

清
實
錄

穆宗毅皇帝實錄(七)

卷三〇二至卷三七四
同治十年至十三年

清實錄

第五一冊

中華書局影印

清 實 錄

(第 五 冊)

穆宗實錄(七)

*

中 華 書 局 出 版

(北京王府井大街 36 號)

北京市中國書店發行

中國建築工業出版社印刷廠印刷

*

787×1092 毫米 1/16 • 60 1/8 印張

1987 年 4 月第 1 版 1987 年 4 月北京第 1 次印刷

印數 0,001—1,500 冊

統一書號: 11018 • 1355—51 定價: 45.00 元

清實錄第五一冊目錄

穆宗毅皇帝實錄(七)

卷三〇二	同治十年正月上	一
卷三〇三	同治十年正月下	一五
卷三〇四	同治十年二月上	三〇
卷三〇五	同治十年二月中	四四
卷三〇六	同治十年二月下	五三
卷三〇七	同治十年三月	六五
卷三〇八	同治十年四月上	八一
卷三〇九	同治十年四月下	九一
卷三一〇	同治十年五月上	一〇四
卷三一一	同治十年五月中	一二六
卷三一二	同治十年五月下	一二七
卷三二三	同治十年六月上	一三五
卷三二四	同治十年六月下	一四九
卷三二五	同治十年七月上	一六一
卷三二六	同治十年七月下	一七一

卷三一七	同治十年八月上	一八八
卷三一八	同治十年八月下	一九八
卷三一九	同治十年九月上	二一〇
卷三二〇	同治十年九月下	二二六
卷三二一	同治十年十月上	二四三
卷三二二	同治十年十月下	二五七
卷三二三	同治十年十一月上	二六七
卷三二四	同治十年十一月下	二七六
卷三二五	同治十年十二月上	二九四
卷三二六	同治十年十二月下	三〇七
卷三二七	同治十一年正月	三三四
卷三二八	同治十一年二月上	三四二
卷三二九	同治十一年二月下	三五〇
卷三三〇	同治十一年三月	三六一
卷三三一	同治十一年四月上	三七七
卷三三二	同治十一年四月下	三八八
卷三三三	同治十一年五月上	四〇〇
卷三三四	同治十一年五月下	四一三
卷三三五	同治十一年六月	四二〇

卷三三六	同治十一年七月上	四三一
卷三三七	同治十一年七月下	四四二
卷三三八	同治十一年八月上	四五七
卷三三九	同治十一年八月下	四六七
卷三四〇	同治十一年九月上	四七八
卷三四一	同治十一年九月下	四八七
卷三四二	同治十一年十月上	五〇二
卷三四三	同治十一年十月下	五一五
卷三四四	同治十一年十一月上	五二五
卷三四五	同治十一年十一月下	五三八
卷三四六	同治十一年十二月上	五五〇
卷三四七	同治十一年十二月下	五六四
卷三四八	同治十二年正月	五八三
卷三四九	同治十二年二月	六〇四
卷三五〇	同治十二年三月	六二五
卷三五二	同治十二年四月	六四〇
卷三五二	同治十二年五月	六五〇
卷三五三	同治十二年六月	六六二
卷三五四	同治十二年閏六月	六七四
卷三五五	同治十二年七月	六八六
卷三五六	同治十二年八月	七〇三
卷三五七	同治十二年九月	七一九
卷三五八	同治十二年十月	七三三
卷三五九	同治十二年十一月	七四九
卷三六〇	同治十二年十二月上	七六五
卷三六一	同治十二年十二月下	七七六
卷三六二	同治十三年正月	七八九
卷三六三	同治十三年二月	八〇三
卷三六四	同治十三年三月	八一三
卷三六五	同治十三年四月	八二四
卷三六六	同治十三年五月	八四一
卷三六七	同治十三年六月	八五八
卷三六八	同治十三年七月上	八七一
卷三六九	同治十三年七月下	八八一
卷三七〇	同治十三年八月	八九〇
卷三七二	同治十三年九月	九〇六
卷三七二	同治十三年十月	九一九
卷三七三	同治十三年十一月	九三〇

金順隨時咨商左宗棠如該堡回眾陽奉陰違仍著該署將軍督兵進剿毋稍遲回致墮奸計現在甯靈一帶已無挾回蹤跡所有招集流亡拊循瘡痍一切善後事宜必須實心任事之員認真經理甯夏道府州縣各官能否勝任著左宗棠隨時訪察並遴賢能守令將地方應辦事務悉心籌畫止分良莠不問漢回務令彼此相安毋任尋仇啟釁左宗棠前奏余彥祿一股已繳械投誠余彥祿亦受傷垂斃並著左宗棠飭令劉錦棠等妥籌安插毋令餘燼復燃余彥祿刻下究在何處著卽查明具奏甘省北路軍務得手恐敗逃餘匪乘隙肆竄或西竄甘涼或北出邊外著左宗棠移圖善派兵分投截剿並著定安督飭纏金磴口各軍嚴密偵探遇賊卽擊毋稍鬆勁將此由六百里各諭令知之以甘肅攻克王疇賊巢提督張曜得旨嘉獎並加賞雲騎尉世職賞署甯夏將軍金順黃馬褂副都

統托雲佈副將李葆珠一品封典遊擊王明泰董大成崔家福沈志高楊壽山陸國鐸都司喬鳳友陳友吉守備胡治國千總孫萬林巴圖魯名號都司丁玉德等花翎餘加銜升敘有差予陣亡總兵官賈蕙山汪德才祭葬世職加等於原籍各建專祠總兵官胡在朝等十七員祭葬世職加等緩徵直隸霸永清高陽天津青靜海滄吳橋南皮開元城大名清豐東明長垣豐潤柏鄉高邑十八州縣被水被旱被雹被蟲地方本年上忙額賦並展緩通三河武清寶坻薊香河保定文安大城新城博野蠡雄安河間獻景故城東光任邱鹽山慶雲平鄉鉅鹿任永年肥鄉雞澤威曲周清河南樂隆平甯晉深饒陽安平三十七州縣歉收地方節年糧租暨民借倉穀○

癸巳

高宗純皇帝忌辰遣官祭

裕陵

上詣

壽皇殿行禮 諭軍機大臣等神機營王大臣奏征兵出口援剿應行籌備各項請飭實力舉辦一摺口外用兵米糧駝馬柴薪帳房等項最關緊要疊經諭令文盛張廷岳等妥為籌備並令福濟等設復臺站俾利師行該將軍等宜如何合力同心認真經理茲覽神機營所奏文盛於應辦各事拘泥前奏不求變通之法即如米糧一項雖由口北道委員採

買究竟如何轉運該都統並未籌有辦法駝隻一項聞參領達密林扎布已向各處措借言明每駝酌給行糧若有缺乏賠補價值該都統以價銀甚多不肯放給致駝隻不能應手官兵出口每人給駝一隻若不籌按站遞換之方必至長途疲乏進退維谷該都統前奏每臺備蒙古包二十三架現聞大者僅容十人小者容三四人亦須趕緊添置庶數官兵棲止各等語口外天氣嚴寒出征士卒必

應優加體恤鼓其勇往之氣豈可顧惜小費因恤兵艱著文盛杜嘎爾悉心商酌蒙古包駝馬等項如須雇賃必當優予價銀並將駝馬如有缺乏作何賠償及分撥各臺如何餵養之處斟酌妥辦以期踴躍集事並著揀派蒙古信服之人勿拘以文法令其辦理駝馬事件以專責成用過各款准歸軍需項下作正開銷所有駝馬鍋帳糧石羊隻柴薪水草等項按臺先為備齊並另撥銀數千兩交杜

嘎爾攜帶前往以備各項短缺之用及雇覓蒙古嚮導之費此次出口各軍未到烏城以前均歸杜嘎爾總統所有未盡事宜該副都統當隨時籌畫與文盛詳酌商辦總期援軍直達烏城不至半途阻滯毋得以文盛職銜在前意存推諉摺內聲稱風聞察哈爾馬隊承領餉銀有每兩官扣六分之一之事並著文盛杜嘎爾嚴查所屬有無侵冒軍餉之員據實奏奏推河以北臺站係錦丕勒多爾濟專責

且該參贊大臣管轄蒙古何至呼應不靈乃為日已久而臺站迄未設復致達爾濟一軍阻於賽爾烏蘇跋前疐後僅因餉絀譁潰錦丕勒多爾濟自問當得何罪著懷遵前旨迅將應設臺站一律設復並將各臺應備駝馬帳房等項籌備周全俾大軍得以速進毋再觀望遷延致干重咎防守庫倫之宣大官兵因各馬隊不能西進現在尚未出境張廷岳阿爾塔什達亦豈得袖手旁觀置之不問至

官軍前赴庫倫烏城後應需馬匹並著福濟榮全錦丕勒多爾濟張廷岳阿爾塔什達等寬為選備如不敷用卽行設法勸捐以備乘騎毋稍遲誤察哈爾庫倫烏里雅蘇台相距雖遠然既同辦一事卽應通力合作察哈爾吉林黑龍江各隊官兵或由賽爾烏蘇徑達烏城或繞由庫倫赴烏無論何路行走總以迅速前進為是該將軍大臣等當以大局為重彼此設法商辦以期援兵早達捍衛邊陲

儻敢自分畛域不顧大局任令官兵濡滯道途以致貽誤戎機惟福濟榮全錦丕勒多爾濟文盛杜嘎爾張廷岳阿爾塔什達是問懷之慎之原摺均著鈔給閱看將此由六百里各諭令知之 甲午

上詣

時應宮拈香 御紫光閣賜蒙古王貝勒貝子公額駙台吉暨朝鮮使臣呼圖克圖等宴並賞賚有差 以神靈顯佑頒科布多

河神廟扁額曰綏邊澤洽 諭軍機大臣等奎昌等奏遵旨籌辦情形一摺前據福濟等奏棍噶扎勒參現有兵勇六百餘名已咨令統帶來烏當諭令妥為駕馭現經奎昌等與之面議將在途之兵七百餘名及索倫一百十餘名均存留用其餘續調各項兵丁令其停止該呼圖克圖所部到烏後人數既多又皆不諳紀律深恐滋生事端著福濟榮全錦丕勒多爾濟懷遵前旨妥為駕馭如不能得

力應如何設法遣撤之處並著妥慎辦理毋令擾害地方該呼圖克圖要求無厭非有大軍前往鎮壓恩威並用恐不足以資控制此時察哈爾等處馬隊必須迅速前進或由賽爾烏蘇徑達烏城或統由庫倫赴烏著福濟榮全錦丕勒多爾濟文盛杜嘎爾張廷岳阿爾塔什達懍遵昨日諭旨速籌辦理至大軍進行尤非速復臺站不可若不趕緊設立並將駝馬帳房等項豫備齊全致誤師行必惟

錦丕勒多爾濟是問至福濟榮全前奏烏城失陷時家屬等殉難及從前塔城失陷時榮全家屬殉難各情著奎昌文碩查明奏請旌卹將此由六百里各諭令知之以故土爾扈特扎薩克貝子烏爾圖那遜子二等台吉精密特襲爵和碩特扎薩克頭等台吉齊默特車林子克什克布彥襲職命赦漢貝子達克沁子二等台吉色丹那木扎勒阿巴噶貝子杜英固爾扎布子二等台吉貢多桑保

在乾清門行走以浙江江山縣捐輸軍餉永廣學額二名緩徵山東臨清濟甯齊東齊河濟陽禹城臨邑長清肥城東阿平陰惠民陽信樂陵商河濱霑化甯陽嶧壽張荷澤曹鉅野濮范觀城朝城茌平厯城青城海豐滕陽穀鄆城蘭山聊城館陶武城魚臺德東平四十一州縣暨德州濟甯東昌臨清四衛被水被旱被蟲地方本年上忙額賦並鹽蘆各項雜課乙未諭內閣曾璧光奏官軍勦

平貴定等處賊巢攻克都勻府城一摺貴州苗逆金幹幹等占踞都勻府城經署提督劉士奇等分軍三路節節進攻平毀賊巢多處斬擒悍賊多名遂於上年十一月初九日將府城克復勒辦尚為得手前署貴州提督古州鎮總兵劉士奇督軍攻勦克拔堅城實屬奮勇可嘉著賞換額騰依巴圖魯名號仍交部從優議敘其在事尤為出力之提督林從太著賞穿黃馬褂總兵何雄輝著以提督記

名簡放並賞穿黃馬褂 諭軍機大臣等曾
璧光奏官軍勦平貴定等處賊巢攻克都勻
府城並丁日昌捐助軍火各摺片都勻府城
為省城至苗疆最要門戶前因羊安各營飢
潰以致得而復失茲經劉士奇等督軍進攻
疊破賊巢遂將該城克復勦辦尚為得手逆
首金幹幹現逃何處未經聲敘刻下軍勢既
振自應乘勝進勦節節掃蕩惟都郡屢為賊
踞此次既經克復必須妥籌善後加意防守

不可再有疏失前據曾璧光奏擬令周達武
馳赴下游與席寶田籌商或進規凱里或由
重安南渡與楚軍夾擊旋據周達武及崇實
吳崇先後陳奏均擬先清上海股匪改從都
勻進兵朝廷雖不為遙制而彼此意見參差
未歸一是必至貽誤事機曾璧光身任封圻
周達武職司專閫均應和衷商辦以策萬全
現在都勻已復楚軍亦攻克台拱軍情旦夕
變遷究應如何進兵之處著曾璧光周達武

悉心籌商奏明辦理嗣後遇有該省軍務仍
著會銜具奏至黔省軍務辦理日久總未大
加振作此時事機稍覺順手即當力籌攻勦
務將該省賊匪限於本年一律廓清不得稍
涉延緩該省餉需未能充裕著該撫設法嚴
催如各該省遲延不解即行參奏並著戶部
將協黔各省餉項嚴催速解以裕兵食江蘇
巡撫丁日昌捐助軍火力顧大局該撫現已
丁憂開缺矣片片奏保勦賊出力之已革各

員內已革知府車尚賢聞其稟緣教士斂弄
是非此等劣員豈得濫行保奏所請著不准
行又片片密陳已革道員多文結案微勞等
語多文係永不敘用之員且經教士胡縛理
代請優獎其為鑽營教士以圖進身顯而易
見實屬卑鄙無恥著不准其保獎將此由六
百里諭知曾璧光並傳諭周達武知之○以
克復貴州都勻府城賞總兵官吳占勝副將
匡國順徐定邦王廷喜萬昌喜參將劉德彰

吳錦堂遊擊宋桂芳張興剛管肇玉都司卜
廣茂守備黃戴才千總韋日昌巴圖魯名號
遊擊李德良等花翎同知趙從陶等藍翎餘
加銜升敘開復有差予陣亡副將張接喜等
祭葬世職加等 以帶隊逗遛革貴州副將
彭萬盛職永不敘用戴榮宗革職留營 予
貴州清鎮陣亡署知縣通判凌蓉第祭葬世
職加等 丙申
上以孟春時享

太廟自是日始齋戒三日 丁酉

世祖章帝忌辰遣官祭

孝陵 追予湖北崇陽陣亡署知縣鈕芳津建

立專祠知縣吳振鏞守備黃鵬程一併附祀

追予湖北武昌陣亡千總韓映奎建立專

祠兵丁等一併附祀 戊戌

上以孟春時享

太廟前期親詣行禮 諭軍機大臣等左宗棠

穆圖善奏賊匪竄擾肅甘郡縣左宗棠豫師

奏賊犯碾伯擊退情形各一摺賊匪於十月
初九日竄入山丹縣城旋即退竄大股直逼
甘郡擾及高臺復有另股盤踞鎮番縣屬之
柳林湖西甯地方又有陝回竄擾此時甘省
北路軍務三在得手賊黨乘西路空虛紛紛
肆擾雖經楊占鼈王仁和等隨時防禦尚恐
兵力不足著左宗棠穆圖善迅速會商派撥
勁旅分紮扼要處所嚴密堵剿毋任賊蹤紛
竄其柳林湖踞匪著穆圖善飭令常明率隊

進剿悉數殲除河狄回匪出擾近省一帶經
副將王得隆帶隊迎剿疊有斬擒仍著穆圖
善妥為布置認真防範署山丹縣知縣張秉
恬因公出城有無捏飾著左宗棠穆圖善查
明具奏撲犯碾伯之賊經參將李春海等督
率團勇擊退據獲賊供稱有由甘涼出口之
語左宗棠穆圖善務當於沿邊一帶設法防
守不得任令竄出邊外致滋蔓延並知照成
祿趕緊派隊兜剿以期聚殲豫師即督飭李

春海等實力防勦一面相機前進馳赴本任會同黃武賢妥為籌辦此次擊退撲犯礮伯賊匪在事出力各員准由左宗棠豫師擇尤保奏將此由六百里各諭令知之又諭據伊勒屯奏巴里坤鎮總兵何瑄袒護已革署遊擊孫淵椿被控各節不遵諭旨復行單銜陳奏該總兵自烏城賊擾後愈加驕恣於一切軍務事件並不商酌辦理請嚴旨懲戒等語巴里坤地方緊要現值西陲軍務未平該

總兵尤當與伊勒屯和衷共濟妥籌布置若如所奏何瑄遇事專擅是該員於軍務地方各事宜甚不得力著左宗棠將何瑄調赴軍營悉心察看據實具奏其巴里坤鎮總兵篆務著左宗棠遴派曉暢營務帶兵得力之員前往接署或即奏請補授以重職守並著一面派往一面奏聞原摺著鈔給閱看將此由六百里諭令知之又諭劉崐奏援黔各軍攻克台水等寨現在勦辦情形一摺席寶田

一軍攻克台水等寨戈鑑一軍攻克九節等寨並追擊竄匪節節獲勝勦辦尚為得手此次出力文武員弁著准其歸於克復台拱寨內崇請獎勵現在雞擺尾猶煩兵力凱里逆酋亦負嵎抗拒席寶田已約戈鑑會攻雞擺尾擬俟該處克復後以次進取高坡凱里俾悍酋巢窟悉由楚軍一律鏟除洵屬勇於任事即著劉崐檄飭席寶田戈鑑等軍實力進攻由雞擺尾埽蕩而前迅殲醜類昨因曾璧光周達武先後陳奏進兵之路彼此意見參差深恐貽誤戎機諭令該撫等將如何進兵之處會商具奏刻下湘軍進勦苗疆事機順利黔省各軍亟應商定進兵之路分投勦辦庶可通力合作以期次第廓清其斬下斬詔雞甲交被巫度交等寨及烏連九連康中烏亥斬衣大田角白韜斬岡董峴九寨先後詣營乞撫劉崐務當飭令席寶田戈鑑妥為安撫毋令再生反側致滋事端將此由六百里

諭知劉崐曾璧光並傳諭周達武知之巴里坤領隊大臣伊勒屯奏烏里雅蘇台城池失陷北路阻塞得旨烏里雅蘇台被賊攻陷後旋即退出現已調察哈爾吉林黑龍江馬隊前往防勦巴里坤防守事宜著伊勒屯認真勦辦毋稍疏虞予貴州龍家坳等處陣亡千總張元明等祭葬世職加等予貴州各屬陣亡殉難知縣曾士珍等紳民婦女三百八十員名口分別旌卹如例

上以次辛祈穀於

上帝自是日始齋戒三日 己亥享

太廟遣享郡王奕譞恭代行禮 遣官祭

太歲之神 諭軍機大臣等據錦丕勒多爾

濟奏上年回匪侵犯烏城福濟並不先事豫防及該城失陷眾皆被害惟福濟得以保全該將軍日夜與賊同居止顧身命將倉庫存項酬謝賊匪所奏賊情語多含混又於厄魯特人眾搶擄驛站牲畜財物並不究辦張廷

岳防勦喀爾喀竄匪時福濟將奏調綏遠城等處兵丁皆令停止現在被擾地方並不設法撫恤又給回兵常安子頂帶使之作為通事任其騷擾蒙古殺害蒙民五人皆置之不理等語前因烏里雅蘇台被賊竄陷該城兵力甚單勢難堵禦尚屬可原業經降旨將福濟等革職留任以觀後效茲據錦丕勒多爾濟所奏福濟謬妄貽誤各節是否實有其事著奎昌馳赴烏城會同榮全逐款查明據實

具奏將此由五百里各諭令知之 庚子諭內閣劉嶽昭岑毓英奏遵查不能勝任之道府據實奏等語除雲南迤西道趙樹吉業經告病開缺外楚雄府知府吳春然才識有限聲名平常著開缺以通判降補 諭軍機大臣等劉嶽昭岑毓英奏官軍攻克竹園賊巢岑毓英奏圍攻激江情形及降人蔡廷棟攜眷私逃各摺片滇省彌勒縣屬竹園地方被賊久踞經總兵張保和等會師進勦連破

上垠下垠逆巢多座擒斬館驛等處援賊甚多立拔竹園老巢勦辦甚為得手竹園地當衝要現經克復而館驛等處賊匪尚未掃蕩該督等現檄張保和署理開花鎮篆著卽飭令迅速赴任督率該處兵團乘此聲威將田心茂克江那里曰者鄉各處賊匪相機分別勦撫早靖東南以便全軍西上合圍大理岑毓英已馳赴澂江攻克附近賊營多座現擬開挖地道進攻著卽督飭各營迅拔堅城毋

稍鬆勁現在雲南軍務日有起色未經收復地方尚有若干各路帶兵將弁某員勦辦何處均著繪圖貼說詳細奏聞蔡廷棟攜眷私逃是否仍回大理馬如龍係派何員看管有無通同情弊著一併查明具奏將此由五百里各諭令知之 又諭蘇鳳文馮子材奏遵查越南夷匪滋事情形蘇鳳文奏官軍勦匪獲勝各摺片此次越南匪徒蘇惻漢劉永幅鄧志雄等向在該國墾田授職俱非吳亞終

之黨現因越南夷官辦理失宜致令羣起為難其匪首曾亞治原係越南積匪又與各匪勾結煽亂夷地白苗復伺隙擾害該國兵力單弱戡定為難必應派兵應援以示矜恤小邦之意况諒山木馬均距廣西邊境非遙尤應妥籌防勦以捍疆圉卽著馮子材刻日馳赴太平統率派出各營相機進勦迅掃賊氛思陵土州等處賊匪現經署知府徐延旭派兵勦捕漸次清釐卽飭團練往襲蘇惻漢坤

光老巢疊挫賊鋒著蘇鳳文飭徐延旭會商夷兵乘勝夾擊以收事半功倍之效白苗巢穴距鎮安所屬邊境不遠仍著蘇鳳文馮子材飭令在防各軍實力扼堵毋稍鬆勁李福泰已由廣東起程該撫接受署篆後所有一切軍情均著與馮子材妥慎籌辦以副委任將此由五百里各諭令知之 以拏獲土匪于廣西同知麥文震以知府用 以雲南攻克竹園賊巢賞遊擊李崇魁巴圖魯名號同

知張來慶都司梁福花翎餘加銜升敘有差
予陣亡參將劉自馨等祭葬世職加等○蠲
緩廣西宣化永瀋新甯歸順武宣柳城崇善
左養利永康天保奉議雒容來賓凌雲橫象
遷江隆安思恩河池臨桂靈川永安貴賓武
緣上林平南桂平三十州縣被擾地方額賦
有差○辛丑祈穀於

上帝遣惇親王奕誼恭代行禮
孝全成皇后忌辰遣官祭

慕陵○蠲緩江西新建進賢清江新淦新喻峡
江蓮花安福永新東鄉樂平都昌建昌安義
德安瑞昌湖口德化彭澤萬安南昌豐城上
高新昌廣昌鄱陽餘干二十七廳州縣暨九
江府同知所屬被水被旱地方新舊額賦並
雜課有差○壬寅諭內閣大學士官文持躬
端謹器量恢宏厯承

先朝知遇由侍衛洊升將軍蒙

文宗顯皇帝優加擢用補授湖廣總督簡任綸

匪特命為欽差大臣督辦軍務與原任湖北
巡撫胡林翼協力同心和衷共濟肅清全楚
復籌辦東征軍務接濟餉需不分畛域厥功
尤多金陵之捷特加恩賞給一等果威伯並
將其木支擡入正白旗嗣令來京供職綜理
部旗事務旋署直隸總督敬厯中外久著勤
勞方冀克享遐齡長資倚畀迺以偶染微疴
遽爾溘逝遺章披覽軫惜殊深著賞給陀羅
經被派惠郡王奕詳帶領侍衛十員卽日前

往奠醑加恩晉贈太保照大學士例賜卹入
祀賢良祠賞給廣儲司銀二千五百兩治喪
任內一切處分悉予開復應得卹典該衙門
察例具奏其一等伯爵著俟伊子榮綵百日
孝滿後由該旗帶領引見承襲無庸俟年終
辦理用示篤眷蓋臣至意尋予祭葬諡文恭
○諭軍機大臣等福濟榮全奏豫籌艱房牲
畜接濟大兵嚴定蒙員告病章程各一摺此
次所調官兵前赴烏城需用艱房牲畜必須

寬為籌辦福濟等現已剗飭喀爾喀四部落趕辦大氈房八百頂驕駝四千隻驕馬八千匹限於三月內辦齊並令豫備驕牛六千頭羯羊十萬隻自本年正月起每月解交牛六百頭羊一萬隻以資應用以上各項定以價值由官發給如各盟汗以下官員等有願捐辦者照章從優請獎即著照所議辦理並著理藩院張廷岳阿爾塔什達催令各該盟長等趕緊照數備辦不得遷延推諉致誤軍需

惟福濟等所籌各項僅備官兵到烏後之用此時察哈爾馬隊已抵賽爾烏蘇因臺站未通中途阻滯後起各隊勢難接續前進錦丕勒多爾濟管轄蒙古責無旁貸著懍遵疊次諭旨將各臺迅速設復並將沿途應需駝馬帳房等項籌備周全俾得暢行無阻儻再遲延觀望致官兵有譁潰之虞恐不能當此重咎也張廷岳阿爾塔什達福濟榮全亦當懍遵前旨合力通籌俾屯紮張家口各官兵陸

續前進毋得袖手旁觀貽誤大局錦丕勒多爾濟現在是否已抵烏城著仍遵前旨與福濟榮全籌辦一切會銜奏事大兵未到以前所有應防處所仍著派委得力之員酌帶蒙古官兵前往扼要防勦至蒙古官員規避差使紛紛呈請病假實屬不成事體著照福濟等所議章程辦理並著理藩院傳諭各該部落一體遵照軍行必需嚮導著即責成車德恩碩多布多爾濟及阿畢爾米特二員多帶

蒙古官兵迎探大軍接引前進俾利師行蒙民假冒賊匪肆行搶掠業經福濟等派員拏獲四人正法仍著隨時認真擒捕以靖地方原摺一件著鈔給張廷岳阿爾塔什達閱看將此諭知理藩院並由六百里諭令福濟榮全錦丕勒多爾濟張廷岳阿爾塔什達知之以鄭親王承志為內大臣博多勒噶台親王伯彥訥謨祜為閱兵大臣以貝勒載治為正白旗蒙古都統撥武備院硬弓五百

張戰箭三萬枝戶部大小彭緞一百匹山西大茶一千塊代煙五千包解赴烏里雅蘇台軍營備用 癸卯

上御乾清宮賜近支親藩等宴○諭軍機大臣等定安奏歸綏軍務較鬆擬將防兵分別撤回一摺甘肅王家疇金積堡剿撫已定余彥祿餘黨亦經劉廷等殲獲殆盡通昌各寨陝回餘孽一律剿清歸綏防務已鬆定安擬將神機營威遠勝字步隊八百名駿驤馬隊五

百名先行遣撤天津洋槍礮隊一千二百名神機營兩翼前鋒八旗護軍營頭二起馬隊一千名續行遣撤卽著照所議辦理惟刻下甯靈軍事雖已稍定而西路賊蹤紛竄尚屬不少仍恐由沿邊一帶出口滋擾該將軍現擬陸續撤回官兵三千五百名自因防軍足資分布著定安督飭留防各軍隨時偵探嚴密防勦毋稍大意並將附近地方土匪游勇認真按捕以清伏莽余彥祿潛遁何處通昌

等堡陝回雖經肅清有無餘匪屯踞並著探明具奏至富勒琿所帶吉林黑龍江馬隊前據定安奏擬俟劉銘傳派兵填紮纏金卽令該副都統赴烏援剿茲據該將軍奏稱該隊所紮地段關繫歸綏甯靈全局樞紐不但不可議撤且不宜輕為調動等語現在烏城需兵甚急仍著定安咨催劉銘傳酌派一軍馳赴該處扼紮以便騰出富勒琿所部迅速起程將此由四百里諭令知之 甲辰

宣宗成皇帝忌辰遣官祭

慕陵

上詣

奉先殿

壽皇殿行禮 直隸總督李鴻章奏擬留總兵官王可陞巡防宣化請飭遊擊徐平川帶兵馳赴庫倫得旨王可陞既不宜遠離宣化卽著嚴飭該總兵認真操練兵勇以固邊圉並檄飭徐平川到庫倫後實力巡防毋稍疏懈

乙巳

上詣

大高殿

壽皇殿行禮。御保和殿賜王以下文武大臣

蒙古王貝勒貝子公額駙台吉暨朝鮮使臣

等宴。午刻奉

慈安皇太后

慈禧皇太后幸漱芳齋。侍午膳。督辦陝西軍

務前任直隸提督劉銘傳奏陝北防務已鬆。

唐定奎一軍暫紮華陰。並籌防勦北山一帶。

得旨著嚴飭各官兵認真防堵。毋稍疏懈。唐

定奎一軍。卽分紮華陰朝邑等處。實力操防。

另備調遣。

大清穆宗繼天開運受中居正保大定功聖智
誠孝信敏恭寬毅皇帝實錄卷之三百二

大清穆宗繼天開運受中居正保大定功聖智
誠孝信敏恭寬毅皇帝實錄卷之三百三

同治十年辛未正月丙午

上御乾清宮。賜大學士尚書等宴。諭內閣軍

機大臣奏本年正月十二日鄭親王承志奉
旨補授內大臣承旨時漏未請旨是否賞戴
三眼花翎。自請交部察議等語。除恭親王文
祥李鴻藻是日未經入直外。寶鋆沈桂芬均
著交部察議。鄭親王承志著照例賞戴三眼
花翎。惟該王於未經奉旨以前擅自戴用。殊
屬非是。著交宗人府議處。諭軍機大臣等。
文麟景廉奏。科城咨請援兵暨關外東西各

路軍務喫緊情形各摺片。文麟等前接科布
多咨文。調軍赴援。業已部署一切。由景廉督
兵前進。自因該處軍情緊急。起見。惟烏里雅
蘇台之賊。早經退竄。且已調派察哈爾等處
馬隊前往防剿。刻下烏科一帶。情形較鬆。景
廉卽著無庸帶兵前往。第安集延回眾。攻破
吐魯番城。另築新城二座。並有往攻烏魯木
齊之信。該回眾恃強攻擊。並無歸順之意。情
殊叵測。必須先事籌防。著文麟景廉督飭兵

勇於西路各要隘嚴密扼守。加意防範。以杜
窺伺。肅州西甯河州碾伯等處。回匪紛竄出
關。玉門一帶。漸有賊蹤。若不設法截剿。必至
絡繹西竄。愈聚愈多。成祿所派之李天和等
三營。現紮玉門敦煌二縣。著卽飭令認真巡
防。遇有口內竄出之賊。隨時堵截。其肅州一
帶。竄匪成祿仍當實力勦捕。毋得任令接踵
西趨。愈形滋蔓。甘肅甯靈一帶。回匪既經分
別勦撫。辦有頭緒。左宗棠務當統籌全局。派

撥勁旅將西竄之賊分投兜剿免致遁逃口外又成不了之局並著文麟景廉嚴飭東路防兵勤加偵探遇賊卽擊毋稍疏懈文麟等所奏委員許登科趙德鈺等採辦駝隻布匹等項均在烏城被賊搶去是否實有其事著福濟等查明咨照文麟等辦理將此由六百里各諭令知之○又諭文麟景廉奏請飭催欠解糧價餉銀並請添撥銀兩各摺片哈密兵丁困苦現值防務緊要尤需各省奉撥餉

銀源源撥解方免困乏之虞著丁寶楨將山東欠解該城糧價銀八萬五千兩迅速籌撥解赴綏遠城一面知照文麟等派員迎提其山西欠解該城餉銀五萬兩據稱如數籌撥尚不敷用著何璟飭令藩司無論何項務將前欠銀五萬兩並添撥銀一萬兩趕緊籌撥尅期解赴綏遠城並知照文麟等派員迎提定安於該兩省餉銀解到時卽交哈密委員管解回城應用將此由五百里各諭令知之

○陝西巡撫蔣志章奏北山逐漸肅清現仍加意防範得旨著檄各路防軍會同劉銘傳各隊認真防堵毋稍大意一面仍撥勦北山餘匪務絕根株並飭地方官將應辦各事悉心經理以靖閭閻○丁未諭內閣隱志郡王之繼福晉薨逝著派總管內務府大臣春佑前往照料一切喪儀著照郡王福晉之例官為辦理○諭軍機大臣等文煜等奏船政大臣因病未能赴工請派員接辦一摺前因船政緊要疊經諭令沈葆楨於百日孝滿後將船政事務照常經理茲據文煜等奏稱沈葆楨百日孝滿後以患病未能赴工呈請代奏等語沈葆楨管理船政已著成效現當工程喫緊之時豈可因病諉卸致誤要工卽著文煜英桂王凱泰傳知沈葆楨趕緊調理其船政事宜仍督飭夏獻綸等認真妥辦並令隨時稟商沈葆楨以昭慎重該前撫一俟病痊卽當迅速赴工照常督率經理用副委任將

此各諭令知之○又諭奎昌文碩奏請飭撥兵赴科防守一摺科布多為西北要區自烏里雅蘇台被賊竄擾後該處人情不無浮動奎昌等以蒙古官兵不能得力非有勁旅彈壓不足以資控制所奏尚係實在情形著張廷岳阿爾塔什達於前調宣化大同兩鎮官兵二千名到庫後卽各撥五百名配齊軍器派員管帶前赴科布多駐紮以資防守所有自庫至科沿途需用馬匹薪糧等項卽著張

廷岳等咨商福濟榮全錦丕勒多爾濟奎昌文碩妥為籌辦宣化大同兩鎮官兵何時出口著李鴻章何璟催令剋期前進並添派副參以下十數員隨同前往科布多聽候差遣科城訓練兵丁需用練兵章程及洋槍隊等項陣圖號令著李鴻章酌量給發並於天津洋槍隊內揀派官二員教習十名前赴科城俾資訓練前項官兵未到以前奎昌等仍當督飭蒙古官兵認真籌防並著隨時咨商福

濟等酌數辦理將此由五百里各諭令知之○賞烏珠穆沁公街頭等台吉堆代扎布輔國公並三眼花翎○以甘肅通昌等處勦辦竄匪出力賞防禦德克德恩佈巴圖魯名號餘升敘開復有差○戊申補鑄安徽鳳陽縣臨淮巡檢印信從巡撫英翰請也○賞江蘇等省庚午科鄉試年老諸生杜鳴岡等一百三十人舉人副榜有差○己酉

上御撫辰殿大幄次賜蒙古王貝勒貝子公額駙台吉暨朝鮮使臣等食○諭軍機大臣等曾國藩奏河運艱難應設法豫籌一摺據稱江北冬漕現遵部議仍辦河運惟運道艱難豫籌應辦事宜五條請飭分投興辦等語漕船經過山東境界計一千數百里中多阻滯以致挽運艱難亟應先事圖維免蹈上年覆轍曾國藩所陳應辦事宜五端關繫河工漕務實因時制宜之策丁寶楨勇於任事必能力任其難著卽按照曾國藩所奏督率沿河

各州縣實力修濬次第興工以期一勞永逸。至張兆棟管理漕務蘇廷魁總轄全河尤當悉心商酌通盤籌畫將曾國藩所陳開挖河道及略改舊章渡黃改道各節迅速會商丁寶楨實力興辦毋得稍存推諉原摺均著鈔給閱看將此各諭令知之○又諭曾國藩奏遵籌日本通商事宜所陳派員駐紮日本約東內地商民一節與李鴻章前奏大意相同至謂明定章程不外體制與稅務兩端仿照泰西之例固無不可但條約中不可載明比照泰西各國總例辦理及後有恩渥利益施於各國者一體均霑之詞以免含混等語所慮頗為周密著李鴻章按照曾國藩籌議各情豫行區畫庶將來該國使臣到後得以因時制宜不至再蹈從前隔閼覆轍是為至要原片著鈔給閱看將此諭令知之○兩江總督曾國藩等奏現在米船將次放洋勢難改章赴通徑交擬先將本年糧米查照向章辦

理俟下屆再行赴通交納下部知之○以鑲藍旗蒙古都統慶春署正白旗蒙古都統○庚戌諭內閣定安奏請將違誤臺站要差之扎薩克等議處仍嚴催趕備駝馬一摺察哈爾所管阿勒台軍臺第二十三兩站幫臺之察克達哈布蘇爾噶差務向由烏蘭察布盟烏喇特東公旗及茂明安兩旗出備烏拉駝隻等項差派官兵前往充當近年以來每多曠誤現當軍務喫緊又不妥速豫備屢經嚴催仍敢任意抗違實屬有心延玩烏蘭察布盟茂明安旗革職留任扎薩克台吉綽克巴達爾琥署烏喇特東公旗扎薩克印務協理台吉噶勒桑色登均著交理藩院議處並著理藩院嚴催該盟長扎薩克等將應行出備阿勒台軍臺第二十三兩站烏拉駝馬及添撥駝隻等項趕緊如數豫備差派妥實官兵剋期前赴各臺支應用濟要需儻再仍前玩誤卽由該盟長呈報理藩院從嚴叅處

以示懲儆。現在庫倫烏里雅蘇台科布多等處均有大兵陸續前進。各蒙古臺站亟應實力整頓。著該將軍都統大臣嚴檄各盟長將應需駝隻等項籌備齊全。俾利師行。○諭軍機大臣等。定安奏請飭副都統回任一摺。據稱歸化城副都統事務繁劇。刻下甯靈軍務已定。後路稍鬆。請飭富勒琿回任等語。著照所請。飭令富勒琿即回本任。以重職守。其留防纏金馬隊。即交薩薩布統帶。責令認真防

範。毋稍疏虞。前據該將軍奏俟劉銘傳之隊一到纏金。即飭富勒琿統帶該兩省馬隊一千二百名取道烏喇特旗馳赴烏境協勦。當經諭令劉銘傳派兵填紮該處。以便騰出吉林黑龍江馬隊起程赴烏。劉銘傳何以久未派撥。著懷遵前旨。迅派一軍馳赴纏金駐紮。毋再推諉。定安俟劉銘傳派兵到後。即飭薩薩布統帶前項馬隊飭赴烏城。毋稍遷延。將此由五百里各諭令知之。以山東武城縣

捐輸團練永廣學額五名。○辛亥

孝穆成皇后忌辰遣官祭

慕陵。○諭內閣都興阿奕慶奏查勘

永陵

昭陵應修各工。請擇吉派員興修一摺。著欽天監於本年三四月內選擇吉期。先行知照。即派都興阿奕慶屆期敬謹興修。嗣後著仍照舊章。

三陵應修各工。估需銀數在萬兩以上者。奏請派員承修。如在萬兩以內者。即由盛京將軍會同工部侍郎辦理。無庸聲明請旨。○又諭巴揚阿等奏移撥江甯駐防官兵辦理情形一摺。據稱荊州移撥江甯駐防官兵五百九十餘員。名於正月起程。該協領等官安土重遷。倍形艱窘。若照部議借支半年俸銀。實屬不敷等語。著照所請。准其再行加借半年俸銀一併照例扣還。以示體恤。○又諭英翰奏甄別州縣各員一摺。安徽撤任天長縣知縣

准補蕪湖縣知縣劉兆彭行止僻謬任性妄為。撤任鳳陽縣知縣候補知縣吳保燮居心狡詐。舉動乖張。無為州吏目徐國楨庸劣不職。願上縣典史姚本初辦事昏憤。試用府經歷李冠羣品行卑污。候補從九品王應昇聲名平常。均著卽行革職。以肅吏治。諭軍機大臣等。蘇鳳文奏會勘夷境賊匪。俟越南咨覆。再行酌辦。及請給發越南米價腳費各等語。前因越南匪徒滋擾諒山等處。當經諭令

蘇鳳文等派兵援勦。現據該夷官來咨。諒山匪徒就撫。自可無煩兵力。其木馬等處另股賊匪。既據奏稱。應如該夷官所請。由該國王商定。再辦。卽著蘇鳳文、李福泰、馮子材。俟越南咨覆到日。再行斟酌情形。妥為辦理。越南應領米價腳費。自應給發歸款。雖據越南國王咨稱不敢具領。然此係該國應領之款。著蘇鳳文等飭令太平府知府知照該國。將前寄北庫銀三萬八千餘兩。仍截存夷庫。以示

體恤。將此由四百里各諭令知之。○壬子。諭軍機大臣等。張廷岳奏因病請假調理。並懇准宣大官兵出口一摺。張廷岳現患瘡疾未愈。加恩著賞假一月調理。以示體恤。庫倫辦事大臣印信。業據張廷岳移交阿爾塔什達接管。遇有軍務緊要事件。張廷岳仍當悉心籌畫。會商具奏。宣化大同兩鎮官兵。前已諭令李鴻章、何璟催令起期前進。庫倫地方防守。亟需兵力。著李鴻章、何璟懍遵疊次諭旨。

檄令該官兵趕緊出口到防。扼要布置。毋得稍涉延緩。此項官兵出口時。著文盛、杜嘎爾將需用駝隻寬為應付。以利進行。並著張廷岳遵照前旨。俟該官兵抵庫後。每鎮各撥五百名。配齊軍器。派員帶赴科布多駐紮。藉資扼守。達爾濟一軍。聞已由賽爾烏蘇西進。所有奉調出口各軍。亟應陸續進發。著文盛、杜嘎爾分別檄催。毋任中途濡滯。將此由五百里各諭令知之。○又諭。劉嶽昭、岑毓英、秦川

邊蠻匪竄擾滇境調兵勦辦一摺雲南昭通屬之永善縣緊連川界與雷波屏山廳縣所屬各蠻僅隔金沙一江現因蠻地飢荒江水低落以致該匪偷渡過江襲踞防兵營碉數座並攻破求雨堡擾至黃果溪出水洞燕家寨一帶勢甚猖獗永善縣城戒嚴劉嶽昭等已調副將劉奇義抽帶勁勇三百名馳往該處聽候總兵李家福調遣以期迅殄賊氛惟大關一帶為迤東孔道且井渡釐金必由之

路一綫餉源關係緊要著劉嶽昭岑毓英一面督飭李家福等剋日進剿一面酌量添撥勁旅以厚兵力庶可盡殲醜類毋致蔓延此次該匪傾巢出擾半多蟻聚川岸若川軍同時並舉則未渡各匪必當迅回老巢而入滇蠻眾不難撲滅著崇實吳棠飛飭雷波屏山附近兵練併力夾擊毋稍玩延將此由五百里各諭令知之○癸丑
孝聖憲皇后忌辰遣官祭

泰東陵○諭軍機大臣等崇實曾璧光奏黔省教案仍照原議歸結一摺黔省教案九起經在事各員與教士李萬美等商議妥協一律議結並由該教士出具甘結照會銷案是民教兩面各無異詞實有完案確據此後遇有中外交涉事件曾璧光務當督飭地方官秉公持平辦理以期永遠相安在事出力之道員余思樞著賞加布政使銜知府馬應鐸著賞加三品銜同知張鴻績著賞加鹽運使銜

州同湯中著俟補缺後以知州用章紹濱著不論雙單月選用副貢生華國輝著賞給五品銜前署遵義府知府汪炳璈前署遵義縣知縣劉肇觀前署遵義協副將梁正春於民教倉卒滋事未能即時解散實難辭咎均著交部議處外委范玉芳把總陳雲龍著一併斥革前署永甯州知州尹樹棠著摘去頂帶一年無過方准開復前署綏陽縣知縣楊嘉禾前署獨山州知州錢壘前署桐梓縣知縣

耿光祺均著交部察議以示勸懲至賠款銀七萬兩已由黔省籌發三千兩其餘六萬七千兩崇實等分咨各省於協黔軍餉內劃撥回因黔省餉需支絀無可應付惟與其令該教士自行走領易滋事端不如由川省先行籌款墊發一面咨催各省於協黔餉內照數提出解還四川較為直捷著崇實吳棠曾璧光斟酌情形設法籌辦將此由五百里各諭令知之○成都將軍崇實陞見以四川總督

吳棠兼署將軍○甲寅諭軍機大臣等文盛杜嘎爾奏籌辦征兵出口事宜覆陳發餉章程並刊刻關防派員隨營各摺片達爾濟馬隊現已行過賽爾烏蘇黑龍江吉林官兵亦卽定期起程文盛等籌辦轉運軍火糧餉豫備駝馬帳房等項添派官兵沿途照料各事宜均尚妥協著卽照所議辦理其自三十二臺並四十四臺通烏庫兩城臺站亦應一體安設駝馬官兵以免阻滯著文盛等卽將所

議章程咨照該將軍等迅速照辦烏里雅蘇台一帶素不產糧軍食必須先事籌備若僅由口北道採辦接運尚恐不敷食用著定安另行採辦米穀就近解至十八臺卽交駐紮該處之參領貢果爾一併轉運其所需糧價或在應解烏城餉銀內截留或由察哈爾撥給卽著定安酌覈奏明辦理各起官兵長途乘騎馬匹不無疲乏到烏後防勦尤資馬力駱駝牛羊亦應寬為籌備文盛等現於察哈

爾八旗三羣軍臺及附近各扎薩克勸諭捐輸按照神機營收捐章程奏請優獎並著福濟榮全錦丕勒多爾濟張廷岳阿爾塔什達於烏庫所屬蒙古各部落廣為勸捐一體准予優獎以資鼓勵文盛於黑龍江吉林馬隊陸續行走後一面卽咨會李鴻章何璟檄飭宣大官兵依次到張家口以便接續前進迅赴庫倫用資防勦杜嘎爾現定於二月十五日起程著准其刊用木質關防所派隨營各

員均著照所請行推河以北臺站刻下曾否設復該官兵等既經先後進發必須迅速烏城不可節節逗遛杜嘎爾起程後著沿途催趙前進並隨時察看情形飛咨福濟等設法妥辦俾利師行如官兵抵烏城所屬臺站該將軍等不能先期籌畫以致節節阻滯必惟福濟等是問錦丕勒多爾濟專管蒙古臺站尤當重處不貸察哈爾開放兵餉前因該官兵未經出境每兩覈減六分是否咨部有案

現在官兵係遠道出征不應再行扣平即當全數發給以示體恤將此由六百里各諭令知之○派刑部左侍郎志和戶部左侍郎潘祖蔭知貢舉○乙卯諭內閣御史吳鎮奏敬陳時政以資治理一摺朝廷綜理庶政首戒因循方今軍務未平民生未裕深宮宵旰焦勞時以逸豫為戒在廷臣工亦當振刷精神上下交儆庶幾政事修明不至漸就廢弛各學教官及書院主講有整飭士習培植人材

之責必須品學兼優方足以資表率著各直省督撫學政隨時察看責令認真勸導講明正學俾士子趨向既端風俗自日臻醇厚至捐納及保舉各員疊經諭令各督撫隨時甄別誠恐視為具文未能破除情面著各直省督撫於屬吏之賢否認真察覈尤當勤於接見遇事講求不得僅以考試文字奉行故事州縣之勝任與否惟在大吏之勸懲循聲卓著之員自應覈實薦舉其有貪污不職罔恤

民瘼甚至激成事端劣蹟昭著者必當分別從嚴叅辦不得稍事姑容以肅吏治將此通諭知之○又諭前因穆圖善奏已革前署甘肅中衛協副將候補參將連慶勒賊出力降旨將該革員開復革職處分仍以參將儘先補用嗣經兵部以連慶前於賊撲勝金關時被叅革職聽候查辦原案尚未到部且該革員奉調赴省日久耽延奏請查明再行覈辦茲據穆圖善查明覆奏連慶被評各款多屬

子虛至該革員赴省遲延亦經查明尚無畏罪延宕情事且疊次守城出力並隨同勦匪屢著戰功尚知愧奮連慶著開復原叅處分並賞加副將銜賞戴花翎諭軍機大臣等左宗棠穆圖善奏分勦竄回獲勝並西路不逞兼顧各摺片西路柳林湖等處賊匪經馬隊連日進勦獲勝東路傅家山等處復經馬步官兵疊次擊敗賊匪並護餉到省著左宗棠穆圖善卽飭派出各軍分路掃蕩毋任蔓延惟敗賊圖竄西甯米拉溝亟應妥籌防範並著檄令西路各軍嚴密布置遇賊卽擊迅掃逆氛成祿一軍前據左宗棠奏無庸出關卽在肅州駐紮與提督楊占鼐會辦一切當諭令成祿就近兼顧肅州與楊占鼐會同擊賊惟沿邊各口賊匪處處可竄成祿等所部未足深恃仍著左宗棠穆圖善隨時酌度情形妥籌兼顧馬化澂投誠後本堡馬械是否呈繳牆垣是否平毀河西等堡及河州西甯

等處賊匪現在如何籌辦王家疇莊已於上年十二月攻克馬化澂等黨眾仍應懍遵前旨辦理著該大臣等迅速詳細具奏將此由五百里各諭令知之○以故圖謝圖汗扎薩克頭等台吉車凌多爾濟子車林多爾濟襲職○閩浙總督英桂陞見以福州將軍文煜兼署總督○以吉林黑龍江馬隊疊次援勦甘肅竄匪出力賞副都統扎拉豐阿委參領德色楞額常壽巴圖魯名號防禦常山等花翎雙德等藍翎餘加銜升敘有差○丙辰以鑲紅旗漢軍副都統岳林署鑲紅旗蒙古副都統○丁巳諭內閣前因定安奏山西委員解到直隸轉解部撥巴哈兩城及烏城餉銀有攙換短少等情當經諭令戶部管庫大臣順天府直隸總督山西巡撫確查具奏旋據該管庫大臣及順天府山西巡撫奏稱銀庫開放此項並無短少攙換情事順天府山西委員領解前往亦驗明毫無破損短少本日

復據李鴻章查明直隸領解各員均係親身押解遞交山西。委無攙短情弊。是此項銀兩開放之日。既屬足數。各省解餉委員亦均交代清楚。何以此次餉銀解到歸綏三十萬兩內。共短大元寶十二箇。又有銅元寶十箇。外長小錠一箇。碎銀四件。十萬兩內。共短大元寶二箇。外長碎銀七件。竟有攙換短少情事。軍餉緊要。豈容任意偷減。仍應嚴切根究。以期水落石出。卽著該衙門再行詳細查務。

得舞弊確情。從嚴叅辦。毋許徇庇。諭軍機大臣等。福濟等奏逆匪復圖回竄。請飭催馬隊並擬調員辦理。口外轉運各摺片。回匪去來靡常。既有正二月間復來搶掠。官廠分撲庫倫之說。並有平羅銅城堡逆匪勾結陝回千餘。攜帶半月口糧。以圖北竄等語。自應厚集兵力。藉資防剿。著文盛、杜嘎爾督催吉林黑龍江馬隊接踵前進。毋稍逗遛。杜嘎爾擬於二月初五日起程。著卽將應辦各事宜趕

緊料理。早日成行。不得再有濡滯。至達爾濟馬隊據文盛奏現已行過賽爾烏蘇。是該總管尚無退縮遷延情弊。福濟等請將達爾濟先行交部議處之處。著加恩寬免。文盛等仍當飭令迅速西行。探明賊蹤。相機迎剿。推河至烏臺站。福濟等總當懷遵疊次諭旨。豫備周妥。俾利師行。不得以緩師無庸赴烏為詞。遂置臺站於不問。錦丕勒多爾濟已回烏城。尤當將蒙古各站極力整頓。毋許推諉。總之

臺站不復。惟福濟等是問。援兵逗遛。惟帶兵各員及文盛等是問。該將軍等當同心協力。共靖邊陲。毋自貽伊戚也。匪徒既有正二月間圖撲庫倫之信。文盛當迅催宣大官兵趕緊赴庫。並知照張廷岳等派員迎提。沿途照料。福濟等擬令馬隊援兵均至哈爾尼敦額爾德尼招推河一帶。會合探剿。於地勢軍情是否相宜。著杜嘎爾行抵該處。會商籌畫。總期於迎剿轉運各事均無窒礙。卽行照議辦。

理朝廷亦不為遙制也。福濟等片稱推河為往來衝道，未便安設糧臺。霍呢齊地尚適中，擬添設轉運糧臺，請飭口北道隨帶委員並張家口現存烏城餉項，迅到霍尼齊辦理接運。酌撥貢果爾馬隊護守糧臺等語。著李鴻章卽飭口北道前往辦理。如該道未能分身，卽由李鴻章何璟各派得力道府，迅既出口接辦，以期無誤要需。將此由六百里各諭令知之。○蠲免直隸安任、隆平、文安、天津、五州

縣被水地方額賦有差，並緩徵新舊糧租暨民借倉穀。○戊午諭軍機大臣等：前因甯夏滿營兵丁乏食，當經諭令山西巡撫於歸綏道所屬各廳酌提倉穀接濟。所需穀價運費均於晉省欠解甯夏滿營餉內扣還。茲據豐紳等奏稱該省將和林格爾廳所撥倉穀八千石按時估價計銀一萬二千二百四十兩，並應需運費腳價銀六千兩，均由本年應撥滿營兵餉內扣除。現在僅撥解銀二千兩，兵

丁情形困苦，請飭將扣除銀兩迅速提交委員管解，並源源撥解餉銀等語。著何璟飭令藩司先將扣除和林格爾廳倉穀米價並運費腳價銀一萬八千兩迅速提出交甯夏委員管解回營。其前項穀價等銀仍歸於積欠餉銀項下覈扣抵銷。晉省每年應撥甯夏滿營餉銀十萬兩，務當按季批解，毋稍短少。將此由四百里諭令知之。○又諭奎昌等奏景廉無須赴援布彥烏勒哲依圖呈懇催兵一

摺，前據文麟等奏科布多咨調援軍已部署一切，由景廉督兵前進，當諭知該辦事大臣等。烏科一帶情形較鬆，景廉無庸帶兵前往。科城人情浮動，亟需勁旅彈壓。業諭張廷岳等於前調宣化大同兩鎮官兵二千名到庫後，卽各撥五百名赴科防守。惟此項官兵到尚需時，著奎昌文碩先就現有兵力嚴密布置，不可稍有疏虞。至布彥烏勒哲依圖以安集延頭人怕夏率眾攻拔吐魯番，現欲攻烏

嚕木齊心懷叵測恐遊牧復遭蹂躪懇請催兵救援現在大兵未到應如何先行設法羈縻妥為撫輯之處著福濟奎昌文碩悉心會商妥籌辦理將此由五百里各諭令知之○又諭奎昌文碩奏撫馭災黎情形一摺綏來縣民人軍功趙興體等於該縣失守後率眾避居沙山子等處能於流離困苦之餘團練殺賊將呼圖壁城攻克實屬奮勇可嘉奎昌等既經發給牛具銀兩以示體恤仍著隨時

派委委員前往曉諭俾該民人等知所感激藉資臂助軍功趙興體董率有方著賞給守備銜並賞戴花翎以示鼓勵其攻克呼圖壁城出力之人即著咨商文麟等會同查明保奏李昶亦著歸入前案出力人員內一併請獎新疆各城自被回匪攻陷以來朝廷因內地軍務未平遽難勤兵於遠每念該處民人慘遭荼毒實堪矜憫現在趙興體等民團既有千餘名河西又有鄉約劉姓民團四百餘

名距烏嚕木齊九十里之南山有徐學功民團五千餘名奇台古城兩處有鄧生玉等民團七八百名是各處民情皆能忠勇奮發踴躍從公正可加之激勵俾遂報效之忱著左宗棠酌量情形或遴派賢能明幹之員輕騎出關或即飭口外鎮道各員將該處民人妥籌安撫以期眾志成城漸奏廓清之效惟所派之員必擇實心任事為該民人所敬服者方有裨於大局該大臣諒早見及此也原摺

著鈔給左宗棠閱看將此由五百里各諭令知之○又諭奎昌文碩奏科布多向來額設承辦兵部戶部理藩院事務章京四員筆帖式三員綏遠城戍守旗兵十七名三年換防一次除承辦戶部事務一缺係用京員其餘員缺皆由換防兵內遞相揀補現在公務殷繁不敷委用請飭派員赴科差委並請略寬其格無論舉貢生員步甲養育兵閒散總以材堪造就為主不必專挑馬甲前鋒等語著

定安迅卽揀派明白謹慎及清漢文理清通字畫端楷者二十名前赴科城交奎昌等差委將此諭令知之○撥山西火藥一萬斤鉛丸一萬五千斤火繩一萬五千丈解赴甘肅甯夏滿營備用○已未

孝儀純皇后忌辰遣官祭

裕陵○諭內閣榮頤等奏

西陵正紅門外

神道石碑樓東次間額枋壓裂情形較重若再

設法保護難以經久等語著本年承修另案工程大臣敬謹詳細查勘奏明辦理○又諭前據理藩院奏甯夏理事司員玉敏呈訴阿拉善親王貢桑珠爾默特私設堆廳等款請飭甯夏將軍就近傳訊茲據該署將軍豐紳訊明具奏此案貢桑珠爾默特於蒙民交涉事件並不隨時報明立案輒私立堆廳擅用繩鎖拷鑠並派達爾古俞甲木岑田志護衛宋元等審辦案件實難辭咎司員玉敏經年

駐紮山後定遠營並不早回甯夏辦理公事亦有不合貢桑珠爾默特玉敏均著交該衙門議處○諭軍機大臣等前因戶部奏大婚禮應用綵緇款項按照例價增價共撥銀三十九萬一千七百兩當經諭令曾國藩等按照該部單開各數速行撥交各該織造趕辦茲據忠誠等奏邇年以來綵價昂貴遵照浙江巡撫具奏市價經部議覆覈減准照八年報銷之案覈實估計統計綵緇十萬匹共需銀五十一萬一千八百餘兩開單懇請添撥銀兩一律照辦等語著戶部按照該織造等單內所開數目迅速覈議添撥銀兩以便趕緊開工織辦並著曾國藩張之萬楊昌濬確查各該省現在經緯時價據實奏報以昭覈實忠誠德壽茂林一面將奉派綵緇按照工部原奏數目剋期興辦不得稍有遲誤將此諭知戶部工部曾國藩張之萬楊昌濬並傳諭忠誠德壽茂林知之○吏部尚書單懋謙

因病乞假以工部尚書毛昶熙兼署吏部尚書都察院左都御史龐鍾璐兼署刑部尚書○庚申諭軍機大臣等張兆棟蘇廷魁丁寶楨奏遵旨會勘張秋築隄束水費鉅害重現籌保護挑濬一摺張秋築隄束水既經張兆棟等會同查勘情形礙難辦理現擬將沮河頭車家樓民埝堵塞添築攔壩圈隄並將鄆城屬之七里鋪民圩隄埝加築堅厚添鑲護埝其八里河臨河民埝及王家垓兩處分別

添築內隄大壩所籌尚屬周妥丁寶楨蘇廷魁已派令趙新王化堂等分赴各該處購料興工剋期辦理惟黃流變遷靡常必須就目前水勢地形熟籌審辦方不至虛糜工費徒託空言張兆棟蘇廷魁專理漕河丁寶楨身任地方均屬責無旁貸即著飭令派出各員實力興辦總期於漕船未到之先一律修濬妥協免致臨事張惶以重漕務將此各諭令知之○緩徵兩浙錢清西興橫浦浦東四場

歛收地方新舊竈課錢糧

大清穆宗繼天開運受中居正保大定功聖智誠孝信敏恭寬毅皇帝實錄卷之三百三

大清穆宗繼天開運受中居正保大定功聖智
誠孝信敏恭寬毅皇帝實錄卷之三百四

[illegible]

同治十年辛未二月辛酉朔春分朝

日於東郊遣鄭親王承志行禮。

上詣鍾粹宮問

慈安皇太后安長春宮問

慈禧皇太后安至庚寅皆如之奉

慈安皇太后

慈禧皇太后幸漱芳齋侍午膳
壬戌遣官祭

黑龍潭

昭靈沛澤龍王之神玉泉山

惠濟慈佑靈瀆龍王之神昆明湖

安佑普濟沛澤廣生龍王之神密雲縣白龍潭

昭靈廣濟普澤龍王之神遣官祭圓明園

惠濟祠

河神廟
(諭內閣)左宗棠等奏平毀金積堡

賊巢首要各逆伏誅甯靈肅清出力各員請

獎一摺甘肅回逆馬化澂等於同治八年秋

間擁眾復叛盤踞靈州所屬金積堡老巢句

結陝甘各回四出竄擾經左宗棠派軍分投

截勦節節埽蕩並令道員劉錦棠等進擣逆

巢壘將附近賊壘攻破。四面鎖圍。該逆勢窮。

乞撫勒令平毀堡寨呈繳軍械猶敢遷延觀

望並於堡內埋藏洋槍洋礮一千餘件匿不

繳出是其心懷叵測怙惡不悛實屬罪無可

追現經劉錦棠等將首逆馬化澂父子兄弟

及逆黨譚生城等概行正法洵足以申天討

而快人心現在堡寨一律平毀餘眾分別安

插其起獲銀十九萬兩零除分賞各軍外著

左宗棠將所餘銀兩為遷居靈州之回眾購辦賑糧俾安生業仍督飭各軍將各股回匪次第進剿以期全省廓清陝甘總督一等伯左宗棠運籌決勝調度有方著加恩開復降三級留任處分並加賞一騎都尉世職甯夏將軍穆圖善陝西巡撫蔣志章協籌防剿均合機宜穆圖善著交部從優議敘蔣志章著交部議敘道員劉錦棠接統湘軍克平巨寇著加恩賞給雲騎尉世職並賞穿黃馬褂所

有尤為出力之道員黃鼎著賞穿黃馬褂提督雷正綰著開復革職留任處分並照一等軍功例從優議敘另片奏已革布政使銜山西按察使陳湜委辦金積堡事宜勞績卓著等語陳湜著開復原官原銜以示鼓勵○又諭左宗棠奏安插陝西就撫回眾請增設官員以資鎮撫一摺陝西就撫回眾一萬有奇除該親屬認領外共男女九千四百餘名口均安插華亭縣化平川地方經該督飭令道

員馮邦棟前往散給賑糧丈量地畝按戶分撥房屋窯洞並購給籽種酌發耕牛贏驢督其開墾播種辦理均屬妥協著該督飭令總兵喻勝榮等妥為彈壓一面檄飭該地方官加意撫綏毋使失所遇有詞訟案件止分曲直不分漢回總以持平辦理毋任稍滋事端其所請添設化平川廳通判化平營都司各缺著該部議奏尋議該督因撫馭回眾請添通判都司各缺係為綏靖地方因時制宜起

見應如所請添設從之○又諭左宗棠等奏訊明已革知縣通賊確情盡法懲治等語甘肅已革前甯夏縣知縣署靈州知州彭慶章數年以前已有通回情事嗣復久留賊中為賊主謀經左宗棠親提研訊據供各情其為通逆無疑喪心昧良罪無可逭彭慶章業經訊明正法實足以昭炯戒至從逆武弁王錫爵鐵秉忠著左宗棠一併提訊從嚴懲辦尋奏遵訊王錫爵鐵秉忠先後投賊屢抗官軍

實屬罪大惡極業於訊明後正法報聞 又諭楊昌濬奏甄別庸劣各員請旨分別降革勒休一摺浙江義烏縣知縣于應誥心地糊塗辦事麤率候補通判張玉樹居心險詐不堪造就紹興府經歷蕭江遇事生風聲名甚劣均著一併革職桐鄉縣知縣富拉渾貌似有才心實浮滑候補知縣汪承緒舉動任性不洽輿情均著以縣丞降補太平縣知縣劉福田辦事遲鈍難期振作該員文理尚優著

以教職回籍候選候補知縣黃宗貴年力就衰難膺民社候補知縣濮榮才本平庸年已衰邁均著勒令休致以肅官方 諭軍機大臣等左宗棠等奏平毀金積堡賊巢安插陝西撫回李德昌前赴河州諭撫回眾東西兩山捕斬要逆各摺片金積堡首要各逆馬化澂等均已伏誅甯靈肅清本日已明降諭旨將左宗棠等及出力各員分別加恩獎勵矣章合才等十二員統帶湘軍異常出力此次

所有勞績著左宗棠先行擬請獎敘仍著該大臣存記俟甘肅全省廓清再行奏請恩施化平川安插陝回各事宜左宗棠所籌均臻周妥惟回俗素畏頭目而誦經祈福之阿渾尤易蠱惑愚蒙著該大臣慎選地方官隨時化導加意拊循務令各安生業以免再滋事端東西兩山及會甯安定等處最易藏奸除已擒斬要逆多名外其未獲逆目狗齒牙子等該大臣卽嚴飭魏光燾等認真擒捕毋任

一名漏網李德昌求赴河州諭撫馬占鰲馬丕太及崔禹等逆左宗棠現今李德昌前往但聽其自投不許招致該大臣總當察看該逆等虛實情形穩慎以圖如該逆仍怙惡不悛務當嚴飭各將領乘此軍威進剿河狄西甯各逆巢以次蕩平毋得一意主撫致為該逆所紿移圖善亦當檄飭近省各軍聯絡聲威俾得膚公早奏近聞周開錫在南路勦匪辦理一切輿論未協且與甘省各勇營不相

輯睦恐激事端左宗棠當隨時查察不可信
任過專致誤事機現在鞏秦各屬有無大股
賊匪北路既已肅清該大臣應進紮何處抑
赴省垣居中調度如統師前進後路尤當妥
為布置並著蔣志章會商劉銘傳將陝甘毗
連各要隘嚴密扼堵毋稍疏虞將此由六百
里各諭令知之○以甘肅平毀金積堡賊巢
賞提督陳廣發蕭元亨陳啟明李勝本張拔
萃正一品封典副都統雙壽提督金運昌徐

占彪王鳳鳴方庭芝黃馬褂總兵官黃祖福
副將陳登雲黃得勝彭清和馮南斌參將龍
得勝李登高陳締高遊擊鄭朝剛李洪超黃
兆熊守備吳元璋巴圖魯名號外委李勝忠
以守備用並賞花翎餘加銜升敘有差○予
甘肅金積堡等處陣亡提督周國勝等七十
二員祭葬世職○予故前任雲貴總督吳振
棫祭葬如例予山西故大學士祁寯藻入
祀鄉賢祠從巡撫何璟請也○蠲緩江蘇上

元江甯句容溧水高淳江浦六合山陽阜甯
清河桃源鹽城安東高郵泰東臺江都甘泉
儀徵興化寶應銅山豐沛蕭礪山邳宿遷睢
甯海沭陽贛榆通泰興海門三十五廳州縣
暨淮安大河揚州徐州四衛被水被旱地方
上年漕糧額賦蠲緩江蘇長洲元和吳吳
江震澤常熟昭文崑山新陽太湖華亭婁金
山青浦武進陽湖無錫金匱江陰宜興荆溪
丹徒溧陽太倉鎮洋嘉定靖江奉賢寶山二

十九廳州縣暨蘇州太倉鎮海金山鎮江五
衛被水被旱地方節年民欠租賦癸亥遣
官祭

文昌帝君廟諭內閣何璟奏特參庸劣衰
老各員請旨分別勒休降革一摺山西太原
縣知縣沈廷樞性情猥鄙公事顛預不恤民
隱洪洞縣知縣張維藩操守平常志氣昏惰
嗜好甚深試用知縣丁慶榮貪鄙輕浮不知
檢束陽曲縣縣丞李銘燕志趨卑陋不守官

歲均著卽行革職試用知縣倪燮榮才品卑庸難膺民社著以府經歷縣丞降補陽高縣知縣臧叔顯年力衰頹難期振作著勒令休致以肅官方○諭軍機大臣等金順奏進規通貴回堡並殲除通昌堡首惡情形一摺河西通昌一堡著名首逆殲戮殆盡著金順會商張曜督飭官軍認真搜捕餘匪務絕根株至回目金萬良來營乞撫該署將軍仍當隨時察看不可墮其詭謀通貴堡回逆始則遣

黨乞撫及令其平牆繳械則又枝梧猶豫其非真心反正已可概見現經金順會商張曜移營進逼該堡卽著激勵將弁乘此聲威迅速進攻掃除醜類不可一意主撫致將來又生反側該逆被勦窮蹙難保不乘間竄出邊外以覓生路著金順與張曜督軍嚴密防維務須就地殲除毋令遠遁他處又貽後患前據福濟等奏平羅銅城堡逆匪勾結陝回千餘欲圖裹糧北竄並著檄令提督劉廷等扼

要嚴防截其竄路以免蔓延昨據左宗棠等奏報金積堡業已平毀馬化澂等均經伏誅當此軍威大振之時羣醜自必震懾該署將軍當同心協力將北路殘匪剋日掃蕩以期次第廓清將此由六百里諭令知之○又諭張廷岳等奏籌辦援兵需用各項請飭撥餉銀軍火並喀爾喀東兩部落協理將軍暫緩赴烏換班各摺片征兵需用米糧最為緊要張廷岳等以庫倫採辦維艱派員赴張家口

購買文盛何以輒稱差役紛繁概難支應遽行咨覆仍著該都統於庫倫委員到口呈報採辦齊備時寬為應付駝隻俾源源運解兵食不至缺乏不得再行推諉出口官兵需用駝馬必須速為籌備參領達密林扎布於蒙古情形最為熟悉其所籌措借應用一節係變通辦法頗屬可行前據文盛等奏該員因患病暫派章京噶勒桑車林帶領官兵代辦一切現在曾否就痊仍著文盛等責成該員

一手辦理以期呼應較靈易於集事察哈爾馬隊業已行過賽爾烏蘇吉林黑龍江馬隊亦已先後起程惟聞哈爾尼敦推河一帶臺站應需支應各項仍未齊備設官兵中途阻滯貽誤非輕著福濟榮全錦丕勒多爾濟懍遵疊次諭旨飛速籌辦俾利師行杜嘎爾業經定期起程即著督飭官軍星速進發沿途偵探賊蹤相機截擊俟行抵烏境應於何處紮營防剿即行咨商福濟等妥為籌畫宣化

大同官兵定於何時出口著文盛咨催接續進發所需駝馬帳房等項既經張廷岳等豫為籌備自可無虞缺乏俟該官兵到庫後仍遵前旨分撥一千名馳赴科布多防守至察哈爾官兵發給餉銀前已諭令文盛等每兩毋庸減平六分庫倫官兵餉銀亦應一律全數開放無須再行扣平以示體恤張廷岳等以宣化大同官兵指日到防餉項不敷支放請飭撥部庫銀二十萬兩著戶部議奏庫城

火藥將次用竣著神機營王大臣籌撥火藥五千斤轟藥五百斤由張廷岳等派委妥員前赴神機營領運回庫以濟要需本年夏秋季輪應車臣汗圖謝圖汗兩部落赴烏住班既據張廷岳等奏稱現值防堵喫緊該協理將軍和貝等均屬帶兵得力未能赴烏等語著福濟即咨行西兩部落就近直班其東兩部落協理將軍等俟軍務稍鬆再行照常輪班赴烏將此諭知神機營戶部並由六百里

諭知福濟榮全錦丕勒多爾濟文盛杜嘎爾張廷岳阿爾塔什達知之以陝甘候補總兵官羅營卿為甘肅肅州鎮總兵官擢直隸易州營遊擊張得祿為廣東高州鎮總兵官
甲子遣官祭
先醫之神遣官祭昭忠祠諭內閣前因蒙古台吉布彥烏勒吉呈控哲里木盟長扎薩克達爾漢親王索特那木彭蘇克及其子棍布旺吉勒倚勢陵虐各情經都興阿說明

請照眾供確鑿擬結當諭令都興阿將布彥烏勒吉七十九烏勒吉布彥三名解送理藩院並令該衙門將索特那木彭蘇克等應得處分查例定擬具奏茲據理藩院奏稱都興阿未將該王父子提傳面訊又未取具確切親供遽以眾供確鑿率行擬結既不足以折服被告之心亦恐啟聚眾誣陷之漸請仍飭該將軍提案覆訊等語此案經都興阿錄供咨送其原告布彥烏勒吉等亦已解送到京

本可查例定擬惟既據理藩院奏恐不足以折服其心即著將所控各節再行詳細研訊索特那木彭蘇克現已病故著理藩院傳知卓哩克圖親王濟克登旺庫爾俟棍布旺吉勒百日孝滿後提交都興阿派員迅速解送理藩院歸案對質仍遵前旨按例定擬具奏其餘一千人證著無庸解京以免拖累○又諭額勒和布德椿奏查明治中叅款請飭吉林將軍查奏一摺據稱前選奉天府治中齊

鶴松被御史鄧慶麟奏叅各款現經吏部查當將該治中撤任查訊據齊鶴松聲稱該員係直隸昌黎縣人已故父兄向在吉林長春廳開設萬慶棧店曾有鄧姓私造假契串詐構訟吉林有案可查奉吉地屬兩省例無迴避明文並非有心隱匿御史鄧慶麟係挾仇叅奏等情奉省無案可稽虛實難以懸揣應由吉林將軍查辦等語著奕榕確切查明詳細覆奏務期水落石出毋稍徇隱○乙丑

諭軍機大臣等前因周開錫辦理甘南軍務恐不得力諭令左宗棠隨時查察毋誤事機並令查明鞏秦各屬有無大股賊匪當此北路肅清南路防勦事宜甚關緊要朝廷實深廑繫近聞河州回匪三千有餘已於去臘潛越洮河竄至岷州與官軍接仗復竄鞏昌阜陽川一路向東分股肆擾距秦州數十里之平南川娘娘壩鹽關李子園等處時有賊馬搶刦殺傷百姓岷州叛勇仍與官軍相持抗

未就撫似此情形軍務尚無了日鞏秦為甘省完善之區前此並未大遭蹂躪乃自周開錫總統南路諸軍既不能禦外來之匪任其奔突又激變范銘之勇致與官軍為仇長賊勢熾若不及早廓清又成燎原之患著該大臣乘此北路肅清迅將南路鞏秦一帶悉心布置盡殲醜類范銘現在何處其所帶勇丁有不法者亟應嚴懲有可用者即應留以勦賊並非楚勇之外皆為不可用之勇且楚勇

中亦未必無他省勇丁參雜其間所有范銘營勇應如何分別措置之處該大臣當秉公辦理毋得誤聽一面之詞以致債事將此由五百里諭令知之又諭劉銘傳奏纏金道路隔絕賊勢現在趨重南路仍難分兵請飭定安就近撥隊一摺據稱河州回匪竄至鞏昌阜陽川一路長驅東下分股肆擾秦州境內時有賊馬游掠岷州叛勇雖經議撫抗拒如故若該逆更向東竄唐定奎所部即須移

向汧隴以固陝防此外仍無可撥之兵且纏金距陝甚遠懸軍遠隔轉運艱難現聞河水已開北路兵力足資展布請飭定安由河防內撥軍駐守纏金或由定安指派段落交該提督撥兵替守以便定安騰出隊伍撥軍赴烏等語南路回匪叛勇接踵紛乘陝防實關緊要劉銘傳所籌各節於接替轉運尚屬相宜即著定安斟酌軍情會商劉銘傳妥籌調派以便薩薩布統帶馬隊迅赴烏城其汧隴

一帶防務劉銘傳務當勤加偵探先事豫防毋稍疏忽將此由五百里各諭令知之予故廣東廣州府知府升任巡撫吳昌壽入祀名宦祠從巡撫李福泰請也

上以祭

社稷壇自是日始齋戒三日丙寅諭內閣醇郡王奏據副都統德懋面稱翼尉文秀向該副都統言及該王馬圈設局聚賭有馬賊窩主高三亦在其內又稱管馬圈護衛一員及

已經逐出太監一名並該副都統家人劉得祿暨察杭阿家人均干預正黃旗滿洲甲米事務與該參領等聯成一氣剝削兵食等情經該王查訊護衛春慶等實無設局賭博結納匪人情事傳訊文秀茫然不知各情並經步軍統領衙門訊明鬧市口高三卽高勝一名並無不法形跡其干預甲米一節亦經該王傳集正黃旗參領等訊究僉稱並無其事請飭分別辦理等語著德懋先將家人劉得

祿送交刑部審訊該副都統所指醇郡王府結納匪人干預米務之護衛究係何人高三為馬賊窩主並在馬圈賭博有何證據著逐款據實覆奏毋稍含混其察杭阿家人是否干預米務並著德懋察杭阿明白回奏又諭前據魁玉張之萬奏審明馬新貽被刺一案將兇犯張汶詳比照大逆問擬案內人犯分別定擬罪名並請將馬新貽照陣亡例議卹建祠當以案情重大該犯所供各節恐尚

有不實不盡特派鄭敦謹前往會同曾國藩再行研究實在情形從嚴懲辦並據給事中劉秉厚等太常寺少卿王家璧先後奏請嚴究主使情節復經諭令鄭敦謹曾國藩等悉心推鞠務得確情以成信讞茲據鄭敦謹曾國藩奏覆審兇犯行刺緣由並無另有主使之人請將該犯仍照原擬罪名比照謀反叛逆凌遲處死並摘心致祭各等語此案兇犯張汶詳以漏網髮逆復通浙江南田海盜因

馬新貽在浙江巡撫任內戮伊夥黨甚多又因伊妻羅氏為吳炳燮誘逃呈控未准審理其在新市鎮私開小押適當馬新貽出示禁止之時心懷忿恨竟敢乘間刺害總督大員實屬罪大惡極既據鄭敦謹等審訊確實驗明兇器亦無藥毒並無另有主使之人著卽將張汶詳凌遲處死並於馬新貽柩前摘心致祭以彰國法而慰忠魂其子張長幅著照所擬按例懲辦該故督公忠體國歷次勦辦

海盜殲除積年匪首地方賴以安靖詎以盜匪遺孽挾仇逞兇倉卒殞命實堪悼惜前已有旨將馬新貽照總督例賜卹入祀賢良祠著再加恩照陣亡例賜卹並於江甯省城建立專祠用示篤念蓋臣有加無已至意記名總兵前署督標中軍副將喻吉三武巡捕儘先遊擊葉化龍把總唐得金千總費善樂馬兵冉雄彪等失於防護咎有應得喻吉三著革去提督銜降二級調用葉化龍著降二級

調用唐得金等均著斥革以示懲儆諭軍機大臣等前因魁玉張之萬奏審明已故兩江總督馬新貽被刺一案因漏網海盜張汶詳挾仇行刺並風聞浙省刺案尚不止一起粵省又有持刀入署之案當經諭令瑞麟楊昌濬飭屬查拏懲辦至所稱長江水師船隻太小近海之地不能得力如長江至江陰以下現時礮船卽難駕駛尚須酌添輪船簡練水師廣募慣習風濤熟於沙綫之士並修復

海口及沿江礮臺輔以陸軍無事則專司控捕有事則嚴扼邊防等語著曾國藩文煜英桂瑞麟張之萬楊昌濬王凱泰丁寶楨斟酌情形於各該省濱江濱海地方嚴密布置妥籌備禦以靖疆圉而息盜風本日據鄭敦謹等奏與兇犯張汶詳同夥之浙江南田海盜龍啟灃等請飭嚴拏等語著楊昌濬按照該尚書等咨拏各犯飭屬嚴拏務護究辦毋任一名漏網將此各諭令知之琉球國王尚

泰遣使表貢方物賞賚筵宴如例丁卯以京畿雨澤愆期

上詣

大高殿祈禱行禮遣惇親王奕訢詣

時應宮恭親王奕訢詣

昭顯廟醇郡王奕譞詣

宣仁廟孚郡王奕譔詣

凝和廟拈香

孝淑睿皇后忌辰遣官祭

昌陵 祭

先師孔子遣戶部尚書寶鑒行禮 諭軍機大臣等文盛等奏遵飭援軍分起前進一摺總管達爾濟所帶官兵已抵哈爾尼敦交界乘騎駝隻均皆疲乏業經文盛等咨催福濟等將應需駝馬派員解往應用並據達爾濟探聞逆匪勾結陝回意圖北竄援軍自應迅速前進以備攔勦疊經諭令福濟等將哈爾尼敦以西臺站趕緊設復何以尚未備齊軍

行人數較多非尋常遞送文報可比必須將需用各項豫備齊全方不至中途阻滯現在黑龍江吉林馬隊均已分起出口設達爾濟之隊稍有停留則後起各隊勢必節節梗阻福濟等但知催軍前進而於臺站應需支應各項並未籌備周妥實屬不知緩急著福濟榮全錦丕勒多爾濟迅將所屬各臺備齊並籌撥馬一千匹卽行派員解交達爾濟分給官兵乘騎以利進行並著文盛杜嘎爾催令

達爾濟設法前進不得藉口於臺站未備稍沙遠延杜嘎爾已定於二月十五日起程著卽督飭黑龍江吉林馬隊接續進發早抵烏境相機防勦其大同宣化官兵隨後分起出口文盛亦當趕為整備催調啟行並著張廷岳阿爾塔什達派員迎提照料一切俾得早達庫倫將此由六百里各諭令知之 琉球國使臣楊光裕等三人於神武門外瞻覲 戊辰祭

大杜

大樞遣怡親王載敦恭代行禮 諭內閣副都統德懋奏遵旨明白回奏一摺據稱前與醇邸王面稱各節係家人于兆喜聞之翼尉文秀該副都統因向醇邸王請示訪查于兆喜業經病故無從質證至家人劉得祿現在畏罪潛逃請飭嚴拏等語著步軍統領衙門順天府五城一體嚴拏劉得祿務獲送交刑部審訊德懋於家人逃匿不能知覺著先行交

部議處。察杭阿奏遵查家人實無干預甲米情事。取具該旗參領等甘結鈔錄呈覽。一摺。著刑部於劉得祿拏獲到案時。一併查訊具奏。尋兵部議。德懋應照旗人犯罪該管官看守不嚴例降一級留任。得旨著不准其抵銷。又諭。巡視西城御史賈瑚奏同城御史拏犯未經會商。據實陳明。一摺。據稱西城副指揮王翊宗持御史錫光手寫字條往拏北城地面居住之魏禿子一名。經賈瑚飭令該副

指揮俟訪查確實再行拏辦。乃錫光不候會商確查。遽行飭拏。單銜奏交刑部審訊。實與向章不合等語。此次御史錫光飭拏魏禿子一犯。雖據聲明該犯並非居住西城地面。是以未與賈瑚列銜。惟飭拏人犯未經會商。查明辦理。究屬不合。錫光著交部察議。諭軍機大臣等。李鴻章奏霍呢齊地方接運事宜。無庸另行派辦。並宣大官兵不宜分撥一摺。據稱口外各臺籌辦接運。文盛業已布置周

密霍呢齊係二十五臺。尚是察哈爾所轄。即在文盛籌辦接運之內。此時各軍糧食。既由張家口糧臺採辦。沿途各臺接運。應責成貢果爾一手經理。未便另由內地派員往辦等語。口外應設分局。本由文盛派員經管。霍呢齊既屬察哈爾所轄。該處接運事宜。文盛應早顧及。即不必再議。更張李鴻章所奏。與現在辦法是否相符。著文盛杜嘎爾隨時斟酌情形。會商李鴻章妥為辦理。總期無誤。師行

哈爾尼敦以西臺站。仍著福濟等懍遵疊次諭旨。趕緊設復。一律齊備。毋再遲誤。至宣大官兵到庫後。前諭各撥五百名赴科。李鴻章以兩處分撥。統帶之員既難兼顧。分運糧餉又多輻輳。不如以大同兵駐科。宣化兵駐庫。較為妥便。所奏甚合機宜。著張廷岳阿爾塔什達遵照。此次諭旨將宣化兵一千名留駐庫倫。其大同兵一千名全數撥赴科城。並著定安何璟飭令歸化轉運局員迅將該官兵

糧餉軍火就近運赴科城以資接濟另片奏
遵派官弁教習並備送陣圖營制赴科等語
著李鴻章飭令該弁任得魁等帶同教習十
名迅速起程文盛杜嘎爾轉飭各臺照料前
進抵科後即著奎昌文碩照章酌加該官兵
口分飭令認真教練以資得力將此由五百
里各諭令知之 又諭劉坤一奏拏辦閩省
逃匪現飭勒拏首犯等語福建崇安浦城交
界之黃柏山下聚匪多人經該處官兵拏獲

供稱首犯張燮俚朱葛亮即周惘良等聚集
江西鉛山之十三都地方希圖起事劉坤一
飭令知府蔣繼洙等嚴密搜捕拏獲匪黨裴
教化一名此外並無匪徒聚集並經知府許
應鑾於東鄉境內拏獲由閩逃回匪犯邱連
俚等多名惟張燮俚周惘良二犯現均在逃
未獲並據各犯供稱平日在鉛山縣及福建
崇安浦城等縣紙廠傭工被誘結拜兄弟各
情亟須嚴拏懲辦著文煜英桂王凱泰劉坤

一各飭所屬地方文武實力搜拏務將張燮
俚周惘良等犯悉數拏獲究辦不准一名漏
網並責成該處紙槽廠戶不得容留匪類並
嚴束工人毋任煽惑以靖地方而遏亂萌將
此各諭令知之 己巳遣官祭

關帝廟 諭內閣昨據御史賈瑚奏同城御
史錫光拏犯未經會商當經降旨將錫光交
部察議茲據錫光奏稱此次拏獲魏禿子一
犯曾與賈瑚面商在先賈瑚恐有妄拏處分

又非本城地面不肯列銜是以單銜具奏等
語錫光賈瑚各執一詞是非均應剖別著都
察院堂官確切查明據實具奏 又諭前據
李瀚章郭柏蔭奏湖北漢黃德道員缺揀調
無人請以李明墀補授是缺經吏部議以與
例不符駁令另行揀員請補茲據李瀚章郭
柏蔭奏稱湖北實缺道員中實無堪調是缺
之員漢黃德道政務殷繁且有中外交涉事
件李明墀現署是缺熟悉情形請仍以該員

補授等語著吏部議奏另片奏漢黃德道一缺請查照題調要缺之例先儘實缺揀調如無員可調或以候補道員請補或以現任知府請升或酌保數員開單請簡等語道府員缺或題或調均有定章所請酌保數員開單請簡之處殊於定例不合著毋庸議其請變通漢黃德道章程或以候補道員請補或以現任知府請升之處著吏部議奏又諭李瀚章奏提督郭松林因母病請假歸省等語

提督係專閫大員湖北地方操防尤關緊要郭松林因母病請假原無不可惟應奏明請旨或由督臣奏請俟給予假期後方准起程乃該提督不候諭旨輒即回籍實屬非是郭松林著交部議處仍賞假一箇月假滿後迅即回任毋許耽延李瀚章於郭松林請假未經請旨奏定假期先准回籍亦屬不合李瀚章著一併交部議處庚午遣官祭文昌帝君廟諭軍機大臣等本日據恩麟

等奏達賴喇嘛由布達拉山親至大招喇經並據聲稱每於藏地清平按年於正月內循例下山攢招奉經等語前於同治七年正月閒經景紋奏稱西藏僧俗人等因豐收安樂懇請達賴喇嘛下山誦經當經降旨賞給哈達等物此次達賴喇嘛奉經虔祝既據奏稱按年於正月內循例下山是否與前案事同一律抑或年例應有之事著恩麟德泰詳悉覆奏並著將從前循例奉經奏案及有無頒

賞物件一併查明迅速奏聞將此各諭令知之○以鑲黃旗滿洲副都統榮祿署工部左侍郎○予山東故江蘇巡撫傅繩勛入祀鄉賢祠從巡撫丁寶楨請也

大清穆宗繼天開運受中居正保大定功聖智
誠孝信敏恭寬毅皇帝實錄卷之三百四

大清穆宗繼天開運受中居正保大定功聖智
誠孝信敏恭寬毅皇帝實錄卷之三百五

欽

同治十年辛未二月辛未

孝康章皇后忌辰遣官祭

孝陵○諭內閣本年輪應查閱直隸山西陝西
甘肅四川五省營伍之期直隸著卽派李鴻
章山西卽派何璟陝西卽派蔣志章甘肅卽
派左宗棠四川卽派吳棠逐一查閱認真簡
校如查有訓練不精軍實不齊卽將廢弛之
將弁據實叅奏現在甘肅尚有勦匪事宜尤
須隨時加意整頓毋得視為具文○又諭御
史彝昌奏京城內外棍徒結夥搶刦假冒宗

室百般索詐甚至藉端誣控勾串書差上年秋閒廣渠門外有匪徒攔劫鄉試車輛訛詐錢文冬閒並有搶劫商民嚇詐庫兵等事本年正月閒北御河橋復有匪徒攔劫車輛請飭查拏懲辦等語輦轂重地豈容匪徒糾黨滋擾閭閻著步軍統領衙門順天府五城嚴密訪查遇有不法匪徒立即拏獲從重懲辦以靖地方又諭丁寶楨奏擒獲倡教謀逆重犯審明分別辦理一摺教匪邵四卽高四世習離卦教因其父叛逆緣坐充軍潛逃仍復怙惡不悛倡教授徒煽惑鄉愚咸豐九年閒與其徒張玉懷宋景詩等暨旗謀反焚掠攻城旋經官軍勦敗該逆脫逃經丁寶楨派員訪拏茲於直隸吳橋縣境內將該逆擒獲審明後卽行正法實足以彰國法而快人心至習教之徒多係愚民無知被其煽惑現在該逆邵四業已伏誅其被惑之人如能翻然改悔卽著概予免罪用示朝廷咸與維新至

意諭軍機大臣等張廷岳等奏庫倫前調防兵難以分撥並探聞回匪意圖東犯杜嘎爾奏起程出口各摺片據稱庫倫為賊匪所垂涎該處既無險可憑蒙古兵又不足深恃前調宣化大同官兵二千名俟到庫後設營分防尚恐不足勢難分撥請飭直隸山西各續撥官兵五百名徑赴科布多等語前據李鴻章奏宣化大同官兵兩處分撥統帶之員既難兼顧分運糧餉又多輾輳業經諭令張廷岳等將宣化兵留駐庫倫大同兵撥赴科城茲因庫城兵力不敷若由直晉兩省各行添撥仍恐事涉紛歧不如專由直隸添撥較為直捷著李鴻章再於直隸所屬各鎮酌調兵一千名派員管帶馳赴庫倫與前調宣化官兵一併聽候張廷岳等調遣其大同官兵一千仍全數調赴科城藉資防守賊匪既已竄至額哲尼河意圖東犯庫倫援軍必須星速前進杜嘎爾現已統帶馬隊起程著卽趨

程前進馳赴哈爾尼敦推河一帶相機防勦。所有烏屬臺站福濟等諒已遵奉疊次諭旨。趕緊設復。不至再有阻滯。杜嘎爾既不曉漢文。中途遇有緊要應奏事件。著准其繕寫清文。俟抵烏後一切防勦事宜。卽會同福濟等。仍用漢字聯銜具奏。並著福濟等將摺內陳奏之事。用清語向該副都統詳悉告知。以免歧異。吉林黑龍江馬隊既經陸續出口。所有宣化大同官兵著文盛迅速催調。剋期起程。

早抵庫城。不得稍有延緩。將此由六百里各諭令知之。又諭文麟景廉奏停止赴烏援軍一摺。前因烏科情形較鬆。已諭令景廉無庸帶兵前往。至安集延回眾攻破吐魯番城後。並未歸順。心懷叵測。亟應先事籌防。著文麟景廉懍遵前旨。督飭兵勇於西路各要隘嚴密防守。毋稍疏虞。東路西甯河州甯夏等處大股逆回接連肅州回匪陸續出關。在赤金峽一帶盤踞。意圖西竄。著成祿迅飭官軍。

確探賊蹤。防勦兼施。力扼該逆西趨之路。並飭派出之李天和等三營妥籌布置。遇賊卽擊。迅殄逆氛。文麟景廉務當飭令防兵相機堵剿。毋令匪勢蔓延。將此由五百里各諭令知之。○以山東擒獲教匪。予知府馬映奎等加銜升敘有差。○癸酉。諭內閣。前因巡視西城御史錫光與同城御史賈瑚拏犯未經會商。又復各執一詞。當諭令都察院堂官確查具奏。茲據該堂官查明覆奏。並請將錫光等

均撤去巡城差使等語。錫光於拏魏禿子一犯時。既未與賈瑚商明。獲犯後又不移交該管衙門訊供。遽行奏交刑部。迨經奉旨交部察議。又復瀆陳分辯。實屬羈率。錫光著交部議處。賈瑚與錫光同城辦事。未能和衷。亦屬不合。著交部察議。○諭軍機大臣等。曾壁光周達武奏籌辦黔省軍務。調隊助勦。請撥協餉一摺。曾壁光周達武現在籌商上下游兩路同時進兵。上游用兵以萬計。下游用兵以

二三萬計周達武隨帶原部楚勇五千九百名並忠字楚勇六百暨募定黔勇共一萬五千再將本省各軍選留八千擬調李輝武所部二千五百人赴黔令其再行添募併原部足一萬四千人兼辦上下兩游始數分布所籌自係實在情形黔省軍務日久尚無起色總由本省兵力過單以致此勒彼竄該撫等既擬兼辦兩游籌定進兵之路即當協力同心相機調度不可徒託空言李輝武本係周

達武舊部前帶武字營勇三千援陝經蔣志章抽撥王名滔一營外尚有二千五百人分紮寶雞各路現劉銘傳督辦陝西軍務所部不少黔省亟須添兵李輝武所部著准其調往以厚兵力陝西南路寶雞一帶與甘省秦州屬境毗連防務甚關緊要著蔣志章劉銘傳會商迅即撥隊前往填紮該提督本有移軍前赴汧隴之奏著即悉心布置毋稍疏虞李輝武所部俟劉銘傳派隊接防後再行起

程赴黔歸曾璧光周達武節制調遣該軍向食川餉著崇實吳棠於月協黔餉五萬八千兩外仍將該軍月餉照常籌解毋令缺乏曾璧光等此次籌添兵勇除川省月協的餉及李輝武所部由川給餉外按月尚需餉十四萬兩有餘部撥黔省軍餉每月約計銀十二萬餘兩數尚不敷著戶部酌度情形再於各省加派數萬合舊撥之餉每月湊成銀十四萬兩自本年為始作為協黔的餉催令各該

省按月撥解赴黔以應急需添兵添餉均已照請辦理周達武務當會商曾璧光妥為部署督軍進剿戡定苗疆黔省現擬分軍兩路進規八寨凱里莫會楚師合勦下游著劉崐檄令席寶田迅督所部埽蕩而前聯絡聲勢不得稍有觀望將此由五百里諭知崇實吳棠蔣志章劉銘傳劉崐曾璧光並傳諭周達武知之○貴州巡撫曾璧光等奏請調四川候補道劉歡曙等前赴貴州差委允之○以

鑲白旗滿洲副都統何永安署正藍旗漢軍副都統 甲戌遣官祭

歷代帝王廟 予故前任廣州將軍穆克德訥祭葬諡勤毅○追予廣西各屬殉難紳民婦女三千九百二十四名口分別旌卹如例

○乙亥諭軍機大臣等蘇鳳文奏據越南國王來咨都司馬雲標遞到馮子材照會內稱該都司前往河內購買玉桂等項銀兩被搶欲往清化追究劄令派兵護送該都司又欲

往河內海陽等省行徑甚為詭譎並接到廣東陽江鎮照會內敘派李得安等前往該國拏犯又古之人一名偽造劄文捏稱前往清查軍情懇請究辦等語都司馬雲標與盜削桂皮之張祿交通欲往該國買桂又以銀兩被搶為詞意圖詐索情殊可惡馬雲標著卽行革職拏問古之人實在係何姓名偽託清查軍情意欲何為有無夥黨亦應徹底根究馬雲標古之人均著交蘇鳳文李福泰嚴行

審訊從重懲辦張祿亟應飭拏務獲與李四一併訊究馮子材曾否給予馬雲標照會著該提督嚴切根究以期水落石出毋稍含糊廣東陽江鎮照會拏犯一節著瑞麟飭屬嚴拏李得安王憬詳到案與陳渴一併究出確情盡法懲治事關交涉外藩瑞麟蘇鳳文李福泰尤當認真查辦不可稍有不實不盡啟外邦輕視之心至廣東廣西各行越南文件向有定例著知照該國嗣後如有違越向章

捏遞公文者卽一面將遞送之人看押一面咨照該督撫等查辦以杜假冒此外有匪類在該國境內滋事者立將該犯拏交該督撫從嚴究辦毋稍姑容另片奏據該國各稱蘇惻漢等在沿邊擾掠等語該國既有匪蹤未可忽然膜視應否派兵會勦或派員會同該夷官拏辦著蘇鳳文李福泰馮子材會商該國妥為辦理至蘇惻漢等難保非吳亞終餘黨蘇鳳文等亦應確切查明不得稍涉迴護

將此由五百里各諭令知之○蠲緩直隸元城南樂長垣沙河廣宗鉅鹿永年邯鄲成安肥鄉曲周雞澤磁南宮新河東強武邑晉開清豐南和唐山平鄉任廣平衡水束鹿二十七州縣被擾地方節年額賦有差○命晉濟堂功德林煑賑展期兩月○丙子清明節

上詣

奉先殿

壽皇殿行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢○丁丑

上復詣

大高殿祈雨行禮○遣惇親王奕誼詣

時應宮恭親王奕訢詣

昭顯廟醇郡王奕譞詣

宣仁廟鎮國公奕謨詣

凝和廟拈香○欽差大臣左宗棠奏記名總

兵官王萬年趙嗣昌呈請歸宗復姓名為薛

萬年朱嗣昌下部知之○派倉場侍郎喬松

年前往天津會同總督李鴻章驗收海運漕

糧○戊寅諭內閣奎昌文碩奏將軍等擅撤

奏摺請旨懲處並因奏遲延自請議處一

摺前因奎昌等上年閏十月初九日所發摺報未經遞到諭令查明具奏茲據奏稱福濟等接閱奎昌等奏稿因情節不符派弁將前摺追回等語福濟榮全於奎昌等業經拜發摺件擅行撤回實有應得之咎奎昌等參奏遲延亦有不合著交部分別議處至內外臣工陳奏事件既已繕遞卽有錯誤亦止應補陳更正豈得擅撤原摺嗣後如有擅撤之員應如何將該員暨管驛地方官吏分別議處之處著該衙門妥議章程具奏 又諭奎昌文碩奏請將疏脫賊犯擅自回旗之駐班公爵懲處一摺科布多駐班之喀爾喀公爵索諾木多爾濟於上年十二月間疏脫發交看管之蒙古賊犯普爾布一名經奎昌等飭令勒限嚴緝及該公班期已滿復令暫留俟該犯緝獲後方准交卸乃索諾木多爾濟竟於本年正月間潛回本旗疊次差追該公執意不回駐班處所且普爾布與該公同旗難保

無瞻徇情弊索諾木多爾濟著交理藩院嚴加議處並先行摘去頂帶卽著烏里雅蘇台將軍轉飭賽因諾顏部落盟長責令該公將賊犯普爾布趕緊嚴緝務獲解送科布多歸案審訊儻再託故遷延卽行揭報該將軍嚴參懲辦○諭軍機大臣等有人奏湖北漢川縣知縣暨之騏於職官馬鳳瑞呈報被竊縱容門丁刁難陵辱誣以哥老會匪濫刑責押經漢陽府知府提案查訊現聞該縣有賄買私和等情州縣於所屬地方竊盜案件理宜趕緊緝拏若如所奏縱盜誣良各節實出情理之外著郭柏蔭將此案卽行提省秉公審究務得確情按律懲辦毋稍瞻徇原摺著鈔給閱看將此諭令知之○又諭奎昌文碩奏棍噶扎勒參一軍將來遣留請飭豫為籌畫等語前因烏城需兵孔亟經福濟等咨調棍噶扎勒參帶兵援應該呼圖克圖所部兵勇七百餘名業經到烏駐紮城西該軍能否得

力。福濟等仍當懷遵前旨。妥為駕馭。奎昌等以科城餉需支絀。前調內地官軍一千名前往防守。支應已屬不易。儻日後福濟等將棍噶扎勒參一軍撤退。令駐科城。必至因飢譁潰。大局堪虞。所奏自為思患豫防起見。棍噶扎勒參所部素無紀律。將來烏城如果無需該軍留防。應如何設法遣撤之處。福濟榮全。錦丕勒多爾濟總當與奎昌文碩妥慎籌商。毋得輕率從事。致令別滋事端。至奎昌等請

調之兵。前已諭令張廷岳等將大同官兵一千名全數撥赴科城。並因庫倫兵力不敷。續調直隸官兵一千名前往協防。此時大同官兵計將起程出口。應如何取道赴科及整備臺站之處。著奎昌文碩咨商福濟等豫為籌備。俾軍行不至遲滯。將此由五百里各諭令知之。○己卯追予河南各屬陣亡殉難紳民婦女一千九百十一名口分別旌卹如例。○庚辰諭內閣。正白旗滿洲奏已故大學士官

文之子榮綵年未及歲。應否進譜承襲。請旨遵行。一摺。榮綵應襲官文所遺一等伯爵。著於百日孝滿後。由該旗卽行進譜。奏請承襲。無庸補行帶領引見。○又諭曾璧光奏甄別文武各員。請旨降革一摺。貴州獨山州知州郭拉豐阿。於署安平縣任內。辦理團練。藉事誅求。候補知縣張維權素善鑽營。聲名狼藉。均著卽行革職。署古州鎮總兵補用副將溫志學招練勦賊。約束不嚴。著以都司降補。署

畢赤營遊擊雷耀先。性行橫暴。玩法營私。守備吳焜貪鄙嗜利。遇事風生。黎平營守備廖成興抗不交印。訐告該營署參將朱占元各款。訊屬虛誣。均著卽行革職。以儆官邪。○又諭曾璧光奏審明劣員丁憂。捏報出繼。隱匿親喪。請革職治罪一摺。貴州補用同知謝邦鑑上年在黔聞訃。丁親母全氏憂。該員並不據實呈明。輒敢希圖短喪。捏報丁本生母童氏憂。將親母全氏捏作嗣母呈報。尚存並將

親父新美捏作嗣父其所稱本生父新成及病故現報丁憂之本生母童氏並無其人實屬喪心作偽藐法忘親情節甚為可惡謝邦鑑著革職永不敘用從重發往黑龍江充當苦差遇赦不准援減以昭炯戒○諭軍機大臣等本日曾璧光奏參同知謝邦鑑丁憂捏報出繼隱匿親喪已明降諭旨將該員革職發往黑龍江充當苦差遇赦不准援減矣此等劣員敗壞綱常實屬可惡該革員籍隸四

川巴縣曾璧光現將其解回四川收管聽候諭旨著飭令派出之員嚴行押解抵川省後卽著吳棠將該革員卽日起解不准逗遛將此各諭令知之○以鑲白旗蒙古都統穆騰阿署鑲黃旗蒙古都統以貴州永甯威甯兩州城被賊竄陷旋卽收復賞提督鍾有恩總兵官龔生環巴圖魯名號同知吳光鑒等花翎徐樹德等藍翎餘加銜升敘有差總兵官萬化林道員奇克慎下部議處革署知州

嵩年署遊擊都司周飛熊職仍留營○予甘肅甯夏陣亡千總田運升祭葬世職加等

大清穆宗繼天開運受中居正保大定功聖智誠孝信敏恭寬毅皇帝實錄卷之三百五

大清穆宗繼天開運受中居正保大定功聖智
誠孝信敏恭寬毅皇帝實錄卷之三百六

臣等謹將前奉 諭旨開辦吉林黑龍江等馬
由部撥項下開銷察哈爾吉林黑龍江等馬
隊起程時文盛已給發三箇月口分銀兩此
後行抵烏境若仍由察哈爾按月續發道途
過遠實有鞭長莫及之勢嗣後各該軍月餉
卽著由福濟等如數放給以歸簡便部撥烏
城餉銀三十萬兩早經解至察哈爾都統衙
門收存並著福濟等迅派員弁前赴察哈爾
領回毋再稽延如烏城提餉委員到尚需時
卽由文盛派委妥員先行分解或卽在此項
餉銀內再發該馬隊一兩箇月口分以免到
烏後有停兵待餉之虞均著文盛酌度辦理
毋稍推諉現在大兵接續西行推河以北臺
站福濟榮全錦丕勒多爾濟務當懷遵疊次
諭旨趕緊豫備妥協俾利遄征不得再有玩
延自干重咎杜嘎爾仍遵前旨趨程前進馳
赴哈爾尼敦推河一帶相機防勦賊蹤究竄
何處並著隨時奏聞宣化步隊指日出邊張

同治十年辛未二月辛巳諭軍機大臣等文

盛奏籌雇駝隻供送軍行並更調步隊接續
出口請催烏城迎提軍餉一摺杜嘎爾已於
二月十五日起程吉林兩起隊伍卽於十八
日陸續進發黑龍江第四起官兵現已到口
文盛亦催令接踵出邊其宣化步隊文盛因
庫倫需兵孔亟擬令該軍於馬隊全行後卽
日出口赴庫所籌均尚妥協惟各臺所設駝
隻日久疲乏而捐借又不足恃文盛擬派員
曉諭蒙古人等按照時價招雇尚屬因時制

宜著照所議妥速辦理所需雇價銀兩准其
由部撥項下開銷察哈爾吉林黑龍江等馬
隊起程時文盛已給發三箇月口分銀兩此
後行抵烏境若仍由察哈爾按月續發道途
過遠實有鞭長莫及之勢嗣後各該軍月餉
卽著由福濟等如數放給以歸簡便部撥烏
城餉銀三十萬兩早經解至察哈爾都統衙
門收存並著福濟等迅派員弁前赴察哈爾
領回毋再稽延如烏城提餉委員到尚需時
卽由文盛派委妥員先行分解或卽在此項
餉銀內再發該馬隊一兩箇月口分以免到
烏後有停兵待餉之虞均著文盛酌度辦理
毋稍推諉現在大兵接續西行推河以北臺
站福濟榮全錦丕勒多爾濟務當懷遵疊次
諭旨趕緊豫備妥協俾利遄征不得再有玩
延自干重咎杜嘎爾仍遵前旨趨程前進馳
赴哈爾尼敦推河一帶相機防勦賊蹤究竄
何處並著隨時奏聞宣化步隊指日出邊張

廷岳等當派員迎提並酌派嚮導接引俾得早抵庫倫以資防守將此由六百里各諭令知之○閩浙總督英桂等奏遵議輪船訓練章程十二條一統領外應派分統以專責成一挑選水師弁兵在船練習一弁兵人等技藝精通者分別給予職銜一分泊各口輪船按季互相更調以期聯絡一每年春冬定期操閱以憑黜陟一水手破手彼此兼練以求精熟一管駕官每旬合操一次一廣搜輿圖

以資考證一頒定一色旗號以分中外一口糧造冊請領據實報銷一稽覈煤斤以省浮費一蓬索輪機雜件隨時修配船身損壞應候勘驗修理下所司知之○兩廣總督瑞麟奏遵查七年秋間有新會縣民區亞潰手持菜刀闖入布政司署大堂並未傷人即經拏獲審訊實係瘋顛當將該犯遞籍鎮銅報聞○旌表守正捐軀浙江黃巖縣民邱官河妻應氏○壬午諭軍機大臣等英翰奏拏獲逆

首宋景詩解省訊供一摺宋景詩在東省倡亂後反覆背叛久稽顯戮經英翰密派員弁在亳州之界溝集地方將該逆拏獲即著英翰將宋景詩就近在皖正法並傳首犯事地方示眾以申國憲而快人心此外有無該逆黨與潛圖不軌該撫務當督飭屬員隨時密查以遏亂萌據該逆供稱伊子在西路營中等語宋逆之子如在軍營涸跡必係詭託姓名英翰如能訪明該逆之子蹤跡姓名一面

咨照西路各軍營嚴密查拏一面迅速具奏將此由四百里諭令知之○又諭豫師奏籌辦西甯軍情等語西甯回眾頻年詭託就撫勾結外匪四處焚殺豫師以兵力不足驟難進攻暫擬鎮攝羈縻解散脅從以孤賊勢所籌尚為因時制宜之計現在金積堡賊首馬化隆等業已伏誅羣賊自必聞風喪膽左宗棠即應乘此聲威調派各軍規取河州等處兵貴拙速不貴巧遲諒該大臣全局在胸必

已熟思審計迅速籌辦豫師業已函商左宗
崇移軍狄河時豫為分兵西進以便抽軍進
紮著左宗崇斟酌情形隨時與豫師妥籌辦
理刻下西甯回情漸已斂跡窩藏陝匪亦陸
續西竄豫師仍當審度軍情拔隊前進相機
勦撫不得徒託空言久延時日本日據英翰
奏拏獲逆首宋景詩供稱伊子今年二十歲
聽說在西路營裏不知真假等語該逆之子
如在軍營淵跡必係詭託姓名著左宗崇飭

令各營留心訪察一經查出卽行奏聞將此
由五百里各諭令知之○以安徽亳州拏獲
逆犯宋景詩子總兵官牛師韓以提督用賞
總兵官劉永清巴圖魯名號餘加銜升敘免
罪有差○旌表守正捐軀山東平度州民婦
戴姜氏○癸未諭軍機大臣等金順奏進勦
通貴堡獲勝並攻破洪岡賊寨各摺片通貴
回匪恃其堡大濠深負隅抗拒經金順會同
張曜督軍進勦大小十餘戰斃賊千餘名並

將附近之馬楊春寨攻破惟近日該堡人數
較多各處逃匪麇集其中賊勢頗為猖獗現
在甯靈漸次肅清豈可因此一隅久煩兵力
著金順會商張曜一面挑築長圍一面督飭
各軍奮力進攻務將此股回匪就地殲除不
得任令他竄又形滋蔓劉廷一軍攻破洪岡
情形與定安前奏大略相同清水渠口兩堡
牆濠業經平毀刻下平羅一帶無餘孽潛
藏仍著金順檄令該提督認真搜捕以期一

律廓清昨據英翰奏拏獲逆首宋景詩供稱
伊子今年二十歲聽說在西路營裏不知真
假等語該逆之子如在軍營淵跡必係詭託
姓名著金順知會張曜於所部各營一體留
心訪察一經查出卽行奏聞將此由五百里
諭令知之○又諭福濟等奏親查臺站並籌
辦防勦探明各路賊情杜嘎爾奏臺站情形
各摺片烏里雅蘇台所屬南二十臺經榮全
往催趕辦部署略有規模並擬將幫臺蒙古

官兵酌照正臺暫給一半錢糧以示體恤卽著福濟榮全錦丕勒多爾濟將各臺站妥為整理俟大兵到時源源支應俾利師行哈爾尼敦額爾德尼招推河三處為逆匪往來孔道福濟等擬將棍噶扎勒參兵勇在烏城西南賊去原路扼紮抽調吉林黑龍江馬隊五百名在烏城東南東溝賊來要路扼紮其餘馬隊均駐推河等處著福濟榮全錦丕勒多爾濟會商杜嘎爾妥為布置總期視賊所向

認真勦辦不得以有用之兵置之無用之地部撥烏城餉銀三十萬兩昨諭福濟等派員前赴察哈爾領回如烏城提餉委員到尚需時卽由文盛派員先行分解或卽在此項餉銀內再發該馬隊一兩箇月口分福濟等現以餉銀解至霍呢齊賽爾烏蘇專員支發派兵巡護較為穩妥此項餉銀或卽解至該二臺抑或解交杜嘎爾卽由該副都統官兵順道管解前往著福濟榮全錦丕勒多爾濟丈

盛杜嘎爾悉心咨商妥籌辦理賊匪有由英根色博蘇臺等處分撲庫倫之信該匪若走上年原路必由推河等處經過北向可入烏城東向可入庫倫南向可入喀喇沁賽爾烏蘇翁錦各臺西北向亦可徑至科布多暨巴里坤哈密等城賊蹤趨向靡定防範均不可稍疏著福濟榮全錦丕勒多爾濟張廷岳阿爾塔什達文盛奎昌大碩伊勒屯何琯文麟景廉於所屬各境一體嚴防毋稍大意現在賊勢又形喫重杜嘎爾務當統率所部兼程前進探明賊蹤就地殲除以免該逆紛竄各城致勦辦又形棘手杜嘎爾所稱達爾濟行抵哈爾尼敦未得駝馬不能前進應領米麵不能應送並據管站台吉與達爾濟聲稱惟推河臺站尚備有氈房別站皆不能應付等語與福濟等設法籌備駝馬氈房羊隻等項接濟大兵之奏情形迥不相符著福濟榮全錦丕勒多爾濟督飭各臺站官員實心籌辦

妥為供支不得有名無實臺站係錦丕勒多爾濟專責不得藉病推諉黨因臺站所備一切不實不盡致誤戎機恐該參贊不能當此重咎也福濟等現擬續行撥給杜嘎爾行營馬一千五百匹駝一千五百隻如須再行雇覓民駝著杜嘎爾與文盛會商妥辦將此由六百里諭知福濟榮全錦丕勒多爾濟文盛杜嘎爾奎昌文碩張廷岳阿爾塔什達文麟景廉伊勒屯並傳諭何瑄知之 又諭福濟

等奏索倫領隊大臣圖庫爾久未到任該處地方緊要非實缺領隊大臣管束難資得力懇請飭催等語著奕榕德英查明圖庫爾現在何處逗遛飭令該領隊大臣迅速起程赴任毋再遲延致干重咎將此由四百里各諭令知之○予烏里雅蘇台陣亡防禦阿克棟阿等祭葬世職 撥工部帳房五百架鑼鍋五百口解赴烏里雅蘇台軍營備用 乙酉諭內閣兵部奏學習主事蔣作錦條陳河運

事宜謹將原呈圖說呈覽一摺所陳各條尚屬詳細著該部堂官飭令蔣作錦前往山東一帶隨同張兆棟蘇廷魁丁寶楨察看情形講求實際俟該漕督等妥議具奏後該員即行回京供職 又諭景霖奏職官率眾捆毆巡兵請解任交部審訊一摺筆帖式祿瑞車輶在寶華峪禁地內刮傷樹株經巡兵張林兆等向前阻攔祿瑞竟敢與伊父沈中即忠德率眾將張林兆毆傷如果屬實殊干法紀

沈中即筆帖式忠德筆帖式祿瑞均著解任派員解交刑部與受傷巡兵張林兆一併歸案審訊按律懲辦 又諭德英奏杜爾伯特蒙古招民開墾荒地請飭嚴禁一摺黑龍江附近蒙古荒地向為蒙古旗丁遊牧打牲之所不准招民開墾例禁綦嚴乃杜爾伯特協理台吉那遜烏爾吉等擅將該蒙古旗荒招墾經德英及該盟長疊次阻止仍敢抗不遵辦實屬大千例禁著理藩院傳知署哲里木

盟長吉克丹旺固爾嚴飭杜爾伯特貝子將現在所招民衆驅逐出境妥為彈壓毋許逗遛滋事嗣後不准再有招墾情弊以靖地方其擅議招墾之協理台吉那遜烏爾吉等並著德英咨查嚴叅懲辦○諭軍機大臣等兵部奏學習主事蔣作錦條陳河運事宜謹將原呈圖說呈覽一摺會通河轉運漕糧實為國家至計本年張兆棟等覆陳會勘張秋地勢擬先籌保衛挑濬業經諭令督飭派出各

員實力興辦惟所籌各節不過暫顧目前非一勞永逸之計該主事蔣作錦所陳四策以築銅瓦廂漸復黃河故道為上導衛濟運為次並因款項維艱酌擬節省集事人以貫運立湖借黃濟運次之均係為規復舊制維繫全局起見著張兆棟蘇廷魁丁寶楨按照蔣作錦條陳詳勘地勢斟酌機宜悉心會議具奏總期次第籌辦力任其難不得敷衍因循一奏塞責原呈均著鈔給閱看圖一件著發

交張兆棟卽由該漕督咨送蘇廷魁丁寶楨閱看將此各諭令知之○又諭李福泰馮子材奏籌辦越南踞匪分別勦撫各摺片越南匪徒蘇桐漢退出諒山該撫已飭知府徐延旭前往交界處所會同夷官將此股人眾分別去留或就地安插或遣回本籍約束務當飭令徐延旭妥為安置毋令再滋事端以安邊徼其占踞木馬高平匪股尚未殲除馮子材現擬統帶防兵十六營馳赴龍州駐紮李

福泰派令道員華廷傑赴營幫同辦理勦撫事宜木馬高平接壤鎮安匪蹤出沒靡常亟應悉數殲除免致侵軼為患著馮子材相度機宜督同總兵劉玉成迅將木馬一帶股匪蕩平毋留餘孽並隨時知照該國派兵會勦其各要隘處所該撫已派兵嚴防杜其回竄旁逸之路並於適中扼要地方紮營以防白苗窺伺稽查流民逸匪毋令出關所籌尚為周密卽著隨時認真防範毋任句結蔓延至

宣光等處既據邊界較遠暫緩進兵亦係實在情形著照該撫等所議俟克復木馬高平後知照該國自行攻勦如該國兵力單弱仍當相機協助以綏藩服不得稍存膜視將此由五百里各諭令知之○以兵部右侍郎黃倬兼署禮部右侍郎刑部左侍郎賀壽慈兼署工部左侍郎○以正黃旗蒙古都統載容署鑲白旗蒙古都統鑲紅旗蒙古都統德長暫署鑲黃旗蒙古都統正紅旗蒙古副都統

照祥鑲白旗漢軍副都統滿慶署鑲黃旗蒙古副都統正藍旗蒙古副都統載良鑲藍旗蒙古副都統大壽署鑲黃旗漢軍副都統○以正白旗漢軍副都統銘安署右翼前鋒統領○丙戌

孝昭仁皇后忌辰遣官祭

景陵○補鑄定邊左副將軍印信從將軍福濟請也○補鑄福建汀州府同知關防從兼署巡撫英桂請也○丁亥祭

先農之神遣睿親王德長行禮○諭軍機大臣等英翰奏滙陳援甘皖軍困苦情形一摺本日已照該撫所請特諭左宗棠將金運昌一軍撥歸定安調遣矣該軍從征日久戰歿及傷病者甚多深堪矜憫現在撥赴定安軍營即可藉資休息著英翰檄令金運昌迅速整理聽候該將軍調遣該撫既知金運昌一軍為西征不可少之隊尤當飭令金運昌激勵將士奮勉圖功至該軍月餉英翰仍應接

月籌撥源源接濟毋稍推諉將此諭令知之○又諭前因劉銘傳奏纏金距陝甚遠請飭定安由河防內撥軍駐守當諭令該將軍會商劉銘傳妥籌調派以便薩薩布統帶馬隊迅赴烏城因思定安軍營前已陸續撤回馬步各隊三千五百名兵力亦不為厚若再抽撥官軍前赴纏金接防深慮不敷分布著左宗棠速將金運昌一軍全行撥赴定安軍營歸該將軍調遣以資厚集定安於金運昌所

部到營後應如何調派並令填紮何處卽著妥籌布置以便騰出薩薩布馬隊得以剋日拔營前赴烏城援剿前據英翰奏拏獲逆首宋景詩供稱伊子今年二十歲聽說在西路營裏不知真假等語業經諭令左宗棠留心訪察著定安於所部各營及宋慶等軍內一體訪察一經查出卽行奏聞將此由四百里各諭令知之○又諭張廷岳等奏庫屬臺站均已籌備一摺據稱宣化官兵由賽爾烏蘇

至庫倫防所計十四臺大同官兵由賽爾烏蘇西行至哲林臺復由該處至庫屬額爾德尼招防所添設新臺四座需用駝馬穹廬等項均已備齊其自張家口至賽爾烏蘇復轉西至第六臺向有庫倫幫臺亦經添備齊全是各路援軍出口後已無阻滯之虞現在吉林黑龍江官兵計將全數出口著文盛催令宣化大同及直隸續調官兵迅速部署接續前進賊匪既欲由英根色博蘇臺等處分路

撲犯庫倫情形實為緊要援兵斷不宜再遲杜嘎爾業經統兵起程著卽星速遄行馳赴哈爾尼敦一帶探蹤截剿迅掃逆氛張廷岳阿爾塔什達亦當將庫倫防務嚴密布置一面迎提宣化官兵到防相機調度其大同官兵前已有旨調赴科布多防守該軍出口後應如何取道前進著文盛張廷岳等酌度情形咨商奎昌文碩辦理續調赴庫之直隸兵一千名應如何擇要扼紮之處並著妥籌調

派杜嘎爾所帶各軍雖據福濟等前奏應在哈爾尼敦額爾德尼招推河等處駐紮而推河以北臺站亦須備辦周妥以便支應一切聲息相通不得因大兵無須抵烏數行塞責蒙古生計維艱駝隻或須雇用各臺當差蒙兵或須酌發口分庫倫察哈爾現辦各臺均有章程著福濟等迅行咨取參酌辦理毋惜小費而誤軍行文盛張廷岳等一面將現辦臺站章程知照烏城前部撥烏城餉銀早經

解至察哈爾。應如何設法解往著福濟榮舍
錦丕勒多爾濟文盛杜嘎爾懍遵本月二十
三日諭旨會商妥辦或由文盛派員分解杜
嘎爾軍營順道帶往遇有應行雇覓駝隻發
給臺兵口分俾師行不至濡滯之處並著杜
嘎爾與福濟等妥籌速辦總以馬隊迅抵烏
境防勦有資為要現在烏城籌備支應需餉
較多著戶部再行撥銀十萬兩解交察哈爾
轉解赴烏應用將此由六百里各諭令知之

○又諭李鴻章奏豫籌日本通商事宜請調
熟悉洋務大員來津商辦一摺日本通商議
約伊始尤應慎之又慎免滋流弊該國使臣
約於本年三月間成行輪船迅利不日即可
駛至自應豫行籌畫江蘇按察使應實時熟
悉洋務著曾國藩張之萬飭令該臬司查探
日本使臣過滬卽酌帶委員附搭輪船迅速
兼程來津由李鴻章督同該臬司妥籌辦理
將此由四百里各諭令知之○以正紅旗漢

軍副都統達慶署正黃旗護軍統領內閣學
士慶陞署正黃旗滿洲副都統○戊子遣官
祭賢良祠○諭內閣原任廣東陸路提督劉
松山由湖南軍營帶兵轉戰十餘省屢著奇
功上年正月因督師進攻甘肅馬五寨回匪
中礮陣亡業經降旨優卹現在金積堡賊壘
削平首逆就殲該提督靈柩尚未回籍追溯
前勲尤深矜惜劉松山著加恩賜祭一壇由
左宗棠派員前往致祭用慰忠魂○諭軍機

大臣等左宗棠奏南路官軍勦辦潰卒獲勝
一摺范銘所部潰勇叛踞岷州經總兵傅先
宗等督軍進勦獲勝擒斬逆首尤芝政等餘
眾就撫業經散粟賑濟挑留壯健分置各軍
編營安插其老弱婦女萬餘安置岷州給以
籽糧督令耕作籌辦尚為周妥此起潰勇人
數龐雜前曾有焚掠刦搶之事該大臣慮及
土客尋仇已將新收叛卒分別飭赴隴西伏
羌秦安駐紮勤加訓練著嚴飭各營妥為矜

東母令再生事端范銘所部該大臣已逐一清釐其另案叛弁匪目及各省游勇尚恐隨處溷跡仍當檄令周開錫認真清查漸次辦理以靖南路而遏亂萌此次各軍勦撫潰卒著有微勞及去冬攻堅陣亡將士准由左宗棠分別奏請獎卹另片奏覆陳周開錫並無激變貽誤情形等語南路軍務既據該大臣查明詳細陳奏足紓廛繫所請飭令蔣志章等派員前赴秦州查辦之處著無庸議周開

錫既能任事不避嫌怨所有甘南軍務及地方釐稅錢糧已責成該道經理該大臣當飭周開錫聯絡各營及地方官和衷商辦不得一意孤行如有貽誤惟周開錫是問范銘現在是否投出仍著查明具奏另摺奏請將所得加賞世職追獎勞臣等語劉松山屢著奇功歿於王事朝廷軫惜殊深本日已明降諭旨賜祭一壇以慰忠魂俟甘省軍務一律肅清屆時再降恩旨該大臣請將加賞騎都尉

世職追賞劉松山令其嗣子承襲之處著無庸議將此由五百里諭令知之○又諭崇實吳棠奏巴夷竄擾經川滇兩軍擊退回巢一招雲南之大關永善四川之雷波馬邊夷巢林立聲息相通此次滇匪勾串巴夷散練分股竄擾雖經川滇兩軍夾擊潰竄回巢惟尚有零匪數百藏匿老山且該夷不務耕耘專圖剽奪難保不暗中勾合乘間復出著崇實吳棠劉嶽昭岑毓英督飭唐友耕李家福兩軍在川滇毗連一帶實力防勦將老山匪匪按捕淨盡毋得稍分畛域其筠連縣地方游匪數十成羣乘機搶奪若不上緊拏辦尤恐釀成大患崇實等務當嚴飭唐友耕會合附近兵練併力埽除以清餘孽將此由五百里各諭令知之○成都將軍崇實等奏遵查黔省教案賠款上年議結時將應撥協餉銀兩飛咨各省照數動支一面飭令該教士持大請領似無庸再事籌撥致多輾轉得旨著仍

遵正月二十三日諭旨將黔省教案應發銀兩除各該省業已付給咨照川省有案外餘銀仍由四川籌款墊給再由各省照數解川以清款項 命協辦大學士刑部尚書瑞常為大學士吏部尚書文祥協辦大學士○賞江西等省庚午科鄉試年老諸生應見龍等一百十三人舉人副榜有差○己丑以雨澤未霑

上於

大高殿設壇祈禱親詣行禮 遣惇親王奕誼

詣

時應宮恭親王奕訢詣

昭顯廟醇郡王奕譞詣

宣仁廟孚郡王奕譔詣

凝和廟睿親王德長詣

覺生寺豫親王本格詣

黑龍潭順承郡王慶恩詣密雲縣

白龍潭拈香○庚寅諭軍機大臣等文盛奏

請賞給軍臺弁兵銀兩並請飭添撥駝馬各摺片察哈爾所屬軍臺官兵照料征兵及轉運糧餉差務繫多情形苦累自應量加調劑著照文盛所請每官給銀五兩每兵給銀三兩共需銀五千二百六十兩即由部撥軍需項下動用覈實開放達爾濟車登所部頭二起馬隊暫紮哈爾尼敦迤西公布里特地方經盟長西哩巴咱爾扎普及烏里雅蘇台解到馬共四百九十餘匹均皆疲瘵不堪乘騎

原騎駱駝亦已大半疲傷必須添撥應用前據福濟等奏調撥官廠孳生廠及三盟捐馬共一千五百匹解交達爾濟營中並於四部落再撥駟馬一千五百匹駝一千五百隻解交杜嘎爾行營現在達爾濟收到之馬既皆疲瘵其續行解到者恐亦未必適用著福濟崇全錦丕勒多爾濟將前調駝馬務須選擇臚健催令迅速解往第恐尚屬不敷並著趕緊寬為添撥俾利軍行如已無可調撥必須

設法雇用。所有烏城餉銀。著文盛仍遵前旨。派員分解杜嘎爾軍營。順道帶往。或卽由杜嘎爾設法雇用。以應急需。並著杜嘎爾將軍。臺需用一切。及進剿機宜。隨時咨商文盛。福濟等妥籌辦理。宣化等處官兵。仍著文盛催令速為部署。剋日起程。毋稍遲誤。達爾濟帶兵前進。尚知奮勉。著賞還頂翎。將此由六百里各諭令知之。調禮部尚書全慶為刑部尚書。工部尚書存誠為禮部尚書。理藩院尚書崇綸為工部尚書。以都察院左都御史靈桂為理藩院尚書。吏部左侍郎阜保為都察院左都御史。○調戶部左侍郎魁齡為吏部左侍郎。轉戶部右侍郎。延煦為左侍郎。管三庫事。調禮部右侍郎桂清為戶部右侍郎。管錢法堂事。工部左侍郎恩承為禮部右侍郎。未到任前。以內閣學士祥泰署理。轉工部右侍郎。明善為左侍郎。以鑲黃旗蒙古副都統榮祿為工部右侍郎。管錢法堂事。

大清穆宗繼天開運受中居正保大定功聖智誠孝信敏恭寬毅皇帝實錄卷之三百六

大清穆宗繼天開運受中居正保大定功聖智
誠孝信敏恭寬毅皇帝實錄卷之三百七

欽定實錄

理宗實錄

正統實錄

景泰實錄

加六載

秋修

同治十年辛未三月辛卯朔

上詣鍾粹宮問

慈安皇太后安長春宮問

慈禧皇太后安至己未皆如之 壬辰旌表守

正捐軀直隸河開縣民李從周妻常氏○癸

巳祭

先蠶之神遣內務府大臣春佑行禮○諭軍

機大臣等前因何瑄奏巴城需餉孔亟請飭

部撥銀十萬兩派員赴京領解當經飭令戶

部議奏茲據該部奏稱上年議撥巴哈兩城

餉需於各省積欠新疆月餉先行提撥山東

銀十二萬兩河南銀十萬兩山西銀六萬兩

直隸銀二萬兩共銀三十萬兩本年正月文

麟等奏請撥餉復經議令在前提餉銀三十

萬兩內撥用現在巴里坤請餉與哈密之案

相同請仍令在前提三十萬兩內分撥等語

即著照所議田伊勒屯何瑄飭令前派守備

劉光珍迅往張家口綏遠城兩處守候俟前

項解到時分領銀十萬兩押解回營至各省

應解新疆月餉自同治五年九月起截至本

年二月止山東欠解銀八十三萬兩河南欠

解銀一百二十一萬六千兩山西欠解銀四

十四萬九千兩直隸欠解銀十二萬五千兩

著李鴻章丁寶楨何璟李鶴年督飭令該藩

司將欠解月餉並前提餉銀迅速籌解不准

再行延宕嗣後月餉仍當源源解濟毋誤要

需將此由五百里諭知李鴻章丁寶楨何璟

李鶴年伊勒屯並傳諭何瑄知之○又諭定

安全順奏功克通貴堡擒獲首逆馬萬選並辦理餘匪情形一摺通貴堡大小兩寨巢堅賊悍日久負隅經金順會同張曜督率官軍奮勇進剿攻克巨巢生擒首逆實足以寒賊膽而快人心惟敗逃餘匪乘間竄入納家牐內該處匪類納萬郭等復以洗回之說煽惑羣情若遽行進兵則已撫良回勢必驚擾適墮納萬郭等詭謀金順現商張曜飭令該處良回速將藏匿匪眾及頑梗不化之徒勒限

悉數驅出就戮以免株連所籌尚合機宜卽著該署將軍等妥為辦理如果有意窩藏自外生成卽著金順會同張曜督兵進剿毋令滋蔓金順張曜所部攻堅破壘勞瘁異常俟甯夏一帶肅清卽可略予休息以養兵力該處有無零星回堡需兵勦辦並著定安全順查明具奏將此由五百里各諭令知之 命大學士瑞常管刑部事 命前任國子監祭酒章鑒仍在上書房行走 調正黃旗蒙古

副都統廣壽為鑲紅旗滿洲副都統以前任科布多幫辦大臣明瑤為正黃旗蒙古副都統 復甘肅通貴堡陣亡已革副將傅守巽原官予祭葬世職加等 甲午予河南故閩浙總督王懿德入祀鄉賢祠從巡撫李鶴年請也 丙申諭軍機大臣等都興阿等奏朝鮮拏送犯越流民解交原籍查辦暨匪民投留慢書各摺片據稱接准朝鮮來咨本年正月間在南浦昌麟島等處陸續拏獲犯越人眾四十二名船內載有火器火藥又有數百船隻聯帆圍島揚旗轟礮經島民守兵捍禦至夜散去察其情形決非尋常捕魚之輩所拏人眾籍隸山東文登榮成甯海等處經都興阿等提訊均供實係船隻遭風漂泊並無為匪滋擾情事現已解回山東省就近查辦等語此起人犯究竟在何處剽掠所掠何人財物未據該國聲明所拏船隻物件僅在李幅船內查有火器火藥據供為護船防賊之

用惟獲犯至六起。人數至四十餘人。是否安分良民抑係不法匪類。著丁寶楨認真查訊。明確照例懲辦。不得含糊了事。以肅邊禁。至沿海奸民出洋滋事。例禁綦嚴。近乃有船眾拘執島民投留慢書之事。似此任意肆行。漸不可長。並著丁寶楨查照朝鮮來文。申明科條。將該省沿海地方。飭屬一律稽查。毋令莠民出外。致生事端。其奉省沿海處所著都興阿等隨時嚴密查禁。此次該國拏送人犯。業

交丁寶楨訊明辦理。並諭盛京山東整頓海防。著禮部卽行知照朝鮮以安藩服。將此諭知禮部。並由四百里諭令都興阿清凱額勒和布德椿丁寶楨知之。又諭岑毓英奏攻克徵江府城擒斬首要各逆。並克復江那土城各摺片。徵江府城被賊占踞十有餘年。此次經岑毓英督率各營員弁奪據四面城濠。分投開挖地道。疊次環攻。於二月初一日將徵江府城攻克。生擒逆首馬和等正法。敗逃

餘匪。按殺殆盡。全境一律肅清。實足以申天討而快人心。岑毓英督兵勦賊親臨前敵。克奏膚公實堪嘉尚。其在事出力文武員弁。卽著劉嶽昭岑毓英查明保奏。候旨施恩。至開化府屬之江那地方。久為賊匪堅巢。經署總兵麟志等軍先將探南腳側奄二處攻克。斷其犄角。乘勝力拔江那。勦辦尚屬得手。卽著劉嶽昭岑毓英檄飭張保和等迅將田心茂克賊巢一律攻拔。毋稍稽遲。現在滇省東南

各屬漸次底定。此後進兵機宜及如何規復大理之處。並著劉嶽昭岑毓英斟酌情形。次第籌辦。岑毓英另片奏參將邵天貴等燒殺搶擄目無法紀。已查拏正法等語。軍行以紀律為先。騷擾在所必禁。嗣後如有似此不法之員。並著該督撫等一體嚴懲。以肅軍律。將此由六百里各諭令知之。漕運總督張兆棟奏運河淤墊處多。現籌興挑並於宿運兩汛各築束水壩一道。邳汛築挑水壩三道。及

黃林莊以下石牘均擬擇要的修報聞又奏
浙江省漕項奏銷請再展限辦理從之○以
大學士朱鳳標為會試正考官工部尚書毛
昶熙都察院左都御史阜保內閣學士常恩
為副考官以禮部尚書萬青藜兼署吏部
尚書戶部尚書董恂兼署工部尚書刑部尚
書全慶兼署都察院左都御史刑部右侍郎
桑春榮兼署戶部左侍郎管三庫事兵部右
侍郎寶珣兼署刑部左侍郎以鑲白旗滿

洲副都統何永安署鑲紅旗護軍統領鑲紅
旗滿洲副都統安住暫署鑲黃旗漢軍副都
統予雲南澂江陣亡都司楊思潤守備祖
大章千總飛兆雄把總黃勝海等祭葬世職
加等予雲南各屬陣亡殉難教諭李應紱
等紳民婦女三千九百六十二員名口分別
旌卹如例丁酉諭軍機大臣等福濟等奏
拏獲賊探飭屬嚴防何璟奏烏屬各臺未齊
大同兵候調前進各等語賊匪伺隙回竄本

在意中現據福濟等拏獲賊探據供教成娃
子賊中分遣細作陸續赴烏城庫倫放探並
有賊股在各該旗地界藏匿行走額哲尼河
等處又有賊股盤踞約定三月間在雪山溝
會齊四月間向東北來烏滋擾圖上庫倫並
調施元帥帶馬隊二千出口謀犯庫倫賊情
叵測亟宜先事豫防著福濟榮全錦丕勒多
爾濟張廷岳阿爾塔什達各飭所屬扼要嚴
防斷賊來路一面勤加偵探將各起細作按
名按拏毋任溷跡賊既圖犯烏庫乘其黨與
未集先發制之則烏合之眾不難盡數殲除
著杜嘎爾迅即督兵前進探蹤雕剿毋任醜
類蔓延福濟張廷岳等當各就現有兵力防
勦兼籌彼此隨時知照互相聯絡不得稍涉
大意福濟等原片著鈔給張廷岳等閱看烏
屬各臺疊經諭令福濟等一律設復乃日久
尚未備齊以致師行多滯實屬疲玩大同官
兵改調赴科應由賽爾烏蘇轉西行走文盛

因烏屬各臺未齊令該官兵暫緩來口駐紮
天鎮候調俟宣化兵全過後再行前進究竟
烏屬各臺駝馬何時可以備齊宣化官兵何
時全過著文盛福濟等妥速應付毋再稽延
杜嘎爾亦應遵奉疊次諭旨會商福濟等設
法辦理以便迅速前進福濟等即將各臺備
齊由文盛就近飭令大同官兵接續進發星
速赴科轉餉既由貢果爾一手經理晉省即
無須派員出口其由歸化購糧及運赴察哈

爾臺站事宜仍著何璟會商定安妥為籌辦
毋令兵食缺乏福濟等另摺奏請將捐輸踊
躍之蒙古王公等獎勵等語業已照請將車
林敦多布賞穿黃馬褂餘令該衙門議給獎
敘矣即著該將軍等傳知該王公率屬守禦
共衛邊疆力圖報效將此由六百里各諭令
知之○賞御前行走扎薩克圖汗車林敦多
布黃馬褂○追予浙江各屬陣亡殉難巡檢
曹福九等紳民婦女三百一十七員名口分

別旌卹如例○戊戌予甘肅涼州等處陣亡
副都統善山保等祭葬世職加等○添建江
甯駐防官署兵房從將軍魁玉請也○己

亥
上復詣

大高殿祈雨壇行禮○遣惇親王奕誼詣

時應宮恭親王奕訢詣

昭顯廟醇郡王奕譞詣

宣仁廟孚郡王奕譔詣

凝和廟睿親王德長詣

覺生寺豫親王本格詣

黑龍潭怡親王載敦詣密雲縣

白龍潭拈香○庚子諭內閣英元奏請飭營

汛巡緝偷米匪徒一摺大通橋設有上下號

房二處積存已收未運之米上年八月間竟

有匪徒擁入上號搶掠經巡緝兵役齊往抵

禦該處營汛置若罔聞實屬不成事體著步

軍統領衙門飭令朝陽河陽二汛於上下號

存米時實力巡查遇有匪徒搶盜米石一體嚴拏懲辦並將著名盜米之犯隨時訪緝務獲毋任溷跡另片奏請將製斛廳移設大通橋左側等語著照所議辦理遇米石到橋時卽著抽查漕糧御史督同監督隨掣隨運以期迅速而免偷漏諭軍機大臣等杜嘎爾奏遵籌進兵各事宜並擬調貢果爾一軍勦賊請飭文盛另派旗員督催糧餉各摺片杜嘎爾因烏城防兵單薄現派蘇彰阿統帶黑龍江官兵五百名前赴烏城調度尚合機宜福濟榮全錦丕勒多爾濟務當懍遵疊次諭旨趕將喀爾喀二十臺站應用駝馬帳房一切豫備妥協以利師行不得再事因循致滋貽誤並一面迎提蘇彰阿所帶馬隊迅速到烏以資防勦烏城餉銀三十萬兩疊經諭令文盛設法籌解或分解杜嘎爾軍營順通帶往現在文盛已否派員管解起程並著知照福濟等設法提催杜嘎爾遴員照料用昭慎

重杜嘎爾於途次雇駝一百隻補足驛傳駝隻之額其不敷之數仍准其隨地雇募分給各站俾大軍得以迅進不至濡滯中途杜嘎爾已於三月初四日由濟斯洪果爾前進馳赴哈爾尼敦推河額爾德尼招等處擇要紮營卽著確探賊蹤相度地勢妥籌防勦仍與福濟張廷岳等隨時知會聲息相通以期無誤戎機杜嘎爾兵分見單貢果爾一軍卽著該副都統帶赴前敵俾壯聲威所有貢果爾各路督催事宜卽著文盛於察哈爾蘇魯克旗官員內揀派賢能大員前往接辦毋稍遲緩賊匪既有回竄烏城東犯庫倫之信福濟榮全錦丕勒多爾濟張廷岳阿爾塔什達等務將各該處防勦事宜妥慎籌畫不得稍有疏虞致干重咎將此由六百里各諭令知之○追予安徽涇縣等處殉難教諭王敬典等紳民婦女二十九員名口分別旌卹如例予故兩江總督馬新貽於山東荷澤縣原籍

建立專祠 辛丑

孝賢純皇后忌辰遣官祭

裕陵 諭內閣前因伊勒屯奏叅巴里坤鎮總兵何瑄袒護已革署遊擊孫淵椿被控各節及遇事專擅等情當經諭令左宗棠將何瑄調赴軍營察看茲據左宗棠奏稱遵旨檄調何瑄來營其所遺巴里坤鎮總兵一缺查有記名提督趙德正明幹老成久經行陣請以署理等語何瑄著即馳赴左宗棠軍營不准

藉詞延緩該大臣於何瑄到營後悉心察看並將被叅各情秉公查覈據實具奏巴里坤鎮總兵員缺即著趙德正署理諭軍機大臣等定安奏遵旨採辦米麵協濟軍食酌擬章程覆奏一摺塞外用兵糧運最關緊要定安現擬遴派妥員採辦米麵另籌經費由蘇木臺站運送十八臺惟各省應解烏城協餉山西之十萬兩早經解往河南之十萬兩僅解二萬兩亦已撥交其餘尚無到綏信息現

在該處剋日設局採辦需用甚殷勢難久待所有歸綏採買米麵價值並蘇木臺站運解經費以及派出採買運解官兵應給口分銀兩即著文盛在察哈爾庫存軍需項下撥給以濟要需並著該都統酌派協佐官一員前赴綏城會同辦理一切用款即飭承辦之員按月造冊呈由定安詳覈咨照文盛統歸察哈爾都統彙總報銷其現籌採買運送章程均著照定安所議辦理一切未盡事宜著定

安文盛隨時咨商和衷妥辦昨因杜嘎爾奏兵分力單准其將貢果爾調赴前敵其督催糧運各事諭令文盛另派妥員前往接辦定安擬將歸綏糧石直送至濟斯洪果爾交貢果爾查收之處著咨詢文盛派出接辦者係屬何人飭令領運之員妥為交付毋稍疏虞定安原摺著鈔給文盛閱看將此由五百里各諭令知之 又諭甘肅金積堡賊巢業經官軍平毀逆首馬化澂等伏誅經左宗棠審

明該逆首等眷屬。按律分別科罪。請將馬化鳳馬阿西子馬進孝馬啞啞發往新疆等處。給官兵為奴。按照新章。俱應改發黑龍江。據該督奏稱。訊據賊供。黑龍江近亦有新教之黨。在彼傳教。應改發閩廣。給官兵為奴等語。回民創立新教。結黨自固。恐非安分之徒。黑龍江地方。是否有此名目。有此黨類。曾否在該地方滋事。著德英不動聲色。密訪明確。詳細具奏。如無滋事情形。自應一視同仁。毋令

該回民等稍生疑懼。轉啟釁端。此事並非令該將軍查辦。萬不可稍涉張惶。將此密諭知之。尋奏遵查。黑龍江回民尚屬安分守法。並無新教結黨滋事。報聞。以記名提督崔廷桂為河南河北鎮總兵官。○壬寅補鑄正白旗滿洲四甲喇佐領圖記。從都統恭親王請也。○補鑄甘肅鎮迪道關防。從總督左宗棠請也。○追予江蘇各屬陣亡殉難州同銜呂對等紳民婦女一千七百三員名口。分別旌

卹如例。旌表守正捐軀直隸清河縣民李大三妻姜氏。○癸卯諭軍機大臣等。張之萬奏署藩司應寶時稔習洋人情形。擬將蘇省各屬民教交涉之案。派令應寶時綜理其事等語。華洋交涉事件。關係緊要。即著張之萬會商曾國藩。督飭應寶時隨時妥籌辦理。以期中外相安。張之萬身任封圻。蘇省一切事宜。均屬責無旁貸。不得以洋務非所諳習為詞。置身事外也。將此各諭令知之。○命湖廣

總督李瀚章在紫禁城騎馬。追予江蘇各屬陣亡殉難州同銜石雲龍等紳民婦女一千八百四十一員名口。分別旌卹如例。○甲辰追予江蘇各屬陣亡殉難遊擊封耀祖等紳民婦女三千五百員名口。分別旌卹如例。○丙午兩廣總督瑞麟奏。欽川轄境與越南國屬狗頭山等處毗連。時有匪徒窺伺。洋面現飭副將雷東剛管帶輪船會勘。斃匪多名。得旨仍著嚴飭派出文武各員弁會同巡洋

舟師實力查拏毋任漏網以靖海疆 丁未

上復詣

大高殿祈雨壇行禮 遣惇親王奕諒詣

時應宮恭親王奕訢詣

昭顯廟醇郡王奕譞詣

宣仁廟孚郡王奕譔詣

凝和廟睿親王德長詣

覺生寺豫親王本格詣

黑龍潭鄭親王承志詣密雲縣

白龍潭惠郡王奕詳詣清漪園

龍神祠鎮國公奕謨詣靜明園

龍神祠拈香 以神靈顯應頒陝西米脂縣

關帝廟扁額口福佑銀城 引見截取刑部

郎中徐用儀得旨著開缺以五品京堂候補

戊申諭內閣吏部奏遵議湖北漢黃德道

一缺前已奏定改為由外調補不得作為題

補之缺李瀚章等請以候補道李明墀補授

是缺與奏定改缺原案不符至該督等奏請

變通漢黃德道補缺章程既與前次奏案相

背且甫經改定未便又議更張等語湖北漢

黃德道一缺李明墀例不應補自應照章議

駁惟據該督等聲稱是缺政務殷繁且有中

外交涉事件李明墀情形熟悉實屬人地相

宜著照所請即以李明墀補授漢黃德道員

缺嗣後不得援以為例 又諭李鶴年奏請

將才不稱職各員分別降補撤省一招河南

署滎陽縣知縣陳燾曾借案糾罰聲名平常

著以府經歷縣丞降補歸部銓選郟城縣知

縣沈玟才欠開展人地未宜署柘城縣事涉

縣知縣丁鳳年緝捕不力難資整頓均著開

缺留省察看以肅吏治 禮部以宗室會試

中額請得旨取中二名 吏部以大學士倭

仁瑞常應定何殿閣請得旨倭仁著授為文

華殿大學士瑞常著授為文淵閣大學士○

頒河南省城故欽差大臣科爾沁博多勒噶

台忠親王僧格林沁專祠扁額曰積忠偉烈

追予河南各屬陣亡殉難紳民婦女一千六百五十一名口分別旌卹如例。己酉盛京將軍都興阿奏新授高州鎮總兵官張得祿自同治五年來奉帶隊調度有方請緩赴新任暫留奉省以資得力允之。舉行同治九年軍政廣東罷輟官二員才力不及官一員處分如例。庚戌以甘澍優需

上詣

大高殿行禮報謝○遣惇親王奕誼詣

時應宮恭親王奕訢詣

昭顯廟醇郡王奕譞詣

宣仁廟孚郡王奕譔詣

凝和廟睿親王德長詣

覺生寺豫親王本格詣

黑龍潭肅親王隆勲詣密雲縣

白龍潭惠郡王奕詳詣清漪園

龍神祠鎮國公奕謨詣靜明園

龍神祠拈香 諭軍機大臣等張之萬奏安

徽建平縣於二月十七日有客民勾結土匪滋事搶劫釐局鹽卡經該縣文武拏獲數十人正法餘黨逸入浙省湖州府屬之孝豐縣山中等語該匪餘黨人數尚有若干現在竄入孝豐亟應趕緊按捕著楊昌濬酌撥兵勇悉數查拏盡法處治務絕根株廣德屬境是否尚有匪徒潛匿著英翰嚴飭該地方官認真按查一面嚴防毗境遇賊即擊毋令再行回竄擾害地方漂水荆溪宜興溧陽均與建平接壤尤須加意防維著曾國藩張之萬嚴飭水陸各軍察看情形相機防勦不可稍涉大意將此由五百里各諭令知之。又諭張廷岳等奏請飭直隸續撥官兵迅速到防等語賊匪屢有圖撲庫倫之信該處警報頻仍情形甚屬喫緊前因大同官兵業已撥赴科城諭令李鴻章添調直隸官兵一千名馳赴庫倫聽候調遣該督諒已遵旨調撥其前調宣化官兵一千名此時計可出口所有續撥

之兵著卽飭令趕緊部署早日成行不得稍涉延緩前據文盛奏吉林黑龍江馬隊三月初五日可以走畢擬令宣化步隊接續行走大同兵及直隸續派步隊隨後進發仍著該都統妥籌應付催令各起官軍陸續前進張廷岳等俟該官兵出口後著卽派員迎提俾得迅速到防以資厚集將此由五百里各諭令知之○又諭前因戶部議撥哈密巴里坤兩城餉銀請於山東等省在欠撥新疆餉銀

內向前提撥銀三十萬兩由該兩城分提應用當經降旨允准茲據伊勒屯奏稱各該省撥解需時誠恐緩不濟急請飭山西無論何款先行借撥銀三萬兩等語前據戶部奏山西尚有欠解新疆餉銀四十九萬九千兩現在巴城需餉孔殷亟應迅籌接濟著何璟飭令藩司卽於前項欠款內先行籌撥銀三萬兩由伊勒屯派員迎提應用該城修補軍械等項尚需銀數千兩並著何璟一併酌量籌

撥至戶部前奏先提之三十萬兩內山西應提銀兩仍著趕緊籌撥其餘欠餉亦當陸續撥解毋誤要需將此由四百里各諭令知之○以四川官軍攻克雲南永北廳城出力予副將鄧全勝等以總兵官簡放賞土司安平康二品封典已天錫巴圖魯名號道員薛華垣都司陳仕林等花翎千總江炳文等藍翎餘加銜升敘有差○撥火器營武備院火槍四百桿火箭一千枝梅鍼箭二萬枝角弓四

百張腰刀四百把給庫倫委員領回備用○辛亥兩江總督曾國藩等奏籌辦廣德等處土客開墾事宜擬先清查現墾之田分別有主無主認糧認租嚴禁侵占次卽設立保甲無論土客一概編冊以為除莠安良之計得旨著嚴飭該委員等悉心經理俾土客各民恪遵約束毋任再滋事端○安徽巡撫英翰奏浙江孝豐山內土匪竄擾建平平等界經官兵擊散擒獲匪首彭節應等正法得旨著懍

遵昨日諭旨派員前赴廣德按勘並將匪首
關汶淮會同浙江嚴拏務獲毋任漏網○壬
子

上奉

慈安皇太后

慈禧皇太后幸寧壽宮侍午膳○賜王以下文
武大臣蒙古王貝勒貝子額駙暨琉球使臣
等食○浙江巡撫楊昌濬奏皖浙交界之廣
德孝豐境內土匪蠢動經副將羅啟勇等勦

捕擒獲賊黨沈添保等正法得旨著懷遵本
月二十日諭旨檄飭該副將等會同安徽派
出各員不分畛域實力搜捕餘匪並將關汶
淮嚴拏務獲毋任遠颺又奏遵旨派員查辦
湖州各屬墾荒客民分別安置批所有安置
驅逐一切章程著檄飭地方官各就情形妥
為籌議悉心辦理毋得有名無實○癸丑
萬壽節遣官祭

太廟後殿遣官祭

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵遣官祭

顯佑宮

東嶽廟

城隍廟○

上詣

大高殿

壽皇殿行禮○詣鍾粹宮

慈安皇太后前行禮長春宮

慈禧皇太后前行禮御乾清宮王以下文武

大臣蒙古王貝勒貝子額駙等行慶賀禮眾

官暨琉球使臣於午門外行禮奉

慈安皇太后

慈禧皇太后幸寧壽宮侍午膳○賜王以下文

武大臣蒙古王貝勒貝子額駙暨琉球使臣

等食○甲寅

上奉

慈安皇太后

慈禧皇太后幸漱芳齋侍午膳禮部以會試

中額請得旨滿洲取中八名蒙古取中二名

漢軍取中五名直隸取中二十四名奉天取

中三名山東取中二十二名山西取中十一

名河南取中十九名陝甘取中二十四名江

蘇取中二十六名安徽取中十八名浙江取

中二十五名江西取中二十三名湖北取中

十四名湖南取中十四名福建取中二十名

臺灣取中二名廣東取中十六名廣西取中

十三名四川取中十五名雲南取中十一名

貴州取中十一名○乙卯以湖南湘鄉職除

會匪出力賞總兵官朱唐洲從一品封典知

州曾紀渠等花翎把總彭蘭枝等藍翎餘加

銜升敘有差○丙辰予貴州各屬陣亡殉難

州判黃成弼等紳民婦女一百二十八員名

口分別旌卹如例○丁巳諭軍機大臣等定

安何璟奏籌議轉運軍糧一摺大同征兵所

需軍糧定安等本擬在布庫爾採買運至烏

蘭哈達軍臺因該處產糧無多挽運不易現

仍在歸綏購買取道蘇木六臺每駝每站酌

給雇價其採買價值及運解經費雜用何璟

已飭藩司籌款解交歸綏道撙節支用按月

報銷所籌尚為妥協即著照所議辦理仍著

定安何璟飭令國英將米石趕緊購齊俟各

起征兵過竣卽由蘇木六站運至察哈爾所屬之濟斯洪果爾交文盛派出督催轉運之員接收運赴烏屬臺站由烏接運抵科著文盛福濟榮全錦丕勒多爾濟奎昌文碩分別督飭該委員妥為轉運不得稍有遲誤糧運抵科時並著奎昌文碩照數驗收卽行咨覆定安何璟以憑查覈貢果爾已令帶隊馳赴前敵其各路督催事宜文盛現派何員接辦著迅速派往卽行奏聞將此由五百里各諭

令知之 命蘇尼特郡王那木濟勒旺楚克在御前行走賞托第布木黃纒）
上以孟夏時享

太廟自是日始齋戒三日 戊午諭內閣李鴻章奏練軍哨弁縱兵滋鬧分別訊擬一摺直隸提督傅振邦於本年正月間巡閱古北口練軍營盤該兵丁等輒藉口年節散歸家居營官馮勝林因催傳未齊向哨官富克金保申飭富克金保竟敢唆令眾兵出營喧鬧幫

帶官馮樹勳並不迅速赴營隨同彈壓意存觀望殊屬不成事體亟應從嚴懲辦遊擊銜儘先都司提標城守營千總富克金保題補守備馮樹勳均著卽行革職不准留營富克金保居心刁狡情節尤重並著發往軍臺效力贖罪提標左營把總李永貴右營把總喬有才於本哨兵丁隨眾滋事不能約束亦難辭咎均著暫行革職仍留營帶隊以觀後效提督傅振邦平時失於覺察亦有不合著交

部議處其逃兵蘇清泉等六名著李鴻章督飭地方文武嚴拏務獲訊明正法以肅軍律而昭炯戒 諭軍機大臣等李福泰奏勦除賓州貴縣賊巢等語匪首廖八占踞賓州下周村地方日久稽誅經副將潘其泰等帶兵進勦破其巢穴該匪率黨逃出旋經兵練擊斃客匪張平義等分踞遷江縣之白鶴村貴縣之松柏村情險負嵎亦經知府固魯鏗等督率兵勇分投圍攻當將張平義等擒獲正

法兩村匪巢同時攻克辦理尚惟妥協惟潰
逃餘匪難保不勾結黨與復滋事端著李福
泰督飭潯州府知府將貴縣土客各案認真
清理並分督兵勇搜捕餘黨以清餘孽前據
蘇鳳文奏咨商馮子材於入關後挑留十二
營撥赴南太鎮安思恩各府與原派之勇協
力清除伏莽仍著李福泰酌度情形督飭所
屬文武實力籌辦以期地方一律肅清將此
諭令知之以甘肅克復狄道州城出力賞

副將李忠林周高陞程文勝陳復陞劉加斌
陶占魁參將耿仕才盧萬德巴圖魯名號知
府李守愚參將唐玉德等花翎縣丞曾長林
等藍翎餘加銜升敘開復有差 己未
上以孟夏時享

太廟前期親詣行禮諭內閣恩麟德泰奏噶
布倫不遵節制請旨懲處一摺噶布倫密瑪
策忍在藏辦理一切公務諸多把持遇事阻
撓不遵諾們罕約束實屬咎有應得密瑪策

忍著革去噶布倫並東科爾仍交達賴喇嘛
按例嚴懲並飭令該管營官嚴加管束不准
出外別滋事端諭軍機大臣等奎昌等奏
支發兵糧章程大同官兵徑由賓爾烏蘇赴
科並口外需兵情形各摺片奎昌等所籌防
兵薪糧等項支發章程著戶部議奏前據定
安何璟奏大同征兵所需軍糧每月計需粟
米三百三四十石由歸綏採買轉運赴科按
一月作為一批等語是此項官兵口糧已經

定安何璟會商由山西按月支應此次奎昌
等請飭定安文盛各協解糧二千石自係未
悉三月二十七日寄諭籌辦情形所請應毋
庸議惟征兵出口後糧食刻不可緩若按月
批解沿途轉運設有遲滯恐難接濟著定安
何璟先籌數月之糧趕緊解赴科城以備緩
急隨後仍按月分批撥解俾免缺乏之虞文
盛前因烏屬各臺未齊令大同官兵暫緩來
口駐紮天鎮候調現在科城需兵甚急著福

濟榮全錦丕勒多爾濟將烏屬各臺應需一切迅速備齊以便吉林黑龍江馬隊過後大同兵亦可陸續前進自烏至科臺站並著福濟榮全錦丕勒多爾濟奎昌文碩先事豫籌錦丕勒多爾濟專管臺站更屬責無旁貸儻因供支缺乏致誤戎機該參贊尤不能當此重咎也並著文盛催令大同官兵剋期出口由賽爾烏蘇西進徑赴科城毋稍延緩庫倫防務緊要尤盼內地援軍早日到防所有前調宣化兵一千名及續調直隸兵一千名著文盛懍遵前旨妥籌應付催令陸續進發杜嘎爾行抵何處著卽統率馬隊星速進行確探賊蹤妥籌布置迅掃逆氛將此由六百里各諭令知之○科布多參贊大臣奎昌等奏遵旨查明烏里雅蘇台將軍福濟參贊大臣榮全各家屬殉難情形並前在塔爾巴哈台殉難之榮全家屬請飭部一併議卹從之○以內倉臺庫不戒於火監督鈺坤等下部議

處

大清穆宗繼天開運受中居正保大定功聖智誠孝信敏恭寬毅皇帝實錄卷之三百七

大清穆宗繼天開運受中居正保大定功聖智
誠孝信敏恭寬毅皇帝實錄卷之三百八

同治十年辛未夏四月庚申朔享

太廟遣怡親王載敦恭代行禮○

上詣鍾粹宮問

慈安皇太后安長春宮問

慈禧皇太后安至己丑皆如之○諭內閣禮部

奏據福建巡撫咨稱南安縣舉人王玉書呈

由本籍請咨會試府縣轉詳未到藩司詳請

先行給咨再飭取供結補行咨部經該部查

明王玉堂已於咸豐九年中式進士籤分刑

部主事當將試卷扣除傳集出具保結

洪榮等訊問均供王玉書早經中式進士在
籍病故該舉人等並未出結委係被人冒捏
並取具同鄉京官保結該舉人等實不知情
復據該舉人等呈稱尚有黃梧陽等四名身
故多年鄭超英等二人並未到京均被人冒
報恐仍有捏結情弊照呈按名傳訊均未到
部等語案關冒充舉人蒙混請咨亟應徹底
根究著英桂王凱泰確切查明照例懲辦不
得含混了事至舉人黃梧陽等何時身故未

據咨部鄭超英等是否親身到京著一併確
切查明嚴行究辦以杜弊端福建省既有此
等情弊他省恐亦在所不免並著各直省督
撫認真查察有犯必懲毋任奸徒作偽以肅
功令○諭軍機大臣等文煜等奏第六號輪
船開工第七號改造兵船情形一摺另片奏
船政大臣因病不能赴工請旨遵行等語閩
省第六號輪船現已購齊木料剋日開工即
著照文煜等所擬命名鎮海至輪船之設須

破多而馬力大方能利涉波濤制勝較有把握文煜等擬將第七號改造兵船不為無見著卽督飭在事人員與日意格悉心講求功歸實際不得曠日持久虛糜帑金沈葆楨辦理船政成效彰彰現雖病未就痊仍未可置身事外著文煜等督飭夏獻綸等認真妥辦並令該道等隨時稟商沈葆楨以昭慎重沈葆楨著俟服闋後再行赴工督率經理此係朝廷曲體孝思俯允所請該前撫毋再因病固辭以副委任將此各諭令知之禮部奏准盛京禮部送到朝鮮國王咨文係因甯古塔副都統照會該國派員赴塔春兩城收領逃民謹鈔錄原文密奏得旨據鈔錄照會內有方為兩國和好之道一語朝鮮本係屬國措詞殊為失當著禮部堂官行知該將軍轉飭各城嗣後給與照會不得仍用此等語句以符定制○壬戌諭軍機大臣等文盛奏籌辦駝隻並擬雇用車輛運送軍糧一摺察哈

爾所屬各臺駝隻供送征兵轉運軍械糧餉日無休息率已疲乏不堪使用文盛派委佐領何步登額等攜帶銀兩前往就地雇用著卽飭令該佐領等趕緊雇覓毋誤急需宣化官兵已於三月二十六日全行出口大同官兵擬於四月初四日起開日進發約於二十四日亦可走畢其續調直隸一軍卽令接續啟行仍著文盛妥為應付飭令依次前進迅速到防察哈爾吉林黑龍江馬隊前帶三箇月行糧計四月間卽應接濟文盛飭口北道購辦四箇月糧米先期解送惟口外駝隻缺乏兼之夏令駝隻不能得力文盛現擬雇用牛車於端節前趕緊運送著照所請准其動款辦理該都統卽迅速籌辦起運並行知福濟張廷岳等派員在哈爾尼敦賽爾烏蘇等處接收妥為存儲備用俾濟軍食將此由五百里諭令知之○追予江蘇江甯殉難道員陳克讓諡忠節

上以常雩祀

天於

圖丘自是日始齋戒三日○癸亥諭軍機大臣等劉銘傳奏派軍填紮寶雞一摺據奏唐定奎一軍已由華陰拔隊馳赴寶雞分軍駐紮隴州鳳縣等語劉銘傳飭令實力嚴防遇賊卽擊毋稍疏懈甘省秦州一帶與寶雞等處接壤該處情形若何刻下有無賊蹤范銘所部叛勇雖已收降有無餘匪滋事金積堡克

復後降眾是否安置妥協抑尚有餘匪竄併河州劉銘傳如探有確實情形隨時奏聞北山一帶伏莽未清該提督仍當派隊按捕以靖地方並分飭所部各營將弁隨時認真操練毋任勇丁稍滋事端另片奏丁憂提督請俟撤防後終制等語提督唐定奎膝學義均著暫行留營俟陝西撤防後准其回籍補行終制將此由四百里諭令知之○甲子追予安徽青陽陣亡文生林獻芹等賞卹如例○

乙丑常雩祀

天於

圖丘遣鄭親王承志恭代行禮丙寅諭內閣本日劉崐奏遵保攻克松柏洞苗巢及克復鎮遠等城出力人員開單請獎並另片聲明摺片單正繕齊拜發聞據營官戈鑑稟稱總兵陳大才等五員或撤遣出營或現已身故應將該五員此次保案刪除惟陳大才等業已列入清單請獎一經刪除全單卽應另繕未便因此數人致稽全案請將陳大才等保舉撤銷等語除陳大才等業經扣除外惟臣工陳奏事件宜如何小心敬慎乃劉崐於保舉清單竟因業經繕就憚於更換奏請於降旨時代為撤銷實屬不成事體劉崐著交部議處尋議劉崐應照不應重杖八十例降二級留任得旨准其抵銷諭軍機大臣等劉崐奏援黔官軍疊破苗寨進規凱里一摺苗匪盤踞高坡雞擺尾等處經席寶田派軍進

勦先將南瓦台盤兩寨攻克逆酋金大五撲
犯鎮安當經擊退旋將高坡雞擺尾一帶賊
寨勦平其甕谷隴賊巢亦一律埽除辦理尚
屬得手所有此次出力人員著准其附入克
復台拱案內彙請獎敘席寶田現擬派兵會
勦加巴牛場並分軍擇要駐紮通清江台拱
之氣扼丹江古州之要自率大軍由排羊排
雜前進著劉崐飭令乘此聲威力圖進取務
將丹江以東賊寨悉數蕩平由凱里等處節
節進勦以期戡定苗疆將此由六百里諭令
知之以故科爾沁輔國公布彥圖固魯克
齊兄布彥巴哩克齊襲爵添設江蘇堰盱
同知一缺駐守長隄改揚州府總捕同知為
河務同知仍兼管地方從巡撫張之萬請也
以湖南官軍收復貴州巖門司等城出力
賞總兵官席啟昭于高勝正一品封典道員
張自牧副將席世長廖德茂參將蔣其順巴
圖魯名號遊擊劉得勝等花翎通判李永琰

等藍翎餘加銜升敘有差以湖南官軍收
復貴州鎮遠施秉等城出力賞提督彭文興
曹復勝總兵官張祖恩鄧善端一品封典總
兵官鄧新標鄧在仁徐士松副將歐飛林唐
步雲鄧善居都司李維清巴圖魯名號同知
姜興國都司潘才喜等花翎千總瞿定國等
藍翎餘加銜升敘有差予貴州鎮安陣亡
參將陳永楨都司王得忠周占魁守備彭景
福外委韋玖祭葬世職加等撥直隸司庫
銀一萬兩解交

東陵永濟庫備用撥直隸司庫銀二千兩修
理

隆福寺行宮丁卯

上奉

慈安皇太后

慈禧皇太后幸漱芳齋侍午膳追予山東各
屬陣亡殉難縣丞高廷保等紳民婦女二千
七百七十二員名口分別旌卹如例戊辰

追予湖北各屬陣亡殉難巡檢余映奎等紳民婦女五十三員名口分別旌卹如例○已諭內閣德英奏遵查索倫領隊大臣患病不能起程圖庫爾奏請假調理各一摺索倫領隊大臣圖庫爾患病未痊著自三月二十日起賞假兩箇月趕緊調治一經痊愈卽著懍遵前旨速由關外取道馳驛前赴新任毋庸來京請訓至此次簡放圖庫爾領隊大臣係同治八年十月二十二日諭旨據圖庫爾

奏稱至今未接部咨等語實堪詫異著兵部將咨文如何遲延及有無遺漏之處確切查明具奏○諭軍機大臣等英桂王凱奏泰察看道員人地不宜遵旨撤回一摺據稱署臺灣道黎兆棠到任已閱年餘治理地方意見偏執袒庇同鄉不洽輿評等語黎兆棠業經該督等撤回該道本係江西補用人員卽著文煜等飭令交代清楚仍回江省毋庸留閩該員回江西後並著劉坤一留心察看據實

具奏另片奏委定保接署臺灣道員缺等語臺灣孤懸海外兼有交涉事件非為守兼優之員不克勝任定保於署理是缺人地是否相宜仍著文煜等隨時察看以重地方將此各諭令知之○又諭英桂等奏逃犯結黨起事現在辦理一摺福建匪徒吳灝漢前因犯罪發遣竟敢逃回原籍在浦城之舊館地方結盟樹黨勾結齋匪游民希圖起事經地方文武往拏復敢率眾抗拒傷害勇丁亟須嚴

拏懲辦雖經英桂等派出員弁捕獲犯屬匪黨三十餘名惟逆首吳灝漢及頭目林沅得等尚未弋獲英桂等現已咨商提督羅大春折回浦城督率辦理卽著文煜英桂王凱泰知照該提督趕緊馳回督率派出各員弁將該犯吳灝漢等嚴密查拏務獲究辦不准一名漏網以期盡絕根株仍一面分飭地方官將各該處紙槽廠戶及種山棚民一律認真清理並責令約束工人不得容留匪類以靖

地方而遏亂萌將此各諭令知之。又諭金順奏回匪被勒求撫現籌妥辦一摺通貴餘匪遁入納家牕後冀與納萬郭等匪黨伺隙逃竄疊被官軍攔擊無路可逃擒斬著名首夥多名敗匪潰奔入寨窮蹙求降金順會商張曜勒令此起回眾盡繳馬械平毀寨牆若能悔罪輸誠將藏匿器械繳清聽受約束即著該署將軍等分別妥為安插予以自新儻敢怙惡不悛心懷疑貳仍即督兵痛剿毋留

餘孽甯靈西岸回務金順與張曜會商辦理總當分別良莠相機勦撫不可草率了事其投出靈州回民二百餘名金順已遣令東渡由該地方官收管安插著左宗棠飭令劉錦棠黃鼎遇此項回民抵籍即創行該管地方官隨時稽束妥籌安置毋令失所免致滋生事端金積堡攻復後左宗棠究從何路移營作何布置河狄匪勢若何如何設法進剿該大臣自應統籌全局將賊匪次第蕩平何以

日久尚未奏及殊深廬繫著即將籌辦情形據實具奏不得稍涉遲回致負委任前據福濟等奏拏獲賊探成娃子係甘肅平番縣人寄居肅州據供同治八年楊軍門與回回講和上年八月內回匪十人持楊軍門票出來貿易隨後出來五百人又有穆姓二人持楊軍門印票赴將軍公旗下貿易後跟賊三百多人等語所稱楊軍門是否即楊占鼐有無此等情事著左宗棠查明具奏將此由五百里各諭令知之○子甘肅納家牕陣亡遊擊尚清蘭守備秦得銀把總吳天恆等祭葬世職加等○庚午陝西巡撫蔣志章奏漢中鎮總兵李輝武奉調征黔所遺南路寶雞等處防務經提督劉銘傳飭派唐定奎分營填紮與延安防兵聯絡一氣得旨陝北沿邊各要隘著飭帶兵員升嚴為戒備毋稍疏虞其招集安撫各事宜並著檄飭該府州縣妥為經理以靖地方○辛未以望雨仍殷

上詣

大高殿祈禱行禮○遣惇親王奕誼詣

時應宮恭親王奕訢詣

昭顯廟醇親王奕譞詣

宣仁廟孚郡王奕譔詣

凝和廟拈香○諭內閣李鴻章奏揀員升補

要缺知府並遺缺知府另行擬補一摺據稱

天津地處海疆知府員缺緊要馬繩武署任

以來辦理妥協請准以該員補授等語天津

府知府著准其以馬繩武補授嗣後不得援

以為例前經簡放之天津府遺缺知府裕長

卽著照所請補授大名府知府○諭軍機大

臣等恩承等奏會勘

永陵河工按照原估應修處所量為增改開單

呈覽一摺

永陵草倉蘇子二河各工既據奏稱按照原估

做法相度現在形勢量為增改可保盛漲衝

淘等語均著照所擬妥籌辦理其應行增挖

引河一道攔水壩二道並著一律興辦恩承

溫葆深都興阿務當悉心會商認真經理以

期工堪經久餉不虛糜其續行添改工程估

計尚不敷銀七千九百餘兩現赴盛京戶部

先行支領銀二千兩其餘銀兩工竣再行找

領卽著照所請行將此各諭令知之○又諭

成祿奏頭起官軍分紮關外並籌辦後路情

形一摺成祿所派頭起出關兵勇分紮敦煌

二營玉門一營去冬已抵防所現在關外附

近地方是否安靖著成祿飭令遊擊李天和

等與安西玉門原駐各軍聯絡聲勢互為應

援以資防剿上年竄擾甘郡之賊於十一月

初間折回東去而自山丹至鎮番一帶賊蹤

出沒無常道路不通且西甯之賊常赴北套

擄糧是蘭州以西賊勢仍行滋蔓左宗棠務

當統籌全局一面進兵河狄一面派軍由西

路繞截毋令賊匪向甘涼遠竄致追剿又形

棘手上年賊匪闖入山丹圍攻甘郡楊占鰲

擁兵自衛閉關株守以致城外地方悉遭蹂躪著左宗棠將該提督貽誤情形查明具奏成祿現在駐紮高臺著督率兵勇認真訓練遇有賊蹤竄近隨時實力堵剿毋稍鬆懈吉林黑龍江官兵現在無可調撥該提督當就現有兵力相機布置另片奏署高臺縣知縣秦惠鈞因奉委赴肅州查辦事件行至南山馬營岡地方遇賊被害殊堪憫惻著交部照例議卹並著左宗棠遴員接署高臺以重地方

此股匪徒究從何處竄至現又竄往何方著一併查明具奏將此由六百里各諭令知之○以內閣學士訥仁為繙譯會試正考官理藩院右侍郎廣壽為副考官壬申諭內閣本月二十五日鍾端郡王安葬園寢著派孚郡王前往代朕賜奠○又諭德英奏遵查擅議招墾之蒙古協理台吉等官據實參奏一摺杜爾伯特署扎薩克協理台吉那遜烏爾吉等將該蒙古旗荒擅議招墾希圖漁利

經德英及該盟長疊次阻止竟敢抗不遵依仍懇德英代為奏請招墾實屬悖謬著扎薩克協理台吉那遜烏爾吉色德恩霍爾察畢里克圖均著革職永不敘用○以正黃旗蒙古都統載容署正黃旗領侍衛內大臣鑲紅旗漢軍都統奕劻署鑲藍旗漢軍都統○癸酉閩浙總督英桂等奏遵查延建邵道鍾祿並無劣蹟得旨仍著隨時察看如果不能勝任卽行奏參不得稍有含混致誤地方○甲

戌諭軍機大臣等吳棠奏派隊赴黔留兵以守川邊並簡練綠營情形一摺前因曾壁光等奏黔省兵力不敷當照所請調李輝武一軍前往助剿茲據吳棠奏稱該軍扼守漢南三載以來邊境賴以稍安若全行撤去難資緩急請留二營駐紮陝甘交界之大安驛以固川邊其餘三營仍令赴黔等語所奏自為兼顧蜀境起見卽著照所擬辦理至所稱調往之三營先給兩箇月餉銀解交李輝武料

簡啟行並請將以前欠餉仍由川省酌補以後月餉即歸周達武於各省協餉內均勻撥放等語該軍向食川餉無論在陝在黔於川省同一支應並未額外添餉且黔省兵餉正苦不足若令李輝武所部由該省勻撥月餉勢必愈形支絀著吳棠仍遵前旨將該軍月餉照常籌解不得意存推諉並著飭令李輝武統帶所部三營迅速起程曾璧光周達武俟該軍到黔後即行酌量添募歸併統帶藉

資調遣其陝南一帶已據劉銘傳蔣志章先後奏報調派唐定奎等營分紮寶雞等處仍著飭令在防各軍與川省所留兩營聯絡聲勢嚴密扼守以固邊防川省綠營既據吳棠奏稱簡練整頓可得精兵九千餘人仍著隨時勤加訓練悉成勁旅不得徒託空言有名無實將此由五百里諭知吳棠蔣志章曾璧光劉銘傳並傳諭周達武知之又諭文麟等奏安集延回首遞送檔子烏城送回投順

安集延逆首馬仲由烏城遞稟乞撫各一摺安集延怕夏圍攻番城勦敗回匪該怕夏如果為國出力何以呈遞檔子內並無投誠交城之語且將該城漢民概令薙髮發往南路不知安插何地該怕夏現在城外安營窺濠派撥纏頭看守城垣其為希圖占踞地方顯而易見且偪令烏城送回投順並將馬仲放給迪化總頭目寶屬包藏禍心文麟等現擬設法羈縻給與諭帖飭令投誠交城亦不能

不權宜辦理但須慎之又慎嚴密防維不可稍涉大意致為該怕夏所給參將白世泰回營後即將所探安集延及烏城確實情形迅速具奏勇目徐學功等所帶練勇各衛身家不肯從賊洵堪嘉尚自應收留拊循以固眾心即著照文麟等所籌妥為辦理該辦事大臣等現今孔才帶領馬隊馳赴西路收復奇台等處即著飭令統率所部迅圖攻拔並密探吐魯番軍情豫籌防範文麟等給該怕夏

帖內有擬據情奏請破格施恩將怕夏從優獎勵一俟欽奉諭旨即送交怕夏恭閱等語而摺內於此節如何辦法並未聲敘著文麟等將辦理情形妥為籌畫仍一面奏聞索煥章病故是否確實怕夏是否安集延回酋名目抑係人名並著一併具奏文麟等續報馬仲具稟投誠現今烏仁泰等傳諭馬仲會同妥得璘及頭目等同赴孔才營中帶領來哈等語馬仲如果真心投誠自可因勢利導酌量辦理若觀望不前即屬心懷叵測不可輕率議撫委員等稟詞亦未可輕信務須妥慎籌辦成祿當靜聽文麟辦法悉心會商毋得冒昧從事致涉兩歧將此由六百里各諭令知之○以三品頂帶已革直隸總督劉長佑為廣東巡撫未到任前仍以兩廣總督瑞麟兼署以廣西布政使康國器暫護巡撫予故署廣西巡撫廣東巡撫李福泰祭葬如例

大清穆宗繼天開運受中居正保大定功聖智誠孝信敏恭寬毅皇帝實錄卷之三百八

大清穆宗繼天開運受中居正保大定功聖智
誠孝信敏恭寬毅皇帝實錄卷之三百九

同治十年辛未四月乙亥諭內閣楊昌濬奏
省城及各府屬疊遭風雹損房屋並壓斃
人民春花受傷等語本年二三月間浙江省
城猝遭暴風雨雹倒塌民房壓斃人口餘杭
縣風雹尤甚衙署倉廩民房均有坍塌春花
閒有受傷嚴州金華紹興湖州各府亦各被
風雹山陰會稽二縣並坍塌廟宇民房傷斃
人口此次風雹猛烈地方民人猝受災傷殊
深軫念著楊昌濬飭令各該地方官查明被
災輕重情形妥為辦理坍塌廟宇官房分別

同治十年辛未四月乙亥諭內閣楊昌濬奏

省城及各府屬疊遭風雹損房屋並壓斃
人民春花受傷等語本年二三月間浙江省
城猝遭暴風雨雹倒塌民房壓斃人口餘杭
縣風雹尤甚衙署倉廩民房均有坍塌春花
閒有受傷嚴州金華紹興湖州各府亦各被
風雹山陰會稽二縣並坍塌廟宇民房傷斃
人口此次風雹猛烈地方民人猝受災傷殊
深軫念著楊昌濬飭令各該地方官查明被
災輕重情形妥為辦理坍塌廟宇官房分別

委勘估修如有倒塌民房無力修復及壓斃
人口著量予撫恤其春花受傷較重之處並
著查明暫緩徵收以紓民力○又諭瑞麟奏
紳民勦匪守城出力援案請加學額一摺廣
東連山連州歸善陸豐德慶開平鶴山恩平
花縣饒平等廳州縣地方前曾被匪竄擾該
處紳民捐貲練勇隨同官兵防勦力保危城
實屬深明大義敵愾同仇著照所請將連山
連州歸善陸豐德慶開平鶴山恩平花縣饒
平等廳州縣文武學額永遠加廣各二名用
昭激勸惟該省學額歷次加廣甚多若再陸
續奏請未免太濫嗣後紳民出力請獎著不
准援案請加學額以示限制○又諭前因記
名提督金運昌委員鄧瑞品在阿拉善旗採
買糧石拷打市民縱勇搶掠當經諭令左宗
棠查明懲辦茲據查明具奏委員鄧瑞品即
鄧瑞徵雖查無拷打縱掠情事而奉委採買
糧石並不與協理台吉阿布哩和衷商辦又

不能約束勇丁致令滋事實屬任性妄為且該委員前在甯夏辦糧藉端招搖短欠糧價迨經紳民控告始行交清尤為貪鄙分發兩淮鹽大使鄧瑞徵著卽革職永不敘用其所得補缺後以知州用並戴藍翎保案一併撤銷並不准投效軍營以昭儆戒○諭軍機大臣等前因袁保恆奏西征協餉積欠過多請旨嚴催當諭戶部速議具奏茲據奏稱查明除江西閩海關兩處新舊協餉埽數解清外

山東欠解原撥左營餉銀二十九萬兩豫師餉銀九萬兩山西欠解原撥左營餉銀七十五萬九千餘兩穆營餉銀六十五萬五千兩豫師餉銀一萬四千兩河南欠解原撥左營餉銀一百十六萬七千餘兩穆營餉銀十五萬兩豫師餉銀九萬兩湖北欠解續添陝甘餉銀七十七萬兩穆營餉銀五十六萬兩浙江欠解續添陝甘餉銀一百十三萬兩福建欠解續添陝甘餉銀八十四萬兩湖南欠解

原撥左營餉銀四十七萬餘兩安徽欠解續添陝甘餉銀三十四萬兩四川欠解穆營並米價銀一百六十六萬兩江蘇欠解續添陝甘餉銀六十四萬五千兩專協陝西餉銀三萬兩淮欠解豫師餉銀五萬三千兩廣東欠解原撥左營並續添陝甘餉銀七十六萬兩專協陝西餉銀五十五萬兩江漢關欠解專協陝西餉銀三萬兩粵海關欠解專協陝西餉銀九萬兩等語甘省各軍餉需極形缺

乏亟應速籌接濟著各該督撫監督迅將原撥續撥陝甘各月餉按月如數解清不准稍有帶欠其向有積欠並提撥未解之省並著該督撫等嚴飭司道陸續籌解清完甘省軍務現在較為得手儻餉需缺乏必至停兵待餉貽誤戎機如各該省任意遲延著袁保恆查照同治八年奏案開具各省欠解成數知照左宗棠查取各該督撫司道監督銜名卽行分別奏參將此由五百里諭知曾國藩文

煜英桂李瀚章吳崇瑞麟張之萬英翰丁寶楨何璟李鶴年王凱奏楊昌濬郭柏蔭劉崐並傳諭袁保恆張樹聲崇禮知之○又諭左宗棠奏南路官軍截剿竄匪獲勝一摺河州回匪分竄鞏秦各屬疊經官軍擊敗逆首張運澄沙母驢子等均斃於陣匪黨殲除殆盡另股回匪由成縣擾及階州亦經鄧光耀等擊退此次由安定南犯之賊不過千餘而分支狂竄勢頗慄悍誠恐該逆先以小股嘗試

繼將大股出竄以圖一逞左宗棠現調劉明燈所部八營進紮馬營監以向安定徐文秀撥所部四營由靜甯州延紮會甯並挽運軍糧以規進取著卽妥籌布置剋日進兵以期節節掃蕩前據左宗棠奏稱撫回李德昌求赴河州曉諭近日該處情形究竟若何該大臣務當相度機宜速籌攻剿斷不可任其觀望遲回致墮緩兵之計金積堡收復後北路有無餘孽潛藏應否留兵駐紮並如何調派

各營分投西進之處均著詳悉奏聞將此由五百里諭令知之○以甘肅攻克金積堡賊巢出力賞提督章合才蕭章開何作霖陶定昇李雲貴白玉翎管各一支白玉搬指各一箇玉柄小刀各一把大荷包各一對小荷包各兩箇余虎恩正一品封典熊有常易致中譚拔萃李占椿潘運璋譚上連黃馬褂喻執益等下部優敘○丙子孝端文皇后忌辰遣官祭

昭陵○諭內閣倭仁奏病久未愈請仍准開缺一摺倭仁著再賞假兩箇月無庸開缺並著賞給人蔭六兩以資調理○賞會試年老舉人陳絨等六十三人司業編修檢討學正職銜有差○丁丑諭軍機大臣等定安奏撥隊填紮纏金騰出馬隊西進謹陳籌辦情形一摺前因定安軍營馬步各隊陸續撤回諭令該將軍於金運昌所部到營後妥籌調派以便騰出薩薩布馬隊赴烏援剿茲據定安奏

稱甯夏平羅一帶漸次肅清無須添兵助剿惟靈州等處需兵駐守現令金運昌督飭全軍仍紮靈州以資鎮攝其纏金地方已飭劉廷於所部五營內先行抽撥一營就近趕赴纏金駐紮騰出薩薩布馬隊剋日起程等語所籌均尚周密即著定安妥為辦理毋誤事機至薩薩布各起馬隊官兵一千二百餘員名定安前議擬令取道烏喇特旗徑赴烏城現因查探該旗荒沙戈壁並無人煙村落駝馬雇覓維艱軍行不易擬仍由歸化城赴十八臺歸軍臺大路行走亦是正辦即著定安傳知薩薩布督隊暫紮茂明安等旗境內相機進發文盛前奏宣化官兵全數出口大同官兵約於四月二十四日亦可走畢其續調直隸一軍即令接續啟行等語仍著文盛妥為應付催令依次前進一俟各軍全行出口即知照定安督催薩薩布一軍接踵西行毋稍遲誤將此由四百里各諭令知之○戊寅

諭軍機大臣等杜嘎爾奏到營日期及軍務地方大略情形一摺杜嘎爾已於四月初三日督帶馬隊馳抵哈爾尼敦臺站惟馬匹疲瘁水草缺乏蒙古生計維艱需用各物皆難應手該副都統現在貢鄂博地方移營暫駐著即咨商福濟等將需用駝馬牛羊等件趕緊催解以應要需福濟崇全錦丕勒多爾濟務即檄飭各蒙古臺站設法應付毋得袖手旁觀置之不顧蘇彰阿抵烏後即著福濟等飭令扼要防堵遇賊即擊並將在城各官兵實力整頓以資得力軍行糧食最為緊要該官兵裹帶行糧轉瞬即將罄盡亟應源源接濟著文盛飭令口北道廣為購辦陸續運解該都統前奏派參領畢都里業接辦轉運事宜著即飭令該參領實力督催毋稍遲誤前據定安覆奏歸綏設局採買米麵由蘇木臺站運送十八臺並著速為辦理不可稍涉遲延其宣化大同官兵現已先後出口所有該

兩軍糧餉並著李鴻章張樹聲飭令承辦之
員速籌應付軍士遠道出征朝廷深為廕念
務使軍食無缺方可責以用命諒該將軍都
統督撫等必能迅速籌辦也前諭李鴻章續
調直隸官兵一千名前赴庫倫究竟曾否調
派何人統帶定於何時起程著該督卽行奏
聞將此由六百里諭知李鴻章定安福濟榮
全錦丕勒多爾濟文盛杜嘎爾並傳諭張樹
聲知之○禮部以繙譯會試中額請得旨京

旗取中一名駐防取中三名○己卯諭軍機
大臣等穆圖善豫師奏擊退平番竄匪會商
布置情形一摺甘肅平番縣境於本年二月
間有肅州投誠陝回一千數百名由成祿派
員護送前往米拉溝據原解委員聲稱定期
十日仍由米拉溝折回赴肅乃逾期仍未折
回忽報米拉溝有陝賊多人四出殺掠復於
金家泉等處滋擾先後經豫師派兵擊斃
匪甚多該匪現已分竄入山卽著豫師飭令

派出各營分投搜捕認真扼堵務將此股賊
匪悉數殲除平番防勇無多並著左宗棠穆
圖善抽調勁旅協同防剿以資厚集原赴米
拉溝陝回尚未折回現在滋事之匪是否卽
係此項回眾且該陝回等現須在肅安插何
以先送至米拉溝既須由米拉溝折回肅州
何以原解委員又不在平番守候其辦理詳
細情形何以不先期知照穆圖善等著成祿
據實奏聞並一面妥為辦理毋令貽害地方

甘涼一帶該將軍等已飭楊占鼇王仁和一
體防範卽著隨時檄令該提督等認真扼守
不可稍涉疏虞碾伯一帶賊股亦當檄令巴
扎果莽等處團勇合力兜捕保衛地方將此
由五百里各諭令知之○以大學士瑞常戶
部尚書寶鑒刑部尚書全慶工部尚書毛昶
熙都察院左都御史龐鍾璐戶部左侍郎延
煦兵部右侍郎黃倬都察院左副都御史劉
有銘為殿試讀卷官○以阻撓隄工湖北在

籍道員陳相清革職訊辦。○庚辰策試天下貢士。聯珠等三百二十三人於保和殿制。曰朕寅紹丕基。撫臨寰宇。默荷上穹垂佑。

列聖詒謀。兢業勅幾。日慎一日。承兩宮之訓迪。期四海之乂安。深維誠意正心之要。通經致用之方。何以崇實而黜華。何以興賢而致治。集思廣益。莫於實政。有裨茲當臨軒發策之時。悉心諮訪。爾多士其敬聽朕命。

人心道心之訓。肇自虞廷。帝王所以與天下相見者。心也。書所謂享天心。肩一心。蓋徹上下之義也。心之用。主乎敬。堯典一篇。始終皆曰。欽。卽至於元首股肱。賡歌喜起。而猶勗以欽。此傳心之功效也。禹之祗台。湯之聖敬。文之小心。武之執競。足相證明。後世如唐太宗之帝範。范祖禹之帝學。其言有可採歟。真德秀大學衍義。僅及修身齊家而止。何以不言治平。而明邱濬補之。能約舉其要歟。自漢以

來。儒者相傳。但言五經。而唐時立之學官。則云九經。九經者。三禮三傳。分而習之。故為九經也。其刻石國子學。則併孝經論語爾雅而言。其增益果在何時。唐太宗詔顏師古攷定五經。頒於天下。又以儒學多門。章句繁雜。詔孔穎達諸儒。譌定五經義疏。能分析其義歟。至義疏之外。先儒之說。有足羽翼經傳者。能略言其目歟。書曰。慎乃儉德。傳曰。儉德之共。自古帝王。未有不以節儉為天下先者。帝堯茅茨不翦。帝舜甌盆無牘。大禹卑宮。文王卑服。尚已。嗣後惟漢文帝躬行儉德。遂成富庶之業。享世長久。他如晉武帝。隋文帝。亦稱克儉。而行政或未盡合宜。其故安在。國儉國奢。由於上之所示。山樞蟋蟀之風。最為近古。今則服食器用。競為美觀。士庶多踰禮之嫌。閭閻鮮蓋藏之實。果何由力戒浮華。而使風氣日臻樸茂歟。古之用人。德行為首。才能次之。虞廷載采。亦有九德。周禮賓興。惟以三物法

至善也。兩漢以來，刺史守相得專辟召之權。魏晉而後，九品中正得司人物之柄行之果。能無弊歟？至隋始以科目取士。唐制設科雖多，而明經進士尤為得人。宋時司馬光分路取人之說，主均額以息奔競。歐陽修但務擇人之論，主覈實以免繆濫。二者孰是？至光欲以十科取士，朱子又欲分年試士，其目安在？蘇軾之議經義試士，劉敞之議賢良方正，亦有可採歟？夫建中以立極，稽古以右文，崇儉以化民，任賢以立政，皆致治之宏模。綏猷之極則，爾多士服習有年，對揚伊始，其各陳謨論，毋泛母隱。朕將親覽焉。○諭軍機大臣等：劉嶽昭奏，毓英奏，勦退川省蠻匪，疏通關井，餉道現飭籌辦，江防一摺。四川蠻匪自襲踞求雨堡後，分竄雲南之大關、永善各地方，阻塞關井，餉道。經劉嶽昭等飭令總兵李家福等派副將劉奇義遊擊曹世貴各軍分赴大關、永善迎擊，斬馘甚夥。大關之賊退竄筠連。

宜賓邊境川軍迎頭截擊，復經滇軍尾追殲滅殆盡。永善官軍攻克求雨堡，並復蔣家沱等處碉卡。境內肅清，餉道均已疏通。勦辦尚屬得手。惟蠻性出沒無定，亟應整頓江防，以杜回竄。著劉嶽昭、岑毓英督飭李家福等嚴飭沿江文武修築碉卡，置備戰具，並檄劉奇義率勇嚴扼隘口，會同原設兵練實力梭巡。毋得稍有疏虞。現在滇省東南各屬次第底定，迤西大理一帶賊勢如何，亟宜乘機規復。

應由何路進兵之處，並著該督撫悉心妥籌辦理。迅速具奏。將此由五百里各諭令知之。○以雲南大關等處疏通防蠻匪入境，暫革署遊擊譚美職，仍留營。○辛巳。

上復詣

大高殿祈雨行禮。○遣惇親王奕訢詣

時應宮恭親王奕訢詣

昭顯廟醇郡王奕譞詣

宣仁廟孚郡王奕誨詣

凝和廟睿親王德長詣

覺生寺豫親王本格詣

黑龍潭克勤郡王晉祺詣密雲縣

白龍潭惠郡王奕詳詣清漪園

龍神祠鎮國公奕謨詣靜明園

龍神祠拈香○諭內閣大學士倭仁學術純

正志慮忠誠受

先朝知遇之隆由翰林洊躋卿貳

特恩命直上書房旋授盛京侍郎均能恪恭盡

職朕御極之初蒙兩宮

皇太后簡用耆碩擢任正卿旋晉綸扉並命在

弘德殿授讀朝夕納誨於茲十年深資啟沃

前因患病屢請開缺疊經賞假並賞給人蔭

以資調攝遽聞溘逝悼惜良深披覽遺章於

修齊治平之道敷陳剴切語不及私閱之尤

深悽愴著賞給陀羅經被派貝勒奕劻帶領

侍衛十員卽日前往奠醊加恩晉贈太保照

大學士例賜卹入祀賢良祠任內一切處分

悉予開復應得卹典該衙門察例具奏伊子
廣東候補同知福綸著俟服闋後以同知留
於該省卽補理藩院員外郎福裕著俟服闋
後以該衙門郎中補用伊孫戶部候補員外
郎衡峻著以本部員外郎卽補衡瑞著賞給
舉人准其一體會試衡齡著賞給主事衡珊
衡琪均著賞給內閣中書用示篤念耆臣至
意尋予祭葬諡文端○以吏部尚書單懋謙
管國子監事○追予河南嵩縣陣亡知縣王

萬齡建立專祠○壬午諭軍機大臣等成祿
奏歷陳軍務掣肘並辦理撫回情形各摺片
前因成祿駐軍高臺諭令左宗棠妥籌兼顧
茲據該提督奏稱糧餉兩絀情形萬緊駐師
日久事勢更難支持等語成祿一軍疊諭汰
弱留強以資得力不必紛紛招募徒耗餉需
惟非左宗棠隨時兼顧恐致貽誤事機著左
宗棠統籌全局遇有該提督咨商一切機宜
應行應止務當悉心會商妥為經畫庶免該

提督無所適從。至左宗棠新定章程出差員弁均各發給盤川。不准地方官支應。自是正辦而成。祿軍營餉精缺乏。所派委員不能優給。川貲亦係實在情形。若非速籌接濟。不但飢軍難以久持。卽一切用款亦屬不敷。支發著戶部查明成祿協餉咨催各該省督撫迅速籌解。毋任缺乏。以濟要需。投誠陝回據成祿聲稱尚非虛偽。該提督務當隨時察看。妥為防範。不可為其所給。將此由四百里各諭令知之。○癸未。

上御養心殿召讀卷官入親閱定進呈十卷甲第○甲申。

上御太和殿傳臚賜一甲梁耀樞高岳崧郁崑三人進士及第二甲惲彥彬等一百二十人進士出身三甲李紱藻等二百人同進士出身○諭軍機大臣等李鴻章奏查閱海口礮臺現籌布置情形等語。大沽海口南北兩岸礮臺日就傾壞。李鴻章現令副將羅榮光督

率兵夫擇要興築。先將營壘加挑堅厚。添築夾牆並擬於礮臺前加築護臺。復於牆外添築欄潮土壩一道。以免潮汐侵刷。又將蘇局舊存炸礮及江甯礮局製成洋礮陸續運津。並委員添購西洋新式巨礮數尊。以備更換。操習所籌均係未雨綢繆。至計卽著該督妥為經理行之。以漸持之。以恆務令海疆要地。屹若長城。方為不負委任。至北塘與大沽犄角關繫緊要。李鴻章已調周得勝帶運化練軍一千名移紮北塘。卽著飭令該總兵實力操防。將應設礮臺次第修整。俾壯聲威。其各該處應需經費並著該督悉心籌畫。期收得寸得尺之效。不可畏難中輟。致廢遠謀。將此諭令知之。○又諭前因張廷岳等奏庫倫防兵不敷分撥。當經疊諭李鴻章於前調宣化官兵一千名外再行續調直隸官兵一千名。前赴庫倫協同防守。茲據李鴻章奏稱本年調防烏庫官兵已有五千餘人沿途臺站苦

累已極駝隻倒斃甚多雇募幫運實屬不敷周轉現聞庫倫甚屬平靜前調宣化官兵訓練尚為整齊協防庫倫似可稍壯聲勢現經續派古北口練兵一千名飭令豫為整備俟秋涼後臺站駝匹數用屆時烏庫兩城如有警信再行調派出口等語所籌自係實在情形刻下杜嘎爾所帶各隊已抵哈爾尼敦分紮防堵蘇彰阿吉林黑龍江馬隊已抵烏城宣化頭起步隊亦即抵庫果能就現有兵力

認真防堵自可稍壯聲威庫倫地方現尚平靜所有一切籌防事宜仍著張廷岳阿爾塔什達妥為辦理並將現在賊勢軍情詳細具奏如果賊勢東趨亟須添兵即著該大臣等迅速奏調毋誤戎機將此由五百里各諭令知之 派刑部左侍郎賀壽慈前往

西陵會同輔國公榮頤恭勘

正紅門外石牌樓應修工程 乙酉諭內閣前

因錦丕勒多爾濟奏參福濟謬妄貽誤各款

當經諭令奎昌馳赴烏里雅蘇台會同榮全查明具奏茲據奎昌榮全奏稱上年賊陷烏城福濟遇救得生是否與賊同居此時無從質訊至以倉庫酬賊係得自傳聞亦無確據其奏報賊名係據難民稱述所殺蒙民均係乘機搶奪匪徒並非置之不理至被擾地方事前既令蒙古各盟固守藩籬事後又調內地大兵會合防剿尚非膜視不恤惟厄魯特人眾搶擄牲畜一節實有其事因烏城旋陷未及究辦至改調察哈爾馬隊上年七八月間福濟因賊已遠颺咨令暫在賽爾烏蘇一帶聽候調遣並未止令歸伍各等語福濟被參各節雖查無實據惟身膺邊寄不能振作有為力圖報稱實屬有負委任該將軍前經革職留任著即行革任以示懲儆錦丕勒多爾濟與福濟同辦一事不能和衷共濟迫債事後輒思諉過於人已屬非是本日復與福濟奎昌榮全聯銜奏請以該參贊能得眾心

為詞擬卽馳歸遊牧尤屬謬妄錦丕勒多爾濟著卽開參贊大臣之缺交理藩院嚴加議處至福濟被參案內馬兵常安子需索羊隻一節仍著奎昌榮全查明定擬具奏○諭軍機大臣等本日已有旨將金順補授烏里雅蘇台將軍令其馳赴新任毋庸來京請訓烏城防守緊要該將軍接奉此旨卽著迅速起程赴任以重職守甯夏一帶軍務卽著交張曜接辦該提督務將防勦事宜認真經理毋稍鬆懈嗣後遇有緊要軍務卽由張曜專摺奏報將此由五百里諭知金順並傳諭張曜知之○以甯夏副都統金順為烏里雅蘇台將軍未到任前以科布多參贊大臣奎昌署理實授乾清門侍衛謙禧甯夏副都統○命護山西巡撫張樹聲撥銀八萬五千兩解赴烏里雅蘇台科布多二城備本年經費○丙戌諭軍機大臣等張廷岳等奏請飭催帶兵大員乘時進勦籌撥烏城駝馬等項張樹聲

奏遵派將弁隨軍赴科各摺片本年三月間回匪突犯賽因諾顏部落阿畢爾米特旗所屬諾彥山一帶住戶多被搶掠四月初一日竄至固爾班賽汗等處焚掠並有四出竄擾之信現在該逆究竄何處著杜嘎爾統率馬隊探明賊蹤迅速進勦毋任蔓延奎昌榮全張廷岳阿爾塔什達務當各飭防兵嚴密堵禦力扼該逆竄突之路刻下關外大兵雲集時交夏令正可乘時進勦若徒久駐防所坐待賊至轉瞬又屆秋冬冰雪在地將士苦寒勦辦愈形棘手糜餉老師何日方能蕺事耶著杜嘎爾會商奎昌榮全張廷岳阿爾塔什達探明何路有賊卽由何路進勦以期迅速蕺功不得遷延時日坐耗餉需如杜嘎爾兵力尚單卽咨商張廷岳阿爾塔什達抽調庫倫防兵協助該逆一經大軍痛勦難保不沿邊回竄著定安金順張曜於沿邊一帶先事籌防以杜奔突宣化大同官兵均已起程著

文盛催令星速遄行。趨程前進。以赴戎機。昨據李鴻章奏。續派古北口練兵一千名。如烏庫兩城有警。再行調派出口。茲據張廷岳等奏。回逆出竄。請飭催續調官兵到防。著李鴻章。仍將續派古北口練兵一千名。妥為整備。剋日起程赴庫。以資厚集。烏里雅蘇台將軍等。以各軍咸集。需用駝馬等項。咨令庫屬圖車兩盟協同籌備。張廷岳等現已飭該兩盟將烏城指調駝馬。氈帳等項。無論足數與否。竭力籌辦。解交烏城應用。惟圖車兩盟供應已極苦累。亦係實在情形。嗣後所需一切。著奎昌榮全就近剴飭所屬西兩部落。未經被擾各旗。設法辦理。宣化大同官兵所需軍糧。極關緊要。著李鴻章張樹聲。懍遵前旨。妥籌應付。不得稍有貽誤。派往科城之桓昌等八員。張樹聲即飭迅速前進。烏里雅蘇台參贊大臣。本日已簡放多布沁扎木楚。該參贊即迅速起程。前赴新任。會同奎昌榮全將一切

應辦事宜。實心辦理。並將臺站事宜。竭力整頓。以副委任。將此由六百里諭知李鴻章。定安金順奎昌榮全多布沁扎木楚文盛杜嘎爾張廷岳阿爾塔什達。並傳諭張樹聲張曜知之。○實授錦州副都統奕榕吉林將軍。以護甯夏將軍記名副都統豐紳為錦州副都統。未到任前。以錦州協領古尼音布署理。○以扎薩克圖汗郡王銜扎薩克貝勒多布沁扎木楚為烏里雅蘇台蒙古參贊大臣。○丁亥。引見戊辰科散館人員。得旨。編修黃自元。王文在業。經授職二甲庶吉士。劉廷枚。吳華年。吳大澂。費延釐。葉大焯。潘衍桐。張登瀛。陳寶琛。吳寶恕。張人駿。徐文洄。徐會澧。李肇錫。慕榮幹。邵曰濂。鄭嵩齡。賀爾昌。姚協贊。戴恆邵。積誠。閻迺斌。何萊。福陳。啟泰。黃湘。李鴻達。廣熙。李振南。李培元。王炳泰。鍾簡。錫珍。李郁華。宗室寶廷。徐祥麟。胡喬年。劉春霖。劉治平。梁仲衡。高萬鵬。陸芝祥。劉海鰲。許景澄。周崇

傳余鑑何如璋洪良品譚承祖鄔純嘏鮑存
曉王鳳池俱著授為編修三甲庶吉士王邦
璽聯元嵩申趙汝臣鄭賢坊甘杰俱著授為
檢討皇甫治杜瑞麟苑萊池林楸社崔煥章
黃煦蕭振漢蔡以瑞關朝宗程澤霈姜球俱
著以部屬用張清元陶模吳士愷趙繼元馨
德劉常德焦肇駿魏弼文熊汝梅雲茂濟俱
著以知縣即用○以記名總兵官滕嗣林為
江蘇蘇松鎮總兵官○戊子

孝慎成皇后忌辰遣官祭

慕陵○諭內閣宗人府等衙門奏奪獲毆斃職
官人犯供係親王主令謹將咨取親供奏明
請旨遵辦一摺主事福珣被扎身死一案據
要犯已革三等護衛王壽供有伊主鄭親王
主使情事經該衙門行令鄭親王永志逐一
登覆該親王兩次投遞親供反覆辨論而王
壽堅執前供矢口不移案關親王主使糾毆
致斃人命虛實均應徹底根究著宗人府傳

令鄭親王永志到案質訊並著派軍機大臣
會同宗人府刑部詳細研鞫定擬具奏

大清穆宗繼天開運受中居正保大定功聖智
誠孝信敏恭寬毅皇帝實錄卷之三百九

御史所奏。是否可行。著曾國藩察看情形。悉心妥籌具奏。原摺著鈔給閱看。將此諭令知之。尋奏。遵查江蘇安徽兩省雖有荒田。皆與熟田交互錯綜。且畸零分布。不成片段。難以試辦。屯田數年後。客民土著亦必次第開墾。不至久荒。報聞。又諭劉銘傳奏調派隊伍駐防邊境。並陳探報情形各摺。片。河州竄出回股。擾掠秦州一帶。窺伺陝邊。劉銘傳現調提督吳宏洛等駐防長武等處。著卽飭令勤操部伍。扼要嚴防。遇有匪蹤。卽行攔擊。以固邊圉。陝北一帶。漸臻安靜。劉銘傳仍當妥為彈壓。接捕伏匪。並飭該將弁整肅營規。嚴禁滋擾。以期綏靖地方。密片一件。留中。將此由五百里諭令知之。又諭前因金積堡克復後。疊經諭令左宗棠。將如何移營進剿之處。妥籌布置。近聞河州回股。於四月初間。竄擾兩當徽縣一帶。旋向西去。十六日。隆德縣知縣周其俊會同馬隊。遇賊於馬廠野雞峴地。

方。接仗陣亡。隆德固原一帶。匪蹤出沒無定。兼之叛回馬彥瀧黨眾四百餘騎。潛伏其間。並聞另股回匪。在秦州西六十里鋪剽劫。攻破管子鎮以南民堡一處。經官軍追擊於初八日。至禮縣所屬長道鎮地方。接仗挫敗。十四日。又有回匪千餘騎。竄擾娘孃壩高橋。延擾牡丹園等處。秦州北鄉鹽合城地方。亦有賊蹤紛擾。此股回匪。約有三千餘眾。由河州潛渡洮河。長驅東下。現在盤踞甯遠縣屬之

馬塢新寺一帶。分股四出。以擾後路糧道。似此情形。賊勢甚為猖獗。著左宗棠將近日常情。確切查明具奏。前據奏稱調派劉明燈等所部分向安定靜甯等處。挽運軍糧。以規進取。諒該大臣必已全局在胸。速籌辦理。第恐所部將士。或因金積既克。北路稍定。遽爾志驕意滿。漸形懈弛。甚至觀望遷延。不遵調遣。此等軍營惡習。亦難保其必無。現在河州賊勢方張。正當激勵諸軍。鼓行而西。滅此朝食。

斷不可翫時。愒日坐失事機。仍著將如何籌辦情形迅速奏聞。以慰廑念。將此由五百里諭令知之。又諭杜嘎爾奏逆匪向東侵犯。現籌防勦情形。請催調承辦糧臺官員迅速出口各摺片。逆匪有赴翁音河哈爾尼敦附近之薩巴爾圖河推河等處東竄之信。另股距庫倫翁音站僅七八日路程。四月初間該逆分股在阿畢爾米特遊牧之白心圖西樓圖各寺盤踞。杜嘎爾現飭管帶吉林二起馬隊之訥蘇肯等前赴翁音驛駐紮。著卽飭令嚴密設防。一面偵賊所向。實力進勦。迅掃逆氛。逆匪現既擾及阿畢爾米特境內。勢將侵犯東南。亟應通力合作。會籌掃蕩。著定安金順奎昌榮全多布沁扎木楚文盛張廷岳阿爾塔什達一併偵探賊情。妥籌備禦。務期各路聲息相通。為一鼓聚殲之計。杜嘎爾統兵進勦。需用駝馬甚殷。著奎昌榮全多布沁扎木楚張廷岳阿爾塔什達將備調駝馬趕緊

備齊。解交杜嘎爾營中應用。杜嘎爾當懍遵前旨。探明何路有賊。星馳勦辦。不得頓兵不進。日久無功。烏城餉銀三十萬兩。業經杜嘎爾飭令貢果爾等擇地存儲看守。仍著妥為照料。不可稍有疏虞。所稱此項餉銀須有承辦官員專司開放等語。著卽咨商金順奎昌榮全多布沁扎木楚文盛等妥籌辦理。將此由六百里各諭令知之。命兵部尚書載齡戶部右侍郎李鴻藻教習庶吉士授一甲一名進士梁耀樞翰林院修撰二名進士高岳崧三名進士郁崑編修辛卯諭軍機大臣等前因福濟等奏口外安設後路糧臺請飭戶部揀派司員經理糧餉事務當交戶部議奏。茲據奏稱北路往來文移及官兵冊檔大半係蒙古文字。該部司員中通曉蒙文者較少。且該司員等有稽覈報銷之責。不便卽令經理支發等語。所奏亦係實情。福濟等所請揀派部員之處。著毋庸議。惟杜嘎爾所稱

羅桑臺可為支發糧臺。察布齊爾臺及哲林兩處可以屯糧。該副都統隨營人員過少。自應添派妥員。專司其事。金順向在甘肅帶兵。本有專設糧臺。該處必有經理之員。該將軍馳赴新任。即著酌量帶往。藉資差遣。至直隸察哈爾及山西之綏遠城均已設立糧臺。各該處委員內必有熟悉情形之人。北路設立糧臺。如果經理之人並著金順奎昌榮全多布沁扎木楚咨商李鴻章定安文盛張樹聲

等就近派員前往。協同辦理。以期得力。李鴻章等亦不得藉詞推諉。此時支放糧餉等事。著杜嘎爾咨商奎昌等。先行酌量籌辦。期無貽誤。原摺均著鈔給閱看。昨據杜嘎爾奏稱。據文盛咨前項餉銀三十萬兩分為三起。由口起程等語。現在是否全數起解。如尚有未經起解者。著文盛酌度緩急辦理。其已在途中者。著杜嘎爾責令貢果爾等。揀擇妥實處所。多撥弁兵。認真守護。文盛於察哈爾各臺

站亦當檄令小心護解。不得以餉已起程置之不顧也。將此由五百里諭知李鴻章定安金順奎昌榮全多布沁扎木楚文盛杜嘎爾並傳諭張樹聲知之。○予河南各屬陣亡殉難紳民婦女二千一百三十七名口分別旌卹如例。○緩徵山西臨汾曲沃洪洞定襄絳五縣歉收地方節年民借倉穀。○上以夏至祭地於

方澤。自是日始齋戒三日。○壬辰孝誠仁皇后忌辰。遣官祭

景陵。○諭軍機大臣等。福建按察使葆亨現已來京。陸見察其才具。似近平庸。奏對亦不甚明晰。該臬司到任後。著文煜王凱泰悉心察看。能否勝任。據實奏聞。毋稍遷就。將此各諭令知之。尋文煜等奏。遵查按察使葆亨到任後。勤懇求治。辦事實心。其言語雖近口吃。若從容論事。條理尚屬分明。似堪勝任。報聞。○

又諭郭柏蔭奏會匪滋事陷城現籌防勦一摺湖南會匪糾黨豎旗裹脅焚掠於四月十二日攻破益陽縣城十六日復陷龍陽縣城郭柏蔭現飭總兵彭昌禧派撥師船前赴澧州防守並飭黃中元暨荆宜水師稽查偵探商令郭松林酌帶所部駐紮荊州布置尚為周妥惟楚鄂會匪實繁有徒恐其到處勾通暗中響應必須乘其初起就地殲除方免蔓延為患賊氛漸偪常德近接鄂疆李瀚章郭

柏蔭務當嚴飭派出各營實力堵遏毋令匪蹤侵軼荊州地方緊要並著會商郭松林嚴密布置扼要設防常郡兵力甚單如該處情形喫緊該提督自應越境進兵協力助剿但須兼顧荊州防務不可稍有疏虞是在該督等酌度事機妥籌進止鄂省兵力現在不敷分布陝西軍務漸鬆所有譚仁芳仁勝楚軍即著蔣志章檄令統帶回鄂交李瀚章郭柏蔭調遣譚仁芳所部起程後著劉銘傳酌量

撥隊填紮湖南會匪現又起事攻陷城池勢已猖獗劉崐何以並未奏及匪徒究有若干是否去歲湘潭滋事餘黨現在如何派兵進剿著悉心籌畫迅速據實奏聞此股賊匪若勦辦稍遲則裹脅日眾該撫務當振刷精神會商李明惠督兵進剿迅將兩城克復盡殄逆氛不得再事因循致干重咎其附近各州縣尤當嚴檄該地方官設法彈壓消患未萌毋任再滋事端致辦理愈形棘手曾國荃是

否尚在省城著劉崐傳知該前撫酌募舊部協同李明惠盡力勦賊綏靖地方曾國荃於勦賊機宜確有把握且誼關桑梓諒必能妥速會辦尅期歲事也將此由六百里各諭令知之○命工部右侍郎童華仍在上書房行走○追予廣西桂林等處陣亡殉難知縣莫雲卿等紳民婦女一千二百三十二員名口分別旌卹如例並予建祠○癸巳引見新科進士得旨新科一甲進士三名梁燿樞高岳

崧郁崑業經授職外。憚彥彬黃利觀李鐵林。陸繼輝趙時俊李岷琛劉韞良謝元福吳西川袁善王祖光呂紹端曹馴左璿雷鍾德李殿林張佩綸金保泰陸廷猷吳觀禮丁振鐸孫汝贊崔國因洪鎮陳夢麟樊恭煦朱文鏡熊景釗陳卿雲趙履道龔履中毛松年王履亨朱琛張楷潘炳年余弼王崧辰寇本城歐德芳朱成熙陳理泰王文錦毛五和承翰丁立瀛王廉陳慶禧盧峯張星鏐唐景崇陳欽

瞿鴻機廖壽豐林國柱彭在曦曹昌祺曾培祺楊成文陳序球漆墉韓文鈞張曾敷李聯芳臧濟臣王貽清朱元治鄧蓉鏡鄭成章李肇南王玉森周衍恩黃崇惺區謬良丁立幹李端李紱藻吳浚宣英煦周福清成占春汪運鎰李長齡周晉堃陳秉和貴恆曾瑞春潘仕釗孔繼鈺陳寶俱著改為翰林院庶吉士陳炳星殷如璋樓汝達趙林羅文彬胡寶鐸田我霖張瑄劉齊潯李邦楨黃家駒孫祿增

王成德盧璣采區雲漢盧英憫沈績熙劉章天許揖宋之京張冲霄郭慶治黃杰盧樹桂錢振常劉敦紀李喬年潘宗壽陳慶萱沈星標甘常俊德浚劉臣良孫萬春高彤瑄宗室碩濟金桂馨楊承澤周維祺趙慶麟陳李芳張海鵬王廣福趙環慶王廣寒任明哲何秉禮劉鎮李士周何養恆黃嘉端陳宗濂陳榮昌蕭湘劉鴻熙姚定基周文燾楊晉笙丁墉良弼彭懋謙涂椿齡郭增祿畢奉先沈蓮魏

傳熙李穀人孫紹曾魯宗頤文光趙炳堃李平先慶吉劉調元李璫宗室多泰俱著分部學習楊銘張祖謨劉世德崔錦中善廣繼文俱著以內閣中書用劉承寬許桂芬郭慶新張維垣朱慶墉張永熙周孚裕張秉銓鄭聲鏘宋岱齡馮壽鏡李錫朋陽成章何式珍邵世恩張廷蘭崔佐單傳經于鍾德晏榮梁融李賓陳士鈞宋紹波張煒基李聯珠蓋紹曾李文耀陳駟門謝廷鈞徐景福劉珏吳雲濤

林兆南趙維麟歐陽泰項聯晉趙聯登許虎
變宋廣蔭杜天樞陳鳳靈楊開第趙映辰劉
寶燭德潤史賢何粹然唐光圻梁朝瑞田寶
岐孫樹滋陶大夏羅大佑馬耆劉銘訓邢彤
雲張和王在隆裕昌尹起鸞胡永焯李應華
陳煥文李曾珂王士錚閻廣慶趙鼎五劉青
葵李敦煌王澤普趙錦章孫清士王寶仁汪
昌王方田鄒嶧邊淪慈曾星輝精一蘇維垣
文朝輔毛羽豐閻樸曹登瀛趙輝棣程秉鈞
王嘉喆王岱包鵬飛陳聿昌趙擇雅趙英祚
周紹适張琅函榮保蔣士驥丁受中高桐馮
國楨陳樹南王鳴岐蘇超才楊作楫徐步月
雷俊章黃金山蕭樹藩石裕紳楊邦衡陳岳
楊鈞范元音左紹鑾程炳星劉廷鉞韓瞻斗
郭源趙文粹劉鄴田姚再薰侯思濟王啟綸
王啟渠周之冕李崇忠易均鼎梁琯邵樂裕
崇俊黃興樹俱著交吏部掣籤分發各省以
知縣卽用戶部候補主事孫家穆著以主事

卽用刑部候補員外郎李暎著以員外郎卽
用兵部學習郎中許奇嵩工部額外郎中梁
琛著俟報滿作為候補郎中後以該部郎中
卽補刑部學習員外郎陳康祺著俟報滿作
為候補員外郎後以該部員外郎卽補候選
員外郎方功渤著分部學習餘著歸班銓選
甲午夏至祭

地於

方澤遣豫親王本格恭代行禮○

上奉

慈安皇太后

慈禧皇太后幸漱芳齋侍午膳○諭軍機大臣
等英翰奏餉源日絀現籌辦理情形一摺據
稱皖省餉需入不敷出邇年以來積欠防軍
餉銀及左宗棠軍餉為數甚多現擬於防軍
內酌量裁撤仍留精銳等語所籌尚妥惟現
在湖南益陽等縣會匪滋事各路遣散勇丁
時虞勾結卽著英翰將新撤各勇妥為鈴束

母令滋生事端。皖省與楚北相近。水陸要隘。尤須兵勇嚴防。該撫所留勇丁。務當勤加訓練。實事求是。俾成勁旅。以備不虞。皖省月撥協甘餉銀二萬兩。據稱自八年迄今。已欠三十二萬兩。請自本年四月起。將月解左宗棠軍餉暫為停緩。先將舊欠之餉儘籌儘解。俟此項欠餉解竣。再行按月協濟等語。著戶部議奏。建平匪徒滋事。前諭該撫派員按捕餘匪。現在辦理情形如何。匪首關汶柱在孝豐

縣山內。曾否會同浙江兵勇拏獲。並著迅速奏聞。將此由五百里諭令知之。○乙未諭軍機大臣等。前據左宗棠奏請禁絕回民新教一摺。所稱乾隆年間。逆回馬明心等創立新教。惑眾滋事。先後伏誅。根株未絕。至馬化澂之父馬二等。復以新教私相傳授。遂至釀成變亂。皆由新教行為詭僻。足以誘惑愚回。迷而不悟。現在馬化澂雖已伏法。而新教傳染漸廣。必須嚴加禁絕。以杜亂萌等語。所奏自

為思患豫防起見。惟回民散居各省。同隸編氓。各安生業。若因區別舊教新教。設為厲禁。地方官稍不加察。書吏藉此按求騷擾。必至回眾驚疑。轉生枝節。從前乾隆四十九年。回逆田五等滋事以後。欽奉

高宗純皇帝聖諭。查辦此事。止當分別從逆與否。邪正之殊。不必論其教之新舊。欽此。嗣於乾隆五十四年。經勒保奏稱。新教為回教之大害。擬令靜甯等處頭人訪察稟首。復奉

聖諭。令其設法化導。不可區別新舊之名。仰見垂訓周詳。具有深意。此次馬化澂倡亂及身。既被刑誅。徒黨亦遭殲戮。正可借此剴切曉諭。俾該回眾等及早改悔。不至誤入迷途。自陷罪戾。該督現既出示所屬州縣。禁冒新教。並准自悔免罪。仍著嚴飭該地方官。妥為開導。不可操之過盛。致激事端。所請飭令各省一體禁絕之處。可從緩辦理也。將此諭令知之。○丙申諭內閣。工部右侍郎童華著授奕詳

奕訥奕謨讀諭軍機大臣等定安奏遵籌轉運糧食事宜請飭察哈爾烏里雅蘇台多備牛車駝隻等語軍行遠道糧食最關緊要必須源源接運方可免匱乏之虞定安因大同官兵業經出口卽將歸綏所辦軍糧飭派土默特官兵領解頭批於四月二十五日由歸化起運送至濟斯洪果爾交參領畢都爾業接收轉解以次陸續分批運往所辦甚是惟時當夏令駝隻毛脫不能負重致遠非設

法協濟必至貽誤事機著文盛趕緊多備牛車妥為轉運以輔駝力之不足其烏城一帶臺站並著奎昌榮全多布沁扎木楚認真整理並將牛車駝隻寬為豫備務使軍糧隨到隨解不至壅滯中途庶可收飽騰之效金順到任以後亦著一體遵辦毋稍懈弛至歸綏代察哈爾購備軍糧一節俟出口征兵接踵迭發後文盛卽派員攜價赴綏會同定安派出各員妥籌採買轉運以裕兵食杜嘎爾前

奏逆匪向東侵犯當經諭令該副都統偵賊所向實力進剿現在賊勢若何官軍曾否接仗著杜嘎爾懍遵前旨星馳探剿不得頓兵不進日久無功仍將近日軍情隨時具奏將此由五百里各諭令知之又諭馮子材康國器奏剿辦邊境土匪克復越南木馬省城暨籌議剿撫機宜各摺片馮子材籌辦越南踞匪督兵前進取道南甯先將宣化隆安股匪次第剿除肅清內地伏莽鎮安官軍會同夷兵平毀大嶺茶嶺等處賊巢攻克木馬省城剿辦尚為得手該提督現已派撥兩營駐守並咨照越南派兵嚴防要隘免蹈上年覆轍又為賊踞卽著馮子材督兵迅赴龍州就近察看情形妥籌剿撫期於一勞永逸綏藩服而固邊防不得敷衍了事宣化隆安餘匪並著馮子材康國器嚴飭地方文武認真擒捕免致餘燼復燃此次出力員弁准其擇尤保獎毋許冒濫蘇惻漢就撫後仍復觀望懷

疑越南近又有股匪十數起。猶須備以兵力。馮子材等擬俟各軍到防後。約會該國先將邊界各匪分別勦撫。卽分軍扼要駐紮。隨時相機應援。所籌尚是惟當實力協助。不可稍分畛域。應否添募營勇之處。著酌度辦理。至慶泗等府屬境。屢有黔苗竄擾。尤當加意嚴防。著馮子材、康國器迅飭孔憲隆、潘其泰越境進兵。協同黔軍。掃除獨山、荔波各匪。進規古州。擣其巢穴。免致侵軼。為患平樂、密邇省

城。該處有匪徒搶掠富川、恭城等處。亦有江華匪股竄入。雖均經兵勇分頭控勦。擒獲匪首多名。尚恐外來匪徒勾通內匪。滋事。著康國器飭令曾協均。迅將敗匪就地殲除。毋任逃匿。江華、富川交界處。所卽著責成陳培桂。約同楚軍實力控拏。毋令餘匪乘間竄突。以固疆圉。將此由五百里諭知馮子材。並傳諭康國器知之。以甘肅攻克杜家寨等處賊巢。甯夏南路肅清出力。予總兵官李葆琛以

提督用賞參將趙昌富。遊擊萬清傳。二品封典。遊擊金鈞。巴圖魯名號。同知姚文炳。都司張有才等。花翎守備馬振清等。藍翎餘加銜升敘有差。戊戌諭內閣。前因已革員外郎寶山承辦

定陵應用各物。未能交代。以致延誤。當經降旨令該旗傳案查究。茲據溥楮等奏稱。接准鑲藍旗滿洲咨。覆寶山業已病故。覆訊書吏李雙堅供各項應用物件。已領未領。均係寶山一人承辦。並查據工部覆稱。應需各物。全憑來冊備具文領。行文各處。給發承領之員支領等語。此案寶山承辦各物。未經交齊。既經溥楮等將前後情節確切查明。所有寶山領過物料。工運銀兩。著鑲藍旗滿洲都統著落該故員家屬賠補。其應由各該處咨領物件。著總管內務府戶部工部。逐款查明。如已全數給領。均令該家屬一併賠補。郎中阿爾薩蘭尚膳正兆瑞。尚茶正延昌。原稟措詞過當。

亦有不合。著交部分別議處。諭軍機大臣等。巴揚阿等奏湖南會匪攻陷城池。現在布置情形。一摺。會匪疊陷益陽龍陽兩城。龍陽已於四月十八日克復。匪股回竄益陽。該逆現雖退出龍陽。並未大受懲創。難保不再行紛竄。荆門等處邊防。未可稍形疏懈。著巴揚阿李瀚章郭柏蔭希元文全悉心會商督飭。派出各營嚴密防維。毋令匪蹤闖入。前諭李瀚章郭柏蔭會商郭松林扼要設防。如常郡情形喫緊。該提督自應越境助剿。仍須兼顧荆州防務。巴揚阿現擬商令郭松林移紮常郡會剿。卽以荆旗備戰之師。遙為策應。應如何酌度。緩急妥籌布置之處。著巴揚阿李瀚章郭柏蔭希元文全會商辦理。湖南逆匪滋擾兩縣城池。相繼失陷。軍情極為喫緊。郭柏蔭奏益陽龍陽失守。於本月初三日。早經報到。本日又據巴揚阿等奏龍陽業已克復。乃劉崐身任本省巡撫。竟無隻字奏到。不知所

司何事。顯預已極殊堪痛恨。著傳旨嚴行申飭。劉崐現在如何布置朝廷亦無從知悉。該撫務當振刷精神。督飭官軍。迅將此股逆匪就地殲除。儻縱令匪勢蔓延。擾害地方。或不能實力勦辦。俟匪蹤退出。以業經收復縣城一奏了事。致貽養癰之患。恐劉崐不能當此重咎也。將此由六百里各諭令知之。又諭曾壁光周達武奏勦平下游股匪。收復八寨等城。一摺。貴定平越等處賊股。既經殲除。都勻所屬平浪各賊巢。亦已攻破。惟逆首李憲腐逃往桃花五寨未獲。其定番李高脚一股。經副將何世華等擊敗。賊由廣西一路奔竄。李逆亦未就擒。仍著曾壁光周達武嚴飭派出各軍分投追剿。務將著名首逆設法擒獲。以絕根株。昨據康國器馮子材奏。現今副將孔憲隆潘其泰協同黔軍勦辦獨山荔波苗匪。此時李高脚一股竄往粵境。人數已屬無多。著馮子材康國器卽飭孔憲隆等會合黔

軍前截後追迅將此股殘匪悉數殄除以清
邊患苗酋聞國興等率眾投誠收復八寨上
江下江三脚各城曾壁光等現今率領原部
駐守八寨並調劉廷玉一軍前往鈴束仍著
隨時察看情形妥籌布置毋稍大意一面趁
此聲威飭令王彥等軍由平口一帶進兵兼
為八寨聲援次第由都勻麻哈各路節節進
勦平靖苗疆將此由六百里諭知曾壁光馮
子材並傳諭康國器周達武知之○以貴州

勦平下游積匪收復八寨等城賞副將李得
貴巴圖魯名號同知黎開南等花翎縣丞周
玉德等藍翎副將何世華等升敘有差贈陣
亡參將黃立成副將都司楊遇恩遊擊守備
彭正昇都司外委楊順發千總均予祭葬世
職加等○己亥以祈禱靈應頒山東省城
雨師廟扁額曰應時澤普

大清穆宗繼天開運受中居正保大定功聖智
誠孝信敏恭寬毅皇帝實錄卷之三百十

大清穆宗繼天開運受中居正保大定功聖智誠孝信敏恭寬毅皇帝實錄卷之三百十一

秋

同治十年辛未五月辛丑諭軍機大臣等劉

崐奏會匪闖入益陽龍陽兩城旋即克復現在跟蹤追剿一摺此次會匪滋事疊陷益陽龍陽兩城雖經羅德煌姚華武等軍追剿獲勝擒斬多名將兩城先後收復惟倡亂逆首尚未被擒餘匪復四散潛匿必須實力擒捕淨絕根株著劉崐督飭李光燦等統帶兵勇認真擒拏務將劉道美劉貫三何春台等全行弋獲不准一名漏網其竄逃餘孽並飭水陸各軍嚴防竄路四面兜拏以期盡數殲除

劉崐於地方緊要軍情遲至半月始行奏報實屬不知緩急前已傳旨嚴行申飭若再不振刷精神力圖激奮或令稽誅逸犯餘燼復然必惟該撫是問郭柏蔭前已商令郭松林督兵駐紮荊州現雖兩城已復而伏莽未淨仍恐勾結竄突李瀚章郭柏蔭總當與郭松林隨時咨商嚴密巡防毋稍鬆懈將此由五百里各諭令知之○又諭奎昌文碩奏酌議營規支款附陳臺站餉銀事宜一摺奎昌等接據文盛來咨大同官兵三月底業經出口因將一切應辦事宜先行酌議所擬章程十條著該部妥議具奏至哨隊官兵丁勇名目請定清文蒙古語一節著照所擬繕用北路奉撥各項官兵暨操練教習出口後經過各臺站著金順奎昌榮全多布沁扎木楚文盛杜嘎爾瑛榮文碩督飭所屬懷遵疊次諭旨妥速應付毋得稍有留難科城所管七臺奎昌等現已派員承辦酌定支應章程並更定

幫臺差使。所有此次幫臺官兵著加恩量予差費。卽照奎昌等所議覈實支發。此係專為緊要兵差變通辦理。其餘常差不得援以為例。著理藩院烏里雅蘇台將軍傳諭各該盟長。儻有避差取巧者。仍照向章罰懲。以符定制。大同官兵糧石前據定安奏已由歸綏轉運。科布多存糧無幾。難供兵食。仍著定安何璟張樹聲飭局趕緊運解源源接濟。毋任缺乏。前次部撥科城餉銀十萬兩。由察哈爾轉

解。曾諭文盛派員護解赴科。自應酌分數起陸續撥發。免致疏虞。茲據奎昌等所奏該都統已將餉銀全數發交科城委員接領。曾否派有妥員協解撥兵護送。著文盛查明迅速籌辦。以昭慎重。以後遇有此等要差均應遵例施行。妥為照料。至解護糧餉軍火例有專條。經過地方及管解員弁責成綦重。並著通諭合屬官兵使知例義。庶不敢掉以輕心。致有疏失。奎昌文碩等摺報嗣後務須言簡意

明。不得似此次之語多拉雜。意不明曉。殊乖奏摺體裁。將此諭知理藩院並由六百里諭知定安金順奎昌榮全多布沁扎木楚文盛杜嘎爾何璟瑛榮文碩並傳諭張樹聲知之。○以湖南乾州協副將趙鴻舉為河南南陽鎮總兵官。○以湖南益陽龍陽兩縣城被匪竄陷。旋即收復。革副將陶藻知縣黃應詒張奉祥守備申大發職。仍留營。○壬寅遣官祭關帝廟。○諭軍機大臣等定安金順奏甯夏

西岸三縣回匪勦辦完竣。請將道員汪景度簡用。定安奏西來回匪滋擾烏喇特旗界內。金順奏請將管站各員獎勵。各摺片納家牘賊巢業經攻克。甯夏甯朔平羅一律肅清。其投出回民業經定安金順分起發交地方官安置。靈州逃來之回亦解交該州收管。著左宗棠張曜仍隨時密為查察。妥為鎮撫。毋令再滋事端。金順現應前赴烏里雅蘇台將軍新任甯夏一帶。如尚有潛匿餘匪。著張曜統

率各營認真搜捕務絕根株。陝回尚有老弱男婦五百十五名。應否解至平涼安插。著左宗棠會商金順張曜妥籌辦理。甯夏軍事現已完竣。金順張曜所部兵勇應如何分別撤留。或包頭纏金一帶。有須添兵防剿之處。著定安金順張曜悉心會商。妥速籌辦。阿拉善鄂爾多斯等旗。並殺虎口等處管站各員。接遞文報。尚無貽誤。著定安查明擇存記獎。毋許冒濫。道員汪景度已交軍機處存記。密

片一件留中。西來回匪由阿畢爾米特旗竄至白任濠賚及古爾班賽坎一帶。分路搶掠。嗣有賊匪三百餘人竄入烏喇特中公旗境內。在庫克鄂爾濟巴克那等處擄掠。續又在中公所屬之洪庫勒塔拉民屯盤踞。烏喇特旗在黃河之北。直達歸綏。無險可恃。亟應派兵兜剿。以期就地殲除。薩薩布帶隊前進。計正與賊相遇。著安安飛催該副都統親督全軍。星速進行。迎頭截擊。迅掃逆氛。並催直字

營馬隊迅赴包頭之西。一面分飭駐紮纏金之卓勝營暨大同鎮總兵馬陞各派勁旅。由東南面節節兜剿。毋任紛竄。杜嘎爾務當偵賊所向。躡蹤追剿。與薩薩布等軍前後夾攻。為一鼓聚殲之計。其餘各股現竄何處。著定安杜嘎爾確切查明。認真勦辦。烏城軍情緊要。非有知兵大員前往。不足以資調度。金順諳練戎機。戰功卓著。著即迅速起程前往。妥籌防剿。以副委任。土爾扈特汗布彥烏勒哲

依圖有赴杜嘎爾軍營之說。該副都統與該汗是否素識。曾否前來謁見。來見時如何情形。著杜嘎爾即行據實奏聞。將此由六百里諭知左宗棠。定安金順。杜嘎爾並傳諭張曜知之。○以甘肅攻破納家牕回巢。甯夏西岸肅清。將軍金順定安提督張曜得旨嘉獎。賞提督王連三一品封典。提督程之偉孫金彪。李葆珍。劉廷副都統托雲布總兵官李考祥。劉宏發黃馬褂。遊擊沈鏞守備劉世俊。巴圖

魯名號餘加銜升敘有差○以籌濟甘肅糧餉予河南巡撫李鶴年優敘○癸卯追予浙江杭州陣亡殉難領催定裕等紳民婦女四百二十七名口分別旌卹如例○甲辰月食諭內閣前因禮部查出福建省會試舉人王玉書及黃梧揚等七名冒名請咨奏請飭查當經降旨諭令查明究辦茲復據文煜等奏此次會試舉人就省取結詳咨者計五十八名除胡夢得等十三名續據府縣加結補

送外恐如王玉書之冒名弊混者尚不乏人現已嚴查究辦並請交部議處等語著文煜等王凱泰確切查明嚴行懲辦以儆作偽而肅功令福建布政使潘霽未能詳查遽行詳請給咨殊屬疏忽著交部議處福建巡撫王凱泰當時未能查出著交部察議尋議潘霽照失察例罰俸一年王凱泰減等罰俸九箇月得旨准其抵銷○又諭文煜王凱泰奏據吏部咨福建廈防同知馬珍調補福防同知本

任與調任均係沿海衝繁難題要缺例不准其更調等因查同治三年俞林曾由廈防同知調補福防經部覈准今倣照俞林成案請以馬珍調補斯缺部覆以缺項相同例不准調駁飭另行揀選調補是否俞林成案先已查銷閩省尚未接准部文現宜如何畫一辦理之處請旨飭查等語馬珍與俞林同係以廈防同知調補福防同知因何前後辦理兩歧著吏部查明具奏尋奏查同治五年吏部

案件被焚已奏明各省升調補缺均照定章覈辦不許引案准駁俞林成案在不得援引之例並非辦理兩歧福防同知應令該署督等另行揀選以符定制從之○諭軍機大臣等郭柏蔭奏益陽龍陽縣城收復情形一摺與劉崑前奏大略相同此股會匪多係軍營撤勇久經戰陣與尋常烏合之眾不同現在該兩城雖經收復而逆首劉道美等尚未弋獲誠恐勾結黨與走險負隅必至勢成滋蔓

亟應乘此各軍雲集設法兜剿淨絕根株劉
崑務當懷遵疊次諭旨會同李明惠並嚴飭
道員李光燦等激勵兵勇星速四面圍擊務
將匪首悉行捕獲並將餘黨聚殲毋得再有
疏虞致干重咎李瀚章郭柏蔭仍遵前旨隨
時咨商郭松林嚴密偵探妥籌防禦並飭派
赴澧州之總兵彭昌禧督帶師船認真巡緝
毋稍鬆懈將此由五百里各諭令知之○追
予江蘇各屬陣亡殉難武生楊銘鑫等紳民

婦女一千七百六十三名口分別旌卹如例

○乙巳

上奉

慈安皇太后

慈禧皇太后幸漱芳齋侍午膳○諭軍機大臣

等文盛奏遵籌轉運軍糧擬仍歸軍臺提運
並撥款派員赴綏一摺文盛前以口外駝隻
缺乏兼值夏令不能得力擬改用牛車趕運
糧米茲據該都統體察情形牛車笨滯又須

覓有水草之路繞道行走較之臺路更為紆
折為日過欠米糧恐致徵變且該處僅有牛
車八百輛不敷應用現擬將備齊米麵仍歸
軍臺運解即著照該都統所議辦理總期軍
糧早日運到以裕兵食各臺駝隻現多疲瘦
文盛已酌給銀兩令其設法雇覓車駝依次
運送著嚴飭畢都爾業及管臺各員實力督
催毋許延誤文盛現派員赴綏採辦軍糧著
定安飭令歸綏道會同該委員趕緊購齊轉

運以資接濟大同官兵糧石亦著源源運往
毋任匱乏將此由四百里各諭令知之○禮
部左侍郎殷兆鏞回籍葬親轉右侍郎溫葆
深為左侍郎未到任前仍以兵部右侍郎黃
倬兼署以內閣學士邵亨豫為禮部右侍郎
○追予江蘇各屬陣亡殉難四品銜楊瞻淇
等紳民婦女一千八百三十六員名口分別
旌卹如例○丙子諭軍機大臣等劉崑奏援
黔各軍連拔賊寨克復丹江凱里各城一摺

席寶田等軍攻拔排羊等三百餘寨。丹江凱里兩城先後克復。勦辦尚屬得手。本日業經明降諭旨。將席寶田等交部從優議卹。出力陣亡各員分別獎卹矣。惟向來賞給世職。皆係出自特恩。豈臣下所得擅請。劉崐請將提督彭芝亮等賞給雲騎尉世職。實屬不諳體制。所有彭芝亮等五員著劉崐另行擬請獎敘。現在丹江凱里一帶苗寨雖已掃蕩。而逆首金大五包大肚等均未擒獲。張臭迷等復

集潰黨盤踞雷公山。若不乘其喘息未定。迅速進剿。必至勾結黨與。復肆蔓延。席寶田現既回軍施洞。著劉崐飭令趁此瘴癘未作。會合戈鑑剋日進兵。迅將雷公山賊巢攻拔。並將逆酋張臭迷等設法擒獲。毋任漏網。其螃蟹等境亦當次第規復。以期早靖苗疆。八寨上江下江三腳各城已據。曾璧光等奏報收復。刻下軍事正在得手。著曾璧光周達武迅飭各軍由都勻麻哈各路節節進剿。聯絡楚

師掃除餘孽。不得稍涉遲延。另片奏請將已革副將拏問提省審訊等語。已革常德協副將陶藻前於會匪竄犯龍陽時。帶兵四百名在城防守。並未力戰。遽行出城潰退。滄港土匪乘機搶掠。並有潰兵同搶情事。情殊可惡。陶藻著卽拏問交劉崐嚴行審訊。按律懲辦。毋稍寬縱。此次會匪敗竄桃花江一帶。共有若干人。道員李光燦勦辦情形究竟如何。劉崐所奏竄匪擒斬略盡。是否確實。該撫務當

會同李明惠督飭官軍實力兜剿。將匪首劉道美等全行捕獲。並將滋事匪黨悉數殄滅。以淨根株。若一味粉飾敷衍了事。致貽養癰之患。必惟該撫是問。將此由六百里諭知劉崐曾璧光並傳諭周達武知之。以克復貴州丹江凱里二城並攻拔排羊等處賊寨。記名布政使席寶田得旨嘉獎。與道員謝蘭階鄧善燾戈鑑均下部優敘。賞提督蘇元春黃馬褂。郎中張鴻等花翎。餘升敘有差。予陣亡

總兵官陳顯祥等十六員祭葬世職加等○
丁未諭軍機大臣等定安奏西來賊股尚眾
現籌布置並請添撥山西協餉飭催山東欠
餉各摺片據稱西來賊股現仍盤踞烏喇特
旗之洪庫勒塔拉地方並據各處探報賊匪
約有萬餘由阿畢爾米特旗西北界分股東
竄等語該逆因北路大兵雲集又無糧食可
掠是以鉞而走險竄向東南烏蘭察布盟所
屬各旗較為喫緊其前股竄踞洪庫勒塔拉
地方僅四百餘人當不難於殄滅著定安催
令薩薩布迅速前進分隊兜擊並飭金運昌
馬陞各軍合力進剿先將此股就地殲除免
致勾結蔓延轉行棘手包頭地方素為賊匪
垂涎尤應加意防範定安現調毅前軍五營
駐紮台梁一帶並令水師由托克托城至包
頭一帶梭巡布置尚妥所派馬步各隊分紮
烏喇特茂明安等旗境內亦頗周密著即飭
令派出各軍勤加偵探遇有賊蹤竄近飛速

截剿毋稍鬆勁該逆若分股東竄則察哈爾
一帶亦恐喫重著文盛先事圖維妥籌防剿
軍臺大路為北路各城大軍糧運所關設被
賊擾尤屬可虞賽爾烏蘇一帶應如何撥兵
保護之處著文盛張廷岳阿爾塔什達會商
辦理直隸續派古北口練軍一千名著李鴻
章催令剋日起程前赴庫倫以備張廷岳等
扼要分紮不可稍有遲誤杜嘎爾現駐哈爾
尼敦距賊較遠豈可頓兵坐待致誤戎機著
卽探明賊蹤所向督率馬隊緊躡追剿並與
定安派出各軍聯絡聲勢合力兜圍以期早
殄逆氛金順接奉前旨諒已部署起程所部
得力馬步各隊諒必酌帶前往亦可與杜嘎
爾定安各軍會合迎剿刻下甯靈甫定河西
尚有零星竄匪且阿拉善旗西界時有鎮番
賊匪竄擾張曜所部各軍應如何扼紮防剿
之處著卽妥籌辦理定安現因添募馬勇及
調派土默特官兵需用餉銀請飭山西於每

月應協歸綏防餉三萬之外再增銀五千兩。現在歸綏防務緊要著何璟張樹聲迅卽先行如數籌撥歸綏糧臺以後仍按月源源批解毋稍遲緩山東應解歸綏防餉每月二萬六千兩著丁寶楨迅飭藩司將欠解銀兩剋期埽數解清以應急需將此由六百里諭知李鴻章定安金順文盛杜嘎爾丁寶楨何璟張廷岳阿爾塔什達並傳諭張樹聲張曜知之。○戊申諭內閣前因額勒和布德裕奏前

選奉天府治中齊鶴松被御史鄧慶麟奏參及齊鶴松呈稱鄧慶麟挾仇參奏各情奉天無案可查請飭吉林將軍查辦當諭奕格確查覆奏。茲據奕格毓福奏查明吉林長春廳萬慶棧店實係齊鶴松已故父兄產業於該員並無干涉至民人鄧金詳與齊鶴松之兄齊鶴潔等互相構訟業已完結惟齊鶴松被參情節是否係鄧慶麟挾仇礙難懸揣等語著刑部將前後案情秉公查辦據實具奏。○

又諭金順奏辦理回務完竣一摺甘肅甯夏河西一帶回民良莠不齊疊經金順會同張曜分別勦撫續又查獲馬強米萬銀納玉標牛大科等訊明正法所有甯夏甯朔平羅投誠回眾均交地方官編立保甲妥為安置毋令失所。經此次安插撫恤後該回眾等務當改過自新各安生業毋得再有反側負朝廷寬大之恩其附近漢民亦不得有意尋仇藉端控告致啟猜嫌總期彼此相安爭端永息

地方官吏遇有漢回事務尤當持平辦理不可稍有偏袒以昭公允而弭釁端。○諭軍機大臣等奕格等奏派兵接捕金場匪徒情形一摺吉林葦沙河等處金場時有匪徒藏匿經該將軍等商派協領富爾丹帶兵前往巡查在夾皮溝內三道岔地方遇匪數十名排立抗拒該協領整隊擊斃十餘名並將窩棚焚毀此次該匪雖小受懲創而在逃餘匪尚未淨絕根株亟應嚴密偵緝以杜亂萌著奕

榕毓福督飭派出巡查兵弁認真擒捕毋任因循粉飾致釀事端所請將富爾丹給獎之處姑照所請賞給副都統銜嗣後該將軍等不得遇有尋常勞績執行請獎用示限制而杜冒濫將此各諭令知之○又諭金順奏甯夏回務已竣現籌分兵布置一摺甯夏為北路巖疆刻下雖臻靜謐而西路賊氛尚熾自應分佈設防以資捍衛金順會商張曜分派各隊扼紮磴口橫城等處所籌尚屬周密金順起程後即著張曜督飭派出各軍嚴密防剿毋稍疏虞河西三縣投誠之回均已造冊交地方官編立保甲妥為安置其附逆之徒並由受害漢民指名控告者亦經金順等撙節正法至四百五十餘名之多該回經此痛勸自當懷德畏威不至再生反側惟附近漢民亦不得有意尋仇致成釁隙本日明降諭旨一道著張曜刊刻謄黃徧行曉諭俾漢回永遠相安以副朝廷一視同仁至意阿拉善

旗地方既有西來竄匪搶掠牲畜之事張曜務當飭令馬步隊伍迅往防剿毋任蔓延花馬池一帶亦有匪蹤出沒左宗棠當檄飭東路官軍實力剿捕張曜仍妥籌兼顧毋稍疏懈河州等處逆燄方張左宗棠總當激勵諸軍鼓行而西滅此朝食豈可煩兵不進致軍心懈怠將士思歸以勝兵而轉成暮氣該大臣自金積堡克復後久未據報進兵機宜實深慮繫著懍遵疊次諭旨迅將籌辦情形據實具奏不得粉飾遷延致誤大局金順另片奏軍營設局鼓鑄礮子需費甚鉅無款歸還請飭部撥銀二萬兩以清款項並請飭河南撫臣覈發張曜局費等語著袁保恆即於西征糧臺籌撥銀二萬兩清還金順鑄礮局費其張曜營中礮局之需即著李鶴年如數籌撥作正開銷前據曾國藩奏續飭上海製造局製造洋火藥二萬磅洋礮藥五千磅金底大銅帽二百萬顆二十四磅開花彈子四千

箇藥引六十箇木心六十箇委員解交天津道查點收存由金順委員迎提赴營等語著金順張曜迅速派員赴津提解到營以應急需金順現須前赴烏城此項軍火應如何分撥應用之處著與張曜妥商辦理將此由五百里諭知左宗棠金順李鶴年並傳諭張曜袁保恆知之○旌表守正捐軀直隸博野縣民女程義姐○己酉諭內閣曾國藩奏曾任提鎮大員尋仇構釁據實參奏一摺前任江

南提督李世忠因事逗遛揚州與前任浙江處州鎮總兵陳國瑞相遇李世忠扶陳國瑞從前奪取鹽船銀物之仇陽與交好於四月十四日潛赴陳國瑞寓中喝黨將陳國瑞捆縛赴船行抵揚州四里鋪地方適陳國瑞之姪陳澤培等趕至呼救一時各船水手人等譁聚來援李世忠將陳國瑞藏匿自覓小船逃走落水遇救得生其輜重被搶一空家屬亦遭毆辱致有落水淹斃者此案李世忠以

提督大員輒行尋仇闖很實屬不安本分李世忠著卽行革職革令回籍交地方官嚴加管束陳國瑞與李世忠往來日夜演戲致生事端亦屬性非安靜著以都司降補勒令速回湖北原籍交地方官嚴加管束李世忠陳國瑞均不准在揚州逗遛○諭軍機大臣等本日據曾國藩奏參李世忠陳國瑞在揚尋仇構釁業經明降諭旨將李世忠革職陳國瑞以都司降補均勒令回籍矣該二員素性

獷悍不安本分每在外滋生事端此次僅予薄懲勒令各回原籍不准在外逗遛於懲創之中隱寓保全之意著李瀚章郭柏蔭李鶴年於李世忠陳國瑞到籍後飭令地方官隨時留心查察嚴加管束如再出外生事或在本籍不受約束卽行據實參奏原摺均著鈔給閱看將此各諭令知之○又諭左宗棠穆圖善奏南路各軍勦賊獲勝等語鹽固一帶敗殘餘孽句合河州回逆竄擾秦州徽縣伏

羌甯遠禮縣各屬。經在事各軍相機截剿。賊斃逆首馬秀馬貨郎劉羊等多名。餘賊亦擒斬略盡。其另股竄匪亦經提督張仲春總兵田連考兩軍分路兜擊。斃賊極多。敗賊向通渭回竄會甯。卽著左宗棠移圖善督飭各軍實力防剿。務將殘匪擒捕淨盡。毋使賊氛再有紛竄。以固南路邊防。左宗棠另片奏遵覆河州等處軍情。並進規河州。一時未能進取。各情形覽奏均悉。軍營探報遠近不一傳聞。

容有異詞。朝廷既有所聞。卽不能置之不問。該大臣惟當仰體朝廷西顧之憂。將進兵機宜悉心籌畫。並激勵將士。殺敵致果。迅奏膚公。用副委任。正毋庸瀆辦為也。將此由五百里各諭令知之。○以甘肅克復狄道等城。並擊退河州等處竄匪出力。賞總兵官裴思朝正一品封典。提督傅先宗楊世俊黃馬褂。提督丁桂智總兵官吳得勝副將朱運廣林正祥參將孫得勝李枝宏段鵬翥石清武馬有

才周道欽遊擊劉大興巴圖魯名號遊擊余森芳等花翎知縣曾貴和等藍翎。餘加銜升敘有差。予陣亡總兵官羅營卿等二十五員祭葬世職加等。○以甘肅鹽茶廳等處剿匪獲勝。予都司銜穆進善王益萬以都司用。並加遊擊銜。陣亡副將王有慶李松林同知周其俊祭葬世職。○以布倫托海剿賊出力。賞副管蒙庫吉呼噶爾巴圖魯名號。旌表守正捐軀河南洧川縣民女梁芳姐。

大清穆宗繼天開運受中居正保大定功聖智誠孝信敏恭寬毅皇帝實錄卷之三百十一

大清穆宗繼天開運受中居正保大定功聖智
誠孝信敏恭寬毅皇帝實錄卷之三百十二

教諭

同治十年辛未五月庚戌安徽巡撫英翰奏

荊州旗營分撥江甯駐防官兵五百九十一
員名於四月初九日行抵安慶遵例動放兵
丁治裝銀兩下部知之○辛亥諭內閣前因
宗人府等衙門奏王事福珣被扎身死一案
訊有鄭親王承志主使情事當派軍機大臣
會同宗人府刑部詳細研鞫茲據奏稱連日
質訊要犯王壽等已將該親王指使糾毆情
形供指確鑿而該親王堅稱並無其事且呈
遞親供前後自相矛盾其為任意狡展更屬

顯然請旨先行革審等語承志著先行革去

王爵其應訊各情及一千人證著管理宗人

府王等軍機大臣會同刑部嚴行審訊按律

定擬具奏○諭軍機大臣等李鴻章奏日本

使臣將抵天津請派大臣在津會議立約一

摺已另有諭旨派李鴻章為全權大臣並派

應寶時陳欽隨同幫辦矣該大臣俟日本使

臣到津後務當督飭應寶時陳欽悉心籌畫

杜漸防微總期周密妥善免致將來窒礙是

為至要本日簡派全權大臣諭旨一道一併

發往如該使索看憑據即著李鴻章另行恭

錄給與閱看俟議約事畢此旨仍繳還軍機

處備查將此由四百里諭令知之○命直隸

總督李鴻章辦理日本國通商條約事務江

蘇按察使應寶時署直隸津海道陳欽隨同

幫辦○壬子

孝恭仁皇后忌辰遣官祭

景陵○癸丑諭軍機大臣等都興阿等奏查勘

鳳轂二邊門外地段完竣並擬畫留界限情形繪圖呈覽一摺鳳轂二邊地段現經都興阿等督飭協領崇善等分段查勘北自轂陽門屬之八里甸子等處起東至兩江匯口轉向西南至海沿江有漏河一道下至廟爾嶺直至貢道北老邊牆處接續貢道南烏津飛大孤頂子等岡斜向西南至舊邊柵小黑山止均擬酌展為邊即著照所議辦理其貢道南三角一隅之地雖據該協領等請仍舊制

無庸繩丈惟大東溝一帶江海相連時有匪徒叢聚都興阿等務當嚴飭鳳凰城城守尉等詳細查明相機妥辦至畫留界限藉資閒隔原以內撫游民外綏藩服今則沃壤膏田私墾已徧遷移不易安插亦難殊於邊境大有關繫都興阿等務當詳度情事先事豫籌於查辦驗廠旺清邊地完竣後設法圖維據實奏明辦理所有應留封禁之地並著該將軍等斟酌機宜隨時妥辦以昭慎重所呈地

圖即著留中都興阿另摺奏海洋匪犯登岸滋擾派兵勦捕各情形海盜登岸搶奪鋪戶掠去商人並敢闖入稅局擄人劫財實屬目無法紀水師營協巡韓崑珊帶領戰船追捕賊匪棄船登岸將綁去之人均行放回何以不乘勢緝獲致令逃逸地方官既不會同堵剿駐紮孤山之統領馬步隊又不趕緊截拏其懈弛情形實堪痛恨著該將軍等查明一併奏奏以示懲儆仍一面督飭派出員弁跟蹤窮追務期悉數弋獲不准一名漏網將此各諭令知之○又諭成祿奏探聞新疆近日情形請將奉差遊擊梅振清獎勵並請飭左宗棠委員接署鎮篆各摺片所稱安集延攻克吐魯番城池逆回亦均投順等情與文麟等前奏大略相同該怕夏要結人心中藏叵測難保無狡焉思逞之意前諭文麟等密探吐魯番軍情豫籌防範仍著懷遵前旨妥慎籌畫應否派員前往撫諭並酌帶精兵數營

以壯聲威著文麟景廉悉心會商妥籌布置成祿當靜候文麟等商辦所有奉差遊擊梅振清經歷艱險著有微勞著照所請賞給副將銜以示鼓勵至巴里坤地方緊要前據左宗棠奏派趙德正署理該鎮篆務現據成祿聲稱趙德正於營務軍政均未講求肅鎮尚恐不勝何能膺此重任等語著左宗棠悉心察看趙德正如果不能勝任卽片揀妥員奏請接署以重邊疆成祿現委胡可均代理肅

州鎮總兵哈國霖代理肅州知州該處地方緊要並著左宗棠遴選明幹之員前往肅州分別署理鎮篆州篆將此由五百里各諭令知之吏部左侍郎胡肇智因病解職調兵部左侍郎胡家玉為吏部左侍郎以禮部右侍郎邵亨豫兼署吏部右侍郎轉兵部右侍郎黃倬為左侍郎調工部左侍郎鮑源深為兵部右侍郎未到任前以詹事府詹事夏同善兼署轉工部右侍郎童華為左侍郎以內

閣學士錢寶廉為工部右侍郎管錢法堂事○察哈爾都統文盛因病解職以盛京戶部侍郎額勒和布為察哈爾都統未到任前以鑲藍旗蒙古都統慶春署理○甲寅諭內閣奕山著補授內大臣該大臣年逾八旬宣力有年日直內廷殊形勞勩前經有旨免其進班著再加恩開去御前大臣並管理一切差使仍留正紅旗蒙古都統並免其帶領引見以示體恤○諭軍機大臣等有人奏已革提

督李世忠在皖豫交界之葉家集地方修築堡寨五處私藏礮械招集亡命種種不法請飭拏辦又有人奏李世忠陳國瑞向籍管束恐生事端請拏問治罪各等語李世忠從前行為諸多不法業經加恩寬免此次與陳國瑞尋仇構釁業經降旨將李世忠陳國瑞分別革職降補勒令回籍交地方官嚴加管束朝廷就案辦理期得情法之平所請拏問治罪自可無庸置議惟該二員素性獷悍不安

本分儻經此次薄懲之後仍復怙惡不悛不遵地方官約束別滋事端卽著該督撫拏獲從嚴治罪至葉家集地方修築堡寨一節究竟有無其事並有無不法情形著英翰李鶴年查明具奏李世忠陳國瑞現在何處著曾國藩卽行勒令各回原籍不准逗遛另片奏擒首汪敦友前在河南商固交界毗連霍六之汪家畝地方占踞肆掠經兵勇捕拏脫逃現復潛回原寨挑濠築壘仍圖嘯聚搶案疊出請飭查拏等語著英翰李鶴年迅派幹員會同前往嚴密查拏訊明就地正法毋任漏網原摺片著分別鈔給閱看將此各諭令知之○乙卯諭軍機大臣等金順奏請賞假調理並補行守制葬親一摺金順業已補授烏里雅蘇台將軍此次發摺時自係尚未接奉前旨該將軍身歷戎行宣力有年覽所奏傷疾未痊等情殊堪廕念惟烏里雅蘇台為西北要區自被賊竄擾以後諸事須重加整頓

非有知兵大員前往辦理難資鎮壓金順素性勇往不避艱難現既膺茲重任自應迅速赴任悉心籌辦著仍遵疊次諭旨部署起程所部得力馬步各隊並著酌量帶往以資調度將此由五百里諭令知之○調鑲黃旗領侍衛內大臣惇親王為正黃旗領侍衛內大臣正黃旗領侍衛內大臣伯彥訥謨祜為正白旗領侍衛內大臣以鑲紅旗蒙古都統德長為鑲黃旗領侍衛內大臣○以鑲紅旗漢軍都統奕劻為閱兵大臣○以正白旗蒙古都統載治署鑲藍旗蒙古都統○調盛京刑部侍郎瑞聯為戶部侍郎兼管奉天府府尹以內閣學士銘安為盛京刑部侍郎○以左春坊左庶子楊慶麟翰林院侍讀林天齡左春坊左贊善王之翰充日講起居注官翰林院侍講學士周壽昌侍講許應騷孫詒經署日講起居注官○丙辰諭軍機大臣等李瀚章奏探明湖南會匪業經官軍擊散龍陽益

陽已無賊蹤。郭松林無庸越境進剿等語。湖南龍益匪徒既經剿散。常德防務已鬆。郭松林一軍自無庸越境進剿。惟荊州等處地關緊要。邊防仍未可稍疏。著李瀚章、郭柏蔭飭令該提督帶領各隊暫駐荊州。俟湘境一律肅清。再行率師回襄。以固邊圉。龍陽等城雖經收復。餘匪敗竄桃花江一帶。難保不再行勾結。餘燼復燃。現在逆首劉道美、劉貫三、何春台等均尚在逃。亟宜認真擒捕。以淨根株。

著劉崑飭令道員李光燦會同提督李明惠各軍盡力擒剿餘匪。並將逆首劉道美等悉數擒拿。不准一名漏網。一面嚴飭各州縣整齊團練。清釐保甲。認真搜查。毋任伏莽潛匿。現在辦理情形。仍著據實具奏。將此由五百里各諭令知之。○以內閣學士慶陞兼正白旗漢軍副都統。○丁巳諭軍機大臣等。英翰奏廣建地方情形。並獲賊親屬一摺。匪首關汶淮之子關雙淦及壻金尚芝業經英翰派

令總兵潘鼎立在合肥關家集地方拏獲。惟關汶淮尚無蹤跡。現將金尚芝作為眼線。並派總兵許思義等會同地方紳團密探賊蹤。即著英翰嚴飭派出各員認真訪拏。並著曾國藩、張之萬、楊昌濬於蘇皖浙三省交界處所各飭派出員弁會同該處地方文武一體嚴拏。迅速弋獲。毋任遠颺。廣建及孝豐一帶難保無餘匪藏匿。尤當搜捕淨盡。以絕根株。其廣建丈田事宜亦應趕緊清釐。該處土客

雜處。英翰務當慎選地方良吏。撫綏鎮壓。以期永遠相安。毋任滋事。將此由四百里各諭令知之。○又諭張廷岳等奏探悉賊情。現籌防剿一摺。據稱四月初十日賊匪在巴噶諾木汗地方與圖謝圖汗部落蒙兵相遇。被蒙兵擊敗。竄往東南。追至沙巴克烏蘇會同烏喇特中公旗巡防官兵兜擊。斬馘八名。擊傷二十餘名。現仍盤踞沙巴克烏蘇一帶。恐向東南竄擾等語。所奏賊匪奔竄蹤跡。與定安

前奏大略相同。惟賊股究有若干。未據張廷岳等奏及蒙兵與賊接仗。不能窮追。任賊奔逸。設徑由東南擾及臺路。烏庫文報糧餉被阻。固屬可虞。歸綏及察哈爾一帶。亦形喫緊。總當四面兜擊。使該逆無隙可乘。方可一鼓聚殲。盡除醜類。著定安、文盛、張廷岳等各飭派出兵弁。擇要堵禦。相機扼擊。仍隨時勤加偵探。互相知照。以期聲勢聯絡。杜嘎爾當懷遵臺次諭旨。督飭各軍探蹤進剿。毋得稍涉

鬆勁。烏城地方緊要。金順當迅速部署。馳赴新任。並挑帶得力馬步隊迎頭截擊。迅掃賊氛。正在寄諭間。據文盛奏。挑選馬隊守衛軍臺糧路。並臺站弁兵逃避情形。各摺片賊匪竄入烏喇特旗界內。文盛揀派右翼兵五百。在該翼地方駐紮。扼賊東竄。左翼馬隊五百。在軍臺要路分布偵探。惟濟斯洪果爾臺站。僅有畢都爾業隨帶官兵四十名。在彼督運。該處為察哈爾歸綏運糧要區。自應撥兵護

守。貢果爾所部前在該處駐紮。熟悉情形。此時北路兵力已厚。賊蹤又竄向東南。著杜嘎爾卽飭貢果爾管帶所部。迅卽馳赴濟斯洪果爾臺站駐紮。以保糧路。而遏狂氛。至布魯圖屬之喜喇穆呼爾等五臺。弁兵聞有槍聲。恐賊來擾。先後逃避。以致大同征兵半途阻滯。後路軍糧不能轉運。覽奏殊深廕繫。蒙兵如此懦弱。甚不足恃。著文盛趕將已散五臺設法招集。設復其未散各臺。並著妥為拊循。

飭令照常當差。毋得妄生疑懼。現在軍臺人心未免惶惑。亟需有兵鎮壓。貢果爾所部未到以前。卽照文盛所議。將左翼四旗馬隊派赴布魯圖一帶分布駐紮。以安眾心。大同七起官兵。急切不能前進。卽著暫紮各臺。藉資防堵。仍須將各臺駝馬速行整備。俾該官兵得以剋期進發。並將後路糧石接續轉運。不得任意遷延。致有貽誤。薩薩布所部本由綏遠取道濟斯洪果爾前進。著定安飭令該副

都統將此股賊匪悉數殲除至濟斯洪果爾臺站後暫紮以護糧運俟貢果爾到時再行西進續調古北口練軍千名曾否起程著李鴻章催令迅赴庫倫以備張廷岳等調遣將此由六百里各諭令知之○戊午諭軍機大臣等杜嘎爾奏查探賊蹤派隊進剿一摺賊匪由阿畢爾米特旗分股東竄一股竄入烏蘭察布盟烏喇特旗境內疊經諭知定安催令薩薩布督隊剿辦並諭令杜嘎爾探蹤進

剿茲據該副都統奏稱派令吉爾洪額帶領馬隊四百餘名前進著卽飭令該員探明賊蹤所向迅速截剿該匪股數不一恐其分投竄突杜嘎爾仍當懍遵疊次諭旨勤加偵探撥兵堵擊與定安文盛派出各軍聯絡聲勢迅掃逆氛不得擁兵株守坐失事機昨已寄諭定安文盛仍著該副都統隨時咨照不得稍分畛域惟征兵需用馳隻馬匹尚多缺乏亟宜寬為籌備著奎昌榮全多布沁扎木楚

張廷岳阿爾塔什達嚴飭各愛曼速將駝馬解逆杜嘎爾營中以應要需杜嘎爾現將烏城餉銀內先撥三萬六千兩發給官兵其餘銀兩仍飭令派出官兵小心看守毋稍疏忽將此由六百里各諭令知之○兩江總督曾國藩等奏續議長江水師變通章程五條一調操擬改為巡哨閱操並定營官月操總兵季操提督歲操每年由長江提督閱畢密咨總督會奏一調汛擬改為本營就近互調由

營官察看辦理按期造冊通報一分防內河勢難兼顧擬將內河湖蕩概歸地方文武管轄俾營哨各官處分不得藉口推諉一提鎮衙署擬添設親兵二十四名總兵以下各添十二名俾軍火各庫有所守衛一守備以下哨官請添設飛划一隻以資急捕下部議從之○己未諭軍機大臣等金順張曜奏遵籌沿邊防勦事宜一摺據稱甯夏一帶近防遠勦均關緊要該將軍等已分兵布置復商派

提督程之偉等帶隊馳往大舍太烏喇等處截剿並於石嘴磴口一帶派兵扼紮所籌尚妥卽著督飭各軍於派防處所嚴密堵禦遇有匪蹤竄近卽行實力截剿毋稍疏虞一面招集流民鎮撫降眾以靖地方金順當懷遵疊次諭旨酌帶所部剋日起程其甯夏防剿事宜卽著張曜妥籌辦理將此由五百里諭知金順並傳諭張曜知之○又諭劉嶽昭岑毓英奏官軍攻克賓居賊巢收復雲龍州城並茂克賊巢攻拔情形各摺片賓川所屬賓居賊巢盤踞日久經楊玉科等先後督軍進勦力攻一年有餘克拔堅巢賓川州境肅清雲龍州賊目趙炳南具稟投誠州城亦已收復該處軍務旣經得手大理賊勢自更窮蹙惟雲南縣踞賊負隅未下彌渡地方又有賊擾著劉嶽昭岑毓英飭令李維述等實力進勦迅克雲南縣城並將彌渡一帶竄賊悉數掃蕩毋稍延緩此次攻克賓居賊巢及收復

雲龍州城在事出力員弁准其查明併案請獎其茂克賊巢旣經攻拔開化府屬已就肅清仍著飭令張保和等乘此聲威速將田心等處賊巢次第攻克以期一律廓清將此由五百里各諭令知之○革職留任雲貴總督劉嶽昭等奏現在大理等九城尚為賊踞臨安各屬餘匪亦未肅清已飭將弁分投進剿謹遵旨將未經收復地方及某員勦辦某處繪圖貼說呈覽報聞○以雲南克復澂江府城暨平毀竹園等處賊巢出力賞道員蔡錦青副將潘文元參將柳明泰錢汝達熊遇周蘇成林遊擊何秀楨牟正昌都司趙廷雲陸純剛岑有富楊聯桂巴圖魯名號知府榮恩遊擊劉紹烈等花翎知州蔡芳田等藍翎總兵官何秀林等加銜升敘有差○予雲南賓川等處陣亡遊擊陳定邦等十三員祭葬世職加等○撥直隸司庫銀六千兩解赴西陵廣恩庫備用

大清穆宗繼天開運受中居正保大定功聖智
誠孝信敏恭寬毅皇帝實錄卷之三百十二

大清穆宗繼天開運受中居正保大定功聖智
誠孝信敏恭寬毅皇帝實錄卷之三百十三

同治十年辛未六月庚申朔

上詣鍾粹宮問

慈安皇太后安長春宮問

慈禧皇太后安至戊子皆如之奉

慈安皇太后

慈禧皇太后幸漱芳齋侍午膳諭軍機大臣

等李鴻章奏續派古北口練軍赴庫協防擬

俟臺站疏通再行飭催前進一摺古北口練

軍一千李鴻章現派都司賈吉齡統帶並籌

給三箇月餉乾酌發雨具號衣等項又照宣

化官兵章程購備月需食米所籌均尚妥洽。卽著該督飭令承辦各員趕將該官兵應需餉銀等項迅速給發催令剋日起程馳赴庫城協同防剿毋稍遲誤。前論文盛趕將已散五臺設法招集其未散各臺妥為拊循。本日李鴻章亦稱目下情形以整復臺站趕通運道為急。著文盛懍遵前旨將臺站趕緊設復並將應需駝隻設法籌添保護俾軍行無阻糧道疏通不得稍涉遷延致滋貽誤。此項續

調官軍行抵庫倫後張廷岳阿爾塔什達務當妥籌布置相機防剿應領餉銀卽由張廷岳等照章接續支放毋令缺乏。文盛前奏布魯圖屬之喜喇穆呼爾五臺弁兵聞有槍聲紛紛逃避究竟賊匪曾否擾及臺站現在匪眾是否仍踞烏喇特旗境內抑已由西而東著文盛張廷岳等多設偵探派兵會合兜剿該五臺與賽爾烏蘇臺毗連卽赴庫倫大道並恐賊眾避兵而行由東繞道赴庫均應先

事豫籌張廷岳等尤當確探嚴防毋稍大意將此由五百里各諭令知之。又諭色揚阿等奏軍勢稍鬆會籌布置情形一摺據稱湖北穀城縣境內有土匪勾結起事之謠民心不無驚惶襄樊為南北通衢重鎮兼值甘肅遣撤南勇過境不絕恐致沿途滋事現擬於前調武毅各隊三千名內暫留兩營駐紮荊州其餘馬步悉由郭松林統帶回襄等語湖南會匪雖經官軍擊散現尚竄匿桃花江一

帶鄂省邊防未可稍鬆穀城境內既有土匪起事之謠尤恐內外勾結伏莽潛滋襄樊一帶自應豫為籌防所有武毅各隊應如何分別留荆回襄以固邊防而清腹地之處著李瀚章郭柏蔭會商巴揚阿等酌度緩急情形妥為布置毋稍疏虞。桃花江竄匪被剿窮蹙難保不窺伺鄂邊丁長春所帶水師礮船卽著飭令前往常德駐紮嚴密防堵其前調彭昌禧等各礮船如湖南兵力現敷分布卽著

撤歸各汛以專責成。將此由四百里各諭令知之。○壬戌太白晝見。○諭軍機大臣等。劉崐奏益陽等處會匪一律殲除一摺。據奏道員李光燦等由桃花江進剿舒塘等處竄匪殲盡無遺。益陽龍陽交界資江南北兩岸一律肅清。惟所稱查探著名首逆多死於陣。語涉含糊。究竟劉道美劉貫三何春台等首逆曾否殲斃。有無確據。抑尚在逃未獲。該犯等係起事首惡。斷不准任令漏網。著劉崐遵派

幹員並飭所屬地方官嚴密躡緝。務須悉數弋獲。其從逆之犯亦當搜捕淨盡。以絕根株。該撫現將派出各軍分別撤回酌留。李光燦兩營擇要扼紮。並派員會辦益陽等處團防。仍著飭令該員等認真防範。以遏亂萌。湖南會匪連年滋事。雖立時撲滅。而閭閻已被其害。劉崐身任封疆。當時時以緝匪安良為念。妥為籌辦。不得因循粉飾。致負委任。所有此次李光燦等軍剿匪出力著准其暫行存記。

俟清查完竣酌量保奏。將此諭令知之。○盛京將軍都興阿因病乞假。以盛京戶部侍郎瑞聯暫署將軍。○予湖南益陽殉難在籍知州陳景滄祭葬世職加等。子監生克灃。文生克權。賞卹加等。○癸亥諭軍機大臣等。庫克吉泰奏遵旨清查圍場現籌辦情形一摺。熱河圍場佃戶侵占圍地。經庫克吉泰查明情形。將圍外附近旗地令該民佃按照原領條何旗圍內之地。即以何旗圍外之地如數

補給。至各旗之人從前認領邊荒曾交過押荒銀兩。即以貴山等舉出餘地及所捐之地就近補還。現在圍場八處及蹕路經過之所均已一律騰清封禁。其應補民佃之地亦陸續補足。並於各要路總口立界設卡。以免侵越。辦理尚為妥速。即著庫克吉泰飭令司員孫恩慶等迅將一切未盡事宜悉心籌畫。次第興辦。該都統務當隨時稽察。毋令日久生弊。方為妥善。將此諭令知之。○又諭福濟等

奏會議酌派委員總辦糧臺請飭速解馬隊口糧趕辦駝馬等項奎昌等奏遵籌撥兵會勦杜嘎爾奏偵探逆匪奔竄情形各摺片出征馬隊需用糧餉極關緊要福濟等擬請在張家口設立總局由口北道專司其事按月源源運送一面由烏城派員在霍呢齊等處迎提著李鴻章酌量情形或令口北道親赴張家口或派員前往妥為辦理期無貽誤惟疏通糧路尤為第一要著刻下蘇彰阿所帶

馬隊在烏城防所已有斷糧之患杜嘎爾營中裹帶之糧亦將罄盡情形實為困苦前據文盛奏布魯圖屬五臺弁兵聞警逃避糧石中途堆積該都統業已挑撥牧羣駝馬趕為運送尚能先其所急仍著飭令各臺趕緊整頓齊備務將應需糧餉陸續趲運以資軍食並著杜嘎爾遵照五月二十八日諭旨飭令貢果爾迅帶所部馳赴濟斯洪果爾臺站駐紮保護糧路至駝隻馬匹等項均為軍營急

需福濟等因蒙古力難供應發給西兩盟銀各一萬兩以為採買之需著張廷岳阿爾塔什達飭令東兩盟長即行派員赴烏領價一體照辦並著理藩院傳知各該盟長曉諭所屬此次派兵遠征原為保衛蒙古遊牧地方若因駝馬缺乏貽誤事機致賊匪蔓延愈廣於蒙古生計亦大有關礙該盟長等務當力顧大局竭力籌辦不得觀望推延致滋貽誤定安前奏賊踞洪庫勒塔拉地方薩薩布等

帶兵進勦現在勦辦情形若何本日據杜嘎爾奏賊於五月十五日竄至拉蘇倫巴咱爾所屬遊牧之巴爾圖叟吉地方與第十七臺相近是否另是一股該副都統現令吉爾洪額所帶之隊改道追勦著即飭令緊躡賊蹤相機截擊並著定安催令薩薩布迅將洪庫勒塔拉之賊勦除淨盡即行取道前進探明賊蹤與杜嘎爾所派之兵聯絡聲勢會合夾擊以期迅掃逆氛邊外地勢遼闊該匪到處

流竄防不勝防奎昌等請將杜嘎爾之兵酌留一千名於哈爾尼敦以顧烏庫兩城門戶其餘一千數百名派令跟蹤進剿並請飭綏遠城察哈爾庫倫各派官兵合力會剿等語著定安文盛杜嘎爾張廷岳阿爾塔什達悉心會商妥籌辦理總期將此股竄匪設法及早殄除免致日久紛擾福濟等另片奏前咨綏遠城揀派筆帖式生監一二十名章京三四員赴烏迄今尚未派往等語著定安按照福濟等前咨照數揀派飭令剋日前往毋稍遲延將此諭知理藩院並由六百里諭令李鴻章定安奎昌榮全多布沁扎木楚文盛杜嘎爾張廷岳阿爾塔什達知之○予烏里雅蘇台陣亡前鋒忠信等十四名賞卹如例○甲子諭內閣李鴻章奏審明造言惑眾之職員請旨懲辦一摺此案已革運同銜知縣劉謨閣以職員辦團平日恃眾妄為聲名頗劣同治九年三月間輒聽營弁滿文全浮言擅

自致信鄰國令各修守具以致合境人心惶惑雖非有意煽惑眾心殊屬謬妄劉謨閣著從重發往軍臺效力贖罪以示懲儆○諭軍機大臣等李鴻章奏江西應造直隸剝船趕辦不及請仍暫由直隸代造一摺上年據該督奏稱漕運剝船不敷周轉當經降旨准由直隸代造三百隻以顧本年漕運茲據李鴻章體察情形直隸剝船疊因年久滿料不敷應用來歲新漕運津舊船滿料愈多新船剝運不足南省排造之船不能依限解直懇將江西應造剝船三百隻暫由直隸代造等語所奏自係為慎重新漕起見即著劉坤一查照直隸歷屆代造剝船價銀於該省解部漕折項下如數籌撥迅速委員限七八月間解到直隸此項漕折銀兩仍著劉坤一籌款解還部庫以清款目李鴻章於江西解到價銀後即行督飭天津道趕緊排造剝船三百隻務於明歲漕前造齊毋誤要需嗣後江西等

省分年排造剝船仍不得援為成案以符定制將此由四百里各諭令知之○又諭張廷岳等奏偵探逆匪竄踞情形請飭各路援兵就近進剿一摺據稱逆匪分作三股一股擾及喀喇沁圖固里克暨托里布拉克二臺一股在騰格里諾爾地方盤踞一股竄至噶克察巴揚莫多等處現在圖固里克托里布拉克二處臺站業經渙散烏庫兩城糧餉及宣大兩軍兵食必將阻滯不通非各路援兵合

力勦洗不足以肅清邊境各等語賊匪飄忽無常現既分股滋擾臺站牽掣糧餉要路難保不俟庫倫兵取前往堵剿即乘虛撲犯庫倫張廷岳等現調蒙兵六百名馳往該處相機勦捕並督飭宣化步隊嚴密防守所籌尚屬周密即著張廷岳等多發偵探防勦兼施毋稍疏懈杜嘎爾駐紮哈爾尼敦一帶距圖固里克等臺站僅二十二臺尚不甚遠著該副都統仍遵本月初四諭旨偵賊所在派員

帶兵進剿匪股分合不定並著飭令帶兵員弁於賽爾烏蘇迪南一帶會同庫倫派出各軍將此三股賊匪聚而殲旃以通臺站而清東路文盛已派兵千名前進著定安酌量情形派撥隊伍合力兜剿薩薩布現紮何處並著定安懷遵前旨飭令該副都統迅率所部轉戰而前至濟斯洪果爾一帶暫紮以護糧運布魯圖屬已經潰散各臺文盛當懷遵疊次諭旨趕緊設復以利師行李鴻章即飭都司賈吉齡統帶古北口練軍一千名迅速起程赴庫歸張廷岳等調遣俾厚兵力將此由六百里各諭令知之○又諭瑛榮奏科城需餉甚殷請暫由烏城借撥銀兩一摺前因科布多防勦緊要業經文盛將部撥餉銀十萬兩發交該城委員接領並增添駝隻派員護送到科惟現在喜喇穆呼爾等五臺弁兵聞警潰逃道途梗阻此項餉銀一時未能起解而該城援兵不日到防餉需刻不容緩著奎

昌榮全多布沁扎木楚。即於部撥烏城兵餉內先行借撥三四萬兩就近解赴科城以應急需。一俟臺站疏通該城餉銀經過烏城時即將借撥之項如數扣還以清款目。該城糧石業經定安何璟設法接濟。瑛榮文碩於官兵到防後即著妥籌布置認真防勦另片奏請將續調前赴庫倫之直隸官兵一千名暫紮張家口外以張聲勢等語。庫倫防務正在喫緊本日已諭令李鴻章將此項官兵飭令

馳赴庫倫以資防守。該處需兵孔亟萬不能稍有遲留。瑛榮所請暫留該軍紮張家口之處著毋庸議。將此由五百里各諭令知之。○以緝捕不力降直隸大名鎮總兵官姜國仲為參將。以前任廣東瓊州鎮總兵官彭楚漢為直隸大名鎮總兵官。予湖南故工部尚書羅源漢入祀鄉賢祠。從巡撫劉崑請也。○乙丑陝西巡撫蔣志章議覆整飭綠營改勇歸兵擬於裁撤客勇之際易以土著以期漸

復營制得旨營務廢弛已久著即實力整頓俾士卒皆成精壯餉糈不至虛糜毋得徒託空言是為至要。丙寅諭軍機大臣等都察院奏河南職員周文浚等遣抱赴該衙門呈稱咸豐九年間商城縣知縣忽改徵收定例將上下兩忙錢糧併為一徵每屆二月初旬糧差催比勒令全完始因軍需緊急後遂沿為定例甚至糧差先代花戶墊完名曰備糧加倍收取任意勒索請飭遵照定例徵收等

語徵收錢糧向分上下兩忙何以該縣擅改舊章先期併徵並任令糧差代墊倍徵藉端勒索著李鶴年嚴飭該縣遵照定例辦理並查明有無糧差勒索之弊隨時懲辦以蘇民困原呈著鈔給閱看將此諭令知之。○丁卯諭內閣御史劉瑞祺奏步軍統領衙門書吏番役串用非刑唆使原告傾陷平民承審官為其蒙蔽以致案懸不結請飭嚴查等語中外理刑衙門詞訟事件理宜迅速早結若如

該御史所奏步軍統領衙門書吏舞弊各節。貽累小民實屬不成事體。著步軍統領衙門堂官嚴飭所屬司員勤慎。趨公於吏役人等嚴加稽察。遇有詞訟事件。迅速了結。其已經完結之案。必將案由及起結各日期榜示署門。並詳移河南道御史稽查。以除積習。○又諭御史劉瑞祺奏請飭銷毀小說書版一摺。坊本小說。例禁褻嚴。近來各省書肆竟敢違禁刊刻。公然售賣。於風俗人心殊有關係。亟

應嚴行查禁。著各直省督撫府尹飭屬查明。應禁各書。嚴切曉示。將書版全行收毀。不准再行編造刊印。亦不得任聽吏胥借端按查。致涉騷擾。○諭軍機大臣等。恩麟德泰奏僧俗番官謀害已革番目。分別奏參一摺。據稱達爾漢總堪布班墊頓柱句通噶勒丹寺喇嘛阿丹及扎薩克喇嘛扎克巴協捻折窩喇嘛策忍桑結。謀令諾們罕呼圖克圖辭退協理商上事務。並定計密差喇嘛分住各處。將

已革贖罪之普隆噶布倫彭錯策旺奪結父子。池捫戴琿琿期美奪結。大昭倉儲巴江洛拉旺彭錯。通巴戴琿琿朗結頓柱。及現參催果噶布倫密瑪策忍等六人。先後謀死班墊頓柱。旋因畏罪潛回噶勒丹寺。噶布倫策忍汪曲聽信該總堪布之言。私離職守。同往噶勒丹寺集眾抗拒。不遵劄調等情。此案班墊頓柱謀奪商上之權。輒敢句通各該喇嘛。謀害多人。不法已極。策忍汪曲聽信班墊頓柱煽惑。

擅離職守。情亦可惡。班墊頓柱原授達爾漢總堪布職名。扎克巴協捻現授四品大堪布。連扎薩克名號。策忍汪曲曾授台吉噶布倫連東科爾著。卽一併斥革。並著恩麟德泰派撥番營官兵將該犯等拏獲。會同達賴喇嘛訊明。確供定擬。具奏該犯等既經糾集僧俗。意圖抗拒。恩麟等尤當妥為彈壓。一面嚴拏首要各犯。一面解散脅從。以免滋生事端。另摺奏。遵查達賴喇嘛下山。奉經援案聲明等。

語本年達賴喇嘛親至大昭唵經攢招為國
祈福忱悃可嘉著發去黃哈達一箇銀曼達
一箇鈴杵一分菩提念珠一串玉盃一箇玉
盤一箇黃緞二卷交恩麟等轉給達賴喇嘛
祇領用昭恩賚將此由四百里各諭令知之

○戊辰

上詣

奉先殿

壽皇殿行禮○兩廣總督瑞麟奏遵查署陽江

鎮總兵官彭玉派弁前赴越南偵緝事本因
公惟擅用公文照會越南地方官究屬不諳
體制業經撤任應免置議把總李德安等奉
派偵緝查無別項情弊其陳鴻一名現已照
會越南國王查辦報聞○明正宣慰使司土
官甲木參齡慶等三十六人於神武門外瞻
覲○己巳諭軍機大臣等左宗棠穆圖善豫
師奏陝回句結西甯回族滋擾派兵堵剿一
摺陝回分竄西甯攻撲高寨威遠等堡擾及

高羌堡董家寨一帶經總兵黃武賢派隊堵
剿疊獲勝仗惟逆首白彥虎率黨攻陷小南
川漢堡踞為巢穴崔三一股仍踞曹家堡分
黨潛伏高寨禹生彥股眾與為犄角並有金
積堡敗匪竄至與西甯回民聯為一氣河州
回目馬占鼇等亦率撤回攻陷民莊西甯回
族就撫本不足恃現在外匪紛至與之句結
勢恐蔓延穆圖善現已檄令黃武賢率領三
營會同豫師原駐威遠營勇調集西碾各路

圍下相機堵擊即著督飭派出兵團認真剿
辦毋任賊勢鴟張西甯地方賊股充斥豫師
兵力既單穆圖善駐省各營勢又不能遠調
左宗棠當統籌全局迅即撥隊馳往助剿痛
殲妖氛其應如何籌辦布置並現擬進紮何
處河州回巢應如何分路進兵攻剿均著詳
細具奏赴湟道路雖梗豫師仍當設法剋期
前進不得濡滯中途以重職守穆圖善另片
奏未能撥兵兼顧西路等語甘省北路雖漸

肅清而敗殘餘匪竄向河州西甯等處陸續由甘涼遁入肅州若左宗棠進兵規取河州賊勢窮蹙必以西路為遁逃藪自應添撥兵勇扼守西路方足制賊死命穆圖善所部保守省城護運糧石未能移調前往自係實在情形甘涼兵力過單難資扼勒左宗棠統轄全省西路應早籌及仍著迅速撥兵協勒毋得稍涉遷延致滋貽誤穆圖善亦應督率近省各軍隨時扼勒竄匪與左宗棠和衷商辦不可稍分畛域左宗棠穆圖善另摺奏勒辦山丹土匪及甘州賊股情形已明降諭旨將出力及畏縮各員分別獎勵懲辦矣仍著左宗棠等飭令楊占鼇督率所部加意防範毋令賊匪乘間奔突以靖地方將此由五百里各諭令知之○甯夏將軍穆圖善奏請將丁憂副都統雙福仍留軍營允之○以甘肅勒辦山丹土匪暨甘州府城解圍賞副將何青霄參將陳友交陳元萼巴圖魯名號千總石

得明以守備用並賞花翎餘加銜升敘有差革職陣退縮總兵官吳于城遊擊李聯芳職○庚午諭軍機大臣等曾壁光周達武奏勒辦永甯等處賊匪情形一摺貴州官軍由盤江以北進剿疊破永甯鎮甯歸化賊巢克復募役司汛城並攻破郎岱水城各崗寨盤江以北雖無賊蹤難保該逆不乘隙回竄復肆蔓延曾壁光等現調總兵何世華督率八營防守盤江北岸即著飭令該總兵嚴密布置認真防守毋令再行擾及北岸以免復煩兵力曾壁光等現調鄧有德鍾有思等馳赴下游分路進兵著曾壁光周達武檄飭派出各軍分路進規麻哈清平等處轉戰而前節節掃蕩以期次第廓清李高脚一股竄粵境後現在勒辦如何著馮子材康國器懍遵前旨飭令孔憲隆等會合黔軍迅將此股殘匪悉數殄除此時黔軍進攻麻哈清平等處苗匪兵力尚恐不足馮子材等能否騰出勁旅越

境助勦之處著卽酌度情形相機調派不得稍分畛域將此由五百里諭知曾璧光馮子材並傳諭康國器周達武知之○又諭杜嘎爾奏賊匪東竄派隊追勦一摺據稱賊於五月十七日經過圖固里克臺站在拉蘇倫巴咱爾遊牧地方盤踞旋即東竄寨莫得庫等處嗣又竄向莫霍爾嘎順臺站與文盛張廷岳等先後奏報大略相同該逆由阿勒台軍臺向東竄走距察哈爾不過千餘里正宜乘

其竄迹合力兜勦杜嘎爾已令訥蘇肯帶領官兵與庫倫派出喀爾喀各隊會合進勦並派西勒興阿會同吉爾洪額所帶之兵向東迎擊著卽催令各隊星速前進探蹤截勦文盛前派察哈爾左翼官兵五百名在軍臺要路安營並令大同兵暫紮各臺防堵此時賊距臺站不遠著文盛慶春飭令迎頭遏截務期與杜嘎爾所派之兵兩面夾擊就地殄除該匪駁駁東向難免不覲覲庫倫著張廷岳

阿爾塔什達督令派出各隊實力追勦並嚴檄附近防兵確探嚴防毋稍大意薩薩布前次進勦洪庫勒塔拉踞匪曾否歲事著定安催令迅速取道前赴濟斯洪果爾一帶相機兜勦以顧糧運毋稍遲緩杜嘎爾現在催調駝馬並在附近雇覓駝隻應用著俟辦理就緒卽行統帶官兵剋期進勦其哈爾尼敦一帶應如何留兵扼紮以顧烏庫門戶仍著懷遵前旨妥籌辦理刻下臺路梗阻糧運遲滯

若不迅籌疏通兵食必至缺乏關繫非輕著杜嘎爾飭令伊勒和布會同賽爾烏蘇管站官玉和將臺站失散人眾趕緊收集並著文盛慶春將布魯圖屬各臺一律設復並將各軍糧餉催趲運解以資接濟將此由六百里各諭令知之○直隸總督李鴻章奏報日本使臣到津日期得旨著卽督飭應寶時陳欽恣心籌辦務臻妥善○廣州將軍長善等奏遵旨酌保勞績優異旗員請將記名副將協

領承惠。以副都統記名簡放。協領劉安堡。交部從優議敘。允之。並均賞二品頂帶。○以直隸永定河南岸漫溢。總督李鴻章下部議處。革職。丞蕭承湛職。道員李朝儀同知朱津。均革職留任。○以貴州攻克永甯等處賊巢。盤江北岸肅清。賞參將黃允中二品封典。提督黃宗耀。總兵官鄧有德。巴圖魯名號。知州王藻春等花翎。府經歷楊見龍藍翎。餘升敘有差。予陣亡參將張晉成。都司何曉春。千總雷玉庭。祭葬世職加等。○壬申。諭軍機大臣等。丁寶楨奏。派員查閱營伍。分別獎懲。暨捕獲嶧縣棍匪。按拏曹屬匪徒。並擒逆首正法各摺。片。山東各屬營伍。經丁寶楨嚴加整頓。派員逐一校閱。據稱較上年漸有起色。刻下精壯士卒。堪以抽調備用者。約可得六十餘人。仍著督飭各標營。勤加訓練。以冀悉成勁旅。不得以一奏塞責。仍蹈從前廢弛積習。務須實心實力。持以有恆。隨時隨事。加意整頓。一

二十年後。或可轉弱為強。登中營守備李兆龍。訓練無方。萊州營守備萬宇春。辦事顛預。均著卽行革職。沂州營副將孫文友。馭軍有法。著賞給尋常加一級。武定營遊擊趙鴻先。署青州營參將溫長湧。梁山營都司賈宗江。均屬訓練得力。著各給予紀錄二次。其裁汰老弱兵丁。著丁寶楨酌量情形。隨時募補足額。以符舊制。至嶧縣境內。竟有棍匪多人。潛入滋事。雖經孫文友等立時按拏。擒斬殆盡。惟尚有餘匪十數名。在逃未獲。且現在漕船陸續挽入東境。仍恐有此等匪徒潛行潛入。著丁寶楨飭令派出員弁。將餘匪按名緝拏。並飭地方文武認真巡查。毋任奸宄潛跡。此股賊匪。捕拏尚為迅速。副將孫文友著給予隨帶加三級。臺莊營參將劉志和。嶧縣知縣蘇名顯。著各給予隨帶加二級。以示獎勵。匪首張懷舉。劉浩。得窩聚何處。亟應設法捕獲。如在江南境內。並著知照該督撫。飭令地方

文武迅速會捕。毋得養癰貽患。曹州各屬盜風甚熾。而濮鄆交界之水套。尤易藏奸。從前東省伏莽。每以水套為逋逃藪。此次又有叛匪句結土棍散勇至二百餘人。在水套藏匿。時出搶劫。經王正起等先後拏獲首夥八十餘名。餘匪分逃直隸江南邊境。根株未絕。仍恐蔓延。丁寶楨現飭長賡派緹躡緝務須悉數弋獲。毋令遠颺。並隨時知照直隸兩江各督撫。飭屬一體兜拏。以清餘孽。擒首燕化堂。

日久在逃未獲。近復在東豫交界處所聚眾滋事。長賡探悉賊蹤。派員在河南永城縣境將該犯拏獲就地正法。足以消患未萌。長賡著開復革職留任處分。河南永城縣知縣陳夢蓮。夏邑縣知縣蔣士漢。著各給予尋常加二級。逸犯盧潮潰等。仍著嚴緝務獲。毋任漏網。將此諭令知之。○補鑄甘肅洮岷協副將鞏昌府知府儒學岷州知州儒學隴西縣知縣儒學安定縣儒學洮州廳儒學照磨各印

信關防條記從總督左宗棠請也。○癸酉禮部以

慈安皇太后聖壽禮節請得旨是。照例行禮。奉慈安皇太后懿旨。今年停止筵宴。其在外公主福晉命婦進內行禮之處。並著停止。○陝甘總督左宗棠奏。現派總兵官戴定邦帶律勇兩營駐防隴州等處。報聞。○甲戌

上奉

慈安皇太后

慈禧皇太后幸漱芳齋侍午膳。○諭軍機大臣等。劉崐奏。勦除雷公山踞逆。並掃蕩附山各寨一摺。湖南援黔官軍自攻克丹江凱里後。乘勝進取。連克南刀大塘堪洞各賊巢。徑趨雷公山。立平雷公坪。並攻克九眼塘燕子窠等寨。直登山頂。縱橫盪決。殲賊千數。百名雷公山境肅清。惟逆首張臭迷率賊數百竄逸。該逆糧盡黨散。勢已窮蹙。著劉崐飭令席寶田督率將弁。跟蹤追捕。迅速弋獲。以除巨憝。

並派隊由螃蟹等處轉戰而前廓清大道俾
無梗阻貴州各軍已將上下江收復調隊進
次都勻麻哈之間與楚軍相距不遠著曾璧
光周達武檄催派出將領會合楚軍迅將逆
苗次第殲除以靖黔疆此次在事出力人員
著劉崐暫行存記俟苗疆肅清再行彙請獎
勵將此由五百里諭知劉崐曾璧光並傳諭
周達武知之○以記名總兵官章洪勝為甘
肅肅州鎮總兵官○予貴州雷公山陣亡遊
擊劉得勝祭葬世職加等○修直隸秦甯鎮
坍塌營房從總督李鴻章請也

大清穆宗繼天開運受中居正保大定功聖智
誠孝信敏恭寬毅皇帝實錄卷之三百十三

[illegible]

同治十年辛未六月乙亥諭軍機大臣等楊

昌濬奏查辦嚴州齋匪情形一摺浙江衢嚴二府界連江閩時有齋匪溷跡本年四月間壽昌縣地方謠傳外來匪徒暗中勾結滋事經該縣督團緝獲徐保洪包膳幅二名五月初八夜間復有匪徒突入嚴州府城卽經該處文武派兵擊勦擒斬多名立將城內餘匪及城外匪黨搜捕訊據賊供此股匪徒係江西鉛山縣人李懷東起意刼犯搶掠首先進城已被陣斬其逃散之匪亦經先後拏獲並

訪獲積年齋匪頭目周幗良卽朱葛亮等地
方一律肅清辦理尚為迅速嚴州府屬文武
各員本有應得處分姑念事起倉卒登時撲
滅功過尚足相抵著免其置議其奮勇勦賊
受傷之副將黃中理著交部從優議敘齋匪
出沒靡常實為地方之害楊昌濬仍當檄飭
派出各員會同各該地方官督率團練隨時
稽查遇有不法之徒三五成羣形跡可疑者
立卽躡拏從嚴懲辦此股人數究有若干窩

聚究在何處江西福建與浙江毗連處所尤
易藏奸著文煜王凱秦劉坤一楊昌濬一體
飭屬確查悉數兇拏毋任匪黨藏匿鉛山等
處匪徒疊經諭令劉坤一督率所屬實力搜
捕該撫務當懍遵疊次諭旨飭令所屬各員
認真辦理務將該匪黨與訪拏淨盡以絕根
株將此由四百里各諭令知之 又諭李瀚
章郭柏蔭奏拏獲穀城縣謀逆匪徒並湘省
龍益匪黨肅清等語湖北穀城縣匪徒葉子

午等商同逸犯蔡凌漢招集河南夥黨約期滋事經該縣知縣宋熙曾訪獲並起出謀逆書信等件著李瀚章等飭令審明後卽將各犯就地正法並勒限緝拿逸犯蔡凌漢等務獲盡法嚴辦該逆既有招集河南夥黨滋事之語著李瀚章等知照李鶴年飭屬訪察如有匪徒潛謀勾結卽行嚴拿懲治郭松林現已回襄著知照該提督將各軍扼要駐紮妥為彈壓湖南龍益滋事會匪雖經勦散伏莽

尚多該督撫務當督飭各該州縣力行保甲認真稽查以期消患無形不得以現已撲滅稍形疏懈匪首劉道美劉貫三何春台等曾否殲斃著劉崐懌遵前旨嚴密躡緝斷不准任令漏網將此由四百里各諭令知之○追予江蘇各屬陣亡殉難外委顧勝榮等紳民婦女一千七百四十一員名口分別旌卹如例○予貴州各屬陣亡殉難內閣中書章永康等紳民婦女一千二百二十七員名口分

別旌卹並立祠建坊如例○丙子諭內閣御史張沄奏湖南莠民滋事宜靖亂源請飭申明軍令分別良莠等語近年以來湖南時有莠民滋事之案雖據該撫疊次奏報肅清而伏莽仍未盡絕亟應設法整頓以遏亂萌若如該御史所奏湖南地方官吏往往諱盜不報以會匪名目為藉口之資上司不欲究治本官不敢查拏甚至賄賂通行誅求無已以致激成禍亂殊堪痛恨著劉崐督飭各該地

方官力除積習申明軍律於該管牧令失於撫字激變良民之案嚴參懲治並將統兵武職遷延貽誤各情據實參奏至湖南勇丁人數眾多積功保至提鎮等官者亦復不少在軍共矢同仇之誼歸里本無結匪之心惟其中良莠不齊又值年來水患頻仍流亡未輯無業游氓或因飢寒迫為盜賊滋事者未必盡屬勇丁而犯法者亟應嚴加懲創著該撫查明搶刦拒捕之徒盡法懲治其被脅入夥

及未入夥者分別辦理以靖奸宄而安善良
諭軍機大臣等本日據御史張沄奏湖南
羣民滋事條陳辦法一摺內有補行伍減援
軍二條詳加披閱所奏不為無見湖南撤回
勇丁前曾效力行間內多保有官職閒散日
久生計維艱該御史請將撤回楚勇酌量補
入行伍以示體恤而遏亂萌亦因時制宜之
策著李瀚章劉崐體察該省情形卽行妥議
章程具奏原摺著摘鈔閱看至席寶田援黔

一軍歲需餉銀二百餘萬頓兵日久疲於供
支現在黔省軍務方有眉目又亟須鄰封援
應斷難半途撤退盡棄前功楚省伏莽甚多
本省兵力不足以資鎮攝該御史請將援黔
一軍以一半留黔一半調回本省自固疆圉
著劉崐通籌全局酌度辦理總期兩有裨益
不得顧此失彼至援黔軍餉本歸楚省籌濟
該御史深慮獨力難支請令湖南從長覈算
每歲實協黔餉若干萬兩再於兩廣四川湖

北江南江西等省釐捐項下酌量撥濟著各
該督撫酌度該省情形能否協撥若干毋稍
推諉庶眾擎易舉楚黔均受其利也楚省目
前須舉行團練保甲諸法以清亂源而江蘇
等省時有遣散勇丁解回本籍者清查既難
緝束亦復不易必至滋生事端著各路統兵
大臣各直省督撫卽將安插散勇章程悉心
酌議具奏原摺片均著鈔給閱看將此各諭
令知之 又諭李鴻章奏口外臺站潰散糧

運阻滯請飭迎提保護定安各撥隊探剿檄
調馬隊進紮臺路慶春奏設復臺站情形派
兵赴臺防剿杜嘎爾奏酌配調到駝隻帶隊
起程各一摺杜嘎爾於圖謝圖汗部落解到
駝隻後卽抽調官兵三百餘名親自統帶起
程偵探賊蹤向東南進剿並飭吉爾洪額訥
蘇肯迅速前進一體探剿卽著該副都統督
飭各軍視賊趨向實力夾擊毋得再涉遲延
致令匪蹤紛竄至駐紮哈爾尼敦各隊調出

千有餘名存營官兵無多而餉銀十餘萬兩尚在烏訥格圖站收存杜嘎爾務當嚴飭達爾濟等於推河等處要隘嚴密防守以保糧餉喜喇穆呼爾等臺雖已設復大半惟默霍爾噶順霍呢齊二臺又被賊擾且探有分犯庫倫多倫諾爾之說是賊蹤駸駸東竄距察哈爾不過千餘里慶春當飭前調察哈爾官兵迅即起程前進探蹤迎勦與杜嘎爾等軍兩面夾擊就地殄除張廷岳阿爾塔什達仍

懷遵疊次諭旨督飭官軍勤加偵探妥籌防勦毋稍懈怠臺站梗阻前敵各軍糧食恐有匱乏之虞雖經大盛檄催各臺駝馬並撥兵護送尚恐緩不濟急著杜嘎爾將二十五臺以下存積米糧派隊迎提到營接濟軍食仍酌撥隊伍擇要扼紮以護續運之糧慶春迅將已復各臺設法保護未復各臺趕緊招集以期源源接運無誤師行其宣化官兵並著張廷岳等就近在恰克圖採辦糧石以資接

濟一俟臺站疏通卽由李鴻章飭令口北糧臺如數解還庫倫至張家口糧臺既據李鴻章奏稱現由口北道就近督辦均尚妥協卽著照舊辦理毋庸另議更張前竄烏喇特旗之賊經薩薩布等派兵會勦賊向西北竄去難保不與固爾板賽漢一股會合擾及軍臺著定安仍遵前旨催令薩薩布督率所部剋日馳赴濟斯洪果爾一帶相機兜勦以顧糧運並令劉廷等軍聯絡聲勢會合夾擊以期

盡掃逆氛賊匪究分幾股共有若干人現在究竟分竄何處除薩薩布所部曾與賊接仗外杜嘎爾所派吉爾洪額等何以終未與賊相遇著定安慶春杜嘎爾張廷岳等確切偵探實力防勦並著定安檄飭烏喇特茂明安等旗嚴密堵禦毋任賊匪再行竄入將此由六百里各諭令知之又諭穆圖善奏各營馬步勦賊獲勝等語甘省大靖及黃崖王鵠壩山石井子等處時有竄賊搶掠軍糧及農

民牲畜經薩英阿雙福等帶隊迎擊擒斬多名金縣境內竄匪亦經穆克德布會合團勇擊敗惟現值收穫夏田之際該逆四出滋擾無非計圖飽掠仍著穆圖善督飭派出各隊分途截勦保護農田毋任肆擾河逆大股現復偷渡洮河鞏昌安定徽縣等處均有賊蹤該處入省大路時通時塞秦州運省餉銀軍火亦尚滯中途安定迤西之車道嶺等處為糧運要路游匪出沒防不勝防穆圖善所部

不數分布亦係實在情形左宗棠當酌撥勁旅前往助勦力圖兼顧穆圖善仍就現有兵加實力防範毋稍鬆懈其河州逆回如何籌辦及現在情形若何仍著左宗棠迅速具奏將此由五百里各諭令知之○命兩廣總督瑞麟為大學士仍留兩廣總督任○以甘肅大靖等處擊賊獲勝賞還副都統雙福頂翎○以甘肅西柳溝等處截勦竄匪獲勝賞驍騎校額爾精額蘇勒布巴圖魯名號餘加銜

有差復陣亡已革委參領德住原官予祭葬世職如副都統例戊寅予故吏部左侍郎胡肇智祭葬如例己卯諭內閣前因鄭親王承志於指使糾毆福珣被扎身死一案任意狡展當將承志革去王爵仍令管理宗人府王等軍機大臣會同刑部嚴行審訊茲據審明分別定擬具奏此案兇犯馬三聽從王壽糾邀將福珣毆扎致傷身死該犯以回民因案擬軍由配潛逃膽敢於輦轂重地戕害

職官實屬不法已極馬三著即行處絞以昭炯戒已革鄭親王承志因被福珣屢次欺侮主令王壽糾邀馬三將其毆打因而致斃承志業經革去王爵其應得杖一百流三千里罪名著照例折罰養贍錢糧一年並折圈禁二年王壽因承志欲毆福珣復挾嫌慫恿代為主謀致釀重案實屬罪無可逭王壽著從重發往吉林等處交該將軍安插德祿在已革鄭親王承志府內管事明知承志與王壽

謀毆福珣並不勸阻仍與王壽商謀且屢次抗傳到案時復捏詞搪塞亦屬狡詐德祿著杖一百徒三年與娘聽從王壽兩次代為展轉糾人復幫同馬三攔截福珣車輛亦屬不安本分與娘所犯杖六十罪名著照例實行責打其應得徒一年罪名照例折園禁半年此次拏獲兇犯馬三之派出員弁著步軍統領衙門酌量保奏至所遺和碩鄭親王爵著宗人府照例揀選承襲又諭刑部奏審明

棍徒按律定擬並御史應得處分聲明請旨一摺此案魏禿子卽魏怔賢雖訊無從逆潛逃等情惟違禁取利素有小霸王綽號著照刑部所擬杖一百徒三年不准留養前因御史錫光拏犯未與賈瑚會商復瀆陳分辯經吏部議以降二級調用實屬咎有應得姑念該御史訪獲此案尚非妄拏無辜可比錫光著加恩改為降三級留任御史賈瑚應得降二級留任處分著一併加恩改為降一級留

任○諭軍機大臣等李鶴年奏皖匪闖入豫境派隊擊散並拏獲多名正法一摺安徽阜陽縣匪徒三十餘人攜帶馬匹洋槍闖入河南沈邱項城交界之樹王村經署沈邱縣知縣秦本提會同參將王壽等拏獲李金聲等數名復有匪徒吳老淵等百餘人突入汝陽縣小宋寨意圖擄掠該署知縣張其昆參將柏英等帶兵會拏立斃數十名陣斬匪首石景沅生擒匪首石侈子並經新蔡縣知縣管

煥蘇派勇追獲匪首王拉等十數名餘匪竄回阜陽豫境一律安堵阜陽華莊姜寨一帶聚匪究有若干匪首何人英翰何以未經奏及著嚴檄該地方文武實力搜查悉數捕獲毋得養癰貽患其吳老淵王狗頭二名在逃未獲著英翰李鶴年飭屬一體會拏務須按名弋獲淨絕根株以靖地方李鶴年現檄令李家昌王壽等分紮梭巡著督飭該員弁會同地方官實力搜捕毋稍疏虞前據李瀚章

郭柏蔭奏拏獲穀城縣匪徒葉子午等供有
商同逸犯蔡凌漢欲招集河南夥黨約期滋
事之語當經諭令知照李鶴年飭屬查拏仍
著該撫嚴飭所屬於毗連湖北各州縣地方
認真訪查如有匪蹤潛匿立即嚴拏懲辦以
杜亂萌將此各諭令知之 調廣東巡撫劉
長佑為廣西巡撫以漕運總督張兆棟為廣
東巡撫廣西巡撫蘇鳳文為漕運總督 命
翰林院編修許振禕提督陝甘學政 以前

任貴州鎮遠鎮總兵官張文德為貴州威甯
鎮總兵官 以驗收海運漕糧完竣予直隸
總督李鴻章倉場侍郎英元喬松年議敘有
差 以安徽當塗拏獲逆首關汶淮予總兵
官潘鼎立以提督遇缺提奏守備胡忠發等
花翎把總杭鎮年等藍翎餘加銜有差 庚
辰諭軍機大臣等恩承等奏承修河道工程
酌量變通一摺據稱前奏新挖蘇子河道擬
定辦法原冀水歸故道不至北徙現在體察

情形若竟照前奏築修一遇大雨必至盡為
兩河有礙風水擬將新河隄工一律北移改
由泊岸前自西至東通長修築仍堆砌石子
偏坡河隄泊岸聯絡歸一水勢不至分流等
語既據該侍郎等酌定變通之法有益風水
兼可保護北面一帶隄岸錢糧亦不加增即
著照此次所擬次第興修不得稍有草率惟
陵寢要工必須籌畫盡善方臻鞏固恩承溫葆
深都興阿既統籌全河酌定辦法自必確有

把握若再不能經久復出險工必惟該侍郎
等是問將此各諭令知之 又諭昨有旨將
劉長佑調補廣西巡撫該撫謝恩摺內本有
取道廣西前赴廣東新任之語著於接奉此
旨後迅赴桂林省城接印任事仍毋庸來京
請訓廣西地方遼闊伏莽甚多南太泗鎮等
屬尤為盜賊淵藪其附近越南邊境時有匪
徒滋擾叛服靡常若非封疆大吏振刷精神
極力整頓不足以綏靖邊圉劉長佑素嫻軍

旅前任廣西巡撫有年情形熟悉此次棄瑕錄用正當激發天良力圖報稱該撫到任後於察吏安民及勦辦土匪一切事宜務須認真籌辦毋稍因循馮子材現在帶兵勦辦越南竄匪劉長佑當與和衷共濟以期迅速成功將此由五百里諭令知之 又諭杜嘎爾奏帶兵追勦賊匪籌撥駝馬並分兵嚴防後路一摺賊匪竄至霍呢齊臺之西旋竄扎薩克達爾瑪僧格游牧杜嘎爾現飭吉爾洪額

訥蘇肯等探蹤截擊該副都統亦催兵前進著卽督飭各軍認真追勦務殄逆氛不得觀望遲回致令賊蹤紛竄吉爾洪額等帶兵擊賊月餘以來總未與賊相遇實屬不成事體著杜嘎爾認真督催前進如敢再涉遷延卽著嚴叅懲辦惟分兵三起前敵兵力尚單杜嘎爾現令帶隊官富珠哩侯烏里雅蘇台駝馬解到卽分給哈爾尼敦等處官兵全數管帶來營其察哈爾官兵一千名令達爾濟統

帶在推河哈爾尼敦一帶分駐防守以壯聲威卽著照所請辦理至塞外地方遼闊全賴駝馬裹糧師行方無阻滯著奎昌榮金多布沁扎木楚張廷岳阿爾塔什達分飭各該部落扎薩克等遇有經過官兵駝馬疲乏者卽當妥為應付以利師行阿勒台一帶臺站被擾糧運阻滯著慶春杜嘎爾飭令畢都爾業等趕將已散各臺設法招集俾利轉輸其各軍應需口糧並著定安慶春陸續解運以足兵食正在寄諭間據張廷岳等奏蒙兵續獲勝仗賊眾西逸臺站漸通一摺該逆竄至霍呢齊迪西之鄂羅蓋廟地方盤踞經扎齊魯克齊伯克瓦齊爾督兵追擊殲斃賊目一名餘匪四五十名賊匪突圍向西南奔竄該台吉裏創力戰挫賊兇鋒實屬勇敢可嘉著准由張廷岳等從優保奏候旨施恩仍著張廷岳等飭令幹丹丹準車林督率所部蒙兵星夜馳往會同扎齊魯克齊伯克瓦齊爾乘勝

追擊悉數殲除並著杜嘎爾嚴飭吉爾洪額等迅速進兵協力夾擊不准再有遲誤將此由五百里各諭令知之 庫倫辦事大臣張廷岳奏庫倫防務緊要阿爾塔什達本年年班請緩進京得旨著毋庸來京 以成都將軍崇實為鑲白旗蒙古都統調江甯將軍魁玉為成都將軍鑲白旗蒙古都統穆騰阿為江甯將軍 辛巳諭軍機大臣等御史黃槐森奏廣東釐局煩擾請旨飭查裁減一摺抽

釐助餉原屬朝廷不得已之舉全在地方官吏認真辦理方不至弊竇叢生困累商民若如該御史所奏廣東惠州各廠均於起照之處抽釐一次驗照之處又抽釐一次民已不勝其苦而書吏復藉查驗為名百計勒索且於兩次抽釐外更增幫費名目名為衛民實以剝民東江如此則西北兩江釐廠煩擾恐亦在所不免著瑞麟認真查覈務將應裁釐廠應禁幫費酌量情形妥為辦理具存留各

廠尤須慎選妥員酌裁吏役以省浮費而杜弊端另片奏廣州府屬盜賊蜂起曾大鵠幅等一股聚集香山新會新甯三縣交界之趙家圍地方焚搶勒贖巨案案累香山雖已舉辦團練而新會新甯未籌防守請飭拏辦等語盜賊肆行閭閻何以安輯著瑞麟嚴飭各該地方員弁多帶兵船駐紮該處合力圍攻務將首夥各犯悉數擒獲盡法懲治仍令各該縣力行保甲倡辦團練以靖地方儻該管

文武有疲玩不職者即著嚴行叅奏毋稍姑容原摺片著鈔給閱看將此諭令知之 壬午遣官祭

火神廟 諭軍機大臣等左宗棠奏南路官軍剿除竄回餘眾攻拔階州匪巢現籌進兵事宜劉錦棠請假回籍遵查趙德正尚堪勝任各摺片成縣任家莊匪匪經總兵蘇家良按剿投誠者三十人著左宗棠飭令蘇家良妥為安插毋令再滋事端此外有無伏莽仍

著認真按捕毋留餘孽階州絡匪經副將彭德沅等率隊圍攻疊破賊巢惟段侍才瞿煥周在逃未獲該大臣當飭彭德沅等實力查拏盡法懲治賊供既有段逆赴陝瞿逆赴川之說著左宗棠咨照吳棠蔣志章飭屬一體協緝毋任漏網中衛鹽固一帶時有游匪出沒徽兩西禮等縣亦有伏匪伺劫運道左宗棠卽飭派出各軍嚴密掩捕以淨根株現在該大臣規取河州分中左右三路進兵布置

尚屬周密左宗棠擬赴靜甯安定督勦卽著督飭傅先宗等軍分道前進實力掃蕩毋任河州逆匪日久盤踞惟河州一經進兵恐該逆被勦窮蹙勾結西甯回眾紛竄甘涼等處該大臣於西路一帶尤宜妥籌兼顧以免匪勢蔓延巴里坤鎮總兵員缺既據左宗棠奏稱趙德正尚為相宜卽著飭令迅赴署任仍隨時察看如不能勝任卽行奏請撤換劉錦棠現在請假回籍並將傷病弁勇遣撤另行

募補著飭令到籍後認真挑選假滿卽行回甘以資得力其所留各營分駐金積靈州等處卽飭蕭章開等妥為鎮撫前由金順遣回靈州回民當諭左宗棠飭令劉錦棠黃鼎遇此項回民抵籍創行地方官籍束安置現在辦理是否完竣著左宗棠查明具奏將此由六百里諭令知之尋奏遵查金順張曜等前解陝回六百餘名已分地安插現在各回民均安靖守法報聞 以內閣學士常恩為刑

部右侍郎 以正黃旗蒙古都統載容署鑲黃旗蒙古都統 以記名副都統祥亨為正紅旗漢軍副都統 癸未諭軍機大臣等溥楙等奏按捕松蟲情形一摺據稱本年入夏以來天時微旱圍牆內松樹生蟲派員按捕並設廠收埋嗣經風雨淋濯擊落無數現在情形較輕仍飭按拏等語
陵寢樹株風水攸關亟應敬謹保護著溥楙載燾景霖飭令派出各員督率兵役務將未淨

松蟲全行搜捕毋留餘孽以保樹株將此各諭令知之 又諭步軍統領衙門奏已滿徒犯李山壽遣伊姪李鴻鈞赴京在悖親王前攔輿呈訴解送該衙門研究據稱李山壽前在四川經遂甯縣知縣盧光吉保舉帶隊借墊兵糧銀八萬餘兩嗣經盧光吉將兵勇遣散所墊銀兩分釐未給盧光吉串通首府楊重雅等受賄冒功勒派捐輸侵蝕銀兩追控經四川總督批飭覈算楊重雅暗使盧光吉

遺物逃走反誣李山壽攔搶遺物復被盧光吉虐刑逼認問擬徒罪並將伊弟李鴻培誘去致死等語所控各情是否屬實著吳棠將此案嚴密訪查徹底根究務得確情以成信讞不得稍涉迴護原呈著鈔給閱看將此諭令知之 又諭金順奏部署起程並請飭催協餉一摺包頭為赴烏必經之路該將軍擬將所部全隊帶往該處簡拔精銳部署赴烏著俟行抵包頭後將應需餉項及採買轉運

各事宜悉心籌畫趕緊起程一面具摺奏聞副將詹恩科帶隊追剿竄匪曾否與賊接仗近據杜嘎爾張廷岳等奏前竄二十五臺霍呢齊之賊現向西南奔竄該匪股數不一奔突靡常該將軍啟行後即當派隊遠探沿途遇有匪蹤相機截剿掃蕩逆氛至所稱該軍積年餉需缺乏包頭後套等處欠發糧價甚多且赴烏官軍裹帶行糧亦須籌給款項等語所奏自係實在情形現在北路軍情緊要

該將軍帶隊前進必須速籌鉅款方能成行著何璟將積欠軍餉趕緊籌撥銀三十萬兩解交金順應用其河東辛未綱應協銀十八萬兩並著一併歸數籌解俾資開放何璟素顧大局務當竭力籌畫不得稍涉延宕致誤軍行將此由五百里各諭令知之 乙酉戌刻有流星出天市垣 丙戌諭軍機大臣等慶春奏籌運軍糧撥兵保護臺路並飭探蹤迎勦一摺疏通糧路最關緊要慶春現已將

圖固里克等三臺官兵招集並籌備駝隻將各臺存積米糧依次起運辦理尚為妥協前敵各軍裹帶之糧已將罄盡即著慶春飭令畢都爾業並現經添派之瑞森多爾濟扎普等認真督催剋日運送並飭糧臺接續採辦源源運解毋令匱乏大同征兵尚在十七八臺著俟積糧運竣即令拔隊前進迅速到防前據張廷岳等奏竄至霍呢齊迤西之賊向西南奔竄現在究竄何處即著慶春確探奏聞察哈爾左翼官兵由布爾噶素臺進發該署都統務當督飭派出員弁視賊所向實力截剿並與杜嘎爾所派之吉爾洪額等軍聯絡聲勢兩面夾擊務殄賊氛右翼官兵分布各臺並著飭令保護臺路妥為鎮撫毋任再有潰散將此由四百里諭令知之以戶部尚書寶鋆充國史館總裁官撥工部火藥一萬斤轟藥六百斤火繩一萬五千丈擡槍鉛丸五千出烏槍鉛丸一萬出解赴烏里雅

蘇台軍營備用

上以孟秋時享

太廟自是日始齋戒三日丁亥

今上皇帝生戊子

上以孟秋時享

太廟前期親詣行禮諭內閣李鴻章奏天津

等處被水地方籌款撫恤並請援案截留漕

米接濟一摺本年五六月間天津雨水過多

致城東海河及南北運河衝溢數口濱海地

面田廬禾稼多被淹沒小民蕩析離居殊堪

憫惻雖經該督等督同官紳籌捐酌撥銀款

量為撫恤惟天津河間順天保定各屬地勢

低窪濱河地方被災較廣亟應籌款接濟加

恩著照所請截留江浙籌備餘米八萬石並

奉天解通粟米二萬石以備各屬賑濟之用

該督務當督飭司道遴委妥員會同各該州

縣查明被災分數覈實散放仍隨時體察情

形妥為撫恤總期實惠均霑毋令一夫失所

大清穆宗繼天開運受中居正保大定功聖智
誠孝信敏恭寬毅皇帝實錄卷之三百十四

監修德義經廷日講起居注官大子太傅又潤閣讀書事翰林院學士禮部主事上諭學府應行略增德義經廷日講起居注官大子太傅又潤閣讀書事翰林院學士禮部主事上諭學府應行略增

理吏部書府部三庫事務加七級軍功加五級常加七級見錄三十七日宣發本應職官等據呈太子下等行開閣讀書體三同大率大太子於德義

正北旗滿洲都統管理二部九學事務同大臣輔國公章功加一級隨帶加六級見錄十七次宣發本應職官等呈日講起居注官大子太傅翰林院學府

學士指撥教士上諭學府應行略增德義經廷日講起居注官大子太傅又潤閣讀書事翰林院學士禮部主事上諭學府應行略增

加六級見錄十九次宣發本應職官等呈日講起居注官大子太傅翰林院學府應行略增德義經廷日講起居注官大子太傅翰林院學府

教修

同治十年辛未秋七月己丑朔享

太廟遣孚郡王奕諲恭代行禮

上詣鍾粹宮問

慈安皇太后安長春宮問

慈禧皇太后安至戊午皆如之○奉

慈安皇太后

慈禧皇太后幸漱芳齋。侍午膳。○諭軍機大臣等。杜嘎爾奏催隊進剿。並偵探賊竄情形。一摺。前據定安奏賊匪已竄出烏喇特旗界。五六百里以外。此次杜嘎爾聲稱逆匪現竄烏

喇特公中旗交界之什巴克台地方是否偵探未確抑係賊蹤回竄著杜嘎爾懷遵疊次諭旨迅催吉爾洪額訥蘇肯等跟蹤追剿力挫賊鋒不得藉口駝馬稍涉遷延致與賊匪相左任令遠颺貢果爾既經調營會剿所有臺站糧路杜嘎爾務當飭令在防官兵妥籌保護毋稍疏虞前據慶春奏圖固里克等臺業經招集並籌備駝隻將各臺存積米糧依次起運是糧道已經通暢著杜嘎爾派員迎催以濟軍食將此由五百里諭令知之○又諭馮子材康國器奏撥隊出關剿賊獲勝現籌辦理情形一摺馮子材督軍馳抵龍州聞越南匪勢披猖卽撥隊出關分道進剿攻克長慶府城擒斬逆首趙雄才擄平賊巢十餘處禿山和樂賊巢亦一律掃除疏通北甯諒山餉道勦辦甚為得手惟越南未能截擊致鄧建新等敗匪竄向太原其蘇幟漢曾亞治等股復盤踞東潮縣一帶勾結竄擾均屬可

虞馮子材康國器現已留營長慶等處遙為聲援並調兵堵剿按捕所籌尚是我兵現在雖未便窮追仍當相機援應屆時可以進兵卽當協力夾擊將各股敗匪盡數剿除以綏藩服匪徒如此猖獗越南何以毫無布置任其奔竄著卽知照該國嚴密堵禦毋令該匪闖入腹地馮子材尤當嚴飭出關將士及留防兵丁不可稍有擾累並隨時與該國官吏聯絡聲勢庶彼此情意相洽方易奏功東潮近接欽州恐為廣東邊患著瑞麟檄飭洋面師船及該地方文武一體嚴防毋令蘇幟漢等股潛入滋擾此次剿賊出力員弁准其擇尤保獎以示鼓勵黔省四寨敗竄苗匪業經粵軍會合黔軍擊退李高脚一股已敗遁丹江都勻交界之小五戎地方著康國器飭令孔憲隆督軍嚴防邊隘按捕餘匪儻再有匪黨竄入粵邊卽著併力截擊以固疆圉黔省下游漸次肅清正籌及上游軍務著曾璧光

周達武酌度機宜知照馮子材等撥兵助剿劉長佑抵任後卽著與馮子材和衷商辦以資得力疊次勦辦苗匪出力員弁著准其擇尤保獎毋許冒濫將此由五百里諭知瑞麟劉長佑曾璧光馮子材並傳諭周達武康國器知之○追予江蘇各屬陣亡殉難武生孫邦達等紳民婦女一千八百五十三名口分別旌卹如例 庚寅諭內閣朕叔祖惠端親王之子奉恩鎮國公奕詢在上書房讀書有

年持躬謹飭旋經派令在內廷行走並管理中正殿事務俱能恪恭將事勤慎有加前因患病疊經賞假調理方冀日就痊愈恩眷長承遽聞溘逝悼惜實深著賞給陀羅經被派孚郡王卽日帶領侍衛十員代朕前往奠醑加恩由廣儲司賞銀三千兩經理喪事所有飾終典禮著各該衙門察例具奏○壬辰諭內閣御史余培軒奏軍流等犯藐法潛逃請飭查禁一摺軍流徒罪及遞解回籍人犯理

宜依法管解毋任乘閒脫逃乃近來地方官吏往往視為具文致令前項人犯或中途疏脫或到配潛逃甚至為匪滋事怙惡不悛殊屬不成事體著各直省將軍督撫都統府尹嚴飭所屬遇有軍流徒罪及遞解回籍人犯過境務當遣派幹役認真管解儻有鬆刑賄縱情弊卽將該管地方官從嚴懲辦不得飾詞開脫其已至配所及到籍者尤應嚴加管束毋任出外生事仍照定例隨時按名點驗

如有脫逃立卽申報查拏並著步軍統領衙門順天府五城一體稽查遇有此等人犯潛逃來京卽行拏交刑部懲辦以肅法紀○諭軍機大臣等恩承等奏草倉等河水勢漫溢一摺據稱上月十一日大雨山水暴發草倉河與蘇子舊河並新沱河身漫成一片南岸山麓衝刷十餘丈新沱河身被淤沙大半填平所沱河身沙土被水漂沒新培月隄衝淘成阮等語河岸工程未及告竣卽值水勢盛

漲致有衝刷淤墊之處。恩承等現飭該商人等將所淤河道趕緊賠挖。月隄現衝坑坎處所照舊培墊。並將原估攬水壩一道改至辰方決口處緊靠月隄。卽著照所議辦理。恩承等惟當督飭工役趕緊挑挖培築。仍按前奏單開工程及變通辦法認真經理。務臻穩固。不得偷工減料。其西堡修成泊岸尚屬完整。卽著隨時保護。以免疏失。恩承等承辦要工總當布置妥協。期於一律鞏固。儻再不悉心籌畫。草率塞責。將來復出險工。定惟恩承等是問。將此各諭令知之。○又諭庫克吉泰奏據咨甘回東竄豫籌防範一摺。多倫諾爾為熱河西北門戶。地方富庶。素為賊所垂涎。庫克吉泰因直隸咨文聲稱探聞賊匪有分犯庫倫多倫諾爾之說。卽揀派員弁馳往多倫廳常川坐探。並飭豐甯縣大閘司會同營汛調集兵團嚴為防備。復由熱河八旗派定官兵一千名。俟有警信。馳赴交界駐紮。所籌尚

屬周密。卽著該都統督飭在事員弁認真偵探嚴密防範。不得以賊蹤尚遠稍涉懈弛。至古北口練軍一千。疊經諭令迅赴庫倫防剿。此次庫克吉泰摺內聲稱李鴻章現飭該軍趕緊出口。協剿等語。是此項官兵卽可起程。卽著李鴻章檄飭都司賈吉齡統帶前進。迅速出口。毋稍遲延。此時潰散各臺已經設復。卽或糧運緊要。駝馬不敷周轉。而該練軍行抵張家口後。亦當以次漸進。與察哈爾派出各隊聯絡聲威。藉截賊匪紛竄之路。著慶春斟酌辦理。多倫東北克什克騰地方兵力單薄。庫克吉泰現咨昭烏達卓索圖兩盟長將上年古北口撤回防兵二千操練整齊。以備協剿。卽著理藩院轉飭昭烏達卓索圖兩盟長一體遵照豫備。聽候徵調。庶免臨時延誤。正在寄諭間。據杜嘎爾奏吉爾洪額等追賊至烏喇特旗所屬之布拉特地方。擊賊獲勝。殲斃二百餘名。生擒十餘名。現飭該協領等

乘勝追勦等語。此次吉爾洪額等奮力勦賊。大挫兇鋒。洵堪嘉尚。潰匪現已無多。著杜嘎爾飭令前敵各軍。探明賊蹤。悉數掃蕩。前據定安奏。此股匪徒約有二千餘人。現分兩股。竄擾等語。此次吉爾洪額等擊敗之賊。係屬何股。其餘現竄何處。尚有若干。著定安、杜嘎爾確切偵探。視賊趨向。飭令各軍妥籌防勦。前以扎齊魯克齊伯克瓦齊爾殲斃賊目。裹創力戰。已諭令張廷岳等從優保奏。此次杜

嘎爾奏稱。勦賊出力之扎奇魯克齊巴奇瓦齊爾。是否卽係其人。著該副都統遇便奏聞。其所部官兵。卽著張廷岳等擇尤請獎。仍令該帶兵官確探賊蹤。會合吉爾洪額等乘勝進擊。並著杜嘎爾飭令達爾濟迎頭兜勦。淨掃逆氛。將此諭知理藩院。並由五百里諭令李鴻章、定安、庫克吉泰、慶春、杜嘎爾、張廷岳、阿爾塔什達知之。尋杜嘎爾奏遵查吉爾洪額等斬殺之賊。卽係竄入中公旗等處股匪。

扎奇魯克齊巴奇瓦齊爾卽係扎齊魯克齊伯克瓦齊爾。報聞。○吏部以大學士瑞常、瑞麟應定何殿閣。請得旨。瑞常著授為文華殿大學士。瑞麟著授為文淵閣大學士。○以太常寺卿徐桐、太僕寺卿翁同龢為內閣學士。兼禮部侍郎銜。○以烏喇特旗地方勦匪獲勝。賞協領吉爾洪額頭品頂帶。佐領奎丹扎布、伊勒和布、巴圖魯名號。協領雙喜、花翎。予陣亡委參領德克登布祭葬。世職加等。癸

巳諭內閣。奉恩鎮國公奕詢夫人。著加恩賞食鎮國公半俸。○又諭。給事中夏獻馨奏。敬陳辦賑事宜一摺。本年直隸天津等處被水。業經降旨。准將江浙等省米石截留賑濟。該給事中所擬清查戶口。防察奸宄。多分賑廠。選擇紳耆。剔除弊端。籌給醫藥各條。不為無見。著李鴻章按照所陳各節。飭令辦賑各州縣體察情形。實心經理。務期實惠均霑。不得有名無實。○又諭。楊昌濬奏遵查私拆夾板。

公文人犯審明定擬一摺。上年九月間由兵部遞回福建夾板公文行至浙江龍游縣亭步驛地方驛書王楚青將黃布封面兵部印花擅行拆動。雖據訊無漏洩情事。究屬罪有應得。王楚青著從重發往黑龍江到配。後加枷號三箇月。杖一百折責安置。其率行轉遞之上航驛專管官西安縣知縣張廷璜著交部議處。○引見考取直省優貢生得旨張祥會等三十三人著以知縣用。申肯堂等二十

九人著以教職用。○命鎮國公奕謨管中正殿事。○追予故浙江巡撫升任總督馬新貽於浙江海塘建立專祠。○追予安徽各屬陣亡殉難巡檢管兆蕃等紳民婦女七百六十九員名口分別旌卹如例。○甲午諭內閣醇郡王之第二子著命名載滢。○又諭溥楙等奏應行急修各工請派員查驗一摺。

孝陵

裕陵

隆恩殿暨

純惠皇貴妃園寢饗殿等處均有滲漏情形著派童華前往將應修各工敬謹查驗歸入本年急修案內一併修理。○諭軍機大臣等前因甘肅甘涼肅一帶兵力單薄諭令左宗棠穆圖善派兵截剿茲據奏稱現在東西兩山尚未肅清南路亦須留兵駐紮西甯河州逆黨未靖左宗棠現駐靜甯距西路遙遠穆圖善所部兵勇駐守省垣分紮金縣等處均難抽撥請俟河西肅清零匪掃除淨盡再由左宗棠撥兵前赴西路等語甘涼肅地方緊要亟應妥為設防即著豫師瑞雲就現有兵力於各該處緊要隘口嚴密防堵遇有匪徒竄入即行實力勒擊毋任該匪蔓延惟豫師瑞雲所部兵力無多如有大股竄入殊難堵禦仍著左宗棠穆圖善妥籌兼顧如西路緊急務於無可抽撥之中設法派兵赴援以資得力將此由五百里各諭令知之○以辦理

江北漕糧完竣。予道員王大經優敘。○以直隸永定河復決。總督李鴻章革職留任。道員李朝儀同知朱津。再下部議處。巡檢鄭官賢革職留任。○乙未。以緝捕不力。摘陝西總兵官黃超羣頂帶。○丙申。諭軍機大臣等。左宗棠。穆圖善。奏。回匪竄擾北山。官兵截剿獲勝。一摺。北山秦旺川一帶。產糧最廣。現值收穫。夏麥之際。該匪時出竄擾。雖經各路官軍截剿獲勝。惟據生擒賊供。有米拉溝撤回句結。

陝回二千餘人。分股四竄。意圖搶糧等語。尤應先事豫防。力為保護。著左宗棠。穆圖善。督飭各軍。分路確探。何路有賊。卽向何路截剿。務期護民收穫。毋資盜糧。穆圖善現已馳往北山。著卽相機調度。並將該處駐紮馬隊。重加整頓。以期得力。將此由五百里各諭令知之。○又諭。定安。奏。追剿烏喇特旗竄匪獲勝。一摺。賊匪竄擾烏喇特旗界內。避兵而行。提督金運昌探悉賊蹤。派隊追剿。於上月十六

日。擊賊於奔巴廟。斬殺殆盡。並在察洪噶爾廟內圍剿分竄之賊。兩次殺斃悍賊三百餘名。生擒十餘名。正法卓勝營。剿賊奮勇。甚為得力。著定安。擇尤保奏。以示鼓勵。賊目韓阿琿。是否殲斃。零匪現逃何處。仍當確切查明。認真搜捕。毋令漏網。前據杜嘎爾。奏。吉爾洪額等在烏拉特旗所屬之布拉特地方。擊賊獲勝。是烏喇特旗界內賊股不一。此外究有幾股。現在何處竄擾。仍著定安。杜嘎爾。懍遵

前旨。確探具奏。一面飭令各軍偵探兜剿。迅掃逆氛。將此由五百里各諭令知之。○又諭。定安。奏。請飭江蘇。撥解洋槍洋藥等語。提督張曜所部各營。轉戰日久。火器損壞。亟宜更換添撥。以利攻剿。著曾國藩。張之洞。飭令江蘇製造局。撥發洋槍一千五百桿。細洋藥一萬五千磅。金底大銅帽七十萬粒。派員解赴天津。一面知照定安。由張曜委員赴津領解。毋稍延宕。將此由五百里各諭令知之。○追

予烏喇特旗地方陣亡遊擊戴占元千總孫福把總李得勝等祭葬世職加等○丁酉

孝靜成皇后忌辰遣官祭

慕東陵○諭軍機大臣等李鴻章奏日本議約漸有端倪並將往返信函鈔錄呈覽一摺日本與中土最近又自託於同文之國現在議立修好條規通商章程自不必沿襲泰西各國舊套該督督飭應實時陳欽與該使臣反覆辯論大致均已允服遵照惟章程內請添

凡兩國准予別國優恩及有裁革事件無不酌照施准一條仍是一體均霑之意至宜相機開導使之就我範圍應實時等覆該使臣信函頗足折服其心卽著李鴻章飭令應實時等力持定見悉心開導總期妥為酌定以示區別而杜弊端並將辦理情形隨時具奏將此諭令知之○戊戌

孝懿仁皇后忌辰遣官祭

景陵○諭軍機大臣等杜嘎爾奏追勦另股賊

匪獲勝情形並派員保護糧路各摺片吉爾洪額等前在布拉特地方勦敗賊匪後復探得正南百餘里山谷中另有賊股當經追至阿巴爾干河擊斃賊匪一百餘名敗竄無多所有出力人員准其擇尤保奏吉爾洪額等兩次所勦賊股均不過二三百人昨據定安奏卓勝營追勦奔巴廟等處之賊亦止三百餘人是賊數並不甚多疊經官軍擒斬漏網無幾此外賊匪究竟尚有幾股仍著定安杜

嘎爾確切偵探賊蹤所在督飭各軍迅速兜剿趁此初秋之際務將各股竄匪悉數撲滅剋期歲事若稍涉遲延轉瞬風雪嚴寒勦辦又形棘手杜嘎爾因馬匹疲乏遠調不及請於察哈爾商都太僕寺牧羣調撥應用著慶春迅調騰壯馬五百匹解赴杜嘎爾軍營俾資進剿喇嘛伊達本捐輸馬匹甚屬急公著杜嘎爾將該喇嘛從前曾否得有獎敘查明具奏後再交理藩院覈給獎敘臺站為糧運

所經關繫緊要察哈爾所派駐紮臺站官兵
卽著杜嘎爾責成達爾濟轍德恩速赴濟斯
洪果爾妥為管帶保衛糧道不可稍有疏虞
將此由六百里各諭令知之○己亥諭軍機
大臣等張廷岳等奏蒙兵追勦賊匪獲勝等
語據奏伯克瓦齊爾會同吉爾洪額等於六
月十八日在烏蘭察布盟烏喇特公遊牧之
搭拉布拉克地方勦賊獲勝與本月初四日
杜嘎爾奏報情形大略相同惟餘匪尚有百

餘名窮蹙逃散亟宜跟蹤追勦著張廷岳阿
爾塔什達飭令和貝勒幹丹丹準車林迅
速帶兵前進會合伯克瓦齊爾等將此股敗
匪悉數殲除杜嘎爾亦當督飭吉爾洪額等
與庫倫派出官兵聯絡聲勢會合擊勦務絕
根株昨又據杜嘎爾奏吉爾洪額等追勦另
股賊匪至阿巴爾干河斃匪一百餘人敗竄
無多此外賊匪究竟尚有幾股張廷岳等務
當確切偵探各飭官軍視賊所向實力兜擊

毋稍遲緩將此由五百里各諭令知之○以
詹事府詹事紹祺為內閣學士兼禮部侍郎
銜○庚子

慈安皇太后聖壽節遣官祭

太廟後殿

奉先殿

上率王以下文武大臣詣

慈寧門行慶賀禮眾官於午門外行禮○詣鍾

粹宮

慈安皇太后前侍早膳○奉

慈安皇太后

慈禧皇太后幸漱芳齋侍午膳○追子直隸饒

縣陣亡縣丞馮義誠於湖南原籍建立專祠

○壬寅諭軍機大臣等文碩奏請飭催大同

兵赴科並迅解餉銀一摺據稱科布多第五

六臺地方有賊數百名竄擾搶掠需兵防勦

前據慶春奏大同官兵後起各隊尚在十七

八臺俟積糧運竣飭令拔隊前進現在該處

需兵甚殷。卽著慶春催令該官兵迅速起程。接踵進發。不得再有濡滯。臺站業經設復。並著飭令妥為應付。其經由烏里雅蘇台臺站著奎昌等飭屬一體支應。以利師行。瑛榮此時計可抵任。此項官兵到防後。瑛榮文碩務當妥籌布置。認真防勦。其滋擾臺站賊匪。現竄何處。瑛榮文碩當一面催提大同官兵。一面先就現有兵力。並通飭所屬各旗。將此股賊匪悉數殄除。毋稍延玩。部撥科城餉銀十萬兩。前經文盛發交該城委員領解。並派員護送。卽著慶春催令迅速解往。瑛榮前奏請由烏城借撥銀兩。當經諭令奎昌等於部撥烏城兵餉內。先行借撥三四萬兩。解赴科城。俟該城餉銀經過烏城時。如數扣還。該署將軍等卽懍遵前旨辦理。將此由六百里各諭令知之。以江蘇蘇松太道涂宗瀛為湖南按察使。○癸卯中元節

上詣

奉先殿

壽皇殿行禮○遣官祭

永陵

福陵

昭陵

昭西陵

孝陵

孝東陵

景陵

奉陵

奉東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢

上奉

慈安皇太后

慈禧皇太后幸漱芳齋侍午膳

大清穆宗繼天開運受中居正保大定功聖智
誠孝信敏恭寬毅皇帝實錄卷之三百十五

大清穆宗繼天開運受中居正保大定功聖智
誠孝信敏恭寬毅皇帝實錄卷之三百十六

秋

同治十年辛未七月甲辰諭內閣御史文明

奏被水災民四出求食請豫籌賑濟一摺本年直隸天津等處被水曾准李鴻章奏請截留江浙等省漕米以資賑濟並諭該督飭屬妥為撫恤李鴻章務當懍遵前旨督飭地方官將賑務認真經理設法安撫居民毋任四出覓食轉致流離失所至京師例設各廠該御史請酌給米石先期開放之處著順天府五城御史屆期酌覈辦理○諭軍機大臣等成祿奏撤回潛結西河回匪肅州防勦緊要

請飭督臣撥兵會剿一摺。肅州城內客民撤回二千餘人。向不安分。近復布散流言。以馬化澂為口實。搖動眾志。肅城土著回民亦為所惑。現又暗中勾結西河回匪。零星入城。人數益眾。若不認真防剿。不足以遏亂萌。成祿現將出關三營調回。以一營駐防金塔。二營力扼臨水要隘。並分兵防守高臺撫彝。以顧後路運道。即著該提督就現有兵力。防剿兼施。毋令肅城稍有疏失。前經疊諭左宗棠派撥勁旅。馳往甘涼肅一帶。截剿竄匪。左宗棠覆奏摺內。有西路相距遙遠。目前無兵可撥。擬俟進規河州。即派兵赴西路剿賊等語。此時肅州情形危急。該督已移營進規河州。著即酌撥勁兵。選派得力將領統帶。鼓行而西。相機進剿。以保關內要地。不得稍涉遲誤。成祿兵餉久絀。著戶部查明該提督指撥專款。各省已解若干。未解若干。分別咨催。迅速起解。毋令遲延。成祿後路糧臺。著左宗棠飭令

署甘涼道蕭宗幹總司其事。所有各省解到餉銀等項。即由蕭宗幹設法護運。以資接濟。成祿另片奏署甘肅提督楊占鰲辦事因循。輿情不洽。請催馬德昭迅速赴任等語。楊占鰲既不得力。即著左宗棠查明貽誤情形。據實叅奏。前據李鶴年奏潼關防務緊要。請留馬德昭駐紮兼顧。當經准照所議。暫緩西進。現在陝省安謐。豫防已鬆。自應飭該提督迅赴本任。以重職守。即著李鶴年傳知馬德昭遵行。成祿又片奏投誠陝回賽玉城等。因乞假未允。擅自潛逃。由南山一帶遁回河州等語。該降眾狼子野心。難保不沿途滋擾。著左宗棠飭令甘涼所屬地方員弁。嚴防截剿。並著成祿督飭明春胡可均等於臨水及附近南山一帶。加意防堵。毋稍疏懈。將此由六百里各諭令知之。○以前任西安右翼副都統穆隆阿為鑲白旗漢軍副都統。○乙巳文宗顯皇帝忌辰。遣官祭。

定陵○

上詣

奉先殿

壽皇殿行禮○諭軍機大臣等總理各國事務衙門奏俄國西悉畢爾地方官由銅綫致該國住京使臣信函內稱七河省巡撫廓派兵前往伊犁與達蘭察接仗獲勝五月十七日克復伊犁城池生擒頭目該國由銅綫寄信詞意簡略並無詳細情節亟應先事豫籌等

語伊犁久為賊踞因關內未靖兵力兼顧不遑今俄國業已帶兵將該城收復難保無覬覦要求情事此事關係甚重亟應豫為籌畫以弭釁端著金順奎昌多布沁扎木楚瑛榮文碩確切查明俄國官兵進駐伊犁是否確實烏科兩城距伊犁程途若干是否須由塔爾巴哈台前進沿途有無賊蹤迅速具奏榮全本署理伊犁將軍責無旁貸該署將軍曾任伊犁領隊大臣嗣復親往俄界辦理一切

事件頗屬勇往且於該處情形又極熟悉著卽馳赴伊犁晤俄國帶兵官七河省巡撫廓後將伊犁城收回妥籌布置中國有人前往經理庶俄人無所藉口免致日後肆意要求難於收拾其應如何派兵前往駐守及由何路設法轉運糧餉並著榮全會商金順奎昌多布沁扎木楚瑛榮文碩迅速具奏聞俄國並欲派兵由伊犁收復烏魯木齊如果屬實更難措手文麟等前奏烏城逆回投順安集

延逆首馬仲遞稟乞撫擬設法羈縻令該怕夏投誠交城並令馬仲妥得璘等赴哈派孔才赴西路相機收復奇古濟木薩等語現在如何籌辦已否就緒若能將烏魯木齊先行收復免致俄人從而生心又費周折景廉久在西疆於各該處事務熟悉卽著酌帶兵勇規復烏魯木齊事機緊迫該辦事大臣等務當綢繆未雨先事圖功毋落他人後著哈密防守緊要卽責成文麟悉心籌畫毋稍大意

巴里坤距烏魯木齊不遠。景廉到彼後。伊勒屯務當與之聯絡聲勢。以顧大局。所有榮舍。景廉所部餉需。著戶部迅撥有著之款。以資接濟。總理各國事務衙門摺。均著鈔給閱看。將此由六百里各密諭知之。○又諭據總理各國事務衙門奏。俄國西悉畢爾地方官。由銅綫致該國住京公使信。函內稱七河省巡撫廓派兵前赴伊犁。五月十七日。將伊犁代為收復等語。並聞俄人尚欲帶兵前往收復烏魯木齊。伊犁淪陷。兵力未能顧及。致俄國從而生心。難免覬覦。要求情事。若烏魯木齊再為該國收復。則更難於措手。成祿原係烏魯木齊提督。著卽統率所部出關。與景廉會合力圖收復。所有該軍餉需。著戶部遵照前旨。迅速查催。並寬為籌撥。以資飽騰。肅州一帶。關繫緊要。著左宗棠迅卽調派勁旅前往扼剿。竄匪潛出。成祿一軍出關。剿賊毋得以兵力不敷。稍形推諉。左宗棠身任兼圻。本應

統籌全局。況鎮迪一帶。又係該督所轄。尤當妥籌兼顧。當此事機緊迫。諒該大臣必能力任其難。以紓朝廷廑繫。穆圖善如有可撥之兵。並著會商左宗棠酌量調派。以資厚集。將此由六百里各密諭知之。○又諭劉銘傳奏。因病請假。離營調理一摺。覽奏實深廑繫。現在秦徽鹽固一帶。游氛漸少。陝省無須多兵。譚仁芳一軍。卽著留紮該省。以資彈壓。該提督所部各軍。著毋庸撤遣。本日據總理各國事務衙門奏。俄國派兵於五月十七日。代為克復伊犁城池。已諭令榮全馳往籌辦。惟聞該國尚有派兵規取烏魯木齊之信。心生覬覦。漸不可制。僅烏魯木齊再為所得。將來藉詞要挾。辦理更形棘手。本日已諭景廉成祿先後帶兵前進。相機規復烏魯木齊。期於先發制人。惟景廉成祿帶隊無多。亟須精兵勁勇。接續西行。庶足以壯聲威。該提督忠勇性成。情殷報效。且以有用之兵。置之無用之地。

尤屬可惜。著卽督率所部由乾州鼓行而西。繞出蘭州之北。由甘涼肅一路出關。節節前進。為收復新疆各城之計。刻下河州西甯逆氛未淨。關外如烏魯木齊等城。又不能任令外人從而生心。該提督惟有力疾從公。專任其難。以副朝廷厚望。將此由六百里密諭知之。○又諭據劉銘傳奏舊疾舉發。請假離營調理一摺。該提督以陝西現無戰事。南路防務亦鬆。欲率所部東行。與曾國藩李鴻章酌

商遣留。因為節省餉需起見。惟以有用之兵。置之無用之地。已屬可惜。劉銘傳忠勇奮發。年力正強。更當為朝廷出力。本日據總理各國事務衙門奏俄國已派兵代為收復伊犁。該國詢問如何辦理等語。勤兵略遠。後患方長。且聞該國尚欲帶兵收復烏魯木齊。若再令逞志於烏。則彼國更有詞可藉。或至肆行要求。事機至迫。不可稍涉迂緩。因諭署伊犁將軍榮全帶隊前往伊犁。收回城池。並諭景

廉成祿先後統率兵勇。規復烏魯木齊。一面寄諭劉銘傳。令其督率所部由乾州鼓行而西。繞出蘭州之北。由甘涼肅一帶出關。節節前進。為克復新疆各城之計。庶於大局有益。至該提督全軍餉項。關繫緊要。卽著曾國藩李鴻章妥速籌商。寬為豫備。源源接濟。以利師行。總理各國事務衙門及劉銘傳摺各一件。均著鈔給閱看。將此由六百里各密諭知之。○又諭奎昌等奏豫籌官兵禦冬皮衣。請

飭直隸山西籌款採辦一摺。據稱軍士遠出沙漠。轉瞬嚴寒。若不豫籌冬衣。征兵難期用命。合計在烏防守及南臺防勦各營官兵。共四千三百六十八員名。需皮衣等項各四千三百六十八件。烏城值兵燹之餘。無從購買。請飭撥款由張家口歸化城製辦等語。官兵遠道出征。寒衣亟宜早備。著李鴻章何璟無論何款。速行籌撥。分飭口北道歸綏道趕緊採辦皮衣皮袴鞞帽各二千一百八十四件。

由定安慶春派員限於九月內解赴烏城俾資應用毋稍延緩此項解到後卽著奎昌等如數分給以勵軍心將此由五百里各諭令知之○丙午諭內閣英翰奏特參庸劣不職各員一摺安徽鳳潁同知劉大馥舉動謬妄貪鄙近利建德縣知縣王必蕃性耽安逸嗜好太重候補知縣郭承紳心地糊塗畏蕙無能均著革職試用府經歷王文麟卑鄙鑽營行同市井著革職永不敘用候補知縣江景桂聲名平常著以府經歷縣丞降補調補東流縣知縣朱文蔚人地不宜著開缺留省另行補用以肅官方○又諭英翰奏職官隱匿親喪請旨革職懲辦等語安徽試用從九品袁廷祿於親父病故後輒敢匿喪不報戀職忘親實屬喪心滅良情節甚為可惡袁廷祿著卽革職從重發往黑龍江充當苦差遇赦不赦以示懲戒○諭軍機大臣等李鴻章奏請酌增官剝船腳價及民船守候口糧一摺

江浙海運漕糧由津運通年來剝船苦累弊竇叢生其民船守候口糧於長蘆鹽捐加貼運費及津沽各項不裝糧之民船派捐津貼歷年以來商民均屬困苦李鴻章擬請自同治十一年為始無論海運正供籌備剝船每裝米一百石加給腳價銀五兩並另籌接運白糧民船守候口糧銀一萬二千兩此項銀兩先儘蘇浙糧道庫漕項內撥解如有不敷卽由各該省司庫通融借撥等語卽著曾國藩張之萬楊昌濬按照李鴻章所擬妥為籌辦以利轉輸此項銀兩准其作正開銷該船戶等經此次體恤周至嗣後海運漕糧到津時該督當嚴飭押運各委員實力稽查毋任再有攙和偷竊等弊另片奏直隸本年水災甚重援案請飭採辦糧石以備賑濟等語著曾國藩張之萬楊昌濬於司道庫籌款兩省各採買米二萬石限於本年封河以前一律由海運津交納藉資搭放將此由四百里各

諭令知之。○直隸總督李鴻章奏前任甘肅提督曹克忠現已服闋暫留天津差委得旨著飭令來京陛見。○江西巡撫劉坤一奏遵查江西額設兵丁業已嚴行淘汰現在八千九百餘人中可選銳卒五千有奇又留防水陸各勇六千餘人均尚得力足備緩急現咨取直隸江蘇教演槍礮陣勢刊發各營令其一律講求俾收成效報聞。○以謬妄不法福建在籍降補同知羅上楨革職訊辦。○丁未

諭軍機大臣等李鴻章奏古北口練兵起程日期慶春奏籌辦防務豫備練軍出口並暫緩協濟糧石各摺片古北口練軍現已先後起程暫紮宣化整備進發據慶春奏稱臺路現已疏通大同官兵均已前進擬將征兵九十月軍糧運竣令練軍分起出口著李鴻章慶春卽飭王可陞奎斌催令都司賈吉齡督帶該軍接續拔隊邁行迅赴庫倫毋稍延緩所有宣化古北口兩軍月餉除由直隸籌給

辦糧等銀外著張廷岳阿爾塔什達查照李鴻章咨明餉章豫為籌備照數發給毋令缺乏。濟斯洪果爾一帶臺站緊要卽著慶春杜嘎爾飛飭達爾濟催令轍德恩速赴該處統帶察哈爾馬隊分布防堵保衛糧道慶春以賽爾烏蘇迤北庫屬臺站空虛擬將古北口練軍在該屬臺站擇地分紮與察哈爾馬隊聯絡防守著張廷岳等酌度情形妥籌辦理杜嘎爾需用馬匹已經慶春調撥牧羣馬五

百匹分起解往刻下賊匪竄向何處吉爾洪額等追勦情形若何著杜嘎爾督飭官軍確探賊蹤實力進勦張廷岳等亦當飭令伯克瓦齊爾等會合兜勦務期悉數殄滅早靖邊疆慶春所稱征軍糧石足供半年之需請飭綏遠城暫緩採辦等語著定安卽將協濟軍糧暫行停止飭令協領額勒洪額仍回察哈爾當差慶春仍當督飭口北道就地採辦源源運解以資兵食其多倫諾爾毗連之察哈

爾二旗並著飭令該旗總管督率所部加意嚴防毋稍大意將此由六百里各諭令知之

○又諭李鶴年奏沁河漫口及漫水趨近攔黃埧各摺片豫省河內縣所屬之徐保村本年沁水盛漲復因大雨長至九尺有餘該縣小王莊無工處所漫溢過隄衝刷二十餘丈現在水勢趨至攔黃埧後身情形甚為喫緊亟應設法保護著李鶴年飭令河北道督率廳汛各員趕緊分別疏消保護黃河隄岸並

將沁河漫口堵築毋稍遲緩一面將賑撫事宜迅速籌辦毋任沿河居民流離失所其武陟縣之原村等處埧段據稱情形亦甚喫緊該撫務當豫籌防範以保無虞將此諭令知之○戊申諭內閣李鶴年奏汜水縣城被水現委員勘辦等語河南汜水縣於本年六月間雨水過多汜河水漲灌城旋即消退查勘田廬衙署多被衝刷人口亦有損傷著該撫飭令委員等迅即前往該處會同地方官將

被水災民妥為撫恤毋令一夫失所○諭軍機大臣等御史張景青奏東南各省流亡日甚請飭加意撫綏一摺自髮捻蕩平後軍務大定亟宜培養元氣以厚民生曾疊諭各省大吏隨時認真撫恤茲覽該御史所奏是東南各省流亡未復不足以靖亂源該游民等以逃荒墾荒為名恐為匪徒煽惑滋生事端東南數省既有此等情形恐他省亦在所不免張景青所陳責成各州縣力行保甲招墾

荒地藉以息盜安民不為無見著各直省督撫體察該省情形實力興辦不得有名無實原摺均著鈔給閱看將此各諭令知之○又諭御史張景青奏陝西渭河兩岸自寶雞至潼關一帶曠地不下數千頃聞該處閒田甚多將來大兵凱撤似可即屯墾為善後之計等語近來西北兵勇多有遣散甘肅慶陽涇州一帶左宗棠業經飭屬分辨兵屯民屯該御史所陳不為無見著左宗棠將志章體察

情形妥為辦理。宜如何豫為籌畫之處。即著酌覈奏聞。將此各諭令知之。○又諭左宗棠奏中南兩路官軍接捕餘匪。疊獲勝仗。並率軍進駐靜甯各摺片。雷正綰等軍追捕西北逸賊。擒斬賊目李汶虎等多名。楊世俊所部截勦秦州竄回。並在渭源所屬汪家衝擊賊獲勝。將回目劉洪等陣斬。其分竄岷州之賊。亦經張仲春等督兵截擊。擒斬頗多。至階州絡匪。亦經該處員弁率隊進攻。破其卡壘。殲斃悍匪數十名。即著左宗棠嚴飭在事各軍認真接勦。並將在逃首逆狗齒牙馬彥澤及絡匪史學虎等悉數擒獲。淨絕根株。左宗棠進規河州。現令雷正綰撥馬步九營。魏光燾撥步隊五營。分紮固原南北各路。以資雕勦。而護餉道。令徐文秀駐會甯。劉明燈駐安定。該督自率親兵進駐靜甯。所籌均尚周密。即著於行抵靜甯後。馳赴安定狄道一帶。察看情形。督率諸軍分道速進。擒渠掃穴。迅奏膚

公。以慰塵繫。將此由五百里諭令知之。○又諭劉嶽昭岑毓英奏請飭催各省協餉一摺。滇省迤西迤南各地方。軍務未靖。本年夏間。附省及東川等州縣。均被水災。據奏軍需支絀。饑饉薦臻。情形十分危急。四川等省欠解協餉。積至二百五十四萬有零。若再仍前延宕。必至貽誤邊陲。著曾國藩瑞麟李瀚章吳棠張之萬楊昌濬劉坤一郭柏蔭劉崑督飭各該藩司。將前欠滇餉。無論何款。趕緊先解一半。其廣東江蘇新撥每月協餉各一萬兩。自本年二月起至五月止。未經起解。並著曾國藩瑞麟張之萬飭司迅速撥解。原單均著鈔給閱看。嗣後各該省應解協餉。仍當源源接濟。毋得稍涉推諉。前據御史余培軒奏請飭查滇省捐輸團練出力紳民。酌給獎勵等語。著劉嶽昭岑毓英查明未經失守及收復各屬捐貲辦團出力紳民。覈實請獎。毋許冒濫。原片著鈔給閱看。將此由五百里各諭令

知之。○兩廣總督兼署廣東巡撫瑞麟奏遵查粵東省章。官山墳地。以橫直二丈為限。此次駱秉章所奏。專就無力升科者而言。意在為貧民稍留餘地。粵東地狹人稠。墳塋櫛比。若繩以定例。恐小民無地開穴。轉生事端。現經體察輿情。所有官山墳地。無力升科者。應仍遵同治五年部議。以橫直二丈為限。有力升科者。即按定例。庶民塋地。九步穿心。十八步為率。雖有餘地。不得踰制。其不及九步者。聽以昭畫一。而杜紛更。下部知之。○以河南南汝光道蒯賀蓀為浙江按察使。○追予河南各屬陣亡殉難弁勇紳民婦女二千九百二十二員名口。分別旌卹如例。○己酉。諭軍機大臣等。前因總理各國事務衙門奏。俄國帶兵將伊犁城代為收復。並欲前往收復烏魯木齊。當經諭令榮全、景廉分赴該兩城。速籌布置。所有餉需。諭令戶部迅速籌撥。茲據該部奏稱。榮全軍餉。擬由部庫先行撥給。庫

平銀十萬兩。解交察哈爾遞解。景廉軍餉。先由西征糧臺就近借撥銀十萬兩。星速解往等語。伊犁烏魯木齊事機緊急。榮全、景廉兩軍馳赴該城。刻不容緩。非餉需應手。不足以利師行。所有部撥原庫平銀十萬兩。即著戶部知照順天府。立即委派妥員。解至察哈爾。慶春於此項餉銀到時。即行派員妥速遞解。榮全帶兵起程。不能稍緩。前次部撥烏科兩處餉銀各十萬兩。現在存項尚多。該署將軍師行迅速。即著於該兩城存項內就近提用。一俟部餉解到。再行歸款。此項餉銀。即著奎昌、多布沁、扎木楚、瑛榮、文碩撥交榮全應用。景廉帶兵規復烏魯木齊。軍情急迫。餉項甚關緊要。若由部撥及外省指撥。仍恐緩不濟急。著左宗棠飭令袁保恆。即由西征糧臺內先行借撥銀十萬兩。星速解赴景廉軍營。以應急需。西征糧臺詎該幫辦大臣軍營尚近。左宗棠等惟當迅即起解。毋稍稽遲。並著何

環於應解本年京餉內。劃撥銀十萬兩。解赴西征糧臺歸款。所有榮全景廉續用餉銀。著戶部再行籌撥。以資接濟。榮全景廉各當迅赴戎機。毋稍遲誤。將此由六百里諭知左宗棠。榮全奎昌多布沁扎木楚瑛。榮文碩慶春。景廉何璟。並傳諭袁保恆知之。○又諭前因總理各國事務衙門奏俄國官兵將伊犁代為收復。當經諭令榮全馳赴伊犁。妥籌布置。並令戶部籌撥有著之款。俾資接濟。本日據

戶部奏。動撥部庫銀十萬兩。由察哈爾解赴烏城。未到以前。即於烏科兩城存項內。先行提用等語。已照所請。寄諭該將軍大臣等。迅速辦理矣。惟念赴伊兵餉。雖經該部籌定。而榮全遠道馳驅。為國家力肩重鉅。若不寬籌餉項。不足示體恤。而獎勤勞。著戶部再行籌撥。部庫銀五萬兩。迅速起解。交榮全收領。以二萬兩賞給榮全。作為該署將軍部署行裝。及沿途駝馬之需。其餘三萬兩。即由榮全帶

赴伊犁。如俄國兵丁有須犒賞之處。即於此項內先行動用。毋誤事機。將此由六百里諭令知之。○又諭克蒙額等奏。請將變通操兵養馬籌畫賞項。統歸操兵支用。並請飭陝西巡撫催繳生息銀兩一摺。西安旗營兵丁困苦。自係實情。而操練刻不可緩。馬匹亦須臠壯。方足以資飽騰。均著照克蒙額等所請辦理。至咸長二縣積欠生息銀一萬三千餘兩。著將志章催令各地方官照數補繳。毋許藉

詞延欠。以免輟轡。將此各諭令知之。○予貴州各屬陣亡殉難文生高煜等紳民婦女一千三十名口。分別旌卹如例。○庚戌。諭軍機大臣等。給事中陳鴻翊奏。請飭催奉天粟米。以資賑濟一摺。據稱奉天解通粟米。歷年辦理遲延。自咸豐十年以後。每年止辦補運。其本年正運之米。各州縣並不豫備。致令差船年年空回等語。奉天應解通州粟米。關係倉儲。何以任令稽延。並不年清年款。刻下天津

等處被水成災。辦理賑濟。需米尤殷。著都興阿。瑞聯。德椿。嚴飭各該州縣。速將補運前年及本年正運兩項應解粟米。如數買補齊全。剋日開兌。不准停船待米。如再稽壓延玩。卽行從嚴叅辦。其押運委員。如督催不力。並著一併叅處。此項米船到津後。著李鴻章按照定章。妥為辦理。不准胥役勒索浮費。以免擾累。原摺均著鈔給閱看。將此各諭令知之。○又諭定安奏。吉林黑龍江馬隊。赴臺護運一

摺。據稱薩薩布到綏患病。尚未起程。其吉林黑龍江馬隊。已派員統帶。分往濟斯洪果爾。茂明安旗駐紮等語。薩薩布係派令帶兵勦賊西進之員。嗣因濟斯洪果爾一帶臺站緊要。令定安飭薩薩布暫紮該處護運。現阿勒台已散各臺。早經設復。糧餉暢行無阻。並有達爾濟。轍德恩。統帶察哈爾馬隊。前赴濟斯洪果爾。足資防護。卽著定安。檄飭該副都統迅速起程。仍帶吉林黑龍江馬隊西行。會同

杜嘎爾。探有賊蹤處所。竭力截勦。毋任延宕。其茂明安旗。仍著直字營馬隊折回駐紮。相機防勦。毋稍疏虞。將此由四百里諭令知之。○以甘肅攻克洪岡賊寨出力。賞參將汝得林。正二品封典。副將楊萬年。遊擊于飛龍。張林。邱明禮。李鳳顯。巴圖魯名號。都司馬壯圖。等花翎。縣丞費登第。等藍翎。副將劉鳳清等。升敘開復有差。○追予直隸祁州殉難貢生李肯堂等紳民婦女二千二百七名口分別

旌卹。並立祠建坊如例。○旌表守正捐軀山西臨縣民王保社妻成氏。○辛亥。以蒙古官兵勦匪出力。賞扎齊魯克齊伯克瓦齊爾巴圖魯名號。○壬子。熱河都統庫克吉泰奏修完旱河工程完竣。下部知之。○癸丑。

仁宗睿皇帝忌辰。遣官祭

昌陵。○

上詣

壽皇殿行禮。○以神靈顯應。頒江西安義縣

龍神祠扁額。日德周澤洽。四川梁山縣。

關帝廟扁額。日神功佑順。○諭軍機大臣等。

戶部奏請飭催各省趕解京餉一摺。上年十一月間。經戶部奏撥本年京餉銀七百萬兩。限五月前解到一半。年終解清。茲據該部查明。截至七月初十日止。除天津關常洋兩稅銀十五萬兩。無庸依定五月前初限。統令年底解齊。江西地丁釐金。河東加課羨餘。廣東鹽課帑息。粵海關海江漢關稅。報解均已過

半。山東山西安徽地丁。浙江地丁釐金。福建湖北湖南鹽課鹽釐。江海關稅。亦據報解及半。至湖北等省地丁釐金。兩淮等處鹽課。九江等處關稅。或解不及半。或絲毫未解。京餉關繫緊要。豈容任意延宕。除緩解劃撥解到外。尚有山西地丁銀五十萬兩。山東地丁銀十六萬兩。浙江地丁銀十五萬兩。湖北地丁銀十九萬兩。湖南地丁銀三萬兩。河南地丁銀十五萬兩。安徽地丁銀十萬兩。江西地丁

銀十萬兩。長蘆鹽課銀二十五萬兩。兩淮鹽課鹽釐銀二十七萬兩。兩浙鹽課鹽釐銀十五萬兩。河東加課羨餘銀五萬兩。廣東鹽課帑息銀十二萬兩。山東鹽課加價銀十三萬兩。福建鹽課銀十萬兩。湖北鹽釐銀五萬兩。湖南鹽釐銀一萬五千兩。四川鹽釐津貼銀二十萬兩。福建茶稅銀十二萬兩。粵海關新增贏餘銀二萬兩。閩海關洋稅銀十六萬兩。九江關洋稅銀三十五萬兩。浙海關常洋兩

稅銀十六萬兩。江海關洋稅銀十五萬兩。江漢關洋稅銀十四萬兩。天津關常洋兩稅銀十五萬兩。贛關稅銀五萬兩。江蘇釐金五萬兩。浙江釐金二萬五千兩。廣東釐金三萬兩。湖北釐金二萬兩。著各該將軍督撫監督等。即將前項應解銀兩。統於年內埽數解齊。毋得遲延干咎。至山西京餉內地丁項下劃撥庫倫軍餉十萬兩。除已據報解外。尚欠五萬兩。並著該撫趕緊解清。以資接濟。另片奏請

添撥京餉等語。部庫需用甚繁。該部擬添撥山東地丁銀十萬兩。河南地丁銀五萬兩。榮工加價奏准解部歸款銀五萬兩。福建春撥實存地丁等銀五萬兩。稅釐銀五萬兩。浙江釐捐銀五萬兩。兩淮鹽釐銀十萬兩。廣東鹽課銀十萬兩。四川鹽釐銀五萬兩。按糧津貼銀十萬兩。閩海關洋稅銀十五萬兩。浙海關洋稅銀十五萬兩。著各該將軍督撫連本年原撥未解京餉一併於年內解齊。毋得稍涉

推諉。致誤要需。將此由五百里諭知福州將軍。直隸兩江。湖廣。閩浙。兩廣。四川。江蘇。安徽。江西。福建。浙江。湖北。湖南。山東。山西。河南。廣東。各督撫並傳諭粵海關監督知之。○又諭戶部奏續行籌撥榮全景廉成祿軍餉一摺。榮全前赴伊犁。餉需緊要。除飭撥部庫銀十五萬兩外。卽著丁寶楨李鶴年再由山東河南地丁項下各撥銀五萬兩。解交察哈爾都統遞解。至戶部奏定新疆月餉。山東月協銀

三萬五千兩。河南月協銀二萬二千五百兩。山西月協銀一萬兩。直隸月協銀二千五百兩。並著李鴻章丁寶楨何璟李鶴年按月撥解。其景廉軍餉除由西征糧臺先撥銀十萬兩外。該大臣與成祿同赴烏魯木齊餉銀自應公同支用。其月協之款四川每月一萬數千兩。湖北陝西每月各數千兩。著李瀚章吳棠郭柏蔭蔣志章分別按月報解。成祿景廉軍營其專協之款四川欠銀六十五萬兩。山東欠銀十九萬五千兩。山西欠銀五萬五千兩。河南欠銀四萬四千兩。並著吳棠丁寶楨何璟李鶴年迅速埽數解甘。轉飭道員蕭宗幹解交成祿景廉軍營應用。毋再延緩。戶部續撥山東地丁項下銀五萬兩。作為成祿專款。卽由丁寶楨一併迅解。成祿軍營以上續撥及原定伊犁烏魯木齊餉項。僅各該省報解遲延。致誤事機。卽著戶部指名叅處。至榮全等行抵各該防所。後續需餉項均著覈實

計算察酌情形奏明辦理。將此由五百里各諭令知之。○以江西鉛山等處拏獲會匪。予知縣楊松兆等加銜獎敘有差。○追予江西軍營病故提督劉勝祥祭葬卹廕加等。○予江西因公淹歿參將孫連勝祭葬卹廕加等。○追予江西東鄉陣亡道員帥遠燁諡文毅。於死事地方暨原籍建立專祠。布政司理問帥疇廩生萬泰。一併附祀。○甲寅。諭內閣李瀚章。郭柏蔭。奏前任督臣勲績最著。懇請建

祠一摺。斥任大學士官文。任湖廣總督十二年。當地方兵燹之餘。能持大體。與歷任巡撫和衷共濟。恢復全楚。並次第舉行善政。民氣得漸復元。該省紳民。至今稱頌。著照所請。卽將湖北前建胡林翼專祠。改為官文胡林翼合祠。列入祀典。飭令地方官春秋致祭。以彰忠藎而順輿情。○宗人府以故鎮國公奕訢門上官員甲數。應否裁撤。請得旨均著無庸裁撤。○以奉天府府尹德椿為內閣學士兼

禮部侍郎銜。○賞科爾沁圖謝圖親王巴寶多爾濟黃纒。○乙卯。諭軍機大臣等。都興阿奏。陸續拏獲盜匪。並派隊馳往邊外勦捕一摺。奉天昌圖廳地方。為宵小出沒之區。盜首烏痣李等狡猾異常。久稽顯戮。現復紛出竄擾。據諾林丕勒等陸續報獲盜犯多名。著飭嚴行訊辦。盡法懲治。榆樹臺孤家子四平街等處。均有賊股擾掠。亟應迅速撲滅。以清盜源。都興阿現派索布多爾扎布帶隊馳赴昌

圖。調沙克都林扎布等馬隊出邊會勦。並飭諾林丕勒及同知張鼎鏞等併力勦辦。卽著飭令派出各軍。認真擒捕。昌圖界連吉林並著奕榕卽行派隊馳赴該處。會合兜拏。該將軍等務當嚴飭在事各員。將盜首烏痣李。劉疤拉脖子等悉數弋獲。毋任再行漏網。並將匪黨挖除淨盡。以靖地方。法庫邊門等處。都興阿飭該防兵認真巡緝。毋稍疏懈。將此由四百里各諭令知之。○刑部尚書鄭敦謹因

病解職。以都察院左都御史龐鍾璐為刑部尚書。戶部右侍郎李鴻藻為都察院左都御史。調兵部右侍郎鮑源深為戶部右侍郎管錢法堂事。未到任前。以刑部左侍郎賀壽慈兼署。實授詹事府詹事。夏同善兵部右侍郎。○丙辰。予陝西各屬陣亡殉難紳民向子光等暨婦女一萬四千六百八十八名口分別旌卹如例。○丁巳。諭內閣童華奏遵查專案工程。據實覆奏一摺。所有

孝陵

裕陵

隆恩殿等處各工。即著本年承修專案工程之尚書董恂侍郎察杭阿。一併敬謹承修。○諭軍機大臣等。吳棠奏。川省邊隅腹地時勢多艱。請暫留帶隊得力總兵一摺。前准曾璧光等奏。請將李輝武一軍調赴黔省助剿。嗣據吳棠奏。留該軍兩營駐紮大安驛。以固川邊其餘三營。仍令赴黔。茲復據吳棠奏。稱湖南

會匪滋事。首逆未擒。餘氛尚熾。黔江彭水邊界。現在籌防。貴州畢節所轄之觀音洞。有匪首羅名。糾集積匪。與雲南鎮雄所轄之豬拱箐。遺孽復萌。句結為患。該處均近接川邊。必須分兵助剿。甘省之徽兩等處。與川接壤。時虞回匪竄擾。非兩營所能抵禦。李輝武帶隊得力。請准暫留等語。川省邊隅腹地。既須增兵。即著照吳棠所請。將李輝武暫留川省。以資防剿。該總兵現已拔隊赴黔。著吳棠飛檄截留。妥為布置。黔省勦辦上下游股匪。亦需兵力。吳棠已於武字右軍酌撥兩營入黔協助。即著曾璧光周達武。於該營到黔後。酌量調遣。以資得力。該營月餉。吳棠當寬為籌撥。毋令缺乏。觀音洞豬拱箐。係滇黔交界處所。既有匪徒竊發。亟宜及早撲滅。免致蔓延。著劉嶽昭岑毓英曾璧光。酌量派兵前往按捕。並責成各該地方官。查拏奸宄。毋任伏莽潛匿。以靖地方。將此由四百里諭知吳棠劉嶽

昭岑毓英曾壁光並傳諭周達武知之。○以湖北荆宜施道恭鏜為奉天府府尹。○戊午。諭軍機大臣等曾壁光周達武奏官軍擒斬首逆。疊克堅巢。都勻漸次廓清。一招貴州官軍。自勦敗竄匪李高脚後。總兵何世華等。復將都勻積年巨匪柳添沈殲斃。乘勝掃蕩。勻郡西北賊壘。立解城圍。轉戰東路。馳勦東南。蹋平楓香猿家斑竹園等處坵寨。擒斬甚多。招降乞撫者不計其數。現在都勻四面漸次廓清。即著曾壁光周達武。飭令各軍。將敗殘餘匪悉數殲除。一面慎選賢能守令。辦理善後。務將招降各寨。妥為彈壓安撫。毋令再生事端。楚軍現由螃蟹等處進勦。與黔軍相距不遠。該撫等即飭將士會合楚軍。節節兜擊。以靖苗疆。李高脚受傷逃遁。並著飭令帶兵各員及地方文武。一體躡拏務獲。毋令漏網。將此由五百里諭知曾壁光並傳諭周達武知之。

大清穆宗繼天開運受中居正保大定功聖智誠孝信敏恭寬毅皇帝實錄卷之三百十六

大清穆宗繼天開運受中居正保大定功聖智
誠孝信敏恭寬毅皇帝實錄卷之三百十七

敕修

同治十年辛未八月己未朔。

上詣鍾粹宮問

慈安皇太后安。長春宮問。

慈禧皇太后安。至丁亥皆如之。○奉

慈安皇太后

慈禧皇太后幸漱芳齋侍午膳○諭軍機大臣等瑞聯奏暫借寄款墊放兵餉並懇飭催指撥銀兩一摺前因奉省官兵俸餉不敷支放經戶部議於直隸山東河南等省撥銀十五萬兩瑞聯現因秋季俸餉開放不容稍遲將

一八八

山東解到吉林黑龍江俸餉等銀五萬兩。暫行借用墊發。惟吉林黑龍江支放俸餉同關緊要。嗣後該侍郎如遇款項不敷之際。自應另行籌款墊用。不得擅動該兩省寄存銀兩。此次既經墊發。如該兩省派員赴奉領取。卽著籌款給領。不得俟撥款解到始行歸還。致誤要需。至奉省應行支放各款。需用孔亟。所有前經部撥直隸積欠項下銀二萬兩。長蘆積欠項下銀三萬兩。山東積欠項下銀五萬兩。河南積欠項下銀五萬兩。著李鴻章。丁寶楨。李鶴年。嚴飭藩運各司趕緊如數籌解。務於九月內解到。以濟急需。毋稍遲誤。將此各諭令知之。○又諭。左宗棠。穆圖善。豫師奏。碾伯匪獲勝。南川被匪竄擾。左宗棠。穆圖善。秦。堵擊西甯賊匪各摺片。陝匪崔三等竄擾。碾伯之勝。番溝等處。並撲碾城。經官軍連日進剿。將賊擊退。平戎一帶肅清。勦辦尚為得手。在事尤為出力各員。著左宗棠等查明保

奏該逆全股焚壘而遁。究竟竄往何處。著左宗棠穆圖善豫師嚴飭各軍探明賊蹤。合力搜捕。務絕根株。逆首崔三是否實係擊斃。該大臣等確查具奏。西甯竄匪。四出竄擾。窯洞等處。雖疊經擒斬。匪勢仍屬蔓延。左宗棠等務飭派出官軍分投勦辦。迅掃逆氛。並檄飭總兵黃武賢嚴密布置。務將威遠一帶完善之地。妥籌保全。至金縣平番及省城附近各隘。著穆圖善飭令帶兵將弁實力巡防。毋稍大意。成祿在肅州收撫陝回潰叛。東下甘涼。二府戒嚴。著左宗棠穆圖善即飭王仁和等加意防勦。如兵力尚屬不敷。並著左宗棠酌量撥兵策應。西甯南川一帶村莊。時被賊匪焚掠。豫師以兵力難分。已函商左宗棠撥軍助勦。即著該大臣酌撥得力隊伍。前往協助。豫師即飭練總張煥奎先行派隊救援。以資保衛。甯靈一帶。雖經肅清。惟聞甘涼回匪。勾結西甯漢回。屢擾平番古浪等處。日久無可

掠食。或由古浪之大靖土門。越中衛而出邊。或由鎮番竄出邊外。肅州之回。亦時由金塔寺出邊竄擾。若不豫籌堵截。恐各匪紛紛北竄。必至滋蔓難圖。刻下大軍進規河州。若以一軍分紮鎮番金塔寺等處。斷賊出邊之路。旺川糧道。俾大兵專力河州。免致牽掣。似於局勢較為周密。著左宗棠酌量情形。妥籌辦理。將此由六百里各諭令知之。○以甘肅肅

州勦賊出力。予都司龍舒甲等升敘有差。○予甘肅金縣陣亡團總四品銜楊增全祭葬。世職加等。○庚申科布多參贊大臣瑛榮奏舊疾復發。請假調理。得旨瑛榮著賞假一箇月。一俟稍愈。即行迅速赴任。○辛酉諭內閣。夏同善奏。久雨為災。請虔誠祈晴。並敦節儉。廣賑濟。開言路。清庶獄。一摺。本年入秋以來。雨澤過多。恐成災歉。業經降旨於本月初六日拈香祈禱。以迓時暘。因思順天保定天津

河間等屬地勢低窪。其被災處所。業准李鴻章所請。截留漕米。妥辦賑濟。此外如續有被災之處。並著直隸總督順天府府尹查勘情形。量加撫恤。毋令一夫失所。陰陽沴癘。災祲薦臻。朕宵旰廑思。倍滋悚惕。惟當躬行節儉。以裕物力。而恤民艱。刑罰失當。不足感召祥和。中外問刑各衙門。尤當恤刑慎獄。清理積案。不准拖累無辜。以消災沴。並著在廷臣工於民生疾苦。政事關失。直陳無隱。以副朕遇

災修省至意。○壬戌。遣官祭

文昌帝君廟。○以祈禱靈應。加山東省城

雨師廟封號曰溥惠。○河南巡撫李鶴年奏

遵查捻首汪敦友一犯。已於汪家畝就捕。當

卽訊明正法。報聞。○補鑄四川木裏安撫司

印信。從總督吳棠請也。○旌表守正捐軀直

隸宛平縣民宋汶鈺妻王氏。○癸亥。遣官祭

黑龍潭

昭靈沛澤龍王之神。玉泉山

惠濟慈佑靈瀟龍王之神。昆明湖

安佑普濟沛澤廣生龍王之神。密雲縣白龍

潭

昭靈廣濟普澤龍王之神。○遣官祭圓明園

惠濟祠。

河神廟。○諭內閣。兵部奏。記名提鎮副都統

各員。請飭查履歷。奏覆一摺。前疊諭各省督

撫。統兵大臣。將曾經記名提鎮副都統各員。

詳造履歷。咨送兵部。茲據奏稱。各省各營未

盡照章咨送。竟有簡放實缺數年。尚無籍貫

可稽。殊屬不成體制。著各直省督撫。統兵大

臣。嚴飭各營各地方官。詳細查明。保至提督

總兵副都統者。現在軍營若干員。收標差委

及緣事在籍者。各若干員。無論曾否造送履

歷。統限此次奉旨後。兵部知照。文到三月內。

逐項逐名。先行開單奏覆。一面飭造履歷。送

部。如有從前保獎之員。各省各營奏報單內

均無其人。卽著將該員保案先行開除。俟續

經查明具奏後再行列入以嚴考覈另片奏
實任副將以下各員暨各項儘先人員請飭
一併造冊送部等語前經兵部請飭各省將
實任各員開單咨部迄今尚未造報員缺是
否虛懸無從查悉至儘先人員履歷未經到
部不能序補該部止能就履歷已到各員分
後先名次於銓選次序殊有關礙且亦易滋
流弊著各直省督撫嚴飭提鎮各將所屬實
任各官並署理之員及現在尚未請補各缺

確查造冊彙齊送部並將各項儘先人員履
歷嚴檄催齊送部註冊統限半年內查覆不
得再行延宕各省實缺提督以下嗣後仍著
各就本標本營按季彙造履歷總冊報部以
符舊制○甲子以京畿久雨未晴

上詣

大高殿祈禱行禮○遣惇親王奕訢詣

時應宮恭親王奕訢詣

昭顯廟醇郡王奕譞詣

宣仁廟孚郡王奕譞詣

凝和廟拈香○乙丑遣官祭

關帝廟○諭軍機大臣等前有旨將劉長佑
調補廣西巡撫該撫接奉此旨計已馳抵新
任接篆視事矣粵西久遭兵燹地瘠民貧年
來吏治廢弛地方官復狃於積習一味因循
必須封疆大吏整躬率屬破除情面隨時大
加懲創方足以挽頹風劉長佑向來辦事尚
能認真惟性情過於寬厚若不濟以剛斷遇

事優容使人知感而不知畏則不肖官吏巧
於嘗試必至故態復萌劉長佑當振刷精神
悉心整頓凡興利除弊察吏安民諸務期於
法立令行雖不必以操切為能要不可以慈
柔貽誤方為不負委任該撫前在直隸所帶
楚省將勇均不得力且多滋事此次入粵距
湖南原籍甚近如有懇請隨同報效情事萬
不可允其所請任令赴粵致滋紛擾如須招
募勇丁儘可就地取材經費既省約束亦易

且與該省各營兵勇亦復相習。儻帶兵將領乏人。著該撫於馮子材軍營商酌調派。以資得力。將此諭令知之。○又諭劉銘傳奏復陳兵勇道路情形。勢難出關。並請賞假離營養病一摺。新疆遠在西陲。朝廷本欲俟甘省肅清。再行籌餉籌兵。力圖大舉。近因伊犁地方。經俄國代為收復。並有代規烏嚕木齊之說。若不迅赴事機。為先發制人之計。竟令鄰國得遂狡謀。以後更難措手。是以特命劉銘傳

率旅西行。為國家力任其難。建茲偉績。茲據該提督所陳各節。河湟未靖。轉餉艱難。江皖之人。又不宜銜寒涉遠。自係實在情形。劉銘傳又因傷疾舉發。亟須靜心調養。覽奏之餘。曷勝廕念。惟邊外事機緊迫。萬不可置為緩圖。淮軍素稱節制之師。且非劉銘傳居中調度。亦難兵將一心。劉銘傳著賞假一箇月。在營安心調理。一俟病體就痊。即行督率所部陸續西進。由甘涼一帶轉戰而前。即在肅州

屯紮。無庸出關。庶聲威較壯。成祿等軍即可一意西行。不至拔前寔後。於大局較有裨益。該提督軍行餉需。及應於何處設立轉運糧臺之處。並著斟酌情形。詳晰奏明。一面與曾國藩李鴻章酌度辦理。將此由五百里諭令知之。○

上以祭

社稷壇。自是日始齋戒三日。○丙寅。諭軍機大臣等。左宗棠奏派軍前赴肅州一摺。新疆軍務。朝廷本欲俟甘省大定。次第籌辦。此時既有俄人代為收復伊犁之事。勢難置為緩圖。惟關外事機緊迫。劉銘傳須俟病痊。再行拔隊前進。尚恐緩不濟急。朝廷正深焦灼。茲據左宗棠覆奏。遵派提督徐占彪所部十二營。由靖遠取道蘭州。前赴肅州。實能力顧大局。該軍既堪當一路之寄。著即飭令迅速前進。不得因有劉銘傳屯紮肅州之旨。稍涉遷延。一面咨催成祿先行部署。一俟徐占彪到後。

卽令成祿拔隊出關。並將起程日期奏聞。肅州防勦事宜。卽責成徐占彪妥為籌辦。將來劉銘傳到肅後。亦可商同布置。成祿現在出關。糧餉最關緊要。該軍雖有專撥之餉。深慮各省未能如期解到。左宗棠亦當代為籌畫。隨時接濟。俾利師行。本年正月間。據奎昌等奏稱。綏來等處民團可用。當諭左宗棠或派員出關。或飭口外鎮道妥籌安撫。該大臣究竟如何籌辦。儻所派之員。因道路梗阻。未能

西行。卽可隨同徐占彪大隊赴肅。並與成祿一同出關。將該處民人加意撫綏。務使各團樂為我用。以收指臂之效。將此由六百里諭令知之。○署烏里雅蘇台將軍奎昌等奏請將查辦前任將軍福濟案件出力各員獎勵得旨。向來查辦尋常案件隨帶之員。從未奏請獎勵。所請著毋庸議。○予雲南楚雄殉難貢生丁燦文等紳民婦女四十五名口分別旌卹如例。○丁卯秋分夕

月於西郊遣醇郡王奕譞恭代行禮。○
太宗文皇帝忌辰遣官祭

昭陵○祭

先師孔子遣大學士瑞常行禮。○諭軍機大臣等。劉崐奏遵籌援防全局。並請飭部指撥實餉一摺。據稱湖南會匪潛伏。實為隱患。惟清查保甲。辦理團練。必須借資兵力。而援黔一軍。勦匪正在喫緊。一時未能抽調。欲增募勦匪之軍。而本省餉源已竭。該撫通籌全局。

擬請將來以一萬人援黔。以一萬人防守本省等語。現在援黔之師正當得手。既未能遽行裁減。卽著飭令席寶田迅速聯絡黔軍。疏通驛道。一面埽蕩逆氛。一面妥籌善後。俟布置稍有眉目。卽將該軍汰弱留強。酌量裁撤。以顧腹地。而節餉需。湖南本境伏莽未清。亟宜豫籌防範。著該撫先事籌維。將保甲團練各事宜。竭力整頓。總應實事求是。毋得徒託空言。一面將餉事兵事實心籌畫。務須騰出

兵力扼要分屯。藉資鎮攝。所請飭部指撥每月有著餉銀十萬兩。著戶部議奏。將此由四百里諭令知之。○戊辰祭

大社

大稷。遣禮親王世鐸恭代行禮。○

上詣

奉先殿

壽皇殿行禮。○諭內閣本日據翰林院代奏。編修謝維藩條陳時局艱危。籲懇憂勤節儉。並

請減除工費。撥賑災民。編修吳大澂請飭停省典禮工費各摺片。披覽之餘。所陳均屬切當。大婚典禮傳辦各事宜。前於同治八年三月間。業經降旨令各該衙門分別減裁停止。方今西北軍務未平。各省被災流民。蕩析離居。朝廷實深軫念。尤當憂勤節儉。以裕民生。所有大婚典禮。現在並無續行傳辦之事。其從前傳辦各項及一切工程。卽著各該衙門力求撙節。毋稍糜費。事竣覈實報銷。不准稍

涉浮冒。直隸被災各屬。疊經諭令直隸總督順天府府尹妥為賑濟。務當認真辦理。實惠及民。以副朝廷軫念災黎至意。○諭軍機大臣等。杜嘎爾奏查明賊匪情形。請將官軍擇地移紮。並派員採辦兵丁衣服各摺片。據稱甘肅回匪。侵擾二年。皆由土爾扈特旗突出。往來搶奪。現被官兵在烏喇特境全行勦滅。附近亦無另股。惟潰匪尚多。不知盤踞何處。土爾扈特境內有無另股賊匪。亦未深悉等

語。該處逆匪雖經官軍勦盡。惟潰賊紛竄各處。尤恐勾結本地匪徒。蔓延為害。亟應迅圖撲滅。著杜嘎爾督飭各軍。確加偵探。將潰散餘匪分投勦捕。迅速殲除。毋留餘孽。其土爾扈特境有無另股。並著嚴飭派出官兵實力躡探。務得確情。不得稍有含糊。致貽後患。該處陰雨連綿。兵丁等衣服不齊。多染寒疾。杜嘎爾已派員分赴張家口歸化城等處。買補衣服。卽著定安慶春督飭各屬妥為照料。毋

誤要需其吉林黑龍江各隊卽照杜嘎爾所請准其暫紮四子部落等處以就水草將此由六百里各諭令知之○又諭文碩奏遵旨曉諭沙山子民人及聞俄國收復伊犁一摺文碩接奉前旨派員赴沙山子曉諭該處民人該民人等團練殺賊奮勇可嘉仍著奎昌瑛榮文碩隨時相機鼓勵趙興體董率有方前已照請獎勵該軍功急公好義措辦倉糧二千餘斛深堪嘉尚並著奎昌等加之激勵

以期聲勢聯絡俾為我用俄人帶兵代為收復伊犁前據總理各國事務衙門奏及已令榮全馳赴伊犁妥為布置文碩現接土爾扈特親王策林喇普坦來文及委員探報均有俄人收復伊犁之事其是否將城池仍交中國接管尚難遽定榮全當懷遵前旨迅赴伊犁與之會晤商辦中國有人經理庶俄人無所藉口藉杜詭謀文碩現已鈔發俄國條款等件劄交千總李昶以備接晤俄人與之應

對榮全抵伊犁後該千總亦可得所稟承也策林喇普坦既有允為俄人帶路往攻瑪納斯情事恐其遂為所用奎昌瑛榮文碩尤當設法開導加意籠絡毋稍大意伊犁之事烏科兩城曾否有人前來報信著金順奎昌多布沁扎木楚瑛榮文碩仍遵七月十七日寄諭隨時確探具奏關外各團亟宜乘時激勵各該處民人流離困苦亦須加意撫恤文碩以陝甘委員未到暫令千總李昶駐紮該局

以通聲氣所辦甚是前諭左宗棠或派員出關或飭口外鎮道妥籌安撫昨復有旨詢問該大臣當飭令所派之員剋期前往將關外民團設法拊循迎機利導激其報效之忱於大局實有裨益另片奏俄人私移鄂博現籌辦理情形等語俄官包達拉拜私將杜爾伯特達巴罕原立鄂博那至博勒克地方亟應執定條約與之理論著奎昌瑛榮文碩知照該國務於來年查界之前趕將私移鄂博那

回原處以符成約。將此由六百里各諭令知之。○己巳。

太祖高皇帝忌辰遣官祭

福陵。○諭內閣鍾端郡王之嫡福晉薨逝。著派總管內務府大臣崇綸前往照料一切喪儀。著照郡王福晉之例。官為辦理。本日召見惇親王。恭親王。醇郡王。孚郡王。詢及鍾端郡王之繼子貝勒載瀅。年尚幼穉。無人照料情形。殊深憫念。載瀅俟百日服滿後。仍著在恭親

王府中居住。所有載瀅府內一切事宜。並著恭親王暫為代管。○庚午。遣官祭昭忠祠。○子軍營病故車臣汗協理將軍扎薩克貝子德濟特多爾濟祭葬卹廕加等。○加賞普濟掌功德林。煮賑小米八百石。命先期開放。○辛未。山東巡撫丁寶楨奏酌擬整頓水師事宜。一。派員赴廣東製造拖罾戰船十四號。一。隨船配製礮位軍械。一。裁撤水師兵丁五百十名。酌留戰守兵八百名。分隸登州榮成二

營。仍以文登協副將為統領。一。改文登協副將為登州榮成水師營副將。隸以登州榮成兩水師遊擊。一。申嚴軍令。不准水師弁兵離船陸居。一。酌增口糧以卹兵艱。一。沿海舊有礮臺。擇要修築。一。登州榮成兩營各管戰船七號。扼紮天橋石島二海口。以資控制。下部議從之。○以阿克蘇辦事大臣福珠哩為廣州滿洲副都統。未到任前。以廣州漢軍副都統果勒敏兼署。○豁免山東濮州被水地方節年課稅。○壬申。諭軍機大臣等。蘇廷魁奏節交白露河工平穩。及經過地方被水情形。並請飭河南巡撫添撥銀兩各摺片。黃河南北兩岸各廳險工疊出。經蘇廷魁周歷查驗。現在尚屬穩固。惟此後水勢趨向靡定。該河督仍當督飭道廳各員實力修護。以期鞏固。秋汛工程緊要。需款甚殷。著李鶴年轉飭藩司於節省防險項下添撥銀六萬兩。分給南北兩道覈實動用。毋稍延緩。至武陟等處被

水村莊。及其餘被水州縣。並著李鶴年切實查勘。分別賑恤。毋令失所。用副軫念民艱至意。將此各諭令知之。○鄭親王承志革爵。以原任奉恩將軍嵩德繼子正紅旗滿洲副都統慶至襲封。○癸酉。

上奉

慈安皇太后

慈禧皇太后幸漱芳齋。侍午膳。○諭軍機大臣等。杜嘎爾奏。探明賊股竄出。派隊進剿一摺。

賊匪二百餘名。由金塔寺城竄出。搶掠旋竄入諾彥山前蘇琿圖等處。並據伯克瓦齊爾等探報。亦太略相同。杜嘎爾現已派兵一百五十名。交參領棟魯布管帶前進。總管達爾濟亦派隊前往科雅爾諾爾地方扼要紮營。賊匪避兵而行。在諾彥山一帶紛竄。卽著飭令棟魯布。達爾濟等。探蹤截擊。迅將此股竄匪悉數殲除。毋令逃逸。杜嘎爾仍當隨時分路偵探。將各處賊匪挖捕淨盡。務絕根株。其

染病官兵。及堪用駝馬。迅卽設法認真整頓。以期追剿得力。將此由五百里諭令知之。

大清穆宗繼天開運受中居正保大定功聖智誠孝信敏恭寬毅皇帝實錄卷之三百十七

大清穆宗繼天開運受中居正保大定功聖智
誠孝信敏恭寬毅皇帝實錄卷之三百十八

收修

同治十年辛未八月甲戌諭軍機大臣等馮

子材康國器奏攻克越南賊巢並富川等處
捕匪情形各摺片越南賊匪鄧建新周仲汶
等盤踞香消等處經總兵劉玉成等攻克復
將曾亞治餘黨王大等擒獲惟鄧周二逆率
殘黨向太原一路逃竄首惡未除仍恐復出
滋擾著馮子材康國器飭令劉玉成等跟蹤
追剿迅速殲除其陳四何三等匪竄入諒山
太原交界之螳螂龍坭地方並著督飭官軍
分投搜捕以絕根株逆首蘇惻漢遣黨赴廣

東乞降業經瑞麟派委知府何世俊等前往
查辦該匪是否真心反正瑞麟務當飭令何
世俊等詳細察看不可輕率招撫致貽後患
並著馮子材等就近體察情形儻該逆意存
反覆卽行派兵進剿毋誤事機竄擾富川之
盜匪盤科仔等現已拏獲永甯附近之四十
八峴踞匪黎伯城等亦經參將黃新春帶兵
剿除所有在事出力員弁准其擇尤保獎該
處地勢險阻難保無餘匪潛藏仍著馮子材

康國器飭令遊擊黃興仁等常川巡緝毋稍
疏懈其藤縣永安接壤之滿村思排等處股
匪著飭都司盧殿清等剋期攻剿以靖地方
劉長佑已抵廣東接印該撫調任廣西此時
諒可按奉諭旨著卽速赴新任將援剿越南
及本省剿匪事宜會同馮子材妥商辦理越
南軍務尤當迅速辦完毋再遷延時日馮子
材等另片奏進剿越南賊匪奪獲象隻擬挑
選呈進等語著照所請准其挑選數隻派員

解京。並檄飭該委員等沿途安靜行走。毋得騷擾。將此由五百里諭知瑞麟。劉長佑。馮子材。並傳諭康國器知之。○調正白旗蒙古副都統吉和為正紅旗滿洲副都統。以庫倫辦事大臣張廷岳為正白旗蒙古副都統。未到任前。以刑部右侍郎常恩署理。○以詹事府少詹事蘇勒布為詹事。光祿寺卿程祖誥為太常寺卿。通政使司副使朱智為太僕寺卿。○以廣西官軍援勦越南匪股。疊獲勝仗。予

總兵官劉玉成。道員華廷傑等。加銜升敘有差。○乙亥。諭軍機大臣等。前據戶部奏。查明各省關欠解西征協餉銀數。請旨飭催。當諭曾國藩等。迅速籌解。茲據袁保恆奏。稱迄今各處。不惟積欠之餉。絲毫未補。向解之數。絲毫未增。且間有不如從前者。近日左宗棠進規河州。師行愈遠。勞費愈增。各處解款。隨到隨罄。異常支絀。現又籌墊哈密軍餉。左宗棠復派撥大隊進駐肅州。尤非大批現餉。不克

成行。請飭迅速籌解等語。西陲軍務。正當喫緊。而糧臺艱窘萬分。幾至無從支應。若再不速籌接濟。恐有譁潰之虞。著各該督撫。監督懍遵前旨。迅將原撥續撥陝甘各月餉。按月如數解清。其從前積欠。並著該督撫等。查明陸續籌解清完。儻再任意遲延。致誤戎機。必惟該督撫監督等是問。將此由五百里諭知曾國藩。瑞麟。文煜。李瀚章。吳棠。張之萬。英翰。丁寶楨。何璟。李鶴年。王凱泰。楊昌濬。郭柏蔭。

劉崐。並傳諭崇禮知之。○以鑲白旗漢軍副都統穆隆阿署鑲紅旗護軍統領。○丙子。遣官祭賢良祠。○諭軍機大臣等。御史彝昌奏。鹽務廢弛。請遴員專運。嚴禁私銷一摺。據稱永平府屬鹽務。自改歸官運後。分司王鍾林辦理未善。復歸灤州經理。該州鹽吏門丁。有私自運銷情弊。濟民場大使蔣嘉泉畏罪稟訴。雖經運司嚴飭認真掣配。該分司並未照辦。且所得餘利。悉以肥己。亟須更改章程。揀

派廉員前往試辦各等語。永平鹽務歸地方官經理。有無流弊。是否必須派員承辦。方臻妥善。著李鴻章查明實在情形。斟酌辦理。分司王鍾林等如實有侵蝕鹽課情事。卽著從嚴叅辦。以儆官邪。原摺著鈔給閱看。將此諭令知之。尋奏遵查永平引岸。廢弛多年。請仍暫歸各州縣經理。以俟招募殷商接辦。分司王鍾林並未侵蝕灤州鹽利。門丁亦無私運情弊。均請無庸置議。從之。○又諭都興阿等

奏匪犯私入圍場槍斃官兵。請飭吉林將軍飭屬查拏一摺。據稱協領玉奎帶兵巡查圍場。行至那丹伯阿木巴色合勒圍內。領催鳳林被賊槍斃。官兵拏獲打牲人犯于憫汶一名。據供偷入圍場捕鹿。其槍斃官兵之賊係害鹿賊匪窩家路達。在吉林義通河勒克山居住。看守鹿害之把頭王大沅。王二麻子。王三小子。均居住義通河屬小黑頂子地方。請飭嚴拏等語。圍場重地。豈容匪徒潛入。都興

阿等務卽督飭開原尉縣及威遠堡邊門巡防各員。將此起匪犯認真訪緝。毋任遠颺。于憫汶一犯。旣知各匪姓名住址。自係同夥匪類。卽著交盛京刑部嚴行訊辦。並著奕榕分飭所屬地方官及邊界各官一體嚴緝。務將匪黨路達等按名弋獲。毋令漏網。將此各諭令知之。○又諭李鶴年奏。出省查勘沁河漫口。撫恤災黎。並估計豫備堵築一摺。本年六月間。河南河內縣徐保村。暨武陟縣方陵等處。沁河漫溢。被災村莊較多。李鶴年親往履勘。分別被災輕重。籌款賑濟。並飭印委各員妥為撫恤。卽著該撫督飭各該地方官實心經理。務期惠及災黎。毋令一夫失所。此次堵築兩處缺口。需銀三萬餘兩。並著飭司迅速籌款。趕備料物。俟霜清後。卽責成該管道府等官分路動工。剋日堵合。其溫孟毗連被水之區。亦著分別拯恤。以副軫念民艱至意。將此諭令知之。○總理各國事務衙門奏。日

本國使臣議約事竣。來京呈貢方物。得旨該國所呈方物。著留中。其另餽土儀一分。卽著恭親王收受。○丁丑。諭內閣。溫葆深。恩承。都興阿。奏修理河道工程完竣。請派大員驗收一摺。

永陵草倉河蘇子河工程。經溫葆深等督率在工各員。次第修築。於本月初三日一律完竣。卽著派瑞聯敬謹驗收。另片奏草倉蘇子兩河水勢遷流不定。請飭隨時保護等語。嗣後

兩河各工。應由盛京將軍會同工部。於每歲春融。隨時派員查看。斟酌辦理。以昭慎重。○又諭御史吳鎮奏訪聞四川各州縣未經查禁私種罌粟。並將洋藥稅一項按糧攤徵。請飭嚴禁一摺。民間栽種罌粟。地方官卽應認真查禁。至洋藥稅一項。取之商販。何得科派農民。若如該御史所奏。是四川省奉行不善。致有前項情弊。恐他省亦在所不免。著各該督撫嚴飭所屬。於徵收洋藥稅務。止宜稽察

商販。不准按糧攤徵。以免擾累。並隨時曉諭農民。不得違禁私種罌粟。致干功令。另片奏軍務平定後。各省流寓孤寡。亟宜設法保全等語。著各直省督撫。通飭所屬地方官。勸諭紳民。共成義舉。如何集貲設局。妥為養贍之處。卽由該紳民自行籌辦。毋得假手吏胥。致滋流弊。○以記名總兵官楊芳桂為浙江處州鎮總兵官。○戊寅。吉林將軍奕榕等奏添兵會剿盜首烏慈李等。得旨著卽督飭派出

官兵。會同奉天員弁。將盜首烏慈李等悉數捕獲。毋任再行漏網。○追予河南各屬陣亡殉難紳民婦女三千一百三名。口分別旌卹如例。○予順天故都察院左都御史李綬入祀鄉賢祠。從兼管府尹萬青黎等請也。○己卯。諭軍機大臣等。奎昌等奏遵旨籌辦伊犁情形。暨棍楚克丹贊等回籍葬親。請飭東兩盟照常換班各摺片。榮全因接到俄國來文。有約會派兵出征之語。派令防禦多仁泰先

赴伊犁查探情形。多仁泰著照所請賞給三品頂帶並賞換花翎。卽著飭令該員趕緊前往。將一切情形詳細確查。隨時稟明酌辦。據實具奏。俄國既代為收復伊犁。非有大員迅速前往經理。恐該國更有所藉口。著榮全懍遵前旨。部署起程。需帶官兵。或卽在烏城附近酌調。以資迅捷。其如何取道前進。如何派兵駐守。前由戶部撥銀二十萬。並另籌賞需。此外尚應籌餉若干。除由塔爾巴哈台行走

外。尚有何路可以徑達伊犁。科城迤西五站以外。臺站阻絕。應如何鼓勵蒙民一體設立臺站。俾官兵糧餉往來不至窒礙。兵少不足以振威。兵多又艱於糧運。榮全應帶兵若干。名均著與奎昌等通盤籌畫。迅速奏聞。榮全素性勇往。朝廷固所深知。奎昌等斷不可畏難遷延。致誤大局。棍噶扎勒參之弟棍楚克丹贊等。向洮州原籍葬親。經奎昌等派令把總朱澍帶兵護送。經由綏遠城行走。著定安

查明另給護照。一面行知山西陝西甘肅各督撫轉飭各屬。於棍楚克丹贊等經過地方。一體驗照放行。並令原籍洮州於事竣後。加給執照。俾令仍回烏城定安。並傳知棍楚克丹贊等。沿途安靜行走。所過州縣。毋得藉端騷擾。前據張廷岳等奏。東兩部落防堵喫緊。該協理將軍等未能赴烏。當諭烏里雅蘇台將軍咨行西兩部落就近直班。茲據奎昌等奏。本年夏秋季直班已令西兩部落代替。惟

烏城軍務亦形喫重。所有蒙古各務均恃副將軍轉飭辦理。未便專責西兩盟常年駐班。致涉偏枯。且遇有應飭東兩盟事務。呼應不靈等語。所奏亦係實情。著張廷岳阿爾塔什達自明年起。仍照常例。令東兩盟副將軍等赴烏換班。如屆時遇有要務。該副將軍等未能前往。卽著揀派公以上明幹扎薩克前往署辦印務。將此由五百里各諭令知之。○以廣西省城重修書院落成。頒秀峰書院扁額。

曰書巖津逮。宣成書院扁額曰道德陶鈞。榕湖書院扁額曰經明行修。○陝甘總督左宗棠六十生辰賞。

御書扁額曰旂常懋績。並

御書福壽字。文綺珍玩。○庚辰。諭軍機大臣等。慶春奏。兵房因雨坍塌。請給款補砌一摺。本年秋雨過多。張家口官署兵房。半皆坍塌。滲漏。該官兵棲身無所。亟宜趕緊興修。惟查勘辦理。尚需時日。卽著照所請。先行籌款。每戶

賞給銀五兩。令該兵丁等自為補砌遮蓋。並著飭令各該旗協領佐領等。眼同散放。具結存案。此項銀兩。卽准其於該都統衙門庫存茶馬釐捐項下動支。並將用過銀兩數目。併案報部覈銷。將此諭令知之。○命河東河道總督蘇廷魁來京。以倉場侍郎喬松年為河東河道總督。○辛巳。

世宗憲皇帝忌辰。遣官祭

泰陵。○

上詣

壽皇殿行禮。○諭軍機大臣等。張廷岳等奏偵探賊匪情形。請飭催古北口練軍迅速前進。並籌解馬匹軍火。接濟前敵各摺片。賊匪分擾阿畢爾米特遊牧等處。大股在珠格倫山一帶盤踞。八月初二日。復竄至沙巴克台地方。分路滋擾。張廷岳等現撥馬匹軍火。解往伯克瓦齊爾軍營。以資接應。卽著督飭伯克瓦齊爾偵探賊蹤。相機進剿。並著杜嘎爾督

率官軍會合夾擊。務期悉數殄滅。早靖邊疆。塞外地方遼闊。兵分數路。防剿均屬不敷。古北口練軍。業已先後起程。暫紮宣化等處。前據慶春奏。擬將該軍分紮賽爾烏蘇迤北庫屬臺站。當經諭令張廷岳等酌度辦理。現在庫倫需兵孔亟。著李鴻章催令都司賈吉齡迅速拔隊。馳赴庫倫。慶春將臺站駝隻籌備支應。俾利過行。該軍到庫後。卽著張廷岳等體察情形。妥為調度。如西路軍情緊急。或由

張廷岳督兵進剿。或另派得力員弁帶隊前往會剿。均著斟酌緩急機宜。妥籌辦理。將此由五百里各諭令知之。○又諭劉崐奏清查益陽等處逸匪。勒緝首逆。並分布各軍情形一摺。湖南益陽等處逸匪。經李光燦等督飭官兵團練。分路按捕。疊獲多名。逆首劉道美之妻鍾氏。何春台之弟何子詳。亦均緝獲。訊據供稱。劉何兩逆。於桃花江潰竄。後日久無蹤。劉崐現飭地方官購覓眼線。並派副將戴登高等帶同兵役。分赴各處按查。卽著嚴飭派出各員。密探賊蹤。將劉道美。何春台迅速拏獲。毋任遠颺。致稽顯戮。其分布彈壓各軍。並著飭令嚴扼要隘。實力巡查。不得稍有疏懈。湖南伏莽甚多。該撫務當將團練保甲各事宜認真整頓。以清奸宄。而消隱患。將此由四百里諭令知之。○調禮部右侍郎邵亨豫為倉場侍郎。以都察院左副都御史胡瑞瀾為禮部右侍郎。工部左侍郎童華兼署吏部

右侍郎。○以蒙古直隸官兵疊次剿匪出力。賞扎蘭噶勒旺多爾濟二品頂帶。訥林扎布等花翎。外委馮步青等藍翎。餘升敘有差。○壬午。諭內閣李鴻章奏直隸現辦災賑招商購米。請飭蠲免釐稅。嚴禁遏糴一摺。本年直隸天津等府屬被水成災。居民困苦。前經截留糴糧。採辦賑米。以資撫恤。茲據李鴻章奏稱災區甚廣。待哺日長。全賴商賈輻湊。源源接濟。現飭委員分赴各處購辦備放。並招勸紳商購米運赴被災處所售賣。惟商米經過局卡。應完釐捐。而鄰省州縣。又往往任意閉糴。深恐糧價日昂。民生日困等語。近畿災黎待拯。亟應設法變通。著奉天江南山東河南各將軍督撫府尹等將商人應完米糧釐捐暫予停免。其由李鴻章派員招商採運米石。著飭各關卡驗明護照。免稅放行。俟來年麥收成熟。再行照章抽收。並著出示嚴飭地方官紳囤戶。毋得遏糴居奇。俾商賈流通。糧價

平減庶飢民得霑實惠。○諭軍機大臣等劉
嶽昭岑毓英奏官軍進剿東溝獲勝並攻克
小東溝賊巢一摺。賊首馬城麟久踞河西縣
屬之大東溝。與小東溝匪首合憫治勾結為
患。經馬如龍派兵分道進攻。復親率隊伍繼
進。將小東溝賊巢收復。並擒獲合憫治等正
法。其餘賊眾就撫。惟大東溝之賊尚負隅死
守。馬如龍督隊勦賊。身受槍傷。曾否痊愈。殊
深廑繫。卽著劉嶽昭岑毓英傳知該提督迅

速調治。一面督率兵勇乘賊匪勢蹙之時。趕
將大東溝逆巢攻拔。毋令首逆馬城麟乘閒
逃遁。致稽顯戮。此次出力及陣亡員弁兵勇
准其俟大東溝肅清後。彙案奏請獎卹。其小
東溝招撫人眾務當設法彈壓。隨時稽察。毋
令再生事端。將此由五百里各諭令知之。○
以雲南攻克小東溝賊巢。賞提督馬如龍白
玉翎管一支。白玉搬指一箇。火鐮一件。大小
荷包各一對。○癸未諭內閣翰林院代奏編

修吳鴻恩敬陳管見各摺片。不無可採。整飭
風俗為地方之要務。乃各省莠民竟有傳習
燈花教白蓮教青林教諸名目。蠱惑愚民。亟
應隨時查禁。有犯必懲。士子身列膠庠。尤當
恪遵軌範。著各直省督撫學政責成各學教
官認真訓戒。如有不遵約束。卽行從嚴懲治。
軍興以來。各省招募勇丁。於遣撤後。結會聚
黨。滋生事端。所在多有。並著嚴飭地方官實
力稽查。遇有恃眾擾害地方肆行不法者。立

卽嚴拏懲辦。不得諱飾輕縱。以清亂源。各省
大小官員賢否不齊。全在舉劾公允。方於吏
治有裨。該督撫務當破除情面。悉心考覈。俾
屬員知所勸懲。至特旨交查事件。及京控提
訊之案。尤當秉公覈辦。毋許瞻徇迴護。常平
等倉存儲穀石。本為豫備凶荒而設。從前動
用未經買補者。著各省督撫詳細查明。務須
籌備足額。毋任虧缺。其地方善舉如設廠施
粥等事。亦當勸諭紳民集貲興辦。以裕民生。

閭閻疾苦。朝廷時深軫念。該督撫等如有所見。卽行據實奏聞。○又諭。張之萬奏職官招搖生事。請嚴行審辦一摺。浙江試用府經歷賴其勳。自稱知州。銜浙江候補知縣。在江蘇上海地方。招搖多事。聲名甚劣。並有刊刻匿名小錄。妄言人罪情事。經蘇松太道訪傳。發縣看管。飭將議敘加銜飭知及加捐知縣部照呈驗。該員延不檢呈。顯有詐冒情弊。賴其勳業經咨部斥革。卽著張之萬提訊該革員實犯劣蹟。從嚴究辦。以肅官方。○諭軍機大臣等。本日據翰林院代奏編修吳鴻恩陳奏四川按糧津貼。幾成永遠定額。而勸捐抽釐。又同時並舉。去年大水。本年大旱。後又大水。米價之昂。甚於往歲。農民兩遇荒年。若再責令照前津貼。民力實有不支。請飭停止等語。該編修所陳民生苦累。自係實在情形。雖京餉軍需。藉資挹注。而災區必當撫恤。吏胥戎恐侵漁。均應認真辦理。其按糧津貼一項。能

否停止。抑或變通裁減。以舒民困之處。著吳崇悉心籌酌。奏明辦理。原片著鈔給閱看。將此諭令知之。尋奏津貼一項。為奉撥京協各餉之需。明年仍請照舊辦理。俟鄰省軍務肅清。卽行奏請停止。從之。○追予江蘇各屬殉難布政使理問銜呂慎學等紳民婦女一千七百十八員名口。分別旌卹如例。○乙酉。諭軍機大臣等。金順奏分起拔營日期。懇請借撥餉項。暨請飭山西仍籌撥墊辦皮衣銀兩。各摺片。金順後起各營。現定於本月十一十七等日。拔隊起程赴烏。取道纏金向包頭進發。清釐積欠。籌辦行裝。需餉甚鉅。前諭何璟將其餉籌撥三十萬兩。以利進行。嗣據該撫奏稱。司庫支絀。措辦為難。業照戶部所議。准將該省欠解本年地丁京餉暫留二十萬兩。再將積欠餉銀籌撥十萬兩。均解交金順軍營應用。以符原撥之數。著何璟按照戶部前奏迅速如數籌解。金順得此鉅款。足資飽騰。

一俟行抵包頭。即將採賣轉運各事宜悉心籌畫。迅統所部馳赴烏城。妥為布置。其墊辦皮衣銀二萬兩。卽著何璟仍由司庫照數籌解金順軍營。毋稍推諉。另片奏軍營需用駝隻。前經咨調每蒙汗籌辦健駝四千隻。配齊鞍繩。解至歸化包頭一帶。接運軍食。迄今未據籌撥等語。著奎昌多布沁扎木楚張廷岳阿爾塔什達酌量蒙古情形。實能籌撥駝隻若干。飭令儘力協濟。派員會同尚玉解往應用。所需運腳銀兩。仍由金順照章發給。將此由五百里各諭令知之。○追予湖南綏甯殉難知縣吳熊於死事地方暨原籍建立專祠。典史馬景恆等均附祀。○追予江蘇各屬殉難從九品周彬等紳民婦女一千八百四十六員名口分別旌卹如例。○丙戌諭內閣。定安奏請飭查明轉運軍需無誤之各廳州縣。給予獎勵等語。近年歸綏甯夏各營需用餉銀軍火。由順天直隸山西等處運解。各該地

方官均能竭力供支。數載以來。尚無貽誤。著順天府府尹直隸總督山西巡撫查明奏請獎勵。毋許冒濫。○又諭。定安奏特參不守營規之哨官。請旨革職一摺。直字營哨官花翎補用遊擊劉永和。隨同提督劉景芳帶隊防剿。遇事任性。行為乖謬。並私自出營。任意游蕩。實屬庸劣無恥。劉永和著卽行革職。永不敘用。並不准其投效軍營。卽將該革員解交原籍地方官嚴加管束。以示懲儆。○諭軍機

大臣等奎昌等奏俄人襲取伊犁。遵旨籌辦情形。請飭杜嘎爾赴翁音河一帶勦賊。定安奏。另股賊匪復犯草地。派隊迎勦。薩薩布因病請假。張廷岳等奏請派兵擊賊。並催古北口官兵暨購備鐵掌各摺片。俄人代復伊犁。仍令滿漢察哈爾官員辦事。查察該國情形。雖不至公然占踞伊城。惟口舌辯論。勢所難免。亟須大員前往經理。著榮全仍遵疊次諭旨。與奎昌多布沁扎木楚會商。部署起程。榮

全擬由杜嘎爾軍營抽調黑龍江頭起三起官兵五百名。交吉爾洪額統帶。吉林官兵五百名。交訥蘇肯統帶。配齊軍火器械。並將奪獲賊中駝隻。選擇驍壯者五百隻。兼程前進。限九月內到烏。並擬將在綏防勒之薩薩布所帶吉林黑龍江馬隊一千二百餘名。調至杜嘎爾營中。以補其數。現在杜嘎爾勦賊。亦屬喫緊之際。該副都統能否令吉爾洪額訥蘇肯帶領馬隊赴伊。抑或另行派員統帶前往。著榮全與杜嘎爾悉心商酌。妥籌調派。聞索倫官兵。現住葦塘子地方。榮全即可就近帶往。以壯聲威。杜嘎爾無論如何為難。總須抽調官兵。撥交榮全帶赴伊城。不得因榮全尚有索倫官兵可撥。遽存推諉。榮全擬帶官兵一千餘名。裹糧三箇月。約需二十萬斤。請飭由口北道歸綏道另籌款項。各先辦糧十萬斤。由臺站解赴烏城。即著李鴻章何璟飭令各該道如數籌辦。由綏遠城張家口分道

運解。並著定安慶春趕緊催提。設法趲運。以濟要需。所請添調吉林黑龍江馬隊二千名之處。該處官兵年來徵調不少。已諭該將軍等先行挑齊。候旨備調。奎昌等所稱科城迤西約十數站。應設糧臺之處。著瑛榮文碩與奎昌等妥籌辦理。定安所奏賊匪竄入阿畢爾米特旗遊牧諾彥山等處。與奎昌張廷岳等奏報大略相同。該將軍已令侍衛永德督帶馬隊由濟斯洪果爾馳赴烏喇特旗會合杜嘎爾所派之兵進勦。此項官兵。本應由薩薩布統帶西進。現在杜嘎爾所部馬隊既須撥赴伊犁。薩薩布一軍。尤當速赴杜嘎爾營中合隊。以資厚集。薩薩布病尚未愈。著定安飭令迅速調理就痊。剋日起程。一面檄令永德先行帶隊進發。探蹤截勦。杜嘎爾前奏賊匪並不甚多。而本日奎昌等奏賊中逃出蒙古人供稱。賊約二萬。分起向西撲犯。於七月二十七日。已到巴彥察罕山。逼近翁音河。又

據張廷岳等奏。賊於八月初間。竄至巴勒達爾多爾濟旗界內。向東北竄擾。賊眾約六七千人。欲犯庫倫。賊蹤已至翁音河哲林等處。各等語。賊數究有若干。現在究竄何處。共有幾股。著杜嘎爾偵探明確。賊勢趨重何路。即行迎頭攔擊。並著奎昌等督飭派出蒙古官兵。速赴哈爾尼敦等處。與達爾濟一軍合力堵擊。張廷岳等亦當飭令伯克瓦齊爾統率所部實力嚴防。以遏奔突。庫倫軍情喫緊。著

李鴻章迅催都司賈吉齡統帶古北口練軍星速前進。並著慶春嚴飭各臺一體妥速應付。駝隻俾得早日到防。張廷岳等奏口外駝馬疲乏。皆由不用鐵掌所致。著定安慶春於綏遠城張家口兩處。將鐵掌寬為籌備。一面咨照各路統兵大員。需用若干。隨時領取。以利馳逐。奎昌等另片奏請調員隨營。已諭侍衛處令錫綸馳赴烏城。並諭戶部等衙門揀派司員筆帖式六員一併前往。其山西試用

縣丞長庚試用從九品曹遇亨著何璟飭令由驛赴烏。均交榮全差委。所請揀發大員二員。俟簡派有人。再行發往。將此由六百里各諭令知之。○又諭前因俄國派兵代為收復伊犁。當經諭令榮全帶兵前往經理。茲據該署將軍奏稱。擬於杜嘎爾所統吉林黑龍江馬隊內先調一千名。統帶赴烏。惟兵力太單。必須添調官兵。方足以資接應。著奕榕托克湍於吉林黑龍江所屬各挑選得力馬隊一

千名。豫備調遣。一面仍令認真操練。俟續奉諭旨。再令起程。將此由五百里各諭令知之。○以捐備軍需駝馬。命烏里雅蘇台參贊大臣扎薩克圖汗郡王銜貝勒多布沁扎木楚為郡王。○旌表守正捐軀直隸藁城縣民底保住妻白氏。○撥神機營洋槍二百桿。解赴烏里雅蘇台軍營備用。○撥神機營火藥六千斤。轟藥六百斤。火繩三千丈。給庫倫官兵領回備用。

大清穆宗繼天開運受中居正保大定功聖智
誠孝信敏恭寬毅皇帝實錄卷之三百十八

大清穆宗繼天開運受中居正保大定功聖智
誠孝信敏恭寬毅皇帝實錄卷之三百十九

款

同治十年辛未九月戊子朔

上詣鍾粹宮問

慈安皇太后安。長春宮問。

慈禧皇太后安。至丁巳皆如之。○奉

慈安皇太后

慈禧皇太后幸漱芳齋侍午膳○己丑諭軍機

大臣等慶春奏賊匪竄近臺路派撥馬隊保護科城糧餉並飭官兵迎剿催古北口練軍出口杜嘎爾奏探明西境竄匪向東擾犯添隊堵剿各摺片科布多二起餉銀運至窄爾

瑪克臺。因察布察爾臺。迤西探有賊匪蹤跡。經護解員弁將餉銀折回。哈沙圖地方。不敢遽行前進。慶春現飭達爾濟派撥馬隊。就近前往保護。科城軍餉。一面選派勁旅。迎頭截剿。並飭參領轍德恩。撥兵馳赴賽爾烏蘇。護餉衛臺。卽著該署都統嚴飭達爾濟等。確探賊蹤。認真防剿。不得稍有疏虞。臺站人眾。聞警易致驚惶。務當責令玉和等。妥為拊循。毋令疑懼逃避。又蹈從前覆轍。賊匪奔竄靡定。

現又撲犯翁音河。圖犯庫倫。若不趕緊殄除。轉瞬風雪嚴寒。勦辦更形棘手。都司賈吉齡所帶古北口一軍。已定於九月初三日。由宣化啟行赴口。著李鴻章嚴催該都司迅速拔隊前進。馳赴庫倫。慶春將該軍應需馳隻帳房等項。設法寬為籌備。以利師行。杜嘎爾現已追賊至烏蘭察布盟界。距翁音河二千餘里。雖據該副都統派兵四百名。交福珠哩等偵探夾擊。惟相隔較遠。奎昌多布沁扎布楚。

張廷岳。阿爾塔什達總當。就現有兵力。相機扼剿。毋令蔓延。吐嘎爾亦當偵明賊蹤。督兵會合夾擊。盡殄賊氛。定安前已派侍衛永德。馳赴烏喇特旗一帶探剿。此次慶春請飭綏遠城將軍派隊。馳往察布察爾一帶。勦賊之處。著定安斟酌調派。杜嘎爾營中。能否分撥馬隊一同前往。亦著酌度軍情。妥籌辦理。其多倫諾爾等處防務。卽由慶春隨時知照庫克吉泰。嚴密巡防。毋令東竄。將此由六百里。

各諭令知之。○又諭前據榮全等奏請揀發大員二員。當諭俟簡派有人。再行發往。本日已將副都統托倫布。富和。記名副都統保英。頭等侍衛沙克都林扎布。二等侍衛特爾清阿。台慶。額爾根巴圖。前鋒參領孝順。護軍參領英廉。翼尉桂祥等十員。發往伊犁。隨同榮全辦理一切事宜。並諭令神機營。每員賞給銀一千兩。剋期起程。取道烏里雅蘇臺前進。榮全現已部署起程。著先行馳赴伊犁。毋庸。

俟該員等到烏一同前進。致稽時日。伊犁地方員缺久懸。該員等到後。如要缺需人。卽著榮全酌量先行派署。一面奏聞。候旨簡放。其司員筆帖式等官。前已諭各該衙門揀派。俟奏派後卽行發往。聽候榮全差委。將此由六百里諭令知之。○科布多參贊大臣瑛榮因病解職。以鑲黃旗漢軍副都統常順為科布多參贊大臣。○予塔拉布拉克傷亡防禦成連等十九員名分別賞卹如例。○庚寅。諭內

閣景霖奏。職官挾嫌妄控。請派大臣審辦一摺。筆帖式祿興呈控尚膳正祥盛員外郎文蔭等有演唱女戲向眾人斂錢情事。並據稱有郭朝利一名可以作證。經景霖派員查訊。並無實據。據祥盛等供稱祿興之父忠德胞兄祿瑞前因軋傷樹株捆毆巡兵犯案。曾向該員等求為護庇未允。因此挾嫌妄控。並據忠德祿興供認妄控及賄令郭朝利作證各情。著景霖派員卽將忠德祿興郭朝利解交

刑部審訊。按律懲辦。○以正黃旗蒙古副都統明瑤署正白旗滿洲副都統。○辛卯。遣官祭

都城隍之神。○諭內閣李鶴年奏散勇藉端滋事。請將疏防之統領營官分別嚴懲。蔣志章奏豫軍勇丁在潼關肆搶竄散。地方現已靜謐。各一摺。甘肅提督馬德昭率領豫軍屯紮潼關。該營勇丁楊開運等於八月十九日以索取欠餉為詞。糾眾肆行搶掠。旋即逃竄。

經馬德昭等派兵追拏。將逃勇截殺殆盡。餘眾向閿鄉盧氏等處竄逸。著李鶴年嚴飭派出弁兵暨地方文武分投截拏。務將潰勇悉數捕獲究辦。並著蔣志章督飭該地方官將被搶居民妥為安撫。提督馬德昭身任統領。未能先事豫防。實屬咎有應得。著交部嚴加議處。其中營營官遊擊謝聯陞約束勇丁。是其專責。乃竟形同聾瞶。致生事端。著革職拏問。交李鶴年嚴行訊究。如有侵蝕軍餉等弊。

卽行從嚴叅辦。○諭軍機大臣等左宗棠穆圖善奏官軍分路勦匪獲勝成祿奏肅回紛擾關內外地方請飭撥兵會勦並籌給餉銀各摺片回匪紛擾西路之古浪縣境及東路之李家莊等處疊經馬步官軍擊退其鎮番等處竄匪亦經防軍截勦獲勝現在大軍進規河州誠恐該逆四出滋擾以圖牽掣穆圖善已赴安定與左宗棠會晤該大臣等務當悉心妥商一面進搗賊巢一面嚴防竄路並

將省垣防務妥籌布置以固根本肅州回逆勾結外來回匪攻陷屯莊紛擾關內外地方勢甚猖獗若不速籌埽蕩恐地方日被蹂躪出關大路必至梗阻左宗棠前奏已派徐占彪一軍前赴肅州著卽飭令趕緊拔隊前進將肅州一帶賊匪實力勦辦該軍既經西行所需餉銀著左宗棠源源接濟以勵軍心成祿現應出關著卽部署一切俟徐占彪抵肅後該提督卽行統率所部剋日起程此次規

復新疆各城關繫極重務當振刷精神竭力籌辦不得遷延貽誤穆圖善另片奏所部各營歷年防勦出力懇請保獎等語著照所請准其酌保數十人其防守鎮番出力官紳等著一併擇尤保奏成祿另片奏金塔地方擊退賊匪情形所有在事出力員弁團紳著准其擇尤酌保毋許冒濫又片奏護理安肅道實型辦事乖僻不能得力著卽行撤任並著左宗棠迅飭蔣凝學前赴本任以重職守如

蔣凝學一時不能前往卽著另委妥員署理劉銘傳前經賞假一月調理並諭令督率所部前赴肅州屯紮刻下肅州軍務喫重著該提督趕緊督隊啟行早日到防該處為出關要道得該軍扼紮其閒庶可紓朝廷西顧之憂也將此由六百里各諭令知之○又諭成祿奏武弁棄營逃走請飭查拏等語本年四月十八日回逆襲破布隆吉營署都司張大倫帶印遁走五月初一日復襲破橋灣營

官祁姓都司謝姓戰敗脫逃均不知下落亟應從嚴懲辦著左宗棠文麟景廉飭屬將張大倫及祁姓謝姓一體查拏務獲從重治罪以肅軍律前因俄人代復伊犁並有往攻烏魯木齊之說諭令景廉酌帶兵勇規復烏城現在如何部署卽著悉心籌辦迅速具奏肅州回匪現竄玉門等處著文麟酌撥官軍相機截剿毋令蔓延將此由六百里各諭令知之○又諭恩麟德泰奏勒辦西藏逆番現已

藏事一摺逆首班墊頓柱等糾合噶勒丹寺喇嘛僧眾恃險抗拒經恩麟等調兵進剿並會商達賴喇嘛催令漢番文武勒撫兼施生擒喇嘛阿丹及已革噶布倫策忍汪曲等二十五名並將班墊頓柱槍斃既據恩麟等奏稱質審各犯情詞相符所有阿丹策忍桑結及現獲從逆各犯均著照所擬分別辦理至扎克巴協擒策忍汪曲二犯並著恩麟等照例治罪在逃從逆人犯恩麟等當咨會達賴

喇嘛徹底清查務獲究辦毋任漏網投誠之喇嘛僧眾仍責成各該寺領袖喇嘛妥為管束不准再滋事端此次在事出力漢番文武僧俗官兵並傷亡兵練著恩麟等查明分別奏請獎卹將此由五百里各諭令知之○以西藏勒撫逆番出力擢遊擊薛占超以副將升用○予甘肅鎮番等處陣亡守備曾夢銳等祭葬世職加等○予甘肅上鹽池陣亡參將萬映全祭葬世職如總兵官例守備王永

周祭葬世職○壬辰以鑲黃旗蒙古副都統成明署正黃旗護軍統領鑲黃旗蒙古副都統尚宗瑞署正黃旗滿洲副都統○以甘肅省城歷年防守暨護運軍需出力賞都司趙琦等花翎把總董殿元等藍翎餘加銜升敘開復有差○旌表守正捐軀順天大城縣民蕭林妻馬氏直隸無極縣民袁永義女銀姐○癸巳諭軍機大臣等前因李鴻章奏永定河漫口工需不敷銀兩請由部籌撥當諭令

戶部速議具奏。茲據該部奏。遵撥山東地丁銀五萬兩。河南地丁銀五萬兩。因恐外撥之款緩不濟急。擬由部庫先行借撥銀十萬兩等語。永定河工程緊要。被水災民四出求食。亟宜以工代賑。著照所請。由部庫借撥銀十萬兩。卽著李鴻章迅卽派員赴部請領。解交工次。剋日勘辦興工。俾飢民就食有方。不至流離失所。該督務當嚴飭廳汛各員。將應行堵築疏濬各工認真辦理。以期經久。毋任偷

減工料。致貽後患。其部撥山東河南地丁銀各五萬兩。並著丁寶楨李鶴年嚴飭藩司趕緊籌措。務於十一月以前解還部庫。以供支放。仍將起程日期先行報部。毋稍延緩。將此由五百里各諭令知之。○又諭據馮子材奏。廣西署太平府知府兼理龍州同知徐延旭將回籍降人驅逐出關。致受撫之周仲汶等。仍附蘇惻漢等。復在越南滋擾。且縱勇通賊。搶掠夷人財物。虛開勇額。冒領餉糈。該員於

所屬境內。私設蘆卡船埠。每年所獲不下萬金。其幕友包攬土官販買人畜分肥。徐延旭亦明知故縱。並有濫保官親家丁等情事。據實嚴叅。請革拏治罪等語。徐延旭由縣令起家。疊膺保獎。前據蘇鳳文密保該員才兼文武。器識宏深。若如馮子材所奏。是該員貪劣不職。蘇鳳文薦舉非人。且於該員官親丁役捏功濫保。未能覺察。為所蒙蔽。亦應查明懲處。著劉長佑按照所叅各節。確切查明。據實

具奏。毋稍徇隱。原摺單均著鈔給閱看。所呈私蘆照票三十五張。著一併發給閱看。將此由五百里諭令知之。○甲午。諭軍機大臣等。前因有人奏。已革提督李世忠在皖豫交界葉家集修築堡寨。私藏礮械。招集亡命。諭令李鶴年英翰查奏。嗣據英翰奏稱。該革員回籍後。已移居商城縣境之鎖口。未聞別滋事端等語。李世忠移居商城後。現在能否安靜。著李鶴年英翰嚴密訪查。據實奏聞。馬德昭

所部勇丁滋事。步行逃勇。業經截殺殆盡。其搶有馬匹者。向東散逃。曾據蔣志章奏稱。逃往闡鄉盧氏等境。此項潰勇。現竄何處。李鶴年務當督飭派出官兵。會同地方官悉數搜捕。毋令再滋事端。將此各諭令知之。○又諭。張廷岳等奏庫防情形危急。請飭催援軍。並賊匪逼近庫倫各摺片。逆匪於八月十四十七等日。竄至翁音河哲林等處。擾及哲林臺迤東之圖爾里察布齊爾臺站。賽爾烏蘇西北臺路已斷。另股逆匪。於二十至二十二等日。分竄圖謝圖汗部落烏克爾哈什雅圖地方。距庫倫不過七八臺。有直撲庫倫之信。情形甚為危急。達爾濟一軍已馳抵烏勒幹呼秀地方。著張廷岳等就近檄令會合齊默特多爾濟伯克瓦齊爾等。迎頭截擊。力遏狂氛。古北口練軍。疊經催令出口。現在庫倫待援甚急。著李鴻章嚴飭賈吉齡統帶遄行。慶春一面迎提到口。即將駝馬等項妥為應付。催

令剋日進發。馳抵庫倫。毋任延緩。杜嘎爾帶兵剿賊。是其專責。數月以來。未見大挫逆鋒。且前據奏報賊數無多。而於大股分竄之賊。並不探明確實。設法截剿。實屬不知緩急。現在賊蹤竄近庫倫。情形萬緊。該副都統豈得徘徊於無賊之地。任令賊勢猖獗。著卽督帶各隊兼程前進。將翁音河一帶賊匪實力剿辦。迅掃逆氛。定安前飭侍衛承德統率馬隊。由濟斯洪果爾馳赴烏喇特旗。著懷遵前旨。卽飭此起官軍迅速取道前赴杜嘎爾營中合隊以資進剿。並著催令薩薩布趕緊前往督帶。不得藉病延宕。將此由六百里各諭令知之。○以詹事府少詹事何廷謙為詹事。○命閩浙總督英桂留京當差。以江蘇巡撫張之萬為閩浙總督。調山西巡撫何璟為江蘇巡撫。以戶部右侍郎鮑源深為山西巡撫。○命兵部右侍郎夏同善提督順天學政。○乙未。諭內閣榮毓等奏查明緊要工程。請派大

臣查勘一摺

泰陵

隆恩殿

寶城

慕陵

隆恩殿等處均有滲漏。職閃情形。著派榮祿前往。將應修各工。敬謹查勘具奏。另片奏。

泰陵

寶頂松樹。被風刮卧。著榮祿一併敬謹查勘。奏

明辦理。○諭軍機大臣等。慶春奏臺站官兵潰散。現飭趕緊設復一摺。察布察爾等臺官兵。聞警潰散。現在臺站不通。大同官兵。停滯中途。前敵各軍糧餉軍火。均虞梗阻。亟應趕緊設復。以利進行。著慶春嚴飭玉和車林多爾濟。迅將該臺官兵設法招集。並將未散各臺加意拊循。以保臺路。慶春現飭轍德恩撥隊馳往防剿。惟兵力過單。不足以資捍禦。著定安迅撥馬隊。馳赴察布察爾一帶。相機截

勒。迅埽逆氛。毋稍延緩。庫倫情形喫緊。昨諭杜嘎爾帶隊馳往剿辦。著懷遵前旨。星速拔隊兼程前進。將翁音河一帶賊匪實力剿除。不得遷延貽誤。致干重咎。古北口練軍。已於初六日由口起程。著慶春飭令迅速到防。以厚兵力。將此由五百里各諭令知之。○調禮部左侍郎溫葆深為戶部右侍郎。管錢法堂事。未到任前。仍以刑部左侍郎賀壽慈兼署。兵部左侍郎黃倬為禮部左侍郎。禮部右侍

郎胡瑞瀾為兵部左侍郎。以內閣學士徐桐為禮部右侍郎。吏部左侍郎胡家玉兼署兵部右侍郎。○丙申。遣官祭

歷代帝王廟。○諭內閣。萬青藜。梁肇煌奏。援案請撥銀米籌辦賑濟一摺。順天各屬。本年被災較重。現經萬青藜等派員查勘。籌議賑濟。加恩著照所請。除由截留南漕。並奉天粟米酌撥三萬石外。再添給賑米三萬石。賑銀四萬兩。即著戶部倉場侍郎分別撥發。由萬

青藜等妥為散放。未經查明被災各處。著該兼尹等趕緊查勘災分。毋稍延誤。其黃村禮賢鎮龐各莊盧溝橋定福莊清河等六處分設粥廠。並著督飭委員認真經理。著派于凌辰。王榕吉。惠林。色普哲。訥。龔自閔。彭祖賢。前往稽查彈壓。實力監放。務當實惠及民。餘著照所議辦理。○又諭都察院奏。江蘇職員陳文肅等遣抱以積弊病民。懇請革除等詞。赴該衙門呈訴。據稱高郵州知州徵收錢糧。於糧差地保外。添設現年名目。具限領催。凡貧疲抗欠之戶。均由現年包完。一有逾限短繳。卽稟提追比。甚至破產等語。地方官吏原期興利除弊。綏輯閭閻。若如所控各情。殊屬大干例禁。著兩江總督江蘇巡撫確切查明。如有前項弊端。卽行禁革。並將辦理不善之地。方官嚴叅懲處。毋稍徇庇。尋何璟等奏遵查高郵州現年名目。列於州志。並非始於今日。擬請永遠革除。現任知州姚德彰。曾禁破串

腳串之弊。不令現年代完。辦理尚無不合。應免置議。從之。○又諭都察院奏。福建職婦林戴氏。以伊子林文明被林應時等挾嫌捏控。委員凌定國索銀未遂。與臺灣道黎兆棠潛謀陷害各節。遣抱向該衙門呈訴等語。此案於上年五月間。經英桂奏稱查明。福建在籍副將林文明恃強霸產。結黨滋事等情。當將該副將拏獲正法。脅從人眾。分別辦理。何以該職婦復以挾嫌陷殺赴京呈控。是否林文明被殺冤枉。抑或該職婦砌詞捏控。亟應徹底查明。著閩浙總督福建巡撫確切詳查。奏明辦理。○諭軍機大臣等。有人奏。已革提督李世忠。聞有招集黨與。私買火藥情事。請飭查拏正法等語。前據英翰覆奏。李世忠革職回籍後。移居商城縣境之鎖口。尚未別滋事端。朝廷既已保全於前。該革員果能安分守法。自不必格外苛求。遽加誅戮。惟若輩獷悍性成。設因聚黨尋仇。或萌異志。則是自外生

成亦不能曲法以縱奸宄。著曾國藩英翰李鶴年嚴密查察。如該革員竟有叛逆形跡。卽著乘其尚未起事。迅速掩拏。散其黨與。一面請旨正法。以遏亂萌。英翰前摺內聲稱商城雖隸豫省。距皖中各處防兵甚近。如該革員漸形跋扈。兵力尚足制其死命等語。是英翰於此事辦法。確有把握。卽著責成該撫。勤加偵查。相機妥辦。商城係李鶴年轄境。尤屬責無旁貸。務當隨時戒備。不可稍涉大意。陳國

瑞籍隸湖北。曾否回里。李世忠有無前往尋釁之事。並著李瀚章郭柏蔭暗中查察。先事防維。毋稍疏忽。此係密查之件。該督撫等總宜慎固機密。不得稍事張惶。致有洩漏原摺均著鈔給閱看。將此由五百里各密諭知之。○又諭蘇廷魁奏黃水入湖竄運情形。喫重等語。黃水由王家橋地方竄入牛頭河。將芒生牯月壩衝開。南旺湖西北兩岸旱石橋趙家口等處均漫水入湖。土地廟元帝廟二牯

衝開。倒流入運。西岸天仙廟等處亦均漫水入運。東岸情形喫緊。趙王河水又灌入牛頭河北岸村莊。悉被淹沒。現在南旺湖水已深至七尺餘。倒漾入運。清濁併流。已成大患。亟應力籌堵禦。著蘇廷魁嚴飭運河道督率該廳營文武各員。趕緊集夫搶護西隄。毋再疏失。東隄為蜀湖屏蔽。關繫緊要。並著勸諭居民協力防守。不可稍涉鬆懈。其被水各村莊丁實積務當遴派妥員前往查勘。分別被災

輕重。妥為撫恤。毋令一夫失所。該撫身任地方。其應行協同修築疏濬之處。並著督飭各該地方官實力籌辦。以維河運全局。將此各諭令知之。○追予廣東各屬陣亡殉難紳民曹振清等暨兵勇婦女二千五百九十名口分別旌卹如例。○丁酉諭軍機大臣等。左宗棠穆圖善奏官軍進剿獲勝。奪據康家厓要隘一摺。左宗棠由靜甯會甯馳抵安定。察看地勢賊情。知安定為賊蹤出沒之衝途。而康

家厓又賊蹤必由之津要。督飭徐文秀、劉明燈、各軍分路進剿。疊有擒斬。乘勝合圍。將康家厓莊堡全行攻拔。殲斃賊匪二千數百名。陣斃賊首馬爾和、哈然麻。官軍卽分據康家新厓等處立營。以扼衝要。現值秋深水退之時。左宗崇務當飭令前敵各營。迅架浮橋。渡過洮河。節節攻剿。迅奏膚公。穆圖善與左宗崇籌商一切意見相同。現已由安定旋省。卽著將省城防守事宜妥為布置。將此由六百

里各諭令知之。○又諭前因袁保恆奏請飭催各省關欠解西征協餉。當經諭令曾國藩等查照戶部奏催銀數。迅速籌解。茲復據左宗崇以軍餉待用孔亟。各省新舊協餉延不照解。奏請飭催等語。該軍進規河湟。師行愈遠。勞費愈增。且又籌墊哈密軍餉。暨派撥隊伍進駐肅州。其克復地方應需賑糧等項。亦藉餉源支應。亟須速籌接濟。著各該督撫監督懍遵前旨。迅將原撥續撥西征月餉。按月

如數解清。其從前積欠。並著查明陸續籌解。儻再任意遲延。致誤戎機。必惟該督撫等是問。將此由六百里諭知曾國藩、瑞麟、文煜、李瀚章、吳棠、張之萬、英翰、丁寶楨、何璟、李鶴年、王凱泰、楊昌濬、郭柏蔭、劉崑並傳諭崇禮知之。○又諭文碩奏遵旨詳查程途道里及籌辦大概情形一摺。文碩現在詢悉西路情形。實有俄官帶兵三千收復伊犁之信。瑪納斯、昌吉縣皆有賊匪盤踞。民勇時往攻擊。文碩已檄令委員李昶等查明綏來、昌吉、迪化、各州縣境內實在賊情。有無俄人前赴該局。著俟委員等呈報後。隨時知照榮全。妥為籌辦。毋失機宜。由科布多前往伊犁及塔爾巴哈台路徑。文碩既已查明。是榮全馳赴伊犁。既屬有路可通。卽當剋期起程。不得藉詞延宕。將來轉運軍餉。能否取道西湖。著文碩悉心酌度。設法妥辦。其庫爾喀喇烏蘇、迪西。如何設站安臺。接護轉運。著榮全、奎昌多布沁

北木楚體察情形奏明辦理撥兵運糧各事宜。最關緊要並著會商文碩妥議具奏。另片奏。新到俄官尼克勒幅稱係帶兵駐紮備賊並非查界之人等語。中國徵兵欲往俄國爭界。究竟謠傳何自而起。俄人聲言調兵備邊。或係因此流言。心懷疑惑。著文碩檄令委員明魁等查看情形設法解釋。其請調遊擊施紹恆差委一節。已諭何璟飭令該員馳驛赴科交文碩差委矣。文碩當將該城防務妥籌

布置以期有備無患。將此由六百里各諭令知之。○又諭曾壁光周達武奏籌辦苗疆大概情形一摺。黔省清平等處尚未規復丹江凱里賊地林立。金幹幹等各酋亦尚未殲除。現在下游防勦各軍不足三萬。曾壁光所稱援黔一軍分半回楚。兵分力薄。進不能戰。退不能守。亦係實在情形。楚黔唇齒相依。而黔省下游軍務亦正在得手。所有此軍應如何布置始臻妥協之處。著劉崧等通籌全局會

商辦理。不得顧此失彼。稍分畛域。李包各逆現竄八寶山。復合古州等處賊眾蜂聚三腳。鄧有德已撥營赴援。即著曾壁光檄飭該提督迅速前進。併力兜勦。至廣西能否撥兵協助。仍著該撫隨時與劉長佑馮子材籌商。以期聯絡夾擊。迅掃賊氛。將此由六百里諭知劉崧曾壁光。並傳諭周達武知之。○貴州巡撫曾壁光奏請調湖北候補道周康祿赴提督周達武軍營差委。允之。○以貴州克復都

勻等城出力。賞總兵官曾敏行。劉元勳。道員岑毓祥。知府葉正固。知州余渭。巴圖魯名號。知府任偉堂。都司田興和等花翎。同知李世依等藍翎。餘加銜升敘有差。○以克復貴州麻哈州城。賞總兵官鄧千勝。鍾開蘭。黃馬褂。鄧千勝。副將黃正。周蓮生。周定。蔡羅芳林。熊復元。巴圖魯名號。守備趙祖德等花翎。縣丞顧玉成等藍翎。餘加銜升敘開復有差。予陣亡參將周文和等祭葬。世職加等。○己亥。

諭軍機大臣等。左宗棠穆圖善奏截剿竄匪獲勝一摺。本年八月間。副都統雙福等在平城堡大滂池等處截擊竄匪。均有斬擒涼州鎮總兵王仁和帶隊至永昌等縣地方。節節按剿。疊獲勝仗。著左宗棠穆圖善仍飭該將領等實力防剿。遇賊卽擊。毋稍疏懈。穆圖善另片奏。現由安定回省。並陳會商布置情形等語。康家厓攻克後。官軍擬進逼三甲集。而中隔洮河。難以徒涉。現飭各營搭造浮橋。安定迤西之車道嶺地方。經穆圖善派隊前往修墊車道。以通糧路。著飭令將橋道各工迅速辦竣。俾得剋日進取。穆圖善擬抽撥數營赴康家厓填紮。騰出左宗棠所部。得以壹意前進。卽著左宗棠穆圖善悉心會商。妥籌布置。左宗棠務當督飭官軍節節進剿。以期擒渠埽穴。早靖邊陲。將此由五百里各諭令知之。○蠲免山東濮州范縣被水地方民借牛具籽種銀。○庚子。諭軍機大臣等。豫師奏籌

防甘涼肅一帶情形等語。豫師接奉前旨。籌防要隘。所稱自平番至威遠各隘口。分投防堵。賊匪不能由此出竄。是已確有把握。卽著責成豫師妥為布置。不得徒託空言。至由巴燕戎格山後可達西甯之大通出扁渡口。卽係永昌山丹鎮番地界。賊如繞竄此路。則甘涼轄境均被騷擾。亟應加意嚴防。豫師已知照王仁和楊占鼉等力扼要隘。以備不虞。仍著會商瑞雲隨時防範。務臻周密。不可稍有疏懈。肅州收撫陝回潰叛東下。甘涼戒嚴。西甯匪徒亦四出竄擾。西路幾成賊藪。豫師未可以屢挫賊鋒。稍存大意。尤當相機戒備。以衛地方。左宗棠仍當懍遵前旨。撥兵助剿。並著穆圖善妥籌兼顧。將此由五百里各諭令知之。○派禮部左侍郎黃倬知武舉。以刑部尚書龐鍾璐為武會試正考官。戶部左侍郎潘祖蔭為副考官。○以甘肅克復高寨出力。賞遊擊黃金福花翎。從九品劉肯堂等藍翎。

餘加銜升敘有差。○辛丑。諭軍機大臣等。都興阿等奏。

福陵石隄被水衝淘。請旨辦理一摺。

福陵前圓脣泊岸石隄被渾河水流入引河衝淘。倒落十二丈餘尺。該處為

明堂以前保護圓脣泊岸之地。非障水石隄可比。前於乾隆四年暨咸豐八年兩次奏請停修。此次工程。自應援照成案暫緩辦理。惟

陵寢重地。關繫緊要。著都興阿奕慶隨時親詣

查勘。如有應行興修情形。即行據實奏聞。候旨辦理。並著將

福陵形勢及石隄被衝處所。詳細繪圖貼說呈覽。將此各諭令知之。○又諭傳諭廣東提督張曜。張曜奏遵辦甯夏沿邊及阿拉善旗防勒情形一摺。阿拉善旗西界紅柳園等處地方。時有馬賊竄入。搶奪牲畜。另股賊騎。復突竄胡莫克巴音諾爾根等處肆擾。雖經官軍迎剿。擒斬多名。惟該旗地方遼闊。平坦無險。

深恐防範難周。張曜已添派李葆琛帶隊前往。即著飭令該提督將竄入該旗匪股迅速剿捕淨盡。毋任滋蔓。至甯夏河西三縣投誠回眾。與漢民雜處。尤慮藉端尋釁。復滋事端。張曜業經酌擬章程。咨商左宗棠督飭地方官覈辦。所有撫綏彈壓各事宜。仍著該提督隨時相機辦理。毋稍大意。左宗棠現在進剿河州。難保該逆不伺竄北路。並著該提督先事豫防。隨時與定安等商布置。以期周密。自

甯夏沿邊迤北一帶。道路綫長。如平羅中衛靖遠平番古浪鎮番之大靖土門金塔等處。匪徒處處可以出邊滋擾。亟應設法嚴防。著該提督遴派明幹員弁。將甯夏至肅州沿邊一帶口隘。由近而遠。確切查明。何處賊匪可以出竄。何處可以扼要設防。繪圖貼說。詳細奏聞。○壬寅。

上奉

慈安皇太后

慈禧皇太后幸漱芳齋。侍午膳。○諭內閣醇郡王奏屬員被叅冤抑。請旨查究一摺。據稱前經派赴榮全軍營之左翼翼尉桂祥以刑部控案未結。赴該部朝房。向管理刑部事務大學士瑞常面遞稟詞。經刑部以該員自恃派往軍營。輒入朝房。遞呈。奏叅議處。該員在朝房遞呈。如果違例。何以瑞常率行接收。並令司員作速審理。旋又將桂祥奏請議處。前後自相矛盾等語。著瑞常明白回奏。其桂祥烏什哈等控訴一案。據稱右翼總兵達明阿貪穢無行。皆烏什哈為綫索。嗣烏什哈為桂祥列款稟揭。步軍統領存誠意存偏袒。始令右翼翼尉文秀等向桂祥說合。令遞退呈。繼又授意烏什哈反控桂祥。藉口於各執一詞。奏交刑部。該部已審有確供。瑞常連次駁令。再訊。是以永無了期等情。均應徹底根究。除醇郡王毋庸會審外。著派御前大臣軍機大臣提集全案。會同訊明具奏。○又諭。知武舉黃

倬奏武舉不候放門徑行出闈。請將疏防各員分別議處。監試御史安祥等奏特叅彈壓督門等官防範未周。請交部議處各摺片。本年武會試內場各該武舉於交卷後。不候放門。遽行扭鎖。陸續出闈。實屬不成事體。該彈壓副都統博崇武疏於防範。督門官亦不認直把守各門。均屬咎無可辭。博崇武著交部議處。其督門等官。並著該部查取職名。一併議處。尋議。博崇武照管轄不嚴。例罰俸一年。從之。○諭軍機大臣等。本日內閣代奏中書端木埰條陳。近來奉天盜風日熾。搶案疊見。率由諱盜成習。凡有報案。紳衿之家。尚止閤案不辦。鄉民則先令取保。遂同管押。破財失時。求卽日歸業。而不可得。命案相驗。有遲至數日數十日者。地方官並有論價委缺之說等語。奉省盜賊橫行。疊經諭令該將軍等認真緝捕。不啻三令五申。今該中書所奏各情。不但盜匪日多。且吏治亦廢弛已極。尚復成

何事體著都興阿瑞聯德椿破除積習將擇吏安民詰奸緝盜各事宜實心整頓務絕弊端至吉林吏治廢弛前經有人參奏馬賊根株亦未淨絕並著奕榕一體認真整飭以肅官方而清盜源原摺均著摘鈔給閱看將此各諭令知之○又諭本日內閣代奏中書端木塚條陳災區宜豫防盜風等語本年直隸地方被災較重雖經籌辦賑撫第恐莠民乘機生事為害閭閻不可不豫為防範該中書

所陳力行保甲操練營兵及舉辦團練各節尚為思患豫防起見著李鴻章酌量情形分別籌辦總期除莠安良消患未萌毋稍大意原摺著摘鈔給閱看將此諭令知之○又諭奎昌等奏達爾濟擊賊獲勝張廷岳等奏伯克瓦齊爾擊賊竄匪並圍攻賊股情形各摺片此次賊匪由翁音河一帶分股肆擾經達爾濟一軍於喀喇地方迎擊獲勝大股之賊直犯庫倫復經伯克瓦齊爾繞出賊前至阿

達哈楚克山額里音華地方截擊一日之內連獲三捷勦辦甚為奮勉現在畢留圖廟內盤踞之賊尚有七八百名亟應乘其窮蹙悉力圍攻聚而殲旃斷不可再令竄出致貽後患張廷岳現已添派官兵助勦並親往察看布置著即督飭官軍穩慎圖功毋稍疏失庫倫防務仍著張廷岳阿爾塔什達妥為籌辦不可稍涉大意此外賊匪尚有幾股現竄何處達爾濟現暫紮翁音河著奎昌等飭令探

明賊蹤認真截勦並著張廷岳等隨時知照該總管互相聯絡以資策應杜嘎爾現在行抵何處著即懍遵疊次諭旨馳赴翁音河一帶相機勦辦迅殄逆氛不得遷延觀望任賊滋蔓薩薩布所部馬隊仍著定安催令星速前進以資厚集將此由六百里各諭令知之○以庫倫勦賊疊獲大勝予總管達爾濟優敘賞四等台吉扎齊魯克齊伯克瓦齊爾以二等台吉世襲

地方官嚴拏務獲。僅該革員潛行來都。並著步軍統領衙門順天府五城一體查拏。解赴江蘇歸案審辦。王啟曾於收管奏案官犯。應如何小心看守。乃竟任令脫逃。實非尋常疏忽。可比。樊毓桂任令該革員潛匿內室。因而脫逃。難保無先事豫謀情弊。該二員僅予摘去頂帶。未免太輕。著改為革職。交該督撫嚴訊。有無同謀賄縱情弊。卽行據實叅辦。○諭軍機大臣等。慶春奏派員設復臺站。並催馬

隊保衛臺路一摺。察布察爾等臺阻滯。現經慶春派員馳赴賽爾烏蘇會同管站各員。并趕緊招集設復。並攜銀雇覓馳隻。飭催馬隊馳往保衛臺路。扼賊東竄。卽著慶春飭令色布什新泰等。趕將潰散之第三十八臺至第四十一臺迅速設復。一面催令大同官兵及烏科兩城餉銀等項依次起程陸續前進。毋任中途逗遛。其餘附近各臺亦當加意拊循。以臻妥善。轍德恩所撥馬隊慶春已催令馳

赴臺路。卽著嚴檄該參領於所撥隊伍到臺後。妥為布置。遇賊卽擊。以衛臺站。前因轍德恩兵力過單。諭令定安迅撥馬隊馳赴察布察爾一帶截剿。卽著各催該將軍趕緊派撥。將此由五百里諭令知之。○又諭劉銘傳奏病難速痊懇恩賞假回籍調理。並請派員接統淮軍各摺片。劉銘傳著賞假三箇月回籍調理。至請飭曹克忠來陝統帶馬步各隊本日已諭令李鴻章傳知該提督卽行前往矣。

甘省軍情緊要。曹克忠未經到陝。以前劉銘傳仍當妥籌布置。不得以接統有人遽行蒞卸。俟曹克忠到陝該提督再行回籍調理。以重防務。將此由四百里諭令知之。○又諭本日據劉銘傳奏病難速痊請假離營。並請飭曹克忠赴陝接統淮軍等語。銘軍營數較多。素尚整飭。曹克忠現在天津。前經李鴻章奏稱堪備將材之選。自必知之有素。若令該員接統淮軍。是否相宜。如果實能勝任。卽著迅

速奏明。派令赴陝。一面仍遵前旨。飭令來京。陛見。至劉銘傳所稱。由平涼至肅州。轉運較難。擬分配馬步二十營。交曹克忠統率赴甘。至蘭州。歸穆圖善會商調度。由甘涼相機前進。兵數較少。轉運稍易。以後該軍餉項。卽由李鴻章飭知後路。撥歸西征糧臺。搭解蘭州。再由穆圖善派隊護運。其餘隊伍。或就地遣裁。或撤回兩江。酌量遣留等語。所籌各節。是否合宜。並著李鴻章妥籌奏聞。將此諭令知

之。○兵部以武會試中額請。得旨。滿洲蒙古取中四名。漢軍取中三名。奉天取中一名。直隸取中十五名。陝西取中四名。廣東取中十三名。河南取中七名。山東取中九名。江蘇取中八名。安徽取中七名。山西取中六名。湖北取中四名。湖南取中四名。四川取中八名。廣西取中二名。福建取中五名。浙江取中七名。江西取中八名。雲南取中二名。貴州取中三名。○追予江西吉安陣亡知府陳宗元諡武

烈。於江蘇吳江縣原籍建立專祠。○追予江蘇各屬陣亡殉難紳民顧繼昌等暨婦女一千七百四名口。分別旌卹如例。○甲辰。諭軍機大臣等。都察院奏廣西職員覃成典遣抱覃保桂。以匪徒肆擾。籲懇勦辦等詞。赴該衙門呈訴。據稱永安藤縣交界之滿村地方。有匪首何先體。及何中孚。何七一。等聚黨滋擾。七年四月。攻奪蚌蛇村。經官兵往勦。該逆竄回老巢。外委庾應榮受賄通賊。逆燄復張。連攻村堡。肆行殺掠等語。此案前據馮子材。康國器。秦滿村等處股匪。已飭都司盧殿清等帶兵前往勦辦。當經諭令該提督等。卽飭盧殿清等。剋期攻勦。茲覽所控各情。匪徒擾害閭閻。亟應迅速勦滅。以靖地方。著劉長佑。馮子材。速飭派出各軍實力勦捕。務將此股匪徒。剋日殄滅。毋稍稽延。致令養癰成患。並著查明外委庾應榮有無通賊情事。從嚴懲辦。以儆官邪。將此由五百里各諭令知之。○又

諭張廷岳奏帶兵大員貽誤戎機請旨查辦。並帶兵回庫各摺片。畢留圖廟內盤踞之賊。不過八九百名。自應悉力圍攻。一鼓殄滅。乃總管達爾濟輕聽賊匪投誠之言。自懈防守。並阻止伯克瓦齊爾等軍無須巡邏。致令賊匪於九月初三日。乘夜向西奔逸。貽誤戎機。實堪痛恨。扎薩克齊默特多爾濟伯克瓦齊爾業經張廷岳摘去頂帶。以示懲儆。達爾濟輕妄縱賊。厥咎尤重。著先行摘去頂帶。交奎

昌榮全多布沁扎木楚杜嘎爾查明達爾濟此次貽誤情形。從嚴叅辦。以肅軍律。並著將被裏從逆之邢章解赴烏里雅蘇台城交奎昌等嚴訊賊匪竄逸情形。據實具奏。現在賊匪竄向何處。張廷岳當飭伯克瓦齊爾等探蹤跟追。痛加剿洗。杜嘎爾亦當督飭各軍確偵賊蹤。會合夾擊。並著嚴飭達爾濟實力兜剿。毋令得容喘息。餘燼復燃。張廷岳恐賊分股直犯庫倫。現已帶兵回庫。卽著將防守事

宜妥籌辦理。毋稍疏忽。賊股西竄。趨向靡定。著定安嚴飭各路防軍。遇賊卽擊。毋形疏懈。其薩薩布所部馬隊。仍著催令星速前進。以資厚集。將此由五百里各諭令知之。○又諭。劉嶽昭岑毓英奏通籌全局。分路進剿一摺。滇省東南一帶。未拔賊巢。均距省城甚近。自應先行剿除。以去肘腋之患。大東溝尚未克復。馬如龍受傷未痊。深慮館驛賊匪出援。致成滋蔓。溲令田心及日者鄉進剿之師。亦未

得手。岑毓英現已帶兵起程。親赴迤南督剿。可謂勇於任事。卽著激勵各營。分投掃蕩。迅拔各巢。肅清東南。一路臨安府屬既有賊巢。數處梁士美僅派隊駐紮。通海曲江一帶。安坐府城。並不遵檄剿賊。漸形跋扈。岑毓英當設法駕馭。隨時約束。毋任如前驕恣。省城巡防事宜。暨接濟各路餉需軍火。著劉嶽昭悉心籌畫。不得稍有貽誤。另片奏攻克永昌府城等語。永昌現既攻克。該處善後及防守事

務該督撫卽飭在事各員妥為布置乘勝進攻永平將未復各城次第收復為直搗大理之計岑毓英現赴迤南所有迤西軍務仍著妥籌兼顧將此由六百里各諭令知之○又諭總理各國事務衙門奏奧斯馬加國換約屆期請派員互換一摺奧斯馬加國前立條約聲明一年更換現據該國使臣嘉理治呈遞照會內稱卽日赴滬候辦換約等語著派恩錫將同治八年與奧國所立條約妥為互換其條約各本俟李鴻章派員齎送至江蘇時卽著恩錫祇領屆期前往上海辦理恩錫於換約一事向未經手著曾國藩添派熟悉洋務大員幫同辦理以期妥協本日諭旨一道一併發往如該使索看憑據卽著恩錫另行恭錄給與閱看俟換約事畢此旨仍繳還軍機處備查將此由五百里諭知曾國藩並傳諭恩錫知之○河東河道總督蘇廷魁奏報秋汛安瀾命詣

河神廟祀謝賞道員成孚花翎○以雲南克復麗江等城出力予總兵官楊玉科以提督簡放賞總兵官張松林一品封典總兵官劉令集副將萬如雲呂鎮南參將楊謙遊擊蘇斯洋將宗漢劉重慶都司楊桐知府鍾念祖巴圖魯名號參將徐聯魁知州程梁生等花翎千總吳志遠等藍翎餘加銜升敘有差○句到新疆廣東廣西四川福建情實罪犯停決新疆紋犯一人廣東斬犯一人四川斬犯四人紋犯二人餘四十九人予句○賑山東荷澤曹單定陶城武鉅野鄆城濟甯金鄉嘉祥魚臺汶上東平十三州縣被水災民○乙巳諭軍機大臣等李鴻章奏練軍分起出口日期請飭察哈爾臺站防護弁兵互相援應並由庫倫多派駝隻迎引一摺古北口頭起官兵已於本月初六日出口其餘各哨每起百名聞日前進賈吉齡亦親率中營於十二日赴口陸續進發卽著李鴻章飭令該都司

督率各起官兵迅速趨程接續前進。毋稍遲誤。李鴻章摺內現有探聞馬賊三四千餘由山後烏拉齊向東北分股竄擾圖謝圖汗地面距賽爾烏蘇較近等情。該軍前赴庫倫必由賽爾烏蘇經過。深恐附近有賊突至。或致疏失。著慶春檄飭沿途防護弁兵。於該軍經過時互相援應。並著張廷岳阿爾塔什達多派驢壯駝隻。遴委得力員弁帶赴二三十臺處所沿站迎提導引。以免遲滯。此軍到庫後

應如何分撥防剿。張廷岳等務當妥為布置。力保要區。將此由五百里各諭令知之。又諭定安奏遵撥馬隊前赴杜嘎爾軍營。並解送烏科兩城軍餉等項。應需經費及各營應賞皮衣。均請飭部撥解銀兩各摺片。薩薩布患病未能速痊。既據定安奏稱並無捏飾。著准其回旗調理。其所部吉林黑龍江馬隊定安已飭侍衛永德帶隊先發。並令副都統成山一軍由茂明安旗就近馳赴杜嘎爾軍營。

卽著該將軍檄飭永德成山等星速前進。合隊以資厚集。毋稍稽延。口外氣候早寒。現屆秋深朔風凜冽。所有沿邊一帶駐紮各營兵勇寒苦情形。實深廛繫。著准其援照上年成案。每兵勇一名賞給皮衣銀一兩五錢。以示體恤。應需銀四萬一千餘兩。卽著何璟於應解京餉內如數酌撥。派員解赴歸綏糧臺。俾得及時放給。至烏科兩城軍餉軍火及新疆各處餉銀。待用孔亟。定安所稱運送經費無

款可籌。亦係實在情形。著准其於山西應解京餉內先撥銀一萬兩。卽著何璟照數籌撥。就近解赴綏遠。以濟急需。將此由五百里各諭令知之。○旌表守正捐軀直隸衡水縣民曹立敬女廷姐。○丙午諭軍機大臣等。神機營王大臣奏請整飭邊外臺站一摺。前因庫倫情形喫緊。察布察爾等臺官兵潰散。深慮官兵停滯中途。糧餉軍火多致梗阻。疊諭慶春趕緊設復。又以榮全馳赴伊犁。於庫爾喀

喇烏蘇迤西如何設站安臺接護轉運諭令榮全等體察辦理茲據該王大臣奏稱邊外各路臺站現擬分段責成張家口外頭臺至八臺專交察哈爾都統自九臺以北至烏里雅蘇台科布多各臺分交各該盟長自賽爾烏蘇至庫倫自濟斯洪果爾至歸化城各臺亦交各該盟長按照定制何臺應歸何旗管轄者仍令該王公等自行經理每臺連額設之數以駱駝一百隻馬五十匹為定數戈壁地內不能用馬之處即備駱駝一百五十隻如不敷用應由幫臺辦事官員添雇所需添雇價銀准其報領在臺供差官兵等應分別給予口分仍由該將軍等稽查遇有認真辦理或貽誤不齊等情隨時奏請勸懲至進取伊犁應由何路前往亟應設法安臺官兵過境時除照例支給外並令蒙古旗戶多備牛羊柴草按照時價賣給官兵以資接濟儻該官兵勒索陵虐准其稟報該管之將軍等參

辦哈爾尼敦等處勾撥官兵分紮聯絡等語著理藩院定安慶春奎昌榮全多布沁扎木楚文碩張廷岳阿爾塔什達知之○丁未諭內閣鑲黃旗滿洲奏原任杭州將軍瑞昌次子續承查有下落現由湖北巡撫派員護送到旗一摺續承著該旗帶領引見○諭軍機大臣等李

瀚章奏遵議湖南撤回勇丁。借補行伍。無庸另定章程一摺。據稱該督自調任楚督後。曾仿照前辦湖南章程。將湖北省出師凱撤投標員弁。挑選精壯。練習弓馬。卽以技藝之優劣。定署補之先後。並酌給練習弓箭銀錢。以資生計。所有撤勇借補行伍。辦理有年。似無庸另議章程等語。兩湖凱撤員弁。既據奏稱。挑選補額。定有章程。卽著李瀚章劉峴按照舊章辦理。惟兩湖地方。年來匪徒屢次滋事。

該督撫務當認真防範。督飭各該州縣將團練保甲等事實力整頓。遇有不法之徒。隨時密拏嚴辦。以期消患未萌。將此各諭令知之。○又諭蘇廷魁奏趕堵侯家林缺口。並改築官隄一摺。據稱自蘭工決口後。黃水穿運而行。本年八月初間。黃水異漲。復由侯家林將民埝衝成缺口。灌運入湖。若不亟籌堵築。恐來年大汛盛漲。沙俱下。河湖全塞。南路運道可虞。擬趁水落歸槽。趕將侯家林缺口堵

合沮河一帶民埝一律改築。官隄現已派員赴工。先於口門盤做裏頭。免再刷寬。並將堵口築隄。樽節確估。奏請籌款興修等語。東南運道關繫緊要。自應亟籌堵築。著喬松年。丁寶楨。按照所奏各節。詳加查勘。會商籌辦。應需款項若干。俟奏到後。再行籌撥。原摺均著鈔給閱看。將此各諭令知之。○又諭劉長佑。馮子材。奏官軍圍剿竄匪。殲除首逆。並拏獲內地要犯一摺。越南匪首曾亞日。於王大股

匪剿滅後。復糾黨竄踞上林社夷村。經馮子材飭令劉玉成等帶隊圍剿。立將賊首曾亞日及匪目黃汶廣等誘擒正法。股匪悉數殲除。惟賴安粘山東枚等處。踞匪尚多。卽著劉長佑。馮子材。檄飭副將陳得貴。督率所部勇丁。扼紮北芹。迅速會同上林社各軍。分道攻剿。一面咨會越南官兵。層層堵截。務乘賊匪勢孤之時。迅將東路逆氛埽蕩。卽行轉戰而西。廓清夷境。毋稍稽延。內匪范三大。陳安瀛。

籍隸欽州暗向水東左結之賊由賊中攜帶銀兩潛回原籍那天墟等處並在西省上思州邊境招集無賴帶赴水東現經馮子材派弁前往欽州大寺汎地面會同該署把總黃紹功將陳安瀟拏獲正法惟范三大聞風兔脫著瑞麟劉長佑馮子材嚴飭各該地方文武會同派出員弁一體嚴密查拏務獲毋任漏網將此由五百里各諭令知之○又諭杜嘎爾奏追勦賊匪情形一摺據稱達爾濟於

八月十八等日在翁音河等處擊賊獲勝與奎昌等前奏大略相同惟畢留圖廟內盤踞之賊已據張廷岳等續報於九月初三日乘夜向西竄逸此次杜嘎爾摺內所稱探聞賊匪擾及哈沙圖等站旋於九月初二初四等日向西避竄是否即係畢留圖廟竄出賊股抑係另股之賊著張廷岳查明具奏達爾濟輕聽賊匪投誠之言縱令已困之賊復行他竄貽誤戎機厥咎甚重著奎昌多布沁扎木

楚杜嘎爾懍遵前旨查明實在情形從嚴叅辦毋稍諱飾杜嘎爾接奉豐次諭旨自己趨程前進著即督飭所部探明賊蹤實力勦辦毋任日久蔓延張廷岳亦當督飭伯克瓦齊爾等會合兜勦並將庫倫防務嚴密布置以杜窺伺昨據定安奏薩薩布患病未痊請假回旗其所部馬隊已飭侍衛永德記名副都統成山統帶前進馳赴杜嘎爾軍營合隊該副都統得此一軍兵力較厚本日據榮全奏

已於九月初四日起程前赴伊犁隨帶官兵僅止百餘名所有該署將軍前請由杜嘎爾軍營抽調吉林黑龍江官兵各五百名令吉爾洪額訥蘇肯統帶前進著杜嘎爾遵照前旨迅速派撥剋日前往毋稍延緩將此由六百里各諭令知之○又諭奎昌等奏酌帶官兵起程前赴伊犁一摺俄人襲取伊犁已四閱月亟須大員前往經理且轉瞬大雪封山行途阻滯自應迅速前進以赴事機榮全因

所調官兵未集。現於烏里雅蘇台防守各營內酌量抽調百餘名。定於九月初四日起程。該署將軍膺茲鉅任。遠道遙行。所有一切機宜。卽著穩慎籌辦。隨時具奏。其後路糧運各事宜。著奎昌多布沁扎木楚文碩妥籌接濟。俾榮全得以壹意前進。不至瞻前顧後。前諭李鴻章。尙環飭令口北道歸綏道各先辦糧十萬斤。由臺站解赴烏城。著嚴飭各該道趕緊如數籌解。並著定安慶春督催趲運。毋任

遲誤。將此由六百里各諭令知之。○以廣西欽州擒獲逆匪。予署把總黃紹功以千總用。並賞藍翎。○戊申。准山東在籍前任浙江衢州府同知陳述經重與恩榮宴。賞四品卿銜。○己酉。諭內閣。永存舒恆奏請飭直隸各州縣買交兵米一摺。承德府應交兵米。向由各該州縣採運備放。現在存倉米石無多。除同治八年分秋冬季欠交兵米如數交齊外。其同治九年採買兵米。尚未交倉。兵食攸關。豈

容延宕。著直隸總督嚴飭該府州縣。迅速買運交倉。以供支放。前代理平泉州知州金齡欠交咸豐十年兵米一千十二石零。仍著嚴催交齊。毋許再延。○庚戌。諭內閣。榮祿奏查勘專案工程。請派員承修一摺。所有

泰陵
隆恩殿

寶城二項工程。著派本年承修另案工程之大臣延煦。桑春榮敬謹承修。另片奏續查出

和裕皇貴妃園寢內

恭順皇貴妃寶頂應修工程。著延煦等一併敬謹修理。○諭軍機大臣等。李鴻章奏遵旨籌派曹克忠赴陝接統銘軍各摺片。曹克忠接統銘軍。旣據李鴻章奏稱尚無不相宜之處。卽著傳諭該提督迅速來京。陛見。所請派令辦理肅州一帶軍務。准其專摺奏報之處。著俟曹克忠陛見後再降諭旨。原摺片均著留中。將此由四百里諭令知之。○又諭德英

托克湍奏遵旨挑備官兵候調並籌撥軍械一摺據稱黑龍江備調馬隊官兵一千名業經挑齊聽候調遣惟該省額設軍械現存無多此次備調官兵應需軍械請飭部撥給抑或轉令該軍營籌給等語著德英托克湍查明該官兵應需何項軍械每項應需若干詳細開單具奏再行飭部籌撥其備調兵丁並著撥飭派出各員認真操練以資得力將此由四百里各諭令知之○又諭杜嘎爾奏遵

旨商調伊犁馬隊請撥餉銀數萬兩各摺片榮全已於九月初四日起程前赴伊犁隨帶官兵僅百餘名甚形單薄昨諭杜嘎爾迅速撥兵前往現在薩薩布所部馬隊已飭承德成山帶赴杜嘎爾營中合隊該副都統有此一軍已足補榮全指調之數亟應速籌派撥著杜嘎爾懍遵疊次諭旨抽調吉林黑龍江官兵各五百名令吉爾洪額訥蘇肯統帶赴伊犁榮全業經起程此項官兵自應剋日前進

不必往返咨商致稽時日杜嘎爾前由烏城軍餉內提銀九萬兩發給官兵口糧現僅存銀一萬數千兩九月以後不敷支放據該副都統奏稱擬於張家口所存應解烏城餉銀內暫撥數萬兩交口北道將該副都統管帶之吉林二三四起黑龍江頭三四起察哈爾五起及訥蘇肯福珠哩貢果爾等兵丁應需餉銀統由該道按月放給並先籌兩三箇月餉銀解赴該營等語張家口如尚有應解烏

城餉銀卽著李鴻章慶春查明撥給銀數萬兩照該副都統所籌辦理如張家口已無烏城存餉仍著杜嘎爾咨商金順奎昌多布沁扎木楚由烏城解到餉銀內籌撥以資接濟至該副都統請將烏城征兵糧餉責成口北道辦理之處著李鴻章慶春斟酌情形奏明辦理將此由六百里各諭令知之○旬到奉天陝西湖廣情實罪犯停決奉天斬犯一人陝西斬犯一人湖廣絞犯一人餘

五十二人予句○辛亥旬到浙江江西安徽江蘇情實罪犯停決江蘇斬犯一人餘四十九人予句○豁免湖南晃州廳被擾地方上年民欠錢糧○壬子引見原任杭州將軍瑞昌子閒散續承得旨著以六部主事用○賞五城貧民棉衣銀○癸丑諭軍機大臣等李鶴年奏遵查李世忠在固始境老樓地方居住築成一寨附近又築四寨寨內私藏槍礮前數年曾有招留張總愚之叔張特賸任柱之弟任汶及息縣巨捻張昆情事其鑄造小錢擅殺平民各節亦皆確實請飭英翰妥速辦理以申國法等語國家仁育義正一秉大公李世忠既已保全於前此時自不能追究既往遽予刑誅如現在實有招納叛黨謀為不軌實據即應密速掩捕明正其罪以遏亂萌○曾國藩向有遠見於李世忠平日行為知之最稔該革員現在舉動想該督亦必隨時查察豫為之防此事究應如何辦法著斟酌

機宜密速覆奏張特賸任汶張昆等是否尚在李世忠寨中抑已逃匿他處即著英翰就近密查一面知照曾國藩一面據實奏聞此節為招集亡命確據必應切實查明以定罪狀英翰於此事亦能隨處留心並著與曾國藩密慎籌商固不可有心文致亦不可稍涉疏虞此中操縱機宜該督撫等諒必能籌畫盡善也原摺均著鈔給閱看將此由四百里各密諭知之○以大理寺少卿龔自閎為光

祿寺卿○甲寅

孝慈高皇后忌辰遣官祭

福陵○旌表守正捐軀山東郟城縣民主盛恩妻趙氏○乙卯諭內閣御史恆忠奏各旗拆毀官房請飭查辦一摺八旗設立官房例應隨時整理茲據該御史奏稱東直門內西北一帶官房自咸豐年間起陸續拆毀千餘間之多該管各官何以毫無覺察鑲黃一旗如此恐他旗亦所不免著八旗都統按照底冊

逐一查明。原有若干間。現存若干間。據實覆奏。並將失察之該管各官一併查叅。經此次清查後。務須督飭該管官實力經理。儘再有拆毀。應如何責令該管官分成賠修之處。並著八旗都統會同步軍統領衙門妥議章程具奏。○又諭劉崐奏拏獲滋事首要各犯。訊明正法一摺。湖南益陽等處滋事首逆劉道美。何春台二犯。經劉崐飭屬嚴拏。劉道美潛匿益陽林子口白馬寺內。已革守備申大發帶領團勇馳赴該處。立將劉道美擒獲。其竄犯龍陽逆匪劉子訓。王友潰亦經該撫飭屬緝獲。均已訊明正法。何春台一犯仍著嚴緝務獲。毋任漏網。拏獲逆首之已革藍翎都司銜龍陽城守營守備申大發著開復守備原官。並藍翎都司原銜以昭激勸。已革益陽縣知縣黃應誥辦理既多未善。被叅後仍復不知愧奮。著不准留營。永不敘用。○諭軍機大臣等。前因馮子材奏廣西署太平府知府徐

延旭貪劣不職各節。當經諭令劉長佑查奏。茲復據康國器奏徐延旭統帶安定等六營辦理邊徼防勦。當越南匪徒披猖。該員所部勇丁竟敢缺額。請旨革職懲處等語。著劉長佑卽將康國器所叅徐延旭勇丁缺額情形一併確切查明。據實具奏。毋稍徇隱。原摺著鈔給閱看。將此諭令知之。尋奏徐延旭歷任要地防勦有功。遵查被叅各款均無實據。得旨徐延旭既查無營私舞弊等情。著無庸議。該撫仍當隨時察看。是否堪勝知府之任。毋稍徇隱。○以前任福州副都統富勒渾泰署鑲黃旗漢軍副都統。○上以孟冬時享太廟。自是日始齋戒三日。○丙辰。孝敬憲皇后忌辰。遣官祭泰陵。○諭內閣李鴻章奏道員試署期滿循例懇請實授一摺。直隸津海關道員缺卽著陳欽補授。仍賞加按察使銜。○又諭李鴻章奏

特參玩視捕務暨聲名平常之知縣請分別摘頂革職一摺。直隸署東明縣知縣候補知州王崑厓。於該縣城內職員陳玉鋪戶被劫一案。並不趕緊查拏。猶以事主呈報不實。飾詞搪稟。致賊乘閒遠颺。實屬玩視捕務。王崑厓著摘去頂帶。暫行革職。勒限留緝。儻限滿無獲。卽行從嚴參辦。運同銜候補直隸州知州南和縣知縣裴福德。聲名平常。雖查無加派賣票實蹟。惟信用匪人。致招物議。實屬咎

有應得。裴福德著卽行革職。以肅官方。○又諭瑞麟奏查辦潮州府屬地方積匪捕獲要犯。請將出力總兵獎勵一摺。廣東潮州府屬潮陽等縣匪徒。搶擄械鬪。積案甚多。經該督派委總兵方耀道員沈映鈴等督帶兵勇。分投查辦。先後將惠來等處著名匪犯陳獨目為。謝凍品。謝奉漳。謝崑礪。鄭錫彤。及陳老仔汰等緝獲正法。該郡賴以安謐。辦理尚屬奮勉。署潮州鎮總兵南韶連鎮總兵方耀著交

軍機處記名。遇有提督缺出題奏。其餘出力文武員弁官紳。並著由該督覈實保獎。毋許冒濫。其失察械鬪之各地方官。著加恩免其置議。仍著瑞麟督飭各屬。將善後事宜妥為籌辦。並嚴飭派出文武各員。認真按捕餘匪。毋任漏網。以靖閭閻。○諭軍機大臣等。成祿奏肅逆東竄。官軍堵截獲勝。並該逆分股出關情形一摺。肅回東竄高臺撫彝一帶。經成祿派兵堵截。斃賊百餘人。復密飭兵勇遏其

歸路。又斃賊數十名。該逆遁歸肅巢。分股出關。一向西竄往安敦玉等處。一由北套竄去。成祿現咨綏遠城將軍。檄飭各臺豫為堵禦。一面飛飭關外三營相機截剿。卽著該提督嚴飭各軍。勤加偵探。遇賊卽擊。保衛民生。毋稍疏懈。逆股旣竄向北套。深慮擾及草地。復肆蔓延。著定安檄飭在防兵勇實力堵遏。並將阿拉善旗各臺站妥籌防範。毋稍疏虞。張曜現駐甯夏。並著分撥隊伍。確探賊蹤。攔頭

截擊盡殄逆氛。左宗棠仍催徐占彪迅赴肅州。將該處賊巢一律掃蕩淨絕根株。庶關外地方不至再遭蹂躪於大局實有裨益。將此由六百里諭知左宗棠。定安成祿並傳諭張曜知之。○又諭文麟景廉伊勒屯奏探聞怕夏已赴南路。烏魯木齊回情反覆。文麟景廉奏肅回出關滋擾情形各一摺。烏魯木齊逆首馬仲如果真心向化。何以於文麟等發去諭紙後久無回信。及孔才行抵昌吉仍復率黨撲攻。其為詭詞乞撫。另蓄詭謀已無疑義。文麟等務當督率各軍妥籌防剿。不得再行議撫。致為該逆所給。前因俄人代復伊犁並有進規烏魯木齊之說。諭令景廉酌帶兵勇規復烏魯木齊。免落他人後著。並令左宗棠由西征糧臺內先行借撥銀十萬兩。迅解景廉軍營。俾應急需。現在該城回情反覆。亟應迅速進剿。以赴事機。著景廉懍遵前旨。剋日帶兵起程。節節進取。將烏魯木齊及早收復。

庶聲威較壯鄰國不至生心於大局實有裨益。怕夏不在吐魯番候信遽赴南路是其歸順之說殊不足信。文麟等務當相機妥辦。不可墮其計中。如果真心投順交出城池。屆時再由該大臣等奏明辦理。陝回大股勾結肅逆出關滋擾攻陷安西協屬之布隆吉爾橋灣各堡並攻撲安西敦煌城池雖經兵勇擊退而賊股麇集來去靡常難保不時出肆擾左宗棠前奏派徐占彪十二營前赴肅州諒早拔隊西進著飭該提督分撥隊伍相機協剿毋任該逆再行出關肆擾並將肅州防剿事宜妥為籌辦。徐占彪到肅州後成祿著即懍遵前旨整隊前行與景廉會合規取烏魯木齊毋稍濡滯將此由六百里各諭令知之。○又諭前因杜嘎爾奏官兵口糧九月以後不敷支放請於張家口所存應解烏城餉銀內暫撥數萬兩並先籌兩三箇月餉銀解赴該營當諭李鴻章慶春查明撥給如張家口

已無烏城存餉。卽由杜嘎爾咨商金順奎昌等由烏城解到餉銀內籌撥。茲據慶春奏。張家口前存部撥烏城軍餉十萬兩。業已埽數提解出口。庫存並無烏城餉項。擬由杜嘎爾咨商金順奎昌等由烏城解到餉銀內籌撥。或由部撥榮全軍餉銀十萬兩內截留數萬等語。榮全帶兵前赴伊犁。規復各城。道路遼遠。此項餉需。關繫至為緊要。杜嘎爾督隊勦賊。需餉甚迫。張家口既無存項。仍著杜嘎爾

會商金順奎昌等由烏城解到餉銀內。如數籌撥。如烏城餉項一時短絀。亦無可提。著慶春於部撥榮全軍餉內酌量撥給。以應急需。仍由金順奎昌等設法補解。榮全軍營以清款項。該將軍等務當通籌全局。審度緩急。會商辦理。不得稍分畛域。將此由六百里各諭令知之。○兩廣總督瑞麟奏。廣東現存釐廠礙難裁撤。並嚴飭水陸官弁。整頓緝捕。以清盜源。得旨。現留各釐卡。既據奏明。不能裁撤。

該督務須慎選妥員。力減浮費。以杜弊端。至盜賊肆行。實為地方之害。該督亟應遴派明幹牧令。實力整頓。毋得一奏塞責。逸犯曾大鵝幅等。仍著檄飭戴朝佐等嚴拏務獲。淨絕根株。○以前任閩浙總督英桂為內大臣。○旌表守正捐軀直隸深州民高山妻种氏。山東陵縣民周永興妻胡氏。○丁巳

上以孟冬時享

太廟前期親詣行禮。○旌表守正捐軀河南新

鄭縣民陳文妻李氏。○越南國使臣阮有立等三人於午門外瞻覲。

大清穆宗繼天開運受中居正保大定功聖智
誠孝信敏恭寬毅皇帝實錄卷之三百二十

中書本

三

大清穆宗繼天開運受中居正保大定功聖智
誠孝信敏恭寬毅皇帝實錄卷之三百二十一

監修穆宗實錄臣等謹將穆宗實錄卷之三百二十一

穆宗實錄卷之三百二十一

穆宗實錄卷之三百二十一

穆宗實錄卷之三百二十一

穆宗實錄卷之三百二十一

校修

同治十年辛未冬十月戊午朔享

太廟遣怡親王載敦恭代行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵。

裕陵。

昌陵。

昌西陵。

慕陵。

慕東陵。

定陵。○遣官祭

端慧皇太子園寢。○

上詣鍾粹宮問

慈安皇太后安。長春宮問

慈禧皇太后安。至丙戌皆如之。○奉

慈安皇太后

慈禧皇太后幸漱芳齋。侍午膳。○頒同治十一

年時憲書。○試中式武舉王可相等一百二

十人於太和殿前。○諭軍機大臣等。前據劉

銘傳奏稱病難速痊。未能前赴肅州。已有旨

賞假三箇月。准其回籍調理。前任甘肅提督

曹克忠曾在甘省勦賊。諳悉戎機。著卽前赴

陝西接統劉銘傳所部淮軍。迅赴甘肅肅州

一帶。辦理軍務。准其專摺奏事。該提督膺茲

重任。必能為國出力。迅奏膚功。劉銘傳著俟

曹克忠到陝接統所部後。再行回籍。所部向

稱勁旅。現歸曹克忠接統。兵將恐不相習。曹

克忠抵陝後。著劉銘傳與之會商。務將一切

駕馭機宜。籌畫妥協。一面將辦理情形會同

具奏。甘涼肅一帶。賊股充斥。曹克忠進紮肅

州。須由甘涼取道前進。正可節節掃蕩。盡殄

妖氛。後路轉運糧餉各事宜。均關緊要。著左

宗棠。穆圖善。隨時照料。妥籌兼顧。該軍月餉

著李鴻章。迅卽覈定數目。飭知後路糧臺。按

月撥交湖北轉運局。搭解西征糧臺。轉解。毋

令缺乏。並著袁保恆。妥為經理。隨時督飭運

解。不得稍有遲誤。其餘淮軍隊伍。卽由劉銘

傳帶回徐州駐紮。著曾國藩。督飭認真操練。

以備緩急。將此傳諭曹克忠。並由四百里諭

知曾國藩。李鴻章。左宗棠。穆圖善。劉銘傳。並

傳諭袁保恆知之。○又諭張廷岳等奏擒獲從逆人犯並賊匪竄擾情形一摺。據獲賊供稱該匪在畢留圖廟被官軍合圍。賊勢已極窮蹙。乃達爾濟輕率招降。並自撤營壘。縱令賊匪遠颺。實屬罪無可逭。達爾濟前已降旨摘去頂帶。著卽革職拏問。交奎昌多布沁扎木楚。杜嘎爾。將該革員貽誤情形。嚴行審訊。定擬具奏。該犯韓會林等三名。著張廷岳。阿爾塔什達。解赴烏里雅蘇台。交該署將軍等

歸案審訊。並將該犯等原供一併鈔送奎昌等覈辦。達爾濟所部官兵。卽著杜嘎爾另派妥員管帶。以資得力。阿畢爾米特遊牧邊界及巴勒達爾多爾濟遊牧邊界。均有賊匪竄擾。現在該逆已竄過固爾板賽堪地方。齊默特多爾濟。伯克瓦齊爾業已追勒無及。逆蹤飄忽靡常。難保不復圖回竄。著張廷岳。阿爾塔什達。督飭各軍妥籌防勦。杜嘎爾務當偵賊所向。實力埽蕩。迅殄逆氛。將此由六百里

各諭令知之。○又諭張廷岳等奏臺站阻滯請飭設法疏通一摺。據稱直隸宣化到防官兵應需八九兩月軍糧。散在喀喇沁各臺。未能運解到庫。情形萬緊。現在古北口練軍陸續出口。尤須臺站疏通。方能剋期進發。卽著慶春飭令沿途管臺各員。趕緊設法雇覓駝隻。務將喀喇沁各臺壅滯糧石。早日運解到庫。毋稍遲延。張廷岳。阿爾塔什達。一面派員迎提。以期迅速。李鴻章。慶春。仍飭口北道採

辦軍糧。源源接濟。俾免缺乏。喀爾喀孳生駝隻。現在庫倫迤東迤南十餘臺牧放。著奎昌。多布沁扎木楚。飭令桑噶西利旺楚克察克都爾蘇隴務當移緩就急。各調撥一千隻。無論能否足數。飭委妥員管解。前往喀喇沁臺站。迎引古北口官兵應用。李鴻章。慶春。卽檄令賈吉齡。途次如遇此項駝隻。撥令官兵乘騎迅速前進。毋再藉詞逗遛。前據神機營王大臣奏整飭邊外臺站。擬分段責成經理。諭

令定安等覈議舉辦著定安慶春奎昌多布沁札木楚張廷岳阿爾塔什達懍遵九月十九日寄諭趕緊覈議奏明舉辦俾利師行將此由五百里各諭令知之○又諭文麟景廉秦肅州回匪撲進安西州城立時擊退並賊擾敦煌縣境各摺片肅州回逆屢竄出關七月初二日撲入安西州城當經該城文武及駐防該處之提督張玉春等督率弁勇登時擊退該地方文武員弁雖屬疏於防範尚能將賊眾立時擊退力保危城均著免其議處提督張玉春副將柳致勝協防出力均著交部議敘其餘出力員弁著准其查明酌保毋許冒濫該逆雖經東竄難保不去而復來著文麟景廉督飭該城文武實力防勦以杜窺伺其竄擾敦煌之賊經李天和等於秦安坊地方擊敗該縣四鄉被賊蹂躪情形可憫著文麟等妥為撫恤毋使失所並著飭令在防官軍遇有賊蹤竄近迅速堵勦力遏狂氛現

在賊匪紛擾關外安敦玉等處均形喫緊若不速籌埽蕩恐哈密後路漸致梗阻成祿一軍本應出關著卽先派數營前赴嘉峪關扼紮以防賊匪出竄之路一面飭令關外三營隨時截勦力保完區徐占彪一軍計已由蘭州拔隊西進著左宗棠催令迅赴肅州將該處賊股力籌勦辦毋任紛竄成祿於徐占彪抵肅後卽當統率所部出關相機前進毋稍濡滯本日據張廷岳等奏甘省回匪時由肅

州一帶出邊竄擾圖撲庫倫等語著成祿於肅州一帶要隘設法堵截並著左宗棠飭令徐占彪到防後分撥兵勇妥為布置以免賊匪出竄邊外益滋蔓延將此由六百里各諭令知之○予吐魯番陣亡署同知許清貴祭葬世職加等妻趙氏子鈺寶分別旌卹加等○己未諭軍機大臣等前因奕榕等奏請撥官兵整裝銀兩並催解欠餉當諭戶部速議具奏茲據奏稱此次吉林奉調赴烏官兵一

千名。應給軍裝等項。共需銀二萬五千兩。請於山東地丁項下撥給等語。著丁寶楨飭令藩司。按照該部撥給數目。趕緊委員解赴盛京戶部交納。一面知照吉林將軍派員領取。以濟要需。瑞聯於此項銀兩解到。卽行驗收。俟奕裕委員到時。發交領解回省。至吉林上年調赴古北口官兵原撥整裝銀五萬兩。未據河南報解。又山東原撥銀十萬兩。僅解到四萬兩。尚欠六萬兩。著李鶴年、丁寶楨飭令各該藩司趕緊籌款。務於年內埽數解清。毋再遲延。其各直省歷年欠解吉林俸餉。共五十九萬二千三百餘兩。著李鴻章、李鶴年、丁寶楨查明各該省欠解數目。實力催提。迅速委員批解。不得再有遲誤。將此由四百里各諭令知之。○又諭奎昌等奏遵旨查明保奏一摺。據趙興體等稟請續支牛具價銀。懇撥民勇黏補衣履之需。及戰馬軍火等項。請將該營獎勵各情。經奎昌等發給牛具價銀二

千兩。並於科城軍火內撥給火藥鉛丸。復發銀二千兩。俾資黏補。尚能不分畛域。仍著奎昌、文碩、文麟、景廉悉心會商。隨時接濟。俾各民勇皆樂為我用。益形踴躍。其請撥援兵戰馬。應如何調撥之處。並著妥為籌畫。仍一面咨商陝甘總督等查覈辦理。千總李昶既據奎昌等奏稱差委得力。著照所請。作為俸滿千總。歸入直隸候補守備本班。遇有應升題選缺出。不計俸資。儘先卽用。並賞加都司銜。單開之軍功伊倉著以從九品。不論雙單月遇缺卽選。並賞戴藍翎。王所傑著以把總。遇缺儘先拔補。並賞給五品藍翎。朱紹智著以按察司照磨。不論雙單月遇缺卽選。並賞戴藍翎。勇目馮魁等六名。均著以經制。外委遇缺儘先拔補。並賞給六品藍翎。趙興順等十七名。鄉約王學禮等五名。均著賞給六品藍翎。景廉接奉七月十七日諭旨後。自應迅籌前赴烏嚕木齊。已有旨令西征糧臺撥銀十

萬解交景廉。藉資籌備。成祿俟徐占彪到肅。即可整旅出關。如能會合前進。聲勢較為聯絡。所有該大臣起程日期。及現在由哈赴烏道路情形。並民團趙興體等如何妥為駕馭。俾為我用而不為賊用之處。均著迅速詳細奏聞。事機至迫。該大臣當力任其難。迅赴戎機。景廉起身後。哈密防務著文麟妥為辦理。毋稍疏懈。將此由六百里各諭令知之。○又諭文碩奏籌辦沙山子民團事宜一摺。沙山

子團紳趙興體派隊在瑪納斯呼圖壁交界地方截擊烏魯木齊援賊。尚屬得力。該處民戶聚集日多。自應妥為拊循。以壯聲勢。仍著文碩隨時酌度情形。妥為籌辦。千總李昶遇賊受傷。曾否就痊。文碩已派都司扎拉豐阿等帶兵前往布倫托海查看情形。筆帖式文齡接辦李昶諸事。如果相宜。即著賞給五品頂帶。俄人行至察罕鄂博折回。聲言秋涼再由西進。著文碩飭令趙興體等豫為籌畫。稟

商辦理。榮全業已起程前赴伊犁。帶兵無多。所有後路派兵解餉及轉運事宜。著奎昌多布沁扎木楚。文碩。懍遵前旨。妥速籌辦。毋稍推諉。沙山子等處未運糧石。即著文碩飭令委員等提存貞義堡內。以備榮全後路接濟。前經疊諭杜嘎爾抽調馬隊一千名。令吉爾洪額。訥蘇肯帶赴榮全軍營。著該副都統迅速飭令起程。毋再延緩。將此由六百里各諭令知之。○漕運總督張兆棟奏報湖河各工

秋汛安瀾命詣

河神廟祀謝。○旌表守正捐軀直隸天津縣民王銓青妻呂氏。○庚申。諭軍機大臣等。恭親王呈遞巴揚阿稟函。內稱湖南益陽龍陽匪徒已散。道州土匪尚有一二千人。風聞武岡州有六月初旬被圍之說。至龍陽之變。實由該邑鄉紳陳少海。恃與巡撫劉崑之子為親家。倚勢貪功。草菅人命。誣殺團首劉秀芝。遂至激成釁端。陳少海全家被害。帶兵道員

李光燦副將陶藻參將羊瀛均未捕獲一人。羊瀛一軍尤甚於賊。鄉人切齒。現聞著名匪首施玉聚眾四五百人。在武岡山內竊藏。又洞庭西湖港內有大頭目劉鴻怡。原係湖北候補縣丞。棄官為寇。湖南州縣賢否不齊。或辦案稍有枉縱。該匪等即藉口滋事。請據稟轉奏。派員查辦等語。湖南散勇會匪徧地皆是。有地方之責者。宜如何認真妥辦。消患未萌。若如所陳各情。是該處有司專以敷衍了

事。養癰貽患。深切隱憂。著派李瀚章馳驛前赴湖南。將該省文武各官粉飾貽誤各情。確切查明。據實參奏。毋得以奏報肅清在前。稍為迴護。其整飭吏治。保衛地方各事宜。亦著詳悉熟籌。奏明辦理。再巴揚阿又稱夥匪內現有偽天王。東王。南王。北王名號。並肆用從前洪秀泉偽記等語。並著李瀚章嚴密訪查。如果實有其事。即應迅速派兵掩捕。盡法懲治。以遏亂萌。原稟著鈔給閱看。將此五百百

里諭令知之。○又諭。巴揚阿遞寄恭親王稟函。詳述湖南會匪情形。業據恭親王呈覽。已派李瀚章前往查辦矣。地方公事。專歸該省督撫具奏。若此事關係重大。非尋常地方公事可比。該將軍有奏事之責。本可具摺奏聞。無所用其顧忌。嗣後遇有此等緊要事件。即著隨時據實具奏。將此諭令知之。○派醇郡王。科爾沁博多勒噶台親王。伯彥訥謨祜。正白旗漢軍都統全慶。校閱中式武舉馬步射

技勇。○以甘肅蕩平金積堡肅清甯夏靈州出力。賞提督易春光。武交清。陳美仙。總兵官盧榮陞。一品封典。提督曾楚勝。賀大光。李秀山。胡騰芳。何本高。朱榮昌。總兵官黃錦雲。田長翼。趙逢泰。周永慶。周應堂。潘澤珍。張楚勝。谷新勝。黃致和。胡嶽峰。副將徐江海。蘇祥雲。郭慶才。曾昌明。符世禮。李長青。蔣寶林。匡羣。臣谷崇德。王友集。彭玉連。蕭仁魁。易咸臨。楊玠。趙永和。劉義勝。劉萬克。夏朝宗。宋榮貴。潘

旭魁彭連陞。湯立梧。張學然。章和榮。周福春。
羊萬順。卜有勝。鄧景雲。武萬才。譚吉士。龍恩。
思。余永習。參將徐桂林。丁雲勝。王文運。易山。
魁。李昆山。陽泰球。李明高。陸清文。劉成德。彭。
守益。袁昭喜。黃金蘭。彭永興。鄧普齋。方明卿。
譚全才。唐仁和。王亮世。蕭興全。胡義和。王桂。
廷。劉寶臣。楊榮華。陳芝本。陳先啟。葉三元。曹。
復勝。楊再發。沈聚先。呂芳林。喻仕發。何玉學。
許功泰。周明武。胡俊昇。黃長清。張貴養。朱必。

勝。劉楚桂。鄧正升。周邦富。羅南堂。熊開祥。文。
青山。尹明亮。鄭熙春。楊忠和。胡含湘。許占鼇。
吳壽生。湯允勝。丁龍化。周雲步。吳立斌。左步。
雲戴占元。宋廷聘。羅永謙。李長勝。孫蘭友。宋。
學禮。吳萬品。宋賢聲。何占元。呂騰福。陳貫珠。
齊懷松。李逢春。洪有元。易大東。龔元發。遊擊。
瞿正西。方時忠。周廷福。尹世美。楊先勝。羅貴。
元。胡得高。曾應祥。何榮光。董官寶。謝週林。劉。
炳旺。張桂林。龐文勝。江仁和。龐友明。黃體坤。

李得勝。趙桂芳。羅桂亭。方柏順。王義和。蔣佑。
新程玉修。劉先華。張萬興。方輝朋。李邦富。范。
守雲。劉瑞林。鳳山恆。張士林。張運東。褚敬財。
李兆昇。易昆山。吳耀輝。彭華國。趙輝南。譚聲。
彩。齊敬亭。張友勝。楊有林。丁玉隆。文雲臨。周。
光朝。劉貴武。熊學猷。田宗善。武守和。劉開國。
周曙良。張其高。都司張友雲。張作勝。劉有元。
易瑞堂。袁青雲。沈祥發。黎長順。許萬勝。李得。
勝。李國泰。戴楚南。張國勝。陳加興。李復勝。朱。

日昇。施思貴。鄧金陵。李正亮。楊厚德。郭春芳。
蕭福元。楊元瑞。李遇春。朱品輝。唐玉德。陳玉。
魁。劉慶金。步雲。楊永長。杜成法。張旺。石中玉。
母可登。孫道友。王允功。韓尚金。陸全勝。何全。
忠。張國乾。劉得勝。劉鳳山。守備劉春林。朱仁。
和。喻春華。李玉成。袁正恆。蘇貴興。傅廷。千總。
陳以林。巴圖魯名號。知府舒大章。遊擊劉子。
忠。等花翎。知縣朱汝霖等。藍翎。餘加銜升敘。
有差。○辛酉。

上御養心殿。引見中式武舉。親定甲乙。○諭軍機大臣等。杜嘎爾奏。追剿潰匪。殄除淨盡。一摺。潰匪竄踞阿畢爾米特旗游牧地方。經福珠哩等帶隊馳剿。於賽堪阿林之北。那林渾第等處。將賊匪四百餘名悉數殄除。賊首圭堆老四。亦經殺斃。其馬受主大漢晁老五等。是否一併擒斬。仍著杜嘎爾詳悉具奏。昨據張廷岳等奏稱。阿畢爾米特游牧邊界。及巴勒達爾多爾濟游牧邊界。均有賊匪竄擾。現在已竄過固爾板賽堪地方。是逆蹤飄忽。靡常。難保不肆行紛竄。杜嘎爾現飭各隊在扎達噶圖地方駐紮。並派員在固爾板賽堪及翁音河等處偵探賊蹤。仍著認真探防。遇賊卽擊。毋稍鬆懈。昨有旨將達爾濟革職。等因。其所部官兵。諭令該副都統派員管帶。卽著遴派妥員接統。以資得力。庫倫防務緊要。張廷岳阿爾塔什達。仍當就現有兵力。嚴密防勦。迅掃逆氛。將此由六百里各諭令知之。○

以蒙古那林渾第等處勦匪出力。賞委參領景武德等花翎。○壬戌。

上御太和殿傳臚。賜一甲丁錦堂主可相。佟在田。三人武進士及第。二甲徐振綱等十六人。武進士出身。三甲楊榮第等七十三人同武進士出身。○癸亥。諭內閣。伯彥訥謨祜等奏。會審職員控訴大概情形。並究出大員授意說合。請旨辦理一摺。據稱翼尉桂祥與協尉烏什哈互相稟訴各款。均經訊有端倪。惟烏什哈所稟桂祥於兌換辦公銀兩以多報少一節。據該員在刑部呈出經管帳目之聯興桂澄繕遞清單為據。訊之桂祥等均不承認。自應嚴切根究。以期水落石出。步軍校聯興桂澄均著暫行革職。從嚴訊究。翼尉桂祥。協尉烏什哈。一併暫行解任。聽候審訊。至翼尉文秀所供。五月初一日。在北上門有差。左堂正堂先走。右堂達明阿將伊喚至屋內。問及左翼之事。言稱要在本衙門了結。纔好。若過

部便不好看。令伊向桂祥勸解。文秀遂於次日約同鳳祥等至桂祥家內提說等語。達明阿授意文秀向桂祥說合。究竟是何意見。並當時向文秀說話時。步軍統領存誠。左翼總兵榮祿是否先已走散。著達明阿明白回奏。○諭軍機大臣等。前據德英等奏直隸等省欠解黑龍江俸餉銀兩。請先由部庫發給。並懇飭催積欠整裝銀兩。當令戶部速議具奏。茲據奏稱。部庫經費支絀。所請先行墊發。本

難准行。惟現已冬令。該省官兵情形困苦。俸餉亟需支放。擬請由部庫暫行借撥銀五萬兩等語。著照所請辦理。該將軍卽行派員赴部領取。並著丁寶楨卽在該省欠解黑龍江俸餉項下。劃出銀五萬兩。趕緊解部歸款。此次由部庫借撥。係一時權宜之舉。嗣後各省欠解俸餉。應由該將軍奏咨嚴催。不得再請部款。以重帑項。至各省欠解黑龍江庚午辛未兩年俸餉。共銀三十三萬八千餘兩。除長

蘆應解銀兩。據稱因積水難行。經戶部行令俟水勢稍退。立即起解外。其山東省前解吉林黑龍江俸餉銀五萬兩。經奉省暫行借用。著瑞聯懍遵前旨。卽行分別歸還。其餘欠解庚午辛未兩年俸餉銀兩。著李鴻章、李鶴年、丁寶楨按照戶部指撥原款。嚴飭藩運各司迅卽籌解。不得再有延緩。至上年戶部奏提各該省積欠黑龍江歷年俸餉銀兩。除山東省應歸還此次部庫銀五萬兩外。尚應解該

省銀三萬兩。長蘆應解銀五萬兩。直隸應解銀五萬兩。河南應解銀十萬兩。並著該督撫於年內一律解清。黑龍江地居邊要。近年徵調頻仍。全賴俸餉及時支發。以資振作。該督撫等務當顧全大局。力籌解濟。儻有仍前延誤。卽著戶部據實奏參。查取藩運各司職名。照例議處。至黑龍江歷次調派官兵。共需整裝銀九萬九百餘兩。又本年行圍官兵。應需資裝銀一萬四千八百餘兩。前經戶部指撥。

迄未報解。均經該省向鋪商借墊。現在亟須發還。並著李鴻章、李鶴年迅將直隸旗租項下指撥銀一萬一千五百餘兩、河南地丁項下指撥銀五萬五千八百餘兩、驛站存積項下指撥銀三萬八千一百餘兩、嚴飭各該藩司趕緊籌撥。派委妥員解赴盛京戶部交納。一面知照黑龍江將軍派員領取。此項銀兩並著於年內解清。以濟要需。將此由四百里各諭令知之。○以內閣學士祥泰署鑲藍旗

漢軍副都統。○賞通州王恕園等處煮賑私米六百石。○甲子。諭內閣。本日達明阿奏遵旨明白回奏一摺。著交原派王大臣歸案訊辦。○諭軍機大臣等。劉長佑奏查明粵西大概情形。現籌整頓等語。粵西近年以來。吏治軍政廢弛已極。以致伏莽未除。強團不法。劉長佑現擬將邊關內外各軍。由馮子材整飭調遣。此外各營。擇得力道府數員分帶。任以勦捕之事。藉察廉能。並於調撥時量加裁併。

所籌甚是。即著照所擬辦理。惟須慎選賢能道府。督率廉明。牧令隨時隨事。加意整頓。實力奉行。不可徒託空言。致負委任。藤縣永定股匪。前已諭令劉長佑等剋日殄滅。著即嚴飭盧殿清等認真勦捕。務絕根株。毋任蔓延為患。南太泗鎮等府。距省較遠。更易藏奸。尤當次第廓清。埽除餘孽。以靖地方。至該省兵力。半駐越南邊境。內地本不免空虛。著馮子材迅將鄧建新等股及早殲除。以綏藩服。並

可騰出兵力。會商劉長佑擇要布置。綏靖疆圉。將此由四百里各諭令知之。○乙丑。諭軍機大臣等。本日有旨將劉崑開缺另候簡用。令王文韶署理湖南巡撫。吳元炳署理湖南布政使矣。劉崑現有應行查辦之案。著李瀚章傳知該前撫仍在湖南聽候查辦。俟此案奏結後。再候諭旨。王文韶、吳元炳署理撫藩各篆。能否勝任。並著該督隨時察看。據實具奏。將此諭令知之。○又諭。奎昌多布沁扎木

楚奏籌撥官兵赴臺堵剿。慶春奏籌撥臺站事宜各一摺。奎昌等以畢留圖廟被圍之賊詐降逃遁。恐南路一帶臺站為賊所擾。現派棍噶扎勒參帶兵前赴哈爾尼敦。翁音適中等臺。擇要駐紮。保護糧道。即著督飭該呼圖克圖實力防守。毋稍疏虞。前據杜嘎爾奏福珠哩等軍。在那林渾第地方。將潰匪兩股剿除淨盡。賊首圭堆老四等亦經殲斃。當經諭令該副都統認真探防。遇賊即擊。現在翁音

河等處。有無另股賊蹤。仍著杜嘎爾嚴飭所部。確實偵探。相機進剿。毋稍疏虞。烏城兵力本單。棍噶扎勒參現紮哈爾尼敦一帶。總以力顧後路為要。毋得貪功輕進。致烏城空虛。或有疏失。庫倫防兵糧石。慶春現飭管臺參領等。將喀喇沁臺站壅滯軍糧設法催運。並令迎提軍糧差官洪富等赴臺督運。即著檄飭在事各員迅速辦理。源源運解。毋稍稽遲。額勒和布到京。現在請假一月。俟假期屆滿。

即飭該都統馳赴新任。所有臺站分段責成事宜。仍著慶春趕緊籌畫。奏明舉行。不得以接替有人。稍涉推諉。並著奎昌多布沁扎木楚懌遵九月十九十月初一日諭旨。將邊外臺站如何分段整飭之處。詳慎籌辦。迅速奏聞。將此由六百里各諭令知之。尋奎昌等奏各臺站情形不一。應即由各旗均勻分辦。逐段責成。照章整頓。其伊疆臺站相距窵遠。應由該將軍等酌辦具奏。從之。○以詹事府詹

事何廷謙為內閣學士兼禮部侍郎銜。宗人府府丞唐壬森為都察院左副都御史。○命湖南巡撫劉崐開缺另候簡用。以湖南布政使王文韶署巡撫。翰林院侍講學士吳元炳署布政使。○丙寅。

上奉

慈安皇太后

慈禧皇太后幸漱芳齋侍午膳。○丁卯。

慈禧皇太后聖壽節遣官祭

太廟後殿。

奉先殿○

上率王以下文武大臣詣

慈寧門行慶賀禮。眾官於午門外行禮。○詣長

春宮

慈禧皇太后前。侍早膳。○奉

慈安皇太后

慈禧皇太后幸漱芳齋。侍午膳。○戊辰。命阿巴

噶扎薩克郡王瓦津達拉在御前行走。賞頭

等台吉。揚桑花翎。○己巳。予山東軍營病故

提督王心安祭葬。卹廕加等。諡果毅。○庚午。

諭軍機大臣等。李鴻章奏酌派練軍營勇分

路巡緝一摺。本年直隸地方被災較重。誠恐

不法匪徒藉端滋事。自應豫為防範。李鴻章

現擬分派練軍營勇。會同各路州縣汛團。梭

巡查緝所。籌尚妥。著即飭令帶隊員弁。各就

地段嚴密稽查。遇有搶劫之案。隨時協同地

方官認真緝捕。務須約束嚴明。不准絲毫騷

擾。以靖奸宄而安善良。至天津為通商要地。

刻下飢民較多。尤應妥為彈壓。得該督坐鎮

其間。庶幾宵小不至生心。而洋人亦可免疑

慮。本年封河後。該督應否仍駐天津暫緩回

省之處。著酌量情形。妥籌具奏。將此諭令知

之。尋奏津郡四鄉賑務。即日開放。擬俟封河

後前往永定河工查勘。就近回省。得旨。該督

回省後。津郡事宜。仍著妥籌兼顧。毋稍疏虞。

○駐藏大臣恩麟等奏。訪出哲布尊丹巴呼

圖克圖呼畢勒罕靈異幼童。例應掣瓶。惟現

在班禪額爾德尼患病。不克前赴前藏。可否

會同達賴喇嘛照例敬謹掣瓶。得旨。哲布尊

丹巴呼圖克圖呼畢勒罕。業經訪出。不可久

稽。即著恩麟等會同達賴喇嘛敬謹掣定。○

予貴州各屬陣亡殉難文生王熙等紳民婦

女七百二十六名口。分別旌卹如例。○辛未。

榮壽公主額駙志端病故。賞銀一千兩治喪。

○壬申。

上奉

慈安皇太后

慈禧皇太后幸漱芳齋侍午膳○諭內閣德英等奏請將擅議招墾之副管等革職一摺呼蘭迤東蒙古爾山業經德英奏明禁止開墾乃副管托蒙阿屯官奇祥竟將弩敏河北克音河南荒地砌詞擅請撥放實屬悖謬托蒙阿奇祥均著革職以示懲儆○諭軍機大臣等景廉奏遵旨籌畫進兵一摺景廉奉命進

規烏魯木齊現已檄調駐紮安西等處步隊三營交提督張玉春統帶由巴里坤向西進發並咨調巴里坤綠營官兵三百名隨同進攻統計兵勇三千有餘防勦兼籌實屬不敷分布景廉已會商文麟飭令孔才馳赴西路調齊鎮西定西等營暨奇古一帶兵勇聽候調遣卽著酌度情形妥為駕馭以資得力成祿卽懍遵前旨迅統所部剋期出關不准再涉遲延景廉軍餉前已由西征糧臺借撥銀

十萬兩並催令四川等省將月協專協等款

埽數籌解著戶部再籌撥銀十萬兩解至察哈爾由景廉派員迎提應用慶春當派員護解催趲前進以期迅速此項餉銀到尚需時准景廉先於烏科兩城各借撥銀二萬兩著金順奎昌多布沁扎木楚常順文碩照數發交該委員運解回營俟部撥餉銀解到卽行叩還景廉現需健駝六百隻牛二百頭羊二千隻著文碩飭屬於烏梁海等處代為購買此項價值卽由借撥餉銀內提出發給至軍行糧隨最關緊要景廉現擬派員分赴巴里坤奇台古城一帶查看採辦軍糧必須寬為籌備以供支放著伊勒屯文麟隨時照料毋稍膜視景廉迅將諸事布置妥協刻卽督隊西行力圖規復毋誤機宜安敦玉等處險要著文麟撥兵填紮嚴密防守不可稍涉大意關外軍情緊急烏里雅蘇台又時虞賊匪回竄著金順迅卽馳赴新任將防勦事宜悉心

布置以副委任。另片奏請調員差委。及分撥馬隊等語。榮全軍營前已將富和等十員發往。足敷差委。本日有旨將景廉簡放烏魯木齊都統。哈密幫辦大臣。令錫綸補授。並令赴景廉軍營。隨同辦事矣。穆圖善如能分撥吉林黑龍江馬隊二三百名。歸景廉調遣。卽著檄令兼程出關。以資攻勦。其請撥洋槍軍火。已諭令李鴻章等籌解矣。將此由六百里各諭令知之。○又諭。本日已有旨催烏魯木齊提督成祿迅速帶兵出關。聞該提督所部兵勇不甚得力。並有到處騷擾情事。此次規復烏城。事關緊要。必須軍律嚴明。方能有濟。成祿到營後。卽著景廉各照成祿將所部兵勇汰弱留強。嚴申軍律。並著確查該提督如果不能勝任。隨時據實奏聞。毋稍徇隱。將此密諭知之。○又諭。據景廉奏遵旨籌畫進兵一摺。景廉進規烏魯木齊。因哈密僅有馬步隊三營。將後路駐防三營調赴哈密。由巴里坤

向西進發。其安西敦煌兩處。卽由文麟分兵駐紮。以資防守。安敦玉等處。為巴哈東路聲援。現在屢被肅回竄擾。茲又將駐防三營拔赴前敵。文麟亦未必有兵可撥。後路益形空虛。殊屬可慮。本日已諭令成祿剋日帶兵出關。以資厚集。第念肅州一帶。必須有兵填紮。方足截回氛之西竄。壯關外之聲威。著左宗棠懍遵疊次諭旨。檄催徐占彪一軍。迅赴肅州。將該處賊股力籌勦辦。毋任紛竄。烏魯木齊為逆回老巢。醜類甚眾。阜康亦為賊踞。勢成犄角。景廉所部僅三千人。益以成祿一軍。兵力仍形單薄。必須另添勁旅。扼紮關外。庶可聯絡聲勢。前經諭令曹克忠接統劉銘傳所部淮軍。拔赴肅州。將來此軍抵肅。著令徐占彪率隊出關。分紮安敦玉等處。足為景廉等後勁。並著左宗棠斟酌情形。豫為籌畫。毋誤事機。景廉等軍餉。前據袁保恆奏先撥銀六萬兩。派提督李炳勳等領解赴哈等語。此

時行抵何處。著左宗棠嚴飭該提督等迅速
西行。並令沿途員弁妥為護送。俾得早抵哈
密。以利師行。其餘四萬兩。並著該督飭令西
征糧臺迅速續撥解往。毋稍稽遲。將此由六
百里諭令知之。○以哈密幫辦大臣景廉為
烏嚕木齊都統。頭等侍衛錫綸為哈密幫辦
大臣。○撥直隸洋槍二百桿。山西省城。綏遠
城。火藥各一萬斤。解赴烏嚕木齊軍營備用。

大清穆宗繼天開運受中居正保大定功聖智
誠孝信敏恭寬毅皇帝實錄卷之三百二十一

大清穆宗繼天開運受中居正保大定功聖智
誠孝信敏恭寬毅皇帝實錄卷之三百二十二

同治十年。辛未。十月。癸酉。諭軍機大臣等。又
煜王凱泰奏。閩省前辦洋務密摺。現有洩漏。
徹查嚴辦一摺。上年七月間。英桂覆奏防範
海口密摺。曾經咨行沿海文武各員。慎密籌
辦。在事人員。自應鄭重其事。不得稍有漏洩。
何以漫不經心。致令美國領事李讓禮鈔錄
實屬不成事體。是否沿途驛站偷拆。抑係該
省文武各衙門收藏不慎。以致洩露。著文煜
王凱泰徹底根查。嚴叅懲辦。不准含糊了事。
粵省匪徒散放藥粉一案。業經瑞麟奏結。聞

省洋人自不至再生疑懼。仍著文煜等隨時隨事按約妥辦。毋令滋生釁端。將此各諭令知之。又諭劉崐奏官軍攻克螃蟹老巢。現飭進剿清江南北兩岸一摺。援黔各軍自剿除雷公山苗寨後。該逆卽收眾聚糧屯踞螃蟹分占麥哨等處。負隅抗拒。提督龔繼昌等分路進攻。疊平逆寨。併力攻克螃蟹老巢。惟清江南北兩岸尚有亂苗占踞。現已飭龔繼昌等先將丹江西南黃茅嶺開懷兩路底定。

由凱里前進。埽除麻凱逆氛。進圖北岸之黃飄等處。再由清平蕩滌北岸。劉崐前已有旨諭令另候簡用。卽著王文韶督飭各軍節節進剿。實力埽蕩。並著曾璧光、周達武嚴飭黔軍隨時與楚師聯絡。會合兜剿。以期迅埽逆氛。肅清黔境。將此由五百里諭知曾璧光。並傳諭周達武、王文韶知之。○以緝獲逃匪。予福建參將郭祖耀以副將升用。○予貴州螃蟹寨陣亡遊擊向信玉、梁得宣、楊得勝祭葬。

世職加等。○甲戌諭內閣。武備院奏庫存盔甲。查有損失情形一摺。東華門樓並迤南角樓為存儲盔甲之所。本月十六日該管甲庫司員等見南角樓槓扇脫落。當卽前往檢視。樓內向存盔甲三千五百副。分存八櫃。業已拆毀五櫃。顯有損失情事。禁城庫儲重地。宜如何小心巡守。乃竟任令匪徒肆意行竊。且拆毀至五櫃之多。其非一時一次可知。該員弁等毫無覺察。實屬不成事體。著步軍統領

順天府五城將匪犯迅速查拏。務獲懲辦。並著護軍統領嚴飭直班官兵加意看守。毋得仍前疏懈。所有損失盔甲數目。卽著確查具奏。其疏於防範之該員弁等。著該管各衙門查明參辦。○以翰林院侍講崇綺充日講起居注官。○旌表守正捐軀直隸昌平州民李國發妻劉氏。○乙亥諭內閣。伯彥訥謨祜等奏會審案内大員供詞未確。請旨暫行解任。質訊一摺。據奏覆訊翼尉文秀供稱向桂祥

說合實係達明阿交派並無誤會該王大臣等咨令達明阿詳細登覆該總兵語多閃爍仍與文秀各執一詞等語達明阿著暫行解任聽候質訊○前甘肅提督曹克忠奏報起程赴陝日期得旨肅州軍務緊要著卽迅速赴陝統帶淮軍馳赴肅州妥籌防勦毋稍延緩○賞八旗暨步軍營綠營官兵一月錢糧○丙子諭軍機大臣等金順奏餉糈支絀請飭部指撥款項一摺金順由甯夏拔隊起程

於三道河什拉胡魯蘇地方酌留馬步數營在彼駐紮自督各隊於九月中旬先後馳抵包頭綜計所部馬步兵勇不下萬人月餉需六萬數千兩人數過多需款甚鉅糧運尤難該將軍當簡拔精銳汰除老弱庶一兵得一兵之用而餉項不至虛糜轉運亦稍資節省烏里雅蘇台軍情緊要金順自應懍遵疊次諭旨迅赴新任妥籌防勦卽著選帶得力隊伍部署成行其餘各隊酌量遣撤以節糜費

烏城本有部撥專款金順抵任後自可隨時提用並著戶部覈計於就近省分再行指撥有著之款以資飽騰其各省從前欠解金順軍營協餉著卽查明催令補解俾資接濟另片奏山陝兩省州縣墊辦轉運等款請准作正開銷等語著金順咨行山陝巡撫查明此項轉運准其作正報銷以示體恤將此由五百里諭令知之○又諭恩麟德泰奏藏餉支絀請飭撥解一摺前據恩麟等奏四川欠解

西藏餉銀積至三十三萬餘兩之多當經諭令該督先行撥銀十餘萬兩並將積欠餉銀籌解茲據奏稱續經吳棠撥銀五萬五千兩現在藏庫支絀所解之項止屬杯水車薪尚難濟急該藏兵丁困苦亟須接濟以資鎮撫等語著吳棠恪遵前旨無論何款先行籌撥銀十餘萬兩派員解交西藏應用仍一面查照定章將應解餉項按年籌撥不得再有帶欠至川省解運藏餉委員卽由吳棠妥議章

程知照恩麟等查覈勞績等次分別奏請升銜獎勵將此由四百里各諭令知之○補鑄甘肅階州知州印信從總督左宗棠請也○以江蘇浙江官紳捐辦棉衣解赴直隸天津助賑予升任閩浙總督張之萬等優敘餘加銜開復有差○丁丑諭軍機大臣等昨因景廉奏請續撥餉項當經諭令戶部再行籌撥茲據奏稱擬於山西應解本年京餉內劃撥十萬兩並請飭四川等省迅將欠解成祿軍營月餉專餉如數籌解分撥應用等語景廉進規烏城需餉孔亟著何璟鮑源深即照部議督飭藩司於該省地丁項下應解本年京餉內迅速籌撥銀十萬兩委員解交察哈爾由慶春驗收即派妥員護解催趲前進一面知照景廉趕緊派員迎提此項餉銀未到以前著景廉仍遵前旨暫在烏科兩城存餉內借撥應用部署成行迅圖進剿至成祿軍營餉需截至本年九月止四川月餉專餉共欠

解六十七萬兩山東專餉共欠解二十二萬五千兩山西專餉欠解五萬兩河南專餉欠解四萬四千兩其月協之餉湖北陝西亦尚有欠款著吳棠李瀚章丁寶楨何璟鮑源深李鶴年郭柏蔭蔣志章督飭藩司迅速如數籌解不准再有帶欠各省餉銀解到景廉成祿即遵照戶部奏案分撥應用以資接濟將此由五百里各諭令知之○添設吉林三姓佐領一員驍騎校二員領催五名前鋒五名披甲一百二十五名裁撤西丹三百名從將軍奕榕請也○戊寅諭軍機大臣等劉長佑馮子材奏會籌越南軍務劉長佑奏接奉諭旨縷陳下情並擒獲藤縣賊首各摺片越南匪首蘇惻漢等雖聲稱投誠仍復心懷反側自應乘其窮蹙悉力殲除以絕後患著劉長佑馮子材督飭派出各軍迅將海陽太原一帶匪眾悉數掃蕩匪首蘇惻漢等務須設法擒獲毋任漏網其河楊興化等處距邊較遠

自不宜窮兵深入轉致邊圉空虛該撫等當傳知該國王自行攻剿以清餘孽儻該匪竄近邊境仍當隨時派軍協剿毋稍膜視藤縣所屬之蜂門等處久為賊藪經官軍進剿將滿村金屯匪巢先後攻克並擒獲賊首何先體等正法辦理尚妥所有在事出力員弁團紳著劉長佑擇尤附案請獎以示鼓勵仍著督飭副將陳培桂等將永藤交界逸匪按捕淨盡一面妥籌善後綏靖地方革生梁汝弼

聚眾逞強罔知法紀亦當嚴行懲辦以儆效尤永甯州四十八珣之逃匪伍琬等竄往柳城余家上雷等村結黨滋擾著飭令遊擊黃興仁等迅速勒辦務絕根株劉長佑所陳為官吏除積習為地方圖久安務當振刷精神實力籌辦用副委任至所稱從前楚軍營員流寓粵省者尚不乏人恐有招搖等事該撫但當隨時查察有犯必懲毋庸總認過慮也前因馮子材等奏進剿越南賊匪奪獲象隻

擬挑選進呈當照所請准其挑選數隻解京第念越南貢象甫經到京若再將象隻進呈遠道跋涉恐沿途州縣供應不無擾累所有此項象隻著馮子材發給夷官領還毋庸解京將此由四百里各諭令知之○又諭奎昌等奏官軍剿匪獲勝生擒逆眾各摺片據稱達爾濟帶隊於九月初九日在喀雅喀喇烏蘇地方勒匪獲勝逸賊約僅百名此股殘匪現竄何處翁音河一帶是否尚有另股竄踞

前據杜嘎爾奏圭堆老四業經殺斃茲據賊供該逆向南山逃竄著奎昌多布沁扎木楚探明賊蹤嚴密設法以遏奔突杜嘎爾當懷遵疊次諭旨督率所部覘賊所向相機進剿迅掃逆氛此項賊匪皆由肅州竄出據獲賊供稱大頭目馬四久伏肅州若不擒其巢穴則該逆首時喉匪黨出關為害伊於胡底著左宗棠檄催徐占彪趕赴肅州認真按捕務將馬四老巢迅速攻毀毋任逆首稽誅致令

蔓延為患。成祿如尚未西進。亦著督率將士協同按剿。以絕根株。達爾濟前因輕率招降。縱賊遠颺。業經降旨革職。拏問著奎昌多布沁扎木楚。杜嘎爾。仍遵前旨。將該革員貽誤情形。嚴行審訊。定擬具奏。達爾濟所部官兵。杜嘎爾。擬派何員管帶。並著該副都統一併具奏。榮全前赴伊犁。帶兵僅百餘名。甚形單弱。著杜嘎爾。迅飭吉爾洪額。訥蘇肯。統帶吉林黑龍江官兵各五百名。剋日前往聽候榮全調遣。該二員起程日期。即著迅速具奏。毋再推諉。遷延。儻榮全因兵力不敷。貽誤事機。恐杜嘎爾不能當此重咎也。將此由六百里各諭令知之。○以喀雅喀喇烏蘇。勒匪獲勝。賞委營總達爾瑪吉爾泰等花翎。筆帖式圖魯孟克等藍翎。○追予四川榮昌殉難武舉唐廷揚等紳民婦女五百八十三名口分別旌卹。並立祠建坊如例。○己卯命都察院左都御史。早保吏部左侍郎胡家玉。在紫禁城

騎馬。○追予江蘇各屬陣亡殉難州同銜徐鍾聲等紳民婦女一千七百五員名口分別旌卹如例。○庚辰山東巡撫丁寶楨因病乞假。以布政使文彬署巡撫。○追予江蘇六合陣亡六品軍功楊守恩祭葬世職。如千總例。並予建祠。○旬到河南山東情實罪犯停決。山東斬犯四人。絞犯三人。餘五十八人予勾。○辛巳閩浙總督張之萬開缺養親。仍以福州將軍文煜兼署總督。○賞蘇尼特扎薩克都楞郡王那木濟勒旺楚克。扎薩克郡王托第布木黃馬祺。阿巴哈納爾扎薩克貝子桑齋薩喇特都布。阿巴噶扎薩克郡王瓦津達拉紫韁。命烏珠穆沁扎薩克郡王銜額爾德尼貝勒達克丹在御前行走。○追予湖北麻城陣亡知縣姚國振建立專祠。○旬到直隸山西熱河情實罪犯停決。直隸斬犯四人。絞犯二人。熱河斬犯一人。餘五十二人予勾。○撥神機營武備院腰刀一千七把。梅鉞箭五

萬一千一百枝。角弓一千張。鳥槍二百桿。給黑龍江征兵備用。○癸未。諭內閣。伊犁自同治五年失守。逆回盤踞。淪陷數年。該處官弁軍民人等。身陷賊中。本有應得之罪。惟念當時回氛猖獗。該官弁軍民人等。被其偏脅。未能自拔。尚屬情有可原。朝廷惠愛黎元。務從寬大。所有從前在伊城被陷之官弁軍民人等。均著加恩免其治罪。並著署伊犁將軍榮全。徧行宣示。寬其既往之愆。予以自新之路。

該官弁軍民人等。務各激發天良。共保地方。毋任回匪再行窺伺。至該處人眾顛沛流離。情形困苦。殊堪軫念。並著該署將軍妥為撫恤。毋令失所。用副朝廷惻隱小民至意。○諭軍機大臣等。榮全奏。探道西進。布置後路。機宜。並請飭催杜嘎爾。迅撥馬隊。杜嘎爾奏。籌辦調往伊犁各隊。並派員接統達爾濟所部官軍。暨擒獲賊供情形。各摺片。榮全現已行抵科布多。所屬扎哈沁之沙扎蓋臺。所有籌

辦駝馬及留備後路接濟。均尚周妥。惟從此西進。天氣嚴寒。程途荒僻。殊深廛念。榮全勇於任事。不避艱險。其屬可嘉。著即激勵官兵。探道前進。早抵伊犁。妥為經理。其後路轉運各事宜。仍著奎昌。多布沁。扎木楚。常順。文碩。妥速籌辦。不得稍有貽誤。索倫官兵。遠在葦塘子。流離日久。緩急難恃。自非得力勁旅。不足以壯聲威。杜嘎爾現已令吉爾洪額。訥蘇肯。整隊起程。並因應放餉銀。咨商慶春。先由

部撥榮全軍餉。內截留銀五萬兩。交口北道辦理月餉。下餘解營。趕辦各項。自因移緩救急起見。著慶春。即行撥給應用。並著奎昌。多布沁。扎木楚。於烏城餉銀內。提撥五萬兩。解交榮全。以抵截留之款。杜嘎爾務當飭令吉爾洪額等。迅速拔隊前進。毋稍遲緩。經過烏科臺站。應備各項。並著奎昌等。豫為籌備。毋致沿途阻滯。是為至要。杜嘎爾請撥鍋帳五百分。本日已諭令工部。照數撥給。該副都統

趕緊派員領取。以資應用。並將該副都統所部各營現有鍋帳。先行湊齊。飭吉爾洪額訥蘇肯迅速西進。不得藉詞耽延。達爾濟所帶之隊。杜嘎爾擬派參領貢果爾接統。並先令營總翰克巴雅爾暫行管帶。著卽飭令貢果爾星速前往統帶。察哈爾官兵。在翁音河一帶扼紮防守。期與烏庫兩城聲勢聯絡。刻下敗殘餘匪。竄往何處。據獲賊任發汶供稱。賊首馬受等。是否被殺。並未確知等語。仍著杜

嘎爾查明具奏。一面確探賊蹤。認真追剿。迅速逆氛。所有任發汶供詞。並著咨送奎昌等覈辦。記名副都統成山。侍衛承德業已到營。杜嘎爾當督同該員等。將所帶隊伍相機布置。協力防剿。毋誤事機。榮全另摺奏保經理臺站採辦駝隻尤為出力各員。已照請獎勵。其餘正臺幫臺出力人員。並著奎昌多布沁扎木楚常順文碩侯西進太兵過境後。查明分別請獎。榮全又奏接據伊犁被難官員來

稟情形。本日已明降諭旨。將該官弁等免其治罪。並令榮全妥為撫恤矣。該處官民感戴國恩。不為俄人煽惑。其志可嘉。所有各營官員。著仍以原職分管各眾。並准以喀爾莽阿暫署錫伯營領隊圖記。各營事務。卽責令一體照料。仍著榮全到伊後。察看情形。多方激勵。以固人心。而維大局。將此由六百里各諭令知之。○以內閣學士訥仁署鑲黃旗漢軍副都統。○以故翰林院五經博士孟廣均子昭銓襲職。○以扎薩克圖汗扎哈沁等旗辦理臺站出力。賞二等台吉丕凌哩扎木楚頭等台吉銜。梅楞仲兌等花翎。餘升敘有差。○句到朝審情實罪犯。停決絞犯一人。餘三人予勾。○甲申諭內閣。本年各直省辦理秋審人犯。經刑部由緩決改情實者。山東省有五起之多。該撫並臬司於秋讞重犯。未能詳審覈議。著交部查明分別議處。嗣後各將軍府尹督撫等。務當督同所屬。遵照定例。酌覈案

情悉心究擬固不可失之刻覈亦不可惑於救生不救死之說故從輕減總期執法持平無枉無縱用副明慎用刑至意將此通諭知之尋吏部議山東巡撫丁寶楨按察使李元華均照失出例降一級調用布政使文彬降一級留任得旨均著准其抵銷○諭軍機大臣等瑞雲奏遵旨撥兵防堵要隘一摺涼州地方遼闊要隘甚多現經瑞雲將王仁和所部分撥三營防守永昌等處其郡城以南亦

經挑派旗綠兩營安插各隘防堵所籌尚屬周妥即著瑞雲督飭派出各軍實力巡防遇賊即擊毋稍疏懈涼州兵力本單除分防各路外止賸王仁和馬步二營甘州之扁都口地方亦時有賊匪竄突涼防兵勇遇有緩急抽調為難瑞雲已飭令王仁和添募二營合滿漢兵勇防勦北路所有該軍糧餉即著左宗棠飭令駐涼營屯局就近撥發以濟軍需瑞雲此次抽出旗綠二營官兵行營口糧著

一併飭令營屯局按月照支毋令缺乏如有賊股竄近仍著穆圖善就近撥兵應援以固要地平番縣境各隘著豫師督飭各軍認真防勦不得稍有疏虞瑞雲在任多年辦理涼州一切事宜尚為得力現因抱病有懇請開缺回旗之語該副都統前次告病摺件並未遞到該處防務緊要瑞雲未可遽離著穆圖善就近派員查明該副都統病勢如何是否即能痊愈之處迅速據實具奏將此由五百

里各諭令知之○予湖南常德陣亡雲騎尉羅煊祭葬世職○予故湖北安襄鄖荆道升任巡撫羅遵殿入祀名宦祠從巡撫郭柏蔭請也○丙戌諭內閣都察院奏浙江貢生陶琴條陳事件據呈代奏一摺覽該貢生所陳多屬窒礙難行自請召試尤為冒昧原件著交該衙門擲還○諭軍機大臣等都察院奏湖北民人馮士純以胞兄辦差自盡身死不明等詞赴該衙門呈訴據稱伊兄安徽亳州

知州署天長縣知縣馮至沂於本年八月間。學院按臨泗州輪應盱眙縣辦差。詎盱眙縣知縣路玉階臨期規避。強留伊兄幫辦。並架詞傾陷。伊兄被偏。遂至投河自盡。經伊嫂馮桂氏具呈巡撫藩臬衙門。未經代為申理等情。案關職官偏迫自盡。身死不明。亟應徹底根究。著曾國藩卽行遴派妥員前赴安徽。按照所控各節。秉公查辦。據實具奏。毋得稍涉偏徇。原呈著鈔給閱看。將此諭令知之。○追予廣西平南殉難署知縣知府李載文諡壯烈。○蠲緩山西徐溝平遙太原臨汾薩拉齊五廳縣被水地方新舊額賦。並賑徐溝平遙二縣貧民一月口糧。

大清穆宗繼天開運受中居正保大定功聖智誠孝信敏恭寬毅皇帝實錄卷之三百二十二

大清穆宗繼天開運受中居正保大定功聖智
誠孝信敏恭寬毅皇帝實錄卷之三百二十三

林鴻勳官修實錄總纂官文子大傳文淵閣修纂官徐林院院學士徐家榮等官修實錄總纂官文子大傳文淵閣修纂官徐林院院學士徐家榮等

聖祖實錄二庫書修加七級軍功加五級統緒二十次實錄纂修總纂官徐林院院學士徐家榮等官修實錄總纂官文子大傳文淵閣修纂官徐林院院學士徐家榮等

正統滿洲院管理郭光祿等事內大臣韓國公等功加一級統緒十七次實錄纂修總纂官徐林院院學士徐家榮等官修實錄總纂官文子大傳文淵閣修纂官徐林院院學士徐家榮等

聖祖實錄二庫書修加七級軍功加五級統緒二十次實錄纂修總纂官徐林院院學士徐家榮等官修實錄總纂官文子大傳文淵閣修纂官徐林院院學士徐家榮等

加七級統緒十七次實錄纂修總纂官徐林院院學士徐家榮等官修實錄總纂官文子大傳文淵閣修纂官徐林院院學士徐家榮等

教修

同治十年辛未十一月丁亥朔

上詣鍾粹宮問

慈安皇太后安長春宮問

慈禧皇太后安至乙卯皆如之○奉

慈安皇太后

慈禧皇太后幸漱芳齋侍午膳○諭軍機大臣

等張廷岳等奏圖車兩盟無力籌備駝隻情

形並請將伯克瓦齊爾解任歸案質訊各一

摺據稱喀爾喀連歲災荒兼之各臺轉運供

應維艱金順所需駝隻東兩盟實係無力籌

備請於四部落孳生駝隻內調用等語圖謝

圖汗車臣汗兩盟無力籌辦駝隻既係實情

即著金順知照奎昌多布沁扎木楚於四部

落孳生駝隻內調撥若干解交包頭一帶應

用奎昌等當劄行該管王公迅速挑選以應

急需前因達爾濟輕率招降疊經諭令奎昌

等嚴行審訊茲復據張廷岳等奏訊錄邢章

等供詞將該犯等解赴烏城並據扎薩克齊

默特多爾濟呈報文件內有牽涉伯克瓦齊

爾於達爾濟輕率招降不無附和等情扎齊

魯克齊伯克瓦齊爾著暫行解任交奎昌等

歸案質訊扎薩克齊默特多爾濟一併聽候

傳質伯克瓦齊爾所帶官兵張廷岳務當遴

派妥員管帶以資得力並著奎昌多布沁扎

木楚趕緊將此案訊明會同杜嘎爾定擬具

奏毋稍遲延賊首王大漢馬六元帥鬼頭老

四等既據賊供均各漏網難保不復圖竄擾

杜嘎爾當隨時確切偵探派軍截剿毋稍鬆

勁將此由五百里各諭令知之○又諭前據金順奏餉糈支絀請飭部指撥款項當諭令戶部於就近省分指撥有著之款茲據奏稱山西陝西河東等處均有應解金順軍營協餉與其另行指撥不如就欠解餉內專提應用等語著何璟鮑源深卽在山西欠解金順協餉項下先提銀五萬兩並前次截留之山西地丁京餉銀二十萬兩提撥積欠銀十萬兩一併迅速籌解不得稍有遲誤其餘欠解

之款並著戶部開單嚴催山西陝西巡撫力籌接濟該撫等務將該將軍月需餉項源源籌撥以資飽騰烏里雅蘇台軍務緊要金順當懍遵疊次諭旨迅速馳赴新任妥籌防勦毋稍遲延將此由五百里各諭令知之○直隸總督李鴻章奏湖北殉難署按察使李卿穀暨子安徽殉難署巡撫孟羣原籍河南固始縣建祠工竣請飭列入祀典並以前金川陣亡都司李雲福附祀允之○蠲緩直隸開

東明長垣通武清香河清苑安肅蠡元城大名灤王田完景成安曲陽三河樂亭定興博野容城祁東鹿阜城肅甯正定晉無極棗城沙河南和平鄉廣宗鉅鹿任永年邯鄲廣平雞澤清河磁趙隆平甯晉深武強饒陽深澤武邑新樂寶坻甯河霸保定文安大城固安永清東安大興宛平良鄉房山涿新城雄安高陽河間獻任邱交河吳橋東光天津青靜海滄南皮鹽山唐山豐潤安平八十四州縣

被水地方新舊額賦有差並減免差徭○己丑諭軍機大臣等為政首在得人各省藩臬兩司有用入理財察吏安民之責果能用當其才庶吏治民生可望日有起色該藩臬等歷練既久並可備異日封疆之選關繫甚為緊要著各直省督撫於所屬運司道府中隨時留心察訪如有通達治體卓著循聲堪勝兩司之任者出具切實考語據實密保並將該員等才具長短分析臚陳以備國家因材

器使。即非屬吏。而有賢能素著為該督撫所真知灼見者。亦不妨切實聲敘。該督撫等受恩深重。務當仰體朝廷慎重旁求之意。秉公保奏。不得徇一己之愛憎。稍涉冒濫。至州縣等官。如有政蹟卓異。堪勝道府之人。仍著懍遵疊次諭旨。據實保薦。用備簡擢。將此各諭令知之。○又諭慶春奏派赴伊犁官員分起出邊一摺。副都統富和等六員。現已到口。慶春已派員前赴各臺。會同管站各員。籌備駝

隻。惟布魯圖所屬十一臺內。幫臺之扎薩克旗駝馬。僅有二旗在臺應差。其察漢托羅蓋所屬第九臺至第十二臺。默霍爾嘎順所屬十一臺。窄爾瑪克臺所屬十臺之扎薩克幫臺駝馬。率多不齊。疊經慶春嚴催。各該盟長視為具文。迄今罔應。實屬不成事體。著理藩院嚴飭錫林郭勒烏蘭察布圖謝圖汗車臣汗各盟長。迅將各扎薩克幫臺駝馬。埽數趕赴各臺。以濟要差。毋任稍延。致滋貽誤。並著

慶春督飭派出各員。隨時照料。添雇駝隻。俾赴伊各員。得以迅速前進。不至濡滯。至赴庫防勦之古北口練軍。應需駝隻。業經慶春酌給銀兩。分段雇覓。仍著隨時督飭催趲。以利師行。將此諭知理藩院。並諭令慶春知之。○以故杜爾伯特扎薩克貝子格里克巴勒珠爾子喇什綢蘇克襲爵。○以河南巡撫李鶴年為閩浙總督。直隸布政使錢鼎銘為河南巡撫。廣東按察使孫觀為直隸布政使。直隸

大順廣道李文敏為廣東按察使。○辛卯。諭軍機大臣等。曾璧光奏餉項支絀。請飭撥實款一摺。據稱貴州軍務現當喫緊。近因川省荒歉。月餉不能如期解到。而各省奉撥月餉。僅收到實銀二十餘萬兩。官軍情形困苦。待餉彌殷。且收復各城。辦理開墾各事宜。及撫恤由川入黔難民。需款均甚緊要。請旨飭撥實餉等語。所奏自係實在情形。江西欠解黔餉。據稱積至七百餘萬兩之多。自應迅速籌

撥以資接濟。著劉坤一查明該省欠解數目。除新撥關餉一萬兩按月批解外。迅速提撥實銀五十萬兩。限於年內埽數解黔。以應急需。毋稍遲緩。此項銀兩到時。卽著曾璧光與提督周達武分別支用。至各省奉撥協餉。廣東湖北各二萬兩。湖南四川各一萬兩。據曾璧光奏稱。均因本省有事。未能解黔。請飭改撥以符定數。著戶部速議具奏。其山東福建江蘇浙江等省報解分數。並著戶部查明酌定章程。奏請獎敘。將此由五百里各諭令知之。○以貴州威甯畢節等州縣勒平股匪。予副將吳奇忠以總兵官簡放。賞通判吳厚恩五品銜花翎。鹽大使吳震翹等藍翎。餘加銜升敘有差。○以茂明安旗地方勒賊出力。賞都司史永魁等花翎。佐領伊鏗額藍翎。餘升敘有差。予陣亡把總賈長魁等祭葬世職。○壬辰。以山西防河勒匪出力。賞提督鄧正峯一品封典。參將陳福勝等花翎。知縣宮汝沆

等藍翎。按察使李慶翱等加銜升敘。開復有差。○以陝西米脂等處勒匪出力。賞提督蔣東才等花翎。府經歷曹憲等藍翎。餘加銜升敘有差。○癸巳。以陝西重修華嶽廟工竣。頒扁額曰瑞凝仙掌。○以神靈顯應。頒陝西長武縣太白神廟扁額曰金天炳烈。○諭軍機大臣等。左宗棠繆圖善奏。官軍攻破賊壘。疊獲勝仗。一摺。覽奏欣慰。此次左宗棠等督軍渡洮連戰大捷。蹋毀高家集等處賊堡。斬馘萬餘。並將三甲集巨巢攻拔。軍威丕振。賊膽已寒。辦理極為得手。惟由三甲集以西至泰子寺。賊壘林立。其眷屬死黨。均聚集大東鄉。負隅抗拒。亟宜乘此聲威。節節埽蕩。左宗棠已飭令傅先宗等先攻三甲集各壘卡。直擣泰子寺。再回攻大東鄉。與諸軍分道並進。調度甚合機宜。著卽激勵各軍。剋期前進。盡殄逆氛。以竟全功。另片奏中南兩路官軍勒賊情形。

亦均得手。現在中路平慶鹽固一帶已就肅清。馬彥澄等逆竄併河州大東鄉一帶正可乘勢兜圍聚殲醜類。毋令四出蔓延。南路各軍已將河州竄出回股追勒殆盡。尚屬出力。准由左宗棠彙案擇尤保獎。另片奏。回目具稟投誠等語。崔三禹得彥等悔罪投誠。原可網開一面。惟必須責令直擣河州。與賊接仗立功。方准收撫。此中操縱機宜。該大臣等務當妥為籌畫。毋稍疏虞。其投誠之陝回楊汶

彥及葑台堡回目馬應林等。應如何妥為安插之處。並著察看誠偽。相機辦理。將此由六百里各諭令知之。○欽差大臣左宗棠奏請調服闋前任河南按察使譚鍾麟赴陝甘軍營差委。允之。○予甘肅高家集等處陣亡副將王楚仁。都司余植。楊振家。祭葬世職。○予甘肅三甲集等處陣亡副將喻友才。參將廖嵩。殷德益。祭葬世職。加等。副將眭金城。參將楊其昌。祭葬世職。○緩徵安徽泗。五河。懷

遠靈璧。盱眙。建德。鳳陽。定遠。鳳臺。壽。天長。懷甯。桐城。霍邱。潛山。宿松。南陵。東流。蕪湖。繁昌。廬江。巢。宿。合肥。當塗。貴池。青陽。無為。阜陽。太湖。望江。宣城。銅陵。舒城。太和。和。含山。潁上。亳。蒙城。渦陽。四十一州縣被旱被水被風被蟲。地方新舊額賦並雜課有差。○甲午。遣官祭先醫之神。○復甘肅靜甯陣亡已革副將施鵬原官。予祭葬世職。○予甘肅固原殉難提督周顯承。知縣祝賓暘。教諭楊素功。吏目魏

光第。祭葬世職。加等。並建專祠。○

上以冬至祀

天於

圜丘。自是日始。齋戒三日。○乙未。旌表守正捐軀安徽鳳臺縣民陶守聘妻李氏。○丙申。諭軍機大臣等。前因川省防務緊要。經吳棠奏准將陝西漢中鎮總兵李輝武暫留川省帶隊駐紮大安驛。以固邊防。茲據蔣志章奏稱。淮軍將離陝境。該省地方遼闊。甘省現在進

攻河州。難保逆匪不乘虛肆竄。擾及陝疆。該撫已飭譚仁芳一軍移紮延綏一帶。與北山防軍聯絡守禦。惟漢鳳等處空虛。請令李輝武就近回漢中鎮本任。以資防守等語。大安驛為漢中屬境。該總兵現既帶兵駐紮。即著吳棠蔣志章飭令李輝武即回本任。並著蔣志章再撥數營。交其統帶。與所部川軍互相聯絡。俾壯聲援。所有川北邊防及陝省鳳翔一帶防務。即著責令該總兵妥籌兼顧。延綏等處。並著責令譚仁芳認真防堵。毋稍疏虞。將此由四百里各諭令知之。○以甘肅克復狄道等城。肅清南路出力。賞提督張明富張仲春總兵官翁九良。協領喜勝。正一品封典。總兵官吳得勝。柯得順。副將常遠藻。張養吾。劉興發。陳連春。孫大海。朱望福。馬虎。和得華。董金城。朱學貴。唐訓文。參將譚秀堂。成秀良。巴圖魯名號。守備劉福勝等花翎。千總朱業焜等藍翎。餘加銜升敘開復有差。○丁酉冬

至祀

天於

園丘。遣禮親王世鐸恭代行禮。○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵。○遣官祭

端慧皇太子園寢○停次日朝賀○

上奉

慈安皇太后

慈禧皇太后幸漱芳齋侍午膳○以江西南昌

等處捕獲齋匪予知縣汪世澤等升敘有差

○戊戌諭軍機大臣等定安奏患病甚劇請

假調理一摺定安著賞假一箇月調理綏遠

城將軍印務著富勒琿暫行護理惟現在北

路軍務未竣該城防勦轉運各事宜均關緊

要定安仍當隨時籌畫與富勒琿會商妥辦

毋稍諉卸將此各諭令知之○以冬至致祭

奉先殿讀祝舛錯革讀祝官郁林職○己亥

聖祖仁皇帝忌辰遣官祭

景陵

上詣

壽皇殿行禮○諭軍機大臣等張曜奏查明沿

邊一帶口隘繪圖呈覽一摺據稱肅州之金

塔一帶邊牆間有坍塌平番之裴家營古浪

之大靖土門及甘涼南山各口均可通達邊

外陝回崔三等股句串西甯肅州土回分股

竄擾人數頗眾是甘省西北一帶賊蹤出沒

靡常實為沿邊之害現在大軍由三甲集等

處進勦恐河州之賊勢窮紛竄西北一帶愈

形喫重左宗棠務當通籌大局豫為防範前

據該督奏稱陝回崔三等具稟投誠是否真

心悔罪仍著察看情形妥為籌辦不可稍涉

大意肅州回眾時竄玉門安西等處著檄令

徐占彪抵肅後將該處防勦事宜速籌布置

以通出關之路阿拉善旗紅柳園等處現在

有無竄匪著張曜飭令李葆琛等認真截勦

以清餘孽北路沿邊口隘並著隨時偵探嚴

防毋稍疏懈圖留覽將此由五百里諭知左

宗棠並傳諭張曜知之○蠲緩山東汶上鄆

城濮濟甯壽張歷城齊東齊河濟陽禹城臨

邑德東平東阿惠民青城陽信鄒滕嶧陽穀

荷澤曹鉅野范觀城朝城聊城堂邑茌平清

平。萃冠館陶恩。夏津武城金鄉嘉祥魚臺臨清章邱鄒平樂陵商河甯陽博平邱長清定陶海豐霑化蘭山長山陵平原肥城平陰濱利津蒲臺曲阜甯陽泗水單城武高唐昌邑濰滋陽七十州縣暨德州東昌臨清濟甯四衛東平所被水被旱被蟲地方舊欠額賦並雜課有差。○庚子。諭軍機大臣等。李鴻章奏伊犁裹糧辦運出口。請飭整頓臺站。並烏城征餉。未便由口北道辦理一摺。伊犁裹糧十萬斤。現已由口北道全數辦齊。分批解至頭臺。接收轉運。其烏庫防軍糧石。亦經按月提前起解。惟臺站駝隻缺乏。各臺堆積米袋甚多。尚係七八月之糧。冬令已屆。若再不設法接運。各城防兵枵腹荷戈。臨事焉能用命。著慶春懍遵疊次諭旨。務將察哈爾所屬各臺應用車駝。大加整頓。如需發價添雇。尤當妥籌幫貼。毋惜小費。庶蒙員不至藉詞困苦。稍涉諉卸。額勒和布到任在即。尤當統籌全局。

實力經營。以副委任。伊犁裹糧。如到烏里雅蘇台後。著金順奎昌多布沁扎木楚常順文碩趕緊設法接運。毋稍耽延。由科城至伊犁各臺站。尤應豫為籌畫。庶師行糧隨。不虞匱乏。如榮全所帶官兵及所調吉林黑龍江等兵前進後。軍糧或有不繼。惟金順奎昌等是問。杜嘎爾前請將征兵糧餉責成口北道經理。當諭李鴻章酌辦。茲據奏稱該軍米麪已由口北糧臺購運。其行營餉銀。未便由內地派員遙為經理。自係實在情形。即著毋庸更張。金順現由包頭取道赴烏。所有杜嘎爾一軍月餉。如併歸金順糧臺籌發。較為便捷。或仍由該副都統自行奏撥支放。著金順杜嘎爾妥為籌商。奏明辦理。烏城一帶防務緊要。金順當懍遵前旨。迅赴新任。毋稍稽遲。奎昌多布沁扎木楚。仍遵前月初一日諭旨。於四部落孳生駝隻內。酌量調撥。解赴包頭一帶。以利師行。將此由五百里各諭令知之。○緩

徵直隸慶雲肥鄉定三州縣被水地方新舊糧租並減免差徭。○辛丑諭軍機大臣等左宗棠穆圖善奏附省各營勦賊獲勝情形穆圖善奏派兵扼紮柳林溝各摺片甘肅附省一帶時有賊匪竄擾經各路防軍隨時雕勦疊有新擒不至蔓延為患現屆嚴寒河冰凍結深恐賊匪伺隙紛乘仍著左宗棠穆圖善檄飭防軍勤加偵探遇賊即擊毋得稍涉疏懈渡洮各營已攻克三甲集進規大東鄉該

處賊悍巢堅山徑錯雜我軍深入尤宜穩慎進取方免疏失穆圖善准左宗棠知照東路空虛前敵無兵可撥因派總兵李佑清統帶三營扼紮柳林溝遏賊旁竄惟省城密邇巨寇兵力僅有六營實屬不敷分布曹克忠接統淮軍前赴肅州一帶須由蘭州省城經過如屆時河州尚未攻克即著該提督會商穆圖善或將所部分紮省城附近各隘騰出穆圖善之兵前往省外各要隘分布似於防勦

兩有裨益該提督當迅速拔隊起程相機籌辦毋誤機宜省防緊要仍著穆圖善就現有兵力妥為布置務臻周密將此由六百里諭知左宗棠穆圖善並傳諭曹克忠知之。○又諭王文韶奏湘省地方軍務大概情形一摺湖南地方目前雖屬平靜惟近年以來會匪屢次竊發根株未淨各省遣回湘勇游手徵逐亦難保不生事端所有清釐保甲整飭團練各事宜該署撫務當督飭各該地方文武

會同紳士實力辦理以清伏莽而消隱患不可視為具文有名無實援黔各軍攻克螃蟹老巢後正在得手著王文韶遵照前旨督飭龔繼昌等由清江南北兩岸節節進攻會合黔軍迅掃逆氛毋稍鬆勁李瀚章刻下計可抵湘其地方軍務一切緊要機宜及減援增防應如何酌量變通之處即著會同王文韶籌畫布置務臻妥協將此諭知李瀚章並傳諭王文韶知之

大清穆宗繼天開運受中居正保大定功聖智
誠孝信敏恭寬毅皇帝實錄卷之三百二十三

大清穆宗繼天開運受中居正保大定功聖智
誠孝信敏恭寬毅皇帝實錄卷之三百二十四

教諭

同治十年辛未十一月壬寅諭內閣榮全奏

大員不勝邊疆之任請旨另簡一摺科布多
幫辦大臣文碩於所屬臺站並不實心整飭
前據該大臣知照榮全烏梁海各臺業經安
設乃沿途仍復阻滯似此空言塞責毫無實
濟實屬有負委任文碩著即行開缺交部嚴
加議處○諭軍機大臣等榮全奏科屬臺站
阻滯設法前進減調後路大兵請飭催金順
等赴任各摺片此次榮全前赴伊犁關繫西
北大局經過各臺站宜如何豫籌周備俾利

進行。乃文碩空言敷衍。毫無實濟。致榮全行抵烏梁海頭臺。卽已阻滯。實堪痛恨。本日已將文碩開缺。並授保英為科布多幫辦大臣矣。現在榮全阻於察庫爾泰臺。未能前進。常順身任科布多參贊大臣。責無旁貸。著卽將烏梁海迤西各臺迅速設復。並著保英迅赴新任。與常順會商妥辦。儻榮全及各官兵因臺站梗塞。貽誤事機。恐常順保英不能當此重咎也。科城籌辦一切常順等務與烏里雅

蘇台將軍等悉心會商。以期彼此聯絡。聲息相通。前因榮全需兵甚急。疊催杜嘎爾飭令吉爾洪額。訥蘇肯迅速拔隊前進。本日覽榮全所奏。是該副都統咨照榮全各情。均屬空言搪塞。並無起程確期。實屬不知緩急。杜嘎爾著交部嚴加議處。仍著該副都統懍遵疊次諭旨。迅飭吉爾洪額等剋日起程。星馳前進。毋再觀望遷延。榮全因科城駝隻僅數。官兵五百名裹帶之需。擬將訥蘇肯所帶吉林

官兵五百名。卽用科城存駝前進。至吉爾洪額所帶黑龍江官兵五百名行至科城後。由該城參贊大臣等設法送至哈密。交景廉調遣。規取烏魯木齊。自係因駝隻不敷起見。惟榮全兵力甚單。應否設法仍令吉爾洪額一併赴伊。抑或於烏科兩城暫紮。隨後調往。或撥至景廉行營。著榮全斟酌情形。並咨商景廉分別辦理。所有榮全糧餉轉運及後路一切事宜。著金順奎昌多布沁扎木楚常順保

英認真經理。儻有貽誤。必惟該將軍等是問。烏城事機緊要。金順務當趕緊部署。速赴新任以重職守。圖庫爾前已告病開缺。索倫領隊大臣。本日已簡放額爾根巴圖。著榮全卽飭該員將葦塘子索倫人眾妥為撫輯。以安其心。富和已放塔爾巴哈台參贊大臣。應令駐紮何地以資鈴束。並料理官兵前進及轉運糧餉軍械之處。著榮全與富和會商辦理。至巴燕岱錫伯察哈爾厄魯特各領隊大臣

員缺。卽著榮全於派往之沙克都林扎布等數員到伊後。擇其人地相宜者奏請簡放。將此由六百里各諭令知之。尋兵部議。杜嘎爾照捏詞蒙混降一級調用。例上加等。降二級調用。係私罪不准抵銷。得旨著加恩改為革職留任。○又諭景廉奏。變通餉路。親赴巴里坤籌辦事宜。文麟奏。派兵隨同西征。並籌辦防務各一摺。師行糧隨。必須豫為籌畫。景廉擬帶頭起官兵馳赴巴里坤。設法採買軍糧。

並於巴里坤迤西安設臺站。著卽會商伊勒屯等妥為辦理。一俟辦有頭緒。卽當督催後起官兵迅速前進。烏魯木齊奇台古城等處。自變亂後。戶民流寓敦煌者甚多。景廉現已曉諭該戶民等。如有願回原籍者。准其隨營西進。並擬將來發給牛具籽糧。俾資生業。酌量升科。擇其精壯者入營訓練。著卽照所擬隨時相機籌辦。景廉所部靖邊各營兵力尚單。文麟已派孔才帶領威儀前軍馬隊一營。

隨同西進。並擬將新收定西鎮西等營弁勇。統歸景廉節制調遣。此項民勇。不為賊匪所煽。頗知順逆。第烏合之眾。未必能諳紀律。景廉由奇台一帶前進。務宜察看情形。妥籌駕馭。俾其踊躍用命。以資聯絡。肅州賊匪屢次出關竄擾。安敦玉等處勢甚緊迫。景廉所部張玉春三營。現既調令西行。愈形空虛。前諭成祿先派數營前赴嘉峪關扼紮。著仍遵前旨。趕緊派往。扼賊出竄之路。一俟徐占彪抵

肅後。成祿卽當拔隊出關。毋稍遲滯。徐占彪現已行抵何處。著左宗棠催令星速到防。俾成祿得以早日成行。哈密一帶防守。及景廉後路轉運各事宜。著文麟熟籌妥辦。毋稍貽誤。安西關繫緊要。並著檄飭該州協調集戶勇協同防守。一面派員前往募勇扼防。以壯聲勢。前撥直隸等省專解巴哈兩城餉銀三十萬兩。半年之久。解到無幾。刻下哈密軍務緊要。需餉急迫。著戶部查明應撥哈密之餉。

速為催解。以資接濟。景廉請將四川等省協餉。改由察哈爾轉解。本日已諭令各該督撫。並察哈爾都統照辦。此項餉銀解到時。仍著景廉成祿。分別動用。將此由六百里各諭令知之。○又諭。前因戶部奏撥景廉成祿軍餉。當經諭令四川每月撥銀一萬數千兩。湖北陝西每月各撥銀數千兩。解交成祿景廉軍營。其專協之款。四川欠銀六十五萬兩。山東欠銀十九萬五千兩。山西欠銀五萬五千兩。河南欠銀四萬四千兩。並諭吳棠等迅速解甘。轉飭道員蕭宗幹解交景廉等應用。又戶部續撥山東地丁銀五萬兩。諭令丁寶楨迅解成祿軍營。茲據景廉奏。現在甘肅平番一帶。皆有賊蹤。而肅州回匪。復出關竄擾。道路依然梗阻。請飭暫行改道轉解。以便與成祿分別支用等語。著照所請辦理。所有此次四川山東山西河南專協欠解景廉成祿軍餉。除業由道員蕭宗幹解運。並專撥成祿軍餉。

銀五萬兩外。其餘未解之款。及四川湖北陝西應解月餉。著李瀚章吳棠李鶴年丁寶楨鮑源深蔣志章郭柏蔭文彬。即將各該省應解景廉成祿餉銀。暫行解至察哈爾。轉解景廉軍營。俟驛路疏通。再由甘省運解。額勒和布。慶春。於各該省餉銀到時。即行派員轉解。景廉軍營。毋稍遲誤。將此由五百里諭知李瀚章吳棠李鶴年。額勒和布慶春。丁寶楨鮑源深蔣志章郭柏蔭。並傳諭文彬知之。○以

鑲藍旗漢軍副都統富和為塔爾巴哈台參贊大臣。記名副都統保英為科布多幫辦大臣。賞二等待衛額爾根巴圖爾等侍衛。為伊犁索倫領隊大臣。○賞記名海關道志剛副都統銜署烏里雅蘇台參贊大臣。○以扎哈沁和碩特土爾扈特等旗辦理臺站出力。予筆帖式錫拉布等升賞有差。○追予山東泰安等處陣亡殉難舉人賈公策等紳民婦女四千九百三十四名口分別旌卹如例。並予

建祠○追予湖北節年陣亡殉難武生吳德

師等紳民婦女九十二名口分別旌卹如例

○旌表守正捐軀直隸阜城縣民張太東妻

劉氏○癸卯以廣東勦辦高明等處客匪出

力賞都司江志等花翎千總李元亮等藍翎

餘加銜升敘開復有差○甲辰諭內閣曾國

藩奏查閱各營官弁分別舉劾開單呈覽一

摺所舉之吳松營參將鄭雲祥掘港營遊擊

周鼎撫標中軍參將韓晉昌提標中軍參將

王幼山揚州營參將朱元松鹽捕營都司曾

德麟徐州鎮標中營守備趙光宗署宿遷營

遊擊劉鶴年參將鄒光前宿遷營守備吳藹

臣署江甯城守協副將鄭龍彪副將田恩來

著曾國藩存記遇有缺出不論班次酌量保

奏升補蘇松鎮中營遊擊華封南匯營都司

安殿魁掘港營守備錢秉直年力就衰均著

以原官勒令休致提標右營守備丁仁麟氣

力輟弱著卽行革職江陰營守備許先傳舉

動遲鈍著以原官勒令休致洪湖營都司王

文治志氣昏惰葦蕩左營守備王鴻業貪鄙

齷齪署淮揚右營中軍守備孫耀心地糊塗

遇事廢率南匯營千總張朝佐年老力衰提

標左營把總徐榮標倫常乖舛干預詞訟奇

兵營把總曹安邦提標左營把總鞠華江提

標中營外委夏成榮揚州營額外張聯魁差

操懈惰均著卽行革職另片奏請將劣蹟昭

著各營員分別革職降補等語廬州營都司

陳兆鴻強很貪鄙有玷官箴著卽行革職全

山營遊擊虎崑揚營伍廢弛難期振作著開

缺以守備降補○以太常寺卿程祖誥為宗

人府府丞○改派通政使司副使承繼稽察

盧溝橋煮賑事宜○乙巳諭軍機大臣等前

因袁保恆奏西征全軍盼餉甚亟懇請速籌

撥濟並請借撥洋稅當交戶部速議具奏茲

據該部奏稱西征全軍一月滿餉需銀六十

萬兩各海關六成洋稅本為解充京餉之需

屢經各省截留勢難再行指撥各省欠解西
征餉銀甚鉅現擬援照上年成案仍從積欠
最多之省酌量提撥河南江蘇湖北各提銀
八萬兩浙江福建四川廣東各提銀五萬兩
山東山西安徽湖南各提銀四萬兩共成六
十萬兩之數等語卽照所議著各該督撫嚴
飭藩司迅速如數籌撥限於年內解交西征
糧臺以應急需現在渡洮官軍正在得手餉
需自刻不容緩僅各該省逾限不解卽由左

宗棠查照同治八年八月奏案指名嚴參其
餘各省關應協月餉並著各該督撫飭令按
月籌解不准拖延其以前積欠各餉仍著陸
續籌解俾資接濟將此由五百里諭知曾國
藩瑞麟左宗棠文煜李瀚章吳棠李鶴年何
璟英翰楊昌濬王凱泰丁寶楨鮑源深郭柏
蔭並傳諭文彬王文韶袁保恆知之○山西
巡撫鮑源深奏甫經到任請將本年大計展
限辦理從之○丙午以烏喇特阿畢爾米特

等旗地方勒匪出力賞委參領全奎等花翎
筆帖式德善等藍翎餘加銜升敘有差○以
察哈爾官軍勦辦沙漠竄匪出力予協領訥
蘇肯以副都統簡放餘加銜升敘有差○丁
未諭內閣前因四川酆都縣知縣徐濬鏞於
江水進城時先行遠避置難民於不顧當將
該員革職查辦茲據吳棠奏稱查明上年六
月間江水陡漲酆都城內居民無路走避徐
濬鏞先自封船帶印攜眷登舟遲至數日始

雇備船筏救出難民數十人遺民逃生不及
亦有溺斃等語已革酆都縣知縣徐濬鏞於
水漲進城時輒先登舟出避並未救護災黎
以致民多溺斃實難辭咎徐濬鏞前已革職
著永不敘用以為玩視民瘼者戒○諭軍機
大臣等前因曾壁光奏廣東湖北湖南四川
奉撥協餉均因本省有事未能解黔請飭改
撥以符定數當令戶部速議具奏茲據奏稱
現在各省同一支絀若將四省從前酌定之

餉。儘數改撥。實係無款可籌。況協黔餉內。湖南早經減解。廣東湖北為數無多。請旨飭催等語。所有原撥湖北及山東福建江蘇月協黔餉各二萬兩。原撥湖南廣東及兩浙東海關九江關月協黔餉各一萬兩。著各該督撫督飭藩司運司監督等。按月如數籌解。毋稍延緩。黔軍防剿。正當喫緊。僅因餉需缺乏。貽誤戎機。恐該督撫等不能當此重咎也。川省連年災歉。其援黔各軍。本有該省應解協餉。再將另撥協餉一律責令報解。誠恐力有未逮。著截至同治十年十月。將川省按月協黔的餉一萬兩暫行停止。即自同治十年十一月起。著楊昌濬在兩浙鹽課鹽釐項下。於月協黔餉一萬兩外。按月再加解一萬兩。以符原撥十四萬之數。至解餉獎敘。戶部無從懸揣。嗣後各省籌解黔餉。著曾壁光於年終詳查。何處解清。何處解過幾成。何處分毫未解。奏明請旨分別勸懲。以昭覈實。原撥協黔月

餉十四萬兩內。廣東僅一萬兩。據該撫奏稱。廣東月協二萬兩。有無錯誤。抑另有添協。著曾壁光查明具奏。劉坤一當懍遵前旨。除新撥關餉一萬兩按月批解外。迅速提撥實銀五十萬兩。限於年內埽數解黔。不准再涉遷延。將此由五百里諭知曾國藩。瑞麟。文煜。李瀚章。吳棠。何璟。丁寶楨。王凱泰。楊昌濬。劉坤一。郭柏蔭。曾壁光。並傳諭文彬。王文韶知之。又諭傳諭廣東提督張曜。張曜奏。勦辦竄匪情形一摺。提督李葆琛等於九月初六等日。在紅沙梁井泉墩地方。疊次擊賊。獲勝。西甯等處回匪六七百人。從烏喇特旗擄掠而歸。復經李葆琛等率隊勦擊。逸賊遁向鎮番西南。另股竄匪。擾及中衛及甯夏縣屬境。經張曜督隊迎剿。均有斬擒。勦辦尚為奮勉。陝回肅集西甯大通一帶。四出剽掠。柳林湖素為產糧之區。連年被擾。現經張曜抽調兩營添紮。以厚兵力。即著飭令該官兵等嚴密防

堵遇有賊匪竄近。卽行實力殲除。不可稍有疏虞。其甯夏一帶地方。著該提督將防勦事宜。隨時相機妥辦。以副委任。○河東河道總督喬松年奏甫經到任。請將本年大計展限辦理。從之。○戊申。諭軍機大臣等。前據景廉奏籌畫進兵。請飭添撥馬隊。當經諭令穆圖善酌量分撥。茲據穆圖善奏稱。存營馬隊官兵僅一千二百餘名。均已分途扼紮。現當進勦河州。各處要隘亟需扼堵。勢難再行抽調等語。所奏自係實在情形。穆圖善既無馬隊可撥。榮全前奏吉爾洪額所帶黑龍江官兵五百名。由科城設法送至哈密。交景廉調遣。已有旨諭令榮全酌度辦理。如景廉軍營必需此項馬隊。卽著會商榮全酌調前往助勦。西征糧臺撥解景廉餉銀十萬兩。已有六萬兩由蘭州起程前進。其餘四萬兩俟解到蘭州時。著穆圖善催趲護送。迅解景廉軍營。以應急需。將此由五百里各諭令知之。○以陝

西布政使翁同爵為巡撫。前任河南按察使譚鍾麟為陝西布政使。○予故陝西巡撫蔣志章祭葬如例。○追予廣東從化殉難知縣李福培諡剛烈。湖北省城殉難知縣王思綬諡武愍。○旌表守正捐軀江蘇宜興縣民陳青三妻萬氏。○己酉。諭內閣。鑲黃旗滿洲奉承襲恩騎尉世職。請旨辦理一摺。據稱該旗世襲恩騎尉一缺。現應揀選富綿擬正。該員現任貴州知州。可否仿照各省駐防調取來

京承襲等語。富統所出恩騎尉一缺。卽著該旗奏請承襲。富綿著無庸調取。嗣後外省官員遇有恩騎尉及雲騎尉世職應行承襲之處。卽照此次諭旨奏請承襲。俟該員因公來京。或例應引見時。再由該旗補行帶領引見。以示體恤。○諭軍機大臣等。各省藩臬兩司。有用人理財察吏安民之責。必須通達治理。廉正有為。方能稱職。前已諭令各直省督撫留心訪察。據實密保。其現任兩司中。如有聞

茸不職者。亦豈可令其尸位曠官。致滋貽誤。廣西布政使康國器。按察使佛爾國春。能否勝任。著劉長佑確切查明。據實具奏。毋稍遷就。將此諭令知之。○又諭李鴻章奏請飭催新授藩司迅速赴任等語。前有旨將孫觀簡放直隸藩司。直隸地方緊要。政務殷繁。各屬被災地方。亟須加意撫綏。來春總督應駐天津。保定一切公事。尤賴藩司經理。著瑞麟傳知該員務於開春後即行雇搭輪船。由海道迅速赴任。毋稍遲延。將此諭令知之。○又諭李鴻章奏請飭閩省採購米石解津接濟春賑一摺。直隸被水災區較廣。疊經籌款撫恤。刻下天津河間低窪之處。積水未涸。二麥已補種不及。來春青黃不接。窮民生計維艱。且前次截留採辦米石。所餘無多。自應先事豫籌。著文煜。王凱泰迅速採購閩米四萬石。或由閩廠官置輪船。或酌量添雇商船。分批趕運。務於來春開河時解赴天津。俾資接濟。毋

稍遲誤。將此各諭令知之。○又諭劉長佑馮子材奏官軍攻克舊街逆巢。首逆就擒一摺。逆首蘇幟。漢股匪廣聚廣安。經瑞麟。劉長佑等各派官軍協同圍剿。先將舊街賊巢攻克。乘勝追殺。直抵海甯。蘇逆攜其養子亞鄧暨悍匪數人突奔東興。為官軍弋獲。東路漸清。此次出力各員。准由馮子材查明存記。彙案請獎。蘇逆既經弋獲。是否解至廣東正法。仍著劉長佑等詳細具奏。該逆養子亞鄧現在潛逃。漏匪張侍灝亦敗竄十萬山中。餘黨紛紛逃回東界。亟須速行搜捕。悉數擒獲。淨絕根株。著瑞麟。劉長佑。馮子材分飭派出各軍實力搜拏。以消邊患。西路瓊北二山股匪。並著劉長佑等飭令劉玉成等軍認真會剿。迅殄逆氛。將此由四百里各諭令知之。○展緩吉林琿春等處歉收地方應徵倉穀。○庚戌以詹事府少詹事馬恩溥為詹事。○辛亥諭軍機大臣等。喬松年奏豫籌來年修守請添

撥節省防險銀兩一摺。據稱黃河南北兩岸各廳工程緊要。來歲修守事宜。必須豫籌布置。方不至臨時掣肘。現在額款不敷。請於歷年節省防險銀兩內添撥銀二十六萬兩。南岸各廳分給十四萬兩。北岸各廳分給十二萬兩等語。著照所請。於歷年節省項下添撥銀二十六萬兩。由河南巡撫督飭藩司。於年內先撥四成。以便採購料物。其餘六成。務於春汛前撥發。俾資接濟。喬松年務當督飭該

道廳等覈實動用。總期工堅料實。不得稍涉虛糜。將此各諭令知之。○又諭杜嘎爾奏調赴伊犁官兵起程日期。豫籌臺站事宜。並請飭部撥餉各摺片。訥蘇肯所帶吉林官兵五百名。經杜嘎爾飭令十二月初六日起。分隊起程。吉爾洪額所帶黑龍江官兵五百名。亦令豫籌駝隻前進。據稱該隊現由克克伊爾根起程。必須由烏蘭察布盟所屬臺站經過。方能行至濟斯洪果爾地方。各該臺站應備

一切支應。著杜嘎爾與定安富勒琿額勒和布慶春咨商辦理。務當豫籌周備。俾利進行。其烏里雅蘇台所屬臺站。並著金順奎昌多布沁扎木楚一體籌辦。儻該官兵未能前進。查明在何臺阻滯。必惟該管之將軍都統等是問。其旣房柴草等項。並著定安富勒琿行令管站之四子部落王等寬為籌備。俾資接濟。榮全前奏吉爾洪額所帶黑龍江官兵五百名。由科城設法送至哈密。交景廉調遣。曾

有旨諭令榮全與景廉會商辦理。著榮全懍遵本月二十二日寄諭。與景廉斟酌情形。調往助剿。杜嘎爾因所部官兵餉項不敷。請飭部撥銀五萬兩。著戶部照數撥給。杜嘎爾行營餉銀。前據李鴻章奏未便由內地派員遙為經理。此項餉銀。著戶部知照順天府解赴察哈爾都統衙門。由杜嘎爾派員領取。以供支放。該副都統現因賊已遠遁。擬將官兵移於四子王遊牧屯紮。惟逆蹤來去無定。仍當

勤加偵探。何路有賊。卽著派兵馳擊。不得株守一隅。致滋貽誤。將此由六百里各諭令知之。○壬子。諭內閣。前因醇郡王奏屬員被叅冤抑等情。當派御前大臣軍機大臣將桂祥烏什哈互稟一案。會同審訊。旋據訊明大概情形。並究出大員授意說合。先後降旨將桂祥等分別解任革職。並將達明阿一併解任質訊。茲據王大臣等審明定擬具奏。此案正藍旗滿洲協尉烏什哈。因巡緝地面。輒令各甲喇裁兵撥餉。自雇壯丁。又令各甲喇扣存銀兩。豫備墊道差使。雖無入己情事。實屬因公科斂。烏什哈著卽行革職。步軍校實祥等各撥給烏什哈餉銀。並扣存豫備墊道銀兩。均有應得之咎。實祥。蘇清阿。成明。雙奎。奎鏐。均著交部議處。左翼翼尉桂祥於辦公銀兩。輒先行作價報銷。隨後始陸續換銀。致與原報錢數不符。又扣存廠腳銀兩。擅自改用市平。雖所存各款。均無侵吞入己情事。實屬辦

理含混。桂祥著交部議處。已革步軍校聯興等經管帳目。亦不應隨同含混。聯興。桂澄均著開復暫行革職處分。仍交部照例議處。醇郡王摺內所稱右翼總兵達明阿貪穢無行。以烏什哈為綫索各節。雖事無實證。惟達明阿授意文秀。令向桂祥開導。顯係有意彌縫。且既降旨明白回奏。猶復飾詞掩蓋。尤屬非是。著交部嚴加議處。步軍統領存誠雖無偏袒屬員授意說合確據。惟於烏什哈擅自科斂。桂祥報銷含混各節。失於覺察。迨既經互控。遲至四月之久。始行奏交刑部。其為意存消弭。亦可概見。左翼總兵榮祿。同辦一事。亦難辭咎。存誠。榮祿均著交部議處。右翼翼尉文秀。經達明阿屬令向桂祥勸解。副翼翼尉富森布。委翼翼尉廣忠。左翼副翼尉鳳祥。隨同相勸。均有不合。著交部分別察議。至烏什哈稟揭桂祥之件。步軍統領衙門司員先回步軍統領。閱數日始回左右兩翼總兵。實屬遲延。

著查取職名交部議處。刑部於桂祥烏什哈互控各節。並未審有確供。其奏參桂祥輒入朝房遞呈。尚無不合。應無庸議。醇郡王令桂祥具稟呈遞。係由桂祥未將被控實情回明。且因該員派往軍營差使緊要起見。所有自請處分。著加恩免其置議。桂祥具稟呈遞。亦係恐誤軍營要差起見。情尚可原。所有刑部原參處分。著該部即行撤銷。醇郡王所請桂祥俟案結後仍赴軍營之處。著該部於覆奏

桂祥處分時。再行聲明請旨。尋兵部議達明阿請即革職。桂祥降三級調用。存誠榮祿均降一級調用。得旨。存誠榮祿均著加恩改為革職留任。達明阿著照部議革職。桂祥著降三級調用。仍遵前旨。即赴伊犁交榮全差委。○又諭。都興阿等奏。已革協領帶隊未能振作。官差疏懈一摺。已革協領毓昌經都興阿等派令前往孤山勦辦賊匪。乃該革員任令匪徒來去自由。並不隨時勦捕。實屬不知振

作。迨都興阿等將該革員撤回。又不入署銷差。遲至旬餘始行具稟請假。尤屬任意疏懈。毓昌本係革職之員。前經都興阿等奏請賞還副都統銜花翎。著仍革去副都統銜。拔去花翎。不准留營。以示懲儆。孤山聚匪不少。著該將軍迅速派隊前往勦捕。毋任該帶兵官粉飾遷延。自干重咎。○又諭。淮安關監督舒麟奏。運鉛委員欠繳銀兩。請飭追繳等語。江蘇候補同知直隸州知州朱桂生。候補知縣

朱應江。湖北候補知縣方殿元。解運京鉛。行抵淮安大關。經舒麟照例查驗。該委員等抗不遵照。其單開木植等貨。應納淮宿二關正稅及船料等銀七百十四兩零。亦未完交。稅課自有定章。豈容任意延宕。著兩江總督督飭藩司。勒令該委員等將欠繳稅銀如數完繳。毋許抗欠。嗣後各省運解官物。若有多餘及別項貨物。務令遵例即時納稅。船料一項。並令船戶完納。儻再違抗。即由監督查明奏

叅以重稅課而倣效尤。○諭軍機大臣等。奕榕奏緝獲著名盜首。並捏報獲犯要功之署。經歷請旨查辦各摺片。據稱奉省積年盜首。劉疤拉脖子。經守備銜劉鴻恩在昌圖所屬營城子屯地方訪獲。正在押解送省間。即經署昌圖八家鎮經歷余文鳳。帶役接護解送該廳。並據該處鄉約及原拏劉疤拉脖子孫桂芳等。均稱解送該犯。行至營城子附近地方。即被余鳳文率領差役搶去等語。劉疤拉脖子一犯。既經劉鴻恩拏獲。何以余文鳳竟敢率領多人將該犯搶去。虛實均應徹底根究。即著都興阿等確切查明。據實具奏。並將該犯審明後。即行正法。未獲之烏痣李及漏網匪黨。仍著都興阿、奕榕等嚴飭奉吉兩省派出員弁一體嚴拏務獲。毋任免脫。所有獲犯出力之劉鴻恩著准其先行奏請獎敘。以示鼓勵。將此各諭令知之。尋都興阿等奏遵查劉鴻恩越境購綫訪拏。因駐紮太遠。馳至

時該犯已先一日被獲解送。為余文鳳所得。並非攘奪要功。報聞。○又諭奕榕奏副都統緝賊傷亡。請將不能接應之委參領懲辦等語。吉林阿勒楚喀所屬拉林界二道溝地方有馬賊李萬銀等結黨肆擾。經記名副都統常在帶兵前往勦捕。擊斃賊匪多名。以後路無兵接應。中槍殞命。該匪逃入伯都訥界。復經官兵進勦。逃逸過江。據擒賊供稱匪首李萬銀等現欲逃回呼蘭藏匿。業經奕榕等咨照黑龍江將軍派兵兜拏。並派協領全福帶兵馳往沿江一帶會合按拏。即著嚴飭派出員弁認真緝捕。並著德英、托克湍迅速派員帶兵合力嚴緝。務將此股賊匪悉數弋獲。毋任一名漏網。委參領巴順留駐五棵樹地方。於常在帶兵勦賊。不知接應。實屬畏葸無能。著革去副都統銜。摘去頂帶。仍令隨隊帶兵以觀後效。將此由四百里各諭令知之。○予吉林二道溝陣亡記名副都統常在祭葬。世

職○癸丑以神靈顯佑。頒直隸天津府

大王廟扁額曰恬波普佑○諭內閣倉場侍

郎英元等奏。查明剝船朽壞情形一摺。通惠

河四牘額設剝船。在保固限內朽壞。前侍郎

鍾岱。宋晉。前署石壩州判汪瀛。應如何照例

價攤賠。裕豐局商人李明道。或應令攤賠。或

應擬罪名。著戶部覈議具奏。此項剝船。應行

修整。著派董恂。桂清。赴通查勘。奏明辦理。另

片奏。大通橋剝船。亦係商人李明道等承修。

同在保固限內。虧朽。著戶部一併覈辦。○甲

寅。諭軍機大臣等。有人奏。薊州知州宋彭壽

每遇官差過境。輒向四鄉私拏羸馬車輜。胥

役藉端索詐。信任門丁秦蘭亭。谷香。帆。攬權

納賄。遇事招搖。本年薊州被水甚重。匿災不

報。住來官差。苛派鄉民草豆等項。以致物議

沸騰等語。所奏是否屬實。著李鴻章按照所

參各節。確切查明。據實具奏。毋稍徇隱。原摺

著鈔給閱看。將此諭令知之。○又諭奎昌等

奏請撥銀兩備用一摺。舊駐塔爾巴哈台之

厄魯特察哈爾。哈薩克人丁。自失遊牧以來。

僑居科布多。接境額爾濟斯河南之布倫托

海一帶。奎昌等以該遊牧舊地。土脈肥饒。水

草茂盛。較勝布倫托海。不若令其仍遷原處。

卽著金順。奎昌。多布沁。扎木楚。與常順。保英

富和。文碩。會同咨商。責成巴彥特古斯。妥為

辦理。該營舊設總管副總管等缺。並著責令

巴彥特古斯。就現在人員內。詳加察看。如有

辦公勤慎。才具優長者。卽著該將軍大臣等

奏請作為實缺。如其不堪勝任。亦卽揀選更

換。以資得力。至舊設兵額。應如何酌增。領催

及捕盜兵丁之處。著該將軍大臣等。妥籌具

奏。奎昌等所奏官兵廉俸餉銀。請自來春為

始。按季支發。其厄魯特等人丁。仍還故土。應

需餉銀。請賞銀一萬兩。均著照所請行。惟以

上各款。均應豫為籌備。以供支放。著戶部撥

銀二萬兩。卽咨照指撥。省分並察哈爾都統。

務於來年春季。埽數解至烏里雅蘇台。分別動用。科布多塔爾巴哈台事機緊要。亟須大員前往經理。常順保英。富和。務當星速進行。迅赴新任。以重責守。將此由六百里各諭令知之。○人諭前因榮全奏。料屬臺站阻滯。文碩並不實心整頓。業經降旨。將文碩開缺。交部嚴加議處。並將臺站各員。照榮全所請。分別獎勵。茲據文碩奏稱。此次因榮全前赴伊犁。業經派員分往各臺。督催照料。旋接榮全咨稱。烏梁海六臺。烏拉較少。復多疲瘵。以致不能前進。是否辦差之員。料理未妥。抑係出差之人。有意吹求。藉口逗遛。又管旗章京鄂勒哲依達什。要挾保獎。防禦扎倫布。毫無布置。台吉克什克布彥。管旗章京克什克圖。廢弛臺務。請將該員等。保案撤銷查辦。並稱該署將軍奏牘文移。每多砌詞裝點。是以不敢深信其言等語。文碩所奏各節。是否屬實。常順。保英。俱係新授科布多大臣。無所用其迴

護。著將該將軍等所奏。應保應撤各員。確切查明。據實具奏。原摺著鈔給閱看。將此由四百里各諭令知之。○以辦理兵差無誤。予杜爾伯特盟長棍布扎布等議敘有差。○蠲緩浙江仁和。錢塘海甯。富陽。餘杭。臨安。新城。於潛。昌化。嘉興。秀水。嘉善。海鹽。平湖。石門。桐鄉。歸安。烏程。長興。德清。武康。安吉。孝豐。諸暨。金華。蘭谿。東陽。義烏。浦江。湯溪。西安。龍游。建德。淳安。遂安。壽昌。桐廬。分水。鄞。山陰。會稽。蕭山。餘姚。上虞。臨海。黃巖。甯海。天台。仙居。永康。武義。江山。常山。開化。麗水。縉雲。青田。松陽。宣平。象山。新昌。嵊。樂清。遂昌。雲和。六十五州縣暨杭嚴嘉湖衛州。三衛被水。被旱。被風。被雹。地方並未墾田畝。本年額賦雜課有差。○乙卯。諭軍機大臣等。戶部奏。議撥東三省官兵俸餉銀兩。並請飭催各省。厯年欠解銀兩。各摺片。據稱。奉天。壬申年俸餉。約需銀八十五萬兩。除該將軍奏明。應抵用銀三十三萬三千

兩外。計需銀五十一萬七千兩。按照章程折放。應撥實銀四十一萬三千六百兩。復將奉天應抵各款。詳細查覈。共抵銀三十萬五千一百兩。尚應撥銀十萬六千兩。卽在該省應徵海口船規項下提撥。有贏無絀。吉林俸餉。約需銀四十六萬餘兩。除本省應抵各款外。應撥銀九萬一千八百兩。照章折算。實需銀七萬三千四百四十兩。並打牲烏拉應領銀三萬六千五百五十七兩零。均應全數撥給。

黑龍江俸餉。應領銀三十五萬二千兩。照章折算。約需銀二十八萬一千六百兩。除應抵各款外。應撥銀二十四萬五千八百兩。其應領制錢一千七百一十串。由盛京戶部金銀庫撥給等語。著照所議辦理。所有吉林應撥銀七萬三千四百四十兩。著提撥長蘆壬申年應徵鹽課銀三萬三千四百四十兩。山東壬申年應徵地丁銀二萬兩。河南壬申年應徵地丁銀二萬兩。打牲烏拉應撥銀三萬六

千五百五十七兩。著提撥長蘆壬申年應徵鹽課銀一萬兩。河南驛站存贖銀二萬六千五百五十七兩。黑龍江應撥銀二十四萬五千八百兩。著提撥長蘆壬申年應徵鹽課銀五萬五千八百兩。山東壬申年應徵地丁銀五萬兩。河南壬申年應徵地丁銀四萬兩。驛站存贖銀五萬兩。直隸旗租銀五萬兩。卽著各該督撫按照戶部指撥銀數。遵委妥員。迅速解赴盛京戶部交納。毋許遲誤。並著瑞聯

俟各該省解到時。卽知照吉林打牲烏拉黑龍江派員赴奉天領取。以資散放。仍由各該將軍按照折放章程。覈實放給。不得稍有浮冒。並將奉省銀價。按月造報。及用過銀錢各數目。於奏銷時照例題報。如有餘贖銀兩。於下年請領時聲明備抵。至該三省節年俸餉銀兩。直隸山東河南陝西等省。積欠至一百八十八萬餘兩之多。屢催罔應。實屬延玩。著各該督撫嚴飭藩運各司。將前項欠解銀兩。

陸續籌款。解赴奉省交納。以濟該三省俸餉。要需。僅各該省仍復延不解交。卽著戶部指名嚴叅。原片著鈔給李鴻章。丁寶楨。文彬。李鶴年。翁同爵。閱看。將此諭知李鴻章。都興阿。瑞聯。奕榕。德英。李鶴年。丁寶楨。翁同爵。並傳諭文彬知之。○又諭。戶部奏遵旨議撥。並請催巴哈兩城餉銀。文麟等奏懇撥部餉暨飭催欠餉各摺片。前經戶部於各省欠解新疆月餉內提撥巴哈兩城餉銀三十萬兩。本年正月。文麟等奏哈密餉需支絀。請飭部撥銀二十萬兩。經戶部議令卽在前提三十萬兩內分撥應用。此項撥款。除直隸埽數解清外。山東欠解銀七萬兩。山西欠解銀三萬兩。河南提撥銀十萬兩。分毫未解。刻下哈密事機緊要。盼餉極為迫切。著丁寶楨。文彬。鮑源深。李鶴年。迅速籌解。不准再涉遷延。此係巴哈兩城之餉。各該省解到時。景廉。文麟當與伊勒屯等分撥應用。各該省所解之餉。著懍遵

前旨。暫行改道解至察哈爾。卽由額勒和布。慶春派員轉解。以期迅速。至文麟等復請撥京餉二十萬兩。茲據戶部奏稱。現難盡數籌撥。庫款擬先在部庫撥銀五萬兩。再於欠解新疆餉銀之山東提銀五萬兩。河南提銀四萬兩。山西提銀四萬兩。直隸提銀二萬兩。以符二十萬之數等語。所有部撥之五萬兩。著照文麟等所請。發交委員常祥等領解回營。其提撥山東等省銀十五萬兩。著李鴻章。丁寶楨。文彬。鮑源深。李鶴年。嚴飭各該藩司。迅卽如數措齊。解交察哈爾都統派員轉解。前借撥西征糧臺之景廉軍餉十萬兩。據袁保恆奏報業經先後起解。此次哈密所撥餉銀未到以前。著景廉將收到之餉。與文麟通融分用。一俟哈密餉銀解到。再行劃還歸款。各省應解新疆月餉。自五年九月奉撥起。截至本年十一月止。山西僅解二十七萬八千兩。欠解四十七萬二千兩。山東僅解二十萬五

千兩。欠解二百零七萬兩。河南僅解四萬四千兩。欠解一百四十一萬八千五百兩。直隸僅解四萬五千兩。欠解十一萬七千五百兩。現在用兵。規復新疆。需餉甚殷。部庫極形支絀。嗣後未能再撥。著李鴻章、丁寶楨、文彬、鮑源深、李鶴年。將欠解新疆月餉。陸續籌措。解交察哈爾都統轉解。其以後月餉。仍著按月如數解清。以備新疆各城分別提用。山東應解哈密糧價。除已解四萬兩外。尚欠解六萬

兩。著丁寶楨、文彬督飭藩司迅速籌解。俾濟要需。將此由五百里諭知李鴻章、李鶴年、額勒和布、慶春、景廉、文麟、丁寶楨、鮑源深。並傳諭文彬知之。○又諭文麟、景廉奏玉門敦煌賊擾情形各等語。肅州回逆。自本年三月至六月間。疊次竄擾玉門縣屬之昌馬湖赤金等處。勢甚蔓延。其撲犯敦煌之賊。於七月間退竄。後復於八月間糾集大股。紛擾該縣境內。情形甚為喫緊。該處僅有李天和所帶健

銳二營。兵力較單。文麟等現派營官王者彥等率領馬隊百餘名前往援應。著卽飭令會合敦煌官兵實力堵剿。迅埽狂氛。玉門為關外首站。逆匪出竄。首當其衝。該處僅有健銳一營。威儀一營。亦恐不敷分布。文麟等務當飭令該縣文武聯絡兵團。妥籌防範。其屢次擊賊出力之員弁團總人等。准其查明彙案保奏。該逆既有攻撲哈密之謠。文麟等尤應加意防範。以杜窺伺。刻下關外賊氛甚熾。若

不過其後路。必至紛紛出竄。愈無底止。著成祿懍遵前旨。迅派數營。先行馳赴嘉峪關扼紮。以資截剿。仍俟徐占彪到肅。卽行拔隊出關。毋稍遷延。並著左宗棠催令徐占彪趕緊進發。卽將該員到肅日期。迅速奏聞。將此由六百里各諭令知之。○以甘肅安西擊退回匪。賞提督張玉春白玉翎管一支。白玉搬指一箇。火鐮一件。大荷包一對。小荷包兩箇。都司楊文嵐。外委萬大富軍功。蔣全龍。巴圖魯

名號千總龍翼保以守備用。並賞花翎。縣丞彭慶鏞藍翎。餘加銜升敘有差。予陣亡都司張泰和祭葬世職加等。

大清穆宗繼天開運受中居正保大定功聖智誠孝信敏恭寬毅皇帝實錄卷之三百二十四

大清穆宗繼天開運受中居正保大定功聖智誠孝信敏恭寬毅皇帝實錄卷之三百二十五

教修

同治十年辛未十二月丙辰朔

上詣鍾粹宮問

慈安皇太后安長春宮問

慈禧皇太后安至乙酉皆如之○奉

慈安皇太后

慈禧皇太后幸漱芳齋侍午膳○丁巳諭軍機

大臣等戶部奏豫撥來年京餉一摺據稱歷

屆京餉均於年前豫撥同治十一年京餉擬

在各省地丁鹽課關稅等款內指撥銀七百

萬兩請飭各該省於來年分批起解等語京

餉關繫緊要。現經該部就各省緩急情形。斟酌動撥。自應遵照奏定數目。源源報解。以濟要需。著該將軍督撫鹽政監督等。務於來年開印後。分批起解。限五月前解到一半。十二月初間全數解清。不准截留改撥。藉詞延誤。儻屆限不到。卽照奏定章程。指名嚴參。原單均著鈔給閱看。至本年未解京餉。前經該部節次奏咨飛催。現屆年終。仍未如數解清。著各該督撫等。迅速籌解。毋再遲延。干咎。另片

奏內務府同治十一年分應需經費。擬撥兩淮鹽課銀五萬兩。兩浙鹽課銀五萬兩。廣東鹽課銀五萬兩。福建茶稅銀十萬兩。閩海關常稅銀十萬兩。太平關常稅銀十萬兩。九江關常稅銀十五萬兩。共銀六十萬兩。請飭依限完解等語。著該將軍督撫鹽政監督等。各按撥定數目。務於來年開印後。陸續徑解內務府。先將起程日期報部。限六月前解到一半。十二月初間埽數解清。不准稍有帶欠。將

此由五百里諭知福州將軍。直隸兩江湖廣閩浙兩廣四川江蘇安徽江西福建浙江湖北湖南河南山東山西廣東各督撫。並傳諭粵海關。血督知之。○又諭奎昌等。奏土爾扈特遊牧人眾。流離失所。情形困苦等語。土爾扈特遊牧。被賊侵犯。搶掠牲畜財物。該遊牧人眾展轉遷徙。情形極為可憫。現由烏魯木齊南山。移至科布多所屬之哈布塔克等處居住。著常順等。隨時加意撫恤。毋令失所。該

汗布彥烏勒哲依圖。現在前往各該處收攬人眾。其陸續移出者。金順奎昌多布沁扎木楚常順保英。文碩務當設法安置。以免滋生事端。該汗家屬人眾。流離遷徙。費用缺乏。前由烏科兩城借過銀四千兩。著卽賞給該汗。毋庸在應領京俸項下扣還。以示體恤。將此由五百里各諭令知之。○又諭奎昌等。奏烏城需餉甚急。請飭部指撥一摺。烏城防務緊要。解到之餉。除分撥各營外。存項無多。該處

軍務甚殷。餉需自刻不容緩。著戶部迅速指撥有著款項銀五六十萬兩。限於來春正月內解至張家口。卽著奎昌等派員迎提。以資接濟。烏城防勦正在喫緊。金順仍懍遵前旨。迅速赴任。妥為布置。至山西應解該城本年經費銀兩。據奏尚無起解之期。實屬遲緩。著鮑源深卽將此項經費剋期起解。毋稍遷延。將此由五百里各諭令知之。○蠲緩湖南武陵安鄉龍陽華容沅江澧湘陰巴陵臨湘九

州縣暨岳州衛被水地方新舊額賦並雜課有差。○戊午諭軍機大臣等曹克忠奏馳抵陝省日期並請截留淮軍一摺。據稱該提督於陝州靈寶潼關一帶遇淮軍隊伍絡繹東行。詢係劉銘傳飭令先行拔赴徐州所留二十二營。其中員弁勇丁亦復紛紛告假不絕。於途等語。前令曹克忠赴陝接統淮軍。當諭劉銘傳俟曹克忠抵陝後會商一切將辦理情形會同具奏。其餘隊伍帶回徐州駐紮。劉

銘傳自應與曹克忠面商後再將隊伍分別撤留。乃該提督迫不及待遽將各隊遣撤。且並未先行奏明。殊屬輕率。現在所留各營是否一律精壯著責成劉銘傳認真挑選足額。不得以疲弱充數。致難得力。甘肅轉運艱難曹克忠統軍前進隊伍亦不宜過多。且肅州地方現有左宗棠所派提督徐占彪統帶十二營前往駐紮。曹克忠抵肅後亦可聯絡布置。自不必將淮軍全行截留。該提督現已由

西安馳赴乾州。著卽與劉銘傳籌商一切接統該軍剋期西進。劉銘傳前奏擬分配馬步二十營交曹克忠接統。此次曹克忠摺內所稱分撥二十二營因何不符之處著劉銘傳曹克忠查明具奏。現在拔赴徐州之淮軍各隊曾國藩務當督飭認真訓練。將來曹克忠所統各營弁兵內如有缺額及不能得力者卽可在徐州各營內續行挑補。著曾國藩李鴻章隨時咨商辦理。將此由五百里諭知曾

國藩李鴻章劉銘傳並傳諭曹克忠知之○
又諭劉嶽昭岑毓英奏官軍疊破賊壘收復
夷寨一摺臨安府屬之館驛等處賊巢現經
岑毓英督兵進剿已將五山夷寨收復並分
勦婁兮田心曰者鄉賊匪脅從各夷寨紛紛
反正賊勢已孤即著劉嶽昭岑毓英飭令何
秀林等督率前敵官軍乘勝進攻先將館驛
賊巢攻拔一面分兵圍剿各處賊壘以期迅
掃逆氣其反正各夷寨務當飭令各員弁會

同地方官隨時稽查妥為安撫毋令再生事
端將此由五百里各諭令知之○禮部以明
年元旦慶賀禮節請得旨是照例行禮奉

慈安皇太后

慈禧皇太后懿旨停止筵宴其在外公主福晉
命婦進內行禮之處並著停止○貴州巡撫
曾璧光等奏請調湖南在籍主事李之鏗赴
營差委允之○以貴州八寨廳城解圍賞提
督李啟貴一品封典遊擊陳安邦等花翎知

縣吳隆瑞等藍翎餘加銜升敘有差○予雲
南臨安等處陣亡都司沈朝觀等十六員祭
葬世職加等○予雲南彌渡陣亡經歷羅熙
藻雲州殉難都司楊林祭葬世職加等○已
未諭內閣都興阿瑞聯奏運通米豆裝兌未
竣請俟來年補運一摺奉天各州縣應解通
倉米豆經都興阿等督催運解已裝粟米八
千五百九十餘石先行起運赴津其餘米石
暨各屬應運豆石現因河冰凍結不能裝載

駛行該將軍等請俟來年開河再行領運尚
係實在情形即著照所議辦理所有奉天未
運米豆著直隸總督飭令雇船州縣俟來歲
春融冰泮即行督催各該原船重赴奉天領
運以重倉儲此次裝載米豆時值封河未能
全數起運尚非各該州縣貽誤著免其置議
○盛京戶部侍郎兼奉天府府尹瑞聯奏莅
任未久請將本年大計展限辦理從之○緩
徵湖北江夏武昌蒲圻黃岡蘄水廣濟嘉魚

漢陽漢川黃陂孝感沔陽黃梅鍾祥京山潛江天門應城江陵公安石首監利松滋枝江荊門二十五州縣暨武昌沔陽二衛被水地方新舊錢糧漕米並雜課有差○庚申諭內閣庫克吉泰奏豐甯土匪滋擾捕獲正法仍飭嚴拏餘匪一摺匪首胡良珠等竄擾熱河豐甯縣屬大閣兒地方聚眾搶刦拒捕經知縣陳本植會同把總徐振邦等帶領兵勇馳往勦捕將胡良珠等擒獲正法辦理尚為迅速

在事出力員弁著庫克吉泰擇尤請獎毋許冒濫其在逃未獲各犯仍著飭屬認真巡緝務獲毋任一名漏網以除奸宄而靖地方○諭軍機大臣等庫克吉泰奏規復木蘭圍場並紳佃捐修工程各摺片木蘭圍場地面臨該都統派員清查於東圍民佃地內丈查餘地補還旗佃現已一律遷徙淨盡圍場仍復舊觀所有一切章程均著照該都統所議辦理此後招墾邊荒並圍場外設局收課各

節仍著庫克吉泰妥為措置其餘未盡事宜並著隨時認真籌畫次第舉行圍場新界已定所有修卡它濠等事業經該都統勸諭該處官紳佃戶等捐修完竣現在添設分局修葺局署等工即著准其捐辦此次兩項工程著免其造冊報銷俟工竣後彙案報部備查該紳佃等捐修要工即由庫克吉泰覈明酌量給獎圍場現經規復嗣後務當隨時嚴查毋任再有越墾等事將此諭令知之○旌表守正捐軀河南許州民尚宣三妻閻氏○喀爾喀扎薩克貝勒錫里巴扎爾扎布於養心門內瞻觀○辛酉

孝惠章皇后忌辰遣官祭

孝東陵○諭內閣巡視東城御史武林布等奏請揀發司坊官員差委一摺各城練勇及飯廠等處需員差委據奏東城須添候補司坊官二員南城須添一員西城須添三員著吏部照例揀發分交各該城以資差委○以故

賽因諾顏扎薩克親王德木吹弟車林端多布襲爵○命刑部右侍郎常恩工部左侍郎童華馳赴熱河查辦事件○以奉天吉林交界地方拏獲匪首李維藩賞署同知恩禧花翎守備銜劉鴻恩都司銜○追予故陝西巡撫蔣志章諡文恪○蠲緩江蘇上元江甯句容溧水高淳江浦六合山陽阜甯清河桃源安東鹽城高郵泰東臺江都甘泉儀徵興化寶應銅山豐沛蕭陽山邳宿遷睢甯海沭陽

贛榆通泰興海門三十五廳州縣被水被旱地方暨未墾田畝新舊額賦並雜課有差○壬戌改山東福山縣煙臺巡檢為繁缺臨清州王家淺巡檢為簡缺從巡撫丁寶楨請也○癸亥諭軍機大臣等吏部左侍郎胡家玉奏時局艱難宜豫籌挽救一摺軍營勇丁隨時招募立營自應覈實辦理方能兵歸實用餉不虛糜若如所奏各營勇數多不過七八成少不及五六成捏報虛額冒支軍糧此等

情弊殊堪痛恨當此經費支絀之時豈可任令陋習相沿漫無稽察著各直省督撫於現有各營認真查覈務按實在數目歸併立營如查有營官以少報多情事立即從嚴懲辦以儆效尤此外陝甘貴州等省現有他省派往助勦之營如有勇額不足情事各該督撫訪有確據亦著隨時奏聞並著遵照兵部奏定章程每屆三月將勇數造冊報部不得任意遲延稍涉含混其現無軍務省分留防之

勇為數尚屬不少歲糜帑項甚鉅該侍郎請將各省防勇陸續裁汰多不過暫留七八千人少或酌留三四人自為節餉起見著各督撫體察情形奏明辦理至所稱長江既添設水師分布汎地而自瓜洲口上至漢陽鎮一帶沿江尚有留防之淮揚水勇未免重複李朝斌所帶之水勇尚在蘇州等處屯紮請一併裁撤等語著曾國藩等妥籌辦理各省抽收釐金因軍餉孔亟未能概行停止第恐

局卡各員。假公濟私。額外需索。藉飽私囊。流弊不可勝言。著各督撫隨時訪察。有犯必懲。毋稍徇縱。其有可以裁減局卡之處。並著酌量情形。分別辦理。原摺均著摘鈔給閱。看將此各諭令知之。○又諭曾國藩奏江北冬漕。仍辦河運一摺。本年江蘇淮揚等府州屬。應徵漕米。及折徵採買米石。並抵充運費粟米。現已提前趕辦。定於明年正月兌清。開行北上。該督因本年侯家林衝決。黃流貫運。請飭先堵決口。次疏運道。迅速辦理。以免阻滯。自係實在情形。昨據喬松年等奏。侯家林決口。須俟明年冬閒始能興工。一摺。業交該部議奏。惟來年江北漕糧。亟需趲運。著曾國藩。蘇鳳文。喬松年。丁寶楨。文彬。悉心會商。應如何豫為籌畫。俾漕運不至貽誤之處。即行妥速辦理。一面詳細奏聞。將此由四百里諭知曾國藩。蘇鳳文。喬松年。丁寶楨。並傳諭文彬知之。○又諭前因已革提督李世忠有人叅奏。

招集叛黨。謀為不軌。諭令曾國藩查奏。茲據奏稱。李世忠居家謀利。在所不免。而於新築圩寨。添製槍械。結納亡命等情。飭查並無實據等語。李世忠現在既無叛逆形跡。朝廷不為已甚。仍著該督隨時訪查。儻有不法情事。即行密速具奏。將此密諭知之。○又諭金順奏。部署赴烏。未能迅速情形。杜嘎爾月餉。未便歸併支發。各摺片。金順所部兵勇。分別撤留。固須俟餉項到營。然時逾數月之久。何以辦理尚未就緒。據奏京欠各餉。如數解到。僅能開發積欠。於赴烏糧腳各價。尚屬無著。是明知各省餉項。未能一時全解。且藉口於待駝運糧。以掩其遲延不進之咎。殊屬不知緩急。烏里雅蘇台地方緊要。亟需實任將軍。整理一切。該將軍當嚴催餉項。駝隻。將遣撤兵勇。轉運軍糧等事。趕緊設法籌辦。並將拔隊起程日期。即行奏報。不得藉口耽延。自干咎戾。杜嘎爾月餉。既未便由該將軍一併支發。

卽著咨照該副都統自行奏撥支放以歸簡捷伊犁後路糧運各事宜金順到任後隨時妥為照料毋稍貽誤將此由五百里諭令知之○追予湖北武昌殉難通判沈耀鑒建立專祠○旌表守正捐軀山東歷城縣民張福甯女煥妮○緩徵兩淮富安安豐梁垛東臺何垛丁溪草堰劉莊伍佑新興廟灣板浦中正臨興十四場歉收地方舊欠錢糧○科爾沁扎薩克卓哩克圖親王濟克登旺庫爾等

四人喀喇沁扎薩克都楞郡王旺都特那木濟勒蘇尼特扎薩克郡王托第布木等二人阿巴哈納爾扎薩克貝子桑齊薩喇特多布浩齊特扎薩克額爾德尼郡王喇特那巴咱爾喀爾喀貝勒剛當黨準車楞等七人巴林貝子索哩雅郭爾羅斯扎薩克輔國公圖布烏勒濟圖翁牛特頭等台吉德木楚克蘇龍三等侍衛兼察哈爾佐領巴雅斯呼朗塔爾於養心門內瞻觀○乙丑諭內閣阜保黃倬

奏承修武英殿工程請旨辦理一摺武英殿前後殿座工程亟應趕緊興修著欽天監於本年立春前選擇開工吉期由阜保等次第督修應需工價銀兩著仍照戶部工部所議章程發給○又諭蘇鳳文奏廣西南甯府知府景雲前赴新任取道江北該員熟悉河務請暫留差遣等語河道事宜非軍營要務可比景雲係現任人員該漕督請暫留差遣之處與例不合所請著不准行○諭軍機大臣

等戶部奏遵撥烏城餉銀一摺烏里雅蘇台專餉上年經戶部奏撥部庫及山東等省銀共五十萬兩現因該城存項無多需款甚急該部請於山東山西積欠新疆協餉項下各提撥銀二十萬兩河南積欠新疆協餉項下提撥銀十萬兩共銀五十萬兩作為烏城專餉等語烏里雅蘇台防務緊要餉需刻不容緩此次戶部提撥餉銀本係各該省應解欠款並非格外添撥著李鶴年于寶楨鮑源深

文彬。按照部撥數目。迅速籌款。委員起解。限於來春正月內解至張家口。交察哈爾都統轉解。由金順等派員迎提。並將起解日期數目報部查覈。至烏城前後收到協餉各數。並著金順等詳細報部備查。另片奏遵撥餉銀備用等語。奎昌等安插厄魯特等人丁。及籌備官兵俸餉需款。孔殷著照部議。在山西地丁項下撥銀二萬兩。由鮑源深速行籌撥。解交察哈爾都統轉解烏城。務於來春埽數解齊。毋稍延欠。奎昌等於此項餉銀到後。將如何分別動用之處。咨部查覈。以重款項。將此由五百里諭知金順。奎昌。多布沁。扎木楚。李鶴年。丁寶楨。鮑源深。並傳諭文彬知之。○又諭蘇鳳文。奏查勘河道。謹擬酌辦事宜。繪圖呈覽一摺。據稱現在黃水挾汶東下安山。以北毫無來源。擬導衛水濟運。於臨清衛河入運。及張秋清黃將接之處。各建一牐。俟漕船將屆渡黃。蓄高衛水。使之南行。並擬於張秋

於高之處。挑深丈餘。增培兩岸。以為運河口門。將安山以南運河。一律挑濬。深通黃水。盛漲卽由安山入鹽河。至漁山上駛。以達張秋。可免繞坡渡黃之險等語。漕運關繫京倉要需。亟宜設法迅辦。該處係山東地面。卽著喬松年。丁寶楨。文彬。各派幹員前往詳細查勘。會商蘇鳳文。妥速辦理。至侯家林決口。前據喬松年奏。明年冬閒始能興工。惟現當水涸之時。及早堵築。尚易為力。若待至來年。則伏秋盛漲。後水門更寬。需費更鉅。施工益難。並於來年漕運有礙。且黃水入湖。下游受害之處更多。喬松年。丁寶楨等。仍當趕緊由外設法。先行籌款墊辦。務於年前興工。將該處決口迅速堵塞。並將淤墊運道。一律疏濬。俾來歲江北漕糧過境。得以暢行。毋得畏難遷延。致干重咎。將此由五百里諭知蘇鳳文。喬松年。丁寶楨。並傳諭文彬知之。○又諭劉銘傳。曹克忠。奏接交隊伍情形。一摺。曹克忠馳抵

乾州已據劉銘傳將銘軍步隊十七營馬隊三營並楚軍馬勇二營共二十二營並軍火器械逐款移交曹克忠接管該提督即當迅速部署拔隊先赴蘭州會商穆圖善妥籌防勦毋誤機宜如蘭垣無需多兵仍著懍遵前旨迅赴肅州一帶與徐占彪各營聯絡聲勢扼要駐紮步隊中將領勇丁有假歸者既須選補足額著即知照曾國藩於徐州隊伍內挑撥發交曹克忠充補缺額該提督儘可先

行帶隊前進不必俟此項缺額補足再行起程致涉遲緩曹克忠赴甘後道途遙遠該軍餉項必須先期撥解方免缺乏著李鴻章李瀚章飭知湖北糧臺將赴甘各營軍餉先期三箇月解交西征糧臺源源轉解以資接濟將此由五百里諭知曾國藩李鴻章李瀚章並傳諭曹克忠知之○督辦甘肅軍務前任直隸提督劉銘傳奏請將所部歷年陣亡弁兵於安徽合肥縣原籍建立昭忠祠允之○

添設順天府捕盜中營設千總把總各一員經制外委二員額外外委一員馬步兵六十名歸治中管轄從兼管府尹萬青藜等請也○教漢扎薩克郡王達維多克丹鄂爾多斯扎薩克貝子巴爾達琥茂明安頭等台吉達爾瑪吉哩第科爾沁貝勒達瑪林旺濟勒喀爾喀扎薩克貝勒堆固爾素隆等四人蘇尼特貝勒布彥圖阿巴哈納爾扎薩克貝勒達木定扎布於養心門內瞻覲○丙寅

孝和睿皇后忌辰遣官祭

昌西陵○丁卯

孝德顯皇后忌辰遣官祭

定陵○以大理寺卿成林署京營右翼總兵○以甘肅甯夏等城防守出力賞總兵官龔良臣胡昌會一品封典道員陶斯咏從一品封典協領興會巴圖魯名號同知梁文龍佐領達三佈等花翎州同馬富邦等藍翎餘加銜升敘有差○以四川會理拏獲逆匪賞總兵

官劉寶國一品封典。土司都鎮國遊擊銜花翎餘加銜升敘有差。○己巳諭內閣李瀚章奏遵旨前赴湖南查明地方文武辦理匪徒情形一摺。據稱道州土匪滋事。已於上年十月辦結。武岡州自拏獲教匪蕭逢源等後。地方安堵。本年六月內並未圍城。亦無匪首施玉山聚眾潛匿等情。舉人陳景滄探悉匪首劉道美等結會謀逆。報官捕獲匪黨正法。並將劉道美之父劉家實收禁。劉道美等遂挾嫌將陳景滄父子殺害。撲犯龍陽益陽縣城。並非陳景滄激變所致。陳景滄亦無誣殺劉秀芝之事。劉崐與陳景滄並無姻親。至李光燦一軍。勦匪甚為得力。洞庭西湖一帶查無大頭目。劉鴻怡在彼潛藏。及肆用洪逆偽記等情事。羊瀛所帶團勇不諳紀律。未及一月。卽經調回裁撤。劉崐於雷伯旺及藍溪匪徒刦殺兩案。實已獲犯懲辦等語。劉崐辦理會匪滋事情形。既據李瀚章查明。尚無粉飾貽

誤。惟於雷伯旺及藍溪搶刦殺人兩案。並不明晰奏報。僅於清查逸匪摺內彙奏。實屬疏略。劉崐著交部議處。已革益陽縣知縣黃應誥拏辦會匪。未能迅獲正犯。僅將犯屬收禁。致被匪眾刦獄陷城。前已革職。永不敘用。著發往軍臺效力贖罪。候補參將羊瀛帶練勦賊約束不嚴。咎無可辭。著以守備降補。○又諭李瀚章王文韶奏特參庸劣不職各員請旨分別降革勒休一摺。湖南試用知府唐廉行止卑污。任事麤心。永桂理謠。通判楊恩植聲名惡劣。撫綏乖方。均著革職。永不敘用。平江縣知縣陳煊心地糊塗。輿論平常。保靖縣知縣湯鑄銘性耽麴蘖。辦事模糊。均著卽行革職。安化縣知縣邱育泉才具平庸。聽訟顯預。甯鄉縣知縣簡春錄才短識闇。難膺民社。均著以府經歷降補。江藍理謠。同知盛海言動失常。時發痰迷。著勒令休致。候補同知黃炳堃人尚明白。惟查辦土匪失之寬縱。著革

職留營以觀後效。○諭軍機大臣等宋晉奏閩省製造輪船經費已撥用至四百萬名為遠謀實同虛耗且聞採買雜料委員四出雖官為給價民間不無擾動江蘇上海製造輪船情形亦同請飭暫行停止其每年額撥之款卽以轉解戶部已經造成船隻撥給殷商駕駛收其租價以為修理之費等語製造輪船原為綢繆未雨力圖自強之策如果製造合宜可以禦侮自不應惜小費而墮遠謀

若如宋晉所奏是徒費帑金未操勝算卽應迅籌變通著文煜王凱泰通盤籌畫應否將輪船局暫行停止之處斟酌情形奏明辦理其上海輪船應否一律停造並著曾國藩張之萬何璟妥籌熟計據實奏聞原片均著鈔給閱看將此各諭令知之○又諭李瀚章奏湖南現籌清查保甲分設防營等語湖南地方緊要會匪散勇在在堪虞李瀚章擬於省城設立保甲總局責成臬司會督紳士妥為

辦理省城內外亦經分撥水陸各營擇要扼守所籌均屬周妥卽著李瀚章王文韶督飭省局官紳將保甲事宜認真經理仿照十家聯牌法飭令各州縣一體實力舉行選派廉正紳耆挨戶稽查不得有名無實亦不得藉端騷擾水陸各處既經分撥各營兵勇節節分巡仍當飭令統帶各員弁聯絡巡防毋得稍有疏懈至省城捐局紛歧章程雜出有傷政體應如何酌量裁併之處卽著王文韶察

度情形奏明辦理另片奏前任湖南巡撫劉崑應如何簡用恭候諭旨等語劉崑前有旨開缺另候簡用卽著李瀚章王文韶傳知該前撫來京將此各諭令知之○以故車臣汗扎薩克貝子德濟特多爾濟子貢楚克扎布襲爵○以翰林院侍讀學士周壽昌充日講起居注官侍講徐郅畧日講起居注官○以吉林黑龍江官兵防守甘肅各要隘出力賞佐領凌豐阿防禦海明阿披甲塔瑪海巴圖

魯名號。驍騎校恭穩等五品銜花翎。餘加銜升敘有差。○追予江蘇溧陽殉難知縣尚那布諡勇烈。在籍主事朱麟祺諡武毅。朱麟祺並附祀侍郎呂賢基專祠。○追予浙江各屬陣亡殉難紳民梁其祥等一百九十一名賞卹如例。○旌表守正捐軀直隸深州民女王霞姐。○加賞通州王恕園等處煮賑私米四百石。○烏珠穆沁扎薩克貝勒達克丹於養心門內瞻覲。○庚午。

上奉

慈安皇太后

慈禧皇太后幸漱芳齋侍午膳。○以故一等男

廣順子桂林三等子雙壽子連祥襲爵。○予

故前任正黃旗漢軍副都統溫德勒克西祭

葬卹廕加等。如軍營病故例。諡威恪。並入祀

昭忠祠。○追予江蘇常州陣亡都司張應選

祭葬世職。○追予安徽合肥陣亡在籍把總

李元甲祭葬世職加等。○追予山東海豐陣

亡守備張殿魁傷亡提督曹萬元。總兵官殷鳴岐。副將鄧萬洪等祭葬世職。

大清穆宗繼天開運受中居正保大定功聖智誠孝信敏恭寬毅皇帝實錄卷之三百二十五

大清穆宗繼天開運受中居正保大定功聖智
誠孝信敏恭寬毅皇帝實錄卷之三百二十六

此條應載在日講起居注官本傳文內開列姓名不特於本傳內開列姓名亦應於實錄內開列姓名以昭大信

理吏部事務戶部二庫事務加七級軍功加五級禮部事務加七級兵部事務加六級刑部事務加六級工部事務加六級

正統後高州都督管理上庫事務加六級驛馬司官加一級驛馬司官加六級驛馬司官加六級驛馬司官加六級驛馬司官加六級

學士楊榮公本一節事詳前卷略後載其詳驛馬司官加六級驛馬司官加六級驛馬司官加六級驛馬司官加六級驛馬司官加六級

加六級驛馬司官加六級驛馬司官加六級驛馬司官加六級驛馬司官加六級驛馬司官加六級驛馬司官加六級驛馬司官加六級

教修

同治十年辛未十二月辛未諭軍機大臣等

前據張廷岳等奏庫倫需餉甚殷請飭撥部
庫銀二十萬兩當交戶部速議具奏茲據奏
稱庫款支絀未便外撥惟庫倫防務緊要需
餉較鉅擬請由部庫先行撥給銀十萬兩由
山西撥還部庫再由山東省指撥銀十萬兩
等語著照所請辦理所有此次部撥銀十萬
兩著戶部知照順天府委員解赴察哈爾交
該都統卽行委員遞解並著張廷岳等派員
迎提以期迅速其指撥山東省地丁項下銀

十萬兩著丁寶楨文彬趕緊籌撥解赴庫倫
應用毋得遲延蒂欠仍著張廷岳等將收到
前項餉銀月日隨時報部查覈此次所撥戶
部庫款自應迅籌歸還著鮑源深卽在山西
地丁項下撥銀十萬兩迅解部庫毋稍延欠
亦不得與年例應解京餉稍涉牽混將此由
四百里諭知丁寶楨鮑源深張廷岳阿爾塔
什達並傳諭文彬知之○以故三等子英瑞
繼子永福二等男成友子錫振清福繼子明

喜三等男巴彥泰子慶瑞德敏子常喜襲爵
旌表守正捐軀江蘇蕭縣民女宮巧娃○
壬申以光祿寺卿龔自閔為太常寺卿○予
先儒張履祥從祀

文廟從浙江學政徐樹銘請也○予故浙江
湖州府知府善慶山東曹州府知府惠慶湖
北荊門州知州舒成龍直隸天津縣知縣謝
子澄河間縣知縣朱溥山西河曲縣知縣曹
春曉入祀名宦祠從總督李鴻章巡撫劉坤

一楊昌濬郭柏蔭丁寶楨護巡撫張樹聲請也○予湖南故翰林院檢討余廷燦江西鹽法道余正煥河南商城縣知縣周振之益陽縣教諭聶肇奎恩貢生龍友慶安徽故刑部主事楊摘藻江西故浙江金衢嚴道顧菊生舉人周釗耆儒余寅止河南故湖北督糧道劉毓恆直隸候補知府凌松林陝西故廣東連平州知州高建鈺山西故朔平府教授任秉哲汾陽縣訓導毛應豐江蘇故候選訓導

伍光瑜直隸故優貢生苗學植四川故恩貢生宋履坦歲貢生孫榮先附生陳會芳入祀鄉賢祠從總督李鴻章吳棠巡撫張之萬英翰劉坤一劉崑李鶴年蔣志章何璟護巡撫張樹聲請也○癸酉諭內閣前據御前大臣奏蒙古貝勒錫哩巴扎爾扎布使用黃纒與例不符當令軍機大臣查詢理藩院再行覈辦茲據奏稱理藩院咨覆本年六月間議覆烏里雅蘇台將軍福濟等奏捐輸之貝勒錫

哩巴扎爾扎布請用黃纒詳覈尚與成案相符當經奉旨依議並據聲稱內外扎薩克蒙古貝勒貝子均未賞過黃纒惟郡王銜貝勒多布沁扎木楚曾因捐輸賞用黃纒等語貝勒錫哩巴扎爾扎布並無郡王銜與多布沁扎木楚成案不符所有錫哩巴扎爾扎布前經議給黃纒著卽撤銷應得獎敘著理藩院另行覈議具奏該衙門堂司各官辦理此案未能詳覈遽稱與成案相符殊屬不合該衙

門堂官及承辦司員均著交部分別議處○諭軍機大臣等王文韶奏援黔各軍攻克賊巢現圖會合黔軍進剿一摺湖南援黔各軍自攻克螃蟹賊巢後席寶田一軍勦辦清水南岸將黃茅嶺一帶賊巢攻破北岸鄧善燮一軍掃蕩而前進紮甕谷隴擊敗援賊軍威已振亟宜乘此聲勢將清江兩岸一律蕩平現在周達武前軍已抵黃平與甕谷隴之軍可期聯絡王文韶已飭令龔繼昌等分營北

渡會同鄧善燮進攻黃飄白堡著曾璧光周達武檄飭各營協力夾攻務將清平黃平一帶積匪盡數鏟除疏通驛路俟此路平定再勦開懷肅清丹江凱里著曾璧光周達武王文韶分檄黔楚各軍隨時相機合剿以竟全功將此由五百里諭知曾璧光並傳諭周達武王文韶知之○又諭文碩奏豫籌邊餉以裕軍儲一摺據稱科布多庫儲未裕歲支之費軍需之費需款甚鉅加以撫馭團民安設

臺站用項甚多請豫籌接濟等語邊疆重地軍儲必宜寬裕方足以備緩急文碩請發部庫銀十萬兩由察哈爾轉解之處著戶部速議具奏其山西應解烏科兩城同治十年十一年常餉銀十七萬兩文碩現已勸商匯兌銀一萬二千兩即著鮑源深如數撥交歸綏道庫發商承領餘銀十五萬八千兩並著該撫督飭藩司趕緊籌解俾北路兩城有備無虞毋稍遲緩將此由六百里各諭令知之○

陝甘總督左宗棠奏甘肅軍務未竣請將本屆計典展限辦理從之○科布多辦事大臣文碩奏遵議整頓科布多臺站事宜擬於東西南三路二十三臺設兵二十名馬十五匹專遞公文仍由各該旗備馬四十匹駝六十隻專供轉運每歲酌給羊茶銀兩以示體恤遇有重差應傳幫臺者仍照舊章辦理其臺兵優劣年終考覈一次隨時勸懲下理藩院知之○以熱河勦賊出力賞協領禧霖等花

翎守備黃堪等藍翎餘升敘有差○以浙江嚴州拏獲齋匪予知縣李宗鄴以同知用並賞花翎餘升敘有差○以當差奮勉賞科布多守備李昶花翎○甲戌諭軍機大臣等都興阿等奏孤山官軍會勦賊匪獲勝一摺匪首李文生等於本年十月間竄擾北井子街及龍王廟等處經都興阿等派令馬步各隊分投抄擊斃匪多名並將李文生及夥犯華復松等拏獲正法餘匪逃散孤山地方賴以

稍安。卽著都興阿清凱檄令春岱等督率馬步各隊。迅將逸匪悉數兜拏。務絕根株。毋留餘孽。此次勦賊出力各員。著准其擇尤保奏。毋許冒濫。將此各諭令知之。○又諭文彬奏遵旨趕緊籌堵侯家林決口一摺。山東侯家林決口關繫運道民生亟應及早堵塞。不容稍涉遲緩。文彬等已籌撥銀三十萬兩。遴委委員帶赴工次。會同地方官購辦料物。著喬松年迅速委員馳抵東省。並飭原估委員先行星夜赴東。務卽剋日興工。於來年春漲以前辦理完竣。並將淤墊運道一律疏濬。毋稍延誤。該河督等務當督飭在工各員。實力籌辦。總期工料堅實。餉不虛糜。以衛居民而利漕運。其蘇鳳文前奏臨清建牆等事宜。仍著蘇鳳文喬松年丁寶楨文彬悉心會商。奏明辦理。將此由四百里諭知蘇鳳文喬松年丁寶楨並傳諭文彬知之。○以禮部左侍郎黃倬兼署工部左侍郎。兵部右侍郎寶珣兼署

刑部右侍郎。○以鑲白旗蒙古副都統西蒙克西克署正白旗蒙古副都統。○吉林副都統毓福因病解職。以蓋州城守尉載耀為吉林副都統。○以前任山東登州鎮總兵官周惠堂為江西九江鎮總兵官。○補行同治六年軍政湖廣卓異官四員。不謹官二員。分別議敘處分如例。○予故江西九江鎮總兵官黃開榜祭葬卹廕加等。謚剛敏。○予甘肅永昌殉難總兵官石紹文祭葬世職。○乙亥。諭內閣李鴻章奏請將雲南楚雄府知府賈致恩改選近省等語。據稱予告大學士賈楨現在年逾七旬。僅有親子賈致恩一人。選授雲南知府。未能迎養。因念賈楨宣力三朝。疊邀

恩眷。茲因伊子遠道赴任。侍奉乏人。殊堪垂念。加恩著照所請。賈致恩卽行開缺。仍以知府改選近省。俾得就近迎養。以示體恤。著臣至意。○又諭李瀚章郭柏蔭奏請將庸劣不職

各員分別降革一摺湖北請補德安府同知遇缺卽補同知直隸州知州李玉墀行止詭詐聲名平常候補知縣左逢泰心地糊塗舉止輕浮均著卽行革職前署麻城縣知縣候補知縣張鴻舉才識平庸不勝民社之任著以府經歷縣丞降補以示懲儆諭軍機大臣等英翰奏遵旨訪查李世忠情形一摺據稱派員密訪李世忠並無謀為不軌及招留捻黨各情事與曾國藩所奏大略相同該革

員既無叛逆實跡朝廷亦不究其既往仍著英翰隨時查訪儻有不法情事卽行據實具奏將此密諭知之湖廣總督李瀚章奏請將提督劉維楨所部歷次陣亡弁兵於黃州府城建立昭忠祠允之以兵部左侍郎胡瑞瀾兼署吏部右侍郎緩征山西平遙交城二縣被水地方舊欠額賦暨民借倉穀丙子以神靈顯應頒河南偃師縣大王廟扁額曰威宣伊雍

城隍廟扁額曰靈昭西毫○諭內閣前因劉銘傳奏病難速痊未能前赴肅州當經降旨賞假三箇月准其回籍調理其所部淮軍卽令曹克忠赴陝接統並恐兵將或不相習復諭該提督俟曹克忠抵陝後晤商妥協將辦理情形會同具奏乃據曹克忠先後陳奏該提督行抵陝州一帶卽遇淮軍所撤隊伍絡繹東行卽所留各營其中員弁勇丁亦復紛紛告假不絕於途迨抵乾州後劉銘傳將各

營弁勇清冊移交卽日將交替情形主豪會奏劉銘傳亦卽星夜遄發查新接各營疲弱缺額及領餉告假者為數甚多均須一律募補辦理實形掣肘各等語劉銘傳於軍旅重事自應恪遵諭旨與曹克忠會商妥協再將隊伍分別撤留乃竟迫不及待遽將各隊遣撤又不先行奏明且所交各營亦多疲弱缺額實屬措置乖方不顧大局前直隸提督劉銘傳著交部嚴加議處以示懲儆○諭軍機

大臣等曹克忠奏接管淮軍辦理掣肘情形請招募勇丁添補缺額各摺片曹克忠接統淮軍曾諭劉銘傳與之會商務將一切駕馭機宜籌畫妥協再行回籍原以新舊交替之際將士不習變故易生劉銘傳自應恪遵諭旨力顧大局方為不負委任乃曹克忠行抵乾州銘軍已有遣去者得力之統領營官悉皆貲遣並將精良礮械悉行運回劉銘傳僅留隨身小隊一晤而別各局早經裁撤淮軍

一切章程未據交出復張貼發餉遣勇告示縱令營勇假歸各營因索餉滋鬧幾至不測等語前據王家璧奏劉銘傳軍伍多虛性情驕蹇朝廷念其前功未加責問所以寬容而優待之者不為不至若如曹克忠所奏各情是劉銘傳止便私圖罔顧公事幾至貽誤大局已明降諭旨將劉銘傳交部嚴加議處以示懲儆現在各軍缺額甚多亟須募補著李鴻章迅將需用經費覈定撥交曹克忠以便

該提督派員分赴楚皖招募並將曹克忠各營餉需寬為籌備俾免缺乏曹克忠務將各營力加整頓相機駕馭拊循一俟布置就緒卽行拔隊西進其撤回徐州駐紮各隊實係若干卽著曾國藩查明督飭訓練毋令日久生懈曹克忠摺片單各一件王家璧片一件均著鈔給曾國藩李鴻章閱看將此由五百里諭知曾國藩李鴻章並傳諭曹克忠知之予陝西同州傷亡副將李家安等祭葬世

職丁丑諭內閣景廉奏鎮迪道一缺關繫緊要若由陝甘揀員調補關內道路梗阻恐稽時日懇請迅賜簡放並因營務紛繁乏員差遣請飭部揀發等語甘肅鎮迪道員缺著恩綸補授並著吏部於候選州縣佐雜人員內揀發十餘員前赴景廉軍營聽候差委以上各員均著該部飭由張家口烏里雅蘇台北前往以期迅速○諭軍機大臣等瑞麟奏勦辦香山等處匪巢情形一摺廣東香山等縣

交界之趙家圍地方近有匪徒麇聚焚搶勒贖經瑞麟派令戴朝佐等督帶兵勇水陸進剿將該處匪巢焚毀賊眾遁向赤溪官軍跟追搜捕拏獲匪首曾大鵝幅等多名現將兵勇調回責成地方文武緝拏餘匪務將在逃匪黨悉數弋獲毋令漏網此次出力各員弁准其擇尤請獎另片奏營員擅自招撫私放要犯請革職審辦等語署赤溪協都司王彪隨剿趙家圍等處股匪乃敢擅議招撫屬

令各營暫緩進兵並將已獲要犯曾大鵝幅朱秋漬私行釋放實屬膽大妄為且恐有通賊賄縱情弊王彪彪著卽革職嚴審究辦至曾大鵝幅朱秋漬二犯是否釋放後仍行拏獲抑尚在逃著瑞麟明晰具奏將此諭令知之尋奏要犯曾大鵝幅業已捕獲正法得旨卽著檄飭各營並地方文武嚴拏朱秋漬務獲毋任幸逃法網又諭景廉奏馳抵巴里坤籌辦軍糧催調後路各營拔隊並西路軍

情各一摺。景廉於十月初七日馳抵巴里坤與伊勒屯商辦進兵事宜惟沙漠瘠區屢遭兵燹採買軍糧萬分棘手且各省欠解之款迄無起運明文所有糧石價銀及勇丁月餉等項現均無款可給自應迅籌接濟除西征糧臺撥款業經奏報起解外其戶部續撥之十萬兩及各省欠餉協餉卽著戶部詳晰查明迅速咨催飭由察哈爾運解至景廉軍營以應急需至塞外用兵籌糧難於籌餉現在

巴里坤一帶糧石無多將來大軍銜接西進更難倉卒立辦著李鴻章定安富勒琿鮑源深豫行籌款分飭口北歸綏兩道廣為採辦麪斤隨時運送景廉所請在烏里雅蘇台設立轉運糧臺或由喀爾喀蒙古遊牧撥用駝隻或官為發價雇覓商駝之處並著金順奎昌多布沁扎木楚竭力籌辦以濟軍食蒙兵素本怯弱且布彥烏勒哲依圖疊據文碩奏稱其人未可深恃著景廉妥為駕馭毋致貽

誤至綏來縣西湖地方。居民歸附俄國。雖係傳聞之詞。惟該處久無官長約束。難免見異思遷。景廉務飭派往委員設法拊循。毋令渙散。景廉僅帶馬步兩營兵力太單。著文麟迅撥數營駐紮安敦一帶。以便景廉所部張玉春等營陸續進發。以振軍威。成祿懍遵前旨。先派數營扼紮嘉峪關。一俟徐占彪抵肅後。該提督卽當拔隊出關。毋稍遲滯。徐占彪現抵何處。計期早應到肅。著左宗棠催令星速

到防。俾成祿得以早日成行。西路軍情。仍著景廉伊勒屯隨時偵探相機妥辦。將此由六百里各諭令知之。以廣東欽州擒獲越南匪首蘇惻漢。擢遊擊雷秉剛以副將用。並賞花翎。知州陳起倬以知府用。以甘肅攻克王家疇賊巢出力。賞提督陳祥勝總兵官。周大華。鄧得勝。一品封典。協領庫克精額佐領。景慶富陞參將。胡三仁。劉大福。遊擊孟興銘。萬清傳。孫復勝。黃玉。安楊。得萬熊。緒福。李懷。

興都司金孔輝。王得勝。王建勳。張大發。防禦銀亮。永陞富慶春。玉守備徐貴林。舒為禮。周啟賢。周錦標。彭明全。耿開國。王鳳廷。張宗玉。姚先壽。羅仁發。朱得勝。陳加貴。沈占魁。趙永元。吳子萬。魏得才。夏朝輔。千總劉經文。呂長泰。王占元。劉登山。童大順。驍騎校巴扎爾巴呢。巴圖魯名號知府史璐。都司王金榮等。花翎。知縣周桂敷等。藍翎。餘加銜升敘有差。○蠲緩江蘇長洲元和吳吳江震澤常熟昭文。

崑山。新陽。太湖。華亭。婁金山。青浦。武進。陽湖。無錫。金匱。江陰。宜興。荆溪。丹徒。溧陽。太倉鎮。洋嘉定。靖江。奉賢。寶山。二十九廳州縣。暨蘇州太倉鎮海金山鎮江五衛未墾荒田。新舊額賦並雜課有差。○戊寅。

上御撫辰殿大幄次。賜蒙古王貝勒貝子公台吉暨呼圖克圖等宴。並賞賚有差。○諭內閣。李鴻章奏請將庸劣不職各員分別休致降革等語。直隸前祁州知州劉尹卿。聲明平常。

著以原品休致青縣知縣章裴成性情怠惰訟獄不清著以縣丞降補蠡縣知縣孫康壽年力漸衰政務疲懈著以教職歸部選用新樂縣知縣蔡振玉才識迂拘難膺民社著改以教授本班卽選順德府同知張錫祺貌似有才心術猥瑣著開缺另補楊村廳通判潘連辦公竭蹶庸懦無能著勒令休致候補同知趙嘉勳舉動躁妄著以州同降補任邱縣縣丞王廣愛卑鄙偷安候補巡檢孟繼賢聲

明狼藉均著革職永不敘用○又諭永存舒恆奏請飭嚴催欠交米石一摺直隸承德府屬各州縣應交熱河喀喇河屯二倉兵米據稱該府州縣僅將同治九年春夏二季兵米交齊其秋冬二季尚未交倉現在存倉米石不敷來年春季支放等語卽著該總管等咨催熱河道嚴飭各屬迅將欠交米石趕緊買運交倉以裕兵食其前任代理平泉州知州金齡欠交咸豐十年分兵米一千十二石零

並著直隸總督嚴催該員迅速完交毋再延玩○諭軍機大臣等榮全奏帶兵西進安設臺站豫籌西進機宜請飭烏科兩城速籌轉運探悉伊犁情形各摺片榮全已於十一月初六日行抵霍博克賽里擬於烏梁海一帶安設臺站並於烏梁海迤西一體設臺直抵塔爾巴哈台所籌尚妥所有科城所屬自和碩特起至布倫托海應設十二臺著奎昌多布沁扎木楚常順保英妥速籌辦常順保英

未到任以前仍著文碩速為經理不得以交卸在卽稍涉推諉致誤大局金順到任後並著奎昌等詳細告知一體遵照其塔爾巴哈台所屬各臺著榮全富和會商辦理榮全卽當剋期進發毋稍延緩托倫布等早經出京俟行抵烏里雅蘇台時著奎昌等傳知該員等迅速前進毋稍濡滯吉林馬隊已據杜嘎爾奏報於十二月初六日由克克伊爾根地方分起前進若再令另行挑選轉致耽延卽

著榮全催令訥蘇肯管帶此起官兵星速遄行藉資策應榮全現由霍博克賽里西進去烏科兩城較遠所有應解餉銀及軍火等項著奎昌多布沁扎木楚常順保英文碩遴派妥員飛速押運俾無遲滯俄國人占踞伊城情殊叵測喀勒帕科斯克依欲與榮全在那丹木克議事著榮全行抵該處後酌度情形相機籌辦俄人有明年進兵東路之說尤應先事防維榮全豫籌挑選索倫等項人眾會合鄉團規取瑪納斯等處先斷東面之路著屆時妥為籌畫謀定後動毋稍疏虞轉瞬春融事機緊迫景廉務當催齊張玉春等營鼓行而西會合沙山子等處團勇掃蕩逆氛規取烏魯木齊等城並與榮全隨時咨商以期聲息相通藉資聯絡榮全安設臺站摺著鈔給奎昌等閱看其探悉伊犁情形片著鈔給景廉閱看將此由六百里各諭令知之○賞喀爾喀貝勒貢桑珠爾默特貝子阿玉爾布

呢雙眼花翎阿拉善鎮國公阿玉爾扎那喀爾喀頭等台吉瑪哈巴里第花翎○己卯諭軍機大臣等前據喬松年等奏侯家林決口須俟明年冬閒始能興工當交該部議奏嗣因曾國藩蘇鳳文先後陳奏侯家林決口不堵有礙漕運業經諭令喬松年等趕緊籌辦旋據文彬奏已籌撥銀三十萬兩購辦料物復諭喬松年委員赴東剋日興工茲據工部戶部奏稱黃水穿運微特運道堪虞卽民田亦深受害請飭該河督等速將侯家林決口堵塞並將上下民隄設法培築以免疏虞本日又據喬松年奏侯家林工刻下仍難興堵擬將該工決口兩頭先行估築裏頭埽段免致伏秋汛內再行塌寬各等語該河督慮及築基購料有需時日恐春汛以前不及完工虛耗錢糧故為此權宜辦法但民田運道關係非輕自以及早堵築為是現在山東業已撥款購料當無缺乏之虞著喬松年仍遵前

旨迅速派委委員赴工。剋期興辦。務於來年春漲以前堵築完竣。若故意遷延。以實其趕辦不及之言。亦難逃朝廷洞鑒。該處民堰亦應加高培厚。以免旁決之患。著丁寶楨文彬督飭地方官勸諭民間一律興工。並由藩庫酌撥銀兩。以資津貼。其運河應辦工程。並著喬松年督飭道廳等擇要趕辦。俾新漕到境不至阻滯。喬松年所稱漕船由安山入鹽河至漁山一節。須視水勢。臨時酌量。未能豫定。

章程等語。著蘇鳳文喬松年丁寶楨文彬屆時斟酌情形。會同籌辦。臨清張秋建牖事宜。卽著喬松年飭令運河道趕緊勘估。奏明辦理。將此由五百里諭知蘇鳳文喬松年丁寶楨並傳諭文彬知之。盛京將軍都興阿因病乞假。以盛京戶部侍郎瑞聯暫署將軍。命賽因諾顏扎薩克貝勒錫哩巴扎爾扎布在御前行走。庚辰孝莊文皇后忌辰遣官祭。

昭西陵。諭內閣內閣學士翁同龢之母許氏秉性淑慎。教子有方。今以疾終。深堪軫惻。著加恩賜祭一壇。賞銀二千兩。經理喪事。由廣儲司給發。用示優禮。儒臣推恩賢母。至意。以大學士瑞常充文淵閣領閣事。內閣學士紹祺詹事府詹事馬恩溥充文淵閣直閣事。以工部尚書崇綸充經筵講官。陝西巡撫翁同爵丁憂。以倉場侍郎邵亨豫署陝西巡撫。候補侍郎宜振署倉場侍郎。蠲緩河

南汜水。河內武陟溫祥符陳留杞通許尉氏洧川鄆陵中牟蘭儀鄭榮陽榮澤禹商邱甯陵永城鹿邑虞城夏邑睢柘城安陽湯陰臨漳武安內黃汲新鄉輝獲嘉淇延津滑濬封邱考城濟源修武孟原武陽武洛陽偃師鞏孟津宜陽登封永甯南陽泌陽鎮平桐柏鄧內鄉淅川裕舞陽上蔡西平確山淮甯西華商水項城沈邱太康扶溝臨潁襄城光山息七十五廳州縣被水地方。新舊額賦並賑。記

水河內武陟溫四縣災民一月口糧○辛巳以神靈顯佑頒陝西渭水

龍王廟扁額曰威宣綏靖○陝西巡撫翁同爵奏新授布政使譚鍾麟尚未到任請將本年計典展限辦理從之○蠲緩陝西咸甯長安渭南三原高陵臨潼興平醴泉涇陽咸陽富平鳳翔寶雞隴汧陽扶風褒城沔城固大荔澄城朝邑華陰郃長武三水郿洛川中部宜君鄠蒲城南鄭乾榆林岐山三十七州縣被災被擾地方積欠額賦有差○是日壬申年立春順天府進土牛春山寶座上以歲暮裕祭

太廟自是日始齋戒三日○壬午以神靈顯應加江蘇江都縣杜仙女封號曰靈感康仙女封號曰廣庇○諭內閣萬青藜梁肇煌奏書吏舞弊行賄牽涉言官請旨辦理一摺前據御史彝昌奏參薊州知州宋彭壽信任家丁貪鄙不職已交李鴻章查辦茲據萬青藜等

奏據宋彭壽稟稱該州戶書朱開甲等虧欠已完糧租正在勒限比催忽聞換官之說隨即密訪得朱開甲等扶嫌賄買言官參奏並單開鈔呈該戶書等來往信彙等情案關書吏欽銀行賄牽涉言官亟應徹底根究著萬青藜等將案內人證解交刑部嚴行審訊御史彝昌著即行解任聽候傳質○諭軍機大臣等前據伊勒屯奏巴里坤軍餉支絀請飭催各省應解月餉並請飭撥部款當交戶部速議具奏茲據奏稱現在庫款支絀實難再撥至前於積欠新疆月餉各省提撥巴哈兩城餉銀三十萬兩內山東欠解七萬兩山西欠解三萬兩河南欠解十萬兩請飭催趕解等語所有該大臣請撥部款之處著毋庸議現在巴里坤需餉甚殷各該省欠解餉銀自應趕緊籌解以應急需著李鶴年鮑源深丁寶楨文彬嚴飭各該藩司將提撥巴哈兩城餉銀按照欠解之數迅速措齊解交察哈爾

都統衙門由額勒和布派員轉解此項銀兩解到時著伊勒屯知照文麟等分提應用儻各該省仍前延玩卽照遲延軍餉章程由該大臣等嚴行叅奏至山東山西河南直隸欠解新疆軍餉四百十二萬八千兩並以後應解月餉著李鴻章李鶴年鮑源深丁寶楨文彬源源報解以資接濟毋再遲延將此由四百里諭知李鴻章額勒和布李鶴年丁寶楨鮑源深伊勒屯並傳諭文彬知之○又諭前

據文碩奏科城餉項支絀請飭撥部庫銀十萬兩當交戶部速議具奏茲據奏稱部庫放款支絀不敷周轉惟科城需餉急迫自應迅籌接濟請先由部庫撥銀五萬兩由山東撥還部庫再由山西撥銀五萬兩以足十萬兩之數等語著照所請辦理所有此次部撥銀五萬兩著戶部知照順天府委員解赴察哈爾都統衙門交納額勒和布於此項餉銀到時卽行派員轉解科布多交該大臣等應用

至該部請由山西積欠新疆協餉項下提撥銀五萬兩著鮑源深趕緊如數籌撥解赴科城以濟要需常順等接到各項餉銀務當撙節動用毋稍糜費此次所撥戶部庫款尤當迅速歸還著丁寶楨文彬卽由山東欠解新疆協餉項下提銀五萬兩改解部庫毋稍遲延蒂欠以重庫儲將此由五百里諭知額勒和布丁寶楨鮑源深常順保英文碩並傳諭文彬知之○又諭奎昌等奏探聞肅州回匪

情形並請飭庫倫捐備駝隻各等語據稱有蒙古人由肅州賊營逃回言及賊匪因東路有大兵阻止定於明年正月間大股分起由西路欲犯烏城自應先事豫防奎昌等以察漢淖爾地方為烏科西路總要之區擬將鞫克巴雅爾所部察哈爾馬隊移赴該處駐紮以斷該逆來路卽著飭令認真防守毋稍疏虞惟該營移紮後南臺空虛可慮著杜嘎爾另撥隊伍迅速馳赴哈爾尼敦一帶擇要扼

紮以資保衛轉瞬春融該逆出邊竄擾自在意中杜嘎爾務當勤加偵探豫為戒備不可稍涉大意前因張廷岳等奏金順需用駝隻東兩部落無力籌備當經諭令金順知照奎昌等於四部落孳生駝隻內撥用茲據奎昌等奏孳生駝廠已無可調撥西兩部落亦極困苦現經派員幫同金順委員尚玉等分赴各旗勸捐仍恐不敷應用著張廷岳阿爾塔什達設法曉諭東兩部落各王公等量力捐

辦趕解包頭一帶交金順收用不得仍前推諉致誤要需將此由五百里各諭令知之

又諭奎昌等奏仍請飭派口北道總辦各軍糧餉一摺據稱官軍遠道征勦隨帶餉銀恐有疏虞所有各隊月餉自應照馬隊出口時已經放過三箇月成案併交口北道照辦請飭直隸總督飭令口北道將吉林黑龍江察哈爾各營糧餉統歸該道辦理並請飭察哈爾都統將前次指撥烏城軍餉五十萬兩俟

到口時以一半交口北道以備提放其餘仍解烏城等語口外各軍餉銀前疊據李鴻章奏未便由內地遙為經理惟奎昌等所奏亦係為慎重餉需起見應如何辦理之處著李鴻章額勒和布悉心會商妥議具奏將此由四百里各諭令知之○命翰林院侍讀林天齡在弘德殿行走○蠲免兩浙仁和海沙鮑郎蘆漚橫浦浦東六場未墾田畝本年竈課

○癸未

上以裕祭

太廟前期親詣行禮遣官祭

太廟中殿

後殿諭軍機大臣等成祿奏截勦肅州逆匪及關外防堵情形並請飭劉銘傳派兵協勦各摺片肅州回匪攻撲臨水營盤經明春等堵勦獲勝竄犯敦煌之賊亦經李天和協力擊退惟成祿所奏尚是七八月閒之事數月以來賊勢軍情更不知若何左宗棠前派徐

占彪一軍早經起程尚未奏報到肅日期著
卽查明此軍現已行抵何處催令星速前進
毋稍遷延前據文興奏關外賊勢甚重疊經
諭令成祿先派數營馳赴嘉峪關扼紮遏賊
出關之路仍著成祿迅速調派一俟徐占彪
到肅該提督卽當懍遵前旨拔隊出關與景
康等會籌勦辦劉銘傳駐陝各營業已撤回
徐州其曹克忠接統之馬步二十二營尚須
募補足額有需時日著曹克忠酌量情形先

就現有之兵部署起程其募補勇丁隨後再
行歸隊仍於經過蘭州時與穆圖善會商布
置毋誤機宜將此由六百里諭知左宗棠穆
圖善成祿並傳諭曹克忠知之 又諭成祿
奏江南運解該營開花礮洋藥炸礮子暨各
省運解火藥鉛丸等件現寄存山西歸綏道
庫擬先借餉買駝百餘隻運解俟軍火運到
再將駝隻變價充餉請飭山西巡撫速撥協
餉二萬兩應用已派守備方守義前赴山西

領餉兼運此項軍火等語著鮑源深迅速如
數籌撥發交成祿委員卽飭該委員順道將
歸綏道庫各省寄存軍火領赴成祿軍營將
此由五百里諭令知之 賞科爾沁卓哩克
圖親王濟克登旺庫爾黃纁賓圖郡王西哩
克咱爾紫纁烏珠穆沁貝勒達克丹三眼花
翎命教漢郡王達維多克丹郭爾羅斯輔國
公圖布烏勒濟圖喀爾喀貝子察克都爾扎
勒在御前行走○以甘肅平番迎勦竄匪獲

勝賞副將李正魯參將蔡正和巴魯名號

緩征山東濟甯州被水地方本年額賦暨

同治十一年上忙錢糧 朝鮮國使臣閔致

庠等三人於午門外瞻覲 甲申裕祭

太廟遣惇親王奕諒恭代行禮 遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢○遣官祭

太歲之神○以山西布政使張樹聲為漕運

總督山西按察使李慶翱為布政使甘肅安

肅道蔣凝學為山西按察使○調廣東按察

使李文敏為江西按察使江西按察使俊達

為廣東按察使○涼州副都統瑞雲因病解

職以黑龍江副總管額爾慶額為涼州副都

統○乙酉

上御保和殿筵宴朝正外藩科爾沁喀爾喀蘇

尼特烏珠穆沁敖漢浩齊特阿巴哈納爾土

默特巴林鄂爾多斯郭爾羅斯翁牛特茂明

安喀喇沁阿拉善察哈爾王貝勒貝子公台

吉額駙暨朝鮮正副使等隨文武大臣依次

就坐諸樂並作

上進酒召科爾沁扎薩克卓哩克圖親王濟克

登旺庫爾喀爾喀親王達爾瑪蘇尼特扎薩

克郡王扎第布木烏珠穆沁貝勒達克丹敖

漢扎薩克郡王達維多克丹浩齊特扎薩克

額爾德尼郡王喇特那巴咱爾阿巴哈納爾

扎薩克貝勒達木定扎布土默特貝子索特

那木色登巴林貝子索哩雅鄂爾多斯扎薩

克貝子巴達爾琥郭爾羅斯扎薩克輔國公

圖布烏勒濟圖翁牛特頭等台吉德木楚克

蘇隴茂明安頭等台吉達爾瑪吉哩第喀喇

沁額駙勒哲依巴圖阿拉善鎮國公阿玉爾

扎那察哈爾扎薩克台吉瑪哩晉沁保等至御座前賜酒成禮（奉）

慈安皇太后

慈禧皇太后幸漱芳齋侍午膳（酉刻詣鍾粹宮）

慈安皇太后前行禮長春宮

慈禧皇太后前行禮（以甘肅攻克新路坡等處賊巢暨收復秦子寺汎城出力賞提督彭忠國丁桂智總兵官汪有湘楊珍穩一品封

典提督喻正祥總兵官艾景勝副將吳應順蘇結簷蔡立柱周開星夏德發陳長泰陳友明陳啟善參將韓金春米福元湯政聲張傳宗姜恩明李正祚李得祥袁孝松袁復興遊擊蕭鳳霖趙先明主長貴黃仕有都司楊光明李金鑲王讚彪色圖魯名號知州文蘊遊擊却金義等花翎知縣張運秋等藍翎餘加銜升敘開復有差（予貴州大定等處陣亡知府李斌等祭葬世職（予貴州各屬陣亡

殉難監生花訪春等紳民婦女三百八十四名口分別旌卹如例（是年旌表孝子直隸等省黃天梅等四十八名孝友直隸等省吳以綱等七名順孫浙江省王日章一名忠義山西省羅英等七名孝婦河南等省錢勳壻妻王氏等十二口孝女直隸等省朱靈姑等八口義夫江西省何順意一名義士四川省鍾清鶴一名烈婦直隸等省劉琨妻許氏等三十六口烈女江西省楊氏一口義婢浙江

省花香一口守節合例滿洲馬甲安興妻瓜爾佳氏等一百四口蒙古馬甲巴彥代妻白氏等九十口漢軍馬甲長慶妻金氏等三十口內務府園戶福海妻彭氏等二口奉天壯丁張錫齡妻張氏等八十八口各省駐防披甲常喜妻巴雅拉氏等五十二口奉天等省孫車妻祝氏等二萬四千九百七十五口夫亡殉節湖北等省彭元善妻蔡氏等二十口未婚守志直隸省省孟鳳舞聘妻裴氏

等三十口。百歲壽民婦四川等省黃啟修等
二十三名口。五世同堂四川等省林恆升等
三十九家樂善好施湖南等省周恆昌等十
一家均給銀建坊如例。○會計天下民數穀
數除江蘇安徽福建雲南廣西陝西甘肅未
經冊報外奉天等省通共大小男婦二萬七
千二百三十五萬四千八百三十一名口存
倉米穀二百八十四萬一百三十七石二斗
九合三勺

大清穆宗繼天開運受中居正保大定功聖智
誠孝信敏恭寬毅皇帝實錄卷之三百二十六

大清穆宗繼天開運受中居正保大定功聖智
誠孝信敏恭寬毅皇帝實錄卷之三百二十七

敕修

同治十一年壬申春正月丙戌朔

上詣

奉先殿行禮。○遣官祭

太廟後殿。○率王以下文武大臣詣

慈寧門慶賀

慈安皇太后

慈禧皇太后禮成。御太和殿受朝。作樂宣表如

儀。○詣

大高殿

壽皇殿行禮。○御乾清宮。賜近支親藩等宴。○

奉

慈安皇太后

慈禧皇太后幸漱芳齋侍午膳○丁亥

上詣鍾粹宮問

慈安皇太后安長春宮問

慈禧皇太后安至甲寅皆如之○河東河道總

督喬松年奏侯家林工程請由山東撫臣督

辦以一事權得旨所陳自是實在情形惟事

關運道民生該河督仍當與丁寶楨文彬通

力合籌以期事有實濟費不虛糜○緩徵直

隸通武清寶坻香河霸甯河保定文安大城

固安永清東安大興宛平良鄉房山涿潯清

苑安肅新城蠡雄安高陽河間獻任邱交河

吳橋東光天津青靜海滄南皮鹽山唐山開

元城大名東明長垣豐潤玉田安平三河樂

亭定興博野容城完祁東鹿慶雲阜城肅甯

景正定晉無極棗城新樂沙河南和平鄉廣

宗鉅鹿任永年邯鄲成安肥鄉曲周廣平雞

澤清河磁武邑趙隆平甯晉深武強饒陽定
深澤八十七州縣被水地方新舊額賦租課
暨民借倉穀有差○戊子

高宗純皇帝忌辰遣官祭

裕陵○諭軍機大臣等丁寶楨奏遵旨籌堵侯

家林決口力疾銷假親往督工一摺山東侯

家林決口關繫運道民生亟應及早堵塞丁

寶楨因節氣已過立春為期急迫力疾銷假

親赴工次督率河工地方員弁擇日開工實

屬勇於任事力為其難即著督飭在事人員

將決口實力趕辦剋期完工如該工員等果

能勤慎從事著有成效准由丁寶楨破格保

獎儻敢陽奉陰違有心遲誤即著該撫嚴叅

從重治罪以儆玩泄堵築孟家莊河面及侯

家林決口兩處已由東省籌撥銀三十萬兩

此外如尚有需款之處即著丁寶楨覈實籌

辦以資應用喬松年以事難必成請於今冬

舉辦固為慎重餉需起見惟此處決口若不

堵塞將來漫淹曹兗濟十餘州縣若再向東南奔注則清淮一帶更形喫重數百萬生靈所繫朝廷豈惜數十萬帑金不為力籌保衛此時丁寶楨既已獨任艱鉅該河督務當與之和衷共濟揀派熟諳河務各員迅赴工次交丁寶楨差委其餘一切事宜亦應隨時商榷務臻妥善不得畏難苟安稍涉推諉將此由四百里各諭令知之○

上以上辛祈穀於

上帝自是日始齋戒三日○己丑諭內閣欽恤庶獄仁政所先溯查乾隆十一年嘉慶十一年道光十一年均

特頒省刑

諭旨大沛

恩施亦越咸豐十一年

皇考文宗顯皇帝紹述

前徽復頒行

曠典朕臨御以來仰承兩宮

皇太后懿訓夙夜兢兢以愛育黎元為念茲當紀年開秩允宜祇遵

成憲以示矜恤而迓祥和所有刑部及各省已經結案監禁人犯除情罪重大及常赦所不原者毋庸查辦外其餘著大學士會同刑部酌量案情輕重分別請旨減等發落其軍流徒杖以下人犯一併分晰減等完結俾霑寬大之恩勉圖自新之路用副朕子惠兆民法外施仁至意○諭軍機大臣等喬松年奏運道關繫甚重請飭撥銀兩辦理一摺運河五廳隄工埽壩緯道引渠亟應豫籌修守該河督援照上年另案銀兩量為覈減請撥壬申年運河道屬運加捕上下五廳另案銀五萬兩所請係為籌護運道起見著丁寶楨即飭藩司如數籌撥解交運河道俾資應用此項解到後喬松年務當督飭道廳各員隨時察看情形擇要修護毋任日久廢弛以昭覈實而杜虛糜將此各諭令知之○緩徵山東濟

甯厯城齊東齊河濟陽禹城長清德東阿惠民陽信霑化甯陽鄒嶧壽張河澤曹鉅野鄆城濮觀城朝城堂邑博平在平清平莘冠夏津武城金鄉嘉祥臨清臨邑青城東平海豐滕汶上陽穀范蘭山館陶恩魚臺四十六州縣暨青州德州東昌臨清濟甯五衛被水被旱被蟲地方本年上忙額賦並雜課有差○庚寅諭內閣前因榮全奏文碩於所屬臺站並不實心整飭降旨將文碩開科布多幫辦

大臣之缺交部嚴加議處復因文碩奏辦理臺站情形諭令常順等查明具奏嗣據兵部奏請將文碩照溺職例革職本欲俟常順等覆奏後再降諭旨本日據文碩奏因病懇請開缺並請將舊設卡倫變通辦理各一摺現在科布多地方緊要常順等尚未到任文碩輒因病奏請開缺已涉冒昧且於所議變通卡倫事宜奎昌多布沁扎木楚未允聯銜會奏乃該員仍將聯銜之摺另繕呈覽向來無

此體制該員種種謬妄實屬辜恩溺職文碩著照部議即行革職○諭軍機大臣等文碩奏議辦臺站事宜請將舊設卡倫變通辦理各一摺並將會奏原摺呈覽前據奎昌等奏分段整飭臺站摺內聲明科布多第八臺阿爾噶朗圖起至第十四臺哈拉烏蘇止共七臺交杜爾伯特明阿特扎哈沁各盟長總管等由科布多大臣專辦茲據文碩奏稱該七臺地址多在扎薩克圖汗部落之內與明阿

特扎哈沁杜爾伯特等旗牧地無涉請飭仍令舊駐官兵應差等語著奎昌多布沁扎木楚常順保英酌度情形妥商辦理總期無誤臺站不可顧此失彼至榮全前奏擬於烏梁海一帶安設臺站直抵塔爾巴哈台其科城所屬自和碩特起至布倫托海應設十二臺著奎昌等仍遵前旨妥速籌辦據文碩奏稱榮全所議各臺兵馬駝隻額數恐不敷用著榮全酌覈定議咨會奎昌等妥為辦理文碩

所議變通卡倫事宜。奎昌多布沁扎木楚既未允聯銜會奏。如文碩果有所見。不妨單銜陳奏。以備採擇。何得仍聯奎昌等銜名另摺繕遞。向來無此體制。著傳旨申飭。本日並已降旨。將文碩照部議革職矣。至烏科兩城所屬卡倫。應否變通辦理之處。著奎昌多布沁扎木楚常順保英妥議具奏。常順保英現已行抵何處。著即迅速馳赴新任。以重職守。文碩原摺。著分別鈔給閱看。將此由六百里各

諭令知之。○以江蘇荆溪等處拏獲會匪。予提督吳兆有等優敘賞候補知州施惠等花翎。知縣張上德藍翎。餘加銜升敘有差。○追予江蘇南匯陣亡光祿寺署正銜盛家琳建立專祠。外委徐承恩附祀。○辛卯。祈穀於上帝。遣鄭親王慶至恭代行禮。○諭內閣。劉長佑奏。叅行止卑鄙各員。請旨革職一摺。道銜廣西候補知府陳東彝習染漸深。殊無忌憚。隨同廣東候補道華廷傑前赴龍州。該員並

未出關。復於提督馮子材處求署太平府事。鑽營包攬。無所不為。實屬行止卑鄙。平樂府鍾山通判胡昶暄。前署平南縣事。任性妄為。貪婪無藝。撤任後。猶復挾貲謀缺。殊屬貪鄙無恥。陳東彝胡昶暄均著即行革職。並不准投效軍營。以儆官邪。○諭軍機大臣等。前據額勒和布奏。察哈爾軍需不敷。請飭迅撥銀十萬兩。當交戶部速議具奏。茲據奏稱。部庫銀兩未便再議外撥。惟察哈爾軍需急迫。亟須迅籌接濟。請由部先撥銀十萬兩。在山東山西地丁項下提銀歸還等語。著照所請辦理。所有此次部撥銀兩。即著知照順天府派員迅速解赴察哈爾都統衙門投交。額勒和布接到此項銀兩。務當撙節動用。毋稍虛糜。刻下如有急需之處。該都統暫將上年部撥杜嘎爾軍餉銀五萬兩酌量借用。俟此項銀兩解到。即行如數提還。至此次部庫所撥之銀。即著丁寶楨鮑源深各飭藩司於地丁項

下提銀五萬兩。迅解部庫歸還。不得稍有帶欠。以重庫儲。將此由四百里各諭令知之。○又諭劉長佑馮子材奏。官軍勦辦越南匪徒。殲擒悍逆。攻克城巢一摺。越南匪首阮四等。滋擾太原。連陷從化府等城。經馮子材調派官軍。分路堵勦。殲擒悍匪鄧仕昌馬二陳汝景等多名。十月初五日。各營偪攻從化府城。都司蔡簡宸等斬關殺入。該逆四百餘人。悉數聚殲。初六日。將從化府城克復。買市之賊。

經遊擊李揚才等前後夾擊。該匪窮蹙夜遁。官軍跟蹤追勦。疊克銀山波賴匪巢。勦辦尚為得手。劉長佑等現檄總兵劉玉成等會勦瓊山等處踞匪。著即督飭該將弁剋期勦辦。掃蕩餘氛。所有此次出力員弁。准其擇尤請獎。毋許冒濫。前據劉長佑等奏。俟海陽太原一帶賊匪芟除。邊隅摘定。當回師列守衝要。申嚴關禁。即著該撫等嚴飭在事將領。將勦匪事宜迅速辦竣。撤兵入關。扼要防守。以固

邊圉而節餉需。將此由四百里各諭令知之。○賞江西等省庚午科鄉試年老諸生馬慶圖等五人舉人副榜有差。○

上以孟春時享

太廟。自是日始齋戒三日。○壬辰。

世祖章皇帝忌辰。遣官祭

孝陵。○河南巡撫李鶴年奏。請將涿州營參將

田慶和開缺。以總兵官留豫差委。下部知之。

○癸巳。

上以孟春時享

太廟。前期親詣行禮。○諭軍機大臣等。左宗棠

穆圖善奏。官軍連破賊壘。偪攻泰子寺。獲勝

一摺。已明降諭旨宣示。將出力各員照請獎

勵矣。仍著左宗棠穆圖善督飭各營。趁此春

融冰泮之時。奮勉圖功。迅將泰子寺等處賊

巢攻拔。節節掃蕩。盡殄逆氛。以期肅清甘境。

左宗棠另摺覆陳。徐占彪已赴甘州等語。徐

占彪抵甘州後。擬以兩營先赴高臺。俟糧運

辦就。即調黃虎臣等駐涼五營接續前進。著左宗棠檄令蕭宗幹迅將購糧轉運事宜妥為籌辦。以利師行。高臺地方徐占彪已先撥兩營填紮。此軍一到。成祿即當督率所部剋期出關。不准稍涉遲緩。四川委解成祿餉銀三萬兩。左宗棠現已兌解蘭州。遇便搭解。著成祿派員就近提取以資應用。由省至肅州一帶郵政廢弛。並著檄飭臬司設法整頓。庶文報往來不至積壓。另片奏。教天印疊著戰功。請予恩施等語。所有該革員鬪殺孫之友一案。著免其解豫歸案審辦。即由左宗棠咨明豫省遵照辦理。將此由六百里各諭令知之。○陝甘總督左宗棠奏。河州迤西之西南北三面距賊甚近。現調集番部。飭提督楊世俊統帶。各防本境。得旨。仍著檄飭楊世俊及該地方文武妥為駕馭。令該土司等各防本境。毋稍疏虞。又奏。遵查提督楊占鼇初復肅州時。曾派回目酌給回民路票。俾出外貿易。

本屬辦理不善。旋即停止。以後並無給票情事。報聞。○以甘肅泰子寺等處疊克賊壘。賞總兵官鄧榮佳。周應棠。一品封典。總兵官余起立。鄭守南。副將歐陽吉星。黃添泰。鄒金本。凌春臺。參將段寶鳳。李天福。李政。蔣恭成。遊擊孫義恆。何建威。何殿元。都司王勇。張成倫。巴圖魯名號。遊擊李福星等花翎。餘加銜升敘有差。○甲午。享

太廟。遣禮親王世鐸恭代行禮。○遣官祭

太歲之神。○諭內閣。前據曾國藩等奏。請以候補道孫衣言補授江甯鹽巡道。經吏部以與例不符。奏駁。茲據曾國藩等奏。稱鹽巡道事繁任重。非資望素著之員。不足以資治理。請仍以該員補授等語。江甯鹽巡道員缺。著准其以孫衣言補授。○追予安徽各屬陣亡殉難同知銜戈定等紳團婦女一千一百二員名口。分別旌卹如例。○乙未

上詣

時應宮拈香。○御紫光閣賜蒙古王貝勒貝子公額駙台吉暨朝鮮使臣等宴並賞賚有差。○諭軍機大臣等成祿奏賊匪撲犯高臺擊退請將勦賊出力各員獎勵並請飭仍留張掖等處倉糧各摺片陝回禹得彥等竄撲高臺經成祿督軍擊退該逆由南山西遁惟自肅逆叛亂以後關內外逆蹤紛擾日肆蔓延成祿兵力較單未能大加懲創左宗棠所派徐占彪一軍已據奏報由涼州拔隊前赴甘州並以兩營先赴高臺填紮著左宗棠飭令該提督督率後起各隊迅速進發將肅州一帶防勦事宜相機布置毋任陝回陸續西竄以臻周密昨據左宗棠奏已咨商曹克忠先撥十數營赴蘭州由省南阿干鎮延紮沙泥一帶惟肅州軍務亦甚緊要如曹克忠行抵蘭州時該處情形稍鬆著左宗棠穆圖善酌度機宜仍令前赴肅州以資防勦張掖高臺撫彝三處倉糧前經准令成祿截留以資

軍食茲據成祿奏稱署甘州府知府李守愚給與高臺縣知縣信函令將倉糧留備徐軍之用不准截留以致軍心惶惑等語成祿一軍糧食本苦缺乏現須出關尤應寬為籌備所有張掖等處運省倉糧著左宗棠飭令該廳縣仍行留備成祿提用其餘占彪一軍應用糧石該大臣當另為設法籌撥總期彼此軍食無誤以昭平允成祿所參李守愚以私函屬託阻撓軍食著左宗棠查明如有辦理不善之處即行據實奏參成祿部署出關一切事宜亦應豫為籌畫據奏將來出關數千里長途軍裝器械如何運載各州縣車馬如何雇覓戈壁數十站兵丁數千人裹帶餱糧如何備豫出關後軍食如何設措餉運如何疏通肅城回逆能否不至阻隔左宗棠皆應代為籌酌等語即著左宗棠隨時與成祿會商妥籌辦理左宗棠身任封疆重寄西陲與甘省亦屬唇齒相依關外地方綏靖關內始

能安枕。該大臣惟當力顧大局。以紓朝廷西顧之憂。方為不負委任。成祿身膺統帥。亦當未雨綢繆。妥籌布置。約束兵勇。申明紀律。出關後。與景廉和衷共濟。步步為營。以期及早行抵烏魯木齊。方為妥善。儻該提督有心延宕。藉口兵勇單薄。餉需不繼。逗遛肅境。坐失機宜。朝廷定惟成祿是問。毋謂陳奏在先。遂可諉過也。另片奏署高臺縣知縣徐應魁。到任未及三月。私賣倉儲糧石。不止一次。經成祿委員查實。照數追出。另行封儲等語。著左宗棠查明。叅奏。並另委妥員前往接署。將此由六百里各諭令知之。尋奏遵查。李守愚承催西路運省糧石。加以信函。轉行各屬。係在奉旨准令成祿截留之前。並無阻撓情事。徐應魁因辦公需費。將耗羨餘糧折發。與倉儲正款無涉。亦無不合。報聞。○命科爾沁頭等台吉那蘭格喀勒喀爾喀公銜三等台吉扎木薩蘭扎布。在乾清門行走。賞烏珠穆沁公

銜頭等台吉察克都爾色楞花翎。○以甘肅高臺等處截勦竄匪。獲勝。賞副都統明春。總兵官胡可均。巴圖魯名號。守備鍾文遠等。花翎。把總魏天心。藍翎。餘加銜升敘有差。予陣亡知縣廣年。祭葬世職。如知府例。守備白發魁。千總趙平川。祭葬世職。○丙申。孝全成皇后忌辰。遣官祭慕陵。○欽差刑部右侍郎常恩等奏。遵查熱河盜墾圍場。已多騰出。辦理具有成效。請仍飭都統庫克吉泰。經理至承辦委員。頗滋物議。現已撤查。得旨。著將經理不善各員。秉公查辦。俟此案奏結。再降諭旨。○丁酉。豁免湖北黃陂鍾祥京山潛江天門五縣被擾地方積欠額賦。○戊戌。上御乾清宮。賜近支親藩等宴。○諭軍機大臣等。左宗棠穆圖善奏各路兵勇疊次擊賊。獲勝。穆圖善奏親督官兵截勦竄擾北山回匪各一摺。上年冬間。甘省東西北三路馬步兵

勇先後截擊竄匪。屢獲勝仗。其竄擾北山一帶賊匪。經穆圖善親督官軍兜剿。斃賊多名。現在大軍進擣河州。賊勢窮蹙。難保不鋌而走險。擾及省垣。以圖牽掣。著左宗棠穆圖善分飭各軍。扼要嚴防。毋任該逆陸續出竄。以期擒渠埽穴。聚而殲旃。其西路為運道所關。北山秦旺川一帶。產糧最多。均應設法保護。該大臣務當嚴飭將弁。勤加偵探。認真防守。遇有賊匪竄近。即行實力擊剿。毋稍疏虞。將此由五百里各諭令知之。○己亥。

宣統三年二月

十九

宣宗成皇帝忌辰遣官祭

慕陵○

上詣

奉先殿

壽皇殿行禮○御前大臣奏兆珏等前往庫克諾爾賜祭如中途梗阻應報明何處辦理得旨兆珏鐵祺前往庫克諾爾如中途梗阻即著知照穆圖善奏明請旨○庚子。

上詣

大高殿

壽皇殿行禮○御保和殿賜王以下文武大臣蒙古王貝勒貝子公額駙台吉暨朝鮮使臣等宴○奉

慈安皇太后

慈禧皇太后幸漱芳齋侍午膳○諭內閣曾璧光奏分別舉劾文武各員一摺所舉之候補道曾紀鳳興義府知府吳宗蘭候補知府羅

應旒周步瀛候補同知直隸州知州周祚嶧候補同知樊葆書談廷桂候補知縣黎懷記名提督平遠協副將林從太記名總兵何世華補用總兵曾敏行均著照所請俟得缺後再行送部引見候補知州柳熙恩借事招搖不安本分候補知縣王子林鑽營巧詐惑亂聽聞韋廷魁逗遛趨避不洽輿情候補州同許本篤行止有虧補用副將李泉源曾作忠逞兇爭毆不守營規候補都司張世楨昏暴

貪婪行同無賴。均著即行革職。許本篤李泉源。曾作忠並著遞回原籍。交地方官嚴行管束。候補縣丞李光典。辦團不善。致招物議。著以從九品未入流歸部銓選。○又諭曾璧光周達武奏請調員差委等語。已革提督陶茂林。現在湖南原籍。著湖南巡撫即飭該員前赴貴州軍營。聽候差委。四川阜和協副將況文榜。工部員外郎傅玉璠。甘肅補用直隸州知州張涇。知縣潘鑄仁。均著留於貴州軍營。聽候差委。況文榜並著無庸開缺。張涇並著改留貴州。以原官補用。潘鑄仁並著留於貴州補用。○諭軍機大臣等。劉嶽昭岑毓英奏派軍出境。勦辦威甯州積匪。全數撲滅。餉道肅清。一摺。積匪楊紹潰等盤踞黔省威甯州地方。經劉嶽昭等派委吳奇忠等會同該省文武分投勦辦。擒獲楊紹潰陳大桿。平毀賊巢。惟威甯州地方。為滇省餉道。關係緊要。匪首李黑四先期潛逃。誠恐糾合餘燼。蔓延為

患。仍著嚴飭在事文武實力偵緝。務期淨絕根株。毋留餘孽。並著知照曾璧光督飭地方官。將善後事宜妥為辦理。一面會拏逃匪。不得任令遠颺。將此由五百里各諭令知之。○又諭曾璧光周達武奏克復清平等城。一摺。黔省清平黃平一帶。為苗匪麇集之所。賊巢林立。驛路中梗。現經曾璧光等派兵進勦。將清平黃平重安等城克復。驛路業已疏通。正宜乘此聲威。埽蕩苗疆。殲除羣醜。著曾璧光周達武分檄鍾有思等。將敗殘餘匪。盡數撲滅。毋令蔓延。清黃重安一路。漸就肅清。楚省援黔之軍。進攻黃飄白堡。聲勢可期。聯絡並著該撫等檄飭各營。趁此事機得手之時。約會楚軍通力合作。以竟全功。不得稍涉鬆勁。將此由五百里諭知曾璧光。並傳諭周達武知之。○擢雲南威遠營參將馬忠為鶴麗鎮總兵官。○以克復貴州黃平清平州縣等城。賞提督鍾有思黃馬褂。提督鄧日勝成有餘

總兵官張錫卿。劉德順。熊得勝。鄒有聲。朱洪勝。副將龔俊宜。參將黃千祥。巴圖魯名號。餘加銜升敘有差。予陣亡副將李能壽。李萬勝。祭葬世職加等。○以貴州威甯撲滅積匪。賞都司朱克曾等花翎。知縣袁允孚等藍翎。餘加銜升敘開復有差。予陣亡都司王學魁。把總張新初。尹得勝。呂得勝。祭葬世職加等。○追予廣西永安殉難知州吳江妻劉氏旌表如例。○辛丑。

上御乾清宮。賜大學士尚書等宴。○諭軍機大臣等。文煜。王凱泰。奏採購米石運津濟賑一摺。直隸春賑需用米石。文煜等現已派員分赴臺灣上海。買足米四萬石。於今春開河時。用官置輪船。分批運津。並擬添雇商船配運。以資周轉。此項米石。剋日抵津。著李鴻章將收米事宜。早為豫備。遴派幹員經理。飭令隨到隨收。不得勒索稽延。致滋流弊。其米船經過各省。並著曾國藩。文煜。何璟。楊昌濬。丁寶

楨。王凱泰。海緒。分飭各該地方官。於此項米船過境。概免釐稅。查驗放行。文煜等此次購米動用款項。著准其查照上屆成案辦理。將此由四百里。諭知曾國藩。李鴻章。文煜。何璟。楊昌濬。丁寶楨。王凱泰。並傳諭海緒知之。○又諭。王文韶。奏援黔各軍。攻克黃飄白堡。苗寨。疏通驛路。會合黔軍。進剿一摺。貴州苗匪。聚集黃飄白堡一帶。經湖南援軍節節進剿。賊寨悉平。驛路業已疏通。湘黔各軍會合。辦理更形得手。昨據曾璧光等奏。黔軍克復清平。黃平。重安等城。乘勝進剿等語。現在湖南援軍。復將黃飄等處攻克。正可聯絡聲勢。迅掃逆氛。著曾璧光。周達武。檄飭各營。乘此軍威。會合楚軍。勦洗而前。盡殲醜類。北岸賊匪。業經掃除。該處善後事宜。著曾璧光。飭令地方文武。妥為經理。南岸官軍。連破苗寨。所有招撫降苗一節。著王文韶。飭令戈鑑。妥慎籌辦。不得稍有疏虞。唐本有等軍。剋日南渡。從

直湧地五寶項節節按勦。一俟黔軍進至兩
全河香鑪山一帶。即著會同攻勦。該撫等當
趁此事機得手之時。督飭各軍通力合作。以
竟全功。毋稍鬆勁。將此由五百里諭知曾璧
光。並傳諭周達武。王文韶知之。○以湖南官
軍攻破貴州黃飄白堡各苗巢。予提督唐本
有等優敘。賞提督龍萬貴。唐本朋。一品封典。
參將馮鼎有。雷家春。巴圖魯名號。都司楊玉
光。花翎。餘加銜升敘有差。○以湖北監利拏
獲匪首何春台。復已革守備申大發職。並賞
還都司銜藍翎。○癸卯。諭軍機大臣等。富勒
琿奏籌備赴伊官兵需用駝隻一摺。調赴伊
犁之吉林官兵。已於上年十二月初六日起
程。其黑龍江官兵。亦即接踵進發。富勒琿以
土默特四子郡王等所管蘇木六臺供應不
支。恐致貽誤軍行。仿照運糧章程。雇覓商民
駝隻。分起運送。以期迅速。即著飭令該官兵
等。趲程前進。不得稍涉遲緩。其雇用駝價等

項銀兩。現由歸綏道庫先行墊用。著俟該官
兵全行起程後。由定安。富勒琿將墊用銀數
咨照鮑源深。飭令藩司照數籌撥歸還。以清
款項。將此各諭令知之。○以陝西布政使譚
鍾麟暫護巡撫。○甲辰。

上御撫辰殿大幄次。賜蒙古王貝勒貝子公額
駙。台吉暨朝鮮使臣等食。○諭軍機大臣等。
劉坤一奏匪徒撲入靖安縣城。當經擊散。請
將疏防各員褫革一摺。江西奉新縣匪徒。於
上年十二月間。糾眾百餘人。闖入靖安縣城。
擄搶燒毀縣署。雖經代理縣丞魏鑫等會同
奉新縣知縣汪以誠。調集鄉團合擊。陣斬匪
首吳沅發等。生擒溫開接等多名。匪黨均已
擊散。惟此股匪徒。為數並不甚多。而該縣知
縣陶黼昌及縣丞高節先事未能籌防。均屬
咎有應得。陶黼昌高節著一併革職。仍著劉
坤一查明該員等。有無退避情事。據實奏。
該撫現派副將普承忠馳往勦辦。即著督飭

該副將會同各該地方員弁實力搜捕餘匪務絕根株。母任一名漏網。在事出力員弁團紳著准其擇尤酌保。母許冒濫。將此由四百里諭令知之。○予江西靖安被害知縣李德碩。把總彭光燦祭葬。世職加等。如陣亡例。○乙巳諭內閣。楊昌濬奏浙西引地試辦限滿銷數仍無起色一摺。浙西蘇松等四府一州為浙鹽引地。自改復商引以來。試辦已逾兩年。迄無成效。各州縣自寬免督銷處分後。遇有梟販之案。視同隔膜。以致私販橫行。官課益絀。亟應認真整頓。以挽積習。嗣後江蘇蘇松常鎮太五屬督銷引鹽處分。著照例復還。並著曾國藩。何璟嚴飭地方文武實力緝私。以衛引地。如敢仍前玩視。及拏獲鹽犯有意開脫者。即行從嚴叅辦。至商巡殺傷梟匪之案。並准援照直隸山東例案。免其議抵。所有耗餘加認之數。著暫行寬免。以恤商力。○浙江巡撫楊昌濬奏。部駁東塘垣工確查實無

浮冒。礙難覈減。請仍援案辦理。下部知之。○署湖南巡撫王文韶奏。瀏陽縣屬匪徒滋擾。業經兵勇擊散。得旨。仍著檄飭派出各員會同地方官。不分畛域。認真搜捕。毋留餘孽。○丙午。

孝穆成皇后忌辰。遣官祭。

慕陵。○丁未。諭軍機大臣等。德英。托克湍。奏。拏獲鄰境盜匪。審明正法一摺。盜匪李萬銀等。前被吉林官兵擊敗。逃入呼蘭藏匿。經該城守尉烏雲布先後拏獲首夥王澱營等八犯。並訪獲窩家易有明一犯。均經審明正法。緝捕尚屬認真。惟匪首李萬銀在逃未獲。其餘夥黨尚多竄匿。著奕榕。載耀。德英。托克湍。飭令派出官兵會同嚴緝。實力兜拏。務將李萬銀迅速弋獲。毋任漏網。並將匪黨搜捕淨盡。以靖地方。此次出力官兵。著德英等俟江洋地方肅清。擇尤保奏。毋許冒濫。將此由四百里各諭令知之。○戊申。

孝聖憲皇后忌辰遣官祭

泰東陵○諭軍機大臣等杜嘎爾奏遵派隊伍

前赴哈爾尼敦等處駐防一摺前因肅州回

逆有分股由西路欲犯烏城之信當諭令杜

嘎爾撥隊前赴哈爾尼敦一帶扼要紮守現

經杜嘎爾派令福珠哩前往辦理勒守事宜

其所帶吉林兵一隊已令分起由驛前進即

著飭令福珠哩迅速到防相度地勢擇要駐

紮與烏庫各營協同防剿遇賊即擊毋稍疏

虞金順奎昌多布沁扎木楚張廷岳阿爾塔

什達仍當分飭各營聯絡聲勢以壯軍威至

遣赴濟斯洪果爾各處官兵需用駝隻既經

杜嘎爾於各營內選擇備用仍一面設法雇

覓即著趕緊解送俾利師行肅回既有春間

西竄之言該將軍等務宜督飭各營認真防

範如有警信杜嘎爾仍當立即派隊迎剿迅

殄逆氛將此由五百里各諭令知之○蠲緩

兩浙鮑郎錢清西興長亭橫浦浦東六場被

災地方新舊竈課○庚戌以黃河防汛出力

賞道員綸恩二品封典○辛亥諭內閣兵部

左侍郎崇厚著在總理各國事務衙門行走

太常寺少卿總理各國事務衙門章京夏家

鎬著在該衙門大臣上行走○又諭英翰奏

請將庸劣不職各員分別降革一摺安徽候

補直隸州知州楊克勤居心巧滑不堪造就

著以府經歷縣丞降補試用巡檢方恩洪躁

妄性成聲名甚劣試用未入流趙履泰品行

卑劣屢招物議均著即行革職試用從九品

楊澤沛性情險詐行止乖張著即革職永不

敘用以肅官方○追予安徽旌德等處殉難

巡檢羅金鑑等祭葬世職加等○追予安徽

蒙城殉難署知縣蘇履中建立專祠○壬子

諭內閣前因御史李德源奏熱河圍場開墾

地畝委員任意予奪等情當經降旨派令侍

郎常恩董華前往查辦茲據常恩等將辦理

圍場情形查明具奏此案圍場地畝越墾已

久經庫克吉泰派委主事孫恩慶等經理該委員等承辦清查圍場。雖無串通團員捏稟騰園轉售熟地及私賣正圍地畝重交銀兩等事。惟因該處屢經聚眾抗違。輒請調隊彈壓。以致不洽輿情。且於烏拉岱等處應騰圍地未將緩騰情形明白曉示。實屬辦理不善。團員富順隨同辦理騰園。不能勸導旗民致滋物議。亦有應得之咎。熱河理刑司司員刑部主事孫恩慶補用知府高登衢署圍場正藍旗防禦富順著一併交部議處。並不准再令辦理騰園事宜。以示懲儆。另片奏請將從前蒙混出結勘放各員弁懲處等語。著庫克吉泰查取職名。分別交部議處。並查明包攬領地之吏商馬庶等。咨行順天府及各原籍嚴緝務獲。提交該都統訊辦。○諭軍機大臣等。圍場重地。自宜規復舊制。從前辦理開墾事宜。僅據各旗防禦出具甘結。任憑旗民各戶紛紛請領展放。漫無限制。不顧正圍。且有

書吏人等任意包攬情事。庫克吉泰於積重難返之際。力為挽回。非慎選妥員辦理。必滋物議。著庫克吉泰嚴飭各員實心經理。總期日久相安。所有未盡事宜。仍著隨時酌度情形。妥為籌辦。圍內遷出旗民。如實有無地可種以致失業者。並著該都統督飭地方官。隨時設法安撫。以示體恤。常恩童華即著率同隨帶司員回京供職。將此各諭令知之。○又諭景廉奏覆陳籌畫西進事宜一摺。景廉馳抵巴里坤後。探悉趙興體等民團尚知大義。特恐該營糧餉缺乏。見異思遷。已派員赴西路一帶。撫慰各營。分別給予銀物。所辦甚是。惟當隨時駕馭拊循。俾趙興體孔才等營始終固結。不至渙散。以助聲勢。軍糧採辦維艱。前據景廉奏請。已諭李鴻章等分飭口北歸綏兩道廣為採辦。並諭金順等籌辦轉運事宜。以備征兵之用。巴城採買糧石。尚未交齊。著伊勒屯隨時督催。毋稍膜視。將來大兵雲

集需糧尤多。並著景廉會商伊勒屯豫為籌畫。以資接濟。景廉帶兵西進。餉需甚急。所有應解哈密餉銀。及該都統請撥之山東糧價。山西專餉部餉等款。仍著文麟照前分撥三分之一。以應要需。現在春氣漸融。前留哈密兩營及靖邊前營。正可拔隊啟行。著景廉催提前進。毋任逗遛。一俟各營到巴。即著陸續西進。迅赴戎機。並著常順保英迅即採買駝牛羊隻。委員解赴巴城。交景廉軍營應用。以利師行。將此由六百里各諭令知之。○以辦理糧臺出力。予巴里坤筆帖式裕厚以知縣用。並賞五品頂帶花翎。○癸丑。以東河催漕出力。予道員王化堂等加銜升敘有差。○甲寅。

孝儀純皇后忌辰。遣官祭。

裕陵。○諭內閣。刑部奏。訊出書吏賄買摺奏各情一摺。據稱薊州書吏賄買御史彝昌奏參知州宋彭壽一案。訊明朱開甲等展轉賄買。

及該御史供認得受銀兩等情。彝昌身任御史。輒敢聽受賄屬。挾私彈事。實為言官中之敗類。彝昌著先行革職。從嚴訊究。彝昌所參宋彭壽各款。是否確實。仍著李鴻章懍遵前旨。確切查明。據實覆奏。在逃之陳啟堂。劉三沅。著步軍統領衙門順天府五城直隸總督一體嚴緝務獲。送部究辦。中城正指揮房山縣知縣籤差不慎。以致要犯陳啟堂中途脫逃。著查取職名。交部議處。仍勒限飭令嚴緝。如限滿未獲。再行叅辦。○又諭長善果勒敏奏。請旨嚴禁旗營弁兵投效。並特叅不職人員一摺。軍興以來。旗營弁兵投效軍營。其中奮勉圖功者。固不乏人。而夤緣幸進者。亦復不少。至並無軍務省分。紛紛投效。其為奔競取巧。情弊尤屬顯然。亟應認真整頓。嗣後著各省督撫於此項人員。嚴加考察。不得任意請留。如遇保獎。不得濫請扣補。本營實缺。以肅軍政。所有廣州旗營弁兵。現留湖北等處。

差遣之驍騎校賈潤洗等七名。即著長善等咨調回營。責令認真操防。各該省不得藉詞仍留差遣。副都統銜防禦賈穆才具平常。性情驕傲。遇有操防差遣。並不勉力從公。防禦都遠奎才具庸懦。身體軟弱。毫無振作。賈穆著以驍騎校降補。並將所保副都統銜儘先即補協領一併撤銷。仍留四品頂帶花翎。都遠奎著降為領催。仍留五品頂帶花翎。並均留旗當差。不准出外投效軍營。以示懲儆。○

宣統三年三月十七

上

以故科爾沁扎薩克鎮國公烏勒吉濟爾噶勒子特古斯畢里克圖襲爵。○以故扎薩克圖汗扎薩克頭等台吉多爾濟扎布子特固斯德勒格爾賽因諾顏扎薩克頭等台吉布彥濟爾噶勒子瑪呢巴勒襲職。○賞鄂爾多斯扎薩克貝子巴達爾琥紫纒。在御前行走。協理頭等台吉巴勒珠爾雙眼花翎。在乾清門行走。○追予安徽甯國陣亡副將蔡應龍於江西樂平縣原籍建立專祠。○緩徵江西

南昌。新建。進賢。清江。新淦。新喻。峽江。蓮花。安福。永新。餘干。樂平。建昌。安義。德化。德安。瑞昌。湖口。彭澤。豐城。上高。新昌。東鄉。鄱陽。都昌。廣昌。二十六廳縣。暨九江。南昌。兩衛。被旱。被水。地方。新舊額賦。有差。

宣統三年三月十七

上

大清穆宗繼天開運受中居正保大定功聖智誠孝信敏恭寬毅皇帝實錄卷之三百二十七

餉孔殷。經戶部奏撥山東省地丁項下銀十萬兩。諭令丁寶楨等趕緊籌解。茲據張廷岳等奏。刻下籌辦運糧駝隻及宣化古北口二軍月餉。關繫緊要。懇請飭催等語。即著丁寶楨。遵前旨。迅將部撥前項銀兩。於本年五月前。全數解到庫倫。以濟要需。毋稍遲緩。將此由四百里諭令知之。○丁巳祭先師孔子。遣大學士瑞常行禮。○遣官祭文昌帝君廟。○欽奉

慈安皇太后

慈禧皇太后懿旨。皇帝沖齡踐阼。於今十有一年。允宜擇賢作配。正位中宮。以輔君德而襄內治。茲選得翰林院侍講崇綺之女阿魯特氏。淑慎端莊。著立為皇后。特諭。○又奉懿旨。皇帝大婚典禮。著欽天監諏吉。於本年九月舉行。所有納采大徵及一切事宜。著派恭親王奕訢。戶部尚書寶鋆。會同各該衙門詳覈典章。敬謹辦理。○又奉

懿旨。員外郎鳳秀之女富察氏。著封為慧妃。知府崇齡之女赫舍哩氏。著封為瑜嬪。前任副都統賽尚阿之女阿魯特氏。著封為珣嬪。戊午祭

大社。

大稷。遣醇郡王奕譞恭代行禮。○

上詣

壽皇殿行禮。○己未。遣官祭昭忠祠。○庚申。諭

軍機大臣等。李鴻章奏。直省製造火藥需用

磺斤。請飭晉省採辦一摺。直隸練軍各營。月需火藥甚鉅。省城設局製造。所需磺斤。開採維艱。前由山西辦解之磺。已無餘存。亟須源源接濟。以資應用。著鮑源深。援照舊案。迅即籌款。再行採辦淨磺十萬斤。分作四年。陸續解往直省。俾資配造。所需磺價。即由晉省造冊報銷。將此諭令知之。○又諭。成祿奏。縷陳出關六難。請飭徐占彪。西進各摺片。成祿以肅逆阻隔。餉道不通。關外餵糧莫措。出關後

所需各項缺乏。後路可虞。所陳各節。亦係實情。惟肅州之事。先已責成徐占彪。帶兵勦辦。成祿仍當懍遵。疊次諭旨。俟徐占彪到後。即行拔隊出關。不得畏難遷延。徐占彪一軍。計期早應到肅。著左宗棠飭令該提督迅速前進。將肅州一帶賊匪掃蕩廓清。俾成祿出關後。得免後顧之虞。僅不認真勦辦。致誤事機。惟徐占彪是問。肅州軍務緊要。即著曹克忠移緩就急。迅即拔隊。取道蘭垣。前赴肅州一帶。會同徐占彪勦辦賊匪。以資得力。至成祿出關後。路轉運各事宜。左宗棠仍應隨時籌畫。與成祿會商辦理。力顧全局。毋稍膜視。成祿另片奏。竇型陷賊情形。請飭左宗棠查辦等語。著左宗棠即將竇型解任。派員前往接署。並將竇型貽誤情形。查明治罪。原片著鈔給左宗棠閱看。穆騰阿已簡放江甯將軍。成祿請調該將軍舊部將弁之處。著毋庸議。將此由六百里諭知左宗棠。成祿。並傳諭曹克

忠知之。○調吉林黑龍江馬隊官兵各五百名。赴甘肅肅州軍營。聽候烏魯木齊提督成祿調遣。○辛酉。

孝淑睿皇后忌辰。遣官祭

昌陵。○調鑲白旗漢軍副都統穆隆阿為鑲白旗滿洲副都統。以散秩大臣符珍為鑲白旗漢軍副都統。○蠲緩廣西武宣。柳城。宣化。橫。崇善。左。養利。永康。天保。奉議。維容。來賓。新甯。永淳。遷江。歸順。東蘭。隆安。凌雲。象思恩。河池。臨桂。靈川。永安。貴。武緣。賓。上林。二十九州縣被擾地方。新舊額賦有差。○壬戌。諭內閣。瑞聯。奕慶。奏。查勘

永陵

福陵

昭陵應修各工。請擇吉興修一摺。著欽天監於本年三四月內。選擇吉期。先行知照。即著盛京將軍會同工部侍郎。屆期敬謹興修。○又諭。吳崇奏。川省歉收。糧貴。懇請撥銀賑濟一

摺。四川上年夏旱秋潦。收成歉薄。入春以來。糧價驟昂。飢民待哺。整。自應迅籌調劑。加恩著照所請。即於該省釐金捐輸項下撥銀二十萬兩。以資賑恤。該督務當督飭地方官盡心經理。俾得實惠均霑。勿使一夫失所。僅查有侵冒情弊。即行從嚴叅辦。並著湖廣總督湖北陝西貴州各巡撫曉諭商民。運米赴川接濟。所過關卡。概免釐稅。以廣招徠。○諭軍機大臣等。榮全奏。行抵塔爾巴哈台。暫安行營一摺。榮全自霍博克賽里前進。已於上年十二月十一日行抵塔爾巴哈台。隨行官兵。冒雪衝寒。不辭艱險。甚屬可嘉。該署將軍現在塔城附近。暫立行營。該處地方殘破。其舊居之哈薩克人眾。既尚恭順。自當妥為拊循。俾知感奮。伊犁近日情形若何。俄官喀爾帕柯斯克依約在何地會議。著榮全酌度機宜。悉心籌辦。並將會議時俄官如何情形。及如何措詞。隨時詳晰奏聞。葦塘子附近。既有

俄人在彼紮營。該處向有索倫人眾。難保不為俄人煽惑。並著榮全設法曉諭。以固人心。而資聯絡。將此由六百里諭令知之。○賞土爾扈特親王策林喇普坦紫綬。○以烏里雅蘇台安輯流亡。暨隨營辦事出力。賞防禦色拉本等花翎。筆帖式永慶等藍翎。佐領音得泰等加銜升敘有差。○甲子。遣官祭先醫之神。○諭內閣。本日兵部奏請派王大臣驗看兵丁軍政。開單呈覽一摺。單內開列睿親王德長。漏未書名。實屬疏忽。所有承辦司員。著查取職名。交部議處。該部堂官。著交部察議。○乙丑。孝康章皇后忌辰。遣官祭孝陵。○以神靈顯應。加廣東佛岡廳城隍神封號曰靈佑。○諭軍機大臣等。前據鮑源深奏。奉撥烏城軍餉。亟難籌措。懇請截留京餉。寬限撥解。當經諭令戶部速議具奏。茲據戶部奏稱。上年提撥山西積欠新疆餉

銀二十萬兩。作為烏里雅蘇台專餉。限本年正月內撥解。現據該撫奏稱。司庫一時無款提撥。尚係實在情形等語。著照部議。准其於本年應解京餉內。暫行截留銀二十萬兩。仍著鮑源深將前撥烏城餉銀。先解數批。俟上忙開徵。全數解齊。不得緩至上忙以後。始行撥解。致誤要需。此次截留京餉二十萬兩。及上年截留京餉協濟金順餉銀二十萬兩。並應還部墊庫倫等處餉銀十五萬兩。均著該撫陸續籌款解還部庫。毋得絲毫帶欠。以清款目。而免輟轍。將此由五百里諭令知之。○又諭。張廷岳等奏。竄匪出邊肆擾。妥籌防剿。一招西路逆匪二千餘人。已於正月間竄至阿畢爾米特遊牧西南濟爾哈朗圖地方。沿途擄掠。該逆傾巢出擾。勢甚披猖。難保不伺隙紛乘。牽我兵力。邊外地方遼闊。無險可扼。亟應妥籌防剿。免致蔓延。且據探稱。索倫賊首意圖報復。有欲帶賊二萬餘分犯烏科庫

倫之說。尤宜先事圖維。著金順奎。昌。多布沁。扎木楚。常順。保英。張廷岳。阿爾塔什達。勤加偵探。協力防範。遇有賊股竄近。即行痛加剿洗。力遏狂氛。賽爾烏蘇一帶臺站。為糧餉往來要路。該處距庫倫較遠。張廷岳等兵力甚單。未能兼顧。著杜嘎爾迅派得力將領。選帶馬隊。馳赴賽爾烏蘇一帶。擇要扼紮。嚴密堵截。毋任賊匪竄擾。並著金順奎。昌。多布沁。扎木楚。額勒和布。各將所屬臺站。布置周密。設法保護。以期有備無患。賊匪如竄近庫倫。即著張廷岳帶兵前往迎剿。毋任竄入。將此由六百里各諭令知之。○又諭。景廉奏。請將何瑄仍留本任。並請飭李天和先帶兵出關各摺片。前據文麟。伊勒屯。先後參奏。何瑄驕縱妄為。袒護遊擊孫淵椿。並遇事專擅各節。降旨將何瑄交部議處。並令左宗棠調營察看。茲據景廉奏稱。該總兵久任西疆。於地方情形。最為熟悉。當此軍務孔亟。未便遽易生手。

等語。何瑄前已有旨調營察看。既經景廉奏稱該員熟悉情形。採辦糧石。製造軍火。尚屬盡力。即著准其暫留本任。並著景廉責令該總兵。將巴里坤防勦各事宜認真辦理。如不得力。即行據實參奏。不得稍涉迴護。署總兵趙德正。並准其留營。以資差委。景廉現由巴里坤前進。兵力單薄。著成祿飭令李天和。先帶所部兩營出關。隨同景廉西進。以利攻勦。毋稍遲緩。將此由六百里各諭令知之。○理

藩院奏。已革郡王銜仍留貝勒錦丕勒多爾濟。從前賞戴之三眼花翎黃纁。應否一併撤銷。得旨。錦丕勒多爾濟既經革去世襲郡王銜及本身郡王。所有從前賞戴之三眼花翎黃纁。著一併撤銷。仍准戴用雙眼花翎紫纁。○以故扎薩克圖汗扎薩克頭等台吉達克丹多爾濟姪瑪呢達喇襲職。○丙寅春分朝日於東郊。遣惇親王奕諒恭代行禮。○諭內閣。大學士兩江總督曾國藩學問純粹。器識宏

深。秉性忠誠。持躬清正。由翰林蒙

宣宗成皇帝特達之知。洊升卿貳。咸豐年間。創立楚軍。勦辦粵匪。轉戰數省。疊著勳勞。

文宗顯皇帝優加擢用。補授兩江總督。命為欽差大臣。督辦軍務。朕御極後。簡任綸扉。深資倚任。東南底定。厥功最多。江甯之捷。特加恩賞給一等毅勇侯。世襲罔替。並賞戴雙眼花翎。歷任兼圻。於地方利病。盡心籌畫。老成碩望。實為股肱心膂之臣。方冀克享遐齡。長承恩眷。茲聞溘逝。震悼良深。曾國藩著追贈太傅。照大學士例賜卹。賞銀三千兩治喪。由江甯藩庫給發。賜祭一壇。派穆騰阿前往致祭。加恩予諡文正。入祀京師昭忠祠。賢良祠。並於湖南原籍江甯省城建立專祠。其生平政蹟事實。宣付史館。任內一切處分。悉予開復。應得卹典。該衙門察例具奏。靈柩回籍時。著沿途地方官妥為照料。其一等侯爵。即著伊子曾紀澤承襲。無庸帶領引見。其餘子孫幾

人著何璟查明具奏。候旨施恩。用示篤念忠良至意。○又諭本年輪應查閱湖北湖南雲南貴州四省營伍之期。湖北著即派李瀚章。湖南即派王文韶。雲南即派劉嶽昭。貴州即派曾璧光。逐一查閱。認真簡校。如查有訓練不精。軍實不齊。即將廢弛之將弁據實參奏。現在雲南貴州尚有勒匪事宜。尤須隨時加意整頓。毋得視為具文。○又諭兵部奏遵議提督劉銘傳處分一摺。前任直隸提督劉銘傳。於移交所部兵勇。辦理乖方。經兵部議以革職。並請將所兼一等男爵革退。本屬咎有應得。姑念該提督從前勦匪出力。著照部議即行革職。加恩仍留一等男爵。以示薄懲。○以江蘇巡撫何璟署兩江總督。江蘇布政使恩錫署巡撫。山東布政使文彬署漕運總督。○戊辰。諭軍機大臣等。河州賊悍巢堅。地勢險峻。疊經諭令左宗棠督率各軍。穩慎進取。日久未據。該督奏報。糜繫殊深。近聞官軍進

攻新路坡。迤東賊卡。未能得手。傷亡多人。統領大員。有臨陣捐軀者。有不知下落者。現在各軍退屯高家集一帶。堅壁扼守。帳房軍裝等件。多有遺失。勇丁亦有逃亡。而自狄道至鞏昌。運道仍是梗阻。此等情形。如果屬實。則賊勢復張。兵威頓挫。而糧餉又不能繼。後患殊不可言。左宗棠規畫河州。圖維已久。當此事機緊急。應如何整頓戰守。疏通糧道之處。想必悉心籌畫。以作士氣而固軍心。一切辦理情形。即著迅速奏聞。甯靈一帶。需兵鎮壓。現分紮若干營。張曜一軍。向稱得力。尚駐甯夏等處。若左宗棠前敵亟需添兵。就近調張曜之兵會勦。足壯軍威。著左宗棠斟酌全局。妥為辦理。前據該大臣奏劉錦棠請假六箇月回籍。即令募勇來營等語。刻下該員假期已滿。即著左宗棠檄催到甘。派赴前敵。以資得力。將此由六百里諭令知之。○又諭左宗棠。穆圖善奏。各路兵勇勦賊獲勝一摺。甘肅

附省駐紮各營。疊在古浪平番永昌金縣地界。截剿竄匪獲勝。糧運得以無虞。現當進剿河州喫緊之時。仍恐該逆伺隙紛乘。希圖牽掣。近省東西北三路。為運解糧餉軍火往來要道。亟應加意嚴防。著左宗棠。穆圖善。飭令各營嚴密偵探。認真扼守。遇有賊股出竄。即行分投雕剿。力遏狂氛。以靖地方而護運道。毋得稍有疏虞。致滋延蔓。將此由五百里各諭令知之。○以署兩江總督何璟兼署辦理通商事務大臣。○予甘肅齊家嶺陣亡把總喻得敬祭葬世職加等。○己巳遣官祭文昌帝君廟。○欽奉

慈安皇太后

慈禧皇太后懿旨。欽天監奏選擇大婚納采大徵吉期各摺。皇帝大婚典禮。著於本年九月十五日舉行。七月二十六日納采。八月十七日大徵。所有應行事宜。著各該衙門敬謹辦理。○諭內閣。本月初三日。欽奉

慈安皇太后

慈禧皇太后懿旨。大婚典禮。著於本年九月舉行。欽此。本日據恭親王奕訢等奏大婚禮成。應舉行加上

慈安皇太后

慈禧皇太后徽號典禮一摺。

慈懷謙抑。未荷

允行。朕以典禮攸關。恪遵

成憲。因復竭誠籲懇。至再至三。始蒙

俯如所請。所有應行事宜。著各該衙門敬謹辦理。○添建甘肅涇州考棚。從總督左宗棠請也。

大清穆宗繼天開運受中居正保大定功聖智
誠孝信敏恭寬毅皇帝實錄卷之三百二十八

實錄卷三百二十八

十七

大清穆宗繼天開運受中居正保大定功聖智
誠孝信敏恭寬毅皇帝實錄卷之三百二十九

敕修

同治十一年壬申二月庚午諭軍機大臣等

長江設立水師前經曾國藩等議定營制頗
為周密惟事屬創舉沿江數千里地段縣長
稍不加察即恐各營員奉行故事漸就懈弛
黃翼升責任專聞無可旁貸著隨時加意查
察務使所屬各營恪守成規勤加操練以重
江防前任兵部侍郎彭玉麟於長江水師一
手經理井井有條情形最為熟悉該侍郎前
因患病開缺回籍調理並據奏稱到家後遇
有緊要事件或徑赴江皖會同料理是該侍

郎於長江水師事宜頗能引為己任家居數載病體諒已就痊著王文韶傳知彭玉麟即行前往江皖一帶將沿江水師各營周密察看與黃翼升妥籌整頓簡閱畢後迅速來京陛見面奏一切並將起程日期先行奏聞將此諭知黃翼升並傳諭王文韶知之○又諭杜嘎爾奏賊匪肆竄派隊迎勦等語據奏賊匪於正月初間竄由蘇哈圖向東北奔逸阿畢爾米特遊牧濟爾哈朗圖山陽地方有賊股蜂擁竄擾與張廷岳等前奏大略相同該逆傾巢出擾亟應乘其喘息未定迎頭截擊痛加勦洗免致日久蔓延杜嘎爾現派貢果爾帶隊前往迎勦並令福珠哩承德等合力夾擊即著檄令該將領等星速馳勦務將賊匪一鼓撲滅毋稍玩延該匪既有欲竄庫倫之說張廷岳等當懍遵前旨勤加偵探如有匪蹤竄近即行帶兵截勦毋任竄入該城防守事宜並著張廷岳阿爾塔什達會商妥籌

布置不得以賊蹤尚遠稍涉大意賽爾烏蘇一帶杜嘎爾仍當派隊扼紮以衛運道杜嘎爾另摺奏請由察哈爾營總那木濟勒色楞管帶隊內挑補第五隊缺額等語即著額勒和布按照杜嘎爾所咨缺額數目挑補以資得力將此由五百里各諭令知之○以太僕寺少卿丁紹周為光祿寺卿○辛未遣官祭關帝廟○諭軍機大臣等曹克忠奏派兵扼防陝邊情形一摺據稱正月間甘省回逆分竄徽縣兩當等處陝防喫緊當派馬步各營馳赴鳳縣寶雞等處扼紮現在賊氛漸遠已將者貴一軍撤回乾州仍留徐邦道馬隊移紮鳳郡等語刻下陝防既鬆肅州軍務緊要河州賊勢又肆披猖曹克忠所部各營自當速籌整理拔隊西進該提督以糧運車贏異常竭蹶惟恃李鴻章撥款解到方可辦理並據聲稱屢接李鴻章來函深知西路糧運艱難將於正餉外多措協餉貼補運費等語足

見該督圖維周至力顧大局。即著李鴻章將該軍所需餉項寬為籌畫迅速撥解俾利軍行。曹克忠亦當趕緊部署起程毋稍延緩。將此由四百里諭知李鴻章並傳諭曹克忠知之。○壬申諭軍機大臣等前據穆騰阿等並梅啟照同日奏到曾國藩因病出缺當降旨優予卹典並於湖南原籍江甯省城建立專祠生平政蹟事實宣付史館一等侯爵即著伊子曾紀澤承襲其餘子孫幾人令何璟查明具奏候旨施恩茲據何璟歷陳曾國藩公忠體國懋著賢勞覽奏尤增悼惜何璟原摺著暫行留中即將該故督之孫何名年歲若干查明具奏再降諭旨兩江總督及通商大臣事務已先後降旨令何璟署理該署督膺茲重寄所有江防海防暨鹽河漕諸大政亟應循照舊章悉心布置並講求吏治民生妥辦中外交涉事件用副委任將此由四百里諭令知之。○又諭何璟奏請飭張樹聲到任

趕辦河漕等語張樹聲因鮑源深奏請暫留山西辦理大計漕運總督已改派文彬署理此時春水方生順清河等處工程緊要江北河運漕米已陸續開兌亦應督催趲運以重倉儲著丁寶楨傳知文彬於接奉此旨後即日交卸藩篆兼程赴淮任事將河漕各務認真籌辦毋稍延緩將此諭知丁寶楨並傳諭文彬知之。○修察哈爾獨石口兵房從都統額勒和布請也。○癸酉諭軍機大臣等綿宜奏根本重地馬賊日熾積久恐成巨患一摺盛京為根本重地豈容馬賊成羣肆行剽掠前因有人奏奉天承德縣等處盜賊充斥曾諭令東三省將軍實力揔捕茲覽綿宜陳奏各情是馬賊滋事之案層見疊出若不及早捕治必至滋蔓難圖該侍郎所擬清查盜源除賊首整兵力嚴門禁四條均屬妥協著都興阿瑞聯清凱恭鐸妥速籌商嚴定章程嗣後拏獲馬賊即將賊之父兄從重治罪庶父子

相維。弟兄交儆。或可收改惡從善之效。至各堡保甲。應如何認真整頓。旗界民界各官。應如何嚴予責成。毋令置身事外之處。並著該將軍府尹妥籌辦理。新出馬賊。尚易破獲。老賊則交通胥役。廣有聲援。轉得漏網。地方文武員弁。玩弛至此。實堪痛恨。此後務將著名盜首。嚴行緝捕。如有胥役包庇縱放。即將該役嚴辦。並將該管官嚴參。以示懲儆。營兵之設。以資捍衛。尤當督飭該管各官。嚴明賞罰。隨時跟緝。其假冒兵役客商者。尤當即時掩捕。盡絕根株。至奉省八門。該將軍等當飭城防各吏。認真盤查。毋使奸宄溷跡出入。以遏亂萌。此次誥誡諄諄。該將軍府尹等務當振刷精神。趕緊籌辦。儻敢因循粉飾。視為具文。以致盜賊蔓延。必惟該將軍等是問。原摺著鈔給閱看。將此各諭令知之。尋都興阿等奉奉省盜匪。歷經嚴拏懲辦。現將前辦章程。再行責成。內外城旗民地方官實力奉行。得旨。

仍著該將軍等認真辦理。毋得有名無實。以致盜賊蔓延。自干咎戾。○丙子。諭軍機大臣等。李鴻章奏。傳辦緞紬等件。請改派各織造恭辦一摺。此次長蘆奉派織辦。實用各色緞紬。紗絹共計二萬件。據李鴻章奏稱。直隸向不產絲。長蘆未設織局。又無諳練匠役。可雇急切難於齊備。援照成案。請改派江甯蘇州杭州各織造。分辨等語。所奏尚係實情。即著照李鴻章所議辦理。惟傳辦各物計二萬件。何處能辦若干。如何均勻分派。著李鴻章查照單開各件。酌量派定。分別咨明江甯蘇州杭州各織造。照數承辦。應需銀兩。即由慶林德壽文治覈實估計。知照李鴻章籌款協濟。此次傳辦各項活計。需費較多。直隸力難獨任。著李瀚章郭柏蔭劉坤一英翰丁寶楨。無論何款。每省各迅撥銀三萬兩。分解各該織造應用。其不敷之數。著李鴻章儘力湊撥。准其作正開銷。慶林等得此有著之款。務當分

投織辦陸續進呈。不得推諉耽延。致有貽誤。將此由四百里諭知李鴻章、李瀚章、郭柏蔭、劉坤一、英翰、丁寶楨。並傳諭慶林、德壽、文治知之。○又諭李鴻章奏籌運巴里坤軍糧。請嗣後改辦粟米一摺。巴里坤糧石已據該督飭令口北道採辦白麪十萬斤。於本年二月間全數運送出口。赴烏里雅蘇台接收轉運。惟張家口距巴里坤等處計程萬里。麪質潮溼。誠恐遠道黴變。所請嗣後或由景廉就地屯墾招買。如必需張家口辦運。應改購粟米。以免潮變等語。自係為慎重軍食起見。著景廉體察情形。查明該處兵糧確數。將口北歸綏兩道各應辦運若干。豫為籌定。隨時知照李鴻章、鮑源深轉飭覈辦。直隸所需米價腳費。即照李鴻章所請。由口北糧臺領到部餉項下動支。彙案造報。將此由五百里各諭令知之。○旌表守正捐軀湖北江夏縣民王正邦妻李氏。○撥工部鉛丸五萬粒。火繩三千

丈。解赴直隸張家口糧臺備用。○蠲免直隸安河間任隆平甯晉文安東安天津八州縣積滂地畝上年額賦有差。並緩徵節年民欠糧租。○丁丑遣官祭

歷代帝王廟。○追予江蘇各屬陣亡殉難千總鄒永彪等紳民婦女二千四百七員名口分別旌卹如例。○己卯諭軍機大臣等。劉長佑馮子材奏官軍疊克賊巢。殄除瓊武股匪。並拏獲匪目出力各員。請獎各摺片。越南匪徒自官軍攻克從化買市後。分股遁踞潞瀝等處。經馮子材派隊分勦。次第收復。並將逆首何三等拏獲正法。匪黨悉數殲除。即著劉長佑馮子材飭令陳朝綱迅速進兵。務將逃匪張侍灝等盡力兜拏。毋任漏網。以清東路。並飭劉玉成陳得貴兩軍。將太原零匪會同勦洗。毋稍遲延。此次出力各員。准其擇尤保奏。毋許冒濫。越南勦匪事竣。該撫等懍遵前旨。迅將前敵各軍凱撤入關。扼要防守。以固

邊圉而綏藩服。將此由四百里各諭令知之。
○以越境緝獲逸匪。賞廣西都司韋如恆等
藍翎。並升敘有差。○庚辰。

孝昭仁皇后忌辰。遣官祭。

景陵。○諭內閣。李瀚章。郭柏蔭。奏訪獲指官招
搖之職官。請革職審辦一摺。湖北在籍知縣
鮑鳳文。與已革從九品馬鳳瑞。指官招搖。業
經訪獲訊辦。並究出候選縣丞黃文斌等有
夥同招搖撞騙情事。鮑鳳文等以職官詐稱

賣缺。指官撞騙。實屬大干法紀。安徽候補知
縣鮑鳳文。候選教職熊善先。候選縣丞宋濤
著先行革職。在逃之候選縣丞黃文斌。並著
斥革。即飭查拏務獲。一併歸案訊辦。以儆官
邪。另片奏起獲馬鳳瑞往來書信。訊據供稱
前在京所控知縣暨之騏案呈詞。係託工部
主事馬佩瑾。在京轉覓李貴。即李雲釗。頂充
抱告。李貴係馬佩瑾廚夫李卿庵之子等語。
工部主事馬佩瑾。著該部堂官飭令前赴湖

北聽候傳質。並將廚夫李卿庵之子李貴交
出。歸案訊辦。○諭軍機大臣等。戶部奏續請
添撥京餉。請飭各省依限趕解一摺。近來京
餉。戶部均於五月間辦理初限時。奏請添撥
本年辦理大婚禮。內務府借支款項一切
需用浩繁。經該部提前添撥。著照部議。指撥
山東地丁銀十萬兩。河南地丁銀五萬兩。榮
工加價奏准解部歸款銀五萬兩。福建春撥
實存地丁等銀五萬兩。稅釐銀五萬兩。浙江
釐捐銀五萬兩。兩淮鹽釐銀十萬兩。廣東釐
金銀五萬兩。鹽課銀五萬兩。四川鹽釐銀五
萬兩。按糧津貼銀十萬兩。閩海關洋稅銀十
五萬兩。浙海關洋稅銀十五萬兩。共銀一百
萬兩。著瑞麟。文煜。李鶴年。吳棠。何璟。楊昌濬。
王凱泰。丁寶楨。崇禮。按照此次添撥數目。並
本年原撥未解京餉。務於五月前解到一半。
十二月初間全數解清。當此需用孔亟。各該
督撫等具有天良。無論如何為難。總當依限

速解力顧大局。儻藉詞諉卸。率請劃抵截留。致誤要需。即由戶部指名嚴叅。以儆玩泄。將此由五百里諭知瑞麟、文煜、李鶴年、吳棠、何璟、楊昌濬、王凱泰、丁寶楨。並傳諭崇禮知之。○又諭前因榮全奏酌復索倫等眾舊制。請撥餉銀一摺。當交戶部速議具奏。茲據該部奏稱新疆各城經費。現均統歸新疆月餉內撥給。山東每月三萬五千兩。山西每月一萬兩。河南每月二萬二千五百兩。直隸每月二千五百兩。共計七萬兩。索倫等眾餉銀擬即在各省應解新疆月餉內。每年提撥銀二萬八千兩等語。刻下用兵。復新疆需餉急迫。而此項索倫等眾流離困苦。歷有年所。現在營制新復。需款尤急。著照該部所請。即在各省應解新疆月餉內。每年提撥銀二萬八千兩。以為索倫等眾俸餉錢糧之用。並著李鴻章、丁寶楨、鮑源深、李鶴年。各將應解新疆餉銀按月如數籌撥。解交察哈爾。額勒和布於

此項餉到時。轉解烏里雅蘇台。由金順等知照各城分別提用。儻各該省推延不解。即著伊犁將軍各城都統大臣等嚴叅。照貽誤京餉例從重議處。前據榮全奏。本年索倫等眾餉銀已於直隸撥解新疆協餉內提用一萬兩。著額勒和布、金順等。於各省續解新疆協餉到時。知照榮全。富和再行提取銀一萬八千兩。以符每年二萬八千兩之數。榮全所請各兵錢糧免其減成。各官俸銀暫減二成。以八成實銀散放。並伊犁所屬將軍大臣廉俸均暫以八成散放之處。著照所請辦理。以示體恤。將此由五百里各諭令知之。○以故和碩特輔國公桑魯布多爾濟子達呢扎布襲爵。○派倉場侍郎英元前往天津。會同總督李鴻章驗收海運漕糧。○辛巳

上詣

奉先殿

壽皇殿行禮。○諭軍機大臣等。劉嶽昭、岑毓英

奏。官軍攻破賊踞館驛外垣。克復田心等處。殲除首逆。暨迤西官軍圍攻永平等城。獲勝。各摺片。館驛田心等處。久為賊踞。岑毓英督飭何秀林。張保和等分路進攻。力破館驛西北兩門。田心等處賊巢。同時攻破。擒斬賊目多名。逆首馬侍得業。經焚斃。該撫於餉需支絀之際。督飭各營弁勇。屢拔堅巢。勦辦甚為得手。仍著劉嶽昭。岑毓英。激勵各軍。乘此聲威。迅將館驛全城克復。曰者鄉。連今等處賊眾。被勦窮蹙。並著乘勢一鼓蕩平。肅清各處匪巢。以靖邊圉。此次出力各員。准由該督撫於館驛全城克復後。擇尤保獎。候旨施恩。迤西軍務。並著分飭楊玉科。李維述等。迅將永平雲南等縣城。剋期攻拔。規取大理。盡殄逆氛。將此由六百里各諭令知之。○予雲南館驛等處陣亡都司朱占鼇等二十六員祭葬。世職加等。○減免雲南東川。晉甯。嵩明。富民。河西。晉甯。安甯。呈貢。宜良。昆陽。羅次。武定。祿

勸。元謀。河陽。路南。新興。江川。南甯。宣威。羅平。陸涼。霑益。尋甸。彌勒。魯甸。通海。甯甯。思茅。新平。楚雄。姚。大姚。鎮南。廣通。麗江。鶴慶。劍川。浪穹。鄧川。中甸。維西。賓川。四十四府廳州縣。被水地方。上年額賦。○壬午。清明節。

上詣

奉先殿

壽皇殿行禮。○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢○遣官祭賢良祠○裁浙江水陸各營都司守備各一員。千總三員。把總十一員。外委二十一名。額外外委五名。改設都司守備各二員。對調都司守備各一員。

添設把總一員。從巡撫楊昌濬請也。○癸未。諭軍機大臣等。譚鍾麟奏。籌辦陝省邊防。並探聞甘省軍情各摺片。據稱甘肅兩當徽縣均有零股回逆竄擾。調李輝武所部。由略陽鳳縣出境扼紮。遣撤王名滔略武四營。由李輝武另募六營。分別布置。並留譚仁芳所部四營。駐守隴竇。均著照所擬辦理。該護撫仍當飭令李輝武等。勤加偵探。嚴密堵剿。毋任賊蹤擾及陝境。邵亨豫計可抵任。並著將陝

省防勦事宜。妥為籌備。以固疆圉。前聞甘省官軍進攻新路坡賊卡。傷亡多人。各軍退屯高家集。並聞提督傅先宗中礮陣亡。似此情形。賊勢頗為猖獗。日久未據。左宗棠奏報。殊深塵繫。茲據譚鍾麟奏。探聞西甯河州兩處回酋。先後赴安定大營投誠。願繳槍礮馬匹等語。回匪詭譎性成。每當攻勦喫緊時。以投誠為緩兵之計。刻下該逆是否真心悔罪。左宗棠務當體察情形。妥慎籌辦。不可稍涉大意。致為所給。其各處要隘。仍須分派各軍加意堵遏。以防乘間紛竄。後路運道。現在有無梗阻。並近日前敵軍情若何。著即迅速奏聞。曹克忠所需募勇經費。前據李鴻章奏。已飭後路糧臺搭解赴陝。該提督即當懍遵前旨。速籌整理。拔隊西進。毋稍遷延。將此由五百里諭知左宗棠。邵亨豫並傳諭譚鍾麟。曹克忠知之。○以詹事府詹事馬恩溥為內閣學士兼禮部侍郎銜。○追予廣東嘉應殉難署

知州知府文晟謚壯烈○甲申諭內閣丁寶楨奏堵築侯家林決口現已合龍一摺山東侯家林決口經丁寶楨親赴工次督率布政使文彬等嚴飭在工各員弁陸續進占南北兩壩於本月二十四日合龍工程一律堅實覽奏實深欣慰丁寶楨勇於任事督率有方未及兩月克竟全功辦理實為妥速著交部從優議敘另片奏請將出力守備獎勵等語前任東河守備劉蕃挑挖引河節費省夫成功迅速著賞換花翎並賞銀五百兩以示優異又片奏此次工程請免照例報銷等語東省鄆城地方舊未設有廳汛辦理河工亦無成案可循此次工程用款著開單奏明咨部存案免其按照成例報部覈銷他處工程有案可循者不得援以為例○諭軍機大臣等前因內閣學士宋晉奏製造輪船糜費太重請暫行停止當諭文煜王凱泰斟酌情形奏明辦理茲據奏閩省製造輪船原議製造十

六號定以鐵廠開工之日起立限五年經費不逾三百萬兩現計先後造成下水者六號具報開工者三號其撥解經費截至上年十二月止已撥過正款銀三百十五萬兩另解過養船經費銀二十五萬兩用款已較原估有增造成各號輪船雖均靈捷較之外洋兵船尚多不及其第七八號船隻計本年夏間方克藏工第九號出洋尚無準期應否即將輪船局暫行停止請旨遵行等語左宗棠前議創造輪船用意深遠惟造未及半用數已過原估且禦侮仍無把握其未成之船三號續需經費尚多當此用款支絀之時暫行停止固節省帑金之一道惟天下事創始甚難即裁撤亦不可草率從事且當時設局意主自強此時所造輪船既據奏稱較之外洋兵船尚多不及自應力求制勝之法若遽從節用起見恐失當日經營締造之苦心著李鴻章左宗棠沈葆楨通盤籌畫現在究竟應否

裁撤或不能即時裁撤並將局內浮費如何減省以節經費。輪船如何製造方可以禦外侮各節。悉心酌議具奏。如船局暫可停止。左宗棠原議五年限內應給洋員洋匠辛工並回國盤費加獎銀兩。及定買外洋物料勢難退回應給價值者。即著會商文煜王凱泰酌量籌撥。該局除造輪船外。洋槍洋礮火藥等件。是否尚須製造。及船廠裁撤後局中機器物料應如何安置存儲之處。並著妥籌辦理。已經造成船隻。文煜等以撥給殷商駕駛殊為可惜。擬將洋藥票稅一款仍作為養船經費。酌留兩號出洋訓練。即著照所議辦理。其餘各船俟各省咨調時分別派往。將此由五百里各密諭知之。○又諭文煜王凱泰奏台灣道員缺調補無員。請旨簡放一摺。福建遇缺提奏道員夏獻綸既據該署督等奏稱熟悉該處情形。可期勝任。所有臺灣道員缺。即著夏獻綸先行署理。該處地方緊要。且時有交

涉外國事件。非體用兼優之員。辦理易滋貽誤。夏獻綸到任後。仍著文煜等隨時察看。如不能勝任。或於辦理交涉事務。未能剛柔合宜。即著據實奏聞。不得以保奏在前。稍存迴護。將此各諭令知之。○兩廣總督瑞麟奏。訊明越南匪首蘇惲漢等正法。得旨。仍著嚴拏蘇亞鄧。並將逃竄餘匪悉數捕獲。以絕根株。○以山東侯家林決口合龍。予布政使文彬等優敘。賞同知曹文振等花翎。千總冉立壩等藍翎。餘加銜升敘有差。

大清穆宗繼天開運受中居正保大定功聖智
誠孝信敏恭寬毅皇帝實錄卷之三百二十九

大清穆宗繼天開運受中居正保大定功聖智
誠孝信敏恭寬毅皇帝實錄卷之三百三十

敕修

同治十一年壬申三月乙酉朔

上詣鍾粹宮問

慈安皇太后安長春宮問

慈禧皇太后安至癸丑皆如之○諭軍機大臣
等曾璧光周達武奏勦辦上游回匪肅清安
南克復貞豐進規興郡新城一摺貞豐州城
既克上游軍事正順亟應乘勝進攻曾璧光
現派吳德溥等帶隊馳赴興義著即飭令督
同該處文武相機勦辦力攻興義府及新城
等處迅圖克復惟該處回夷各匪皆百戰死

黨且地接滇疆尤恐此擊彼竄蔓延為害著劉嶽昭岑毓英挑派得力大員管帶兵練迅即馳赴該處會同曾璧光周達武所派各軍合力勦辦迅掃逆氛將此由六百里諭知劉嶽昭岑毓英曾璧光並傳諭周達武知之○又諭劉長佑馮子材奏攻勦越匪海太肅清一摺海陽太原肅清劉長佑等現將各營調回扼要防守即著妥為布置慎固封守以靖疆圉山宣興化餘匪已知照越南自行攻勦遇有緩急仍當遙為聲援以示體恤藩服之意未可以距邊較遠概從膜視太轄沿邊一帶夷匪不時出沒劉玉成等所部暫留太轄扼守各隘即著飭令該員等認真防範務臻周密並約束兵勇毋許滋擾地方俟越南接戍兵到即行撤回將此由五百里各諭令知之○以貴州克復永甯等城並勦平下游積匪出力賞守備王恩貴巴圖魯名號知府楊凌參將屈貴隆等花翎守備虎雲霄等藍翎

餘加銜升敘開復有差○以克復貴州貞豐州城賞提督黃宗耀一品封典總兵官李漢元游宗翠巴圖魯名號總兵官何世華等升敘有差投誠賊目譚五獸改名元輔楊九改名樹森均以千總補用○以廣西援勦越南賊匪海陽太原肅清賞副將陳得貴巴圖魯名號同知陳以謨等花翎府經歷米鈞韶等藍翎餘升敘有差予陣亡把總覃士明祭葬世職加等○丙戌諭軍機大臣等左宗棠穆圖善奏官軍疊攻泰子寺情形請將棄營各員分別懲辦並西甯土客各回求撫現籌辦理各摺片甘南官軍進攻泰子寺賊巢兩次失挫傷亡將士多至二百餘人覽奏曷勝憤懣傳先宗所部營哨官副將田大勝參將李天禧都司徐正華千總張承前文志懿熊得勝當徐文秀力援苦戰時棄營先遁致徐文秀等勢孤戰歿實屬罪無可逭著左宗棠將該員等即在軍前正法以昭炯戒記名提督

河州鎮總兵王得勝補用總兵朱運廣記名提督彭忠國不能嚴督所部實力堵禦實屬庸懦無能均著革職留營以觀後效提督楊世俊因糧路隔絕移營退紮情尚可原惟於徐文秀力戰時未能迅速援勦亦有應得之罪姑念其平時打仗勤奮著革去勇號褫去黃馬褂降為參將留營帶隊以示薄懲至辦回之法原應勦撫兼施惟須大加懲創後網開一面使知畏威懷德方為一勞永逸之計

此次官軍疊次失挫賊勢方張忽復遣黨投誠難保不首鼠兩端陰懷詭計現在雖已陸續呈繳馬械左宗棠仍當察看情形妥慎籌辦以免後患所有新調各軍著飭與前敵諸營聯絡一氣嚴為戒備毋為奸回所乘西甯土客各回及陝回崔三等均各乞撫是否出自真心並著左宗棠穆圖善豫師督飭道員馮邦棟前往察看相機妥辦毋稍遷就左宗棠另片奏徐占彪抵肅後勦賊情形覽奏已

悉該提督擬先紮營肅州城南之紅水壩遏賊南竄之衝並調馬步各隊由涼州拔赴高臺進規肅城著左宗棠檄令激勵將士迅拔堅城毋任久踞刻下肅州軍務既有徐占彪一軍足資勦辦成祿所部軍糧可敷數月之食該提督即當拔隊起程迅速出關不得再涉遷延其出關後需用糧食應如何源源接濟俾無缺乏之虞仍著咨商左宗棠妥籌辦理將此由六百里各諭令知之○賞浩齊特

郡王濟克登嘎衛章拉特那巴咱爾烏珠穆沁貝勒達克丹紫纒○予甘肅泰子寺陣亡提督傅先宗徐文秀祭葬世職加等建專祠總兵官鄭守南等十一員祭葬世職加等附祀徐文秀專祠○追予安徽陣亡副將吳秀於山西襄陵縣原籍建立專祠子都司國榮附祀○丁亥祭

先農之神遣順承郡王慶恩行禮○諭軍機大臣等有人奏奉天金州地方上年被水成

災。協領書明額署同知徐仲三匿災不報。災民赴副都統衙門控訴。反被鎖拏多名。拷訊禁錮。該衙門司員奎山扶同捏咨。徐仲三等復帶勇催徵。激成衆怒。捏稱土匪聚衆抗糧。開礮擊斃災民數名。徐仲三所帶勇丁率皆亡命匪徒。官民相仇。恐釀巨患。又牛莊城防守尉果勒明阿不恤民災。橫徵苛斂。私設釐局。抽收肥己。苛派兵車。借端詐索。收斂賭局。錢名為官局。以致賭風日熾。馬賊肆起。劫案疊出。各等語。地方遇有水旱偏災。該管官理應及早查勘。妥為安撫。若如所奏各情。匿災徇徵。縱匪殃民。實屬荒謬已極。著都興阿、瑞聯恭鑒。將書明額等被參各節。確切查明。據實參辦。奉省賭風日熾。以致盜賊橫行。亟應嚴行懲辦。豈可任聽官吏斂收賭局錢文。所有果勒明阿被參各款。並著都興阿、瑞聯一併確查具奏。毋稍徇隱。原摺片均著鈔給閱看。將此各諭令知之。○以前任陝西延綏鎮

總兵官汪柱元為甘肅涼州鎮總兵官。○以

甘肅攻克王疇賊巢出力。賞總兵官王進忠

一品封典。知州汪鼎和二品封典。都司李福

雲守備李得勝。巴圖魯名號知府陸襄。錢都

司張建寅等。花翎驍騎校文瑞等。監翎。餘加

銜。升敘開復有差。○戊子。直隸總督李鴻章

奏報修補熱河隄壩各工完竣。報聞。○以吉

林即補協領。訥蘇肯為山海關副都統。未到

任前。以正藍旗漢軍副都統常星阿署理。○

加賞普濟堂功德林。煮賑小米二百石。展期

兩月。○己丑。欽奉

慈安皇太后

慈禧皇太后懿旨。著於本年九月十四日。冊封

皇后。禮成後。即日冊封慧妃。其瑜嬪。珣嬪。冊

封日期。著欽天監於十月內擇吉舉行。○諭

軍機大臣等。杜嘎爾奏籌撥各隊分布防剿。

一摺。賊匪三百餘人。現由阿畢爾米特旗漸

趨東南。竄近桑錦達賴等處。烏喇特為賊竄

熟徑防勦喫緊杜嘎爾已檄成山永德各帶吉林黑龍江馬隊前赴烏喇特交界洪科塔拉地方暨達爾漢貝勒旗和林果爾一帶分投堵截即著飭令該兩軍星馳前進扼要嚴防遇賊即擊杜嘎爾仍當將存營馬隊趕緊挑補整飭隊伍前赴適中地方相機勦辦毋稍大意該逆此擊彼竄飄忽靡常並著定安富勒琿督飭防軍勤加偵探聯絡防勦以免疏虞賽爾烏蘇為糧運要路杜嘎爾以賊勢

東犯擬於奎昌等前調察哈爾馬隊一千名內截留五百名仍防哈爾尼敦騰出福珠哩一軍守賽爾烏蘇以衛糧道自係先其所急即著飭令該副都統帶隊前往防守毋稍鬆懈將此由六百里各諭令知之○以內閣學士文奎署正藍旗漢軍副都統○改江蘇海州直隸州知州調缺為題缺從原任總督曾國藩等請也○庚寅諭軍機大臣等景廉奏催調馬隊派兵西進並請飭文麟撥兵援助

各摺片據稱該營兵力單薄必須馬隊助勦擬令吉爾洪額統帶黑龍江官兵五百名由科城徑赴奇古以期便捷等語吉爾洪額所帶馬隊業經杜嘎爾奏報起程現在行抵何處著奎昌志剛多布沁扎木楚常順保英查明飭令迅速前進即由科布多徑赴奇古古城一帶聽候景廉調遣成祿前調吉林黑龍江馬隊各五百名該省已報起程到西路後景廉亦可會商調撥以資厚集景廉已派營

官金永清帶領一營先赴古城駐紮並經理屯田事宜以資兵食即著該都統悉心經畫督率後路各營陸續進發相機攻勦毋稍遷延兵勇長途遠役該都統務當妥為駕馭恩威並用以固軍心景廉軍營需餉甚亟前由西征糧臺運解餉銀六萬兩成祿何以全行截留實屬不顧大局著成祿即將前項餉銀分撥景廉應用派員護解赴坤以濟急需濟木薩迤南大河口一帶通迪化吐魯番為逆

匪往來必由之路。景廉以威儀後營營官李生元熟悉該處情形。請調該營前往扼守。著文麟即飭該員管帶所部勇丁馳赴古城。擇要駐紮。以壯聲援。軍功柳天祥探悉伊犁軍情。所稱俄人纏頭漢回。各懷爭鬪之心。勢不相下等語。是否屬實。仍著景廉隨時派員確切偵探。據實具奏。榮全行抵塔爾巴哈台後。行知俄官定地會議。刻下辦理情形若何。著該署將軍妥慎籌辦。詳悉奏聞。將此由六百里各諭令知之。○命五城煮賑展期兩月。○癸巳祭

先蠶之神。遣總管內務府大臣春佑行禮。○諭軍機大臣等。載燦等奏永濟庫款支絀。請飭直隸借撥銀兩。並催解欠款一摺。直隸遵化等州縣應交永濟庫租銀尚欠二萬一千餘兩。本年額徵租銀亦未解交。現在應發要款需用甚鉅。亟應設法籌撥。以資接濟。著李鴻章即飭藩司。無論何款。暫行撥借銀七千

兩。並著專派妥員將同治十年以前各該州縣拖欠永濟庫租銀勒限嚴催解交。藩庫抵歸借款。其餘欠交租銀並本年額徵銀兩一併飭令掃數報解。毋許延宕。將此諭令知之。○又諭瑞麟奏請調撥閩省輪船赴粵一摺。廣東欽州一帶海港遼闊。捕盜巡洋極關緊要。必須大號輪船方足禦風濤而資巡緝。瑞麟所請將福建輪船調赴該省應用。係為綏靖洋面起見。著文煜、王凱泰即將閩廠已成之伏波輪船一號派撥赴粵。即用原派管駕之弁兵水手人等駕駛前往。其月需工費薪糧等項。並即知照粵省由瑞麟飭局籌款支發。以節浮費而歸實用。將此各諭令知之。○甲午。諭內閣左宗棠奏請將護理道員革職拏問一摺。撤任護理安肅道花翎四品頂帶寶型前在肅州時。諸事惟回逆馬四之言是聽。且目漢團為土匪。迫令散團從教。復借官銀賞賊。實屬悖謬已極。寶型著即行革職拏

問。交左宗棠嚴行審訊。按律定擬具奏。尋奏寶型於上年冬月經陝回挾出行抵高臺即患痰迷病故。前請革拏之案。應即奏結報聞。○又諭。前因張廷岳等奏參達爾濟縱賊遠颺及伯克瓦齊爾等附和招降等情。先後降旨。將達爾濟革職拏問。交奎昌多布沁扎木楚。杜嘎爾。訊擬具奏。並將伯克瓦齊爾等分別撤任質訊。茲據奎昌等訊明達爾濟被叅各情。請旨辦理等語。此案已革總管達爾濟於上年九月間。追賊至畢留圖招地方。賊已被困廟內。並不就地撲滅。輕聽賊匪投誠之言。致令乘夜逃竄。實屬咎有應得。惟念該員旋在喀雅喀喇烏蘇地方勦賊獲勝。其從前帶隊亦尚得力。達爾濟著免其治罪。仍帶革職處分。留於軍營。責令管帶察哈爾馬隊勦賊。以觀後效。公齊默特多爾濟。扎奇魯克齊。伯克瓦齊爾。同在畢留圖廟東南地方列隊。賊匪潛由該處竄走。又復捏詞稟報。希圖卸

過情殊可惡。姑念該員等前在庫倫防勦。尚屬出力。齊默特多爾濟。伯克瓦齊爾均著革職留營效力。以示薄懲。張廷岳等輕信屬員一面之詞。並不詳細查明。率行奏參。實屬不合。張廷岳。阿爾塔什達。均著交部議處。其擒獲賊黨。著奎昌等分別辦理。尋兵部會同理藩院議。張廷岳。阿爾塔什達。均照誤揭屬員例降一級調用。得旨准其抵銷。○豁免甘肅河狄道。渭源。金靖。遠隴。西安。定會。甯岷。平涼。隆德。固原。華亭。鹽茶。安化。甯正。甯合。水環。甯夏。甯朔。靈鎮。原靈。臺。二十四廳。州縣。暨紅水縣丞。沙泥。州判。所屬被擾地方。同治元年至八年應徵額賦。○乙未

孝賢純皇后忌辰遣官祭裕陵。○諭內閣。譚鍾麟奏請將貪劣之知縣革職永不敘用等語。前署陝西靖邊縣知縣蕭啟基接管駐邊營勇五百名。任意短缺。經該管道派員查點。始雇民夫充數。亦止一百八

十餘名所領之餉率行侵吞且有招倡濫刑私設錢局等情實屬行同敗類蕭啟基著即行革職永不敘用並著陝西巡撫將該革員提解到省追繳侵蝕餉項從嚴懲辦以儆官邪○諭軍機大臣等成祿奏派兵赴肅請催各省協餉並關內外防勦竄匪及糧運艱窘情形各摺片肅州軍務前已有旨責成徐占彪勦辦該提督馬步各隊既經陸續到肅自不難次第布置力籌埽蕩成祿此時正可部署起程迅速出關不得再以肅賊牽掣為詞意存延宕該提督前請調撥吉林黑龍江馬隊各五百名業據該將軍等奏報起程桂錫楨所帶馬隊係隨同徐占彪在肅州勦賊不宜率行抽調致兵力轉形單薄著毋庸議令出關現在景廉業已派營進紮古城其所部靖邊各營亦已催調西進成祿即當就現有兵力剋期進發以資聯絡不必俟吉林黑龍江馬隊到肅始行出關致滋延誤成祿需用

軍糧自應豫為籌備俾免中途缺乏據奏道員蕭宗幹指定高臺金塔兩處買糧數千石虛張其數糧尚無著且以道遠為詞稟辭總辦後路糧臺實屬意存推諉著左宗棠飭令蕭宗幹將成祿需用糧石及轉運車馬等項妥為籌辦不得稍存膜視景廉前調之李天和二營著成祿仍遵前旨先行飭令前進以資策應曹克忠一軍前已有旨催令速籌整理拔隊西進矣成祿所請飭催各省協餉及將欠解餉銀數目開單咨照西征糧臺附便催提運解等語著戶部查照辦理將此由六百里各諭令知之○緩徵陝西府谷縣被雹地方本年額賦○丁酉諭軍機大臣等禮部奏據朝鮮咨轉奏一摺並將原咨鈔錄呈覽據稱上年十月間有伐木匪民七十餘人乘夜越界屯聚朝鮮杜芝洞山間嗣復聚多人渡江放火焚燒房屋經該國礮勇擊斃數名仍屯聚下流金昌里對岸旋有王陽春韓五

亭等投遞約書。均各散去等語。匪民越江滋擾。大干法禁。所稱該國平安道厚昌郡。究與盛京地方何處毗連。現在匪徒雖經散去。惟事關冒禁越境。亟須徹底查明。嚴行懲辦。著都興阿。瑞聯飭令該處地方文武嚴密查拏。妥為辦理。嗣後仍當嚴禁偷越。毋使再有出境滋擾情事。並著禮部即行知照朝鮮。以安藩服。禮部摺及朝鮮原咨。均著鈔給都興阿等閱看。將此諭知禮部。並由四百里諭令都興阿。瑞聯知之。○己亥。

上奉

慈安皇太后

慈禧皇太后幸漱芳齋。侍午膳。○諭軍機大臣等。劉嶽昭奏。派軍出境會剿興義賊匪一摺。貴州興義府城踞匪及新城賊巢。久為滇黔兩省邊患。前據曾壁光等奏。員豐克復。派兵進規興郡新城。茲據劉嶽昭奏。現派副將吳奇忠等管帶忠義等營。由興義縣進征。知府

李維暹等管帶銳字左右營。由普安廳進征。並派道員沈壽榕馳往興義。督率會剿。即著劉嶽昭岑毓英飭令沈壽榕於行抵興義後。即行會合黔省官軍。將進剿機宜妥商辦理。曾壁光周達武當檄令吳德溥等迅速督隊合力剿擊。將興義府及新城等處剋期攻拔。毋稍延緩。此次雲南派出各軍所需糧餉軍火。並著曾壁光周達武妥籌兼顧。毋令缺乏。將此由五百里諭知劉嶽昭岑毓英曾壁光。

並傳諭周達武知之。○撫恤琉球國遭風難夷如例。○庚子。諭軍機大臣等。前據奎昌等奏。仍請飭口北道兼管各軍餉銀。當諭李鴻章額勒和布妥議具奏。茲據奏稱。口外西北各城距口數千里。或萬餘里。行營餉項按月酌發。非內地所能懸揣。現在口外各路兵勢已分。斷難強令由一處放餉。各等語。所奏係屬實情。口外各軍餉銀。既未便由內地遙為經理。應仍歸各城就近酌放。以免貽誤。所有

調赴伊犁之吉林馬隊五百名著歸榮全隨營放餉調赴哈密之黑龍江馬隊五百名著歸景廉隨營放餉文麟錫綸隨時兼顧至杜嘎爾所部察哈爾吉林黑龍江馬隊應行支放餉銀業據該副都統奏請循舊辦理其駐紮烏城之吉林黑龍江馬隊五百名著歸奎昌志剛多布沁扎木楚就近放餉經此次立定章程後各該將軍大臣等務當遵照辦理不得再議更張以歸畫一而杜推諉李鴻章額勒和布當隨時督飭口北道將口外各軍米糧寬為籌備俾免缺乏額勒和布前已請撥餉銀籌辦轉運近聞各臺存糧尚多未經起解著額勒和布嚴飭各臺員弁迅將存糧陸續起解源源轉運以濟軍食將此由五百里各諭令知之○辛丑諭內閣大學士瑞常植品端方老成練達受

先朝知遇之隆由翰林洊陟正卿屢司文柄朕御極以來擢晉綸扉並總管內務府大臣兼

理部旗事務宣力有年勤勞懋著前以微疴給假調治方冀即日就痊長資倚畀茲聞溘逝悼惜殊深著賞給陀羅經被派孚郡王帶領侍衛十員即日前往奠醑加恩晉贈太保照大學士例賜卹入祀賢良祠任內一切處分悉予開復應得卹典該衙門察例具奏伊子禮部員外郎文暉著俟服闋後以該部郎中即補用示篤念耆臣至意尋予祭葬謚文端○諭軍機大臣等張廷岳阿爾塔什達奏口外竄匪不靖敬陳管見一摺邊外地方遼闊賊匪不時出竄避兵而行屢次飽掠遠颺均未能跟追兜勦蠢茲小醜竟至來去自如若不先事圖維制其死命勢必乘虛再犯迄無了期張廷岳等請於土爾扈特貝勒游牧等處駐紮馬步精兵二三千名扼要設防遏其竄路烏科庫倫等處可保無虞於地勢賊情是否可操勝算杜嘎爾帶兵出口勦賊自必熟悉情形即著酌度機宜會商張廷岳等

妥籌辦法。迅速奏聞。張廷岳等摺。著摘鈔給杜嘎爾閱看。至賊匪老巢。多在肅州甘州一帶。根株不淨。則滋蔓難圖。著左宗棠嚴檄徐占彪。迅將肅州賊匪盡數蕩平。並另派得力將領。酌帶勁旅。前赴甘州。殄滅賊股。總須犁其巢穴。就地殲除。斷不可任其敗竄出邊。致滋紛擾。將此由五百里各諭令知之。尋杜嘎爾奏。遵查邊外窮荒沙漠。客兵未便常屯。土爾扈特等處。能否久駐多兵。未敢遙揣。現已督軍進勦。俟隨時體察情形。會商辦理得旨。著即督軍進隊。會商張廷岳等。確探賊蹤。擇要扼勦。毋任匪徒四出滋擾。○又諭張廷岳。阿爾塔什達。奏請將戍守庫倫宣古兩軍。仍由直隸協餉項下撥解一摺。據稱直隸練軍餉項。向由長蘆等處籌撥。現在庫倫戍守之宣化古北口官兵。統計二千餘名。月需餉銀一萬餘兩。此外支放蒙古官兵等項。為數尚多。宣古官兵月餉。現既在庫倫支領。則原餉

自在兩鎮存儲。請將該兩軍月餉。仍由直隸練軍餉內撥解等語。庫倫防守緊要。餉需短絀。自係實情。所有宣古兩軍餉項。即著李鴻章自奉旨之日起。即由直隸練軍原餉內。按月照數委解張家口。轉解庫倫。如一時接濟不及。仍著張廷岳等。由庫墊放。俟解到時再行歸款。將此由五百里各諭令知之。○以河南官軍防守閩鄉等處。暨會勦陝西竄匪出力。賞守備宋員魁等花翎。訓導湯俊明等藍翎。餘加銜升敘有差。○追予江蘇各屬陣亡殉難通判汪駿昌等紳民婦女一千八百三十七員名口。分別旌卹如例。○癸卯。諭軍機大臣等。喬松年奏籌辦運泐二廳漫水隄工。請飭撥銀兩一摺。上年鄆城縣侯家林決口。漫水入運。以致運河泐河廳屬隄埽等工。被衝墊陷。現在侯家林業已堵合。亟應將該廳屬各工趕緊修築。以利漕運。而衛民田。著丁寶楨飭令藩司。迅即撥銀五萬兩。發交運河

道覈實動用。喬松年即督飭該道廳妥速籌辦。剋日完工。不得稍涉延誤。將此各諭令知之。○甲辰。諭軍機大臣等。文麟奏肅州回逆出關肆擾。暨李生元所部未能拔隊赴濟木薩各摺片。肅州大股賊匪復行出關。攻陷雙塔堡。汎城頭起賊隊。已有竄赴敦煌之信。該處本有威儀馬步隊及新中營勇丁駐紮防堵。即著文麟飭令各營會同戶勇及在城官兵協力堵禦。毋任賊匪深入。成祿當督率所部剋期出關。迅將此股竄匪盡數殲除。鼓行而西。不得再涉遲延。致滋貽誤。景廉後路轉運事宜。據文麟奏稱。哈密車駝短缺。又乏餘糧。轉運難於籌辦。請令鎮迪道出關專辦。後路轉運各事宜等語。鎮迪道員缺已有旨簡放恩綸。照景廉所請。令由北路赴任。所有景廉後路糧運著左宗棠另派道府大員兼程出關。妥為料理以濟軍食。該大臣派員出關勢難迅速。仍著文麟隨時設法兼顧。毋稍膜

視哈密東路。時有賊氛。李生元所部駐紮二堡。未能調赴濟木薩一帶。現在張玉春等已率所部馳抵景廉軍營。該都統當酌度情形。或能另撥一軍協防濟木薩。俾李生元所部仍駐二堡。以免空虛。著隨時會商文麟妥為籌畫。賊有撲犯哈密之說。著文麟勤加偵探。實力防範。不可稍涉疏虞。將此由六百里各諭令知之。○丙午。

上御宣壽宮。賜王以下文武大臣。蒙古王貝勒貝子額駙等食。○四川總督吳棠奏民教案。應否會同將軍辦理。得旨嗣後遇有民教案件。著吳棠會同魁玉辦理。○丁未。

萬壽節。遣官祭

太廟後殿。遣官祭

福陵。

昭陵。

昭西陵。

孝陵。

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

顯佑宮

東嶽廟

城隍廟○

上詣

大高殿

壽皇殿行禮○詣鍾粹宮

慈安皇太后前行禮○長春宮

慈禧皇太后前行禮○御乾清宮○王以下文武

清實錄

同治十一年三月

大臣蒙古王貝勒貝子額駙等行慶賀禮○衆官於午門外行禮○御寧壽宮○賜王以下文

武大臣蒙古王貝勒貝子額駙等食○庚戌

諭軍機大臣等常順保英奏回匪分股出竄

請調撥馬隊防剿一摺據稱探報回匪二萬

餘衆分為兩股一股由索倫錫伯格圖路撲

犯烏科一股由巴勒巴爾海春住拜新圖賽

哈諸路竄擾庫倫等語賊匪大股出竄深慮

乘虛撲擾逞其詭謀烏科兩城防守事宜關

繫緊要即著奎昌志剛多布沁扎木楚常順

保英妥籌布置勤加偵探加意防剿不得稍

涉疏虞其庫倫防務著張廷岳阿爾塔什達

先事籌備以固邊圉前據杜嘎爾奏滋擾阿

畢爾米特旗遊牧之賊竄近桑錦達賴等處

該副都統擬赴適中地方相機督剿此股賊

匪現竄何處該逆股數不一奔突靡常杜嘎

爾務當斟酌機宜嚴飭將弁偵賊所向實力

截剿並將竄庫竄烏之路派兵嚴密堵禦毋

三三三

三七三

任匪蹤擾及常順等以大同官兵孱弱請將蘇彰阿所帶兩起馬隊調赴科城惟烏城兵亦無多此項馬隊是否可以調撥著奎昌常順等會商妥辦大同兵遠道抵防甚屬不易若遽行裁撤未免可惜著常順等申明紀律認真訓練俾成勁旅以資捍禦將此由五百里各諭令知之○辛亥

上以孟夏時享

太廟自是日始齋戒三日○壬子諭內閣前因

御史彝昌奏參薊州知州宋彭壽藉差勒索等款當經諭令李鴻章確切查叅茲據查明具奏此案直隸薊州知州宋彭壽雖查無藉差苛派及信任門丁納賄招搖暨匿災不報情事惟於家丁古雲催開比單並已經斥逐之家丁秦升再行進署失於覺察且不將半壁街等村莊勘不成災之處申報查覈實屬不合宋彭壽著交部照例議處餘著交刑部歸案覈辦○諭軍機大臣等海緒奏織辦緞

紬等項撥款未定請旨飭催並請展緩限期先行動墊關庫存款一摺該監督承辦緞紬等項需款甚鉅刻下為期漸迫自應趕緊撥款織辦以免貽誤著何璟恩錫督飭江蘇兩藩司先行指定款項迅速解往並援照成案於江海關洋稅及蘇松各局釐捐項下分別妥籌撥解毋稍延緩海緒於撥款未到時准其於淮安關庫現存各項銀二萬餘兩內先行分別動支墊辦務於大婚典禮以前將傳辦緞紬各件全數解京不得稍有遲逾將此諭知何璟並傳諭恩錫海緒知之○又諭王文韶奏酌減援軍積欠過鉅擬請借撥餉項一摺湖南援黔一軍積欠餉項甚鉅上年指撥湖北四川月餉銀共四萬兩湖北雖隨時接濟仍難按月解齊四川則於湖南舊欠該省旗綠兵餉內業經劃抵銀十萬兩王文韶以現在苗事漸有就緒援局可以稍紓擬將援軍酌量裁減惟積欠無從籌補亟須設法

通融借撥以應急需著何璟恩錫劉坤一於江蘇江西兩省各借撥銀二十萬兩江蘇借款即於督銷淮鹽局應撥湘釐項下按季扣還江西借款即於月協湖南援黔軍餉項下按月提還以清款目王文韶一面將援軍酌量減撤積欠及早清釐務當妥慎籌畫仍於黔省勦撫事宜力為兼顧以竟全功將此由五百里諭知何璟劉坤一並傳諭恩錫王文韶知之○又諭張廷岳阿爾塔什達奏庫倫

情形今昔不同請量為變通一摺據稱庫倫孤懸草地無城無池向未設兵戍守遇有事務須調取圖車兩部落官員差委往返需時現在事務較繁擬將圖車兩盟之協理將軍和貝飭令每年輪班在庫聽候差委該處近接俄疆宜籌防範請由圖車兩盟蒙兵內每季輪派四百名分駐四隅防守與將軍和貝輪替休息所有烏城駐班即責成賽扎兩盟將軍和貝按季輪替圖車兩盟無庸赴烏城

駐班其賽扎兩盟所屬毗連俄國之卡倫距庫較遠請仍歸烏城將軍管理遇有烏庫交涉事件彼此咨商關照等語所陳各情係為因時變通起見惟如該大臣所奏是否烏庫兩處均各得宜並有無流弊之處事當更改舊章不厭詳求著金順奎昌志剛多布沁扎木楚張廷岳阿爾塔什達統籌全局彼此悉心會商據實覆奏張廷岳等原摺著鈔給金順等閱看將此由五百里各諭令知之○浙

江巡撫楊昌濬奏遵查水陸防軍未能裁減釐卡捐輸現亦無可裁併報聞○調四川松潘鎮總兵官聯昌為重慶鎮總兵官重慶鎮總兵官李得太為松潘鎮總兵官○癸丑上以孟夏時享

太廟前期親詣行禮○諭內閣李鶴年奏三等侍衛王世清因告假前赴甘肅措貲在廣東提督張曜軍營投效尚稱得力懇准留營差委等語向來侍衛不准投效軍營王世清既

經兵部咨催銷假著即回京當差。所請留營差委之處著不准行。○諭軍機大臣等左宗棠穆圖善奏西路官兵迎勦竄匪情形一摺。大清古浪永昌一帶時有賊匪竄擾。雖經官軍迎勦獲勝。仍恐游氛不時出沒致擾春耕。仍著左宗棠穆圖善督飭各路官軍嚴密防範。隨時按捕毋任紛竄。前敵各營失利後左宗棠尚未續有奏報。現在情形若何。敗挫各營如何整頓。近日有無戰事。殊深廑繫。西甯土客各回及陝。崔三等前於官軍疊挫賊勢方張之時遣黨投誠。殊恐另有狡謀。左宗棠務當熟審賊情妥慎籌辦。不可一時輕信。致為所紿。目下如何辦理暨官軍賊勢近日情形若何。並著左宗棠隨時詳細奏聞。將此由六百里各諭令知之。○以直隸永定河隄工修築完竣。賞知府徐本衡等花翎道員祝壇等升敘有差。復道員李朝儀同知朱津等職。○追予河南各屬陣亡殉難紳民婦女一

千四百九十三名口分別旌卹如例。

大清穆宗繼天開運受中居正保大定功聖智誠孝信敏恭寬毅皇帝實錄卷之三百三十

大清穆宗繼天開運受中居正保大定功聖智
誠孝信敏恭寬毅皇帝實錄卷之三百三十一

監修臣等謹將本年八月十八日奉 上諭 諭內閣恩麟等奏請將哲布尊丹巴呼圖克圖之呼畢勒罕靈異幼童掣定奏聞一摺上年十月二十一日駐藏大臣會同達賴喇嘛呼

教修

同治十一年壬申夏四月甲寅朔享

太廟遣肅親王隆勳恭代行禮○

上詣鍾粹宮問

慈安皇太后安長春宮問

慈禧皇太后安至癸未皆如之○奉

慈安皇太后

慈禧皇太后幸漱芳齋侍午膳○諭內閣恩麟

等奏察看轉世之哲布尊丹巴呼圖克圖之

呼畢勒罕靈異幼童掣定奏聞一摺上年十

二月二十一日駐藏大臣會同達賴喇嘛呼

圖克圖羅布藏青饒汪曲並伊徒達喇嘛等

率領眾喇嘛諷經由金瓶掣出番民貢確策

仁之子阿旺羅布藏成勒迺奈丹貝甲木參

之名定為呼畢勒罕當經達賴喇嘛遵依經

文哲布尊丹巴呼圖克圖之呼畢勒罕名之

曰阿旺羅布藏吹璣呢瑪丹增旺楚克洵屬

祥瑞之事朕心深為欣悅著加恩賞給該呼

畢勒罕黃哈達一箇佛一尊大緞四匹並著

庫倫辦事大臣傳諭喀爾喀四部落汗王等

使相慶幸所有迎接哲布尊丹巴呼圖克圖

之呼畢勒罕一切應辦事宜均著張廷岳等

照例妥為辦理○諭軍機大臣等崇禮奏傳

辦緞紬各件請分派各織造兼辦並正珠玉

如意等件難以購覓等語據稱廣東絲料工

作不及江浙此項緞紬為數甚鉅限期亦近

織造專司織務辦理較為妥速並可節省糜

費請飭該織造等分辦以昭慎重著照所請

辦理即著崇禮將傳辦緞紬各件均勻分派

分別咨明江甯蘇州杭州各織造照數承辦。應需銀兩。本日據瑞麟崇禮奏已籌定銀三十萬兩。存儲備撥。著慶林德壽文治覈實估計確數。知照瑞麟等如數撥解。以資應用。慶林等務卽分投織辦。毋稍遲誤。其玉如意陳設等項。該監督因難於購覓。請派他省分辦。惟他省採辦較之廣東更屬不易。仍著責成崇禮設法採購。不得稍涉推諉。其正珠等件。並著一併採辦進呈。毋誤要需。將此由四百

聖諭

三

里諭知瑞麟。並傳諭崇禮慶林德壽文治知之。○又諭德壽奏長蘆改派紬緞。懇寬限辦解一摺。長蘆奉派活計。前改派各織造分辦。限於五月內呈交。茲據德壽奏稱現在機匠難以選募。且直隸撥款未到。勢難依限辦解。所有長蘆改派紬緞。著寬限兩月。一律辦齊解京。不得再遲。其直隸撥款。著李鴻章趕緊於四月初間解往。俾資趲辦。毋稍耽延。將此諭知李鴻章。並傳諭德壽知之。○又諭前因

聖諭

四

奎昌等奏請加增烏城官兵領款。並酌增調防滿洲索倫蒙古兵丁領款。暨請指撥協濟銀五萬兩。當交戶部議奏。茲據奏稱烏城文武員弁加增銀兩。擬照奎昌等原擬數目。減半支給。綠營兵丁領款。擬請每月每名增銀九錢。棍噶扎勒參所帶官兵。請統合鹽菜糧折計算。每兵增銀九錢。均自本年四月為始。一律支給等語。均著照所議辦理。此次既經優加體恤。奎昌等當激勵該官兵等實力勦防。毋得虛糜餉項。至烏城所屬臺站需用較多。該部請於山東河南兩省同治十一年徵收地丁項下各撥銀二萬五千兩。以資接濟。卽著丁寶楨李鶴年錢鼎銘迅速如數籌撥。解交察哈爾都統衙門。轉解烏里雅蘇台。以資應用。毋稍延緩。將此各諭令知之。○又諭金順奏請飭烏庫兩城速解駝隻一摺。金順需用駝隻。前據奎昌等奏派員赴西兩盟各旗勸捐。並據張廷岳等奏東兩盟無駝

可籌。改為捐措銀兩。解交金順雇覓應用。此次金順奏請飭催烏庫兩城各辦駝五千隻。自尚未知張廷岳等改解銀兩之奏。東西各部落。近年生計困苦。亦係實情。金順所需駝隻。能否如數籌辦。著奎昌。志剛。多布沁。扎木楚。於西兩部落廣為勸諭。一俟捐有成數。卽行解交金順軍營應用。並著張廷岳。阿爾塔什達。將東兩部落捐輸駝隻銀兩。迅速解交金順。以為雇覓之用。金順行抵包頭。為時已

久。所部各營。如何分別撤留。並如何設法起程。自應趕緊籌辦。豈得坐待駝隻。一籌莫展。且烏城程途遙遠。止宜酌帶精銳隊伍前往。所需駝隻較少。亦可易於籌辦。若用駝至萬隻之多。豈一時所能辦。何日方得起程。該將軍當通盤籌畫。不得藉詞延玩。致誤事機。將此由五百里各諭令知之。○又諭恩麟。德泰。泰。夥色兩族互鬪。現已辦理完竣。一摺。夥色兩族。因控地啟釁。經恩麟等派員前往彈

壓。該兩族膽敢抗拒戕兵。委員恩承等當帶所部。將兩族不法頭目殲斃。並將控案斷清。兩造均已悅服。邊境現在肅清。辦理尚為妥協。惟該夷眾素稱勇悍。難保不再滋生事端。仍著恩麟等隨時彈壓。妥為駕馭。以弭邊釁。而靖地方。將此各諭令知之。○又諭德泰。奏駐藏辦事大臣恩麟。於戴琿拉旺奪結勦辦不法總堪布班墊頓柱一案。並不查照達賴喇嘛咨報。違例擅賞拉旺奪結花翎。上年巡

閱三汛營伍。恩麟並未親到。於旋回前藏時。蒙混奏稱。逐一查竣。且於巡捕戈什哈等擅行賞戴翎支各等語。恩麟與德泰同辦一事。理應會商辦理。何以於戴琿等擅行賞戴翎支。且該辦事大臣於閱伍未到之處。何以蒙混具奏。逐一校閱。卽著恩麟按照德泰所奏各節。據實明白回奏。毋稍隱飾。原摺片著鈔給閱看。將此諭令知之。○以西藏辦理鬪案完竣。予知府恩承等加銜升敘有差。○乙卯。

諭軍機大臣等。王文韶奏。彭玉麟起程日期。據情代陳一摺。彭玉麟病體未痊。殊深廕念。該侍郎已於三月十六日。由長沙起程。渡湖東下。卽著王文韶傳知彭玉麟將沿江水師各營周歷察看。妥籌整理。並一面加意調治。俟簡閱事畢。病體稍痊。卽遵前旨來京。陛見。將此諭知彭玉麟。並傳諭王文韶知之。○又諭。前據左宗棠奏。甘肅軍務緊要。請將新授山西按察使蔣凝學仍留蘭州道署任。暫緩交卸。業經有旨允准。茲據鮑源深奏。山西河防關繫甚重。藩司李慶翱事務繁多。現當春夏之交。防軍雖可兼領。惟一交秋令。卽須籌備冬防。未能分身親赴河干。請飭蔣凝學赴任等語。所奏自係實在情形。卽著左宗棠將蔣凝學經手各事宜。另行遴員接辦。飭令該臬司務於秋初馳赴晉省。接統防軍。以專責成。將此諭令知之。○山西巡撫鮑源深奏防軍未撤。請將本屆軍政展緩辦理。從之。○丙

辰。諭軍機大臣等。邵亨豫奏陝邊近日防勦情形。並探聞甘省軍情一摺。安邊定邊地方。均有賊騎數百擾及。雖經官軍擊敗遁竄。惟我軍亦有傷亡。且逆蹤飄忽靡常。北山與甘省毗連處所。逼近邊牆。草地游匪。時虞竄越。卽著邵亨豫督飭延榆綏鎮道。將北山一帶防務實力籌辦。並著嚴飭譚仁芳管帶所部。剋日拔赴延安一帶相機防勦。毋稍鬆懈。勇隊之不得力而擾民者。迅卽妥為裁撤。騰出經費。調募得力勇營。以資鎮撫。延榆各屬。本係地瘠民貧。卽應檄飭該管道府督率牧令招撫流亡。廣為開墾。州縣優劣。卽於是分。毋得有名無實。至回逆投誠一節。疊諭左宗棠察度妥辦。茲據邵亨豫奏。探聞河州西甯回目先後乞撫。呈繳馬械甚多。回首馬占鼉等四人各質其子。陝回崔三。禹得彥等。自肅州敗竄。亦赴西甯投誠。惟狗齒牙一股不肯歸降。現敗竄慶涇交界之驛馬關等語。回族眾

多。原無盡勒之理。惟性情反覆無常。時虞挾詐。不可不防。仍著左宗棠豫師體察情形。妥慎辦理。近日撫局有無端緒。如何辦法。並著隨時詳細奏聞。前敵後路。仍應加意嚴防。慎毋為賊所乘。其狗齒牙一股。著左宗棠穆圖善飭令雷正綰等督軍痛剿。迅殲醜類。慶涇接壤陝省。邵亨豫尤當嚴飭在防各軍實力堵禦。毋任竄越。將此由五百里各諭令知之。

九

○又諭杜嘎爾奏竄匪回遁探蹤進剿一摺。據稱本年正月間。阿畢爾米特旗屬博羅諾木汗地方。突由西北竄來賊匪二三百人。於二月間向西竄走。巴勒達勒多爾濟旗亦有西來賊匪數十名。於二月間回向西遁。由察里勒圖察汗德勒地方。竄入胡濟爾圖和碩等處。現已回遁等語。據奏各情。似此股賊匪由烏里雅蘇台附近竄出。現又向西回竄。匪蹤飄忽靡定。究竟來自何方。竄往何處。杜嘎爾已拔隊由中路進兵。務當確探賊蹤。截擊

痛剿。毋任日久蔓延。賊情詭譎。並須防其多分股數。四面牽掣。致官軍應接不遑。乘間竄擾。完善地方。匪蹤前趨東南。近又西遁。烏城防務甚關緊要。庫倫雖稍遠賊氛。仍虞再犯。著奎昌志剛多布沁扎木楚張廷岳阿爾塔什達隨時偵探。互相知照。一遇賊匪竄近。立即痛加剿洗。毋稍疏懈。杜嘎爾營中駝隻疲乏。遠道運糧。未能得力。該副都統已商令四子部落等旗。派員幫同委員就地雇覓民駝。以資應用。著定安傳知各該旗妥為照料。不得稍涉膜視。賊勢既分。並著督飭防軍相機堵遏。毋任竄近烏喇特等旗境。張廷岳等前奏逃回蒙古男婦報稱。有正月間賊匪帶二萬餘眾分犯烏庫之說。嗣後探得西路竄匪有二千餘人之多。此次杜嘎爾所奏回竄之賊僅二三百名及數十名。是否分股逃竄他處。是否另有匪徒竄匿。著張廷岳杜嘎爾等查明據實具奏。將此由五百里各諭令知之。

○戊午。諭軍機大臣等。景廉奏二起官兵拔隊西進。肅逆竄陷瓜州。援軍失利。西路各營情形。請添設臺站各摺片。景廉所部靖邊前營。現已拔赴古城。所有駐紮哈密各營。仍著督催前進。以資厚集。該都統以兵力尚單。請調科布多駐紮官兵。惟近據常順等奏。探聞回匪有分竄烏科之信。方以大同官兵孱弱難恃。尚須整頓。且該城止此兵力。亦未便遽行抽調。所請著毋庸議。金順尚在包頭一帶。未據奏報起程。其吉爾洪額所帶馬隊。早經拔隊。現已行抵何處。仍著奎昌。志剛。多布沁。扎木楚。常順。保英。查明飭催速赴奇古一帶聽候調遣。孔才所統各營。本係烏合之眾。人心不無參差。惟刻下西路軍務。與其遠調官兵。難期應手。不若就地取材。較為便捷。景廉務當曉以大義。妥為駕馭。俾其踴躍用命。以壯聲威。回匪與安集延既構釁未已。亟應整頓隊伍。設法進取。榮全前議挑選索倫等項。

人眾。會合鄉團。規取瑪納斯等處。不為無見。仍著榮全察看情形。妥籌辦理。伊犁近日情形。若何。俄人曾否會議。並著隨時具奏。肅州回匪竄陷瓜州。署安西協副將柳致勝。援剿失利。為賊所掠。用銀贖回。殊堪痛恨。著交部嚴加議處。署安西州知州王秉鏞。以催糧為名。日久未回州城。顯係規避取巧。著交部議處。近時關外賊勢若何。安西等處城防緊要。文麟當隨時兼顧。派兵援剿。毋稍疏虞。此時肅州一帶。既有徐占彪專司勦辦。成祿即應迅速出關。將安敦王等處竄匪悉數掃蕩。鼓行而西。與景廉會合進兵。不得再行延宕。致誤戎機。景廉擬添設臺站五處。著照所請辦理。需用馬匹。暨應支鹽菜口糧等項。即著景廉開明數目。知照奎昌等。如數撥給。文碩前奏沙山子等處屯田事宜。著常順。保英酌度情形。派員董率經理。以資軍食。將此由六百里各諭令知之。○又諭。景廉奏關外軍務孔。

亟。前任甘肅平慶涇道黎獻曾署鎮迪道篆務。熟悉情形。該員丁憂回籍。現在計已服闋。請飭赴營差遣等語。著吏部湖南巡撫查明該員是否赴部候選。抑或在籍。卽行飭令前赴景廉軍營差遣委用。並傳知該員在楚省酌帶舊部得力將弁數十員。採買開花子母洋礮及火攻利器。兼程赴營。其應需價值。湖北本有應撥景廉軍營每月餉銀數千兩。尚未起解。並著李瀚章。郭柏蔭。卽由此款內提

十一

撥應用。餘銀並交該員運解回營。毋稍延誤。將此諭知吏部。李瀚章。郭柏蔭。並傳諭王文韶知之。○予甘肅瓜州陣亡守備雷發聲。千總沈明禮等。祭葬。世職加等。○減免貴州興義都勻鎮遠思南石阡黎平貴陽安順大定九府郎岱清江下江歸化水城平越貞豐獨山麻哈黃平開黔西廣順永甯威甯平遠正安定番普安安南興義都勻清平荔波施秉天柱安化印江龍泉永從開泰貴定龍里修

文清鎮綏陽仁懷餘慶甕安涇潭貴筑安平畢節桐梓鎮遠婺川玉屏青谿普定遵義五十廳州縣暨冊亨州同大塘州判錦屏鄉縣丞所屬並古州等衛被擾地方節年額賦有差○

上以常雩祀

天於

圜丘。自是日始齋戒三日。○己未。諭軍機大臣等。李鴻章奏。奉辦緞紬等件。需款過鉅。請酌

軍機處

十四

量減辦一摺。據稱長蘆奉派活計。前經咨照各織造分辦。統計江甯蘇州杭州三處。共需銀五十餘萬兩。除湖北等省協撥外。尚需銀四十二萬餘兩。直隸災瘠之區。實難如數籌撥。請將原派長蘆各件。先行照單減辦一半等語。自係實在情形。著照所請。所有長蘆應辦緞紬等件。准其照單減辦一半。卽著李鴻章將應撥款項迅速分解。各該織造以便趕辦。務於七月內一律辦齊解京。毋稍延緩。其

餘一半緞紬。俟款項稍充。再行分別籌辦。將此諭令知之。○又諭豫師奏辦理西甯等處撫案情形等語。西甯回匪及陝回崔三等乞撫業經左宗棠等酌議章程。派道員馮邦棟前往籌辦。現在米拉溝等處回目冶成林等復帶同黨眾赴豫師軍營。呈繳馬匹器械。已交馮邦棟一併辦理。該回眾等情急乞命。雖似可信。惟向來撫賊之法。難於勦賊。非辦理盡善。必貽後患。左宗棠豫師務當懍遵疊次諭旨。督飭馮邦棟體察情形。妥慎籌辦。不得稍涉大意。俟辦有端緒。卽行據實奏聞。將此由五百里各諭令知之。○以甘肅岷州匪出力。賞參將李春海巴圖魯名號。守備田玉春等花翎。縣丞何鍾楠等藍翎。餘升敘有差。○予故河南南陽鎮總兵官王萬釗祭葬卹廕加等。如軍營病故例。謚勇毅。附祀提督楊鼎勳四川安徽江蘇等省專祠。並追予江蘇太倉陣亡參將王國安祭葬世職加等。○庚

申。諭軍機大臣等。左宗棠奏河州撫局漸可就緒。並現在辦理大概情形等語。河州回目馬占鰲等已呈繳馬匹器械。自限半月悉數完繳。再請委員察驗。米拉溝回眾亦思就撫。昨據豫師奏報。已諭令該大臣等妥慎籌辦。甘省回族眾多。性情狡譎。現雖乞撫。是否真心悔罪。尚不可知。且議撫後。必須措置咸宜。使彼族輸誠悅服。方免滋生事端。該大臣總當籌畫萬全。慎益加慎。斷不可掉以輕心。遷就了事。致異日重煩兵力。該回等每以乞撫緩師。悉力東作。俟春耕事畢。仍圖抗拒官軍。此等詭計。尤應嚴防。是在該大臣酌度機宜。妥為籌辦。免致為其所給。西甯撫局。應飭馮邦棟詳慎辦理。肅回雖有投誠之說。並未大受懲創。仍應嚴飭徐占彪實力勦洗。均毋墮逆回狡計。其狗齒牙一股及零星回騎。左宗棠當督飭各營迅圖撲滅。埽蕩逆氛。以靖疆圉。將此由五百里諭令知之。○以記名總兵

官沈玉遂為甘肅河州鎮總兵官。○以行刳傷人。甘肅軍營副將丁啟發等革職訊辦。○辛酉。常雩。祀

天於

圜丘。遣恭親王奕訢恭代行禮。○定新設甘肅化川川廳通判為繁疲難三字要缺。化平營都司為題缺。並添設訓導。照磨外委各一員。從總督左宗棠請也。○壬戌。予故貝勒溥莊祭葬。賞銀四百兩治喪。○癸亥。諭軍機大臣等。王文韶奏。援黔官軍埽除賊巢一摺。清水南岸開懷香鑪山等處賊巢。次第攻破。凱里以北業已廓清。現在逆眾廣聚烏牙坡一帶。恃險負隅。賊勢已形窮蹙。著王文韶飭令龔繼昌。戈鑑等乘此破竹之勢。奮力進攻。毋稍鬆勁。並飭唐本有等從凱里一路合兵進剿。四面兜圍。以收聚殲之效。曾璧光。周達武亦當督飭黔軍會合楚師聯絡進取。總須嚴密布置。將該逆就地殄除。不可縱令逸出。致貽

後患。所有已復地方一切善後事宜。仍著曾璧光遴派妥員悉心經理。以靖苗疆。將此由

五百里諭知曾璧光。並傳諭周達武。王文韶知之。○命協辦大學士文祥稽察欽奉上諭事件處。○以刑部尚書全慶充翰林院掌院學士。○調鑲紅旗漢軍都統奕劻為正藍旗滿洲都統。內大臣英桂為鑲紅旗漢軍都統。○以詹事府少詹事黃鈺為詹事。○甘肅提督馬德昭開缺葬親。以陝西漢中鎮總兵官李輝武為甘肅提督。前任甘肅西甯鎮總兵官田宗揚為陝西漢中鎮總兵官。○以前任福建海壇鎮總兵官鞠耀乾為閩粵南澳鎮總兵官。○以記名提督成俞卿為湖北鄖陽鎮總兵官。○以湖南官軍勦平貴州香鑪山等處賊巢。予提督龔繼昌道員戈鑑優敘。賞都司楊昌魁巴圖魯名號。守備龔盛祿等花翎。餘加銜升敘有差。○予貴州清水等處陣亡副將王宗高等十一員祭葬世職。○甲

子諭軍機大臣等。御史袁承業奏。敬陳河東鹽務流弊一摺。據稱河東行鹽引地。係晉豫陝三省分銷。豫陝引票。於每年掣籤時。扣留引票若干。不行入筒。分給現任候補各官。以為調劑屬員之計。山西引地。各州縣招商代運。勒索分肥。私立官費。甚至幕友家丁佐雜營員。皆分其利。擬請將豫陝引票統歸掣籤。其山西引地。即照代運之法。令該商取具保結領運等語。著鮑源深確切查明。酌覈具奏。

鹽務流弊

元

如有前項弊端。即行認真釐剔。毋稍姑容。所擬辦法。是否可行。並著妥籌辦理。原摺著鈔給閱看。將此諭令知之。尋奏。河東鹽行豫陝二省。久經定為官民並運。各有引張。未能統歸籤掣。至本省引地行鹽。查無勒索分肥等弊。現飭各州縣查明代運之夥。如確係殷實良民。准其具結領運。得旨。著該撫督飭河東道。隨時體察情形。實力整頓。期於有利無弊。以肅鹽綱而裕民食。○又諭。丁寶楨奏請調

山東省

字

撥閩省輪船赴東巡緝。並酌籌經費一摺。山東海面遼闊。登州一郡尤關緊要。必須大號輪船出洋巡哨。方為周密。丁寶楨請調福建安瀾輪船赴東備用。於巡防自屬相宜。著文煜。王凱泰酌度情形。如可將安瀾輪船撥赴山東。即著配齊舵工水手。委員駛往山東煙臺地方。聽候該省駕用。並將船內經費章程詳細咨明。丁寶楨覈實支給。即著照丁寶楨所請。將該省所收洋藥釐金一款。專作輪船經費。不敷之項。再於藩運兩庫巡防緝捕經費生息項下。湊撥接濟。仍隨時籌款添補。不得動用正款。並著丁寶楨於山東水師內。遴選得力弁勇。令其逐漸練習。庶日久技熟。易於駕駛。並責成該海關監督。就近鈐束差遣。以一事權而收實用。將此各諭令知之。○丙寅。諭軍機大臣等。何璟恩錫奏。傳辦緞紬等件。現在趕籌撥款。並陳款項不敷情形一摺。據稱江蘇省應辦活計。共有四單。需款幾及

二百萬兩之多。該省無從措手。自係實在情形。應如何寬予限期。並酌量減成之處。著內務府酌議具奏。該署督等現已籌措銀八十萬兩。以先辦五成計之。亦尚不敷銀二十萬兩。著英翰、劉坤一、各籌撥銀十萬兩。迅解蘇省。以資協濟。並著何璟等。即將各款勻撥解交。俾得趕緊織辦。毋稍延誤。另片奏蘇省四單。與長蘆承辦之件。似係相仿。而估計銀數多寡懸殊。請飭查覈確估等語。長蘆傳辦各

主

件。前據李鴻章奏需費不下二十餘萬兩。嗣據奏稱接江甯蘇州織造咨函。覈計工價需餘五十餘萬兩。所有蘇省承辦活計。所估銀數。是否相符。著戶部查覈成案。再由該織造等覈實確估。以重款項。將此諭知戶部。內務府、何璟、英翰、劉坤一。並傳諭恩錫知之。尋內務府奏。江蘇省應辦活計。需款過鉅。請將兩淮淮關傳辦之單停止。其江南蘇州二處仍著照單織辦。從之。○又諭何璟奏著天長縣

知縣馮至沂投水自盡一案。情節重大。原派臬司應寶時現署藩司。未便遠赴皖省。應否特簡大員審辦。抑另行遴員會審等語。著派何璟將此案人證卷宗親提研訊。務得確情。據實具奏。毋稍徇隱。將此諭令知之。○戊辰上奉

慈安皇太后

慈禧皇太后幸漱芳齋侍午膳。○以神靈顯應

頌陝西榆林府

清德堂主

三

關帝廟扁額曰威靖河西。○諭軍機大臣等。喬松年奏請飭催長蘆山東欠解生息銀兩一摺。據稱長蘆山東鹽務生息銀兩。向係按年解交豫省藩庫。以為歲料幫價之需。現在截至同治十年十二月底止。長蘆欠解息銀八十萬三千五百五十九兩零。山東欠解息銀二十七萬七百兩。屢催未解。此項息銀。關繫河工要需。著李鴻章、丁寶楨、督飭各運司速行嚴催。各商將欠解各項如數完解。毋任

延宕。將此各諭令知之。追予江蘇各屬陣亡殉難孝廉方正宋清壽等紳民婦女一千三百八十一名口分別旌卹如例。

大清穆宗繼天開運受中居正保大定功聖智誠孝信敏恭寬毅皇帝實錄卷之三百三十一

大清穆宗繼天開運受中居正保大定功聖智
誠孝信敏恭寬毅皇帝實錄卷之三百三十二

執事

同治十一年壬申四月己巳諭內閣杜嘎爾

奏職官潛逃。請飭查拏等語。吉林四起馬隊。

委參領海春經杜嘎爾派令隨隊西進。○膽敢

中途潛逃實屬目無法紀海春著卽革職並

著吉林將軍直隸總督及西北路將軍大臣

等飭屬一體嚴緝務獲究辦其同逃兵丁永

壽西拉布興春著一併緝拏懲辦。以肅軍令。

○庚午。

孝端文皇后忌辰遣官祭

昭陵。○諭軍機大臣等。前因奕榕奏請籌撥官

兵整裝銀兩。並催解欠餉。當交戶部議奏。茲據奏稱。此次吉林調赴肅州官兵五百名。應給軍裝等項銀兩。請於河南地丁項下撥給銀一萬二千五百兩等語。著錢鼎銘飭令藩司。按照該部撥給數目。趕緊委員解赴盛京戶部交納。一面知照吉林將軍派員領取。並將起解日期報部。毋稍延緩。瑞聯於此項銀兩解到。卽行驗收。俟奕榕委員到時。發交領解回省。至吉林前次調赴古北口官兵原撥整裝銀五萬兩。河南迄未報解。又調赴烏城官兵原撥整裝銀二萬五千兩。僅據山東解到銀一萬兩。實屬遲延。著錢鼎銘、丁寶楨飭令各該藩司趕緊籌款。迅卽報解。其歷年欠解吉林俸餉共銀五十四萬餘兩。著李鴻章、錢鼎銘、丁寶楨查明各該省欠解數目。實力催提。委員批解。不得再有遲誤。將此由四百里各諭令知之。○又諭前因德英奏請撥官兵整裝銀兩。當交戶部速議具奏。茲據奏稱。

黑龍江出征官兵五百餘員名。應需整裝銀一萬一千八百四十六兩零。請於河南驛站存騰項下撥給等語。著錢鼎銘飭令藩司。按照該部撥給數目。趕緊委員解赴盛京戶部交納。卽著瑞聯知照黑龍江將軍派員領取。以濟要需。此項整裝銀兩。並著德英轉飭俟各該官兵凱撤之日。卽在應領俸餉項下。按名坐扣。以符舊制。將此由四百里各諭令知之。○又諭瑞聯等奏。擬撥輪船巡緝。並籌議經費一摺。據稱奉天省南濱大海。口岸甚多。時有盜匪游弋。若調輪船巡緝。實為便捷等語。著文煜、王凱泰酌度情形。派撥小號輪船一隻。配齊舵工水手。委員駛赴奉天牛莊海口停泊。聽候調遣。並將船內經費章程詳細咨明都興阿等。覈實支給。俟輪船駛抵奉省。都興阿等當遴派得力弁兵。隨時出洋認真巡緝。並可令該弁兵等隨同駕駛。以資練習。瑞聯等所請於四成洋稅項下動支經費等

語。著戶部議奏。將此各諭令知之。尋議海關四成洋稅。係籌儲部庫。不准擅行動用之款。惟該將軍等所陳無款可籌。亦係實在情形。應暫准動支銀二萬兩。作為輪船經費。年終覈實報銷。從之。○追予安徽王莊殉難一品封職郭法彭。入祀鳳陽府縣忠義祠。○辛未。諭軍機大臣等。王文韶奏。蕩平逆苗。巨巢大略情形一摺。貴州苗匪。疊經官軍勦敗。悉數竄聚烏牙坡一帶。本年三月間。黔楚各軍。併力兜勦。將烏牙坡賊巢攻毀。黔疆逆苗全股。一律蕩平。覽奏實深欣慰。著俟詳細情形奏到。再行降旨宣示。該逆悍酋。如金幹幹。包大肚等。曾否擒斬。著曾璧光等查明具奏。並著飭令各軍。按捕餘匪。毋留遺孽。所有地方善後事宜。並投誠黨眾。應如何安插彈壓之處。曾璧光等務當悉心籌畫。妥為經理。其援黔各軍。應如何分別撤留。著王文韶斟酌妥辦。將此由五百里諭知曾璧光。並傳諭周達武。

王文韶知之。○予故江蘇巡撫梁章鉅。入祀名宦祠。從巡撫張之萬請也。○壬申。盛京戶部侍郎瑞聯等。奏查明草倉等河新工。並無衝刷淤塞。報聞。○旌表守正捐軀浙江山陰縣民婦何莊氏。○癸酉。諭軍機大臣等。穆騰阿等奏。請添造駐防軍裝一摺。江甯駐防軍裝。日久損壞。且與原設額數所缺甚多。現在官兵計有一千六百餘員名。需用軍裝。亟應趕緊添造。以備操防之用。著何璟。恩錫。查照京口成案。先行籌撥庫平銀八千兩。解交穆騰阿等。搏節覈辦。即著穆騰阿。富陞。飭令協領德興等。覈實監工。速為製造。務期工堅料實。一俟辦齊。即將各器械數目。咨部查覈。毋稍浮濫。將此諭知穆騰阿。何璟。富陞。並傳諭恩錫知之。○又諭。前因文煜等奏。閩省製造輪船。未能剋期。歲工。應否暫行停止。當經諭令李鴻章等。妥籌具奏。茲據沈葆楨。縷陳船政情形。不可遽行停辦等語。著俟李鴻章奏。

到。再降諭旨。文煜。王凱泰。沈葆楨。仍將該廠未成船隻。督飭委員照常辦理。毋稍玩忽。沈葆楨所請籌撥訓練經費。即著文煜。王凱泰。按月籌給銀五百兩。作為李成謀出洋操費。即飭該統領認真訓練。無論留閩及分撥外省輪船。均應隨時校閱。俾臻嫻熟。且駛用日久。船隻易致損壞。應如何分年點驗修理之處。並著文煜。王凱泰。沈葆楨。斟酌會商。奏明辦理。另片奏。船政委員未便驟易生手。請飭

夏獻綸暫緩交卸等語。船政經理需員。而臺灣道員缺亦關緊要。夏獻綸應否暫緩赴任。或另行遴員署理。著文煜等會商具奏。將此由五百里各諭令知之。尋奏。夏獻綸應俟沈葆楨服闋到工。再飭赴任。臺灣道員缺。查有署興泉永道潘駿章明白諳練。堪以調署。報聞。○又諭。成祿奏。籌辦軍糧。派員赴歸化催運軍火。請飭部分撥協餉。由西征糧臺代催。綏遠城協同購買駝隻。添撥帳房軍火各摺。

片。成祿現須督隊出關。後路糧運事宜。業與蕭宗幹會商辦理。各省應解協餉。前已諭令各該督撫源源撥濟。此項餉銀解到時。著左宗棠飭令蕭宗幹轉運成祿軍營。儻餉到稍遲。先將糧價代為墊發。餉到時。仍著成祿撥還。以清款目。成祿出關後。該軍糧餉。均須由內地運送。著左宗棠嚴飭西路各地方官。設法妥為轉運。不得以路途梗阻為辭。意存膜視。成祿與景兼分用協餉。據該提督奏請將

各省欠解協餉。擇與北路草地近便者。酌量多寡。分撥一半。改道察哈爾轉運。巴里坤等語。著戶部酌量分撥。其餘省分暨新撥及四川之餉。由該提督自內地提催。俟到哈密後。全歸景廉提解分撥。即著照所議辦理。並著袁保恆將成祿軍營協餉。隨時代為催提。由西征糧臺分撥起解。以期迅速。應需帳房軍火等項。若由河南等省撥給。為時過久。轉誤師行。成祿所請。著毋庸議。即著該提督咨明

左宗棠就近酌量勻撥以資應用前撥江南洋礮等件成祿現已派員赴綏遠領運著定安飭屬妥為照料協同成祿委員添購駝隻迅將前項軍火運解回營以資攻勦將此由五百里諭知左宗棠定安景廉成祿並傳諭袁保恆知之○又諭奎昌等奏籌辦城工擬請援案設法辦理並整復臺務酌添駝馬暨請飭綏遠城察哈爾所屬安設臺兵接送軍糧各摺片烏城前經賊擾城垣毀壞無存亟宜趕緊興修以資保守奎昌等擬援照道光年間成案由喀爾喀收放華生駝內提出駟騾駝分交烏屬支食鹽糧蒙古官兵折價卽由應領鹽菜項下扣餉備工並由志剛倡捐麪斤以助工用將前建木城改用石垣卽著照所擬辦理現在華生廠內除張廷岳提用駝隻外所存駟騾駝究有若干著奎昌多布沁扎木楚志剛酌量提取扣餉應用並著督飭在事人員覈實興辦以重要工烏科

兩屬臺站現在接送兵差整理不容稍緩奎昌等已將烏屬西路七臺南路二十臺及綽和爾首臺遵照科城定章每臺添設官兵駝馬其餘臺站需用鹽菜羊價茶銀款項一併籌辦該署將軍前請指撥銀五萬兩業經戶部奏請在於山東河南兩省分撥應用著戶部再行咨催該兩省迅速籌解奎昌等卽一面趕緊籌辦毋稍遲延並著常順保英一併妥為辦理以資轉運至赴烏臺站接運軍糧等項多有損失實屬不成事體著定安額勒和布迅將所屬臺站按段安設官兵妥為接送毋得推諉致有疏虞將此由五百里各諭令知之○又諭富和奏沿途臺站情形現抵塔城籌辦各事宜並撥給布倫托海農民耕費請將鄉約鼓勵各摺片塔爾巴哈台一帶臺站駝馬不齊富和於行抵該城後會商額爾根巴圖由軍餉項下放給各臺銀兩以為雇覓駝馬之用卽著照所請辦理該大臣仍

當隨時設法整頓。務期無誤師行。至塔城牆垣不全。軍民未能復業。亟應悉心籌辦。並商同榮全妥為整理。毋任廢弛。布倫托海農民耕種無資。富和所請由應解榮全項下撥銀一千兩。交巴彥特古斯派弁放給。及鄉約趙英懇賞五品頂帶。均著照所請行。富和並當激勵該處軍民盡力田畝。毋令一夫失所。將此由五百里諭令知之。○賞圖薩拉克齊四等台吉達木丹扎布花翎。○甲戌。諭軍機大

臣等袁保恆奏。各省協餉報解延緩。請旨飭催一摺。據稱西征各軍月餉。山東自上年十月以後。僅解銀二萬四千兩。山西自上年十一月以後。僅解銀二萬兩。四川自上年七月以後。未經續解。安徽自上年九月以後。未經續解。廣東自上年夏季以後。未經續解。湖南併前提積欠銀四萬兩。亦未報解。河南則兩次提解積欠銀十八萬兩。僅解過銀五萬兩等語。甘肅兵多糧缺。轉運艱難。且一切安插

撫恤之費。需用尤鉅。各該省督撫。自應源源報解。顧全大局。豈得任意延緩。致誤要需。著瑞麟、吳棠、英翰、錢鼎銘、丁寶楨、鮑源深、王文韶將應解西征協餉剋期籌撥。併批速解。不准再有拖延。並著袁保恆隨時催提運解。以資接濟。另片奏。山東河南兩淮月協豫師軍餉。截至三月底止。共欠解銀三十四萬餘兩。現在西征餉項支絀。實難墊解等語。著何璟、錢鼎銘、丁寶楨將應解豫師餉銀。迅速撥交

西征糧臺轉解。毋稍延緩。將此由五百里諭知瑞麟、吳棠、何璟、英翰、錢鼎銘、丁寶楨、鮑源深。並傳諭王文韶、袁保恆知之。○丙子。諭內閣。彭玉麟、李瀚章、黃翼升奏。特參長江水師庸劣各員。請旨分別革懲一摺。譚洲營都司記名總兵蔣振元。任性妄為。擅離汛地。著卽行革職。拔去翎支。撤銷勇號。永不敘用。荊州營守備儘先副將陳照惠。縱兵殃民。訛索規費。著革職永不敘用。岳州中營候補參將劉

義方急情性成。嗜好過重。沅江營把總唐有勝。操防不力。敗壞營規。岳州中營把總儘先都司劉有材。劣蹟多端。陸溪營把總儘先守備文星元。嗜好太深。彝洲營把總儘先遊擊唐有德。居心貪鄙。漢陽中營把總儘先遊擊朱有茂。聲名惡劣。田鎮營把總劉得勝。擅離汛地。沅江營外委儘先守備劉康容。訛索民財。漢陽中營外委儘先守備張昌貴。聲名狼藉。巴河營外委儘先都司朱蘭亭。擅理詞訟。荊州營外委儘先千總劉耀泰。漢陽中營外委儘先遊擊劉元壽。外委儘先都司劉萬桂。田鎮營外委升補把總張三爵。操防懈怠。均著革職。並不准投效別營。希圖開復。荊州營都司記名總兵李大鵬。舉動謬妄。千總記名總兵成師吉。陸溪營把總王宗高。均不能約束兵丁。荊州營把總儘先參將李開福。性耽安逸。均著摘去頂翎。以觀後效。田鎮營都司記名總兵梁永學。登岸陸居。不守營規。著即

撤任。勒令回籍。不准留營效力。以示懲儆。仍著彭玉麟等隨時稽察。認真整頓。如再有此等劣員。卽著從嚴叅辦。以肅營規。○以烏喇特旗地方追勦竄匪出力。賞提督金運昌。王鳳鳴。頭品頂帶。副將羅永謙。參將牛允誠。邵維常。龔心明。侯德明。王允功。巴圖魯名號。知府孫毓塗。守備李叶蘭等。花翎。鹽大使邊本育等。藍翎。餘升敘開復有差。○以湖北宣恩撲滅會匪。賞把總李名貴。藍翎。予知縣向光謙等升敘有差。○丁丑。追予浙江杭州殉難道員繆梓謚武烈。交國史館立傳。○戊寅。諭內閣。翰林院侍講孫詒經奏。天象可畏。請遇災修省一摺。朕臨御以來。兢兢業業。宵旰不遑。期與中外臣工。共求上理。方今軍務未竣。民氣未舒。正君臣交儆之時。豈上下恬嬉之日。矧值本年五月初一日日食。上蒼示儆。寅畏益深。該侍講所陳。隆孝治。勤政理。親君子。遠小人。並崇儉黜浮。各節。披覽之。

餘。實深嘉納。爾中外大小臣工。亦當振刷精神。各勤職業。庶幾交相儆勉。政事修明。以迓祥和而消沴戾。○諭軍機大臣等。戶部奏。內務府撥款日增。部庫存儲將罄。遵旨覈議。據實陳奏一摺。近來帑項支絀。國用不充。自係實在情形。前因長蘆及江蘇省傳辦各件。需款較多。疊經准令減成停辦。此次內務府請於四五六等月。共撥銀一百八十萬兩。既據戶部奏稱。部庫現僅存銀一百一萬餘兩。勢難周轉。著內務府將應辦各件。權衡緩急。力求撙節。一切用款。務須覈實動支。毋任浮冒。所有應需款項。著戶部就現有銀兩。酌量動撥。以資應用。至外省傳辦各件。前據德壽奏。長蘆改派綢緞。勢難依限辦解。業經准其寬限兩月解京。此外各該監督織造等承辦之件。皆係豫備大婚典禮之用。自應依限辦解。第恐各該省撥款需時。或實有不能依期辦齊之處。著崇禮。慶林。德壽。文治。酌度情形。陸

續儘辦儘解。以應要需。將此諭知戶部。內務府。並傳諭崇禮。慶林。德壽。文治。知之。○又諭。常順等奏。官兵過境。騷擾臺站情形一摺。吉林赴伊官兵。道經烏科臺站。藉端需索。並有毆傷臺站兵丁及扎斃駝隻。訛換馬匹等事。殊堪痛恨。營總保陞著卽行革職。拏問交奎昌志剛。多布沁。扎木楚。常順。保英。嚴行審訊。並將滋事兵丁一併查明。按律懲辦。毋稍寬縱。副都統訥蘇肯。係統帶之員。於所部官兵並不認真約束。著先行交部議處。並著常順。保英。飭令訥蘇肯。將前二起官兵另行派員管帶。督同後起官兵。嚴申紀律。沿途安靜行走。毋任再滋事端。以後過境官兵。如有似此騷擾情形。奎昌等卽隨時查明。將滋事兵丁就地正法。以昭炯戒。官兵滋擾地方。既經懲創。人心自可安帖。該署將軍等。務當曉諭蒙古部落。照舊豫備駝隻等項。支應臺站。毋誤軍行。此項官兵行抵塔爾巴哈台。並著榮全

富和。安為鈴束。以肅戎行。將此由五百里各諭令知之。○旌表守正捐軀河南溫縣民婦高任氏。○己卯。諭內閣。朕奉

慈安皇太后

慈禧皇太后懿旨。本月十九日。據通政使司副使王維珍奏。請益廣孝思。以臻豫順一摺。覽奏殊深詫異。皇帝沖齡踐阼。於今十有一年。侍奉晨昏。孝養無間。當亦在廷臣工所共知。王維珍摺內所稱。先意承志。幾諫不違。並孝

思維則。基諸宮庭等語。不知意何所指。似此任意揣測。信口妄言。實屬荒謬。王維珍著交部嚴加議處。原摺著即擲還。尋議。王維珍照不應重私罪降三級調用例上加等降五級調用。從之。○又諭。大學士兩江總督曾國藩於本年二月間因病出缺。當降旨優予卹典。並於湖南原籍江甯省城建立專祠。生平政蹟事實。宣付史館。一等侯爵。即令伊子曾紀澤承襲。其餘子孫幾人。令何璟查明具奏。候

旨施恩。旋據何璟英翰李瀚章先後臚陳曾國藩歷年勳績。英翰李瀚章並請於安徽湖北省城建立專祠。又據何璟遵查該故督子孫詳晰覆奏。披覽之餘。彌增悼惜。曾國藩器識過人。盡瘁報國。當湘鄂江皖軍務棘手之際。倡練水師。矢志滅賊。雖屢經困阨。堅忍卓絕。曾不少渝。卒能萬眾一心。削平逋寇。功成之後。寅畏小心。始終罔懈。其薦拔賢才。如恐不及。尤得以人事君之義。忠誠克效。功德在民。允宜疊沛恩施。以彰忠蓋。曾國藩著於安徽湖北省城建立專祠。此外立功省分。並著准其一併建祠。伊次子附貢生曾紀鴻。伊孫曾廣鈞。均著賞給舉人。准其一體會試。曾廣鎔著賞給員外郎。曾廣銓著賞給主事。均俟及歲時分部學習行走。何璟英翰李瀚章摺三件。均著宣付史館。用示睦念。勳臣有加無已至意。○諭軍機大臣等。前據何璟等奏。江蘇奉辦緞紬等件。餉項不敷。請飭安徽江西

各撥銀十萬兩。解蘇協濟。當經降旨允准。茲據英翰奏稱。皖省情形萬窘。若驟加撥款十萬兩。無處湊那。皖南茶釐一款。歲入三十餘萬兩。自同治七年以後。全行提歸金陵。除每年提撥水師額餉十萬兩外。僅於八年皖省籌辦隄工提銀四萬兩。此外均歸金陵支發。請飭卽於此項茶釐內撥銀十萬兩等語。著何璟。恩錫。卽於江蘇提用皖南茶釐款內撥銀十萬兩應用。以抵安徽奉撥之款。將此諭

知何璟。英翰並傳諭恩錫知之。○又諭。文麟奏。回匪竄擾敦煌瓜州堡等處。撲入安西州城。暨敦煌安西官軍擊退賊匪情形各摺片。肅州逆回。屢次出關竄擾敦煌安西等處。勢甚蔓延。敦煌北湖等處踞匪。疊經兵勇擊退。現已遠遁。其撲入安西之賊。亦經官軍擊退。惟該逆來去無常。仍應隨時嚴密防範。安西屢被賊匪闖入。實屬防守不力。文麟現已調派營官周鼎。遊擊張炳。各帶兵勇前往助守。

著卽飭令會同在城官兵。妥籌守禦。毋稍疏失。署安西協副將柳致勝。援勦失利。前經景廉奏參。業經交部嚴加議處。文麟所請從寬免議之處。著不准行。仍著文麟責令該員。督率官軍認真防勦。以贖前愆。敦煌安西等處居民。疊遭蹂躪。情殊可憫。文麟當督飭該地方官。妥為撫恤。並董勸耕種。毋使失所。成祿屢奏。部署出關。究於何日起程。著該提督。懍遵疊次諭旨。速籌進發。不得再以肅逆牽掣。

為詞。稍涉延宕。將此由六百里各諭令知之。○又諭。富和奏。請調官兵回塔駐紮一摺。據稱塔城雖有索倫一軍。不足以資防守。棍噶扎勒參帶領索倫厄魯特馬步官兵數百名。並民勇喇嘛等。現在烏城迤西駐紮。請將此項官兵。全行調回塔城。並飭烏里雅蘇台將軍等。發給兩三箇月鹽糧。令該官兵自辦裹糧。無庸由驛前往。所有各臺應付駝隻。令該將軍等。覈計裹糧若干。酌量妥辦。其棍噶扎

勒參及民勇喇嘛。交該將軍等安插等語。塔城為伊犁後路。須有兵隊鎮守。以資策應。惟棍噶扎勒參所帶官兵。是否可以調往。並棍噶扎勒參與民勇喇嘛。該將軍應如何安插之處。必須豫為籌畫。即著奎昌志剛。多布沁扎木楚。按照富和所奏各節。悉心酌度。奏明辦理。榮全與俄官喀勒帕科斯克依。約在色爾賀鄂普勒地方會議。該署將軍於二月十九日行抵該處。額爾根巴圖等先後前往。隨同議事。現在會議情形若何。著該署將軍妥慎籌辦。一面詳細奏聞。富和應否前往。著與榮全隨時咨商。其塔城一切事宜。該參贊當妥為經理。毋稍疏忽。吉林官兵經過烏科臺站。藉端騷擾。該官兵行抵塔境。著富和懍遵昨日諭旨。嚴行約束。毋任滋事。並飭各臺應付周妥。以利師行。將此由五百里各諭令知之。○以雲南克復新興州城。並攻克大東溝等處賊巢出力。賞副將屈洪泰。劉萬勝。一品

封典。總兵官林懷清。知府張來慶。副將黃紫耀。彭煥章。夏毓秀。參將穆文陞。王銓義。涂開科。陸得成。劉光誥。遊擊馬永順。都司楊好謀。龍文藻。巴圖魯名號。知府靳登瀛。遊擊王濤等。花翎。同知鄧芳等。藍翎。餘加銜升敘有差。予陣亡守備鄭其麟等三十一員。祭葬世職加等。○庚辰。諭內閣。兵部奏。欽奉恩旨。查辦軍臺廢員。開單請旨各摺片。本年正月初四日。因紀年開秩。特頒恩旨。命將軍流以下人犯。分晰減等。茲據兵部查明請旨。自應酌量辦理。除軍務獲罪之包容。周冕。柯沅。吳奎祥。劉敬業。李世玉。未經查明下落之蘇錦堂。暨未經咨報起解之趙國樑。宣維禮。許如龍。艾憲銀。黃應誥。陶藻。並在途在營在藉在配。脫逃之汪殿元。周策勳。索成。曾昭仕。解魁元。李正鈞。許懷清。德馨。許志耀。奎英。邊得勝。賀永銘。王勳。春慶。黎定攀。王得勝。富昌。李明哲。張九圍。里善等。均毋庸查辦外。其文恆。李景華。

崔麟兆。游占鼈。多福富克金保。祿興。張明仲。全大倫。花里雅春。均著加恩釋回。徵麟著加恩減免二年。邱瑞祥。李振海。均著加恩減免三年。李廷誥。周星符。張同方。均著加恩減免四年。屆期卽行釋回。以示朕法外施恩至意。○辛巳。諭軍機大臣等。成祿奏。定期拔隊分起出關。請飭山西撥餉。綏遠購駝。暨李天和所部未能卽赴景廉軍營各摺片。成祿現統全隊前赴金塔。料理後路轉運事宜。卽行分起西進。此時諒早布置就緒。剋期出關。不准藉口於糧石駝隻籌辦未齊。逗遛不進。至曹克忠各營。現須募補整頓。方能拔隊赴肅。成祿惟當遵奉疊次諭旨。迅速啟行。毋得以該軍未到為詞。藉端延宕。後路糧運事宜。著左宗棠檄令蕭宗幹等。督飭西路各地方官。妥為籌辦。酌量撥給車馬。多購軍糧。不可稍存膜視。成祿需用軍裝駝隻。著鮑源深於應解餉銀內措撥銀二萬兩。劃出五千兩。交成祿

差弁採買鋼鐵軍裝布匹。下餘一萬五千兩。解交定安。在於所屬蒙古部落內攤派健駝一千隻。發給價值。配齊鞍韉。卽將所購鋼鐵等項。運回成祿軍營。以資應用。至李天和等所部。現均分防要隘。成祿擬俟出關後。再行派赴景廉軍營。卽著咨明景廉酌度辦理。將此由五百里各諭令知之。○壬午。

孝慎成皇后忌辰。遣官祭

慕陵。○癸未。補造黑龍江額設腰刀三千把。梅

鐵箭十八萬枝。烏槍三百桿。從將軍德英等請也。

大清穆宗繼天開運受中居正保大定功聖智
誠孝信敏恭寬毅皇帝實錄卷之三百三十二

實錄卷之三十二

書

大清穆宗繼天開運受中居正保大定功聖智
誠孝信敏恭寬毅皇帝實錄卷之三百三十三

穆宗皇帝實錄卷之三十三

穆宗皇帝實錄卷之三十三

穆宗皇帝實錄卷之三十三

穆宗皇帝實錄卷之三十三

穆宗皇帝實錄卷之三十三

欽

同治十一年壬申五月甲申朔日食○

上詣鍾粹宮問

慈安皇太后安長春宮問

慈禧皇太后安至癸丑皆如之○諭內閣庫克

吉奏奏騰清正園復有民眾擅入耕種請將

看守不力之該管官弁摘頂示懲一摺熱河

圍場經上年查辦騰清後並暫撤旗地撥補

騰圍民佃以示體恤乃為日未久竟有不知

姓名民佃聚集多人突至湃布嘎圍外毀柵

入內任意耕種該總管等不能禁止任令民

眾擅入正圍。實屬辦理不善。署圍場總管伊克坦布。及該管之翼長防禦曉騎校等。著一併暫行摘去頂帶。責令該官兵將擅入圍場民眾迅速驅捕淨盡。嚴密看守。毋任奸民再行闖入。並將從中架唆之人。訪察確實。按名緝拏。嚴辦以儆效尤。儻仍前不能振作。即著從嚴叅處。另片奏請豁免騰圍各佃租課等語。所有騰圍撤地旗民各佃應完課銀加恩著照所請。自同治十年起豁免三年。以紓民

力。該都統卽刊刻謄黃。徧行曉諭。務使實惠均霑。毋任吏胥舞弊。用副軫念民艱至意。○又諭文煜。王凱奏查明告病副將侵吞營餉各情。請飭調赴福建追辦一摺。告病閩浙督標中軍副將楊在元。前署臺灣鎮總兵任內。侵吞營餉三千六百餘兩。且有濫委營缺私收練兵貼費各情。亟應勒追查辦。以儆貪婪。著王文韶飭令楊在元迅赴福建聽候勒追查辦。如敢飾詞違抗。卽著嚴叅押解。毋許

逗遛。○諭軍機大臣等奎昌等奏挑撤大同疲病防兵。並請將科城前調洋槍洋礮酌量截留。暨請留馬隊防勦各摺片。大同官兵到防後疲病甚多。現經奎昌等將精強堪用者挑選五百名留科防勦。卽著飭令管帶之員時加訓練。以資實用。其疲病兵丁卽照奎昌等所請各賞給兩月錢糧作為盤費。飭令副將鳳紀等妥為管押分起撤回。並嚴飭沿途約束不准稍有騷擾。該官兵等既賞有盤費。

卽毋得再令臺站供支。著奎昌等查明沿途各地方查照辦理。科城前調洋礮洋槍等項現在大同防兵既難演練。自不必全數解往科城。奎昌等請將洋礮及洋槍二百桿撥領回城其餘應否截留神機營備撥抑或解至金順軍營以資防勦之處著神機營王大臣酌度情形咨明妥辦。科城現有蘇彰阿馬隊合之挑選大同防兵五百名若能實力操防亦足以資守禦。景廉前赴烏魯木齊事機緊

要前敵兵力實形單薄奎昌等請將黑龍江官兵截留一起暫駐科城之處著不准行此項官兵仍著飭令迅赴景廉軍營以資調遣將此諭知神機營並由五百里諭令奎昌多布沁札木楚志剛景廉常順保英知之○乙酉諭內閣昨日御史李宏謨奏請勤召對一摺覽奏實堪詫異自朕御極後兩宮

皇太后垂簾訓政勵精圖治惟日孜孜召見臣工訪求治理本年入春以來

慈禧皇太后聖躬時有不適仍以勤政為心無間召對迨三月初旬以後

聖體違和久未痊愈始月餘未經視朝然四月二十六日猶力疾召見軍機大臣嗣因

聖體尚未大安是以連日仍未召見李宏謨近在京師豈獨毫無聞見竟以逐日召見為請嘒嘒瀆陳冒昧已極朕意本欲從重懲處乃我

皇太后以廣開言路之時特降

懿旨加恩免其褫革仍傳旨嚴行申飭○又諭

左宗棠奏請將庸劣不職各員分別降革一摺候補直隸州知州冒沂巧於營私因顧大局候選同知余壽鼎行為乖謬不諳政體陝西補用知縣羅正湘志趣卑污甘肅補用知縣廖紹銓近有嗜好遇事疲玩均著即行革職甘肅補用知縣海英性傲才疏不堪造就著以府經歷歸部降選○諭軍機大臣等奎昌等奏請免分兵隊以固防守一摺前因賊

匪由阿畢爾米特旗漸向東南竄擾杜嘎爾派隊分剿請將烏城所調之察哈爾馬隊一千名分撥五百移紮察漢淖爾地方截留五百仍駐哈爾尼敦以防烏庫門戶茲據奎昌等奏稱烏城防兵除察哈爾馬隊外僅有棍噶扎勒參營九百餘名蘇彰阿營三百餘名棍噶扎勒參所存索倫伊犁十蘇木等處之兵已據富和咨調赴塔景廉又因兵力單薄亦擬撥用該營之兵若再將察哈爾之兵分

隊駐紮不足以壯聲威等語。烏城地方緊要，棍噶扎勒參營既須西進，察哈爾馬隊自宜合隊擇要防守，方免兵分力單。惟庫倫門戶亦當兼顧，該處防兵約有三千餘名，或可自為設守。毋須將察哈爾馬隊分撥著杜嘎爾、張廷岳、阿爾塔什達悉心酌度，會商奎昌等辦理。總當相度機宜，統籌全局，不得顧此失彼。致有疏虞。將此由五百里各諭令知之。○追予浙江杭州殉難知縣楊尚瑛祭葬世職。

眷屬六名口旌卹如例。○丙戌

孝誠仁皇后忌辰遣官祭

景陵。○諭內閣據御史袁承業奏近聞太監在京城內外開列多鋪，並蓄養勝春奎戲班公然於園莊各處演戲等語。我朝紀綱嚴肅，從不准太監任意妄為。若如所奏各節，實屬大千禁令著總管內務府大臣步軍統領衙門順天府五城一體嚴行查禁，並著嗣後隨時稽查。如有前項情事，立即據實奏明，從嚴懲

辦。經此次訓諭後，僅有太監在外生事，別經發覺，除將該太監嚴行懲辦外，並將該管大臣及地面各官懲處不貸。○諭軍機大臣等，邵亨豫奏籌辦陝境防剿賑墾事宜，並探聞甘省撫局就緒一摺。陝西北山一帶現有譚仁芳等軍扼紮，陝南李輝武一軍復將階州竄出，回匪擊退。陝邊南北已無賊蹤。即著邵亨豫飭令譚仁芳、李輝武各將所部兵勇認真訓練，擇要扼防。一面勤加偵探，遇有賊匪

竄入，即行剿擊。甘肅西甯河州等處回匪乞撫，會甯靜甯隆德各州縣安插陝回。近日情形如何，並著隨時探明，詳細奏聞。陝北賑恤流亡開墾地畝各事宜，仍著通飭各該地方官認真經理，不得有名無實。該撫務當隨時稽查嚴防弊竇，以期振作。將此諭令知之。○又諭曾璧光等奏下游官軍連克賊巢，驛路疏通一摺。前據王文韶奏黔楚各軍業於三月間攻克烏牙坡賊巢，逆苗全股一律蕩平。

此次曾璧光等所奏尚是正月以前之事。刻下大股苗匪既經勦平亟應趁此大軍未撤之時撥捕餘匪妥籌善後以期一勞永逸。王文韶前奏摺內聲稱苗匪棄械投誠者萬餘人竄投黔軍就撫者亦復不少。此項降眾應如何設法安插必須妥慎籌辦其著名首要各犯如有在逃未獲者亦當上緊購捕務絕根株免致死灰復燃。以上各節著曾璧光周達武王文韶督飭各軍會同該地方官悉心商辦不得苟且了事致貽後患。上游興義一帶踞匪近日攻勦情形若何應否抽調下游官軍助勦之處著曾璧光等酌度辦理。周達武帶兵素稱得力現在患病未痊著該提督一面加意調治一面力疾籌辦毋稍諉卸。將此由五百里諭知曾璧光並傳諭周達武王文韶知之。○陝甘總督左宗棠奏軍務未平請將本年軍政展緩舉行從之。○以貴州下游勦辦苗匪獲勝賞提督鄧有德黃馬褂總

兵官朱連陞張義山道員曾紀鳳參將蕭肇富邑圖魯名號餘加銜升敘有差予陣亡總兵官周定璽等十一員祭葬世職加等。○予四川馬邊傷亡總兵官劉為美祭葬世職加等。○追予廣東各屬陣亡殉難武生鄧朝璋等紳民婦女四千六十名口分別旌卹如例並予建祠。○己丑諭軍機大臣等景廉奏探聞西路軍情派兵西進暨安敦地方被賊竄擾情形各摺片烏魯木齊回逸現與安集延彼此攻擊景廉當乘此機會隨時確切偵探設法進取趁俄人未經東犯將醜類悉數掃除收復疆宇該逆曾差人赴趙興體營投誠未允所請嗣後如回逆安集延等復有投誠之說景廉仍當妥慎籌辦斷不可為其所紿。孔才辦事未能妥協景廉已派提督張玉春馳赴古城會同孔才辦理防勦並屯壘事宜著卽飭令該提督悉心部署以資戰守。徐學功回營後尤應妥為駕馭令其帶隊進勦並

將趙興體營勇隨時加意拊循俾為我用靖邊中營已赴古城後營及親兵營亦陸續調令赴坤惟駐紮安西之靖邊左營一時尚難開隊著景廉催令楊定邦將該營趕緊募補足額剋期啟行毋任延宕景廉軍營餉需支絀各省專協各餉著戶部催令各該督撫迅即如數運解以濟要需並著奎昌多布沁扎木楚志剛額勒和布各將所屬臺站竭力整頓酌添駝馬接運景廉軍營餉銀毋稍遲滯

+

安敦被賊竄擾與文麟前奏略同該逆雖已東竄難保不去而復來仍著文麟懷遵前旨認真防剿撫恤居民靖邊左營現須西進文麟當飭令安西州豫備車輛行糧俾利進行毋稍膜視將此由五百里各諭令知之○以右翼前鋒統領托雲為鑾儀衛鑾儀使以鑲藍旗滿洲副都統興林為正黃旗護軍統領○調正藍旗漢軍副都統恩承為正黃旗滿洲副都統以刑部右侍郎常恩兼正藍旗

漢軍副都統內閣學士紹祺署正白旗蒙古

副都統○賞故鑾儀衛鑾儀使一等承恩公

德懋銀三百兩治喪○予甘肅安西陣亡遊

擊楊文嵐祭葬世職如副將例○庚寅諭軍

機大臣等成祿奏請飭籌辦車馬及後路轉

運各事宜並請飭採買糧石各摺片據稱上

年勸捐之糧大半未交旋改為發價採買因

將已捐未收之糧出示停止蕭宗幹指給之

金塔高臺兩處糧共五千石惟高臺已交一

上

千餘石金塔尚不及十分之一糧食仍形缺

乏需用車馬亦未解到等語成祿現須拔隊

西進需用糧石自應寬為籌備且現在關外

安敦玉等處疊遭蹂躪戶鮮蓋藏更難就地

採辦其不得不藉內地之轉運亦係實在情

形著左宗棠飭令署甘涼道蕭宗幹署安肅

道何元普轉飭各廳州縣代為採買糧數千

石按地分派仍由成祿發給價值並將前准

截留之十年分張振運省倉糧三千五百石

籌款補交。一併運往成祿行營應用。至需用車馬及後路轉運事宜。左宗棠務當嚴飭該地方官趕緊籌備。妥為應付。不得稍存膜視。致誤軍行。成祿現赴金塔。著卽迅速部署。一切剋日出關。亦不得藉口於軍糧不繼。任意遷延。肅州踞匪。必須早圖廓清。方免梗阻。著左宗棠檄令徐占彪嚴密布置。相機攻剿。毋存輕敵之見。致為所乘。將此由五百里各諭令知之。○癸巳諭軍機大臣等。左宗棠移圖

善奏。官軍偪攻肅州。大獲勝仗。左宗棠奏。截剿北路竄匪。殲滅殆盡。暨階州白馬關被匪闖入。旋經擊退。各摺片。肅州踞逆。經徐占彪督隊痛剿。連戰皆捷。殺斃悍賊死黨甚多。城賊恟懼。左宗棠等卽飭令該提督乘此聲威。迅拔堅城。盡殲醜類。惟該逆負固。有年。仍當穩慎進攻。不可稍涉大意。甘肅北路零星匪經官軍節次截剿。殲滅殆盡。惟狗齒牙及馬二利木尚在。脫逃該逆。皆百戰之餘。熟諳地勢。

亡命鋌走。自在意中。左宗棠等仍當檄飭各防營分道接捕。務將狗齒牙等逆悉數弋獲。淨絕根株。甘南階成一帶竄匪。闖入白馬關。經官軍截剿。竄逸餘黨無多。該督等仍嚴飭各將領聯絡一氣。探蹤接剿。以靖地方。署白馬關州判羅映霄疏。防汎地被匪闖入。惟因捕賊遠出。聞信卽將該關收復。著加恩免其置議。將此由六百里各諭令知之。○又諭左宗棠奏。成祿廉餉。遷延舉動。乖張。請簡派大員接統該軍等語。據稱該提督奉旨西進。七載以來。戰績無聞。肅州雖報收復。旋被賊踞。肅回陝回分竄。烏里雅蘇台及甘涼各處。成祿均不能制。於實心就撫之陝回。馮均幅不肯資以兵。力致該回為馬四所害。又將護送寶型之陝回二十餘名殺盡。陝回馬長順遂疑懼。不回西甯。就撫徐占彪一軍赴肅。成祿遇事不與相商。阻撓牽制。道員蕭宗幹於高臺等處代成祿定買糧石。成祿不如數發銀。

該軍十二營現存實數僅五六營久駐高臺
拉運婦女小孩蓄養戲班並遣人赴都接取
伊妾赴高臺等情朝廷以西事孔亟疊飭該
提督星速出關勦賊若如所參各節殊屬措
置乖謬亟應確切查辦著穆圖善按照左宗
棠參奏各款嚴密訪察迅速據實具奏毋稍
徇隱原片著鈔給閱看將此由五百里密諭
知之○又諭金順奏赴任未能迅速擬請效
力前驅一摺金順簡任烏里雅蘇台將軍自
應遵旨迅赴本任以重職守惟據奏稱選帶
所部得力隊伍尚不下六七千人需用駝隻
甚多無從籌備遣撤兵勇清釐積欠需費又
鉅是以積遲至今未克成行並以烏城竄匪
多係河狄西甯等處回逆由肅州甘涼沿邊
北犯擬請暫統全軍進紮甘涼鎮番一帶邀
截賊匪來路藉保烏城等語該將軍駐軍包
頭徘徊觀望於大局毫無裨益姑允所請迅
帶所部馳赴甘肅於甘涼鎮番一帶扼要駐

紮遇有賊匪奔突卽行截擊毋任紛竄出邊
以逼竄烏之路金順接奉此旨卽當趕緊部
署將應撤勇丁設法遣撤拔隊日期先行奏
報毋再藉口於餉需不繼任意遲延到甘後
並當激勵諸軍力圖報稱將甘涼鎮番一帶
竄匪埽蕩廓清毋留餘孽儻再藉詞延宕不
能力圖振作致匪徒鋌走出邊使烏城等處
又遭寇警定將該將軍重處不貸金順拔隊
啟行應需軍裝轉運費用著鮑源深邵亨豫
各於該省應解軍餉內先行籌撥銀十萬兩
剋期如數解交金順軍營以資應用其各省
應解金順軍餉仍著戶部分催迅解源源接
濟毋令缺乏將此由六百里各諭令知之○
以勦賊不力摘甘肅軍營提督左日昇總兵
官熊道濱副將王雲孚頂翎○以甘肅白馬
關被匪竄陷革把總周德職不准留營予殉
難副將孫萬榮知縣李舒萼縣丞郭怡祭葬
世職○予甘肅肅州陣亡都司賀洪山等十

一員祭葬世職加等○予甘肅定邊等處陣亡遊擊秦正明等十三員祭葬世職○甲午諭內閣前因安徽署天長縣知縣馮至沂投水自盡一案情節較重當派何璟親提研訊茲據奏稱此案前署盱眙縣知縣路玉階於被控稟留馮至沂幫辦考差架詞傾陷等情堅不承認飭傳經辦考差之家丁楊玉廷不交解顯有狡飾庇縱情事路玉階著暫行革職勒令將家丁楊玉交出歸案審訊以成信

讞○諭軍機大臣等前據英翰奏安徽奉撥江蘇傳辦緞紬銀十萬兩請於皖南茶釐款內抵撥當經降旨允在茲據何璟奏稱此項銀兩實係江省本有之銀並非皖省協濟之款除劃解皖省額派長江水師餉銀十萬兩及添撥火藥經費一萬兩外每年收銀十八萬餘兩均解交金陵軍需總局按月湊撥甘餉並無餘賸現在傳辦緞紬需款甚急請於江蘇應解皖省之鹽課鹽釐內劃扣等語即

著英翰於淮北鹽課鹽釐項下劃出銀十萬兩由何璟等提撥應用以資協濟該撫毋再藉詞推諉致誤要需將此諭知何璟英翰並傳諭恩錫知之○署兩江總督何璟奏蒞任未及三月請將本年軍政展緩舉行從之○乙未諭內閣李瀚章王文韶奏援黔各軍攻破賊巢苗疆平定曾璧光周達武奏下游官軍會剿大股苗匪情形各一摺覽奏實深欣慰貴州苗匪張臭迷等自咸豐五年倡亂以來嘯聚黨眾疊陷城池貴東貴西蹂躪殆遍楚蜀邊境亦為不靖嗣經記名布政使席寶田統帶楚軍入黔援剿貴州提督周達武亦率所部由蜀前進黔楚各軍節節掃蕩疊將清水南岸開懷香鑪山等處賊巢攻克該逆竄踞烏牙坡一帶負隅死守本年三月間提督唐本有等分路進剿連克牙塘馬遠猴子坳等處逆巢提督龔繼昌等會合黔軍進攻烏堡冷水溝等處踞匪擒斬收降者甚眾該

逆乘雨出竄官軍截擊於挂燈地方陣斬逆苗九大白遂將烏牙坡二十餘里內賊巢悉數踣毀四月間提督蘇元春等分率隊伍由雷公坪等處挖勦而前復斬巨苗巖大五於陣並將逆首偽大元帥張臭迷偽平楊王楊大六及姜老拉潘老冒等先後擒獲逆苗全股蕩平其逆首包大肚金幹幹等股盤踞平茶牛角坡等處經黔軍提督鍾開蘭鄧有德等攻破斬馘無算並生擒包大肚金幹幹及悍黨多名均經正法此次黔楚各軍勦力同心連戰克捷遂使積年巨寇悉就殲除苗疆底定洵足彰天討而快人心所有張臭迷一犯尤為苗逆渠魁著王文韶即將該逆就地正法傳首犯事地方以昭炯戒湖廣總督李瀚章署湖南巡撫布政使王文韶貴州巡撫曾璧光貴州提督周達武均能和衷共濟克竟全功著一併交部從優議敘記名布政使席寶田總統楚軍調度得宜著賞給騎都尉

世職○諭軍機大臣等李瀚章王文韶奏援黔各軍攻破賊巢苗疆平定擒獲逆首張臭迷應否解京曾璧光周達武奏下游官軍會勦大股苗匪情形各摺片本日業經明降諭旨宣示此次黔楚各軍合力圍剿克定苗疆著名逆首悉數就擒覽奏之餘實深欣慰所有張臭迷一犯業經解送湖南省城卽著王文韶將該逆就地正法傳首犯事地方以昭炯戒無庸檻送京師其逆首金大五伏匿香鑪山白水洞並有數百人竄伏香鑪山頂著王文韶飭令唐本有等剋日殲擒毋任鉅險他竄致貽後患曾璧光等摺內所稱凱里渡河之賊分投向鎮遠之路逸去此股賊匪尚有若干人著卽飭令宇文秀等會合楚軍前截後追迅速殲除毋留餘孽現在苗疆旣經平定楚省援軍應如何分別遣撤及擇要扼紮之處著李瀚章王文韶會商辦理黔省地方疊遭寇亂瘡痍滿目殊堪矜憫現下游一

帶甫就肅清當以綏輯閭閻為急務曾壁光
務須遴派廉能明幹之員認真經理以期地
方日有起色黔省餉項本缺現有各營除酌
留下游擇地扼防及勦辦上游興義賊匪外
其餘即可酌量裁減以節經費著曾壁光周
達武悉心會商妥為籌辦貴東道一缺有撫
輯苗疆之責必須得人而理李德義現在有
何別項差委該員於此缺人地是否相宜著
曾壁光據實具奏將此由五百里諭知李瀚
章曾壁光並傳諭周達武王文韶知之○又
諭曾壁光奏待餉孔殷請飭催專餉一摺據
稱上年江西奉撥貴州專餉五十萬兩派員
提解僅據該省撥銀五萬兩現在黔省軍務
正當喫緊士卒待餉甚殷且新撫苗眾已逾
十數萬家應辦善後事宜尤須鉅款請旨飭
催專餉以濟急需等語所奏自係實在情形
卽著劉坤一飭令藩司將該省奉撥貴州專
餉除已經撥解外其餘銀兩迅速如數籌撥

務於本年六月內發交貴州委員提解回黔
毋稍延緩將此由五百里諭令知之○以四
川官軍防勦陝西回匪並勦辦貴州上游股
匪出力予提督李輝武優敘賞總兵官賴錫
光副將鄭學德巴圖魯名號同知李輝聯參
將賀曙堂等花翎守備談嘉祥等藍翎餘加
銜升敘開復有差○以湖南貴州官軍勦平
苗匪賞提督龔繼昌唐本有蘇元春雲騎尉
世職總兵官鄧祖興一品封典提督蘇元章
道員謝蘭階戈鑑黃馬褂道員易鼎臣副將
陳嘉參將鄧興標遊擊蘇年春唐占寅何玉
祺都司陽肇祥龔盛祿蔣得標巴圖魯名號
同知銜知縣鄭以蒸等花翎教諭宋必昌藍
翎餘加銜升敘開復有差予陣亡副將洪石
齋等十一員祭葬世職加等○予貴州定南
陣亡副將李錦貴等十七員祭葬世職加等
○丙申遣官祭
關帝廟○以神靈顯應頒陝西邠州

城隍廟扁額曰西陲永賴○諭軍機大臣等
豫師奏現籌辦理陝回就撫情形等語道員
馮邦棟由平番進抵碾伯陸續將陝回宋全
德等呈繳馬匹槍械戶口冊籍分別點驗其
軍功馮振鳳等帶到回夥于海潮馬世魁禹
召林等均經飭回原處聽候查辦著豫師隨
時會商左宗棠督飭馮邦棟妥實辦理不得
稍涉遷就致貽後患回情狡詐誠恐各營因
辦撫或形疏懈轉為該逆所乘左宗棠務當

懍遵疊次諭旨體察情形將河州西甯各回
撫局妥慎籌辦並嚴飭前敵後路各軍加意
防範毋稍大意近日辦理情形並著隨時詳
悉具奏將此由五百里各諭令知之○署陝
西巡撫邵亨豫奏到任未久請將上年大計
緩至本年夏季後辦理從之○以故不入八
分鎮國公綿壽子奕賀襲爵○以甘肅西甯
等處防勦回匪出力賞總兵官李占超正一
品封典遊擊周興祿已圖魯名號知府德蔭

都司陳洪泰等花翎從九品劉永齡等藍翎
餘加銜升敘有差○以江西靖安勦匪出力
予知縣汪以誠以同知用並賞花翎餘加銜
升敘有差○予伊犁殉難已革尚書陳孚恩
眷屬四名口分別旌卹加等○
上以夏至祭

地於

方澤自是日始齋戒三日○丁酉諭軍機大臣
等瑞聯清凱奏邊外賊匪滋擾兵勇迎擊獲

勝一摺邊外大東溝突有由上江竄來賊匪
五百餘名雖經兵勇在榆樹房東甸子地方
迎擊擒斬多名惟邊外地面遼闊逆蹤出沒
靡定仍恐去而復來著都興阿瑞聯清凱嚴
飭鳳凰城城守尉及帶兵各員在沿邊一帶
勤加偵探實力防勦毋稍疏虞此次出力員
弁兵勇准其擇尤酌保毋許冒濫此股賊匪
係由海洋竄來棄船登岸分股肆擾嗣後尤
應嚴防海口絕其登岸之路瑞聯等前調福

建輪船已諭文煜等酌撥小號輪船一隻駛赴牛莊海口聽調此項船隻到後卽著都興阿等遴派得力弁兵隨時出洋認真巡緝遇賊卽擊毋任逆蹤登岸以靖游氛將此各諭令知之○又諭張廷岳等奏遵查賊股分竄暨防務情形一摺賊情狡變無定現雖避兵遠颺難保不去而復來乘虛竄突張廷岳阿爾塔什達仍當督飭各軍嚴密布置隨時確切偵探不得以現無賊蹤稍涉疏懈致有貽

誤將此由四百里各諭令知之○廣州將軍長善等奏旗營會哨洋面窒礙難行得旨所稱洋面滋事旗營一同查叅之處既屬窒礙難行卽著仍照向章辦理無庸出洋會哨以符定制○派工部右侍郎錢寶廉恭勘

東陵風水圍牆應修工程○戊戌諭軍機大臣等前因德英等奏請飭催各省欠解整裝銀兩當交戶部速議具奏茲據奏稱黑龍江節次調赴各省軍營官兵需用整裝銀兩前經

該部於直隸河南兩省撥給僅據河南解到銀七千三百餘兩其餘銀八萬三千六百餘兩迄未報解又本年調赴肅州官兵由河南省撥給整裝銀一萬一千八百餘兩請一併飭催等語黑龍江歷次需用整裝銀兩均向鋪商借墊亟應早日歸還前經降旨飭催各該省仍復延不報解實屬怠玩著李鴻章錢鼎銘嚴飭各該藩司按照部撥數目趕緊籌款卽行陸續起解以濟要需不得再涉遲緩將此由四百里各諭令知之○追予山東各屬陣亡殉難州吏目邵文燁等紳民婦女一千四百十三員名口分別旌卹如例

大清穆宗繼天開運受中居正保大定功聖智
誠孝信敏恭寬毅皇帝實錄卷之三百三十三

實錄卷之三百三十三

四十六

大清穆宗繼天開運受中居正保大定功聖智
誠孝信敏恭寬毅皇帝實錄卷之三百三十四

茲將穆宗皇帝實錄卷之三百三十四內開列各事

穆宗皇帝實錄卷之三百三十四內開列各事

穆宗皇帝實錄卷之三百三十四內開列各事

穆宗皇帝實錄卷之三百三十四內開列各事

穆宗皇帝實錄卷之三百三十四內開列各事

教修

同治十一年壬申五月己亥夏至祭

實錄卷之三百三十四

地於

方澤遣鄭親王慶至恭代行禮

上奉

慈安皇太后

慈禧皇太后幸漱芳齋侍午膳（庚子）諭軍機

大臣等李鴻章奏滬津機器各局事體繁重

知府鄭藻如於本年春開乞假回粵省親現

未銷假廣東道員吳贊誠精於算學堪備督

理製造之選請飭該員等回滬來津等語滬

津兩局辦理洋務機器委用需人著瑞麟卽飭令鄭藻如迅速回滬銷假毋稍延緩並飭吳贊誠卽行雇搭輪船航海來津隨同辦理洋務製造事宜以資臂助將此諭令知之○命協辦大學士直隸總督李鴻章為大學士仍留總督任○命閩浙總督李鶴年在紫禁城騎馬○命前任山西布政使劉秉璋前任廣東布政使文格前任貴州布政使嚴樹森來京陛見○壬寅諭軍機大臣等戶部奏遵撥杜嘎爾餉銀一摺據稱杜嘎爾行營並無專撥協餉現在該營僅贖餉銀四千數百兩不敷六月兵餉之用請仍由部庫撥給銀五萬兩並請飭山東山西兩省撥還部庫等語著照所請辦理此次所撥銀兩卽著戶部知照順天府遴委委員解赴察哈爾都統衙門投交額勒和布於此項餉銀到後卽派員妥為護送杜嘎爾一面派員迎提並著丁寶楨鮑源深卽在地丁項下各撥銀二萬五千兩

迅速解交部庫毋得稍有蒂欠杜嘎爾卽將所部官兵每月支放餉銀章程報部查覈其上年十二月間由部庫撥給杜嘎爾餉銀五萬兩並著該副都統將支放數目一併分晰開報以昭覈實將此各諭令知之○又諭文麟奏官兵截擊西路賊匪情形一摺哈密防守二堡營官李生元等在三道林等處截勦西路馬賊殲擒烏魯木齊送信奸細三名惟馬阿布都一名未經弋獲著文麟飭令該官兵認真搜捕毋任漏網二堡地方為烏魯木齊吐魯番等處往來要隘李生元等軍在該處駐防尚稱得力卽著督飭該營官等隨時偵探嚴密防範遇有匪蹤窺伺卽行實力擊勦不得稍涉疏虞哈密歷年籌辦防堵出力員弁准其擇尤請獎毋許冒濫將此由五百里諭令知之○哈密辦事大臣文麟奏請調前任甘州提督成瑞候選知府景春前山東曹州鎮總兵官雙齡赴營差委允之○調察

哈爾商都牧羣駝八百五十隻馬八百匹分
解烏里雅蘇台科布多兩城備用○癸卯賞
江南庚午科鄉試年老諸生潘向雲等二人
舉人○甲辰諭軍機大臣等曾壁光等奏下
游漸就廓清籌辦調撤兵勇安撫降苗暨楚
軍和衷共濟各摺片黔省下游業已底定亟
應添撥兵勇力攻上游曾壁光等已抽調鍾
開蘭率三千人馳赴新城興義助剿卽著飭
令該提督會同滇軍併力進攻將該兩城迅
速克復廓清上游毋稍鬆勁其香鑪山孤巢
及零星竄匪並著黔楚各軍乘勝剋日掃除
毋令死灰復燃致貽後患楚軍所撫降苗甚
眾著王文韶督飭地方文武妥為安插彈壓
其飢疲待哺者亟應籌款分別賑恤曾壁光
以黔省降苗亦眾未能兼顧自係實情卽著
王文韶暫由湘省籌款就近酌給口糧俾生
計有資不至流離失所所稱生苗頑梗性成
此後擬令一律薙髮改變服色並不准私蓄

槍礮刀械之處均著照所議辦理並慎選賢
能牧令將保甲義學等事宜實力舉行以冀
默化潛移庶可一勞永逸曾壁光等摺著鈔
給王文韶閱看將此由五百里諭知曾壁光
並傳諭周達武王文韶知之○乙巳諭軍機
大臣等劉嶽昭岑毓英奏攻克永平雲南縣
城一摺永平雲南兩縣切近大理該逆恃為
犄角久抗官軍此次楊玉科李維述等督兵
分投進剿先後將兩城攻克殲除悍賊殆盡
並將曲洞漾濞賊巢攻拔當糧餉支絀之際
該督撫能激勵將士奮勉出力殊堪嘉尚岑
毓英現擬將迤南軍務趕緊肅清卽赴迤西
督剿勇於任事必能所向有功惟杜逆久踞
迤西根深蒂固現雖藩籬已破恐負隅之志
愈堅該撫務當於勇往之中加以穩慎總期
謀定後動竟此全功用副委任前據學政汪
敘疇奏滇省賦斂過重以致民不閒墾穀米
騰貴士子誦讀無資又局紳把持吏治不修

考試大典。每多玩延等語。滇省久經兵燹。地方彫敝已極。該督撫當體恤民生。整飭吏治。將一切弊政隨時除革。以期綏靖地方。汪敘疇所奏各情。著卽查明覆奏。將此由五百里各諭令知之。○予雲南永平等處陣亡參將李棟材等二十二員祭葬世職加等。○丙午。孝恭仁皇后忌辰。遣官祭。

景陵。○鑲紅旗蒙古副都統寶全因病解職。以內閣學士紹祺兼鑲紅旗蒙古副都統御前侍衛扎拉豐阿署正白旗蒙古副都統。○安徽學政景其濬因案解任。命翰林院侍講學士祁世長提督安徽學政。○命雲南學政汪敘疇來京。以翰林院編修李端棻提督雲南學政。○實授湖南布政使王文韶巡撫翰林院侍講學士吳元炳湖南布政使。○以湖南官軍克復貴州台拱廳城暨攻拔三丙等處賊巢出力。賞提督陳賢勝總兵官陳正珀池中和彭楚賓樊本德袁有名李榮華二品封

典。總兵官唐啟太。熊守綿胡蘭芳副將魏祖祥袁有勝潘才喜彭世昇參將楊宗德王學純。遊擊楊大喜。知府鄧善實巴圖魯名號。知府戈聿新參將歐陽芝等花翎。守備唐占寅等藍翎。餘加銜升敘有差。○以甘肅勦辦河西等處竄匪出力。賞委參領尚玉。遊擊徐和都司劉清巴圖魯名號。副都統成山等花翎。縣丞李如玉等藍翎。餘加銜升敘有差。○予甘肅甯夏陣亡委參領全祿等十六員祭葬世職。○丁未。諭內閣。本日據御史張景青奏。內務府堂郎中文錫承辦公事。巧於營私。且恃伊父明善現任堂官。益無顧忌。遇有傳辦之件。動多浮冒。請將該員撤去差使等語。國家經費有常。疊經諭令內務府大臣搏節用款。力杜中飽。茲據該御史所奏各情。必係該員於承辦事件不能覈實。以致物議沸騰。此等劣員。豈宜仍令干預差務。卽著總管內務府大臣將文錫撤去一切差使。另派廉謹之

員承辦。並著存誠。崇綸。春佑。確切查明。如有浮冒侵蝕等弊。卽行奏參懲辦。嗣後仍著該管大臣隨時稽查。一切支領款項。務須實用實銷。儻有中飽情事。卽將承辦之員嚴參治罪。毋稍徇縱。尋奏遵查。文錫尚無浮冒侵蝕等弊。惟承辦大婚一切差務。未能處置得宜。致招物議。實屬咎有應得。除撤去一切差使。外。應請將該員驍騎參領堂郎中一併開缺。以示懲儆。從之。○己酉。諭內閣。左宗棠等奏。

出差大員中途梗阻。請旨遵辦一摺。前派委散秩大臣兆珏。翰林院侍講學士鐵祺。前往庫克諾爾賜祭。現據奏稱該員等行抵蘭州。探明前途梗阻。自應暫緩西進。兆珏。鐵祺著卽回京供職。續派之大理寺少卿長敘。著一併折回。俟西甯軍務大定。道路疏通。另行派員前往。嗣後遇有應派西路出差事件。著該衙門俟該處軍務肅清。再行奏請簡派。○諭軍機大臣等。左宗棠。穆圖善。奏馬步兵勇。分

路截剿。竄匪獲勝一摺。河州回眾。及西甯土客各回。旣已先後乞撫。何以涼州鎮番武威各屬。尚有賊匪時出肆擾。可見回民種類不一。約束難齊。左宗棠。穆圖善。務當督飭馬步各軍。嚴扼要隘。遇賊卽擊。毋稍鬆懈。至該回狡譎性成。每當耕作之際。輒乞撫以冀緩師。迨收穫後。旋又借端抗拒。從前覆轍。不可不防。左宗棠現辦撫局。總當斟酌機宜。為西陲籌數十百年之安。毋得稍涉遷就。致日後重

煩兵力。現在辦理情形如何。著該大臣隨時具奏。以慰廛繫。穆圖善另片奏馬隊官兵糧餉。請分別報銷等語。所有甘肅續調吉林黑龍江馬隊月餉。卽著照穆圖善所請。劃清年限。分別報銷。其八年冬閒委員辦糧未結商借銀二千五百九十兩零。卽著袁保恆照數撥解歸款。將此由五百里諭知左宗棠。穆圖善。並傳諭袁保恆知之。○予甘肅涼州等處傷亡協領依常阿。陣亡守備歐發梅。祭葬。世

職加等。○庚戌諭軍機大臣等。前因瑞聯奏抵撥各款。不敷支放。請飭添撥銀十五萬兩。當交戶部議奏。茲據奏稱。奉省用款日增。徵收各項。不敷抵放。自應如數撥給。請於直隸積欠項下提銀三萬兩。長蘆積欠項下提銀二萬兩。山東積欠項下提銀五萬兩。河南積欠項下提銀五萬兩等語。卽著李鴻章、丁寶楨、錢鼎銘。按照戶部指撥數目。迅飭藩運各司趕緊籌撥。務於七月以前。悉數解赴盛京戶部交納。至奉省應徵各項。該將軍府尹仍當督飭所屬。實力徵收。年清年款。毋任稍有短絀。以重課款。將此由四百里各諭令知之。○又諭。前因德英等奏請撥官兵資裝銀兩。並催解欠款。當交戶部議奏。茲據奏稱。本年黑龍江圍獵官兵。應需資裝銀一萬四千八百七十兩。請於河南地丁項下撥給等語。著錢鼎銘嚴飭藩司。按照該部指撥數目。迅速籌撥。委員解赴盛京戶部交納。限文到三箇

月內報解。毋稍遲延。一面知照黑龍江將軍派員領取。此項銀兩解到。瑞聯卽行驗收。俟德英委員到時。發交領解回省。至上年河南應解黑龍江圍獵官兵資裝銀兩。迄未報解。並著錢鼎銘趕緊籌撥。一併剋期委解。毋得再事延宕。致誤要需。德英於此項銀兩到後。務當覈實支放。並將用過數目。專案報部。以重款項。將此由四百里各諭令知之。○又諭。榮全等奏面見俄官會議情形。並俄兵直入塔境各摺片。榮全行抵色爾賀鄂普勒地方。與俄官布呼策勒傳斯奇會晤。該俄官語多閃爍。竟不議及交還伊犁之事。並以請示該國為詞。意在延宕。塔境之三工河灣額爾米斯河老河口等處。又有俄兵駐紮。是其心懷叵測。已可概見。本日已令總理各國事務王大臣設法與該國住京公使辯論。第俄人蓄謀占踞伊犁。徒以口舌相爭。恐亦無濟於事。榮全現已旋回塔城。著與富和會商布置。妥

為防範。毋令俄人再行侵占塔境。榮全此時自未便帶兵徑赴伊犁。惟伊城情形現在究竟如何。應派妥員前往。隨時偵探。妥籌進止。布呼策勒。傳斯奇到伊後。有無回信。仍著榮全酌度情形辦理。該國兵隊既有潛取瑪納斯之意。勢將駁駁東犯。榮全前議挑選索倫等項人眾。會合鄉團。規取瑪納斯城。自當速籌調度。先發制人。以杜他人窺伺。儻能派隊先復瑪納斯城。則烏魯木齊近在咫尺。可期

軍機處

十三

與景廉之軍聯絡聲勢。景廉所部各營已陸續拔赴古城。著即督率官軍整頓附近民團。相機進取。務將烏魯木齊早日規復。方能居中控制。以扼西路之衝。烏城回逆與安集延彼此互攻。各不相下。其中有能去逆效順。率眾來歸者。不妨寬其既往。酌量收撫。俾為我用。並著景廉察看情形。與榮全咨商妥辦。榮全原摺片著鈔給景廉閱看。將此由六百里各諭令知之。○以驗收海運漕糧完竣。予倉

場侍郎英元。直隸總督李鴻章等優敘。○辛亥。予四川故河南按察使王正誼入祀鄉賢祠。從總督吳棠請也。

軍機處

十三

大清穆宗繼天開運受中居正保大定功聖智誠孝信敏恭寬毅皇帝實錄卷之三百三十四

大清穆宗繼天開運受中居正保大定功聖智
誠孝信敏恭寬毅皇帝實錄卷之三百三十五

臣等謹將本年內各款恭摺具奏伏乞皇上聖鑒訓示謹奏
光緒二十九年正月二十二日奉 上諭著照所請辦理並著知照盛京禮
部內務府責成承辦之員於各項貢物照常
呈進毋任有所藉口致誤需用將此各諭令
知之○又諭景廉奏籌辦兵餉各事宜並探
聞烏魯木齊軍情請飭黑龍江馬隊全數赴
營哈密採辦軍糧各摺片烏魯木齊淪陷已
久現在逆回與安集延互相攻擊機有可乘
自應厚集兵力迅圖克復景廉所部官軍僅
十餘營不敷分布刻下秦晉邊防較鬆著定

教修

同治十一年壬申六月甲寅朔

上詣鍾粹宮問

慈安皇太后安長春宮問

慈禧皇太后安至壬午皆如之○奉

慈安皇太后

慈禧皇太后幸漱芳齋侍午膳○諭軍機大臣

等都興阿等奏查勘邊地情形一摺據稱查

明驗廠門外已墾熟地十二萬五千餘畝俟

北二邊地段查勘完畢再行報部起科邊外

河岸山廠關繫捕漁採蜜地方游民耕種多

安於綏遠城防軍內酌撥馬步勁旅二千名並派得力大員統帶前赴景廉軍營以資攻勦。景廉現擬採買駝隻及籌撥軍裝等項需款甚急。著李鴻章、吳棠、錢鼎銘、丁寶楨、鮑源深、邵亨豫、李瀚章、郭伯蔭於各該省欠解新疆軍餉及景廉協餉內無論如何為難各先行籌撥銀六七萬兩迅速解至察哈爾收存。景廉擬於此項銀兩內提銀十萬兩買駝五千隻以一半為口北歸綏兩道運送米麪之

需其餘一半駝隻即於新調兵勇出口時駄運軍火口糧乘便解至景廉軍營並再提銀十萬兩作為官兵出口製辦軍裝裹帶之用其餘銀兩分起解交景廉應用均著照所請辦理該都統所部需用糧石請由口北歸綏兩道每月各運解京斗粟米四百石著李鴻章定妥督飭該道等照數籌辦至所請在察哈爾設立糧臺在蒙古地方採買駝隻轉運軍糧及征兵出口事宜責成一手經理等語

著李鴻章、額勒和布會商辦理烏魯木齊回逆約會鄉團徐學功同攻安集延是否該逆有悔罪投誠之意如果真心向化獻出城池不妨赦其前罪予以自新著景廉相機妥辦所請將徐學功等分立營名仍著飭令張玉春等妥為鈐束以資得力科城截留黑龍江馬隊前據奎昌等奏到未經允准此項馬隊著奎昌多布沁扎木楚志剛常順保英飭令吉爾洪額星速統帶前進毋稍遲延景廉軍

營需糧甚多不能盡由內地運解若就哈密一帶採買自較便捷著文麟遇有景廉委員赴哈採糧或左宗棠派員出關即行妥為照料督飭設法趕辦不得稍存膜視致誤軍糈將此由六百里各諭令知之○丙辰以舉行大婚典禮封

皇后阿魯特氏父翰林院侍講崇綺為三等承恩公母宗室氏宗室氏瓜爾佳氏均為公妻一品夫人○丁巳諭軍機大臣等常順保英

奏遵查科布多辦臺員弁等保案請旨辦理暨酌加防兵口糧請飭山西解餉各摺片文碩前請撤銷科城辦臺員弁保案現經常順等查明主事托莫爾歡總辦各臺應差遲誤咎有應得姑念其查辦後尚知愧奮著撤去保案免其叅處驍騎校玉崑派辦烏梁海等處臺務未能妥善著撤銷保案以示薄懲委署主事祥慶筆帖式薩拉哈本錫拉布扎倫布拴德等暨台吉克什克布彥章蓋克什克圖鄂爾哲依達什等三員均著照常順等所請免其撤銷前次保案科城駐紮之大同兵五百名口糧不敷業經常順等酌量增加難於支墊著鮑源深轉飭所屬迅將此項防兵口糧及科城採買之項星速遞運以資接濟嗣後辦理該軍糧食米仍舊章酌則以一斤八兩覈計並著鮑源深飭屬照辦山西奉撥科城餉銀五萬兩著該撫迅即發交歸綏道庫由常順等委員支領應用毋再延緩將此

由五百里各諭令知之○移甘肅平慶涇道駐紮平涼府城改甯夏水利同知為甯靈撫民同知從總督左宗棠請也○追予安徽廬州陣亡護總兵官遊擊何朝亮諡勇烈○戊午諭軍機大臣等曾壁光等奏餉需奇絀請飭催協餉一摺據稱貴州指撥各省協餉每月十四萬兩自上年二月起至本年四月止除四川及江西九江關尚能如數撥解外其福建山東浙江湖北江蘇等省均解不足數湖南廣東則分釐未解統計欠解銀一百六十四萬餘兩現在下游軍務將竣各營勇丁分別撤留亟需撥解鉅款方能清釐積欠開單懇請飭催等語黔省歷年餉需短缺士卒情形困苦現在下游苗匪漸次蕩平所有應撤各軍自應清給欠餉所留各軍尤須餉項接濟以資飽騰即著瑞麟李瀚章文煜何璟丁寶楨楊昌濬王凱泰郭柏蔭王文韶張兆棟恩錫於各該省欠解貴州協餉飭令藩運

各司無論何款趕緊籌撥於接奉諭旨後限一月內埽數解清不得稍涉遲緩諒各該督撫等必能力顧大局不至意存膜視也其江西指撥專餉前經降旨飭催著曾璧光周達武隨時咨催撥解以為籌辦善後之用原單著分別鈔給瑞麟等閱看將此由五百里諭知瑞麟李瀚章文煜何璟丁寶楨楊昌濬王凱泰郭柏蔭王文韶張兆棟曾璧光並傳諭周達武恩錫知之○己未諭軍機大臣等左

宗棠穆圖善奏馬步兵勇勦賊獲勝邵亨豫奏零匪竄越陝境派軍追勦等情各一摺蘭州附近防軍在黃羊川等處截擊回匪均有擒斬著左宗棠穆圖善督飭該將弁等按捕竄賊悉數殲除並隨時確探嚴防不得稍涉疏懈甘省零股賊騎越入陝境由中部宜君界內直竄白水經譚仁芳等軍進勦由澄城縣西遁其竄擾紅流河一帶賊匪經延榆綏鎮道派隊擊散著邵亨豫嚴飭譚仁芳等會

同曹克忠駐紮王家角等營將竄陝匪股痛加勦洗毋任日久蔓延致地方又遭蹂躪並著左宗棠飭令甘境防軍實力堵截以收夾擊之效河州回眾投誠曾否將馬匹器械依限繳齊就撫回戶已否編查約有若干著左宗棠將現辦情形詳細奏聞以慰塵繫其陝北賑墾事宜邵亨豫當慎選賢能牧令盡心經理務臻妥善以期地方日有起色將此由五百里各諭令知之○予甘肅黃羊川陣亡

都司黃林貴祭葬世職加等○庚申諭軍機大臣等金順奏督隊分起西進並豫籌沿途轉運事宜一摺金順接奉前旨後已令劉宏發統帶頭隊於六月初六日起程各隊挨次繼發該將軍亦即於十六日督率後隊西行即著趕緊前進毋稍紆遲俟行抵甘涼鎮番等處一面扼要駐紮一面迅速奏聞該將軍因經過蒙古地方暨甯夏所屬各處臺站廢弛擬由營添設運局轉解糧餉軍火續設馬

撥馳遞摺報公文均著照所請辦理甯夏近日漸有存糧應否設局採買接濟軍食卽著金順道出甯夏時與張曜妥速籌商奏明辦理將此由五百里諭令知之○壬戌上詣

奉先殿

壽皇殿行禮○甲子諭內閣前據朱鳳標因病兩次奏請開缺疊經降旨賞假調理茲據奏稱假期屆滿病尚未痊仍懇開缺等語朱鳳

標年逾七旬精力尚健襄贊綸扉深資倚畀今以病未就痊復請開缺情詞懇摯自應勉如所請朱鳳標著以大學士致仕加恩賞食全俸俾資頤養用示眷懷耆碩恩禮優加至意○又諭額勒和布奏臺站往來各差近來每藉官差販帶貨物在臺任意需索駝馬稍不如意輒加鞭撻請旨嚴禁等語臺站為支應官差而設若如所奏藉差帶貨濫索駝馬等情實堪痛恨亟應嚴行禁止著各城將軍

大臣等嗣後凡遇各項差使卽分別差務輕重人數多寡覈明應用駝馬數目給發印照將官兵員名往來處所實需駝馬數目逐一填明照內賽爾烏蘇張家口管站部員卽按印照所開數目另加傳單飭臺供應其由京前赴口外各差卽責成張家口管站部員按照部發勘合如數飭傳儻該官兵有格外需索各情或管站之員暨各臺徇情濫應一經查出卽著從嚴叅處毋稍徇庇○吏部以大學士瑞麟李鴻章應定何殿閣請得旨瑞麟著授為文華殿大學士李鴻章著授為武英殿大學士○命協辦大學士文祥為大學士管工部事刑部尚書全慶協辦大學士○調戶部尚書寶璽為吏部尚書兵部尚書載齡為戶部尚書以內大臣英桂為兵部尚書○革職留任江西巡撫劉坤一奏遵查江西留防勇丁僅七千餘人將來撤防擬將年壯技優者考選歸標餘亦開具銜名咨行原籍以

備稽查。所有夫勇派員押帶回籍。由該州縣管束。令其各安生業。報聞。○乙丑舉行同治十年大計。直隸卓異官十八員。不謹官四員。浮躁官三員。才力不及官一員。年老官一員。江蘇卓異官六員。不謹官二員。才力不及官二員。安徽卓異官八員。不謹官一員。浮躁官一員。年老官一員。江西卓異官十員。不謹官二員。浮躁官一員。年老官五員。浙江卓異官十員。不謹官二員。浮躁官二員。罷輟官一員。才力不及官二員。年老官三員。有疾官一員。福建卓異官十員。不謹官四員。浮躁官二員。罷輟官一員。才力不及官二員。年老官一員。湖北卓異官七員。不謹官四員。浮躁官一員。才力不及官一員。湖南卓異官八員。不謹官一員。浮躁官一員。才力不及官一員。年老官二員。有疾官一員。河南卓異官十二員。不謹官一員。才力不及官一員。年老官四員。山西卓異官十二員。不謹官一員。浮躁官二員。才

力不及官三員。四川卓異官十五員。不謹官五員。浮躁官三員。才力不及官二員。年老官一員。有疾官一員。廣東卓異官七員。不謹官二員。浮躁官四員。罷輟官二員。才力不及官二員。年老官一員。有疾官一員。廣西卓異官六員。不謹官六員。浮躁官一員。罷輟官一員。年老官二員。貴州卓異官六員。不謹官三員。分別議敘處分如例。○丁卯。以神靈顯應。加河南新蔡縣

城隍神封號曰顯佑。湖南長沙縣李真人封號曰靈感。○諭軍機大臣等。王文韶奏援黔官軍掃除竄匪。苗疆肅清。並分軍設防。撫恤降眾各摺片。烏牙坡苗匪蕩平後。逆首金大五竄伏香鑪山麓白水崗。經提督唐本有等設伏誘擒。復將漏網髮逆李七一。股悉數殄滅。並擒斬著名逆首多名。其香鑪山頂踞匪亦已殲除。苗疆一律肅清。辦理甚為妥速。所有擒斬首逆。尤為出力各員。著王文韶先行

酌保數人以示鼓勵。此次苗疆平定。當籌一勞永逸之計。清水南北兩岸降苗。為數甚眾。一切善後事宜。自應妥為經畫。王文韶現派各軍分段設防。並籌撥銀兩。分別撫恤。實能力顧大局。著卽飭令道員陳寶箴會同分防各營及各該地方官。體察情形。妥籌辦理。曾壁光、周達武亦當派委明幹大員。將下游一帶新復地方。應辦事宜。次第經理。以圖久遠相安。從前漢人視苗人如奴隸。多方陵虐。以致激成變端。皆由地方官不能豫為勸導之故。著曾壁光嚴飭地方官。曉諭苗漢各民。嗣後務須各安生業。不得互相猜忌。遇有詞訟案件。是非曲直。悉由該管官秉公剖斷。毋許稍有偏徇。用副朝廷一視同仁至意。王文韶另片奏擬將苗疆形勢險夷及用兵先後情形查覈臚陳等語。著卽確切查明。詳悉陳奏。將此由五百里諭知王文韶。曾壁光並傳諭周達武知之。○命吏部尚書單懋謙協辦大

學士兼充翰林院掌院學士。○以大學士文祥都察院左都御史李鴻藻為武英殿總裁。官兵部尚書沈桂芬為國史館總裁官。○命江西布政使文輝來京。以前任山西布政使劉秉璋為江西布政使。○予江蘇故禮部尚書何汝霖入祀鄉賢祠。從巡撫張之萬請也。○停本年秋審。朝審。○戊辰上奉

慈安皇太后

慈禧皇太后幸漱芳齋侍午膳。○諭軍機大臣等。錢鼎銘奏匪徒拒捕派兵查拏一摺。河南固始匪徒李六勾結安徽霍邱縣李四輩子在固境之裴家沖等處滋擾。經錢鼎銘派兵前往查拏。竟敢拒捕竄逸。現在匪首李六占踞霍境之葉家集附近民寨。李四輩子占踞李世忠族姪李德橫莊圍煽惑劫奪。亟應及早捕治。以靖地方。錢鼎銘現派趙鴻舉等帶兵往捕。卽著飭令該總兵等迅將匪黨盡數

殲除淨絕根株。毋留餘孽。並著英翰檄令郭寶昌派隊一體堵拏。毋令一名漏網。李四輩子一名李昭仁。係李世忠族弟。李世忠現赴江甯。著何璟飭令迅即回籍。將李四輩子弟官究治。不得稍有徇庇。將此由五百里各諭令知之。○以孚郡王為內大臣。鑲藍旗滿洲都統寶璣為閱兵大臣。○以吏部左侍郎魁齡。上駟院卿誠明為總管內務府大臣。○己巳諭軍機大臣等。張廷岳。阿爾塔什達奏請

飭催山東趕解欠餉等語。庫倫餉項支絀。前經指撥山東餉銀十萬兩。限於本年五月內全數解到。現屆夏杪。據張廷岳等奏稱尚未接到山東起解此項餉銀日期。咨文庫倫防勦喫緊。需款甚殷。豈容任意延緩。著丁寶楨趕緊將此項餉銀如數措齊。委員運解到口。轉解庫倫。以濟要需。毋再遲延。將此由五百里諭令知之。○旌表守正捐軀江蘇銅山縣民婦戚張氏。○癸酉諭軍機大臣等。錢鼎銘

奏會合皖軍擒獲匪首一摺。固始匪徒李六。句結李四輩子聚眾滋擾。占踞圍寨。現經豫皖各軍合力圍剿。業將李四輩子及頭目吳長林。張上銀等七名立時擒獲。餘匪逃散。此等匪徒膽敢句眾拒捕。亟應即時撲滅。以淨根株。李六一名現在未經弋獲。且餘匪四散。尤虞再行句結。餘燼復燃。著英翰。錢鼎銘分飭崔廷桂。牛師韓等合力挖捕。務將李六擒獲正法。餘匪盡數捕拏。以清餘孽。而靖地方。

將此由五百里各諭令知之。○乙亥以神靈顯應。加湖北蒲圻縣

城隍神封號曰靈感。湖南西河

朗公普濟真君封號曰誠感。○補鑄甘肅甯

夏府通判儒學甯夏縣儒學平羅縣主簿王

泉廣武二營遊擊橫城興武二營都司安定

堡石空寺堡二守備各關防印信條記。從總

督左宗棠請也。○以貴州桐梓等處勦除逆

匪。予提督胡國珍優敘。賞總兵官文德盛李

攀桂參將王安邦巴圖魯名號副將蕭茂亭知州傅大亨等花翎知縣曾士璠等藍翎餘加銜升敘有差○以貴州克復麻哈州城出力賞總兵官陳玉堃巴圖魯名號道員趙肇江總兵官張大洪等花翎通判周慶芝等藍翎餘加銜升敘開復有差○丙子遣官祭火神廟○己卯諭軍機大臣等英翰奏官軍越境剿除叛匪一摺匪徒李四輩子等與漏網擒逆張振科勾結滋事經皖豫各軍合力

圍剿已將李四輩子張振科擒獲正法餘黨殲除殆盡辦理尚屬迅速惟逆匪李六隻身潛逃仍未弋獲著英翰錢鼎銘分飭弁勇及各該地方官嚴密躡緝並知會鄰近各省一體兜拏此外有無餘匪務期搜捕淨盡毋留餘孽將此各諭令知之○以安徽河南交界地方殲擒逆匪賞提督牛師韓頭品頂帶予副將徐思忠以總兵官簡放○庚辰諭內閣左宗棠奏吉林馬隊營總驍騎校慶德與前

在軍營經管餉項之披甲景福通同舞弊景福此次回營行抵順天府地方復敢落後潛逃請將慶德革職並飭拏逃兵景福審辦等語吉林儘先佐領驍騎校慶德著先行革職勒令交出帳目聽候覈算並著吉林將軍步軍統領衙門順天府五城將逃兵景福一體查拏到案嚴行審辦以肅戎行○以理藩院尚書靈桂兼署禮部尚書倉場侍郎英元署步軍統領戶部左侍郎延煦署倉場侍郎

以鄭親王慶至署鑲白旗漢軍都統○上以孟秋時享

太廟自是日始齋戒三日○辛巳諭內閣巡視中城御史國秀等奏五城捕務亟宜整頓一摺京師地面理宜嚴肅近來竊盜之案層見疊出甚至持械傷人肆行無忌捕務廢弛如此實堪痛恨亟宜認真整頓以挽頽風著五城御史督飭司坊慎選捕役嚴密巡緝稍有疏懈立予叅處並著步軍統領嚴飭營汛兵

弁遇有竊盜案件趕緊緝拏以期共濟緝獲盜犯解交刑部後該承審司員總當研訊確情按律懲辦毋存姑息之心致涉輕縱至有罪人犯中途脫逃往往潛回京城流為積匪此等弊端尤應嚴禁著該部申明舊章責成各省督撫嚴為稽查於罪犯到籍到配務當飭令地方官吏嚴加管束其中途脫逃者解役如何治罪官弁如何議處實力辦理庶盜源可清盜風日息毋視誥誡為具文也○又

諭豫師奏西甯軍餉緊要各省月撥專餉截至本年四月底止共欠銀四十七萬兩本年僅據兩淮報解銀六千兩遵照部定章程請將玩誤甯軍專餉之藩司議處並請飭山東等省迅解欠餉等語報解不及二成之河南布政使劉齊銜著先行交部議處以示薄懲並著兩江總督江蘇山東河南各巡撫嚴飭藩運各司限一月內將積欠西甯專餉先行提撥一半迅速解交西征糧臺轉解嗣後仍

當源源接濟不得再有帶欠以重軍食○又諭豐紳等奏生息款項無從追繳懇恩豁免一摺甯夏滿營通益庫發商生息銀五萬五千兩前因借發兵餉及採買軍糧除提用外實存無著本銀三萬七千八百三十餘兩既據該署將軍等奏稱當商產絕人亡無從追繳其提借各項亦因餉項支絀勢難扣款歸還自屬實在情形所有此項通益庫發商生息銀五萬五千兩著加恩准予豁免以示體恤○

諭軍機大臣等左宗棠等奏擒剿巴家臺賊巢生擒匪首一摺匪首蘇家酉兒糾聚逃匪窩伏平番紅城後山之巴家臺恃險負隅經豫師岳商左宗棠穆圖善密派兵勇前往勦捕參將周興祿率眾攻破賊巢守備劉定國將蘇家酉兒擒獲餘賊亦皆殲斃即著該大臣等督飭各軍將在逃匪黨悉數擒捕此外有無賊巢仍飭隨時探勦盡絕根株河州等處軍情及現辦撫事有無頭緒並著左

宗棠恪遵前旨。將詳細情形據實具奏。將此由五百里各諭令知之。○總理各國事務衙門奏。遵議船廠事宜。未可惑於浮言。淺嘗輒止。應如李鴻章左宗棠沈葆楨所議辦理從之。○以禮部左侍郎察杭阿兼署戶部左侍郎管三庫事。○以甘肅巴家臺收破賊巢。予參將周興祿守備劉定國升敘。○以庫倫截剿竄匪出力。賞佐領密吉特多爾濟等花翎。○壬午

實錄卷三三六

三

上以孟秋時享

太廟前期親詣行禮

大清穆宗繼天開運受中居正保大定功聖智誠孝信敏恭寬毅皇帝實錄卷之三百三十五

實錄卷三三六

三

大清穆宗繼天開運受中居正保大定功聖智
誠孝信敏恭寬毅皇帝實錄卷之三百三十六

監修纂修官吏部尚書左侍郎文淵閣學士徐元善等奉勅修纂

纂修官吏部尚書左侍郎文淵閣學士徐元善等奉勅修纂

纂修官吏部尚書左侍郎文淵閣學士徐元善等奉勅修纂

纂修官吏部尚書左侍郎文淵閣學士徐元善等奉勅修纂

纂修官吏部尚書左侍郎文淵閣學士徐元善等奉勅修纂

教

同治十一年壬申秋七月癸未朔享

太廟遣禮親王世鐸恭代行禮○

上詣鍾粹宮問

慈安皇太后安長春宮問

慈禧皇太后安至壬子皆如之○奉

慈安皇太后

慈禧皇太后幸漱芳齋侍午膳○諭內閣劉嶽

昭奏特參庸劣不職各員請旨分別降革一

摺雲南試用同知車士魁行止卑污聲名狼

藉試用通判唐秉興行為卑鄙有玷官箴均

著革職永不敘用補用同知全楫霖才具平

庸難期振作著以州判降補試用通判錢萬

青居心巧滑專務營私補用府經歷沈基岳

貪鄙近利不知檢束補用府經歷縣丞蔣鑑

身家不清均著卽行革職候補州判黃琮望

舉止輕浮辦事疏忽補用府經歷陳鼎任性

妄為致滋物議均著革職留營效力以肅官

方○又諭劉嶽昭奏請將庸懦不職之武弁

分別降革等語雲南督標中軍副將署鎮雄

營參將張成貴任性驕傲不諳體制著開缺

以遊擊降補補用副將署景蒙營遊擊黃世

昌行為卑鄙不安本分著卽行革職勒令回

籍城守營守備陶勤專意取巧妄事鑽營著

革職永不敘用以肅戎行○又諭劉嶽昭等

奏官軍攻克興義府城一摺貴州興義府城

久被回匪盤踞為滇黔兩省邊患經該督撫

等派軍會剿疊有斬擒本年四月間總兵吳

奇忠等攻入外城奪據碉樓道員沈壽榕吳

德溥復會督各軍晝夜環攻該逆抵死抗拒二十五日滇軍設伏城南黔軍全隊由北奮擊賊見北門攻急奔赴抵禦滇軍卽乘虛由南門越濠架梯而入殲斃悍賊二千四百餘名生擒九百餘名當將興義府城克復勦辦尚為得手卽著督飭官軍將新城賊巢剋期攻拔以靖黔疆○諭軍機大臣等榮全奏回抵塔城籌辦各務富和奏酌覈軍餉以資要需並接濟布倫托海人眾各摺片前據總理各國事務衙門奏與俄使辯論交收伊城各事大概情形業經玉知榮全相機商辦該署將軍旋回塔城後俄人有無覆音其在塔境三工河灣等處駐紮兵隊有何動靜仍著察看情形按照總理衙門玉知各節詳慎籌辦瑪納斯為伊犁東來要地自應早籌克復以資控扼榮全現已派員馳赴沙山子等處查探情形著卽催提吉林馬隊到齊認真整頓豫籌調度景廉亦當督率張玉春等速籌進

兵機宜並隨時咨商榮全互相策應以期共維大局富和所奏布倫托海農民開墾耕種及十蘇木臺站雇覓駝馬需用銀兩暫由榮全餉下借銀四千七百餘兩並請飭部撥銀二萬兩或由何項專款動用或暫由科城那款濟急等語著戶部卽照所請籌撥應用撥款未到以前仍著榮全酌量緩急通融接濟厄魯特十蘇木人眾從前暫歸科城管轄現在富和既經到任自應仍歸塔爾巴哈台接管以符舊制著常順保英卽將未了各案件移交富和接辦此項人眾情形困苦該參贊務當加意撫綏毋令失所需用鹽糧並著查照向章奏明撥用將此由六百里各諭令知之○又諭榮全奏補償俄款事竣請飭催款項一摺據稱山西奉撥應還俄款同治九十年先後解到銀兩業已歸還該國本年再還俄鈔四萬張卽埽數全清惟現在日期已迫山西應解此項銀兩尚未接准起解來文

請飭迅速撥解等語。著鮑源深將山西奉撥本年應償俄國銀兩。按照從前奏定數目。趕緊解至烏里雅蘇台轉解應用。不得稍有遲緩。將此由五百里諭令知之。○以克復貴州興義府城。賞提督何世華總兵官李漢元。顏佑勝。一品封典。顏佑勝並賞巴圖魯名號。道員沈壽榕。吳德溥。黃馬褂。總兵官文德盛。副將李嘉谷。杜得雲。參將金仕耀。遊擊余繼祖。林志良。知府陳席珍。同知陳廷梁。知縣曾善

權。巴圖魯名號。知府劉官禮。都司羅登瀛等。花翎。通判王圖等。藍翎。餘加銜升敘有差。予陣亡遊擊楊佑祿。都司彭稱選。把總張振麟。祭葬世職加等。○甲申。以翰林院侍講許應駟。充日講起居注官。黃毓恩。署日講起居注官。○旌表守正捐軀河南鄧州民張心得妻劉氏。○丙戌。諭軍機大臣等。文彬奏拏獲著名幅匪。並擒捕餘匪情形一摺。匪犯朱小五於上年夏間。在仰化集向通朱憬堂等。結幅

聚眾擾害地方。現經清淮官軍會合各該州縣文武。盡力擒捕。先後剿除匪黨多名。並將匪首朱小五。朱憬堂。拏獲正法。辦理尚妥。著何璟。張樹聲。文彬。飭令派出各員。會同各該地方官。迅速將逸匪朱芳茂等。嚴密躡緝。務期全數弋獲。不准一名漏網。此次出力各員。著准其彙案保奏。毋許冒濫。將此諭知何璟。張樹聲。並傳諭文彬知之。○以漕運總督張樹聲。署江蘇巡撫。山東布政使文彬。仍署漕運總督。○戊子。諭軍機大臣等。據御史袁承業奏。晉省時有游勇。刦搶多未破案。刻下鄰氛未靖。恐此輩乘機騷動。為患地方。該省裁種罌粟。雖經鮑源深飭屬嚴禁。究未悉絕根株。並請將煙館一併禁革等語。游勇為害閭閻。民間私種罌粟。既妨農田。並壞風俗。均宜及時整頓。著鮑源深。按照該御史所奏。將游勇認真查拏。毋任藏匿。並禁止民間栽種罌粟。開設煙館。飭屬一律遵辦。不得視為具文。

至所稱晉省停鑄多年。懇請減鑪鼓鑄一節。該省此時能否開鑄。著該撫酌度情形。妥籌具奏。原摺著鈔給閱看。將此諭令知之。○己丑。諭軍機大臣等。左宗棠穆圖善奏收復河州城池。辦理善後事宜。肅州官軍獲勝。並甘涼防軍截勦援賊情形。邵亨豫奏疊勦竄陝零匪肅清各摺。河州土回馬占鰲馬尕大等。懇誠求撫。經左宗棠等宣布朝廷威德。責令盡繳馬械。准其投誠。一面編審戶口。將遷徙客回安輯土回各事。次第籌辦。又於安定會甯平涼隆德靜甯各屬。度地廣狹。分起安插。陝回及漢民之無歸者。並皆給以賑糧。所籌均合機宜。河州文武員弁。現已分駐任所。卽著左宗棠督飭沈玉遂等。加意拊循。俾悔過自新之人。咸知感愧。庶可日久相安。不至再生反側。其泰子寺等處要隘。並著飭令張仲春等軍。照常聯絡布置。毋稍疏懈。撤拉回目畏威求撫。並著該大臣相度機宜。一併妥為

籌辦。西甯回目馬泳幅乞降。而陝回禹得彥白彥虎等。自知稔惡。疑畏殊深。且有官軍速進。卽當竄蜀竄滇。以延殘喘之議。不可不嚴為之防。左宗棠現飭馮邦棟。一面諭令悉繳馬械。一面密飭降回截其去路。並分派各軍會師碾伯。進規大小南川老巢。所籌深協兵機。卽著督飭官兵密速勦捕。毋令他竄。肅州城堅濠深。徐占彪一軍。雖屢攻獲勝。仍當飭令穩慎進取。不得稍涉疏虞。竄陝零匪。經陝防各軍截勦。追至靖邊保安所屬。該逆竄向草地而去。邵亨豫當督飭譚仁芳等。扼要駐紮。嚴密布置。以靖疆圉。北山一路。開墾漸多。民食稍資接濟。並著該署撫督率牧令。勤求民瘼。加意撫綏。以副軫念災黎至意。將此由六百里諭令知之。○又諭景廉奏。探聞西路軍情。派兵助守古城。定安奏。遵撥隊伍。馳赴景廉軍營。文麟奏。因病請假。暫留錫綸幫辦營務各一摺。烏魯木齊回逆。復與安集延勾

結圖襲徐學功等營壘。該營官等先期拔隊出險。未為所乘。該逆等詭譎異常。旋離旋合。現既聯成一氣。狼狽為奸。並欲乘隙東犯奇古。該處防兵單薄。亟應豫為布置。以備不虞。景廉已檄派巴城綠營官兵。暨靖邊後營頭起勇丁。共計三百餘名。馳赴古城協同防守。務當飭令各營隨時偵探。設法堵禦。力遏妖氛。不得稍涉疏懈。其靖邊後營左營勇丁抵坤後。能否添撥前往。並著景廉酌度辦理。該

九

都統軍營需兵甚急。李天和所部各營。即著成祿檄令迅赴巴城。歸景廉調遣。毋稍遲延。該逆等蛋距相依。兇倭漸熾。著榮全迅即選派索倫等項官兵。會合趙興體團勇進攻瑪納斯。以分賊勢。而杜詭謀。定安現在派撥吉林黑龍江馬隊官兵一千名。大同鎮屬步隊官兵一千名。赴景廉軍營助剿。即著趕緊部署。剋期拔隊前進。迅赴戎機。文麟現因病乞假。懇留錫綸在哈。幫同辦理營務。刻下西路

軍情喫重。景廉籌辦進剿。佐理需人。錫綸未可中途久滯。姑允文麟所請。賞假一箇月調理。暫留錫綸在哈。將該處防剿事宜隨時商辦。文麟假滿後。錫綸立即起程。迅赴景廉軍營。不准再涉延宕。將此由六百里各諭令知之。○又諭恩麟德泰奏廓爾喀國王例貢屆期。援案懇免。暨達木蒙古番族被災。請撥款撫恤。各一摺。廓爾喀國王例貢屆期。懇請赴京呈進。現在陝南一帶隴回未靖。道路通塞

十一

靡常。若准其來京。致該貢使阻滯中途。徒勞跋涉。殊非柔遠之道。所有此次該國王應進貢物。著照上屆成案。免予呈進一次。以示體恤。至達木蒙古官兵。及三十九族番民。據恩麟等奏稱。於同治九十年間。疊遭大雪。人畜凍斃。遊牧之所。藏庫無款。那濟請飭川省先行撥銀三四千兩等語。達木一帶。連年被災。自應速籌賑恤。著恩麟等即於藏庫軍餉項下先行那用。派委妥員前往該處。查明被災

重輕。覈實散放。毋令一夫失所。其那用餉項若干。由恩麟等覈明。行知吳棠。迅速照數籌撥。解藏歸款。將此由五百里各諭令知之。○吏部以大學士文祥應定何殿閣請。得旨著授為體仁閣大學士。○予陝西甘泉等處陣亡遊擊李運堂都司張興泰祭葬世職。○庚寅。諭軍機大臣等。劉長佑馮子材奏官軍暫留越南。並勦辦各屬土匪各摺片。劉玉成等所部兵勇。現因越南尚未派兵接防。一時不能入關。馮子材已照該國所請。暫留鎮柳選建等營。扼紮太轄。現籌選練防軍。慎固封守。辦理尚妥。即著劉長佑馮子材照會該國。迅速派兵接防。一面飭令劉玉成等先就戍所各營認真挑汰。俟大軍入關。即於邊境各要隘妥籌布置。毋稍疏虞。思南太鎮及北流岑溪等處土匪。現經次第擒捕。巨憝殲除。該撫等仍當飭令派出各營及地方文武。迅將逸匪悉數捕獲。毋留餘孽。並將善後事宜妥為

區畫。以衛地方。此次勦匪出力各員。著准其擇尤彙案請獎。毋許冒濫。將此由四百里各諭令知之。○辛卯。

孝靜成皇后忌辰。遣官祭。

慕東陵。○以通州驗收米石完竣。予署倉場侍郎宜振議敘。○予故江西布政使龍啟瑞入祀名宦祠。從巡撫劉坤一請也。○壬辰。

孝懿仁皇后忌辰。遣官祭。

景陵。○諭軍機大臣等。前因富和奏布倫托海

農民開墾耕種及十蘇木臺站雇覓駝馬需用銀兩。請飭部撥銀二萬兩。當諭令戶部籌撥。茲據該部奏稱。新疆月餉。自同治五年奉撥起。截至本年六月止。山西欠解銀四十七萬二千兩。山東欠解銀二百二十五萬五千兩。河南欠解銀一百五十六萬一千餘兩。直隸欠解銀十萬五千兩。惟山東積欠為數最多。此次富和請餉。擬即於山東積欠新疆協餉項下提撥銀二萬兩等語。著丁寶楨迅即

如數籌撥。委員解交綏遠城。由定安轉解塔爾巴哈台。交富和收用。此項餉銀未到以前。著富和仍遵前旨。與榮全籌商。通融接濟。其山東山西河南直隸。歷年欠解新疆月餉銀兩。並著丁寶楨鮑源深錢鼎銘李鴻章陸續籌解。以後月餉。仍當源源報解。毋稍延欠。將此由五百里各諭令知之。○又諭奎昌等奏遵旨遣撤安插棍噶扎勒參營眾一摺。棍噶扎勒參現帶索倫馬步民兵三百餘名。由臺

路徑赴塔城。其厄魯特兵隊。俟將所帶喇嘛親族安插阿勒台山後。再行赴塔。業經奎昌等發給口分。雇備駝馬。於六月十三日拔營西進。惟棍噶扎勒參所部。雜湊成軍。營規未必整肅。該呼圖克圖性復喜事。尤當妥為駕馭。方能就我範圍。刻下所部索倫厄魯特官兵。全赴塔城。人數不少。富和當申明紀律。加意約束。毋令滋生事端。並著奎昌等隨時確探。妥籌兼顧。不得因該營已赴塔城。遂存膜

視。另片奏科城積欠應撥烏城官兵口糧。據常順等各商劃撥餉銀。通融採辦。懇請飭撥折支軍糧銀五萬兩等語。著照所請。即由戶部如數妥籌撥給。此項銀兩一時未能解到。准由軍餉銀內先行動支。每石口糧。照議折給銀四兩。俟軍務告竣。仍著照章辦理。將此由五百里各諭令知之。○兵部議覆原任兩江總督曾國藩續議江蘇水師章程。一。外海六營。分為三起輪流巡哨。一。內洋五營。分界

管轄。按期會哨。一。裏河五營。各按汛地巡緝。一。淞南淞北太湖左右四營。各添船三號。每號配兵十四名。一。水營所遺陸汛。分撥附近各營兼管。一。京口三營原轄之大沙洲。撥歸陸汛巡防。一。狼山鎮屬之海門營。改隸蘇松鎮管轄。一。蘇松三營陸汛原留陸兵一百名。加留四百名。千總把總外委共十員。上海留兵二百名。汛弁兩員。一。江面失事處分。即照前次會議章程覈議。一。應造船隻。分別派營

駕駛。裁撤千總八員。把總二十四員。改設外委三十四員。以符定制。一。酌定外委薪糧。一。外海六營營官衙署。各給差兵十名。一。水師提鎮兼轄陸營。例馬照舊支給。不得兼支座船。太湖右營。係以都司為營官。應給坐船二號。一。內洋五營。升拔考驗。照外海水師例辦理。裏河五營。照內河水師例辦理。一。增添橐書五十三名。書識二百八十六名。一。裏河水師各船。需用旗幟號衣等項。每年發銀製給。一。加給水師提督及蘇松狼山福山三鎮總兵官巡洋經費。橐書書識五年役滿。考職送部。一。外海內洋各船。共配礮位六百一十六尊。洋槍八百八十桿。一。各船火藥經費。在上海蘇州各局領給。一。新立各營官兵俸薪養廉等項。每年約需銀二十三萬兩有奇。不至浮於舊額。以上二十一條。均應如所奏辦理。從之。○癸巳。

上奉

慈安皇太后

慈禧皇太后幸漱芳齋。侍午膳。○甲午。

慈安皇太后聖壽節。遣官祭

太廟後殿。

奉先殿。○

上率王以下文武大臣詣

慈寧門行慶賀禮。眾官於午門外行禮。○詣鍾

粹宮

慈安皇太后前。侍早膳。○奉

慈安皇太后

慈禧皇太后幸漱芳齋。侍午膳。○旌表守正捐

軀四川安岳縣民唐自沅妻謝氏。○乙未。諭

軍機大臣等。曾璧光等奏。剿除牛角坡逸匪。

並攻拔香鑪山賊巢。殲除逆首李宰腐等。下

游一律肅清。一摺。黔省下游苗教各匪。疊次

肆擾。勢甚猖獗。經曾璧光等會同湘軍實力

攻剿。現在下游地方肅清。辦理甚為妥速。惟

苗疆甫定。營制未復。自應留兵鎮撫。以資彈

壓卽著曾壁光等酌留精兵一萬五千名分投扼紮遇有藏匿餘匪悉數捕剿以期淨絕根株毋得稍有鬆懈上游興義郡城已經何世華等攻克僅餘新城賊巢未下諒不難指日收復並著曾壁光等飭令該總兵等會合滇軍迅圖恢復毋任遲緩黔省素稱瘠苦辦理善後需用孔殷著曾壁光於協餉解到後督同司道妥籌辦理並將兵勇酌撤以節糜費將此由五百里諭知曾壁光並傳諭周達

武知之○又諭曾壁光奏請飭撥專款籌辦善後一摺黔省變亂垂二十年現在下游幸已蕩平惟土地荒蕪窮黎遍野加以收降苗眾遣散兵勇人數甚多必須妥籌安輯方能一勞永逸該省素稱瘠苦現當兵燹之後一切善後事宜若不專撥鉅款趕緊辦理誠恐數十萬眾流離失所別釀事端所關非細曾壁光請於江西釐金內提撥銀四十萬兩湖北釐金內提撥銀三十萬兩均於應協黔省

兵餉積欠項下扣抵山東福建各借撥銀二十萬兩仍由四川廣東江西湖北浙江五省每省代還山東福建兩省銀各四萬兩亦於積欠黔省兵餉項下扣抵著各該督撫於奉到諭旨後立即如數分別撥解不得稍涉遲延亦不得以現協軍餉及現辦黔捐藉詞抵卸諒該督撫等必能力顧大局竭力籌撥不誤要需也將此由五百里各諭令知之○以貴州剿除苗匪下游肅清賞提督鍾開蘭鄧

有德頭品頂帶提督鍾有思鄧日勝羅芳林吳占勝成有餘黎澤桂總兵官鄧千勝唐天佑一品封典提督龔生環胡國珍總兵官宇文秀李得貴黃馬褂總兵官邵永齡李茂華周定元黃三元李錫仁徐有耀朱連陞朱洪勝沈玉明副將葉正雄張大洪董應昌李德良道員吳自發知州曾紀鶚參將朱榮昌都司聞國興巴圖魯名號知府張觀鈞守備黃祥英等花翎縣丞張正燧等藍翎餘加銜升

敎有差予陣亡都司藍金曜祭葬世職加等

○以籌濟貴州軍餉予四川總督吳棠前任

成都將軍崇實等優敎賞貴州道員呂序程

花翎江西道員景福等加銜有差○丁酉中

元節

上詣

奉先殿

壽皇殿行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢○

上奉

慈安皇太后

慈禧皇太后幸漱芳齋侍午膳○以神靈顯應

頒山東嘉祥縣

關帝廟扁額曰宣德安流○諭軍機大臣等

左宗棠穆圖善奏涼州兵勇分勦竄回情形

一摺鎮番縣屬有大通一帶竄來陝回並南

山等處土回沿途裹脅居民肆行搶掠經在

防各軍隨處截勦餘匪向西沙窩遁去其古

浪縣屬賊匪及竄擾永昌縣屬之陝回亦經

各軍迎勦獲勝餘賊遠颺即著左宗棠穆圖

善飭令王仁和督率兵勇併力搜捕務絕根

株。穆圖善另片奏交卸省防後應否帶隊赴任。抑或移紮西安請旨遵行等語。河州撫事漸次就緒。西甯一帶劉錦棠現統各營前往相機勦撫。左宗棠自可進駐省垣。居中調度。穆圖善交卸省防原應即赴本任以重職守。第甯夏現尚安謐且有張曜所部駐紮足資鎮攝。陝西為甘軍後路糧餉所關此時南北兩路時虞零匪竄擾且新撫回眾分別安插之處均距陝界非遙非得力隊伍扼紮要隘。

王

懾以聲威不足戢犬羊反覆之性著該將軍於左宗棠進省將現辦防務分晰移交後統帶所部馬隊並挑選步隊率以東行在陝西乾邠一帶擇要扼紮妥籌防勦以副委任。穆圖善所部分布近省各要隘尚稱得力左宗棠到省後派兵接防是否足敷分布儻不敷扼紮即可將該將軍所部酌量留防著與穆圖善妥籌辦理。穆圖善應俟該大臣布置妥協後再行拔隊東進至該將軍籲懇陛見之

處著俟軍務大定再行奏請將此由五百里各諭令知之。○又諭本日據穆圖善片奏交卸省防後應否帶隊赴任抑或移紮西安已諭令該將軍督率所部馳赴乾邠一帶駐紮矣。武毅右營勇丁潰散二百餘名並有戕害營官情事是否係曹克忠所部現在已否安謐如何懲辦。穆圖善馳抵陝境自能彈壓鎮攝以杜亂萌惟此項勇丁竟敢肆行不法久留該處亦恐不能得力如該將軍所帶各隊

王

王

到齊後足敷分布即可將武毅右營及其餘隊伍酌量裁撤免滋紛擾若尚須酌留應如何布置稽束儻須遣撤應揀派何員管帶出境以免逗遛陝疆致貽後患均著體察情形迅速奏明辦理至曹克忠與穆圖善共事多年才略性情知之必悉其接統劉銘傳所部及新募各營能否整頓駕馭並著穆圖善就近詳察據實具奏將此由五百里密諭知之。○賞三等承恩公崇綺委散秩大臣。○予甘

肅永昌等處陣亡副將張忍祥都司柳國瑞
守備陳桂林把總杜文繡祭葬世職加等○
緩徵山東東平濮金鄉滋陽四州縣暨東平
所被水被雹地方新舊額賦

大清穆宗繼天開運受中居正保大定功聖智
誠孝信敏恭寬毅皇帝實錄卷之三百三十六

大清穆宗繼天開運受中居正保大定功聖智
誠孝信敏恭寬毅皇帝實錄卷之三百三十七

校修

同治十一年壬申七月戊戌諭內閣彭玉麟

英翰劉坤一奏特參長江水師庸劣員弁請
旨分別革懲一摺。江西湖口中營前哨守備
兩江補用副將黃振鼇狎妓妄為不能約束
兵丁署左哨把總儘先都司龔永勝儘先補
用副將郭松盛儘先補用都司廖發姜紹庭
嗜好太深操防怠惰均著卽行革職不准留
營前哨把總參將沈其貴聲名甚劣著卽行
革職吳城營左哨都司記名提督鄧金楚後
哨守備記名總兵尹坤山右哨千總記名總

兵黃得勝後哨千總儘先副將譚宏亮均有嗜好。鄧金楚並登岸陸居。本應卽予罷斥。姑念該員等從征多年。疊著勞績。均著先行撤任。察看。勒限改過。儻逾限不悛。卽行嚴叅懲辦。鄧金楚並著撤銷勇號。吳城營右哨把總記名總兵劉永勝署後哨外委儘先參將楊聲鳳。暴氣自甘。玩視防務。饒州營署左哨外委儘先守備洪芝蘭。署右哨外委儘先參將李天貴。不守紀律。均著卽行革職。不准留營。

安慶營前哨守備已升都司儘先副將趙俊秀。前哨守備記名總兵葛定有。均於撈取遭風船隻物件。從中漁利。實屬居心卑鄙。本應嚴懲。姑念該員等從征多年。著有勞績。且巡防尚屬認真。均著革去提督銜。以觀後效。左哨千總儘先副將彭騰芳。中哨千總副將李西田。右哨千總記名總兵萬品文。中哨把總儘先參將王南山。前哨把總儘先參將吳長松。前哨外委千總蕭光武。性耽安逸。怠惰江

防。均著革職。不准留營。署前哨千總儘先都司劉福田。形同無賴。有玷官箴。右哨外委儘先都司史芳蘭。不自檢束。任性妄為。均著卽行革職。永不敘用。左哨把總都司湯友勝。屢離汛守。肆行無忌。中哨外委都司李世富。嗜好既重。違例陸居。均著卽行革職。永不敘用。並不准改投別營效力。署華陽營遊擊左哨都司總兵李正和。於該營前哨外委儘先守備賀桂林。強買民婦。不為究處。轉加袒護。殊

干軍紀。本應嚴懲。姑念該員從征多年。著有勞績。著卽撤任。革去提督銜。總兵以副將降補。歸部銓選。不准留營。賀桂林著卽行革職。永不敘用。華陽營左哨千總副將彭致和。左哨千總記名總兵任啟耀。不知自愛。均著卽行革職。不准留營。以肅軍律。○又諭。前據德泰奏。駐藏辦事大臣恩麟。擅賞戴琫花翎。及巡閱營伍。並未親到。蒙混入奏。各節。當經降旨。令恩麟明白回奏。茲據奏稱。上年勦辦不

法總堪布班墊頓柱。因戴琿拉旺奪結帶隊奮勇。賞給翎支。當經咨明達賴喇嘛。其巡閱後三汎營伍一節。因番民苦瘠。由各番官呈請免往。從前奏報漏未聲敘。至巡捕戈什哈等酌給翎支。並未給與印照各等語。恩麟於所奏各節。雖係事出有因。究屬不合。恩麟著交部議處。卽著來京當差。尋兵部議。恩麟照不應重杖八十私罪例降三級調用。從之。○諭軍機大臣等。何璟奏已革提督擅自出外

請飭地方官嚴加管束等語。已革提督李世忠。前經降旨交地方官管束。何以任聽出外游弋。現在雖無滋事實據。難保不故態復萌。該地方官漫無覺察。深可痛恨。著何璟派員押令該革員迅回固始本籍。毋任沿途逗遛。解到後。並著錢鼎銘嚴飭該地方官隨時管束。毋任潛行出外。儻該革員再或他往。無論有無滋事。卽著就地嚴拏。治以違旨之罪。以遏亂萌。何璟等不得稍存姑息之見。該地方

官如再視為具文。任令他出。一經發覺。必將該縣嚴加處分。該管各上司亦一併嚴處。不能再邀寬典。毋謂言之不豫也。將此各諭令知之。○又諭傳諭廣東提督張曜。張曜奏官軍剿辦竄匪疊次獲勝一摺。甯夏西路地方。自本年四月初二至六月十三等日。疊有陝回竄擾。延及蒙境。經張曜派撥兵勇分路剿擊。並於阿拉善各蒙古境內斃賊多名。現在和果勒厄拉等處已無賊蹤。卽著張曜督率

沿邊各營實力防守。並勤加偵探。遇有賊匪竄近。卽行截擊。並飭提督孫全彪等於柳林湖各要隘嚴密扼守。一面兼顧蒙境。毋令賊匪竄入。甯夏各回現已歸業。該提督仍當隨時稽察彈壓。毋令滋生事端。○又諭恩麟德泰奏循例查閱後藏三汎營伍一摺。據稱布魯克巴部長來稟。欲求達賴喇嘛助給銀兩。並懇賞給僧官廉俸。且以毗連披楞隱躍其詞。意存挾制。定日聶拉木邊界。時有廓爾喀

人入境等語。江孜後藏定日三汛為哲孟雄
聶拉木隘口緊要門戶。自應加意防範。布魯
克巴部長稟求助銀賞俸。究竟是何意見。德
泰現已起程前往後藏三汛校閱營伍。著卽
將邊界情形詳細訪察。並將布魯克巴及哲
孟雄部眾設法防閑。毋滋他患。其定日聶拉
木邊界營伍。務須力求整頓。以資鎮壓。一切
辦理情形。著於巡閱事畢據實具奏。本日已
有旨將恩麟交部議處。令其來京當差。新任

駐藏大臣未到任以前。所有應辦事宜。仍著
認真經理。不得稍涉大意。將此由四百里各
諭令知之。○予四川井研等處陣亡殉難團
長曾達義等紳民婦女一百九十三名口分
別旌卹如例。○己亥。

文宗顯皇帝忌辰。遣官祭

定陵。○

上詣

奉先殿

壽皇殿行禮。○諭內閣。御史邊寶泉奏督臣呈
進瑞麥恐滋流弊。並請將永定河合龍保案
撤銷各摺片。國家愛養黎元。惟期年穀順成。
從不侈言符瑞。李鴻章前以直隸清苑縣暨
廣平府等屬呈報麥秀兩歧。據以入奏。並將
麥樣進呈。在該督雖不至意存粉飾。第恐各
該地方官藉此導諛貢媚。殊於吏治民風大
有關繫。嗣後各該督撫務當勤恤民隱。於地
方水旱情形隨時察看。力求補救。不得率以

瑞應嘉祥鋪張入告。用副朝廷惻隱在抱之
意。近聞永定河北岸隄工潰決。順天南路及
保定天津所屬州縣。均有水患。兼有被蝗之
處。著李鴻章迅速查明永定河決口及各州
縣被災情形。究竟若何據實具奏。前據李鴻
章奏保永定河合龍出力人員摺內聲稱全
河兩岸隄埝均已培補堅厚。何以又復潰決。
在工各員所司何事。著李鴻章查明叅奏。並
著該部將前次保案卽行撤銷。○調理藩院

尚書靈桂為禮部尚書。以都察院左都御史
阜保為理藩院尚書。倉場侍郎英元為都察
院左都御史。○調戶部左侍郎延煦為倉場
侍郎。刑部左侍郎志和為戶部左侍郎。管三
庫事。禮部右侍郎恩承為刑部左侍郎。盛京
兵部侍郎綿宜為禮部右侍郎。以都察院左
副都御史繼格為盛京兵部侍郎。○以鄭親
王慶至為鑲白旗漢軍都統。○以都察院左
都御史英元兼步軍統領。○以戶部右侍郎

桂清為總管內務府大臣。○以兵部尚書英
桂管理藩院事。○賞通政使司副使承繼副
都統銜為駐藏辦事大臣。○補行同治十年
大計東河年老官一員處分如例。○命貝勒
載治帶領侍衛十員往奠故禮部尚書存誠
茶酒。賞銀五百兩治喪。予祭葬。謚勤恪。庚
子。諭內閣。昨據御史邊寶泉奏稱永定河決
口情形。當降旨令李鴻章查明據實具奏。並
將在工各員查叅。撤銷前次保案。茲據李鴻

章奏稱。上月大雨時行。河水盛漲。消洩不及。
各隄多有蟄動。均經隨時搶護。惟北下汛十
七號水高過隄。大溜越隄而過。搶救不及。遂
至漫口。請將在工各員分別叅辦。並自請議
處等語。永定河隄工。前經李鴻章奏報合龍。
並稱兩岸隄埝均已培補堅厚。乃為時未久。
卽有決口之處。在工各員未能小心防護。咎
無可辭。石景山同知王茂堦著革職留任。署
北下汛宛平縣縣丞候補主簿唐照著革職

留工效力。永定河道李朝儀著革職留任。以
示懲儆。李鴻章督率無方。著交部議處。卽著
該督嚴飭在事員弁。迅將決口趕緊堵合。務
臻堅固。不得稍有草率。其全河各段隄工。並
著隨時加意保護。毋稍疏懈。尋吏部議李鴻
章應降一級留任。准其抵銷從之。○以頭等
侍衛恆訓為正白旗蒙古副都統。○以甘肅
安西等處勦辦竄匪出力。擢知縣樊建基以
知府用。賞都司金永清巴圖魯名號。佐領業

普懇等花翎。州判聶鳳年等藍翎。餘加銜升敘有差。○予陝西榆林被戕遊擊周欽輝等祭葬世職。○辛丑以神靈顯應加浙江黃巖縣

城隍神封號曰靈佑。蕭山縣靜安公封號曰綏佑。○予湖南故廣西巡撫方顯入祀鄉賢祠。從巡撫王文韶請也。○甲辰諭軍機大臣等傳諭署漕運總督文彬。文彬奏擒獲幅匪首惡正法。並擒緝餘匪一摺。幅匪朱小五等

被擒後。匪首朱方茂潛匿宿遷西南之朱家圩內。經文彬飭令總兵歐陽利見等督率兵勇前往密拏。並令投誠幅首王見勳解散黨與。覓綫協捕。擒獲朱方茂。凌遲處死。辦理尚屬妥速。惟匪黨李際平在逃未獲。亟應密速偵緝以淨根株。王見勳一犯雖據投誠究難深信。著文彬嚴飭在事各員弁會同各地方官迅緝餘匪。毋任漏網。並飭姚廣武等將王見勳嚴加約束。責令躡緝幅首李際平務獲

懲辦不得稍涉輕縱致貽後患。○福州將軍文煜陛見以閩浙總督李鶴年兼署將軍。○以江蘇宿遷拏獲幅匪賞總兵官劉鶴年提督銜。予千總蔡家孟等以守備用並賞花翎。千總姚長榮藍翎。餘加銜升敘有差。○乙巳欽奉

慈安皇太后

慈禧皇太后懿旨。皇帝大婚典禮著於本年九月十四日寅時。皇帝升太和殿遣使行冊立

禮。本日申時。皇帝詣慈寧宮行禮畢。升太和殿遣使行奉迎禮。皇后鳳輿卽於皇帝升殿遣使還宮後。由乾清宮啟行。十五日子時。皇后升鳳輿進宮後。丑時行合卺禮。十七日巳時。皇后詣慈寧宮行朝見禮。十八日辰時。皇帝詣慈寧宮行慶賀禮畢。仍於辰時。皇帝升太和殿行慶賀禮。十九日卯時。皇帝升太和殿筵宴。其慈寧宮筵宴時刻著由內傳旨屆時舉行。○諭軍機大臣等額勒和布奏遵旨

商辦調兵籌餉。採買駝隻一摺。景廉帶兵進規烏魯木齊。亟宜迅赴戎機。早圖克復。前經諭令李鴻章定安等添派勁旅籌撥餉需。辦運軍糧一切。旋據定安奏稱。派撥馬步隊二千名赴烏助剿。此項官兵若由張家口取道。未免稽遲。額勒和布擬令由綏遠所屬六臺取道察哈爾所屬之第十八臺濟斯洪果爾歸入軍臺正站。可省路程二千餘里。其軍裝等項亦由綏遠城就近辦給。較為便捷。即著定安如所議速為辦理。俾利師行。該官兵駄運軍裝等項需駝二千五百隻。暨歸綏運糧需駝一千二百五十隻。察哈爾採買維艱。並著定安即由綏遠城迅速購買。發交應用。所有製辦軍裝及採買駝隻共需銀十七萬五千兩。亟應速為籌備以應急需。著丁寶楨錢鼎銘鮑源深於各該省應解烏魯木齊餉銀內各先行籌撥銀四萬五千兩。邵亨豫於應解烏魯木齊餉銀內先行籌撥銀四萬兩。迅

即解交綏遠城歸定安支用。至口北運糧需用駝一千二百五十隻。著額勒和布於各省餉銀解到時即行設法採買。毋稍遲誤。將此由五百里各諭令知之。○丙午。諭軍機大臣等。左宗棠等奏官軍偪勒肅州踞匪並中衛一帶截擊竄匪情形各摺片。逆匪久踞肅州負隅抗拒。現經徐占彪一軍疊次偪勒。攻拔近城之塔爾灣堅巢。並埽蕩城西賊壘百餘座。擒斬著名逆目多名。勒辦甚為得手。逆匪經此懲創。兇焰稍衰。自應乘此聲威。力圖攻克。該逆前次降而復叛。現又哀詞乞撫。難保非因攻勒緊急暫為緩兵之計。左宗棠現已進紮省城。著即酌度情形妥籌調度。檄飭徐占彪督率各營迅速圍攻。並將關内外援賊隨時相機截剿。則孤城自不難力拔。陝回由涼州屬境竄出邊外。復由阿拉善旗入邊肆擾。雖經防軍擊退。惟賊蹤飄忽。去來無定。且蒙古地方亦恐被其蹂躪。著左宗棠飭令譚

拔萃。會同黃鼎所部各營。探蹤截勦。並知會張曜。派軍合力兜擊。悉數殲除。毋任紛竄。穆圖善著仍遵前旨。俟省防事宜交代清楚。再行率隊東行。並著與左宗棠會籌一切。以期共維大局。將此由六百里各諭令知之。○賞阿巴噶扎薩克頭等台吉拉爾濟勒桑都布輔國公銜。在乾清門行走。○以甘肅攻克塔爾灣等處賊壘。予提督陳萬春等優敘。賞總兵官康得勝李世勤。桂錫楨都司秦玉盛樊

振海。武朝聘。巴圖魯名號。參將張成義等花翎軍功藍明泰藍翎。餘加銜升敘。開復有差。○予貴州各屬陣亡殉難文生李煥章等紳民婦女二千三十八名口分別旌卹如例。丁未。

仁宗睿皇帝忌辰。遣官祭

昌陵。○

上詣

奉先殿

壽皇殿行禮。○以神靈顯應。加河南陳留縣朱大王封號曰靈庇。

黃大王封號曰保民。山東汶上縣

永濟神封號曰昭孚。○諭軍機大臣等。左宗

棠穆圖善奏。馬隊官兵擊勦陝回獲勝一摺。

據稱陝回奔竄平番所屬之柳川口一帶。經

副都統常明督帶馬隊追擊。斃賊四百餘名。

餘匪入山逃逸等語。此股陝回由西甯逃出。

欲赴甘涼一帶搶掠。雖經官軍中途截勦。其

竄逸之匪仍恐四處滋擾。著左宗棠等飭令

在防各軍隨時偵探。遇賊卽擊。以清餘孽。前

據左宗棠奏。崔禹等逆。盤踞大小南川。已令

劉錦堂何作霖等。由碾伯進勦。刻下該逆曾

否他竄。該大臣務當飭令劉錦堂等迅速進

兵。乘土客交訐之時。痛加勦洗。就地殲除。毋

任遠竄甘涼。致西路又被蹂躪。其西甯土回。

如果真心就撫。仍著督飭馮邦棟妥慎辦理。

毋稍苟且。將此由五百里各諭令知之。○派

工部左侍郎明善恭勸

東陵更衣殿應修工程○以正紅旗漢軍參領景瑞署察哈爾副都統○正紅旗滿洲副都統吉和署福州副都統○總管內務府大臣誠明署正紅旗滿洲副都統○戊申遣禮部尚書靈桂為正使○總管內務府大臣春佑為副使○持節詣

皇后邸行納采禮○並筵宴如例○諭內閣彭玉麟何璟黃翼升奏特參水師庸劣員弁請旨

分別革懲一摺○記名提督提標中軍副將周國興性情浮躁○攤派苛刻○著革去提督總兵○降二級留副將任以觀後效○記名提督提標蕪湖營遊擊繆福賓性情乖僻○巧於干營○尤多嗜好○著卽行撤任開缺○並革去提督總兵○以副將回籍候選○記名總兵三江營遊擊蕭復勝庸劣不職○疏失江防○著卽行撤任開缺○革去總兵以副將回籍候選○記名總兵提標大通營右哨都司李光裕不守官箴○曠職玩

公○著卽行撤任開缺○革去提督銜總兵○以副將回籍候選○記名總兵三江營左哨都司蕭東凌庸懦不職○廢弛營務○著以原品休致○記名總兵江陰營左哨都司熊濟圖器小易盈○聲名狼藉○著卽行革職永不敘用○記名總兵右哨都司楊龍光怠惰營務○著卽行開缺○革去總兵以參將回籍候選○記名總兵提標中營後哨守備龍有升○記名提督中哨守備張光德嗜好甚重○均著摘去翎頂○卽行撤任開

缺○蕪湖營前哨守備李華庭聲名狼藉○著卽行革職不准留營○記名總兵大通營前哨守備陳有陞○剛愎自用○苛刻僚屬○著卽行撤任開缺○革去提督銜總兵以副將回籍候選○裕溪營前哨守備盛忠興諸事任性○不遵營制○著摘去翎頂○記名總兵署江陰營中哨守備錢榮華縱兵擾民○怠惰江防○尤多嗜好○著卽行革職不准留營○提標中營右哨千總邵龍陞嗜好甚重○怠惰江防○著卽行革職不准留

營提標中營左哨千總丁泰順不知振作怠情江防著卽行革職不准留營蕪湖營右哨千總周東萬性圖安逸疏懈江防著卽行革職不准留營大通營右哨千總蕭心廣嗜好甚重有玷官常記名總兵左哨千總余有德記名總兵後哨千總傅子鼎嗜好甚重怠情江防以上三員均著革職不准留營並不准投別營效力提標裕溪營前哨千總瞿興友後哨千總李志儒嗜好更重怠情江防均著

卽行革職不准留營記名總兵瓜洲營右哨千總梁崇利肆意妄為玷辱官常著卽行革職永不敘用三江營左哨千總李益定嗜好甚重疏失江防著卽行革職不准留營三江營前哨千總柳德慶登岸妄為廢弛防務著卽行革職不准留營並不准投別營效力記名總兵江陰營左哨千總楚玉和記名總兵中哨千總戴廷立署右哨千總羅占儒以上三員怠情江防尤多嗜好均著卽行革職不

准留營江陰營右哨千總羅宏德怠情江防著撤任留營以觀後效提標中營左哨把總李昌俊右哨把總楊達嗜好甚重怠情江防均著卽行革職不准留營提標中營前哨把總蔡麟厚不守營規屢多妄謬著摘去翎頂蕪湖營前哨把總段藍田嗜好甚重怠情江防著卽行革職不准留營提標裕溪營前哨把總劉祥吉違例陸居著卽行革職不准留營右哨把總劉金耀苛刻兵丁著卽行撤任

開缺不准留營署提標金陵營左哨把總李長福縱兵殃民著卽行革職不准留營並不准投別營效力記名總兵瓜洲營左哨把總賴迎勝妄作妄為聲名狼藉著卽行革職永不敘用三江營左哨把總游廣泰嗜好甚重疏失江防著卽行革職不准留營三江營前哨把總夏平高登岸妄為廢弛防務著卽行革職不准留營並不准投別營效力江陰營左哨把總傅清鼇記名總兵左哨把總易姚

勝。怠惰江防。尤多嗜好。均著卽行革職。不准留營。提標中營左哨外委楊定發。右哨外委左洪勝。前哨外委高酉山。楊應龍。後哨外委譚煌業。以上五員。嗜好甚重。怠惰江防。均著卽行革職。不准留營。提標中營前哨外委譚有發。不知振作。怠惰江防。右哨外委陶啟春。違例陸居。敗壞營規。均著卽行革職。不准留營。蕪湖營左哨外委何茂德。不守營規。違例陸居。以坐船私運謀利。著卽行革職。不准留

營。大通營左哨外委易宏亮。嗜好甚重。怠惰江防。右哨外委盛萬青。嗜好甚多。指發兵餉。大壞營規。均著卽行革職。不准留營。並不准投別營效力。提標金陵營左哨外委劉桂林。浮蕩貪鄙。後哨外委余傳長。任性妄為。均著卽行革職。不准留營。並不准投別營效力。荊州營前哨外委彭昭山。逗遛蕪湖。延不歸標到任。著卽行革職。瓜洲營後哨外委嚴世源。前哨外委吳樹德。舉動任性。疏懈江防。後哨

外委黃大德。嗜好甚重。怠惰江防。以上三員。均著卽行革職。永不敘用。三江營右哨外委楊光禧。嗜好甚重。疏失江防。著卽行革職。不准留營。孟河營左哨外委劉克斌。嗜好甚重。疏懈江防。著卽行革職。不准留營。江陰營左哨外委陳邦俊。右哨外委封乾鑑。怠惰江防。尤多嗜好。均著卽行革職。不准留營。記名總兵狼山鎮標通州營遊擊楊開太。苛刻貪鄙。性情剛僻。聲名狼藉。嗜好尤重。著卽行革職。

永不敘用。狼山右營守備丁斐榮。年邁力衰。不能勝任。著以原品休致。右營右哨把總武長清。外委成大樑。深於嗜好。怠惰防務。記名總兵海門營左哨都司馬志俊。左哨把總署千總彭金魁。精力不振。嗜好更深。以上四員。均著卽行革職。不准留營。以肅軍律。○前任兵部右侍郎彭玉麟。奏請俟病體稍痊。起程入覲。仍懇恩准回籍養病。得旨。該侍郎此次查閱長江水師。認真整頓。力戒因循。實堪嘉

尚著將應辦各事料理清楚。卽行來京。陛見以慰塵繫。○己酉諭軍機大臣等。都興阿奏。股匪乘閒竊發。隨時勦辦。並請將勦捕得力之員。恩准擇保各摺片。奉天賊匪滋擾多年。邊外地方尤為奸徒遁跡之所。雖疊經奏報。拏獲多名。正法究未能淨絕根株。此次昌圖復有股匪糾聚多人。焚搶鋪戶。抗拒官兵。實屬不成事體。雖兵勇會同勦捕。殺斃甚多。而餘匪各處奔逃。難保不乘機復發。著都興阿

嚴飭各官兵暨地方文武。迅將敗匪餘匪悉行擒勦。盡數殲除。不得以目前稍就安謐。卽形鬆懈。其疊次勦匪出力員弁。著准由都興阿擇保數員。毋許冒濫。仍當責令該員弁等實力擒捕。隨時四出梭巡。淨絕盜源。以靖閭閻。而安邊圉。將此諭令知之。○改福建淡水廳儒學訓導為教諭。定學額八名。永廣二名。增設噶瑪蘭廳儒學訓導一缺。定學額五名。永廣一名。從兼署總督文煜等請也。○予湖

南軍營病故道員戈鑑。祭葬卹廕。如布政使例。並賞一品封典。○豁免湖南晃州廳被擾地方上年額賦。○庚戌諭內閣。桂清奏司員於咨部要件未經回明。率請標畫。請交部議處一摺。內務府銀庫司員。於咨行戶部請領銀兩。索內未經該堂官商定。輒加入欠撥銀兩字樣。呈請崇綸標畫先行。實屬膽大自專。郎中英綬。員外郎連廕。扎拉芬均著交吏部議處。以示懲儆。另片奏該侍郎入直時。與該

衙門堂官商議。將英綬等聯銜參奏。明善是日未經入直。春佑魁齡俱稱雖畫此稟。一時未能查出。誠明亦稱知有其事。不料崇綸聲稱是伊主意等語。崇綸何以不與該侍郎等商議。輒畫先行。明善等是否均經標畫。著崇綸春佑魁齡明善誠明據實明白回奏。○諭軍機大臣等。前因武毅右營勇丁潰散。並有戕害營官情事。當經諭知穆圖善。俟左宗棠進駐蘭州省城。卽督率得力兵勇移紮乾那

一帶並察看曹克忠能否得力。所部勇丁如何分別撤留。令該將軍悉心酌度。奏明辦理。茲據邵亨豫奏稱。曹克忠自接統銘軍後。駕馭未能得宜。時逾半年。與兵將總不決洽。該提督久患足疾。於營哨各官疏於接見。軍心已搖。訛言四起。附近居民紛紛遷徙。營弁亦多乞假。請飭李鴻章密籌辦理等語。軍營統帥全在謀勇兼施。聯絡軍心。申明紀律。曹克忠既不能約束勇丁。致令戕官潰散。是其不勝統帥之任。已可概見。近復患病。不能接見營哨各官。則其兵將離心。猜疑日積。勢所必至。此軍素稱勁旅。現在不但無益陝防。且恐激生事端。致滋後患。著李鴻章悉心籌畫。將曹克忠所部銘字一軍。應如何撤回安插。俾有用之兵不至潰散為患地方。是為至要。穆圖善於行抵乾邵後。妥為布置。俾銘軍去留得以迅速酌定。不至日久患生。邵亨豫於銘軍未撤之先。務當不動聲色。妥為調處。以弭

亂萌。該署撫原片著鈔給李鴻章。穆圖善閱看。此旨關繫軍營大局。穆圖善近在甘肅。務當飭令在營各員。不得稍有洩漏。致生他變。提督成祿被參各節。穆圖善前奏已派員前往訪查。何以日久尚未查覆。並著該將軍迅速查明據實具奏。毋再延緩。將此由五百里各密諭知之。○又諭邵亨豫奏陝省邊境漸安。墾務日闢。曹克忠奏會匪誘勇潛逃。追拏懲辦各一摺。陝省北山一帶。現在雖無賊蹤。仍應隨時嚴防。邵亨豫擬令譚仁芳統率各營。移紮北路適中之地。以資策應。著即飭令該提督將新集各營認真訓練。相機防勦。毋稍懈弛。北山開墾荒地。漸次復業。並著督飭該地方官勤求民瘼。實力撫綏。以期閭閻日有起色。據曹克忠奏會匪丁恆汰等暗誘武毅右軍右營勇丁李占標等迫脅多人開營潛逃。營官楊祺追捕被戕。旋經該提督帶隊追及。立將倡逃之李占標等擒斬。餘眾亦悉

數就獲。分別責革正法。並先後將會匪頭目丁恆汰等十餘名拏獲。駢誅地方一律安謐。等語。營官儘先副將劉玉發於兵丁被誘潛逃。事前既毫無覺察。臨時又不能彈壓。實屬咎無可辭。姑念從前打仗尚屬出力。從寬摘去頂帶。拔去花翎。仍留營差遣。如再不知愧奮。卽行從嚴叅辦。會匪溷跡各營。乘機煽惑。大為軍營地方之害。自應不動聲色。隨時豫為防範。乾州為四達之衝。時有游匪往來。著

邵亨豫督飭該地方官勤查保甲。如有形跡可疑之人。卽行查究。來歷禁止窩留。以清奸宄。並著曹克忠將所部各營加意拊循。妥為鈐束。毋任再滋事端。匪首梅金山。張大華。胡明得三犯。現已逃往甘肅。著左宗棠飭令所屬地方官嚴密查拏正法。該犯等仍恐潛回陝境。並此外有無餘匪藏匿。著邵亨豫曹克忠派員一體訪拏。毋任漏網。將此諭知左宗棠邵亨豫並傳諭曹克忠知之。○又諭前據

金順奏該將軍於六月十六日督率所部啟行西進。計期已有月餘。何以中途杳無奏報。現在已否抵抵甘涼一帶。卽著趕緊前進。俟行抵該處。卽行迅速奏聞。將此由五百里諭令知之。○予陝西乾州被戕總兵官楊祺祭葬。世職加等。○壬子。諭內閣。崇綸等奏遵旨明白回奏一摺。內務府前次奏撥戶部銀一百四十萬兩。經戶部覆奏七八月間約可共撥銀五六十萬兩。是戶部酌量動撥之款。止

有此數。卽因用款不敷。尚須添撥。亦應奏明請旨遵行。乃該司員英綬等此次出具印領文彙。意存蒙混。未經回明各堂商定。輒請崇綸標畫先行。崇綸亦不與同官商酌。遽准該司員於文尾加入下欠八十萬兩之語。實屬輕率。除英綬連廕扎拉芬。膽大自專業。經降旨交部議處外。崇綸著交部議處。春佑。魁齡。明善。誠明。不加查察。隨同標畫。亦屬疏忽。均著交部察議。尋議崇綸降二級留任。春佑等

各罰俸一年。得旨均著准其抵銷。○又諭前因御史秀文等奏。工部製造庫支領內務府款項。有捏飾蒙混情弊。當諭令該部查奏。茲據該部查明具奏。工部製造金冊應領款項。既據查無捏飾蒙混等弊。該御史所奏著無庸議。另片奏稽察內務府御史。並無兼查工部之責。請飭無庸干預等語。著都察院堂官飭令稽查內務府御史。嗣後恪遵定例。於例應稽察衙門之外。不得再有干預。如實有應查事件。亦著由內務府轉行。以免紛歧。

大清穆宗繼天開運受中居正保大定功聖智誠孝信敏恭寬毅皇帝實錄卷之三百三十七

等處撥銀十五萬兩。茲據奏稱現屆開放之

捕圍官兵津貼等銀○前經戶部指撥河南驛

站賸存項下銀一萬四千兩未能如期解到
奕榕於本年俸餉銀內借撥銀一萬三千餘
兩此項圍獵經費亟應速籌歸款著錢鼎銘
迅將指撥銀兩籌款撥解奉省由奕榕派員
領取抵放俸餉以清款目至吉林本年冬圍
經費銀一萬四千兩並著戶部豫撥專款俾
資應用將此各諭令知之○又諭張廷岳等
奏請續撥帑項一摺據稱庫倫防兵餉需山
東省應撥銀十萬兩除解過銀二萬兩外尚
未接該撫續撥咨文現在應放月餉及添換
官兵旣房等項已由商民借墊即山東餉項
全數解到尚屬不敷支放請飭部酌撥餉項
以應急需等語著戶部就近酌撥餉銀十萬
兩趕緊解赴庫倫並著丁寶楨即飭藩司迅
將欠解庫倫餉銀八萬兩速行籌撥毋再延
緩張廷岳阿爾塔什達即委員迎提俟部撥
餉銀及山東欠餉全數解到務當覈實動用
毋任浮冒將此由四百里各諭令知之○撥

神機營火藥一萬觔轟藥一千觔火繩六千
丈交庫倫委員領回備用○丁巳祭
先師孔子遣大學士文祥行禮○諭內閣榮
毓等奏查出要工請派員查勘一摺

慕陵

隆恩殿

泰陵正紅門外東邊石碑樓

昌陵明樓

純懿皇貴妃園寢寶頂現有滲漏等項情形

著派榮祿前往將應修各工敬謹查勘具奏

另片奏

泰陵

寶頂松樹被風情形並各處被風樹株開單呈

覽等語著榮祿一併查勘具奏○諭軍機大

臣等前因曹克忠接統銘軍不能聯絡兵心

申明紀律致令戕官潰散深恐猜疑日積激

生事端當經諭令李鴻章悉心籌畫撤回安

插茲據該督奏稱銘軍素極整肅經此變易

習氣頗難挽回。必得平日威望與將士素孚者接統。然後撤回安置。可漸順手。請飭在籍臬司劉盛藻赴直籌議等語。遇缺提奏按察使劉盛藻。向隨劉銘傳在營帶隊。約束嚴明。最稱得力。此時曹克忠所部銘軍兵將既不相洽。若不易人統帶。必至以百戰勁旅。悉行潰散。後患殊深。著英翰傳知劉盛藻。兼程前赴天津。聽候李鴻章面授機宜。迅行赴陝接統銘軍。妥撤回南。徐籌安置。以弭隱患。不得

稍涉遲回。致滋貽誤。穆圖善何日自甘東來。該將軍既經帶有得力兵勇。將來行抵乾州。即可毋庸留調銘軍。致滋搖惑。李鴻章摺著鈔給穆圖善閱看。將此由五百里各密諭知之。○又諭豫師奏辦理西甯撫局。並擊賊獲勝情形一摺。陝回暨米拉溝西馬營回眾。雖呈繳馬匹器械。其中尚有觀望不決。暗行出擾情事。西甯回眾所繳馬匹較多。據豫師奏稱近頗安分。仍當防其更變。未可稍涉疏虞。

現在左宗棠已派提督何作霖等分統十六營赴湟。兵力厚集。豫師當隨時會同該提督等。將反側逆回痛加勦洗。其真心悔罪者。方准投誠。斷不可一意主撫。致貽後患。此中操縱機宜。仍著咨商左宗棠妥慎籌辦。新添堡一帶。突有陝回竄擾。經黃武賢派隊追擊。餘匪敗遁回巢。仍著督飭各軍加意嚴防。毋任賊蹤紛竄。另片奏西甯專餉。已派員分赴各省坐催。在陝設立西甯運局。兌收轉解。無庸

由西征糧臺催提墊發。以免拖累等語。即著照所請行。其各省解餉按月報部事宜。仍著袁保恆照舊辦理。將此由五百里諭知豫師。並傳袁保恆知之。○戊午祭

大社。

大稷。遣醇郡王奕譞恭代行禮。○諭內閣。銘安奏職官涉訟潛逃。請飭歸案質訊一摺。欽天監五官正敦禮赴奉天呈控墳丁一案。旋經墳丁牛吟等。以敦禮霸墳認丁恃官詐財等

詞呈訴並據焦郭氏控有牽涉人命重情該員不候審明擬結輒行潛逃難保非情虛畏罪私自回京敦禮著暫行解任卽著欽天監嚴飭迅赴奉天歸案質訊以成信讞○以甘肅金塔高臺等處勦匪出力賞參將陳智和等花翎縣丞方秉鈞等藍翎餘加銜升敘開復有差○己未遣官祭昭忠祠○諭軍機大臣等景廉奏奇古官軍輕進失利咨商榮全現取瑪納斯城各摺片據稱提督張玉春因西路委員桂洪元營官沈廷秀約令進兵該提督帶隊二百餘人馳抵古牧地突有烏城逆回勾結安集延馬隊攻撲營盤眾寡不敵遂至挫失等語此次張玉春誤信委員之言不候批示冒昧輕進致損軍威實難辭咎著先行摘去頂翎責令立功自效以贖前愆儻再不遵調度貽誤戎機卽照軍法懲治委員桂洪元擅行致函張玉春調兵進勦並有不必稟明都統之語實屬膽大妄為著卽提訊

明確從嚴懲辦以肅軍令現在官軍旣為逆匪襲敗難保不乘勢東犯亟應妥籌布置備豫不虞靖邊左營現已到坤著景廉卽飭該營拔赴古城會合前敵各營聯絡聲勢嚴密防守刻下軍情緊要景廉所部兵力尚單著成祿懍遵前旨迅飭李天和統帶所部剋期馳赴巴里坤聽候景廉調遣不得藉詞延緩榮全前有規取瑪納斯之議若能設法進兵亦足牽制賊勢仍著榮全酌度機宜妥為籌辦回首馬明如果真心反正卽著景廉善為駕馭俾為我用景廉另片奏前撥西征糧臺銀十萬兩成祿截留銀四萬兩其餘銀六萬兩尚未解到等語著成祿將前項銀兩迅卽派員解赴景廉軍營以應要需毋稍遲誤將此由六百里各諭令知之○予古城陣亡都司唐漢雲守備楊春錦千總萬大富把總陸治國五品軍功沈廷秀等祭葬世職加等○庚申諭內閣左宗棠奏請將侵虧軍裝銀兩

之已革知縣發往軍臺效力贖罪等語。已革湖北候補知縣陳兆蘭侵虧軍裝銀兩至七千餘兩之多。膽敢潛逃赴陝。迨經查獲。始將虧項陸續繳齊。殊屬咎無可逭。陳兆蘭著發往軍臺效力贖罪。並永不敘用。以昭儆戒。諭軍機大臣等。瑞麟等奏傳辦緞絢各件。請飭各織造就款覈實儘辦儘解一摺。粵海關監督應辦大婚禮緞絢各件。業經諭令江甯蘇州杭州各織造勻分承辦。現在為期已迫。自應陸續辦解。以期無誤。要需瑞麟等所籌工料銀三十萬兩。已經分解應用。雖與各該織造所估銀數尚有不敷。而粵省庫款支絀。一時無從籌解。亦屬實在情形。著慶林德壽文治。即就現經籌解之款。覈實儘辦儘解。剋期到京。不得稍有延緩。將此諭知瑞麟張兆棟。並傳諭崇禮。慶林德壽文治知之。○命協辦大學士吏部尚書單懋謙為大學士。管兵部事。調工部尚書毛昶熙為吏部尚書。以

都察院左都御史李鴻藻為工部尚書。刑部右侍郎桑春榮為都察院左都御史。○調工部右侍郎錢寶廉為刑部右侍郎。以候補侍郎宜振為工部右侍郎管錢法堂事。○實授邵亨豫陝西巡撫。以候補侍郎畢道遠為倉場侍郎。辛酉。太宗文皇帝忌辰。遣官祭昭陵。○旌表守正捐軀熱河平泉州民賈禿子妻賈氏。壬戌。

上詣

奉先殿

壽皇殿行禮。○遣官祭

文昌帝君廟。○諭內閣。文煜。王凱泰。奏書吏蒙支鉅款。從嚴訊辦一摺。福建前製印票搭放兵餉。嗣經發款。陸續收回查銷。庫書林榮。膽敢將已銷之票捏作代人齎繳。重支票價。計贓至銀二萬九千餘兩之多。不法已極。卽著嚴切訊究。有無知情分贓之人。並另犯不

法情事。勒限追賠。按律治罪。如限滿贓未全完。著落該管官賠補。不准稍有短少。前署布庫大使長泰縣知縣朱寶善現任布庫大使楊渤於收回餉票。並不認真經理。致被庫書蒙支。實非尋常疏忽可比。朱寶善楊渤均著先行撤任。歸案查辦。儻有通同包庇情事。即行嚴參懲治。尋奏。訊明書吏林榮侵盜多贓。應即按律治罪。朱寶善楊渤訊無包庇情事。惟失察書吏舞弊。請照例革職。下部議從之。

○又諭。江長貴奏。校閱臺澎營伍。請將庸劣各弁分別懲處一摺。福建署艦艍營陸路守備留閩補用守備陳世恩居心貪詐。聲名平常。著即行革職。臺灣城守右軍裁缺外委劉光墀。弓馬生疏。北路中營額外陳登輝。北路右營額外黃遇雲。弓馬平庸。均著斥革。臺灣水師協標中營把總林勝標。步射無準。著開缺候補。噶瑪蘭營外委吳得舍。馬射不穩。著降為額外。○諭軍機大臣等。本日據江長貴

奏。校閱臺澎營伍情形。摺內聲稱各營將備交代。歷任不清。北路塘汛。並不照章派令實缺人員駐防。率以軍功虛銜捐職之弁。派委營伍未諳。恐誤地方等語。臺灣孤懸海外。民情浮動。彈壓巡防。在在均關緊要。若如所奏。各營塘汛。率派不諳營伍之員代防。斷難得力。殊於營政大有關係。著文煜李鶴年。飭令署臺灣鎮總兵林宜華。於各該塘汛。務須按照定章。派令實缺人員前往駐防。隨時認真

巡緝。以靖地方。其將備歷任交代。並著通飭迅速清查。毋任延宕。此外閩省各鎮營伍。如有前項情弊。著一併飭查整頓。毋稍遷就。將此各諭令知之。○以故青海扎薩克郡王烏爾津扎布子阿玉爾什第襲爵。○以都察院左都御史桑春榮為刑部尚書。吏部左侍郎胡家玉為都察院左都御史。○轉吏部右侍郎彭久餘為左侍郎。未到任前。以兵部左侍郎胡瑞瀾兼署。調工部左侍郎童華為吏部

右侍郎仍兼署兵部右侍郎。以內閣學士何廷謙為工部左侍郎。未到任前。以都察院左副都御史劉有銘署理。以鑲黃旗蒙古都統載容署正白旗蒙古都統。○癸亥。

太祖高皇帝忌辰。遣官祭。

福陵。諭軍機大臣等。本日據都興阿等奏。特參疏防餉鞘被刦各員一摺。盛京為根本重地。前因關外馬賊滋擾。疊諭都興阿等認真勦捕。以清盜源。該將軍等應如何振刷精神。

妥籌整頓。乃此次興隆甸地方被刦。距省僅數十里之遙。刦去餉銀至一萬四千餘兩之多。似此盜賊成羣。肆行刦掠。該地方各官所司何事。殊堪痛恨。著都興阿、清凱、瑞聯、恭鐸嚴飭所屬實力按捕。務絕根株。至盜賊所到處所。必有本地知情勾引及窩藏分贓之人。地方官豈竟毫無聞見。著將綿宜前奏各條趕緊籌辦。儻該將軍等視為故常。任令盜匪蔓延日久。釀成巨患。該將軍等其能當此重

咎耶。總兵張得祿帶領兵隊駐紮新民屯。近在咫尺。毫無覺察。何以該將軍等未經參奏。卽著一面具奏。一面檄飭該總兵嚴拏逸賊。毋任漏網。將此各諭令知之。○又諭。左宗棠、穆圖善奏。官軍偪攻肅州。連克賊壘一摺。徐占彪一軍攻勦肅州逆匪。疊克枯樹四壩。北崖頭各壘。卞及朱家堡堅巢。附城賊蹤一律掃蕩。辦理尚屬得手。肅州之賊。疊經懲創。自已勢孤膽落。著左宗棠等檄飭徐占彪。乘此

聲威。穩慎進取。以期力拔堅城。毋得輕率受撫。致為賊匪所給。至成祿一軍久駐高臺。尚無行期。疊據奏稱。車馬糧石均形缺乏。此軍雖難期得力。然使因糧缺譁潰。必至貽患地方。左宗棠務當飭令甘涼安肅二道妥籌接濟。不得稍存膜視。將來此軍進止。朝廷別有權衡也。將此由五百里各諭令知之。○又諭。成祿奏。營餉待用孔亟。請飭各省撥解一摺。據稱四川湖北陝西三省應解餉項。惟四川

積欠最多。現在該營軍糧等項需款甚殷。擬請四川每月解銀四萬兩。湖北每月解銀二萬兩。陝西每月解銀一萬兩。作為吉林黑龍江馬隊專餉等語。著吳棠、李瀚章、郭柏蔭、邵亨豫每月按數籌撥。解交西征糧臺轉解。以應亟需。至山東應撥地丁銀五萬兩。除已解外。尚短解銀三萬兩。並著丁寶楨迅速籌撥。解交西征糧臺。以清款目。毋稍延緩。將此各諭令知之。○以右春坊右庶子崑岡充日講

起居注官。○以甘肅朱家堡等處疊克賊壘。賞提督蕭章林、李登第、蘇洪勝副將李占雄、雷大興、張邦銀、巴圖魯名號。守備劉殿邦等花翎。李生財等藍翎。餘加銜升敘有差。○以疏防餉鞘被劫。革奉天佐領嘎力杭阿等職。仍留任。○甲子遣官祭

關帝廟。○諭內閣。丁寶楨奏營勇譁諍。請將統帶之員革職等語。記名提督山東德州營參將馮義德。候補參將楊正才等。統帶東治

營勇。丁分駐壩頭。防護大汛。馮義德因接統該營未久。與營哨官弁未能浹洽。以致勇丁譁諍出營。雖經知府馬映奎剴切曉諭。即行歸隊。尚未滋生事端。惟馮義德身當統領。馭眾無方。實屬庸懦不職。馮義德著革職留營效力。以贖前愆。楊正才充當營官。未能先事覺察。臨事又不能約束。尤難辭咎。楊正才著革職。不准留營。由丁寶楨解交原籍地方官嚴加管束。其畏罪逃逸之哨官遊擊郭友升

參將梅玉煥。守備沈俊秀。均著革職。並著丁寶楨嚴緝務獲。歸案按律懲辦。○諭軍機大臣等。本日據丁寶楨奏東治營勇丁譁諍。已明降諭旨。將參將馮義德等分別懲辦矣。馮義德既接統東治營。該營勇丁歸其管轄。何以遽爾譁諍出營。有無另有不法情事。雖據奏稱馮義德與該營情誼未浹。諸多操切。究竟該革員有何不公不法之事。難以服眾。未據詳細聲明。營官楊正才如何約束。無方以

致勇丁詳譯均著丁寶楨確切查明據實具奏。毋稍含混。將此諭令知之。尋奏遵查東治營勇丁詳譯尚無不法情事。馮義德亦無不公不法重情。惟苛細不明致啟讟侮。楊正才身充管帶。臨事未能彈壓。實屬約束無方。業經懲辦。請免置議。報聞。○乙丑諭軍機大臣等錢鼎銘奏擒獲匪首李六。地方肅清一摺。匪首李六雖經拏獲訊明。是否即行正法刻下地方雖已肅清。仍恐皖豫交界一帶伏莽未清。若不將餘匪搜捕淨盡。難保不暗中踰伏。伺隙復發。著錢鼎銘嚴飭在事各員認真搜緝。務將餘黨悉數捕獲。以消後患。並著飭令各該地方官將編查保甲各事宜實力奉行。毋稍疏懈。將此諭令知之。○以降調刑部左侍郎恩齡為都察院左副都御史。○命廣西布政使康國器來京。以前任廣東布政使文格為廣西布政使。○以河南固始擒獲匪首李六。賞總兵官崔廷桂正一品封典。道員

傳壽彤等加銜升敘有差。○丁卯上奉

慈安皇太后

慈禧皇太后幸漱芳齋侍午膳。○諭軍機大臣等定安富勒琿奏臺站經費不敷請借撥銀兩一摺。據稱歸化城土默特臺站經費前借山西銀兩將次用竣。現在僅存八百餘兩。如遇緊要差務不敷應用。援案請飭撥濟等語。著鮑源深查照成案。再由山西藩庫提借銀五千兩。專款存儲。由定安等提撥應用。此項銀兩仍俟土默特減成項下積有成數即行歸還。以清款目。將此各諭令知之。○又諭常順保英奏整理臺站情形。請飭撥餉銀以備邊費。派員經理臺務。挑練蒙古兵丁。哈薩克頭目捐助駝馬各摺片。科布多所屬臺站差使繁重。駝馬倒斃甚多。自應量加體恤。常順等擬將本年呈報駝馬倒斃數目。照向章加一成覈辦。並於軍需項下動支銀三萬兩為

整理臺站之用。均著照所議辦理。科城支應一切差務及修築城垣。接濟土爾扈特需用經費。請撥銀十萬兩。著戶部照數撥給。並於年內先解到銀五六萬兩。以應急需。常順等以科屬臺站緊要。擬照烏城章程。派委筆帖式章京等分赴各臺經理。及給發官兵口糧。均著照所請行。蒙古人眾積弱已久。常順等現擬挑選蒙古兵丁二三百名。訓練成軍。卽著隨時認真教練。俾成勁旅。藉資臂助。哈薩克頭目扣凱等捐助駝馬。尚屬急公。卽照所請賞給五六品功牌。以昭激勸。將此各諭令知之。○撥神機營洋馬槍二百桿。解赴科布多軍營備用。

大清穆宗繼天開運受中居正保大定功聖智誠孝信敏恭寬毅皇帝聖錄卷之三百三十八

大清穆宗繼天開運受中居正保大定功聖智
誠孝信敏恭寬毅皇帝實錄卷之三百三十九

監修武英殿書局纂修臣等謹將本年所修實錄卷之三百三十九目次開列於左

理部事務加七版實地加七版錄十七次

正統間高州縣管理印先修事務加七版實地加七版錄十七次

學蔭家錄上節事處周史籍總方略總纂編纂大學兵部尚書總纂大學教習學堂學堂戶部三庫事務總纂加七版實地加七版錄十七次

加七版實地錄十七次

教修

同治十一年壬申八月戊辰遣官祭黑潭

昭靈沛澤龍王之神玉泉山

惠濟慈佑靈濩龍王之神昆明湖

安佑普濟沛澤廣生龍王之神密雲縣白龍潭

潭

昭靈廣濟普澤龍王之神○遣官祭圓明園

惠濟祠

河神廟○諭內閣明善奏遵查專案工程請

派員承修一摺所有

東陵更衣殿暨端憫固倫公主園寢茶膳房等

處工程著派本年承修另案工程之大臣胡家玉延煦一併敬謹承修○又諭榮祿奏遵查專案工程請派員承修一摺所有

慕陵

隆恩殿等處各工即著本年承修另案工程之

大臣董恂崇厚一併敬謹承修另片奏查明

泰陵被風樹株情形請援案辦理暨

泰東陵

隆恩殿西邊樹株並甄石情形請歸前案一併

修砌等語均著照所議辦理○又諭前據總

司稽查

定陵工程恭親王寶鋆奏稱本年夏間雨水過

多派委前監督貴寶前往查勘嗣據該員回

京稟稱

定陵甕券門等處間有滲漏並井亭有被水衝

刷沈陷情形請飭承修大臣帶同原派監督

等赴工修理當即照所請行茲據承修大臣

阜保奏稱應修各工現已購料鳩匠迅速辦

理。惟據商人郭林呈控。郎中阿爾薩蘭有詐索賊銀。故令井亭沈陷情弊。請交刑部訊辦等語。著派桑春榮會同寶璽前往。

定陵將各工情形敬謹查勘。並將井亭究係因何沈陷。據實具奏。再降諭旨。○己巳遣禮部尚書靈桂為正使。總管內務府大臣桂清為副使。持節詣

皇后。行大徵禮。○諭軍機大臣等。邵亨豫奏。請飭劉盛藻赴陝接統銘軍等語。銘軍素稱

勁旅。前因曹克忠與該軍未能聯絡。諭令李鴻章悉心籌畫。撤回安插。業經李鴻章奏請飭在籍臬司劉盛藻赴直籌議。當諭令英翰傳知該臬司兼程赴津。聽候李鴻章面授機宜。迅行赴陝接統。頃據該撫所奏。是劉盛藻久為銘軍悅服。兵將自必相孚。惟該臬司尚當前赴天津。到陝有需時日。邵亨豫仍當隨時籌畫。妥為布置。一俟劉盛藻到後。籌商一切。奏明辦理。穆圖善現已起程。赴乾邠一帶。

駐紮。前已諭知該將軍毋庸留調銘軍。以一事權。所有一切機宜。卽著邵亨豫與李鴻章咨商妥辦。將此由四百里密諭知之。○又諭榮全富和奏查明保陞叅款。懇准留營。富和奏整頓臺站。榮全奏接閱俄國來文各摺片。保陞不能約束兵丁。以致騷擾臺站。咎有應得。據榮全等訊明臺站官兵亦實有供支遲延藉詞。躲差情事。情尚可原。保陞業經革職。著暫緩拏問。留於軍營充當苦差。以觀後效。

保陞所部參領等五員。現均摘去頂帶。分別懲辦。其滋事兵丁。仍著榮全等確切查明。從重懲治。以儆效尤。不得含糊了事。至臺站官兵支應要差。日形疲玩。積弊甚深。現當整頓臺站之時。豈可任其廢弛。富和以各臺稽壓文報。勒索賞需。請明定章程。革除惡習。均係臺站應辦之事。著卽知照各城將軍大臣等。於所屬各臺一體申明舊章。實力整頓。不得有名無實。至榮全接閱俄官來文。其意不欲

中國官兵前往伊犁。託詞以緩我師。居心實為叵測。榮全已將接濟官兵銀兩交克柯色。本等運赴伊犁分給。以安眾心。自係權宜辦法。仍著懍遵。疊次諭旨。妥慎籌辦。毋為俄人所愚。瑪納斯為伊犁東來要地。務當設法早籌收復。現在吉林官兵業經到齊。糧石可以收穫。宜及時整備隊伍。妥為調度。以期進取。英廉查探情形。若何。暨俄國續有何信。著榮全隨時酌度。相機辦理。俄國住京使臣倭良

嘎哩如有與總理各國事務衙門商議之處。已諭該王大臣隨時知照矣。將此由五百里各諭令知之。○庚午諭內閣。李鴻章奏畿境各屬被水地方。請截留漕米接濟等語。本年夏秋之交。順天等處雨水暴發。致上游各河漫溢出口。附近永定。滹沱。兩河地面。田廬禾稼。多被淹沒。小民蕩析離居。殊堪憫惻。亟應妥籌接濟。加恩著照所請。截留江北運米十萬五千八百餘石。以備各屬賑濟之用。該督

務當督飭司道遴委妥員。會同各該州縣查明被災輕重。覈實散放。仍隨時體察情形。妥為撫恤。總期實惠均霑。毋令一夫失所用。副軫念災區至意。○又諭英翰奏。特參庸劣不職各員。請旨分別降革一摺。安徽候補知府甘時化。才欠開展。難資表率。著以同知降補。調補繁昌縣知縣。何元炳。行止乖謬。候補布政司經歷杜光邦。舉動躁妄。太和縣教諭霍敬修。年力衰頹。均著即行革職。試用從九品

阮恩甲。任性妄為。聲名狼藉。著革職永不敘用。阜陽縣知縣王國均。不諳吏治。難膺民社。該員文理尚優。著以教職改補。以肅官方。○諭軍機大臣等。前因何璟奏。已革提督李世忠擅自出外。請飭嚴加管束。當經諭令何璟派員押令該革員迅回。固始本籍。並令錢鼎銘飭令該地方官隨時管束。茲據英翰奏稱。李世忠雖與叛匪李四輩子同族。彼此向有仇隙。該匪起事時。李世忠外出業經兩月。該

革員之子李顯謨一聞警信。卽赴省馳告。並將李四輩子家屬誘獲。復隨同官軍追拏餘匪。李世忠在上海得信後。卽由輪船旋皖。現已接取家屬。擬在安省地方暫住。以避物議等語。李世忠果能安分守法。朝廷自當保全。不使無地自容。茲據英翰將該革員現在情形。縷晰上陳。著准其在安徽地方居住。責成英翰隨時查察。如有不法情事。一面密速具奏。一面相機辦理。毋貽地方之害。將此各密

諭知之。○辛未。諭內閣。彭玉麟奏提督傷病未痊。請開缺回籍調理等語。長江水師關繫緊要。黃翼升自簡任提督以來。巡閱操防。是其專責。遇有庸劣不職各員。卽應隨時叅劾。以肅營伍。乃直至此次。彭玉麟巡閱各鎮。該提督始行會銜叅奏。殊屬顛預。至該提督所收外來候補人員。至二百七十餘員之多。亦屬不合。本應卽予懲處。姑念該提督從前帶兵江上。屢著戰功。從寬免其置議。長江水師

提督黃翼升。著准其開缺回籍調理。○又諭。彭玉麟奏酌籌水師事宜。請旨遵行一摺。長江水師控制數省。關繫綦重。彭玉麟所陳四條。切中時弊。深堪嘉尚。提督一缺。管轄江面五千餘里。非有智識閎遠。天資忠亮。並秉性剛方。威克厥愛。及操守清廉。敬慎畏法者。難以勝任。著統兵大臣及各直省督撫。隨時留心。自現任候補提鎮以至偏裨。其才識足任。此缺者。卽行密保。候旨簡用。其各營弁勇。有才堪造就者。並著責成各鎮將。隨時咨明提督。及沿江各督撫。留心考察。次第擢用。不使有用之才。沈淪末秩。用備干城之選。軍營以誠樸為先。水師初設。均能勤苦耐勞。所向有功。乃近來竟有修飾廚傳。講究應酬等事。種種惡習。深堪痛恨。所有各營攤派名目。著永遠禁革。儻有仍蹈故轍。私立名目者。卽照剋扣軍餉例治罪。該管督撫提鎮。徇隱不叅劾者。別經訪聞。一併治罪。以肅軍律。長江水師

經兵部議定。不得攬用別項水師人員。定章最嚴。近來該管提鎮。有意見好。濫收外來人員。一標至二百數十員之多。迨經彭玉麟查閱。且有並無其人者。營制紛雜。幾不可問。著照該侍郎所擬。提標止准酌留三四十員。各鎮標止准酌留一二十員。此外概行遣撤。僅所留各員。弁有不安本分。暨別有嗜好者。卽隨時叅革。毋得稍存姑息。各員弁用竣後。不准再行濫收。如有缺出。專於長江水師兵勇

中拔補。水師額兵出缺。卽於本地招募。藉資得力。提督總兵本屬平行。長江水師豈容歧異。卽著遵照定制辦理。遇有各總兵所屬汛地員弁缺出。卽由該管總兵揀員署理。咨明提督請補。如提督敍補非人。該管總兵亦卽咨明更正。用資整頓。而杜弊端。另片奏請停止水師肄習弓箭。以期專精一技等語。水師所用。本以使舵放礮為優劣。何得藉口演習弓箭。致開陸居之漸。著照所請。所有長江水

師及江蘇新政之外。海內洋內河水師。均著專習槍礮。毋庸兼習弓箭。該提督隨時操演。及考拔各缺。亦著照舊章辦理。經此次訓諭後。該提鎮及各該管督撫等。務當隨時訪察。遇有前項情弊。卽行從嚴叅辦。庶不至真才廢棄。陋習日深。用副朝廷。廑念東南。整飭戎行至意。將此通諭知之。○又諭。前因長江水師地段。繇長恐該將弁等日久生懈。特命前兵部侍郎彭玉麟前往沿江各營。周歷察看。

妥籌整頓。疊據該侍郎將庸劣不職各員分別叅奏。是該將弁等怠惰廢弛。積習已非一日。並稱水師各營。近亦沾染綠營習氣。講究酬應。應嚴禁攤扣名目等語。因思他省水師。並各直省陸營。此等情形。斷不能免。著通諭各督撫提鎮等。將各該省營伍。加意整理。嚴飭該將弁認真操防。力除各項陋習。儻查有庸劣不職。及徒尚虛文者。卽行隨時叅奏。不得稍事姑容。經此次訓諭後。該督撫提鎮等

務當破除情面。整肅營規。毋負朝廷諄諄誥誠至意。○調福建水師提督李成謀為長江水師提督。以直隸大名鎮總兵官彭楚漢為福建水師提督。○追予江南江西各屬陣亡殉難縣丞劉鸞鈞等紳民婦女四千五百十三員名口分別旌卹如例。○追予浙江錢塘殉難從九品章錫桂暨戚屬人等分別旌卹如例。○癸酉秋分夕

月於西郊遣鄭親王慶至行禮。○諭內閣金順

自簡放烏里雅蘇台將軍後。督帶所部由甘肅甯夏起程赴任。行至山西包頭地方駐紮。屢次有旨嚴催。徘徊不進。嗣據該將軍滙陳赴任未能迅速。自請交部議處。並請帶隊赴甘肅甘涼鎮番一帶效力前驅。朝廷格外恩施。不加譴責。俯允所請。原冀其力圖振作。稍贖前愆。迺遲至數月。始據奏稱抵甯夏。籌布鎮番防勦事宜。並無起程前往甘涼鎮番之語。且以會勦蒙地竄匪為詞。直欲安坐甯

夏郡城。遙為控制。實屬意存取巧。大負委任。金順著開烏里雅蘇台將軍之缺。交部嚴加議處。仍著迅速拔隊。剋期西進。儻再遲延。朝廷惟有執法從事。毋謂言之不豫也。懍之。尋兵部議金順應照溺職例革職。現奉旨飭令拔隊西進。請作為革職留營效力。從之。○諭軍機大臣等。金順奏馳抵甯夏。籌布鎮番防勦事宜。並派隊會勦蒙地竄匪一摺。覽奏實堪詫異。金順駐軍包頭。徘徊觀望。久未赴任。朝廷念其行役之艱。允其西征之請。已屬格外體恤。且冀其失之東隅。收之桑榆也。該將軍受此重寄。宜如何感激圖報。踴躍前驅。乃自六月中旬拔隊後。遲回兩月。始抵甯夏。又不遵旨。即赴甘涼等處扼要駐紮。輒以籌商軍糧及布置鎮番防勦為詞。意圖久駐甯夏。實屬有意遷延。大負委任。現在肅州回匪。雖經徐占彪進勦屢勝。而賊尚負隅成祿一軍出關無期。非得一支勁旅前往接濟。不能迅

奏膚公著金順卽日督率所部由甘涼鎮番一帶鼓行而西徑赴肅州到肅後卽行奏聞聽候諭旨河州撫事已定西甯等處左宗棠現已派撥勁兵相機勦撫金順率旅西行專赴肅州一帶於撫局並無妨礙至蒙地竄匪防勦事宜本係張曜專責該將軍若再分兵會勦則西進之兵轉形單薄著卽督飭程朝立等與劉宏發各營接踵前進毋再稽遲沿途軍糧卽著知照張曜代為籌畫該將軍不

得藉口糧運艱難耽延時日經此次訓誡後金順當激發天良力圖報稱毋得巧為嘗試自速愆尤將此由五百里諭令知之○以科布多參贊大臣常順署烏里雅蘇台將軍鑲黃旗漢軍副都統托倫布署科布多參贊大臣○以儘先副將徐道奎為直隸大名鎮總兵官○甲戌遣官祭賢良祠○命廣東布政使鄧廷枏來京以廣東按察使俊達為布政使河南開歸陳許道張瀛為廣東按察使○

○乙亥

世宗憲皇帝忌辰遣官祭

泰陵○以神靈顯應加江蘇上海縣

天后封號曰嘉佑

風神封號曰昭應

海神封號曰恬波湖南長沙縣曹將軍封號

曰昭應陶烜真人封號曰靈應陶淡真人封

號曰昭顯陳九龍將軍封號曰靈應○諭軍

機大臣等都興阿奏拏獲搶刦盜犯並請將

疏防刦餉之總兵議處各摺片奉天馬賊充

斥疊經諭令都興阿等嚴飭所屬認真勦捕

茲據奏稱先後拏獲盜犯一百六十七名正

法該匪等擾害地方股數甚眾雖經疊次拏

獲夥匪而著名要犯漏網尚多難保不日肆

蔓延釀成巨患著都興阿瑞聯恭鐸懍遵疊

次諭旨嚴飭帶兵員弁及地方文武將各處

首從匪徒一律搜捕淨盡務絕根株毋稍鬆

懈總兵張得祿駐紮新民屯距興隆甸甚近

於餉鞘被刦一案毫無覺察。著交部議處。都興阿前奏未經聲明附參。著一併交部議處。本年三月間有人奏金州協領書明額等匿災縱勇及牛莊防守尉果勒明阿縱賭釀盜以致連刦當行等情。當交都興阿等查奏。迄今已逾半年之久。各匪犯已否拏獲。何以尚未奏覆。殊屬玩延。著該將軍等迅速查明據實具奏。將此各諭令知之。○以記名提督周壽昌為貴州安義鎮總兵官。○追予江蘇各屬陣亡千總童宋九等一百二員祭葬世職加等。附祀提督楊鼎勳專祠。○賞普濟堂功德林。賚賑小米八百石。○戊寅諭軍機大臣等。前據景廉奏需餉孔亟。各省專協各餉未報起解。當諭令戶部查明嚴催。並再籌撥銀一二十萬兩以資接濟。茲據奏稱該都統軍餉歷年提撥各省應解之款。山東欠解銀十八萬五千兩。山西欠解銀一萬五千兩。河南欠解銀九千一百兩。又本年六月間奉旨提

撥直隸四川山東山西河南陝西湖北欠解新疆餉銀各六七萬兩。應一併嚴行催解。並擬再於山東山西河南三省積欠新疆協餉項下各提撥銀五萬兩俾資應用等語。景廉勦辦烏魯木齊逆匪。現在籌畫進兵。所有糧餉轉運各事宜需款甚鉅。必須源源接濟。方可無誤事機。著李鴻章吳棠李瀚章丁寶楨鮑源深錢鼎銘邵亨豫郭柏蔭嚴飭各該藩司將欠解景廉軍餉迅即如數撥解。並著丁寶楨鮑源深錢鼎銘將此次該部續撥之款一併迅籌均解交察哈爾都統轉解景廉軍營收用。該督撫等務當顧全大局力籌解濟。不得稍涉延宕。致誤要需。將此各諭令知之。○以故青海扎薩克貝子索諾木丕勒濟子棍楚克拉旺丹忠襲爵。○以湖南官軍勦平貴州香鑪山等處賊壘出力。賞總兵官鄧善善居一品封典。提督劉光文總兵官鄧善端副將唐家順唐自順參將劉得勝遊擊孫得勝

呂貴林。邑圖魯名號。同知唐承緒。守備濮維嘉等。花翎從九品任翊清藍翎。餘加銜升敘有差。○追予廣西各屬陣亡參將劉希賢等四十六員祭葬世職。○追予湖北各屬陣亡殉難把總曹連陞等紳民婦女五十四員名口分別旌卹如例。○己卯諭內閣。恭親王等奏纂輯勦平粵匪方略四百二十卷。勦平擒匪方略三百二十卷告成。奉表恭進一摺。勦捕粵匪始於道光三十年。至同治四年克復

江甯省城。嗣後搜捕餘孽。又歷年餘。勦捕擒匪始於咸豐元年。至同治七年在直隸地方併力殲除。計辦理軍務前後十有九年。各路軍營及內外臣工章奏紛繁。我

文宗顯皇帝神謨廣運

指示機宜

聖訓昭垂。軍民感服。迨朕御極後。稟承

慈安皇太后

慈禧皇太后懿訓。燭照無遺。同符

先烈。戡定大難。用底敷平。一切機宜。運畫允宜。垂示將來。恭親王等奉命纂辦數年來。率同在館人員陸續繕輯呈進。隨時披覽。卷帙繁多。尚為詳悉。賅備所有。大小出力各員。自應普加優獎。恭親王等摺內雖自稱不敢仰邀議敘。仍應特沛恩施。恭親王著賞加二級。並欽奉

慈禧皇太后頒發御書。訐謨辰告。扁額一方。賞給恭親王。以示優異。文祥寶璽沈桂芬李鴻

藻均著賞加二級。該提調等在軍機處行走有年。平日辦事俱屬勤慎。此次在館或總司纂輯。或分司檢校。均能奮勉出力。迅速告成。著照所請。給予獎勵。其餘謄錄供事人等。著俟陳設本全行完竣後。由恭親王等覈其在館功課及平日差使。分別等第。造冊註明。咨部獎敘。其應如何過班銓選之處。均由該部覈辦。該謄錄供事等當差勤苦。異常出力。所有從優給予分發各員。加恩照所請行。○又

諭順天府奏被水各州縣請賞給銀米賑濟一摺。本年順天所屬之宛平等州縣被水成災。小民情形困苦殊堪矜憫。加恩著照所請。除由直隸截留漕糧內撥給順天所屬六萬石外。再於京倉添撥米二萬石。並由戶部撥銀六萬兩。以資賑濟。萬青藜等卽飭該地方官等趕緊查明被災戶口。覈實散放。妥為辦理。務期實惠均霑。毋令一夫失所。用副朝廷軫念災黎至意。○以纂輯勦平粵逆擒逆方

略告成。予總纂兼提調官宗人府府丞朱學勤等加銜升敘有差。○補行同治十年大計。山東卓異官十二員。不謹官一員。罷輟官一員。年老官一員。分別議敘處分如例。○庚辰旌表守正捐軀河南固始縣民吳長隆妻胡氏。○辛巳諭軍機大臣等。劉坤一奏各省採辦工程物料。免完釐稅。流弊日滋。請旨停止。給照一摺。據稱近年來各省興辦善後工程。及造船修隄。需用木植物料等項甚多。出外

購辦之員。因有免完釐捐印照。其跟丁船戶紛紛夾帶私貨。乘機闖關。不候稽查。或借詞津貼運費。抗不完納釐稅。並有不肖委員轉為庇護。卡員亦或瞻徇情面。勉強放行。流弊日滋。請飭停止。發給印照等語。各省抽收釐捐。本為接濟軍需。若如該撫所奏。是劣員藉運官物。卽可乘便營私。彼省所節物價無多。此省所失釐捐甚鉅。似此情形。恐不獨江西一省為然。各省亦在所難免。著各直省督撫

嚴查此等情弊。卽行禁止。嗣後除地方荒歉委員採買米穀賑濟。仍准免釐稅外。其餘無論何省何營採辦一切物料。概不得發給免完釐稅印照。該委員等經過各處關卡。均著照章完納稅釐。不准請免。各卡委員亦不得徇私放行。以杜流弊。而裕餉源。將此各諭令知之。○又諭奎昌等奏請飭催山東河南撥解欠款。並飭戶部速撥銀兩等語。前因烏里雅蘇台餉需緊要。經戶部於山東河南兩省

本年地丁項下各撥銀二萬五千兩現在烏城轉運軍糧十分緊急採辦駝隻需款尤殷著丁寶楨錢鼎銘各將前撥銀兩迅速如數解往以應急需該處轉運軍糧銜接不斷尤應豫為籌備並著戶部速為籌撥銀十萬兩俾資接濟將此由五百里各諭令知之○吏部以大學士單懋謙應定何殿閣請得旨著授為文淵閣大學士○以校閱方略詳慎賞加戶部左侍郎潘祖蔭二級詹事府詹事黃鈺翰林院侍講孫詒經徐郅各一級○補鑄雲南鶴麗鎮中營遊擊劍川營都司維西協右營分防中甸守備各關防條記從總督劉嶽昭請也○撥工部火藥一萬斤轟藥五百斤鉛丸四萬出火繩一萬丈解交察哈爾轉解烏里雅蘇台備用

大清穆宗繼天開運受中居正保大定功聖智誠孝信敏恭寬毅皇帝實錄卷之三百三十九

大清穆宗繼天開運受中居正保大定功聖智
誠孝信敏恭寬毅皇帝實錄卷之三百四十

監修總裁官等日講起居注官太子太傅文淵閣領事翰林院掌院學士稽察欽奉上諭事件處方略館總裁武英殿大學士軍機大臣鑲黃旗包衣大臣等

理長事務外二座番格加七級功加五級所著加方歌紀錄十六卷 實業全史 義生以爲皇太子ノ條文讀研此事昭仁閣人掌之云云

正紅旗滿洲都統管理工部七旗上書路內大臣輔國公李鴻章一級隨帶加一級加少一級臣一等奉天縣總巡官程月清赴任呈請大吏不保輪休院奉旨

學士積案及奉上述事件處理完竣後方略館由文獻協辦大學士部尚書朱軾大臣教習所查管理戶部一庫書務國子監事務及順天府五城於下

加六級銓錄十九次臣沈桂芬奉命到總領事館接見該品頂帶禮部尚書管壇戶部一庫事務隨亦加五級一等十二次臣徐則年奉

救修

同治十一年壬申九月壬午朔

上詣鍾粹宮問

慈安皇太后安。長春宮問。

慈禧皇太后安。至辛亥皆如之。○奉

慈安皇太后

慈禧皇太后幸漱芳齋侍午膳○追予湖南故

升任巡撫張亮基布政使潘鐸於省城建立

專祠與故升任巡撫駱秉章合祀○追予湖

南故提督鄧紹良。總兵官瞿騰龍。福誠。道員。

黃冕副將尹培立參將薩保都司塔勤附祀

巡撫張亮基專祠○撫恤琉球國遭風難夷
如例○癸未以神靈顯應頒甘肅省城

雷神廟扁額曰威壯金商○諭軍機大臣等

定安奏請賞各營兵勇皮衣銀兩等語歸綏

在防兵勇。從征邊外。冬令需給皮衣。現在時

屆深秋自應趕辦籌備著照定安所請每兵

勇一名賞給皮衣銀一兩五錢以示體恤所

需款項卽著鮑源深於山西應解京餉內酌

撥銀三萬二千兩就近派員徑解歸綏糧臺

以資應用。將此各諭令知之。○又諭劉嶽昭。

岑毓英奏官軍攻克趙州蒙化廳城並大理

之上下兩關請將出力陣亡各員分別獎卹

本日已將總兵楊玉科等照所請獎卹矣。此

次楊玉科等督兵進攻趙州蒙化廳城並大

理之上下兩關。兩旬之間。克復堅城要隘。頗

為迅速。深堪嘉獎。現在逆眾麇集大理。岑毓

英擬親往督攻。自應如此辦理。卽著該撫馳

赴迤西督同楊玉科等將大理府城迅圖攻

克如有願為內應殺賊獻城者。並著岑毓英傳旨嘉獎。俟克復府城後。優予恩敘。使該民人知順逆之分。不至助賊堅守。第軍營宜有專責。庶功罪無所推諉。此番攻勦大理。即責成岑毓英辦理。不得稍存推諉之見。其省城防守事宜。即著劉嶽昭妥籌辦理。毋許稍有疏虞。順甯雲州二城。尚未攻克。該處為大理後路。若督兵進勦。克復兩城。則大理賊援已斷。迤西一帶。可冀次第削平。馬如龍向來性

情勇往。即著統帶所部。馳赴雲州一帶。力籌攻克。以專責成。岑毓英另摺奏參將被仇刺殺。現派員查辦一摺。參將梁士美跋扈驕恣。目無法紀。前經降旨令該督撫等妥為鈐束。何以此次在廟議事。忽被刺殺。恐知州承保等所稟各情。未盡確實。著即飭令何秀林等認真訪查。兇犯共有幾名。是否有人主使。奏明辦理。以杜擅殺之風。毋得稍有含混。將此由六百里諭知劉嶽昭岑毓英並傳諭馬如

龍知之。○又諭。劉嶽昭岑毓英奏餉需孔急。請飭催協餉一摺。據稱四川等省奉撥協滇餉銀。自上年六月至本年五月。僅解到銀三十九萬六千八百餘兩。欠解之數甚多。現在軍務喫緊。已復城池。辦理善後各事宜。需用浩繁。亟須鉅款源源接濟。開單懇請飭催等語。所奏自係實在情形。著瑞麟李瀚章吳崇何璟張樹聲楊昌濬劉坤一郭柏蔭王文韶張兆棟。按照該督撫所請。將每月應解滇餉

在於各該省釐金稅課有著款項。按月如數劃撥。發交該省委員。匯解赴滇應用。如原撥餉銀為數較多。未能全數籌撥。究竟能撥若干。亦宜劃定實數。一面起解。一面迅速奏聞。其不敷之數。或改撥他省有著之款。或仍飭各該省添撥足數。並著戶部覈明辦理。至四川距滇甚近。所有該省協撥餉銀。並著照劉嶽昭等所請。由川東釐金項下按月劃扣存局。交重慶轉運滇餉委員。就近催提解滇。毋

稍遲誤原單著分別鈔給閱看將此由五百里各諭令知之○陝甘總督左宗棠奏地產瑞麥瑞穀請宣付史館得旨朝廷不言祥瑞惟期年穀順成前經李鴻章奏另有旨宣示矣甘省軍務未平閭閻彫瘵所望淨埽賊氛登吾民於衽席毋得因地方官呈報稍涉矜夸勉之○以克復雲南趙州蒙化廳等城暨大理府上下兩關賞總兵官楊玉科李維述黃馬褂遊擊陳發昌都司張潤朱士雲周作祥魯國祥李維通巴圖魯名號從九品劉紫綬藍翎餘升敘有差予陣亡副將李廷標等二十四員祭葬世職加等○乙酉遣官祭都城隍之神○丙戌諭內閣彭玉麟著署理兵部右侍郎童華毋庸兼署前據彭玉麟奏懇恩於陛見後回籍養病本日召見時復再三陳請彭玉麟辦事認真深堪嘉尚刻下傷疾已痊精神亦健特令留京供職用示朝廷倚任之意該侍郎毋得固辭○又諭前因阜

保奏商人郭林呈控郎中阿爾薩蘭有詐索賄銀故令井亭沈陷等情當派桑春榮會同寶鑒前往

定陵查明具奏茲據奏稱上年井亭微有沈陷曾經郭林商允阿爾薩蘭代為修理並無詐索銀兩情事本年夏間雨水過大遂致井亭塌陷實無別故郭林自認懷疑誤控請分別辦理等語此案商人守備銜郭林郎郭鳳林於承辦井亭工程上年既有沈陷情形輒央令阿爾薩蘭代修並未親往經理迨本年井亭衝塌又復懷疑控告希圖誣過於人姑念到案卽行供明與始終狡執者有間郭林郎郭鳳林著革去守備職銜責令將應賠工程趕緊修理儻有延玩草率情事卽著承修大臣奏明從嚴懲辦郎中阿爾薩蘭於郭林應修工程因其再三商懇輒允代修雖事係因公究屬不應著交部議處理藩院尚書阜保於承修地段並未將井亭沈陷情形確切查

明。遽將郭林懷疑誤控之詞入奏。殊屬輕率。卓保著改為交部議處。並著承修各大臣率同原派之監督等常川住工。將現在應修各工認真趕辦。毋稍遲誤。尋吏部議卓保應罰俸一年。准其抵銷。從之。○諭軍機大臣等。文煜王凱泰奏籌解善後黔餉。並滙陳稅釐情形。一摺。前因貴州辦理善後事宜。諭令福建借撥銀二十萬兩。由四川廣東江西湖北浙江等省代還。茲據奏稱。閩省釐稅支絀。現已籌撥銀四萬兩。匯解赴黔。將來仍由各省解閩歸款。其餘銀兩。請卽由四川等省分籌徑解黔省等語。貴州下游肅清。辦理善後需餉孔亟。豈容稍有遲緩。著文煜李鶴年王凱泰飭令該藩司等。無論如何為難。務將未撥之十六萬兩。迅速籌撥。解赴貴州。湊足二十萬兩之數。以資應用。惟福建稅釐所入。不敷分撥。亦係實在情形。其借撥貴州銀兩。自當趕緊歸還。著瑞麟李瀚章吳棠劉坤一楊昌濬

郭柏蔭張兆棟。懍遵前旨。各撥銀四萬兩。解交福建。以清款目。卽於各該省積欠黔省兵餉項下扣抵。毋稍延緩。儻因彼此推諉。致誤要需。恐該督撫等不能當此重咎也。將此由四百里各諭令知之。○以故扎賚特扎薩克郡王阿勒坦鄂綽爾子旺喇克帕勒齋襲爵。命署兵部右侍郎彭玉麟在紫禁城騎馬。○科爾沁扎薩克圖謝圖親王巴寶多爾濟等九人烏珠穆沁扎薩克車臣親王彭蘇克那木濟勒等二人。巴林扎薩克郡王阿拉瑪斯巴咱爾等三人。蘇尼特扎薩克郡王那木濟勒旺楚克喀爾喀扎薩克貝勒錦丕勒多爾濟等十六人。喀喇沁二等塔布囊額駙那木濟勒色丹於養心門內瞻覲。○丁亥。諭軍機大臣等。喬松年奏遵議黃運兩河情形。並籌堵運河缺口各摺片。據稱山東境內黃水日益氾濫。運河日益淤塞。權衡治河之法。以就東境築隄束黃為優。擬先堵霍家橋等口。

並於南北兩岸修築長隄俾黃水全趨張秋借以濟運其張秋迤北迤南積淤之處普行挑濬修建牆壩以濟漕行等語自黃河穿運以來氾濫於山東境內非特漕運阻滯且民田亦多被害亟應妥籌辦法喬松年所奏因勢利導不為無見著丁寶楨文彬將該河督摺內所陳各節詳細酌度妥議具奏但求於事有濟不得固執己見其片內所稱或將黃水穿運各缺口分別酌堵酌留並挑濬河身修培隄工各等語該河督所奏自仍以堵霍家橋等口築隄束黃為正辦著丁寶楨等一併議奏原摺片均著鈔給閱看將此諭知丁寶楨並傳諭文彬知之○追予江蘇各屬陣亡殉難同知銜韋傳之等紳民婦女一千五百六十員名口分別旌卹如例○旌表守正捐軀江蘇溧水縣民張義生妻黃氏○撥河南司庫銀二萬兩發交開歸道備黃河工需○戊子諭軍機大臣等何璟奏江北河運漕

船全抵臨清請飭築壩以備回空一摺十年分江北河運各起漕船已於八月初間全抵臨清卽用原船徑赴通壩交兌惟八里廟一帶黃水長落不時此次各船於五月間行抵該處節節築壩蓄留陂水始克暢行無滯直達臨清將來漕船回空時仍須豫為籌畫著丁寶楨文彬嚴飭沿河各州縣俟漕船回空過境時認真築壩蓄水設法濟運俾得迅速遄歸何璟一面飭令王大經留派妥幹員弁會同東省各員速為辦理以免臨時遲誤將此諭知何璟丁寶楨並傳諭文彬知之○又諭前因鮑源深奏請將奉撥甯夏等處餉銀於江蘇等省欠解協晉款內分別劃撥當令戶部議奏茲據該部奏擬照鮑源深所請於各省協晉欠解項下令廣東劃解甯夏月餉十萬兩福建劃解甯夏滿營兵餉十萬兩江蘇劃解新疆月餉十萬兩浙江劃解哈密餉六萬兩歸德鎮兵餉二萬八千兩等語晉省

司庫入不敷出。自係實在情形。且甯夏等處需餉甚迫。所有此次劃撥各款。卽著瑞麟文煜李鶴年何璟張樹聲楊昌濬張兆棟王凱泰趕緊如數分別解往。毋得遲延推諉。其餘積欠晉餉。以及後應協晉省月餉。仍著設法源源接解。以資接濟。將此由五百里各諭令知之。○旌表守正捐軀福建光澤縣民宮花子妻李氏。○賑山西祁縣被水災民一月口糧。並蠲緩本年額賦。○巴林扎薩克貝子畢

奇那遜於養心門內瞻覲。○庚寅諭軍機大臣等瑞麟張兆棟奏瓊州府屬土匪滋事。勦辦情形一摺。據稱瓊州府匪何亞萬等糾集萬州黎匪多人。分竄定安樂會等處。焚掠經署瓊州鎮總兵劉成元帶兵進勦。斃匪多名。餘匪逃回黎洞。避匿等語。地方水旱偏災。全在該管官體察民情。妥為綏輯。此次土匪何亞萬等藉荒歉為名。突起滋事。是否地方官辦理不善。以致釀成事端。著瑞麟等確切查

明據實具奏。該匪何亞萬等聚眾已至千餘。膽敢負隅抗拒。實屬形同叛逆。若不速籌勦辦。恐致蔓延。瑞麟等務當檄飭劉成元督率官軍。迅將此股匪徒力圖撲滅。毋稍遲緩。並將首要各犯悉數擒獲。一面剴切曉諭解散。脅從以期早日歲事。瓊州地方春雨稀少。田禾被災情形。若何如有應行撫恤之處。並著妥籌辦理。將此由五百里各諭令知之。○又諭杜嘎爾奏擬擇地移紮官軍一摺。據稱邊

外現無賊蹤。濟爾嘎朗圖地方官兵駐紮日久。水草取用盡竭。現值天氣寒冷。擬於四子王旗達爾漢貝勒部落擇地駐紮等語。卽著照所擬行。惟賊蹤出沒靡常。該副都統仍當多派員弁分投遠探。遇有賊匪。卽行率隊勦擊。毋稍大意。福州哩一軍原紮賽爾烏蘇距庫倫較近。卽著咨商張廷岳等酌度地勢情形。飭令福州哩統率所部遵照。扼紮以護糧運。將此由四百里諭令知之。○癸巳以詹事

府詹事黃鈺為內閣學士兼禮部侍郎銜○

減免兩浙浦東橫浦袁浦三場歉收地方上

年竈課○甲午以

大婚冊立

皇后前期遣官告祭

天

地

太廟後殿

奉先殿○以冊封

慧妃前期遣官告祭

太廟後殿

奉先殿○諭軍機大臣等瑞聯恭鏜奏州縣勦

捕馬賊情形並抒管見一摺奉省馬賊滋擾

日肆蔓延亟應及早撲滅以免釀成巨患據

奏該省新民屯及興京之新兵堡義州之清

河門開原之法庫門岫巖之大孤山等處雖

有兵隊駐紮而頓兵一處賊仍得以乘間肆

擾瑞聯等擬於駐紮營兵中以三五十人各

為一隊遴員管帶分別段落往返巡查著都

興阿酌量情形妥籌辦理官兵分隊駐紮尤

須申明紀律責成帶兵員弁嚴加約束明定

賞罰以資得力該匪黨類固多無賴貧民而

諸色旗丁各處兵勇亦不免涸跡其中自應

一體懲辦乃竟有關礙私情不加緝究或被

獲到案任其狡展種種瞻徇情弊實堪痛恨

著該將軍府尹嚴飭所屬旗民各官認真訪

察不論何項人等但經為賊即徑行捕拏窮

治黨與如本管官袒庇不交或問官承審不

實即行分別從嚴叅辦盜賊所至必有巢穴

及零星窩藏之家近來承審人員往往止圖

速結不復深求以致窩家多未破獲嗣後除

孤村旅店僻壤農家畏其兇橫强行食宿者

照常免罪外其餘無論曾否造意有無同行

但知係賊匪而窩留分贓者即照強盜窩主

擬斬立決若並未分贓僅知情容留或受託

寄頓及代為銷售者不論人數贓數均發新

疆給官兵為奴。遇赦不赦。旗人有犯。銷除檔冊。一體實發。承緝承審之旗民各官。務須確切根究。不得仍前顛預。致有疏縱。其緝捕之人。並聞有得受月規。恭縱包庇。或句通一氣。魚肉商民。及貪圖重賄。捕得賣放者。似此通賊殃民。實屬罪不容逭。著該將軍府尹嚴查密訪。該管兵弁勇丁及各州縣書吏差役。儻有前項情弊。立即捕獲。治以軍法。毋稍徇縱。盛京為根本重地。都興阿務當破除情面。秉

公辦理。瑞聯恭鏜亦不得以州縣勦捕難期得力。稍涉推諉。該將軍府尹同受國恩。其和衷商榷。實力籌辦。以遏亂萌。原摺著鈔給都興阿閱看。將此各諭令知之。○蘇尼特扎薩克郡王托第布木等二人。阿巴噶扎薩克郡王瓦津達拉等四人。烏珠穆沁扎薩克貝勒達克丹等二人。敖漢扎薩克郡王達維多克丹等二人。浩齊特扎薩克額爾德尼郡王喇特那巴咱爾等二人。鄂爾多斯扎薩克貝子

巴達爾琥等二人。茂明安貝勒格楚克等二人。科爾沁貝勒達瑪林旺濟勒土默特貝勒散巴勒諾爾贊阿巴哈納爾扎薩克貝勒達木定扎布。翁牛特輔國公克什克阿爾畢濟呼等二人。郭爾羅斯扎薩克輔國公圖布烏勒濟圖等二人。喀爾喀扎薩克輔國公達爾瑪巴扎爾扎魯特鎮國公達瓦甯保。喀喇沁扎薩克鎮國公烏凌阿烏喇特扎薩克輔國公貢桑端魯布。克什克騰扎薩克頭等台吉

畢瑪拉吉哩第於養心門內瞻觀。○乙未寅刻。

上禮服御太和殿閱視

皇后

冊

寶遣惇親王奕諒為正使。貝勒奕劻為副使。持節奉

冊

寶詣

皇后邸冊封阿魯特氏為

皇后冊文曰朕惟運協兩儀乾健必資夫坤順
光昭四表日升更頌夫月恆觀天道之周行
實邦家之肇慶爰諏吉日用製宏章咨爾阿
魯特氏迺翰林院侍講崇綺之女也秀衍桂
林瑞徵椒殿淑身維則慎德有常著端範於
閨闈早嫺女訓肅莊容於宮壺允式母儀茲
仰承

慈安皇太后

慈禧皇太后懿旨以冊寶立爾為皇后爾其勤
儉居先雍和逮下

徽音丕嗣內治克襄夏清冬溫親

兩宮之色笑陳籩薦豆佐

九廟之馨香令望式孚蕃釐永迓欽哉○遣大

學士文祥為正使禮部尚書靈桂為副使持

節齋冊印封富察氏為

慧妃冊文曰朕惟關雎啟化必資淑德以襄

猷猷蒨成功允賴賢媛之佐理鸞章煥采象

服增榮咨爾富察氏心秉柔嘉訓嫺婉婉珩
璜表度懷謙而聿中矩規圖史垂芳性敏而
特嚴禮法茲仰承

慈安皇太后

慈禧皇太后懿旨冊封爾為慧妃爾其坤儀祇
贊揚勤儉之休風翼命新膺體雍和之順道
隆其班秩錫以絲綸欽哉○申刻

慈安皇太后

慈禧皇太后御慈寧宮升座

上禮服詣

慈寧門行禮禮成御太和殿受賀遣惇親王奕
訢為正使貝子載容為副使持節詣

皇后邸行奉迎禮作樂宣制如儀○命委散秩

大臣三等承恩公崇綺以內閣學士候補員

外郎鳳秀以四品京堂候補○丙申子刻

皇后由邸第升鳳輿鑾儀衛陳儀仗車輅鼓樂

前導由大清中門行御道至乾清宮降輿

上具禮服候於坤寧宮丑刻行合巹禮○奉

慈安皇太后

慈禧皇太后幸漱芳齋侍午膳○遣官祭

歷代帝王廟○朝鮮國王李熙遣使奉表齋

貢慶賀

大婚賞賚筵宴如例

大清穆宗繼天開運受中居正保大定功聖智
誠孝信敏恭寬毅皇帝實錄卷之三百四十

大清穆宗繼天開運受中居正保大定功聖智

誠孝信敏恭寬毅皇帝實錄卷之三百四十一

慈安皇太后

慈禧皇太后

皇太后

皇太后

皇太后

敕修

同治十一年壬申九月丁酉

上率

皇后詣

壽皇殿行禮○詣鍾粹宮

慈安皇太后前行禮長春宮

慈禧皇太后前行禮○

上御乾清宮

皇后率

慧妃以下行禮○奉

慈安皇太后

慈禧皇太后幸漱芳齋侍午膳○朝鮮國使臣朴珪壽等三人於神武門外瞻觀○戊戌

慈安皇太后

慈禧皇太后御慈寧宮升座

皇后行朝見禮盥饋醴饗如儀○己亥

慈安皇太后

慈禧皇太后御慈寧宮升座

上率王以下文武大臣詣

慈寧門行慶賀禮眾官於午門外行禮○御太

和殿受賀王以下文武大臣官員蒙古王貝

勒貝子暨朝鮮使臣等行禮禮成頒詔天下

詔曰朕惟圖開紫極坤順與乾健同功曜合

丹宸月恆與日升並著粵稽往牒備溯前型

瞻戴星軒表度於煌規戒矩弼成風化徵祥

於妣幄娥臺惟嘉德之匡襄教行壺掖斯休

和之翔被頌洽家邦朕敬紹丕基誕膺景運

茲者

慈安皇太后

慈禧皇太后特遴賢淑俾正宮廷欽遵

懿旨謹昭告

天

地

宗廟於同治十一年九月十四日冊立翰林院

侍講崇綺之女阿魯特氏為皇后同勤尊養

趨

萱殿而祝蕃釐勉嗣徽音式椒闈而敷內政慶

成嘉禮覃洽恩施所有事宜開列於後一親

王福晉以下至奉恩將軍妻室等俱加恩賜

一民公侯伯以下二品大臣以上命婦俱加

恩賜一各直省民欠錢糧由戶部酌覈奏請

蠲免一八旗綠營兵丁賞給一月錢糧一文

武會試中額俟該部臨期奏明人數請旨酌

量加廣文武鄉試由該部分別大中小省分

並滿蒙漢字號奏請加額一各直省儒學無

論府州縣衛俱於本年以正貢作恩貢次貢

作歲貢一八旗滿洲蒙古漢軍婦人年七十

以上者照例分別賞賚一內務府三旗婦人
年七十以上者照例分別賞賚一各省老婦
有孤貧殘疾無人養贍者該地方官加意撫
恤毋令失所一除十惡及謀殺故殺不赦外
犯法婦人盡予赦免於戲應地安貞帝化重
二南之始普天錫祐母儀合九有之忱欣薄
海之臚愉徧羣生而被澤布告天下咸使聞
知○

慈安皇太后

慈禧皇太后御慈寧宮

皇后率

慧妃以下行禮○

上御乾清宮

皇后率

慧妃以下行禮○

皇后御內殿

慧妃以下公主福晉命婦行禮○以神靈顯
應頒河南正陽縣

城隍廟扁額曰應德效靈○諭軍機大臣等
穆圖善奏移師入陝籌辦情形請將銘軍馬
步八營暫緩議撤邵亨豫奏甘省潰勇竄近
陝邊並續探情形撥兵迎擊穆圖善已抵涇
州各摺片據穆圖善奏楊世俊所統馬隊潰
變意圖竄入陝境現經銘軍副將潘萬才收
撫等語惟覽邵亨豫所奏潰勇下竄通渭駐
紮該處之藍旗馬隊隨同潰散兩哨駐紮直
道鎮之副白旗旋亦潰變裹脅不下二三千

人九月初五日夜間全數竄過汧陽直向東
下是該匪業已竄入陝境是否潘萬才收撫
之外另有東竄匪股著穆圖善邵亨豫曹克
忠確切查明將已撫各勇妥籌安置其東竄
之匪迅速派隊截剿毋任滋蔓聞西甯撫事
現又變更句引陝回抗拒官軍河州回眾亦
有蠢動情形儻該降眾再有反覆則是前功
盡棄大局殊屬可虞左宗棠進省以後自己
熟籌布置現在西甯回匪既不就撫自當督

飭官軍實力勦辦迅速殲除其河州降眾仍當隨時察看密為防範以免他虞此時甘省防勦正當緊要穆圖善所部駐紮北山之馬隊六起步隊四營尚資得力未便遽行撤動著該將軍飭令仍紮原處妥為防勦左宗棠一面揀派勁旅前往接防僅左宗棠所派之隊未到或到後布置尚未周妥穆圖善遽將此軍撤赴陝境致有疏虞惟穆圖善是問甘省轄地綿長需兵較多現在大局未穩全在羣策羣力共濟艱難左宗棠務當和衷虛己聯絡眾心以期維持全局迅奏膚公金順著仍遵前旨迅由甘涼一帶馳抵肅州卽行具奏並將後路甘涼鎮番一帶妥籌布置與各軍互相聯絡不准再涉遷延亦不得稍分畛域穆圖善請將總兵丁汝昌副將潘萬才所帶銘軍馬步八營暫緩遣撤等語著邵亨豫俟劉盛藻到後妥商辦理將此由六百里諭知左宗棠穆圖善金順邵亨豫並傳諭曹克

忠知之○賞奉迎

皇后鳳輿王大臣暨執事章京司員等加級紀錄有差○賞請轎校尉暨執事護軍等銀○

庚子

上率

皇后暨

慧妃以下詣

慈宣宮奉迎

慈安皇太后

慈禧皇太后升座進酒行禮○

慈安皇太后

慈禧皇太后賜

上暨

皇后

慧妃以下宴○

上御太和殿賜

皇后親屬暨王以下文武大臣蒙古王貝勒貝

子朝鮮使臣等宴○欽奉

慈安皇太后

慈禧皇太后懿旨。皇帝寅紹丕基。於今十有一載。親賢夾輔。共濟時艱。茲當大婚禮成。自應特沛恩施。用彰勞勩。其近支王公勳舊後裔。亦宜一體施恩。以光慶典。惇親王著加恩在紫禁城內坐四人轎。無庸進領侍衛內大臣班。並免帶豹尾槍差使。伊子載濂著封奉恩輔國公。恭親王輔政多年。勳勞懋著。前於咸豐十一年十月間。命以親王世襲罔替。因該

親王再三懇辭。允俟親政之年。再行辦理。現在皇帝大婚禮成。親政伊邇。著卽加恩。以親王世襲罔替。醇郡王著晉封親王。伊子載瀅著賞給頭品頂帶。孚郡王著賞加親王銜。惠郡王奕詳著賞加親王銜。郡王銜貝勒載治著賞食郡王俸。奉恩鎮國公奕謨著賞加貝子銜。禮親王世鐸。睿親王德長。肅親王隆勲。均著賞穿四團正龍補服。鄭親王慶至。豫親王本格。怡親王載敦。克勤郡王晉祺。順承郡

王慶恩。均著賞戴三眼花翎。莊親王奕仁之子載勛。著賞給委散秩大臣。御前大臣上學習行走。貝勒奕劻。著賞加郡王銜。補授御前大臣。貝勒載漪。載澂。載瀾。均著賞食貝勒全俸。貝子載容。著賞加貝勒銜。奉恩鎮國公奕湘。奕梁。均著賞加貝子銜。定郡王溥煦。貝勒奕綱。貝子綿勳。奉恩鎮國公載綱。載遷。溥芸。溥楹。榮毓。桂豐。奉恩輔國公載岱。榮頤。續銘。載燦。裕恪。載帛。純堪。端秀。均著賞加二級御

前大臣。伯彥訥謨祜之子貝勒那爾蘇。著加恩。在御前行走。景壽之子志勳。著加恩。賞給六部員外郎。俟及歲時。分部行走。軍機大臣大學士文祥。著在紫禁城內乘坐二人肩輿。太子少保銜尚書寶鋆。著賞加太子太保銜。尚書沈桂芬。李鴻藻。均著賞加太子少保銜。以示行慶推恩之至意。○以直隸永定河漫口合龍。開復總督李鴻章。道員李朝儀等處分賞。同知吳廷斌等花翎。餘升敘有差。○辛

丑。欽奉

慈安皇太后

慈禧皇太后懿旨。前因皇帝冲齡踐阼。時事多艱。諸王大臣等不能無所稟承。姑允廷臣垂簾之請。權宜辦理。並諭俟皇帝典學有成。卽行歸政。十一年來。夕惕朝乾。未敢稍涉懈弛。皇帝緝熙典學。日就月將。當春秋鼎盛之時。正宜親總萬幾。與中外臣工共求治理。宏濟艱難。以仰副

文宗顯皇帝付託之重。著欽天監於明年正月內選擇吉期。舉行皇帝親政典禮。一切應行事宜。及應復舊制之處。著軍機大臣大學士會同六部九卿敬謹妥議具奏。○又奉懿旨。本日已降旨令欽天監於明年正月內擇吉舉行皇帝親政典禮。因念

壇

廟大祀。典則崇隆。皇帝尤應躬親致祭。以嚴對越。而昭敬誠。著自本年冬至大祀

圓丘為始。皇帝親詣行禮。所有一切應辦事宜。著各該衙門敬謹豫備。○又奉

懿旨。皇帝大婚禮成。昨已加恩。惇親王等以光慶典。所有內廷行走及執事諸臣。亦應一體加以獎勵。弘德殿行走侍郎徐桐桂清廣壽均著賞給頭品頂帶。詹事府右春坊右庶子林天齡著遇有應升之缺。開列在前。前任內閣學士翁同龢著賞給頭品頂帶。上書房行走侍郎黃偉童華國子監祭酒章鋆均著賞

加一級。南書房行走侍郎潘祖蔭著賞給頭品頂帶。內閣學士黃鈺著賞加二級。翰林院侍講孫詒經徐郃均著遇有應升之缺。開列在前。禮部工部堂官均著賞加二級。總管內務府大臣崇綸之子候選郎中壽昌著以四品京堂候補。春佑之子頭等侍衛謙德著賞加副都統銜。二等侍衛謙光著賞給頭等侍衛。明善著賞加太子少保銜。魁齡著賞加三級。誠明著賞戴花翎。前任總管內務府大臣

大學士瑞常之子郎中文暉著以五品京堂候補尚書存誠之子員外郎明厚著以六部郎中用武備院卿師曾奉宸院卿毓清均著賞加總管內務府大臣銜師曾之子候補郎中文鑑著以郎中郎補毓清之子候補員外郎麟雯著以員外郎郎補粵海關監督崇禮著賞加總管內務府大臣銜並賞加二級步軍統領英元左翼總兵榮祿署右翼總兵成林均著賞加二級其修理街道等差各兵丁

由戶部撥銀一萬兩著英元等分別賞給以示體恤○又奉

懿旨茲當大婚禮成所有蒙古王貝勒貝子公呼圖克圖等亦應一體施恩以光慶典科爾沁郡王濟克默特朗布著賞加親王銜烏珠穆沁親王彭蘇克那木濟勒之子公堆代扎布著賞加貝子銜喀爾喀親王達爾瑪著賞換黃纁喀喇沁郡王旺都特那本濟勒敖漢郡王達維多克丹巴林郡王阿拉瑪斯巴咱

爾均著賞用紫纁土默特貝勒散巴勒諾爾贊著賞換雙眼花翎喀喇沁貝勒德木齊扎布科爾沁貝子阿敏烏爾圖均著在紫禁城內騎馬土爾扈特汗布彥烏勒哲依圖敖漢貝子達克沁均著挑在御前行走喀爾喀貝勒錦丕勒多爾濟著賞還三眼花翎科爾沁公棍楚克林沁著賞加貝子銜洞闊爾呼圖克圖著在紫禁城內騎馬以示行慶推恩至意○諭軍機大臣等曹克忠奏甘省潰勇現

已悉數收撫一摺據稱潰勇由隴州繞越汧陽之草碧鎮勢極剽疾經該提督派令各營分路堵遏自率親兵從扶風岐山大道迎擊先後於鳳翔麟遊各縣境收降潰勇七百餘名全數撫定解回乾州軍營甘省被擄難民隨時解散鳳翔地方照常安堵等語此項潰勇皆係久經行陣何以忽思變計曹克忠既已撫定務當妥為鈐束毋令故智復萌又貽後患至邵亨豫前奏裏脅不下二三千人此

次曹克忠則稱收降七百餘名。全數撫定。是否收撫之外。另有東竄匪股。抑裹脅之眾。悉已解散。著穆圖善邵亨豫曹克忠。恪遵前旨。確切查明。據實具奏。河州回眾現在情形。若何。左宗棠務當密為防範。毋令降眾再有反覆。致隳前功。楊世俊所部馬隊。因何潰走。該參將有無激變情事。並著該督確查具奏。毋稍徇飾。將此由五百里諭知左宗棠。穆圖善邵亨豫。並傳諭曹克忠知之。○又諭景廉奏。

回目遞稟投誠。設法籌辦一摺。回目馬明等遞稟投誠。據稱權與安集延說和。以待外援。懇請發兵馳救。其言雖未可深信。亦應設法羈縻。景廉擬俟該回將家屬送至濟木薩。卽檄調徐學功等營赴古牧地幫同馬明駐守。藉作官軍屏蔽。自是權宜辦法。仍著景廉隨時體察情形。相機籌辦。毋為該回所給。俄人占踞伊犁。後復差人時至晶河一帶。要挾該處戶民。希圖收為彼用。近又有東取瑪納斯。

之說。若不先發制人。迅將烏魯木齊規復。則俄人得步進步。後患何堪設想。景廉兵力單薄。未能剋期進取。成祿奉命出關。為日已久。既不統兵西進。又不將景廉所調吉林黑龍江馬隊及李天和所部飭令西行。觀望徘徊。擁兵自衛。實屬貽誤機宜。著卽懍遵諭旨。先將所部吉林黑龍江馬隊及李天和營勇檄赴景廉軍營。以厚兵力。不許藉詞延宕。並將吉林黑龍江馬隊及李天和營勇先後拔隊。日期迅速奏聞。景廉當一面籌畫進兵。為規復烏垣之計。伊犁情形如此。俄人叵測如此。左宗棠當顧全大局。將出關馬步各隊糧餉。隨時源源籌濟。並嚴飭經過地方官妥為照料。俾利師行。毋得稍分畛域。至安敦玉地方。關繫軍行後路。必須有兵填紮。方免空虛。曹克忠現紮陝境。徐占彪在肅州攻勦。正當喫緊。未必有兵可撥。該處係左宗棠轄境。應如何撥兵前往駐紮之處。著該大臣妥為調度。

務臻周密。景廉另片奏擬在察哈爾設立轉運糧臺。請派徐樹銘督辦等語。景廉在察哈爾設立糧臺。一切督催轉運事宜。卽著額勒和布景瑞派員經理。以專責成。所請令徐樹銘前往督辦之處。著毋庸議。又另片奏請撥天津洋槍等語。已諭令李鴻章照數採買。卽著景廉派員赴直領取。以資應用。將此由六百里各諭令知之。○又諭前因文麟等奏安西沙州靖逆各營兵餉缺乏。當諭烏里雅蘇

台將軍等於新疆協餉內撥銀二萬兩接濟。茲據文麟錫綸奏前項餉銀僅由該城將軍等於哈密應分直隸餉銀內撥銀二千兩。景廉文麟等各於軍餉內措借銀八百兩。前後共借墊銀三千六百兩。現在各該營軍餉甚急。請飭奎昌等遵照前旨。仍由新疆項下撥銀二萬兩等語。安西等營餉需久已支絀。哈密現又無款可撥。自應速籌接濟。著奎昌常順多布沁扎木楚志剛。仍遵前旨。由新疆項

下趕緊籌撥銀二萬兩。由文麟等派委委員領解赴哈分撥各營。以濟要需。將此由五百里各諭令知之。○撥直隸天津洋槍三百桿。交烏魯木齊都統景廉委員領回備用。○撥火器營火箭一千五百枝。工部火藥二萬斤。火繩四百盤。解赴察哈爾轉交哈密軍營備用。○乙巳。

上率

皇后奉迎

慈安皇太后

慈禧皇太后幸坤寧宮進福祚。○詣鍾粹宮

慈安皇太后前行禮。長春宮

慈禧皇太后前行禮。○

上御養心殿

皇后率

慧妃以下行禮。○奉

慈安皇太后

慈禧皇太后幸漱芳齋侍午膳。○諭軍機大臣

等前因曹克忠接統劉銘傳軍。未能聯絡。當諭令英翰傳知在籍臬司劉盛藻。速赴天津。聽候李鴻章面授機宜。卽行赴陝接統。旋據英翰奏稱該臬司已定於八月二十五日起程北上。現在行抵何處。著英翰沿途行催。飭令迅速趲行。毋稍延緩。陝省防務緊要。銘軍素稱勁旅。統帶需人。劉盛藻一抵天津。李鴻章卽指示一切防勦事宜。飭令該臬司剋期赴陝。以資得力。並將抵津及起程日期先行具奏。將此由五百里各諭令知之。○又諭金順奏拔隊前赴肅州。暨鎮番勦賊獲勝各摺。片。金順現已遵旨。於本月十五日起。陸續拔隊西行。由甘涼徑向肅州。刻下肅州一帶賊勢蔓延。僅有徐占彪一軍在彼勦辦。成祿株守高臺。督率無方。所部未能得力。著該將軍剋期督隊西進。迅赴事機。毋稍延宕。抵肅州後。仍遵前旨。卽行奏聞。金順所部軍糧。自應豫為籌備。以免缺乏。該將軍已派員前往甘

涼就地採辦。著左宗棠通飭甘涼所屬地方官。會同金順委員將糧石寬為購辦。以資飽騰。不得稍分畛域。甯夏及鎮番等處防勦事宜。卽著責成張曜悉心經理。其應如何派撥隊伍。以顧金順運道之處。著彼此商酌妥辦。務臻周密。至甘涼一帶。時有賊匪竄擾。未可稍涉疏虞。仍著金順遵照本月十八日諭旨。妥籌布置。以顧後路。將此由五百里諭知左宗棠。金順並傳諭張曜知之。○貴州巡撫曾

上率

皇后奉迎

慈安皇太后

慈禧皇太后幸坤寧宮進福胙○奉

慈安皇太后

慈禧皇太后幸漱芳齋侍午膳○諭內閣彭玉麟奏傷疾未痊懇請開缺回籍一摺侍郎彭玉麟平日辦事認真勤勞夙著前於陛見時令其署理兵部右侍郎以資倚任茲據該侍郎奏稱帶兵江上十有餘年傷疾未痊仍懇回籍調理覽其情詞懇摯姑允所請彭玉麟著開署兵部右侍郎缺回籍調理新授長江水師提督李成謀初膺重任一切情形未能

盡悉著該侍郎順道馳赴長江一帶督同李成謀布置周妥再行回籍嗣後每年著巡閱一次遇有應行參劾及變通之處准其專摺具奏應需辦公經費著兩江湖廣各總督籌款奏明交該侍郎支領以副朝廷慎重江防之意○諭軍機大臣等邵亨豫奏收撫潰勇陝境安謐情形一摺據稱潰勇竄過汧陽之草碧鎮經律武各營追擊獲勝並經銘軍馬步由扶風一帶進剿先後在岐山鳳翔麟遊

境內收撫潰勇八百餘人裹脅難民概行解散陝境一律安靖與曹克忠前奏大略相同此項潰勇雖經收撫難保無漏網餘黨潛匿陝境著邵亨豫飭令在防各營認真按捕務絕根株仍知會曹克忠將收撫各勇妥籌安插毋任再滋事端將此諭令知之○丁未以吏部右侍郎童華兼署兵部右侍郎○命翰林院編修韋業祥提督貴州學政○追予江蘇常熟陣亡守備張勝貴等祭葬世職加等

○戊申

孝慈高皇后忌辰遣官祭

福陵○己酉諭軍機大臣等李鴻章奏臬司劉盛藻到津飭卹期赴陝接統銘軍一摺駐陝銘軍本令劉盛藻接統妥撤回南現在甘省撫局未定戰事方殷李鴻章因邵亨豫函商請暫留銘軍駐防陝境係為大局起見著卽飭令劉盛藻統帶親軍兩營剋日赴陝接統銘軍認真整頓務令盡復舊規遇有防剿

事宜。卽著邵亨豫妥籌布置。曹克忠著俟劉盛藻到營後。交替清楚。將另募親兵。妥慎遣撤。再行離營。曹克忠交替後。所有該營各事宜。均由邵亨豫代為陳奏。以期迅速。銘軍旣緩裁撤。邠乾附近。足資控制。穆圖善所統馬步各隊。向在甘肅勦賊護運。頗著戰功。若移紮固原平涼一帶。庶得力兵勇。不至聚處一隅。而於甘省聲援。尤為切近。更足備豫不虞。著穆圖善與邵亨豫斟酌情形。妥籌辦理。將

此由五百里各諭令知之。○又諭成祿奏統帶前隊出關一摺。成祿現拔隊行抵金塔。擬卽親統前隊先行出關。前有旨令金順馳赴肅州。業據奏報起程。不日當可抵肅。著成祿卽將所部各隊。妥為整頓。暫行駐紮。俟金順到時。聽候諭旨。成祿所部兵勇。轉運糧餉。最關緊要。左宗棠務當顧全大局。檄飭蕭宗幹等悉心照料。寬為應付。不得稍分畛域。聞肅回乞援西甯匪黨。賊勢尚張。徐占彪近日攻

勦情形若何。該處確實軍情。著左宗棠隨時查察。飭令徐占彪穩慎進勦。毋為回眾所紿。成祿另片奏。嗣後奏報。請改由草地行走等語。亦著聽候諭旨辦理。將此由五百里各諭令知之。○又諭前據金順奏起程赴肅。當諭令剋期西進。迅赴戎機。茲據成祿奏稱。已於八月十二日。督帶親兵二營及小馬隊行抵金塔。擬添調胡飛鵬王正川二營。於二十一日先統出關。俟抵玉門暫駐。以待後隊。現在

北崖頭尚留一營。臨水尚留二營。高臺尚留一營。均交副都統明春管帶。俟車馬齊全。再行拔隊。刻下肅逆又向西甯糾合黨類。助力拒守等語。本日已諭令該提督將各隊整頓。暫行駐紮。聽候諭旨。肅州事機緊要。著金順仍遵前旨。迅速拔隊。馳赴肅州。所有成祿統帶各營。悉交金順接統。覈實簡練。分別遣留。俟行抵肅州一帶。卽將此旨宣示。一面將抵肅日期速行具奏。將此由五百里密諭知之。

○追予浙江各屬陣亡殉難紳民葛啟玲等暨婦女三百十六名口分別旌卹如例○

上以孟冬時享

太廟自是日始齋戒三日○庚戌

孝敬憲皇后忌辰遣官祭

泰陵○諭軍機大臣等榮全奏籌辦各務撥兵布置酌定官兵口分請飭部豫撥經費並劃分新疆月餉遺失軍火請飭查究各摺片據稱伊犁俄人現無動靜塔城俄兵亦已退回

該國界內惟察罕鄂博附近有俄營駐紮盤詰東來官兵並有俄人往來沙山子窺伺及駐隊晶河等語目下俄人雖未遽行深入而久踞伊城心懷叵測必須先事防範豫杜詭謀榮全擬將伊犁來營人眾酌量留營以期積久成軍並令筆帖式瑞福駐紮博勒塔拉偵探情形招撫纏頭漢回所籌尚妥著榮全隨時酌度辦理聯絡人心藉資臂助瑪納斯回人到沙山子納款既稱情願投誠繼又稱

不敢投出情詞真偽殊未可定榮全現派英廉訥蘇肯等管帶馬隊二百五十名前赴庫爾喀喇烏蘇一帶屯紮該處為晶河瑪納斯兩處居中要地官軍駐紮自得控制之勢惟兵力尚嫌單薄該處民團既可就近招募較之徵調客兵尤為便捷著榮全飭令酌募精壯勇丁若干名訓練成軍協同防守塔城留兵無多榮全前赴伊犁尤不能不以兵威鎮懾遠道徵調不易應否在塔爾巴哈台及附

近各城先行招募蒙漢壯丁實力操練以資得力之處著榮全富和托倫布保英等會籌辦理塔城境內應設卡倫著富和按照定界迅籌設復以免俄人侵占榮全所奏酌定官兵口分即照所請支放應需月餉銀一萬三千兩請由神機營每按三箇月批解一次並由神機營報銷之處著該營妥籌辦理其請飭另撥經費銀三十萬兩著戶部酌度情形或於部庫撥給或於各省指撥實在有著之

款解至科布多交納。以便榮全陸續提用。又所請將直隸山東山西河南等省應協新疆月餉。分別劃解等語。著戶部酌覈辦理。前由神機營撥解榮全軍營洋礮等件。經榮全查驗配帶什物。損失甚多。並欠鉛藥一萬二千八百四十捲。銅帽一萬一千五百粒。實屬不成事體。著額勒和布景瑞奎昌常順多布沁扎木楚志剛托倫布保英一體嚴查。究係何臺損壞遺失。認真懲辦。嗣後運解糧餉軍火等項。經過各城。該將軍都統大臣等務當加派弁兵小心護解。以免貽誤。榮全另片奏請飭撥軍械等項。已諭令神機營工部如數籌撥矣。將此由六百里各諭令知之。○撥神機營弓五百張。絃一千條。箭三萬枝。長槍四百桿。腰刀五百把。工部火藥五千斤。轟藥五百斤。火繩二萬根。鉛丸四萬粒。由察哈爾遞解署伊犁將軍榮全軍營備用。○辛亥。上以孟冬時享。

太廟前期親詣行禮。○諭軍機大臣等。左宗棠奏攻剿西甯肅州回匪獲勝。統籌甘省全局。請調宋慶一軍助剿。請飭張曜分營駐紮靈州花馬池密陳西甯情形。楊世俊所部潰走。請免置議。並自請議處各摺片。西甯回匪始以乞撫為緩兵之計。旋結陝回抗拒官軍。經劉錦棠等督軍進剿。疊挫兇鋒。惟逆首白彥虎等皆積年悍賊。詭譎多端。必須厚集兵力。方能制其死命。著左宗棠一面飭令劉錦棠等實力進剿。一面添派勁旅繼進。以期早日蕨功。西甯城內漢民閉門防守。亦當設法援應。內外聯絡。俾免疏虞。馬桂源既為府城官民所拒。即著令其不必入城。以釋羣疑。左宗棠仍當隨時察看情形。相機辦理。肅州官軍雖屢次攻剿獲勝。而該逆負隅如故。著左宗棠飭令徐占彪穩慎進攻。力圖克拔。並酌量添兵合圍。毋任鉅走。甘省被兵日久。亟應速籌戡定。刻下西甯肅州均須增軍攻剿。省北

一帶亦須派營填紮。兵力不敷分布。宋慶一軍素稱得力。現在陝省北路邊境尚屬安謐。著定安即令該提督統帶全軍赴甘助勦。該軍由榆林綏德一帶取道慶陽平涼以抵蘭州。左宗棠擬飭沿途各局豫辦糧草。軍行當不至遲滯。宋慶接奉諭旨。即著剋期拔隊起程。迅赴戎機。本日並已諭令錢鼎銘將該軍月餉源源接濟矣。神木一帶如尚須派兵填紮。即著定安酌度布置。左宗棠現擬將譚拔

萃所部官軍調赴西甯。所有靈州花馬池一帶。即著張曜就近分營駐紮。以資穩固。穆圖善仍當飭令駐紮甘省城北之馬步各隊。照舊駐紮。認真防勦。毋遽裁撤。楊世俊所部勇丁潰散。情尚可原。著免其置議。左宗棠自請議處。並著加恩寬免。將此由六百里諭知左宗棠。穆圖善定安並傳諭張曜宋慶知之。○又諭據左宗棠奏通籌甘肅全局。請調宋慶赴甘助勦。本日已降旨傳諭該提督迅率所

部馳抵蘭州。聽候左宗棠調遣。該提督沿途所需糧料草束。已經左宗棠飭局豫備。惟該軍月餉向由河南撥解。甘肅餉本支絀。勢難兼顧。著錢鼎銘仍按月籌解。源源接濟。毋令稍有缺乏。將此諭令知之。○杭州將軍連成等奏滿營兵未足額。請將本屆軍政展緩舉行。從之。○廣西巡撫劉長佑奏軍務未竣。請將本屆軍政展緩舉行。從之。○烏珠穆沁輔國公阿勒坦呼雅克圖等二人。教漢三等台

吉色丹旺堆郭爾羅斯二等台吉阿穆爾呼畢圖於午門外瞻覲。

大清穆宗繼天開運受中居正保大定功聖智
誠孝信敏恭寬毅皇帝實錄卷之三百四十一

寶錄卷之四十一

福

大清穆宗繼天開運受中居正保大定功聖智
誠孝信敏恭寬毅皇帝實錄卷之三百四十二

藍峰魏公官歷日講起居注官太子太傅文淵閣領事翰林院掌院學士稽察欽奉上諭事件處方略館總纂武英殿大學士軍機大臣錄藍旗滿洲都統掌

理吏部事務戶部三庫事務加七級軍功加五級隨帶加七級紀錄三十次寶鑒堂古經燕慶聯講官太子少保文淵閣領閣事體仁閣大學士武英殿祭燕

正貳級滿洲縣政管理工部光祿寺事務內大臣輔國公軍功加一級隨帶加六級紀錄十九次^五宗室載鈞建武官經歷日講起居注官太子太保翰林院掌院

學士福家敘舉上諭事件處國史館總纂武英殿總裁協辦大學士兵部尚書軍機大臣教習詹事府詹事府三庫事務園子監事務加九級軍功加五級隨帶

加六級紀錄十九次^臣沈桂芬奏奉劉體毅官經廷議官類二項器禮部由書官理戶部三庫事務隨帶加五級紀錄十二次^臣徐桐等奉

款修

同治十一年壬申冬十月壬子朔享

太廟遣睿親王德長恭代行禮○遣官祭

永陵

福陵

昭陵

昭西陵

孝陵

孝東陵。

景陵。

泰陵

奉東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢○

上詣鍾粹宮問

慈安皇太后安○長春宮問

慈禧皇太后安○至丁巳皆如之○奉

慈安皇太后

慈禧皇太后幸漱芳齋○侍午膳○頌同治十二

年時憲書○欽奉

慈安皇太后

慈禧皇太后懿旨○欽天監奏遵旨選擇吉期一

摺皇帝親政典禮著於明年正月二十六日

舉行所有應行事宜著各該衙門敬謹豫備

○宗人府奏輔國公載濂應否照爵減半給

予護衛官員得旨載濂應有護衛官員著照

爵減半賞給○河東河道總督喬松年奏報

秋汎安瀾命詣

河神廟祀謝○賞升任道員張瀛布政使銜予

道員綸恩議敘○命廣西按察使佛爾國春

來京○賞已革貴州布政使嚴樹森四品頂帶

署廣西按察使○命烏珠穆沁頭等台吉察

克都爾色楞在乾清門行走○賞烏珠穆沁輔

國公阿勒坦呼雅克圖敷漢三等台吉色丹

旺堆郭爾羅斯二等台吉阿穆爾呼畢圖花

翎○甲寅諭軍機大臣等都興阿清凱奏○遵

旨嚴飭勒捕賊匪並請令瑞聯等將所聞弊

端指實奏奏一摺奉天馬賊滋擾疊經嚴諭

都興阿等認真勒捕茲據該將軍等將嚴飭

官兵勒捕情形具奏○昂著隨時實力籌辦以

清盜源不得稍涉鬆懈○該將軍等以瑞聯恭

鏜前奏風聞緝捕之人有得受月規奏縱包

庇等弊請飭該府尹等指實奏官兵有捕盜之責州縣職司緝捕均不容稍有諉卸其中良莠不齊皆所不免著都興阿清凱瑞聯恭鐸懷遵前旨嚴密查訪該弁丁及書役人等如有前項情弊立即捕獲治以軍法一面據實奏聞總之無論官弁兵丁州縣書役苟有不法重情彼此皆當指名奏該將軍府尹等身膺重寄當以國事為重和衷商辦豈得各存意見致誤地方自千咎戾都興阿另摺奏請更換官兵等語該省防兵傷病既多即著都興阿知照吉林黑龍江各將軍挑選官兵各五十名前來更替以資得力將此各諭令知之○賞扎薩克圖汗親王車林端多布三眼花翎○乙卯欽奉

慈安皇太后

慈禧皇太后懿旨皇后之母家著擡入鑲黃旗滿洲○諭軍機大臣等曹克忠奏收撫潰勇受籌安插情形請飭催劉盛藻迅速赴陝將

添募各營一併接統各摺片甘省奇營潰勇逸入陝境經曹克忠率隊圍剿悉數收撫帶回乾州仍訊明首從不動聲色分別懲辦以中軍律辦理尚妥此項勇丁猛鷲浮動駕馭甚難現經曹克忠立為馬隊二營並擬將此軍撥隸李輝武譚仁芳部下以分其勢著邵亨豫飭令李輝武等申明紀律妥為鈐束毋任別滋事端前據李鴻章奏劉盛藻於十月初二日由津起程著該督飭令迅速前迎接統各軍妥籌布置前諭曹克忠將另募各營遣撤茲據該提督奏請飭劉盛藻一併接收以厚兵力現在餉項竭蹶應如何酌量撤留之處著李鴻章曹克忠妥慎籌辦曹克忠俟交代清楚後准其暫赴西安調理將此由五百里諭知李鴻章邵亨豫並傳諭曹克忠知之○又諭張曜奏官軍剿辦鎮番等處賊匪疊獲勝仗並殲除南路竄賊一摺甯夏沿邊及阿拉善旗一帶時有竄匪滋擾疊經剿辦

獲勝仍著該提督派兵挖勒淨絕根株金順現已拔隊赴肅卽著懷遵疊次諭旨迅速前進其後路轉運事宜由甯夏至鎮番經過蒙地七百餘里地段甚長著張曜督飭將弁隨時梭巡遇有該營糧餉軍火一切過境卽行妥為護送以利進行鎮番一帶防勦事宜該提督尤當布置周密至靈州花馬池一帶並著遵奉前旨揀派得力弁勇前往接防均毋疏懈將此由五百里諭知金順並傳諭張曜

知之○命禮部左侍郎殷兆鏞仍在上書房行走候補贊善歐陽保極仍在南書房行走○以土爾扈特探勒賊匪出加賞佐領奈丹扎普三品頂帶防禦景文花翎○予甘肅鎮番等處陣亡都司馮冠元千總姜玉明祭葬世職○予貴州興義殉難署知府李保衡祭葬世職加等於死事地方及原籍建立專祠州同李華斗府經歷徐海祭葬世職加等一併附祀○予貴州各屬陣亡殉難知縣鮑鈺

等紳民婦女一千三百二十二員名口分別旌卹如例命於安定東直朝陽德勝西直阜成六門外設廠煮賑○丙辰諭軍機大臣等左宗棠移圖善奏馬步官兵勦賊獲勝一摺西路賊匪於七月間分股竄擾經馬隊各軍於野狐子溝等處截勦獲勝斃賊多名其王家坪竄賊亦經馬步各隊追勦賊匪敗遁仍著左宗棠移圖善督飭各營認真探勒毋稍懈弛前因甘省防勦緊要移圖善所部駐

紮北山之馬隊六起步隊四營已諭該將軍飭令仍紮原處毋遽撤動銘軍現緩裁撤移圖善應否移紮甘肅平涼固原一帶之處仍著該將軍懷遵前旨與邵亨豫妥商辦理將此由五百里各諭令知之○貴州巡撫曾璧光奏請調四川在籍知縣吳德泳前赴貴州差委允之○以安徽按察使裕祿為布政使○以甘肅野狐子溝等處勦賊獲勝賞佐領烏勒吉布彥圖副都統銜予通判福聯以同

知用陣亡都司魯希賢等祭葬世職加等○

予安徽積勞病故布政使吳坤修祭葬卹廕

○賞五城貧民棉衣銀○賞通州王恕園等

處焚賑粟米六百石○撫恤奉天錦州被水

災民並給房屋修費○丁巳諭軍機大臣等○

傳諭前任甘肅提督曹克忠曹克忠奏收撫

潰勇並無另股東竄現籌辦理情形一摺此

項潰勇經曹克忠收撫並無另股東竄與穆

圖善邵亨豫所奏相符其倡首生事之副哨

官馮高山什長王錦如路鍾字邱盛懷楊洪

等業經正法都司王士清守備呂長樂著卽

革職與勇丁李全發等卽行遞解回籍不准

再投軍營餘存四百餘名現既分立兩營籌

給月餉著曹克忠妥為駕馭迅卽撥隸李輝

武譚仁芳部下以資鈴束毋令別滋事端○

以江蘇鹽巡道孫衣言為安徽按察使○戊

午以崇上

慈安皇太后

慈禧皇太后徽號前期遣官告祭

天

地

太廟

社稷○

上禮服御中和殿恭閱奏書畢

上升輿由右翼門至永康左門降輿大學士捧

奏書由中路前行至

慈寧門

上由東階升至門下東旁如

慈安皇太后

慈禧皇太后御慈寧宮升座儀駕全設中和樂

作

上詣正中拜位跪大學士捧奏書在左旁跪進

上受奏書恭獻授右旁大學士跪接置正中黃

案上宣讀官捧起跪宣

慈安皇太后奏書曰

微音懋著篤燕翼之詒謀

懿範光昭晉鴻名而行慶禮既隆夫

尊養典尤重於顯揚欽惟

母后慈安皇太后

治贊乾元

厚符坤德

璇闈訓政十一年時切祇承

寶祚延釐億萬世並蒙

佑冒臣仰遵

慈訓成禮中宮恭奉

崇稱用彰鉅典伏冀

聖慈俞允俾展微忱合九州萬國以臚歡共沐

邦家之慶偕日升月恒而並曜永綿

福履之綏臣不勝惓惓之至謹奏跪宣

慈禧皇太后奏書曰

燕詒垂訓一人承

啟迪之隆

鴻號加崇百世行熾昌之慶答

生成之高厚茂彝典於顯揚欽惟

聖母慈禧皇太后

道協坤貞

功成豫大

訓藐躬而敷政聿昭郵治之規模凝

景祚而延庥備荷

洪恩之優渥臣禮成璇室上慰

歡心敬奉琅函用彰

至德伏冀

聖慈俞允俾展微忱縣億萬年統緒之承永綏

介福合千百國尊親之戴共仰

仁帡臣不勝惓惓之至謹奏

上率王大臣官員行禮禮成

慈安皇太后

慈禧皇太后還宮○

上詣鍾粹宮問

慈安皇太后安長春宮問

慈禧皇太后安○乙未恭上

慈安皇太后

慈禧皇太后徽號

冊

寶

上禮服御太和殿恭閱

冊

寶畢奉安於綠亭前行

上升與隨後由右翼門至永康左門

上升與行至

慈寧門外東旁立

冊

寶陳設於正中黃案

慈安皇太后

慈禧皇太后御慈寧宮升座儀駕全設中和樂

作

上詣正中拜位跪左旁大學士捧

冊

寶依次跪進

上受恭獻授右旁大學士跪接置正中黃案上

宣讀官捧起跪宣

慈安皇太后冊文曰

慈暉普徧九圍歌

怙冒之仁

崇號顯揚萬國遂瞻依之願宮闈衍慶海宇臚

歡欽惟

母后慈安皇太后

德協安貞

功資博厚

威儀是加普懿範於家邦

慈惠為懷被仁風於中外

服澣衣而敦節儉佐

皇考之旰膏

臨黼座而飭幾康

訓藐躬以政治河洲協吉屬嘉禮之初成

天闕增輝仰

慈顏之有喜循視膳問

安之典

蘭殿春長運承先啟後之謨

萱幃日永以天下養冀酬

鞠育之恩惟

壽母慈莫罄尊親之戴肅遵經禮虔展悃忱謹告

天

地

宗廟

社稷率諸王貝勒文武羣臣恭奉

冊

寶加上

徽號曰

慈安端裕皇太后伏願

頤壽長臻

洪恩普被晉

寶冊而星輝雲爛綏履無疆播

徽音於玉節金和蕃釐永迺臣誠懼誠忤稽首

頓首謹言跪宣

慈禧皇太后冊文曰

徽音克嗣燕天開昌後之祥

至德難名鴻號晉無疆之福一人有慶四海永

清欽惟

聖母慈禧皇太后

德備坤元

道符泰運

秉心純粹循左圖右史之文

治事仁明協服教畏神之頌

念小子冲齡踐阼

思勤鞠育之頻勞

體

先皇大業丕承

訓誨維持之備至茲際椒宮啟秀慶典舉行仰

瞻

松棟凝庥

慈容愉悅雞鳴問

寢開曙色於

龍樓燕翼詒謀迓

祥輝於

螭陛進萬方之玉食孝養誠輸傳億世以瑤章

尊崇典備祇循禮制虔表悃忱謹告

天

地

宗廟

社稷率諸王貝勒文武羣臣恭奉

冊

寶加上

徽號曰

慈禧端佑皇太后伏願

頤性安和

仁恩丕冒

寶冊恭陳香案鑪煙則字篆平安

崇名永配球圖翰墨則慶聯福壽臣誠懼誠忤

稽首頓首謹言

上率王大臣官員行禮禮成

慈安端裕皇太后

慈禧端佑皇太后還宮○

上詣鍾粹宮

慈安端裕皇太后前行禮長春宮

慈禧端佑皇太后前行禮○賞恭請

冊

寶龍亭執役校尉銀○以宣讀奏書恩遽太常

寺官連山下部議處○庚申

上詣鍾粹宮問

慈安端裕皇太后安長春宮問

慈禧端佑皇太后安至辛巳皆如之○恭上

慈安端裕皇太后

慈禧端佑皇太后徽號禮成頒詔天下詔曰朕

惟禮隆報本普天洽尊養之忱善則歸親薄

海重顯揚之義矧嘉禮慶成於蘭掖宜隆稱

上晉夫萱幃爰溯成規式彰盛典欽惟

慈安皇太后

倪天協慶

應地含章

普德教於六宮

沛恩膏於四海

慈禧皇太后

溫恭懋著

仁厚覃施

篤燕翼之詒麻

集鴻龐而受祉

垂廉敷政

兩宮昭

一德之孚

秉錄綏猷萬紀仰

重熙之盛茲復慎遴賢淑俾正宮庭

璇闈之愛景方長同申潔養

瑤妃之春暉宜報祇奉

徽稱迺

慈懷過示夫謙撝惟朕意彌殷夫顙懇仰蒙

俞允爰舉上儀謹告

天

地

宗廟

社稷於同治十一年十月初八日率諸王貝勒

文武羣臣恭奉

冊

寶加上

慈安皇太后徽號曰

慈安端裕皇太后加上

慈禧皇太后徽號曰

慈禧端佑皇太后宮壺麻擬聿重尊親之典宸

瀛慶洽應推錫類之恩所有事宜開列於後

一在內親王之福晉以下公之妻以上著加

恩賜一外藩蒙古諸王之福晉以下公之妻

以上著加恩賜一民公侯伯以下二品大臣

以上命婦著加恩賜一從前尚過公主格格

之額駙等照伊等品級著加恩賜一從前恩

詔後升職加銜補官者悉照現在職銜給與

封典。在京文官四品以上武官三品以上

著各加一級。在京王公文武官員任內有

降級罰俸住俸者咸與開復。又在京官員現

在議降議罰者悉予豁免。外藩蒙古王公

以下台吉以上有罰俸住俸者咸與開復。其

現在議罰者悉予豁免。除十惡不赦外。犯

法婦人盡行赦免。太監等賞給一月錢糧

。上三旗辛者庫當差婦人酌議賞賜。罰

贖積穀原以備賑。冬月嚴寒鰥寡孤獨貧民

無以為生。著直省各督撫令有司務將積穀

酌量賑濟。毋令奸民假冒支領。各處效力

贖罪人員向無定限。多致苦累。殊堪矜憫。著

各該管官查係已滿三年者。聲明犯罪緣由

奏請酌量寬免。於戲開國承家。俾緝熙于純

嘏。行慶施惠。用敷錫庶民。布告天下。咸使

聞知。

上御太和殿。王以下文武大臣官員及朝鮮國

使臣行慶賀禮。御乾清宮。

皇后率

慧妃以下行禮。○奉

慈安端裕皇太后

慈禧端佑皇太后。幸漱芳齋。侍午膳。○頒發朝

鮮國崇上

慈安端裕皇太后

慈禧端佑皇太后。聖壽節。遣官祭

例。○辛酉

慈禧端佑皇太后。聖壽節。遣官祭

太廟後殿

奉先殿。○

上率王以下文武大臣詣

慈寧門行慶賀禮。眾官於午門外行禮。○詣長

春宮

慈禧端佑皇太后。前侍早膳。○奉

慈安端裕皇太后

慈禧端佑皇太后。幸漱芳齋。侍午膳。○癸亥。諭

軍機大臣等。伊勒屯春綠營虧欠滿營軍餉。

請旨飭催一摺。巴里坤滿營軍餉向與綠營均勻分撥。據稱總兵何瑄於領到餉銀並不隨時撥給。計前後共欠滿營銀一萬兩。屢次催交任意宕延。請飭迅撥等語。卽著何瑄嚴飭遊擊陳升恆卽將領到滿營軍餉銀兩迅速如數撥交伊勒屯以資支放。毋稍遲緩。嗣後巴里坤滿營應領哈六巴四二成軍餉銀兩並著奎昌常順多布沁扎木楚志剛於各省轉運解至烏里雅蘇台時由伊勒屯提撥

應用。前據景廉奏回目馬明投誠擬調徐學功等赴古牧地幫同駐守以後情形如何著景廉詳察具奏。將此由五百里諭知奎昌常順多布沁扎木楚志剛景廉伊勒屯並傳諭何瑄知之。○命都察院左都御史英元鑲白旗蒙古都統崇實。在紫禁城騎馬。○賞八旗暨步軍營綠營兵丁一月錢糧。○甲子以神靈顯應。頒山東鄆城縣侯家林大王廟扁額曰金隄福佑。○諭軍機大臣等

文麟奏進剿哈密竄匪情形並景廉改換西路營制各摺。片哈密塔爾沁地方突有東山竄來賊匪乘間搶掠。文麟現派營官劉珍帶隊與魏忠義各營分路抄剿。現在賊匪竄往何處偵探尚無確蹤。誠恐接連該處纏頭則剿辦愈形棘手。著文麟飭令魏忠義督率各軍嚴加勦洗。遇賊卽擊。毋稍疏懈。景廉帶兵西進統領全軍均須妥為駕馭。孔才所統西路各營本歸景廉節制調遣。徐學功等營

亦經景廉改換營制均歸張玉春統帶。卽著飭令各軍聯絡一氣迅圖規復。其駐哈密儀新前後營文麟已派李生元等接統並著飭令認真防剿。迅掃逆氛。景廉文麟務當和衷共濟。所有剿辦事宜隨時商酌妥為籌畫。毋得各持己見致誤事機。將此由五百里各諭令知之。○山東巡撫丁寶楨奏候補知州李均之父前廣東候補道李宗沆就養山東明年癸酉科重遇鹿鳴筵宴請就近在東省與

宴以光盛典允之○以甘肅安西等處疊次截勦竄匪出力賞遊擊孟傳來等花翎學正聶盛年等藍翎餘升敘開復有差○丙寅上奉

慈安端裕皇太后

慈禧端佑皇太后幸漱芳齋侍午膳○諭內閣

吳棠奏查閱川北川東營伍請將各員弁分

別革休一摺四川夔州左營千總楊作霖署

巫山營千總張文光騎射生疏均著勒令休

致川北中營千總陳萬榮步箭全空重慶中

營把總咎廷魁久病不操潼川營右司外委

達玉筆差操不加均著斥革以肅營伍○署

兩江總督何璟奏接到部咨為期已迫請將

軍政展緩辦理從之○命前任太常寺少卿

楊泗孫仍在南書房行走○以福建浦城勦

匪出力予參將周德富等加銜升敘有差○

追予江蘇唐港傷亡外委吳品秀祭葬世職

○追予江蘇各屬陣亡殉難在籍光祿寺署

正孫新等紳民婦女二千一百四十八員名口分別旌卹如例○追予安徽歙縣合門殉難舉人蔣嘉煒等男婦五百名口分別旌卹如例○追予安徽歙縣陣亡殉難紳民程啟亨等暨婦女三千七百四十八名口分別旌卹如例

大清穆宗繼天開運受中居正保大定功聖智誠孝信敏恭寬毅皇帝實錄卷之三百四十二

大清穆宗繼天開運受中居正保大定功聖智
誠孝信敏恭寬毅皇帝實錄卷之三百四十三

數修

同治十一年壬申十月丁卯諭內閣前據都

興阿奏已革收長卓金等呈控翼領烏林泰
等有偷開廠地私收黑租等情當諭令古尼
音布前往查勘奏明辦理茲據奏稱詳加查
訪該翼領烏林泰廣榮實無前項情弊其開
河底荒地遵旨嚴行封禁等語著該署副都
統督飭委員隨時前往該處及沿廠一帶地
方實力稽查儻有奸民偷開隱種卽行平毀
照例究辦李尚義前領升科之地既係有礙
牧廠卽著一併註銷封禁以清界限另片奏

歸公官地請仍准兵丁領種等語滿井子三
河套等處黑地八千九十四畝既無各項關
礙著准其仍照咸豐八年成案歸錦州所屬
甲兵認種納課自同治十二年起科其張允
和私收黑租東錢三萬五千九百七十餘千
著該部歸案追繳按律懲辦○又諭劉長佑
奏請將庸劣各員革職一摺廣西候補知府
朱騰偉才識庸劣嗜利妄為潯州府通判韓
鎮岳貪鄙性成工於欺詐左州知州孫源任

性貪婪紳民怨憾凌雲縣知縣劉興讓萎靡
不振操守平常均著卽行革職以示懲儆○
以黑龍江協領吉爾洪額為副都統未到任
前以齊齊哈爾協領倭和署理○戊辰諭軍
機大臣等劉長佑馮子材奏各屬剿捕匪徒
情形暨整頓沿邊關隘各摺片廣西各屬伏
莽甚多現經劉長佑等分派兵勇會同地方
官偵探擒捕將隆安匪首盧成茂岑溪匪首
陳經謨永甯逸匪韋之穩等及其黨與擒獲

正法並將西隆苗匪痛加勦洗其越南州布積匪及廣東靈山土匪亦經官軍兜勦斬戢多名出力員弁准由劉長佑等查明存記彙案酌保各處逃竄餘匪仍當飭屬一體查拏淨絕根株以靖地方而弭後患太鎮沿邊一帶關隘久廢不足以固邊防現在大軍將次入關亟應及時修補毋任荒廢劉長佑已派道員覃遠璉前往會同地方官周歷履勘量加修葺所籌甚是惟當飭令該道認真經理務臻周密應如何布置兵勇以資捍禦卽著覃遠璉就近幫同馮子材妥為料理將此由五百里各諭令知之○又諭曾壁光周達武奏川省協黔的餉請飭仍照原數撥解一摺周達武一軍入黔勦辦賊匪川省原議每月撥解銀五萬八千兩現在黔省下游軍務雖就肅清鎮撫巡防在在需軍駐紮上游新城未克尤當攻剿喫緊之時師行餉隨勢難遽行覈減值此全功將竟若餉項稍不應手深

恐貽誤大局吳棠仍當督飭藩司將每月協黔的餉五萬八千兩設法照數撥解不得稍有蒂欠並將五月至八月共銀二十三萬二千兩先行解黔嗣後仍著源源接濟俟全黔平定卽行酌議停減曾壁光周達武務將下游各地方妥為鎮撫一面督軍迅復新城蕩平羣醜是為至要將此由五百里諭知吳棠曾壁光並傳諭周達武知之○又諭前因榮全奏酌定官兵口分請飭部豫撥經費三十萬兩並劃分新疆月餉當諭令戶部酌度辦理茲據該部奏稱部款不敷開放豈能復向外撥惟伊犁需餉緊迫亦係實情亟應寬為籌備請於山西山東河南應解本年地丁京餉項下各劃撥銀五萬兩共十五萬兩此係各省應解部餉實與撥給庫款無異其餘十五萬兩仍酌撥山西地丁銀五萬兩山東地丁銀五萬兩河南地丁銀五萬兩亦均係有著之款統共合銀三十萬兩請飭照解等語

卽著丁寶楨鮑源深錢鼎銘嚴飭各該藩司
迅卽如數籌撥解至綏遠城交定安接續轉
運科布多由托倫布保英知照榮全迎提應
用以濟急需至各省報解新疆月餉遲速既
殊多寡亦異若如榮全所請按城劃分不足
以昭公允嗣後新疆各城提撥各省專餉應
仍歸各該城應用外所有新疆月餉七萬兩
著於解到時無論何省餉銀均由奎昌常順
多布沁扎木楚志剛托倫布保英等分撥以

一半歸烏魯木齊哈密巴里坤等城提用以
一半歸伊犁塔爾巴哈密等城提用庶各城
均資接濟不至稍涉偏枯將此由四百里各
諭令知之○予貴州新城陣亡提督文德盛
祭葬世職加等謚武愍交國史館立傳於死
事地方暨興義府建立專祠陣亡將士一併
附祀○賞故巴林扎薩克郡王阿拉瑪斯巴
咱爾銀五百兩治喪○庚午遣大學士文祥
為正使禮部尚書萬青黎為副使持節齎冊

封赫舍哩氏為

瑜嬪冊文曰朕惟椒庭玆化資襄贊於坤儀
蘭殿承輝錫褭榮於巽命新綸丕煥茂典斯
彰咨爾赫舍哩氏秉性謙和持躬恪謹播璇
閨之令德禮教無愆協珩佩之芳型嘉稱允
副茲仰承

慈安端裕皇太后

慈禧端佑皇太后懿旨冊封爾為瑜嬪爾其徽
章祇荷被象服以增華內職虔修迓鴻祺而

行慶欽哉○遣大學士單懋謙為正使協辦
大學士刑部尚書全慶為副使持節齎冊封
阿魯特氏為

珣嬪冊文曰朕惟贊坤元而玆化職備宮闈
頒巽命以錫榮恩承綸綍式稽彝典用貢龍
章咨爾阿魯特氏秉質柔嘉宅心端謹協珩
璜之雅度無愧女箴著圭璧之芳儀恪遵內
則茲仰承

慈安端裕皇太后

慈禧端佑皇太后懿旨冊封爾為珣嬪。爾其祇膺寵命。列椒掖以襄勤。益懋徽音。啟芝函而提福欽哉。○諭內閣。裕恪等奏。薊州應解餉銀。請飭查明嚴催一摺。直隸薊州應解

東陵各衙門本年夏秋二季餉銀。暨米折工食等項。既經藩庫發給。自應卽行領回。迅速解送。豈得任意遲延。藉詞推諉。著李鴻章確切查明。實係何任承領。應解之款。催令該員等趕緊解送。毋稍稽延。其遲誤推諉各緣由。並

著一併查明辦理。○辛未。以神靈顯應。頒山東張秋鎮

大王廟扁額。曰宣流濟運。○以詹事府少詹事袁保恒為詹事。○壬申。諭內閣。本日禮部具題冬至禮儀一本。內閣分別票籤進呈。內奉

皇太后懿旨。誤書皇后懿旨。非尋常疏忽可比。所有漢票籤及看本之中書侍讀。均著查取職名。交部嚴加議處。大學士著交部議處。至

本年冬至次日奉

慈安端裕皇太后

慈禧端佑皇太后懿旨。著停止行禮。尋吏部議。大學士文祥單懋謙協辦大學士全慶均應罰俸一年。得旨准其抵銷。○又諭鮑源深奏奉差營員勇丁在晉滋事。請旨辦理。暨記名提鎮奉差經過地方請飭恪遵功令各摺。片軍營奉差弁勇藉端騷擾地方。大干功令。此次鮑源深巡閱河防邊隘。卽有嵩武軍弁勇毆傷車夫及卓勝營差官記名提督徐名揚自營帶馬回皖。因討關未遂。率眾施放洋槍。肆罵鬧關情事實屬不成事體。並聞近來各營差官甚至有包攬客貨。馱載婦女夾帶游勇營混。經過關卡不服盤詰等情。似此情形實堪痛恨。亟應嚴行懲辦。以儆兇頑。現在拏獲在晉滋事之嵩武軍勇丁已由鮑源深解交原營。並咨令將逃回之勇一併拏獲。卓勝營差官及勇丁人等亦咨明皖省查辦。卽著

各該營從嚴究治毋稍寬縱嗣後各路統兵大臣遇有差委員弁著卽申明紀律嚴加約束所給執照務將勇丁馬匹及所攜槍械數目並應需車輛若干以及程途期限詳細開明經過驛站暨關津隘口均令呈驗放行如有不遵盤查及騷擾逾限情弊准由地方官查拏隨時稟報督撫奏明懲辦至各營中記名提鎮之員除統帥外其餘在營差遣者如有奉差經過驛站關津均著恪遵功令聽受

地方官稽查概不准多帶勇下濫索車馬尤不准夾帶貨物私載婦女如敢故違卽由各該地方官稟明嚴叅從重究辦各路統兵大臣務當嚴申軍律飭令各差官一體遵照毋得自蹈愆尤將此通諭知之○諭軍機大臣等工部奏川省承辦燈杆木植延不報解請旨飭催一摺

天壇望燈杆鉅典攸關向由四川湖南兩省採辦木植前因燈杆虧朽過重亟應換新經工

部於同治四年奏准由該兩省採辦解京嗣復疊次奏催並令四川總督查明承辦木植遲誤之員奏叅責令勒限趕解如果該省委員認真經理何至時閱七載仍未報解實屬有心玩延卽著吳棠將承辦遲誤之員查取職名先行交部嚴加議處仍著該督遴委妥員勒限三箇月迅速運解儻再任意延宕卽將該督一併交部議處至湖南雖因苗疆未靖未能如期辦理咨覆該部而現在該省軍

務早平亦應照舊採辦著王文韶飭屬一體購運毋誤要需將此各諭令知之○追予安徽廬州殉難署府經歷沈錫慶祭葬世職○癸酉諭內閣景霖奏請借款移栽樹株開單呈覽一摺

東陵官道兩旁現有自生小樹數百萬棵景霖擬揀選小松樹一萬四千棵移栽

景陵新大園迤南等處陰護風水自應籌撥款項以資應用直隸遵化等州縣尚有積欠籌

備庫租銀三千六百餘兩未經報解著直隸總督飭令藩司無論何款先行如數撥解交景霖擇節動用此項借撥銀兩卽於前欠籌備庫租銀項下由該藩司催徵如數扣抵又諭鮑源深奏特參庸劣各員各摺片山西代州直隸州知州章節文年老多病公事廢弛著勒令休致該員任內虧款仍著查明追究翼城縣知縣徐炳華性耽安逸不理民事著開缺以府經歷縣丞降補屯留縣知縣龔行淮聲名平常著卽革職署交城縣知縣嵩齡才識庸闇著以縣丞降補候補知縣陸春圻挾私任性罔識大體著以縣丞降補興縣訓導張心鑑年力就衰難資訓迪著勒令休致平定州吏目陳興愷遇事招搖頗滋物議著卽革職張皋兒巡檢趙夢松貪利濫刑怨聲載道著卽革職永不敘用○又諭湖南學政廖壽恆奏整飭錄科事宜一摺鄉試錄科送考自當恪守成規據奏湖南近來風氣凡

捐納保舉至州縣以上者往往領卷出場謄真後始行送進並有生員貢監不由學官地方官申送自行投卷考錄者實屬有違定例考試事宜本係該學政專責卽著實力整頓以挽積習此等情弊恐不獨湖南一省為然並著各省學政於錄科時遇有前項各弊一體認真釐剔用副朝廷整飭士習至意○甲戌諭軍機大臣等鮑源深奏統籌西北大局情形一摺據稱本年甘陝之勇潰變數次現雖勉為安撫而事端已見終屬可慮晉省密迤秦隴畿輔又與三晉毗連亟應思患豫防請飭李鴻章於畿輔西邊要地安置數軍萬一西勇再有潰變庶可遏其東竄燕疆之路卽晉省亦得倚為聲援等語所奏不為無見著李鴻章斟酌情形應如何先事豫防之處卽行妥籌具奏鮑源深於秦隴接壤處所亦當妥為布置毋稍疏虞將此由四百里各諭令知之○又諭前據左宗棠奏兵力不敷分

布請調宋慶一軍當諭令該提督赴甘助剿
茲據鮑源深奏稱該軍駐紮河西晉省河防
深資屏蔽值此冬令冰堅倉卒之間無從另
調別軍填紮穀軍拔隊遠征籌辦軍裝糧運
事宜亦需時日且冰雪長途行走難於迅速
可否飭令稍緩西進容得另籌調度等語著
卽照鮑源深所請知照該提督暫緩拔營妥
籌防堵仍一面豫為部署俟來歲春融卽行
迅速前進不准藉詞耽延該提督拔隊後晉

省河防應如何嚴密布置之處仍著鮑源深
先事妥籌毋稍大意甘肅西甯肅州一帶攻
剿情形若何現在穀軍暫難成行該處自應
另籌調度左宗棠當斟酌軍情妥為布置毋
稍疏虞將此由五百里各諭令知之○又諭
恩麟奏遵查藏界情形德泰奏巡閱邊境現
籌辦理一摺布魯克巴部長稟求助銀賞俸
業經恩麟等檄諭開導廓爾喀人已由聶拉
木邊界折回藏境尚屬安靖惟據德泰奏聶

拉木邊外與廓爾喀毗連各隘口防守空虛
擬於聶拉木左右各隘以至定日後藏江孜
各汛添設番兵責成噶布倫等實力整頓等
語所奏自為慎重邊防起見承繼現已起程
到任後卽著該大臣等彼此妥商將所擬各
節實力辦理所有添設番兵約二百名每月
應需口分著承繼德泰知照達賴喇嘛轉飭
協理商上事務呼圖克圖羅卜藏青饒汪曲
妥擬章程由達賴喇嘛咨明覈辦並嚴飭羅

卜藏青饒汪曲暨噶布倫總堪布等將邊防
事務認真整頓不得視為具文其定日漢營
防兵缺額著卽挑補足數飭令實力操防以
固邊圉承繼未到以前仍著恩麟德泰將應
辦事宜和衷商榷務臻妥善將此由五百里
各諭令知之○署漕運總督文彬奏報秋汛
安瀾命詣

河神廟祀謝○以故扎薩克圖汗輔國公章
達勒密濟特子圖布多爾濟襲爵○以輕率

債事革福建知縣王壽昌職並逮問○乙亥諭內閣吏部奏查明禮部內務府保舉人員分別議駁各一摺禮部員外郎松林著改為以道員卽選仍賞加三品銜王福保惲彥琦均著改為以道員卽選仍賞戴花翎賞加三品銜餘仍著照原保獎勵此係因該員等承辦大婚禮格外出力是以從優給獎其餘各員及各該衙門獎敘均不得援以為例○諭軍機大臣等奎昌等奏賊匪竄擾籌辦防剿一摺甘省肅州回匪於八月間分竄出關在白托羅蓋及金山卡倫等處擾掠有圖撲烏科庫倫之說該逆屢竄出關意圖掠食此次所擾地方皆在烏城西南東南十數臺一帶計欲牽掣兵力乘間肆擾奎昌等現撥馬隊堵剿並飭蒙古官兵嚴防卽著嚴飭帶兵員弁實力截剿迅埽逆氛該匪飄忽靡常非有遊擊之師不足以痛殲醜類杜嘎爾卽率所部剋日啟行探明賊蹤馳往勦辦並著托

倫布保英張廷岳阿爾塔什達豫籌備禦調撥官兵擇要扼守遇賊卽擊毋稍大意至摺內有請領洋槍炸礮一語並未敘明數目及由何處領發如該城需用正殷卽著隨時奏聞將此由六百里各諭令知之○又諭景廉奏籌辦西路軍務情形一摺據稱古牧地回目馬明等觀望遲疑未卽就撫安集延與瑪納斯回逆互攻且有北犯沙山子之信現商令錫綸前赴布倫托海招募民勇為東西兩路夾擊之計等語所籌尚妥馬明等投誠既不可恃仍當外示羈縻密為防範未可草率從事致貽後患布倫托海地方聚集難民雖可招募成軍惟此項人眾素無紀律若不整肅營規勤加訓練恐難得力著錫綸馳抵該處後察看情形認真挑選儻能練成勁旅佐以沙山子團勇擇要扼紮相機進兵遙為東路聲援勦辦自較得勢並著榮全富和於厄魯特十蘇木蒙古官兵內派出一千名交署

領隊大臣巴彥特古斯統帶隨同錫綸進剿以厚兵力。所有西路一切軍務著錫綸隨時咨商景廉奏明辦理。如遇緊急事件卽由錫綸自行具奏以免遲延。景廉以哈密東山一帶現有回匪出沒。意圖西竄。前敵官軍尚難西進。仍著該都統酌度情形將後路布置妥協。卽行統兵前進。迅籌攻剿。榮全於伊犁近日情形曾否隨時派員確探。前派英廉等帶隊赴庫爾喀喇烏蘇屯紮。曾否到防。現與景

廉各營能否聲息相通著隨時奏聞以慰厯繫。將此由六百里各諭令知之。○以烏里雅蘇台勒匪出力賞委參領瑪克蘇爾巴圖魯名號。委參領額林臣厄奇爾等花翎護軍德勒格爾等藍翎。餘升敘有差。○以烏里雅蘇台總理臺務出力。予防禦福厚等升賞有差。○予烏魯木齊陣亡遊擊張士魁祭葬世職加等。○丙子諭內閣禮親王世鐸等奏請加上

徽號以光鉅典一摺朕沖齡踐阼仰賴慈安端裕皇太后

慈禧端佑皇太后垂簾訓政宵旰勤勞

聖德徽音超邁前古茲復欽奉

慈諭命朕於明年正月親政自應謹遵順治八年康熙六年

成憲恭上

徽號以繼隆規迺我

慈安端裕皇太后

慈禧端佑皇太后謙抑為懷未蒙

俯允經朕竭誠籲懇始荷

聖慈俯鑒羣情勉從所請所有一切應行典禮

著各該衙門敬謹辦理。○命前任山西巡撫

李宗義來京陛見。○以江蘇巡撫張樹聲署

兩江總督江蘇布政使恩錫署巡撫。○丁丑

諭軍機大臣等曾璧光周達武奏督攻新城

及軍中待餉急迫情形各摺片新城賊悍巢

堅屢攻未下周達武現已親往督攻布置均

尚妥協卽著督飭各軍穩慎進取務將該城設法迅速攻拔毋稍鬆勁該處各營餉需欠缺現屆冬令嚴寒該勇丁忍凍荷戈情殊可憫且圍攻新城正當喫緊之際儻因餉需不繼以致軍心解體則功敗垂成尤與大局有礙著戶部於附近貴州省分迅速指撥實在有著之款一二十萬兩趕緊解往其餘各省欠餉並著該部查明咨催迅解以資飽騰毋稍遲誤曾壁光等仍當竭力籌維拊循激勵以竟全功將此由五百里諭知曾壁光並傳諭周達武知之○戊寅以辦理河運漕米安速賞江蘇道員英樸一品封典○旌表守正捐軀奉天昌圖廳民王小羣妻趙氏直隸樂城縣民郭黑三妻趙氏○蠲緩直隸寶坻薊霸保定文安大城固安永清武清永安宛平良鄉房山涿新城雄安高陽河間獻任邱天津鹽山安平深澤灤清苑安肅博野祁元城豐潤玉田饒陽通三河香河定興望都蠡束

鹿肅甯南皮正定晉無極景城新樂南和永年成安廣平雞澤磁趙甯晉深定容城沙河鉅鹿任邱鄆武邑六十四州縣被水被旱被雹地方新舊額賦暨民借倉穀有差○庚辰命署兩江總督張樹聲兼署辦理通商事務大臣○以乍浦副都統明興為荊州右翼副都統○旌表守正捐軀廣東南海縣民廖廣安妻陳氏

大清穆宗繼天開運受中居正保大定功聖智誠孝信敏恭寬毅皇帝實錄卷之三百四十三

滿洲）又諭前據都察院奏湖北民人馮式

祭葬卹廕。追予江蘇各屬陣亡殉難守備。

王洪等紳民婦女九百三十六員名口分別旌卹如例○甲申遣官祭

先醫之神○諭軍機大臣等前因黔省軍餉缺乏諭令戶部於附近貴州省分指撥有著之款一二十萬兩趕緊解往其餘各省欠餉並令查明咨催茲據該部奏稱貴州毗連省分非協款本多卽地方瘠苦可撥之款甚少惟四川及湖北廣東進款較多江蘇距黔雖遠籌款尚易請於該四省釐金項下各指撥

銀五萬兩共銀二十萬兩為貴州專餉如釐金不敷卽在別項款內湊足起解等語卽著瑞麟張兆棟李瀚章郭柏蔭吳棠張樹聲恩錫按照戶部指撥數目迅速提款剋日解黔以拯飢軍而維大局毋得稍涉延欠致誤戎機其餘欠解省分並著曾璧光等仿照西征糧臺章程將各省協撥餉銀無論月餉專餉按月開列已解欠解清單報部查覈如有延欠過甚者卽由曾璧光一面報部一面將該

藩司關道指名叅處以儆疲玩將此由五百里諭知瑞麟李瀚章吳棠張樹聲郭柏蔭張兆棟曾璧光並傳諭恩錫周達武知之○又諭定安奏另調馬隊助勦請變通辦理一摺前因烏魯木齊需兵助勦經定安由綏遠城防軍內將撥歸杜嘎爾調遣之神機營練兵吉林黑龍江馬隊各五百名暨大同鎮屬步隊一千名飭赴景廉軍營應需製辦軍裝及採買駝隻銀十七萬五千兩已諭山東等省

籌撥由綏遠城就近辦給嗣准神機營奏前項馬隊在防已久不無疲乏難令遠道赴烏另由吉林黑龍江兩省調撥換班官兵一千名前往此項馬隊既不由綏遠防所派撥起程若仍照額勒和布前議程途行走未免迂滯卽著神機營俟此項馬隊到京飭令徑由張家口取道阿勒台軍臺前進以期迅速應需軍裝裹帶等項卽由額勒和布就近辦給並將所需駝隻一併就近採買以歸便捷前

次派撥餉銀。僅據山西解交定安銀一萬五千兩。現在定安部署大同步隊起程。著錢鼎銘。邵亨豫。卽將該省應解銀兩如數解交定安應用。額勒和布現需照料馬隊。啟行山東。派撥銀兩。著丁寶楨。迅卽徑解察哈爾。交額勒和布應用。並著李鴻章。吳棠。李瀚章。郭柏蔭。各於該省欠解新疆軍餉及景廉軍營協餉內先行籌撥銀六七萬兩。迅速解至察哈爾。交額勒和布收存。以供支應。均不准稍涉

推諉。致誤要需。將此由四百里各諭令知之。○以辦事乖謬。廣東知縣馮詢革職記辦。○蠲緩江蘇上元。江甯句容高淳。江浦溧水六合。山陽阜甯清河。桃源安東鹽城。高郵泰東臺。江都甘泉。儀徵興化寶應銅山。豐沛蕭。碭山。邳宿遷。睢甯海沭陽。贛榆通泰興。海門。如皋。三十六廳州縣。暨淮安大河揚州徐州四衛被水被旱地方。新舊額賦有差。○乙酉。以神靈顯應。封廣東平鼎神為牛峙山神。○諭

內閣。御史袁承業奏考試弊竇多端。請旨嚴禁一摺。考試為掄才大典。功令森嚴。豈容潛滋弊竇。若如該御史所奏。近年考試教習謄錄各項大半冒名代倩。鄉會兩闈並殿廷考試各種弊端亦未盡絕。實屬不成事體。嗣後中外大小臣工。凡與衡文之任者。務各精白乃心。嚴絕干謁。其外簾各官亦應認真稽覈。力杜諸弊。庶奔競者幸獲無由。而真才不至掩蔽。經此次訓誡之後。儻仍敢玩法營私。或

被人叅劾。或別經發覺。朝廷惟有執法嚴懲。決不寬貸。毋謂言之不豫也。○諭軍機大臣等。禮部奏賊船侵擾朝鮮。據咨轉奏一摺。本年八月間。中國商船四隻被賊船追趕避入朝鮮東江地方。賊船竟闖入光城坊泊船島。該國發兵擊敗賊船。將中國商船救護出境。此起賊船雖經朝鮮勦散。而餘黨猶存。沿邊各海洋理宜一律嚴肅。豈容匪徒嘯聚越界搶掠。況此次因匪船越境竄擾。致朝鮮衛將

受傷衛士殞命尤屬不成事體著都興阿瑞聯恭鏜丁寶楨檄飭沿海水師查拏奸宄勒減餘孽以靖海疆而綏藩服並著禮部行知朝鮮國王嗣後如有匪徒侵越滋擾卽照向章一體兜擊格殺勿論以期盡殲醜類禮部摺並朝鮮咨文各一件均著鈔給都興阿等閱看將此諭知禮部並諭令都興阿瑞聯恭鏜丁寶楨知之○又諭寄諭前任烏里雅蘇台將軍金順前因肅州一帶賊勢蔓延僅有

徐占彪一軍在彼勦辦兵力尚形單薄疊次諭令該將軍迅速拔隊剋期西進並諭抵肅州後卽行奏聞迄今月餘未見續有奏報刻下肅州事機緊要金順現在行抵何處卽著懍遵疊次諭旨迅赴戎機毋稍延宕抵肅後並著遵照九月二十八日密寄諭旨妥為布置先將一切情形詳細奏聞以慰廑繫將此由五百里諭令知之○又諭文麟奏攻勦東山竄匪獲勝並星星峽軍臺逆回刼殺請將

疏防營員示懲各摺片肅州逆匪竄向哈密東山由馬鬃山分股擾至下莫艾地方經文麟派令統領魏忠義等帶隊追勦斬馘甚多生擒逆馬乙麻木正法匪黨出哈爾山向東北逃竄此次進勦東山逆匪雖經小有斬獲惟東山地面遼闊隘口甚多該逆分股紛擾亟應盡力挖勦以絕延蔓該大臣務當嚴飭魏忠義等探明賊蹤所向實力追擊不得徒事粉飾致令醜類潛滋至星星峽回匪殺

傷弁兵勇目多名刼去車馬餉銀等物守備向永福不能先事防範著先行摘去頂帶以示薄懲所失餉銀共若干兩責令各該營官賠補並著飭令魏忠義等確探痛勦毋留餘孽該處軍臺速派弁兵妥為安設毋任再有疏虞將此由五百里諭令知之○以軍機處當差勤奮予郎中玉春等升敘有差○以軍機處校勘漢字檔冊完竣予主事陸爽棠等升敘有差○旌表守正捐軀直隸定州民劉

黑子女蘭芝。永清縣民賈文惠女滿姐。丙戌改江蘇泰州營守備為泰興營陸路守備駐泰興。從署總督何璟請也。以故貴州餘慶縣土主簿楊茂元姪春鴻襲職。丁亥諭內閣恭上

慈安端裕皇太后

慈禧端佑皇太后徽號著欽天監於明年二月內敬謹選擇吉期舉行。又諭德英等奏布特哈滿洲總管請援例加銜一摺據稱布特

哈滿洲總管一缺管轄地方甚廣事務亦繁該員執掌關防所有官兵牲丁皆資統率請援照呼倫貝爾掌關防總管之例賞加副都統銜以崇體制等語著照所請布特哈滿洲總管一缺賞加副都統銜。諭軍機大臣等榮全奏請添調官兵以資鎮撫請飭張家口等處整頓轉運事宜富和奏請飭撥修理城垣等銀並請調員差遣各摺片榮全前派參領英廉等統帶吉林馬隊二百五十名前赴

庫爾喀喇烏蘇一帶屯紮為規取瑪納斯之計續又添派官兵四十名惟兵力太單難資鎮攝該署將軍隨帶官兵無多自應添撥勁旅以資分布著杜嘎爾即在所部吉林黑龍江馬隊內再撥五百名派員管帶自備行糧剋日起程前赴塔爾巴哈台聽候榮全調遣該官兵經過烏里雅蘇台著奎昌等添撥駝馬俾利進行榮全所稱杜嘎爾軍營如須添兵請在前次吉林黑龍江備調馬隊內酌調

五百名以補其數等語著杜嘎爾酌量情形如兵力實在不敷再行奏明調撥榮全遠在塔城所有後路轉運軍火糧餉等項均關緊要沿途經過各臺必須認真經理方免遲誤著額勒和布景瑞奎昌常順多布沁扎木楚志剛托倫布保英富和於榮全軍營運解各項以及兵差過境務須派委妥員迅速護送行抵塔境即由富和派員迎催照料毋稍延緩富和所奏修理城垣衙署及索倫官兵俸

餉需用銀八萬兩。又需用雜款銀二萬兩。著戶部照數撥給以資應用。又奏請飭綏遠城將軍揀派熟習漢文能辦奏摺文件之官弁二三員調往等語。著定安卽行揀派前往。交富和差遣。將此由五百里各諭令知之。以塔爾巴哈台屯田豐收。予防禦多仁泰等升敘有差。○戊子。諭軍機大臣等。穆圖善奏疊奉諭旨。現擬赴省與撫臣會商。移師駐紮一摺。臬司劉盛藻赴陝。此時計可到防。乾那附近足資控禦。穆圖善俟該臬司接防後。准其暫赴西安。與邵亨豫籌商。仍著懍遵前旨。移師平涼固原一帶。與雷正綰魏光燾聯絡聲勢。扼要分紮。是為至要。將此由五百里各諭令知之。○又諭成祿奏。親統前隊行抵玉門。現在挖勒窰匪。試辦屯田一摺。成祿現已親統八營。於九月初間。行抵玉門縣。擇要扼紮。後隊各營陸續西上。該處地方疊遭賊擾。居民大半流離。並有窰匪八九成羣。到處刦殺。

雖經成祿在惠回堡地方截剿。斃回匪數十人。惟賊夥尚多。分股四出。不特安敦玉三屬胥受其害。尤恐窰擾哈密後路。滋蔓堪虞。成祿統領各隊。旣抵玉門。卽著督飭官軍。勤加偵探。遇賊卽擊。務使就地殲除。毋任窰擾。為患成祿軍糧匱乏。採辦維艱。仍須關內接濟。以贍飢軍。左宗棠務當嚴飭蕭宗幹。何元普等。妥為設法。採辦源源轉運。毋得稍分畛域。致誤事機。景廉所調吉林黑龍江馬隊。亟望剋日到營。以厚兵力。現在行抵何處。著左宗棠沿途催令迅速趨行。毋稍遲滯。所有該軍行糧一切。並著左宗棠寬為籌備。俾利師行。景廉一面派員迎提。以資得力。成祿所統各營。足資防剿。此項馬隊。惟期迅抵。景廉軍營。成祿不得率行截留。致有遲誤。將此由五百里各諭令知之。○又諭前因肅州事機緊要。疊次諭令金順。剋期前進。迅赴戎機。並因成祿統帶各營。未能得力。密諭該前將軍於

行抵肅州後。卽將成祿一軍妥為接統。現在成祿已統率各營出關。前抵玉門扼紮肅州。攻勦事宜尤屬不容稍緩。金順刻下行抵何處。何以久無奏報。殊不可解。著該前將軍懍遵疊次諭旨。迅速前赴肅州。會同徐占彪。剋期攻拔。再行出關。接統成祿各營。妥為布置。以副委任。毋得稍有延緩。致誤事機。並著將抵肅日期先行具奏。將此由五百里密諭知之。又諭額勒和布。景瑞奏請將兩淮欠解

牧羣辦公息銀。飭催籌解。一摺。察哈爾口外牧羣向賴兩淮生息銀九千兩按年解交。藉資辦公。自咸豐二年停解後。卽由本羣抽收鹼釐項下。暫行撙節動用。現在收款不敷支放。辦公倍形支絀。兩淮軍務早竣。應解察哈爾牧羣生息銀兩。自應仍照舊章徵解。以資接濟。著張樹聲督飭兩淮鹽運使。迅速籌款撥解。卽一時未能如數籌撥。務須先撥一半。餘仍按年徵解。俾應急需。其自咸豐二年後

積欠之款。俟兩淮開辦新綱。停釐加課。再行如數帶徵補解。以清款項。將此諭令知之。追予直隸柏鄉殉難廩生魏業講等紳民婦女八十二名口分別旌卹如例。○追予直隸南皮殉難監生傅大銑。兪塢賞卹如例。○蠲緩直隸開東明長垣大名青靜海滄慶雲肥鄉九州縣被水地方新舊額賦有差。己丑以神靈效順。頒山西絳州河神廟扁額。曰神功式遏。○諭內閣。瑞麟等

奏勦辦滋事土匪。地方肅清。一摺。廣東瓊州府屬土匪何亞萬等藉名荒歉。糾集萬州黎匪滋事。經瑞麟等督飭署總兵劉成元帶兵勦辦。該匪逃匿黎峒。仍敢糾眾負隅。四出劫擄。復經劉成元會督官紳兵勇分路攻勦。當將匪首何亞萬等擒獲。並獲要犯多名。悉行正法。餘匪一律殲除。辦理尚為迅速。仍著瑞麟等嚴飭在事員弁協同地方官認真搜捕逃匪。務絕根株。並飭稽查戶口禁止奸民勾

結以遏亂萌。其被擾災民。卽著妥為安撫。毋令一夫失所。以廣東瓊州勦辦土匪地方。肅清。予總兵官劉成元優敘。陣亡把總胡見龍。六品軍功唐元昇。祭葬世職。予廣東增城陣亡殉難紳民尹端熊等暨勇丁一百三十四名賞卹如例。並予建祠。○庚寅甯夏將軍穆圖善奏。陳甘省軍情。請飭督臣左宗棠所留後路各營。移調前路。得旨。前因左宗棠兵力不敷。准調宋慶一軍助勦。現因晉省河防緊要。該軍暫緩拔營。此時蘭州北山一帶。該督恐亦無兵可以填紮。所有原駐各隊。穆圖善仍當飭令照舊扼紮。以資防勦。至所稱左宗棠後路各營。仍可移調前路等語。所指後路各營。究有若干。係屬何人統帶。現紮何處。著該將軍詳細具奏。尋奏。遵查左宗棠後路現有提督劉端冕統帶九營。在金縣皋蘭安定所屬駐紮。提督周紹濂統帶五營。在會甯縣城及所屬駐紮。提督雷正綰分紮一營。

於固原地方。平慶涇道魏光燾統帶六營。在靜甯隆德平涼各處駐紮。自甘肅省城以東至平涼縣止。共紮二十一營。報聞。○以戶部左侍郎志和兼署刑部右侍郎。○旌表守正捐軀直隸獻縣民唐仁義女蘇姐。○辛卯諭軍機大臣等。劉嶽昭奏毓英奏官軍攻勦館驛等處踞匪。迤東迤南肅清。一摺。滇省賊擾多年。現在迤東迤南肅清。省西府州縣城未復者。尚有幾處。已復各城。尚有餘匪滋擾者。又幾處。著劉嶽昭岑毓英詳細查明。據實具奏。一面慎選賢能守令。將已復地方善後事宜實力興辦。並整飭捕務。嚴查奸宄。以靖地方。大理賊匪負嵎已久。上下關早經克復。該撫現赴前敵督勦。卽著岑毓英於馳抵大理後。嚴飭該將領等妥籌進攻。迅將大理府城剋期攻拔。並將附近賊巢一律掃蕩。毋稍遲緩。劉嶽昭等另摺奏汪敘疇所陳賊欽過重吏治不修各節。雖稱尚無其事。該督等仍當

隨時稽察認真整頓俾地方日有起色是為至要將此由五百里各諭令知之○以雲南館驛等處勦除踞匪賞總兵官張保和何秀林一品封典副將姜飛龍參將楊友李傑李占春夏天德徐應宿崔萬順李和雷應山覃修綱梁福袁雲王維本李朝有遊擊趙林玉楊國寶武勇貞李朝相高榮尚粹黃才廣守備張繼聲梁士偉巴圖魯名號知府姚嘉驥遊擊林守懷等花翎州判陸緝孫等藍翎餘

加銜升敘有差予軍營病故道員周之珪祭葬卹廕加等與陣亡副將李廷標並建專祠遊擊趙廷雲等六十員一併附祀○以打仗奮勇賞還雲南已革總兵官申有謀等頂帶○予雲南各屬陣亡殉難訓導楊碩臣等紳民婦女二千五百四十四員名口分別旌卹如例○壬辰諭軍機大臣等戶部奏豫撥來年京餉一摺據稱歷屆京餉均於年前豫撥同治十二年京餉擬在各省地丁鹽課關稅

等款內指撥銀七百萬兩請飭各該省於來年分批起解等語京餉關係緊要現經該部就各省緩急情形斟酌動撥自應遵照奏定數目源源報解以濟要需著該將軍督撫鹽政監督等務於來年開印後分批起解限五月前解到一半十二月初間全數解清不准截留改撥藉詞延誤儻屆限不到卽照奏定章程指名嚴叅原單均著鈔給閱看另片奏本年用款甚鉅請飭將指撥續撥京餉並各

海關應解四成洋稅及欠解漕折銀兩迅速撥解等語著各該督撫迅卽籌解統於十二月初間全數解齊以應急需其豫撥來年京餉務各提前趕撥源源批解毋稍延誤又片奏內務府同治十二年分應需經費擬撥兩淮鹽課銀五萬兩兩浙鹽課銀五萬兩廣東鹽課銀五萬兩福建茶稅銀十萬兩閩海關常稅銀十萬兩太平關常稅銀十萬兩九江關常稅銀十五萬兩共銀六十萬兩請飭依

限完解等語。著該將軍督撫鹽政監督等。各按撥定數目。務於來年開印後。陸續徑解內務府。先將起程日期報部。限六月前解到一半。十二月初間。埽數解清。不准稍有帶欠。將此由五百里諭知福州將軍。直隸兩江湖廣閩浙兩廣四川江蘇安徽江西福建浙江湖北湖南河南山東山西廣東各督撫。並傳諭粵海關監督知之。○癸巳。諭內閣。御史吳鳳藻奏。鄉會兩闈。請整飭謄錄對讀積弊。並請

飭逐場校閱各摺片。文闈謄錄對讀等官。原為除弊而設。若如該御史所奏。謄錄任意潦草。對讀視為具文。此等弊端。亟應嚴行整頓。嗣後各直省監臨知貢舉。務當飭令各執事官認真辦理。有犯必懲。至闈中校閱文藝。本應三場並重。不得專重第一場。此後中外臣工。凡與衡文之任者。務當逐場衡校。冀拔真才。毋許草率從事。用副朝廷籲求賢俊至意。○甲午。

聖祖仁皇帝忌辰。遣官祭

景陵。○諭軍機大臣等。丁寶楨奏。在粵製造師船。請飭派員駕駛來東。及調員赴東。差委各摺片。前因山東整頓水師。該府委派道員李宗岱前赴粵東。製造大小拖罾船十四號。配齊洋礮軍械。就近在粵海等處。選帶熟諳水師員弁數人。遴募善於駕船之舵工人等。隨船來東。據稱師船來春可以造齊。應於春夏之交。乘風北上。惟遠涉重洋。與其臨時雇募無業閒人。莫若就近飭令粵省水師。駕送較為可恃等語。卽著瑞麟。張兆棟。俟李宗岱師船造齊出水時。酌派該省水師營誠樸可靠將弁。酌帶兵丁。會同山東委員代為駕送赴東。以免疏虞。至該弁兵到東後。卽由丁寶楨籌給川資。咨送回粵。廣東在籍候選員外郎溫子紹。候選縣丞許應驥。並著瑞麟。張兆棟。飭令該員等前赴山東。聽候丁寶楨差遣。委用。將此各諭令知之。○予甘肅甯夏等處陣

亡委參領瑪克斯等十四員祭葬世職。蠲緩山東鄆城。濮壽張濟甯齊東東平東阿惠民青城陽信濱利津鄒滕嶧汶上陽穀荷澤曹鉅野范觀城朝城聊城茌平金鄉魚臺章邱鄒平齊河臨邑蒲臺滋陽甯陽單城武莘長山新城長清嘉祥海豐霑化蘭山郯城博興高苑樂安商河臨清濟陽禹城陵德肥城平陰樂陵曲阜定陶堂邑博平冠清平高唐恩夏津武城邱濰平原歷城七十一州縣暨

濟甯青州東昌德州臨清五衛被水被旱被風被蟲地方新舊額賦有差。○乙未諭軍機大臣等曾壁光奏官軍攻克新城。上游肅清一摺。黔省回匪久踞新城。經周達武親往督勦。會同滇省兵勇分門進攻。於十月初五日將新城克復。生擒逆首金萬照正法。上游一律肅清。全黔底定。覽奏殊深欣慰。著俟詳細情形奏到。再行降旨宣示。該省變亂垂二十年。現在軍務初平。瘡痍滿目。亟應整飭吏治。

撫輯民生。著曾壁光督飭所屬將應辦善後事宜悉心經理。以期地方日有起色。其安插鎮撫各事。並著曾壁光周達武妥慎籌辦。毋貽後患。另片奏下江生苗滋事。當經總兵張文德率隊勦除等語。辦理尚為妥速。所有出力員弁。准其擇尤彙請獎敘。毋許冒濫。下江地方現經曾壁光派隊彈壓。並著該撫飭令地方官妥為撫綏。以安反側。將此由五百里諭知曾壁光。並傳諭周達武知之。○又諭奎

昌等奏派兵勦賊獲勝一摺。肅州竄匪擾及蒙古喀爾喀所屬西南各旗境內。經達爾濟督軍追勦於庫爾庫噶地方斃匪多名。該逆向西奔逸。現已竄往科屬以南之扎哈沁旗界距科城甚近。即著奎昌常順多布沁扎木楚志剛飭令達爾濟派撥馬隊迅速西進。務將此股賊匪悉數殲除。毋留餘孽。托倫布保英著一面布置城防。一面派撥科屬兵勇會合夾擊。淨埽賊氛。將此由五百里各諭令知

之○又諭杜嘎爾奏請飭派員暫行接管隊伍一摺。前因杜嘎爾舊疾復發。當經賞假一月。在營調理。茲據奏稱。痼疾增劇。精神委頓。未能督隊勦賊。請飭定安暫派妥員接管所部隊伍等語。杜嘎爾向來帶隊勇往。近來在邊外防勦。亦甚得力。現在患病未愈。自係實情。仍著在營安心調理。本日據奎昌等奏肅州出邊之賊。現竄科屬以南之扎哈沁旗界。賊蹤飄忽。靡常自應。豫籌截擊。杜嘎爾既未能剋期督勦。著先派得力營員管帶各隊探賊所向。相機勦辦。並著定安酌派妥員迅速前往杜嘎爾營中。暫行接管隊伍。以期無誤。戎機一俟杜嘎爾病體稍痊。仍歸該副都統親自調度。毋稍諉卸。將此由五百里各諭令知之。○命科爾沁鎮國公棍楚克林沁在紫禁城騎馬。賞三等台吉圖普蘇爾塔勒圖。四等台吉圖巴勒博哩勒圖花翎。○以烏里雅蘇台辦理臺站兵糧出力。賞頭等台吉丕凌

哩扎穆楚等公銜。四等台吉鄂林準多爾濟等花翎。餘升敘有差。○丙申。

上奉

慈安端裕皇太后

慈禧端佑皇太后。幸漱芳齋侍午膳。○諭軍機大臣等。張樹聲奏拏獲搶梟積匪。分別懲辦。並查拏哥老會匪各摺。片江浙交界處所時有搶匪出沒。擾害地方。本年九月間。竟有大夥槍匪乘駕梟船數十號。駛至太湖。經張樹聲會同提督李朝斌派兵分投堵截。匪黨恃眾拒捕。官軍合圍痛勦。拏獲大小梟船三十八隻。擊沈二隻。起獲私鹽槍礮等件。餘匪梟水逃逸。復在餘杭桐鄉太湖等處。緝獲槍匪頭目李阿四等多名。此等匪徒黨與甚眾。現雖大受懲創。在逃餘黨。亟應悉數查獲。毋任逃匿。江浙邊界。濱臨太湖。港汊紛歧。犬牙交錯。易致此拏彼竄。著張樹聲恩錫楊昌濬各飭地方營汛員弁認真巡緝。協力兜拏。務絕

根株該匪等以聚賭藏身。乘閒勾結劫掠。張樹聲已飭屬查拏賭局。清理保甲。隨時稽察。使匪徒無可容身。卽著恩錫責成各州縣實力奉行。並著楊昌濬一體照辦。以靖盜源。至哥老會到處結黨拜盟。此風斷不可長。張樹聲現將羅林保譚啟思二犯查拏正法。其供出劉東伯陳錦汶二犯著王文韶檄飭所屬嚴密捕獲。毋任漏網。並將游兵撤勇。悉數驅逐出境。不准逗遛。其沿江沿海軍民暨水陸

各營不少此類涸跡。卽照張樹聲所議准其自首免罪。儻仍啓不畏法。一經發覺。卽著重懲不貸。將此由四百里諭知張樹聲楊昌濬王文韶並傳諭恩錫知之。○又諭前因貴州辦理善後需餉甚殷。諭令由福建借撥銀二十萬兩。迅速解黔應用。卽由四川廣東江西湖北浙江等省籌款解閩歸還。現在黔軍已將新城攻拔。上下游一律肅清。善後事宜尤屬刻不容緩。閩省釐稅支絀。自屬實情。惟黔

省需餉孔殷。亟須趕緊設法措解。以期無誤。現經李鶴年等先後籌撥銀八萬兩解往應用。其未撥之十二萬兩。仍著李鶴年王凱泰迅速籌措。陸續解齊。俾供支用。四川等省積欠黔餉甚多。此次諭令分籌解閩歸款。自是移緩就急。且各撥銀四萬兩。為數無多。豈可意存延宕。使閩省獨為其難。著瑞麟李瀚章吳棠楊昌濬劉坤一郭柏蔭張兆棟等懍遵前旨。迅各撥銀四萬兩。剋期解交福建。以清

款目。毋得稍有延緩。致誤要需。將此由五百里各諭令知之。○直隸總督李鴻章奏請將新授福建水師提督彭楚漢仍暫留直隸大名鎮總兵官署任。以資鎮撫。允之。○緩徵安徽泗宿松定遠靈璧盱眙望江五河太湖東流鳳臺天長貴池鳳陽桐城建德壽和銅陵巢縣上霍邱含山無為潛山青陽當塗繁昌宿蕪湖廬江合肥懷甯宣城旌德南陵舒城懷遠阜陽太和毫蒙城渦陽四十二州縣被

水被旱被風被蟲地方新舊額賦暨雜課有差。

大清穆宗繼天開運受中居正保大定功聖智誠孝信敏恭寬毅皇帝實錄卷之三百四十四

大清穆宗繼天開運受中居正保大定功聖智誠孝信敏恭寬毅皇帝實錄卷之三百四十五

教修

同治十一年壬申十一月丁酉諭內閣醇親

王等奏部文辦理舛誤請旨飭查一摺據稱接准兵部來文以軍政屆期咨行內外火器營將本管大臣職名事實造冊送部向無辦過成案無可咨覆旋據兵部兩次咨催當照例由內火器營備文聲覆兵部於覆文各情置之不問復以前事逾限未報嚴催外火器營實屬辦理舛誤請飭查究等語著兵部堂官查明如果辦理舛誤即將承辦司員叅奏至該部三次文件內或有職銜花押或僅有

花押並無職銜。因何兩歧。著一併查明具奏。尋奏。部文畫押。係該司員自行標識。應否填寫職銜。原未定有章程。至軍政造冊。向分滿洲火器營一冊。外火器營一冊。先後行文各營。據內火器營咨覆。而外火器營仍未聲覆。是以再催。於公事尚無舛誤。惟該司員於內外火器營有無合辦之處。未能查悉。究屬疏忽。應請交部議處。從之。又諭。左宗棠奏。陝甘民食緊要。請嚴禁種植罌粟一摺。民間栽

種罌粟。本干例禁。現在陝甘地方。瘡痍甫復。耕墾無多。民食軍糧。猶虞不繼。亟應講求農務。以冀豐盈。即著左宗棠嚴飭各地方官。申明定例。悉行禁止。如有民間貪利私自種植者。即於根苗初發時。飭令盡行拔除。並嚴禁丁差。不准藉端擾索。儻有不肖官吏。仍敢故違例禁。按畝收稅。即著照枉法贓嚴參治罪。其煙土之來自外省者。並著一律嚴查。不准入境。以期淨絕根株。各直省亦宜一體嚴禁。

有犯必懲。毋使有妨民食。○諭軍機大臣等。額勒和布景瑞奏。遵籌馬隊出邊。並請飭部速撥銀兩。各一摺。此次調赴烏魯木齊之馬隊一千名。取道張家口出邊。所需隨軍駱駝。約一千五六百隻。額勒和布等現已派員赴錫林郭勒等旗採買。仍恐不能如數。歸綏地面。向有駝市。著定安酌覈籌款。迅在該處採買駱駝八百隻。派委委員解送張家口應用。以利師行。至前撥部帑銀兩。據額勒和布等

奏稱。業經用盡。轉瞬馬隊出邊。饋運轉輸。需用甚鉅。若待各省解餉。深恐緩不濟急等語。自係實在情形。著戶部迅即籌撥銀十五萬兩。交順天府派員解至察哈爾。交額勒和布等收存支用。以應急需。此項馬隊到口。如有疲乏。即由額勒和布等查看。調取捐輸馬匹。按數更換。俾免濡滯。其餘未盡事宜。並著該都統等隨時奏明辦理。將此由四百里各諭令知之。○戊戌。諭內閣。李瀚章王文韶奏。節

婦孝女。同時自盡。請特賜旌表。並道員處置乖方。請旨革職各摺片。湖南已故知府李杏春於咸豐五年在湖北勦賊陣亡。該故員之妻朱氏痛夫成瞽。矢志守節。其女端貞。娥貞。均經許字。立志不嫁。茹素求愈母目。李杏春之兄李光燎向伊姪女勸解。強令開齋。端貞等孝思純篤。堅執己志。李朱氏因伊目失明。致誤二女終身。乘閒自盡。端貞。娥貞痛母情切。亦卽自縊殞命。一門節孝。深堪嘉憫。李朱

氏並其女端貞。娥貞著交部一併照例旌表。貴州候補道李光燎勸伊姪女開齋出嫁。操之過切。致釀三命。已屬咎無可辭。且事後復以李朱氏母女喫齋入魔。自盡等詞呈報。希圖掩飾。已過居心。尤為險詐。李光燎著卽行革職。以示懲儆。○諭軍機大臣等。常順保英昌等所奏情形大略相同。該匪現已逼近濟爾根地方。距科城僅一百餘里。亟應迅速撲

滅。托倫布計已抵科。卽著常順將該城防勦事宜。與該署參贊等妥籌辦理。並著托倫布保英。懍遵前旨。趕緊布置城防。並於附近各要隘嚴密扼守。一面設法派撥兵勇。會同烏城派出官兵探蹤擊勦。以淨逆氛。達爾濟馬隊追勦此股賊匪。現抵何處。著奎昌常順多布沁扎木楚志剛嚴飭該總管督率隊伍。無論賊匪竄擾何地。卽行迅速兜勦。務絕根株。將此由六百里各諭令知之。○又諭。前據景

廉奏調道員黎獻赴營差遣。當諭令吏部傳知該員。在楚省酌帶舊部將弁採買軍火器械。前赴景廉軍營。應需價值。由湖北應撥景廉軍餉內提撥應用。茲據李瀚章奏接據景廉咨稱。已飭黎獻就近在湘楚地方招募數營。現在該員到鄂。當籌撥銀三萬兩交該員前赴上海採辦軍火。並籌備銀一萬兩俟該員回鄂兌交。惟由湘鄂募勇出關。行糧甚鉅。且該勇丁於西北風霜水土皆未服習。尤恐

中途逃散別滋事端請由景廉就地添募等語著照所請卽毋庸在湘鄂招勇立營景廉軍營所需勇丁卽著該都統就地招募以資得力其採買軍火及撥解餉銀著李瀚章飭令黎獻酌帶將弁妥慎解往並據李瀚章奏素知黎獻前在江西帶勇甚不得力等語著景廉俟該道員到營後隨時留心察看毋任債事將此各諭令知之○乙亥補行同治十年大計陝西卓異官九員不謹官一員浮躁

官一員才力不及官一員年老官一員分別議敘處分如例○

上以冬至祀

天於

圜丘自是日始齋戒三日○庚子諭內閣倉場侍郎延煦畢道遠暨御史克什布奏職官攪擾倉務請革職究辦各一摺據稱本月十五日祿米倉監督在倉查點米票突有五品頂翎一人糾領多人上堂搶去米票經該監督

等飭役追拏始據供出姓名係三等侍衛慶澍隨將搶去米票交出並呈出未領米票二十四張內惟本身一票餘票並不一旗等語京倉地面理應嚴肅乃侍衛慶澍身任職官輒敢搶懷米票入倉滋事是其包攬把持情跡顯然難保非積慣倉蠹若不從嚴究辦何以清積弊而儆奸徒慶澍著先行革職交刑部嚴行審訊從重定擬並查明黨與按名嚴拏歸案一律究辦以肅法紀○諭軍機大臣

等奎昌等奏探聞科城被擾催隊追剿請調庫倫練軍暨察哈爾馬隊各摺片據稱接據西七臺台吉探報十月十七日賊至科城南街外十八十九兩日賊住街內二十日放火燒毀房屋向南遠颺等語前據常順保英馳奏賊竄入境情形卽係十月十七日拜發之件雖稱漸偏科城尚在一百餘里之內而奎昌等探報則是日賊已薄城且賊匪連日焚掠城關未見常順等出奇制勝所謂襲弱擣

虛者安在。現在賊已飽颺。究竟竄向何處。常順等當偵探明確。知照各城一體兜勦。不得以賊眾兵單。未能攻擊為詞。任聽匪蹤奔突。托倫布計已抵科。著懷遵前旨。與保英布置城防。相機扼守截勦。毋稍疏懈。奎昌等即飛催派出馬隊兼程赴科。探明賊蹤。實力追勦。迅掃賊氛。並著常順等派兵會同進擊。不得在城株守。莫展一籌。致干重咎。此股賊匪據奎昌等奏止有六百餘名。何以常順等前奏

稱係二三千眾。多寡懸殊。是否偵探不確。抑有另股分竄。著據實具奏。賊蹤飄忽。難保不回竄烏城。奎昌等當將城防先事豫籌。毋稍疏忽。所請於庫倫練軍內抽調古北口宣化兵共五百名。以資防禦。自係移緩就急之計。著張廷岳阿爾塔什達照數派撥。裹帶行糧等件。分起速赴烏城。交奎昌等調遣。達爾濟等馬隊。即作為追勦之兵。以資得力。如庫倫練軍不敷分撥。即再由宣化古北口轉調足

額著張廷岳等酌度辦理。烏城尚需馬隊。著額勒和布景瑞再揀調蒙古馬隊二百五十名。裹帶行糧軍裝。分起赴烏。於明年正月內陸續到齊。務須一律精壯。不得以疲弱充數。將此由六百里各諭令知之。○又諭張曜奏派隊分紮鎮番等處防勦情形。一摺。鎮番縣屬及阿拉善旗一帶地方。遠闊時有賊匪竄擾。現經張曜派令提督李葆琛管帶三營。前赴柳林湖紅沙梁各處。協同郝永剛擇要分

紮。兼顧金順運道。靈州花馬池一帶。亦派提督王連三管帶親兵兩營前往。俟譚拔萃各營拔赴西甯。即行填紮。著張曜飭令派出各軍認真防勦。遇賊即擊。毋稍疏虞。該提督仍當親率馬步隊隨時偵探。實力勦擊。竄匪率多騎賊。飄忽異常。張曜所部馬隊僅有兩營。不敷追勦。著定安迅即籌撥馬隊數百名。協同追勦。盡掃逆氛。鎮番縣東西灣竄匪。雖經郝永剛等勦敗。擒斬多名。賊匪現向永昌縣

一路遁逃。仍當跟蹤追勦。並著張曜知會涼州官軍。一同截擊。就地殲除。以清邊患。將此由五百里諭知定安。並傳諭張曜知之。○旌表守正捐軀河南武陟縣民孟培芝妻宋氏。○撥神機營洋礮四尊。洋馬槍七百五桿。解赴烏里雅蘇台軍營備用。○蠲緩浙江仁和錢塘海甯富陽餘杭臨安新城於潛昌化嘉興秀水嘉善海鹽平湖石門桐鄉歸安烏程長興德清武康安吉孝豐諸暨金華蘭谿東

陽義烏浦江湯溪西安龍游建德淳安遂安壽昌桐廬分水宣平山陰會稽蕭山餘姚臨海黃巖甯海天台仙居永康武義常山開化麗水縉雲青田松陽鄞象山上虞新昌嵊永嘉樂清瑞安泰順遂昌雲和六十七州縣杭嚴嘉湖衢州台州四衛被水被旱被風被雹地方暨未墾田畝新舊額賦有差。○辛丑上詣

南郊齋宮齋宿。○諭內閣左宗棠奏請將本任

署任道員分別開缺實授等語。甘肅西甯道舒之翰久未到任。署西甯道郭襄之在任多年。尚知受民。當回逆馬本源等出城勾結陝回之時。該員督率士民守城禦賊。尤能調度合宜。既據該督奏請補授。是缺舒之翰著卽開缺。所遺西甯道員缺。卽著郭襄之補授。並著左宗棠將舒之翰應行查辦之件。仍遵前旨查明具奏。○諭軍機大臣等。左宗棠豫師奏西甯解圍現籌辦理情形一摺。西甯被圍

日久。此次劉錦棠督軍深入立解城圍。並分別安插難民降眾。辦理甚妥。該處久為賊擾。民不聊生。一切善後事宜。卽著豫師會商左宗棠悉心布置。毋令失所。回族結黨甚固。醜類繁多。仍恐有不逞之徒。暗中勾結。別滋事端。亟應將伏莽一律掃除。毋貽後患。並著左宗棠豫師隨時加意防範。以期綏靖。地方至叛逆馬本源等帶同土匪挈眷逃遁。已抵巴燕戎格。豈可任其遠颺。仍當設法按名弋獲。

明正典刑以示懲儆。陝回是否仍踞西川如其逃向甘州左宗棠當飭令各軍跟蹤追剿並檄甘涼各隊迎頭兜擊就地殲除毋聽其乞撫緩師致墮賊計。將此由六百里各諭令知之。○又諭常順保英奏賊撲科城擊退並請保出力員弁各摺片據奏賊匪攻撲科城勢甚猖獗經在營將弁竭力拒守。歷三晝夜賊眾始由東南山路仍向扎哈沁部落奔竄等語與奎昌等所奏大略相同。此股賊匪雖

經退走並未大受懲創難保不去而復來伺隙竄突。常順等當懍遵昨日諭旨偵探明確知照各城一體兜剿不得株守一隅致干重咎。托倫布抵科後務與保英布置城防相機扼守截剿毋稍疏懈。奎昌等仍飛催派出馬隊探明賊蹤實力追剿迅掃逆氛。此次守城出力員弁及修治城濠辦理臺站各員均著常順等先行存記俟此股賊匪全行剿滅該員等續有勞績再行據實奏保。常順等摺內

聲稱賊匪二千餘眾與奎昌昨奏六百餘名數目懸殊仍著懍遵前旨確查具奏賊蹤飄忽烏城防守事宜奎昌等宜先事豫防毋稍大意將此由六百里各諭令知之。○以甘肅西甯府城解圍賞道員劉錦棠白玉翎管一支白玉搬指一箇大荷包一對小荷包兩箇火鐮一件提督陳啟明劉象賢宋祥發鄧時益李隆寶李清勝喻少還匡義志彭明達李春元李恆春周恆升總兵官朱正和正一品

封典提督余虎恩席大成黃馬褂提督黃友信邱俊鳳張振壽劉得喜副將張沛鄧增參將陶鼎金遊擊李章貢楊金龍蘇秀生袁紹華李得勝都司張俊楊錦棠張得昇劉長其李孝隆彭秀文巴圖魯名號參將周國泰等花翎把總張瑞揚等藍翎餘加銜升敘開復有差予歷次陣亡遊擊陳湘林等一百三十七員祭葬世職加等。○子科布多陣亡守備賀遐齡千總何大明外委謝登高祭葬世職

加等○壬寅冬至祀

天於

園丘

上親詣行禮○詣

關帝廟拈香○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢○停次日朝賀○奉

慈安端裕皇太后

慈禧端佑皇太后幸漱芳齋侍午膳○癸卯賞

鑾儀衛侍衛各員緞匹並賞請輦校尉銀○

甲辰江蘇巡撫張樹聲奏嘉定寶山二縣折

徵漕糧現因歲稔價平請酌量減價折收報

聞○乙巳諭內閣錢鼎銘奏訊明積惡匪犯

請旨就地懲辦一摺已革千總馬勞柳在河

南滑縣等處通匪窩賊擾害閭閻現經訪獲

訊明該犯罪案多端供證確鑿自應立予嚴

懲馬勞柳一犯著卽就地正法以昭炯戒○

諭軍機大臣等喬松年奏查勘運道隄岸請

籌款辦理各廳另案工程並籌辦上年侯家

林決口衝沒隄埝緯道等工各摺片運河為

漕艘所經各段淤淺處所必須趕緊挑濬方

免臨時貽誤喬松年現擬自三里堡至張秋

一帶由丁寶楨派員辦理。三里堡以南由該河督督飭道廳辦理。自應通力合作。各專責成。卽著喬松年等各飭在工人員。將各段淤淺處所趕緊挑濬。務期一律深通。俾此後漕艘暢行無滯。其癸酉年各廳另案各工。必應寬為估辦。方免臨時棘手。著丁寶楨卽飭藩司籌撥銀六萬兩。由喬松年督飭道廳將緊要工程覈實估辦。毋稍虛糜。至侯家林決口所衝隄埽緯道亦應及時興修。前經喬松年

奏准由山東籌撥之五萬兩。並著丁寶楨趕緊飭司撥發。毋誤要工。將此各諭令知之。○以河南官軍會勦安徽交界匪徒出力。賞同知丁建勳。守備魏雲標等花翎。都司尹彥鏢等藍翎。餘加銜升敘開復有差。○追予河南汝甯陣亡知府王榮烈諡忠毅。○追予安徽汧河陣亡河南知府顏懷忠諡誠毅。於鹿邑縣任所暨原籍建立專祠。府經歷陳謨附祀。○予山西吉州等處殉難知州莫倉榮驛丞

陳鑑祭葬世職。○丙午。諭內閣。額勒和布景瑞奏司員辦稟蒙混以致揀選錯誤。據實檢舉一摺。察哈爾鑲黃旗出有副參領一缺。據該旗署總管巴雅斯呼朗塔爾將噶勒桑車林等呈送請揀。經額勒和布等揀選。以噶勒桑車林擬正咨部。嗣經查明該員原保係以軍臺副參領卽補。並無以本旗副參領卽補字樣。乃該司員於呈畫咨部查覈稟內竟敢將該員原保官階任意刪改。其鑲黃旗署總

管送選冊內亦未註明軍臺字樣。以致揀選錯誤。均有應得之咎。所有辦稟蒙混之左司掌印員外郎承恩候補防禦景文著分別交部嚴加議處。呈送揀選並未詳細聲敘之察哈爾鑲黃旗署總管及該司隨同畫稟之官員等均著查取職名。分別交部議處。額勒和布於該司呈畫稟件未能查出。著交部議處。景瑞到任未及三月。著加恩改為交部察議。尋議額勒和布應罰俸六箇月。景瑞罰俸三

箇月巴雅斯呼朗塔爾降一級留任均准其抵銷從之○諭軍機大臣等喬松年奏黃河工程緊要請添撥癸酉年防險銀兩一摺據稱黃河兩岸各工應需稽麻甄石等項必須豫為儲備現在樽節估計擬仍照九十兩年舊章先請添撥銀二十六萬兩分給南岸十四萬兩北岸十二萬兩等語著照所請於歷年節省項下添撥銀二十六萬兩由河南巡撫督飭藩司於年前先撥四成以便採購料物其餘六成務於春汛前撥交俾資接濟喬松年務當督飭該道廳等覈實動用總期工堅料實不得稍涉虛糜將此各諭令知之○又諭張廷岳阿爾塔什達奏調撥官兵擇要扼守並請催解餉需等語庫倫防務緊要所有該城前調宣化古北口練軍及本地蒙古官兵經張廷岳等派撥偵探防守現值天氣嚴寒口外地方瘠苦該兵丁所需餉銀亟應迅籌接濟著丁寶楨鮑源深錢鼎銘卽將各

該省應撥庫倫餉銀查明數目迅速籌撥解交張廷岳等應用毋稍遲緩前據奎昌等奏賊匪紛竄烏科等處請調庫倫練軍防禦當經諭令張廷岳等照數派撥並令該辦事大臣等酌度情形如該城練軍不敷再由宣化古北口轉調足額現在辦理如何卽著隨時具奏一面飭令派出弁兵遠探賊蹤嚴密防守蒙兵駐守額爾德尼招一帶並著飭令加意嚴防遇有賊匪卽行會同勦擊將此各諭

令知之○蠲緩江蘇長洲元和吳吳江震澤常熟昭文崑山新陽太湖華亭婁金山青浦武進陽湖無錫金匱江陰宜興荆溪丹徒漂陽太倉鎮洋嘉定靖江奉賢寶山二十九廳州縣蘇州太倉鎮海金山鎮江五衛被旱地方暨未墾田畝本年額賦有差○丁未諭軍機大臣等邵亨豫奏劉盛藻到陝接統銘軍並北路零匪竄越勦除殆盡各一摺臬司劉盛藻於十一月十五日行抵陝省現已馳赴

乾州接統曹克忠所部各營著邵亨豫飭令該臬司妥籌駕馭嚴密布置不得稍涉疏虞曹克忠所收潰卒立為馬隊二營前據該提督奏請分隸李輝武譚仁芳部下茲據邵亨豫奏此項勇丁駕馭不易未可輕率分撥卽著該撫督飭劉盛藻體察情形應如何酌量撤留隨時妥慎辦理毋任滋生事端穆圖善擬由邠進省與邵亨豫籌商防務該將軍當懷遵疊次諭旨扼紮平涼固原一帶以為甘

省後路聲援毋得意存畛域致誤事機陝北二套河等處賊騎分股竄擾經譚仁芳等帶隊追剿殲斃殆盡其追至克丑爾廟一起匪徒據奏沙地浩渺迷賊所向究竟竄往何處仍著嚴飭該將領跟蹤搜捕務絕根株並著左宗棠飭令甘省各軍嚴密扼防毋任匪股紛竄草地致滋延蔓徐占彪攻勦肅州情形若何著左宗棠檄飭該提督穩慎進取力圖攻拔以期早靖西陲西甯解圍後一切善後

事宜均應妥為經理逆首馬本源等遁往巴燕戎格等處該大臣當嚴飭各軍設法購拏迅速弋獲以申法紀將此由四百里各諭令知之○以故貝勒溥莊子毓楠降襲貝子爵○以故不入八分輔國公岳靈繼子崇吉襲爵○以故扎薩克圖汗鎮國公車林多爾濟子那遜瓦齊爾襲爵○追予湖北武昌殉難護按察使署知府多山諡忠壯○戊申諭內閣吳崇奏特參不職各員請分別降補改用等語四川洪雅縣知縣張文奎才識庸淺署通江縣事候補知縣黎亘熙治理未諳均著以府經歷縣丞降補蒼溪縣知縣員登魁渠縣知縣張鍾瑛才具拘謹辦事竭蹶均著改歸教職選用○乙酉諭軍機大臣等前據金順奏遵旨於九月十五日起陸續拔隊西行由甘涼徑向肅州疊次有旨催令前進迅赴戎機並諭將抵肅日期先行具奏數月以來未據金順續有奏報殊不可解刻下西甯業

已解圍。惟肅州一城未下。該處軍務正形喫緊。金順計應早到肅州。現在行抵何處。著卽行奏聞。並懍遵疊次諭旨。迅赴肅州。會同徐占彪。尅期攻拔。卽行出關。接統成祿各營。妥為布置。毋再遲延。干咎。將此由六百里密諭知之。○庚戌。諭軍機大臣等。楊昌濬奏來歲新漕。由海運津。請飭多備剝船一摺。據稱浙省同治十二年。起運十一年分漕白糧米共四十五萬三千七百五十餘石。由海運津。現

因商船缺乏。議以輪船裝載。自正月起至五月止。每月可裝二次。循環轉運。共可裝米二十萬石。至輪船到津。一時未能驗卸。自應起棧候剝。特恐船隻不敷轉運。不惟久儲棧房。易於蒸變。且輪船行駛迅速。設前批存棧之米。尚未驗剝。後批之米。無處囤卸。辦理諸多窒礙等語。所奏自係實在情形。著李鴻章飭令天津道縣。屆期多備船隻。趕緊剝運。並查照上屆福建採辦米石章程。會同倉場侍郎

臨棧查驗。隨驗隨剝。毋稍延緩。將此諭令知之。

大清穆宗繼天開運受中居正保大定功聖智誠孝信敏恭寬毅皇帝實錄卷之三百四十五

遵前旨。豫為部署。一俟開正。即行拔隊西進。不准稍涉耽延。神木一帶。必須有兵填紮。並著定安調撥隊伍前往駐守。以期嚴密。晉省河防。鮑源深當妥籌布置。毋稍大意。隴中糧運艱阻。豫省撥給穀軍餉項。自尚不敷。著照左宗棠所請。將河南月協西征餉銀一萬五千兩。改為穀軍運費。自同治十二年二月為始。即同該軍月餉一併解至宋慶行營。錢鼎銘當嚴飭藩司源源接濟。不得稍有蒂欠。致

誤要需。將此由五百里各諭令知之。○又諭。景廉奏西路營弁盤獲悍回。按出文信一摺。據稱回逆妄得璘派人赴古牧地給馬明送信。意欲約會孔才助勦安夷。經營官秦殿喜盤獲。按出偽文。該逆復遣馬進才等赴西甯送信。欲約該處回兵出關相助。亦經西路營弁盤獲。其駐紮古牧地之徐學功等營勇丁現經馬明全數撤回原營等語。前據景廉奏回目馬明投誠。本不足恃。該回目現聞我軍

進兵。遽將古牧地勇丁撤回。顯因官兵前進。意存疑懼。反覆無常。妥逆並令馬明約會官軍。為伊復仇。尤為詭譎。著景廉飭令駐古各統領。勤加偵探。慎守營壘。不得輕率進兵。致為所愚。妥逆意欲糾約西甯回逆出關。尤當嚴加防範。著左宗棠文麟多派兵弁於關內外地方隨時確探。遇有該逆遣人送信。立即查拏。毋令潛通消息。金順現在行抵何處。著懍遵疊次諭旨。迅速兼程前赴肅州。與徐占

彪一軍會合。力拔堅城。並派員弁梭巡各關隘。毋令內地回逆出關勾結為患。將此由五百里各諭令知之。○又諭。富和奏籌畫新疆大概情形。整頓邊境。請飭撥馬匹軍火。景廉奏錫綸需用軍火。請飭烏科兩城分撥各摺。片。據富和奏稱。塔爾巴哈台城池難於整理。且距科布多古城較遠。不能接應。擬請緩修塔城。帶兵由古城沙子山一帶進剿。或暫紮布倫托海阿勒台山一帶。以資鎮壓等語。富

和身任參贊大臣所有塔城應辦事宜責無旁貸。自應竭力籌畫。勉為其難。豈得意存諉卸。所稱帶兵進剿。亦未確有把握。且該參贊與榮全同在塔城。何以不會商。該署將軍再行入奏。所陳各情於新疆大局有無裨益。著榮全酌度迅速奏聞。如有應與景廉咨商之處。卽著彼此妥籌具奏。至該署將軍參贊等同辦一事。必應和衷共濟。方於公事有裨。毋得各執意見。卡拉托羅蓋臺究竟是否俄

國地面。富和以該處屢被俄人偏勒。擬將東南兩路十四臺暫行裁撤。但裁撤之後。道路恐致梗阻。著榮全與富和會商妥辦。哈薩克肆行搶掠。逃避俄境。已諭令總理各國事務王大臣與俄使商辦。仍著榮全富和派撥官兵認真彈壓。遇有哈薩克搶刦之案。按照條約分別辦理。厄魯特索倫官兵需用軍械馬匹各項數目。該參贊何以不分晰奏明。著富和知照奎昌多布沁札木楚志剛將馬匹需

用若干酌量撥給軍械等項。應撥若干並著知照奎昌等於前月十九日奏撥神機營軍械內分撥應用。該城如有不敷再由奎昌等奏請撥補。錫綸前赴布倫托海募練勇丁需用軍火著奎昌多布沁札木楚志剛常順托倫布保英豫為籌備。以便就近撥用。富和另片奏上年十一月二十八日奏奉諭旨豫撥俸餉銀二萬兩。迄今尚未解到等語。著戶部查明前項撥款迅卽行催。毋令延緩。富和原摺一件著鈔給榮全閱看。將此由六百里各諭令知之。○蠲緩湖南武陵龍陽益陽安鄉臨湘華容沅江巴陵澧湘陰桃源十一州縣暨岳州衛被水地方新舊額賦並雜課有差。○壬子諭軍機大臣等都興阿奏宗室窩盜分贓獲案審實。擬請照例嚴辦一摺。西斌卽斌洛二身係宗室。膽敢窩盜分贓。並商令盜匪關鐸等宰牲祭旗。糾聚多人到處焚掠淫殺。擾害地方。實屬罪不容誅。全昇卽祿二豐

喜卽豐四。窩盜分贓。並敢將盜首縱令逃逸。目無法紀。厥罪維均。以上三犯。均著革去宗室頂帶。照強盜窩主擬斬立決例。卽行正法。在逃盜首關鐸暨鄧心來等。卽著都興阿督飭在事員弁。勒限嚴拏。務獲。按律懲辦。不准一名漏網。如逾限無獲。卽將承緝各員嚴參懲處。窩盜之家。既經嚴辦。其在官人役。難保無得受月規。夤緣包庇。及勾通一氣。魚肉鄉民情事。尤屬罪無可逭。該將軍務當會商府

尹。嚴密查訪。儻有前項情弊。立卽捕獲。治以軍法。毋稍寬縱。至諸色旗民。各處兵勇。如有涸跡盜中者。並著懍遵九月十三日諭旨。嚴拏窮治。如本管官袒庇不交。或問官承審不實。卽行分別從嚴叅辦。務使法立必行。不得始勤終怠。此案餘犯。均著所擬辦理。將此諭諭令知之。○又諭。定安奏籌辦杜嘎爾馬隊情形。並先提借察哈爾餉銀。趕辦行糧各摺片。前諭杜嘎爾在所部吉林黑龍江馬隊內

再撥五百名。自備行糧。赴塔爾巴哈台聽候榮全調遣。並因杜嘎爾患病。諭定安派員前往。暫管隊伍。茲據定安奏稱。現將吉林黑龍江兩隊全數撥往。派副都統富珠哩統帶。在賽爾烏蘇一帶暫紮。請飭部撥銀三萬兩。置辦行糧。並請先於部撥察哈爾餉銀十五萬兩內。提用等語。榮全軍營需兵甚亟。著杜嘎爾卽派得力營員。管帶黑龍江馬隊。前赴賽爾烏蘇。併歸富珠哩調遣。剋日西征。至該馬

隊行糧。尤應趕緊籌辦。卽著額勒和布景瑞。於戶部解到銀十五萬兩內。先行提撥銀三萬兩。解交杜嘎爾。將該隊行糧迅速辦齊。飭令富珠哩統帶西進。毋稍逗遛。富珠哩啟行後。賽爾烏蘇一帶。卽責成轍德恩帶察哈爾馬隊。在該處扼紮護運。並確探賊蹤。相機防勦。惟該處兵力單薄。如須添撥隊伍。著定安酌度辦理。以免疏虞。所有此地提用銀三萬兩。並著戶部照數籌撥。解交察哈爾以清款

項將此由五百里各諭令知之。緩徵湖北江夏武昌咸甯嘉魚蒲圻漢陽漢川黃陂孝感沔陽黃岡蘄水黃梅廣濟鍾祥京山潛江雲夢天門應城江陵公安石首監利松滋枝江荊門。二十七州縣暨沔陽武昌等衛被水地方新舊額賦並雜課有差。○癸丑諭軍機大臣等前據曹克忠奏收撫奇營潰勇請保出力員弁有旨准其酌保數員。毋許冒濫。茲據該提督將所保各員弁開單奏請獎勵。與

咨部保獎者共有數百員之多。殊不足以昭覈實。著與另片保奏之營官王正枝委員張義廷王郊等均由邵亨豫就近確切查明。另行覈減。將實有勞績人員酌量保奏。再予恩施。在營病故之參將喻正祥等應否給予卹典。亦著邵亨豫查明具奏。副將等缺曹克忠何得自行揀員請補。所有甘肅中衛協副將及沙州營參將威遠堡都司各缺。著左宗棠查明合例人員請補。以符體制。並著邵亨豫

傳知曹克忠懍遵本月初一日諭旨。迅即馳赴蘭州聽候。左宗棠調遣曹克忠摺片單著分別鈔給左宗棠邵亨豫閱看。將此各諭令知之。○又諭劉長佑馮子材奏勦捕沿邊各屬土匪情形。一摺廣西岑溪等處土匪疊經各路兵勇會同地方官將首要各逆拏獲斬馘多名。勦辦尚屬認真。惟各屬伏莽尚多。非按捕淨盡。不能永除後患。仍著劉長佑等督飭各路兵勇及各該地方文武將逃竄餘匪

悉數勦除。並將善後事宜妥為籌辦。以靖閭閻。而清遺孽。所有此次出力官紳。准其先行存記。彙案酌保。至沿邊關禁廢弛已久。亟應大加整頓。覃遠璉所帶營勇計將到防。劉長佑等務當督飭該道會同該地方文武修整隘口。查拏匪徒。庶內奸外寇不致勾結為患。劉長佑另摺奏越南國正貢屆期請示進關日期。一摺著該撫查照歷屆例貢進關之時酌定日期。一面具奏。一面行令該國王遵照。

辦理將此由四百里各諭令知之。○禮部以明年元旦慶賀禮節請得旨是照例行禮。奉慈安端裕皇太后

慈禧端佑皇太后懿旨。停止筵宴。其在外公主福晉命婦進內行禮之處。並著停止。○甲寅陝西巡撫邵亨豫奏北山墾務日闢。統計已在五分以上。得旨。仍著督飭該地方官廣為招墾。日闢荒蕪。毋得始勤終怠。○乙卯諭軍機大臣等。前經疊諭穆圖善移紮平涼固原

一帶。為甘省後路聲援。茲據穆圖善等奏稱。劉盛藻現已抵陝。接統銘軍。邠乾一帶足資控禦。其固原平涼地方。現有雷正綰魏光燾各營駐紮。該將軍一軍。擬即移紮涇州等語。穆圖善現已回邠。著即趕緊部署。統率所部各營。移紮涇州。與雷正綰魏光燾兩軍聯絡。聲勢互相應援。涇州與長武汧隴等處接壤。時有潰勇游匪出沒。該將軍當隨時查拏。認真勦辦。以靖地方。左宗棠邵亨豫亦當飭令

各路官軍協力防剿。毋稍疏虞。劉盛藻接統銘軍。自應妥籌布置。著邵亨豫飭令該臬司於邠乾一帶嚴密設防。以資捍衛。並將所統各營勇丁。妥為駕馭。毋任滋生事端。將此由四百里各諭令知之。○丙辰

孝惠章皇后忌辰。遣官祭

孝東陵。○丁巳

上詣

中正殿拈香。○以神靈顯應。加江蘇上海縣

城隍神封號曰靈佑。○諭軍機大臣等。李鴻章奏覆陳畿輔邊境布置情形。各摺直隸邊防。據李鴻章奏稱。各路防兵及練兵。尚屬整齊。惟北路兵力稍單。現擬令王可陞添練一營。俾數分布。所籌均尚周妥。即著該督隨時相機調度。以固邊防。毋得稍涉疏懈。另片奏宋慶一軍。請暫緩西進等語。甘肅攻剿喫緊。需兵甚殷。宋慶一軍。昨已諭令開正赴甘。助剿隴中糧運維艱。業經左宗棠籌及。請將河

南月協西征餉銀一萬五千兩改為毅軍運費。同該軍月餉一併解至宋慶行營。已諭錢鼎銘照辦矣。將此由四百里諭令知之。○予故山東安邱縣知縣升任布政使姚錫華入祀名宦祠。從巡撫丁寶楨請也。○予江西故江蘇布政使程煥采入祀鄉賢祠。從巡撫劉坤一奏也。○追予陝西軍營病故總兵官童邦傑祭葬卹廕。○旌表守正捐軀河南嵩縣民婦路都氏。浙川廳民婦魏劉氏。○戊午諭

內閣王文韶奏查閱衡永一帶營伍。請將庸劣將弁分別革休一摺。湖南永州鎮標右營遊擊劉義成。辦事未能分曉。難資督率。著勒令休致。武岡營把總趙順宏。鎮標左營外委蕭永福。弓馬輟弱。均著斥革。其武岡營遊擊田宗友等各員。著李瀚章。王文韶歸入本年軍政案內會題叅辦。○科爾沁圖謝圖親王巴寶多爾濟等三人。阿拉善扎薩克親王貢桑珠爾默特蘇尼特扎薩克郡王托第布木

土默特貝勒散巴勒諾爾贊。茂明安貝勒格楚克。阿巴噶貝子杜英固爾扎布等二人。巴林二等台吉色旺諾爾布。喀爾喀二等台吉三音烏察拉勒圖察哈爾恩騎尉巴圖濟爾噶勒於養心門內瞻覲。○己未日重輪抱珥五色翼日如之。○諭內閣前據喬松年奏遵議黃運兩河情形。並籌堵運河各摺片。當經諭令文彬。丁寶楨妥議具奏。茲據奏稱遵議黃河穿運情形。請仍挽復淮徐故道一摺。著

軍機大臣會同六部九卿。與喬松年前奏各摺片一併妥議具奏。○諭軍機大臣等。金順奏派隊赴肅籌布後路運道。並請飭購辦軍火。及指撥銀兩各摺片。金順所部各隊齊抵涼州。已派隊赴肅助剿。並留隊分紮後路。以顧運道。即日督飭後隊赴肅。現在肅城軍務喫緊。前據左宗棠奏賊匪被剿窮蹙。該處地廣兵單。官軍尚未合圍。亟盼勁旅。早到即著金順懍遵疊次密諭。馳抵肅州。會同徐占彪

迅拔堅城。卽行出關妥籌布置。毋得在涼州逗遛。金順以軍火不敷。請飭江蘇巡撫趕緊就滬購辦細洋藥二萬磅。大銅帽四百萬粒。三楞礮藥五千磅。派員航海運至天津等語。軍火需用甚亟。若由滬運津未免久需。時日著李鴻章按照金順所請。先由天津現存之洋藥銅帽等項。照數撥給。由金順派員赴津領解到營。以資應用。此項軍火係屬借撥。著恩錫趕緊如數購辦。解赴天津歸還。不得有

誤。金順因購買皮衣。請飭部撥銀一萬五千兩。著戶部照數於就近省分迅速指撥解交歸綏道衙門。由金順派員領取。將此由五百里諭知李鴻章。金順並傳諭恩錫知之。○又諭奎昌等奏請調馬隊剿賊。並請飭催前調各軍杜嘎爾奏派撥西征馬隊情形。各一摺。賊匪麇聚扎薩克圖汗地南路山抗拒。亟應就地剿除。烏城兵力不敷。該署將軍等前調之察哈爾馬隊二百五十名。庫倫練軍五百

名。著額勒和布景瑞張廷岳阿爾塔什達懌遵前旨。卽行派撥。剋日起程。毋稍延緩。奎昌等此次因援兵未到。請將富珠哩所部吉林馬隊二百五十名先行就近調撥。此項馬隊現經杜嘎爾添派黑龍江馬隊前往賽爾烏蘇會合。調赴榮全軍營。著杜嘎爾卽將察哈爾提到銀兩。飭令趕辦行糧。迅速進發。該軍沿途西行。卽可覘賊趨向。相機截剿。如行抵烏城後。該處軍情尚未稍鬆。卽著奎昌等就

近調度。飭令與達爾濟所部各隊合力剿辦。以期迅殄逆氛。榮全需兵正殷。奎昌等俟該處軍務稍鬆。或察哈爾庫倫調派各隊有一處到齊。卽令該軍馳赴榮全軍營聽候調遣。將此由六百里各諭令知之。○以烏里雅蘇台剿匪出力。賞扎薩克圖汗副將軍輔國公車德恩敘多布多爾濟貝子銜。台吉棍佈扎布等花翎。餘升敘有差。子陣亡四等台吉邦棍扎布祭葬世職。並賞其子棍楚克扎布二

等台吉銜。○追予江蘇震澤陣亡道員姚丙禧祭葬世職。加等於浙江嘉興縣原籍建立專祠。○追予浙江臨海陣亡知縣鄭煜等建立專祠。陣亡傷亡弁勇一併附祀。○追予陝西武關殉難署城固縣知縣施作霖諡剛毅。○撥火器營火箭四百枝解赴張家口。交烏里雅蘇台委員領回備用。○庚申以神靈顯應。加河南正陽縣

城隍神封號曰昭應。○諭內閣給事中盧士杰奏家丁蒙捐冒考請旨斥革等語。捐納州判李光煦卽李天賜曾於河南商城縣署充當家丁。輒敢勾通書吏。蒙入光州籍貫。改名報捐。並令其子捐納監生。潛赴鄉試。賤役蒙捐冒考。亟應嚴行查辦。李光煦著先行斥革。交河南巡撫飭令該地方官追出執照。並查明伊子捐監姓名。一併追繳監照。按律懲辦。以澄流品而肅官方。○諭軍機大臣等單懋謙志和奏盛京工程緊要請飭催河南解款

一摺前因盛京

鳳凰樓頭停工。勘得金柱朽壞情形。亟須更換。業經戶部奏明由河南地丁項下撥銀二萬兩速行解往。以應急需。迄今已逾二年。該省撥款並未解到。而砍伐木植。運省風晾。尚需時日。工程緊要。豈可因解款稽遲。展轉延閣。致誤興修。著都興阿作速嚴催河南解款。剋日解齊。卽行派員趕緊砍運木植。奏請興工。並著將砍伐工費。覈算明確。需用若干。先由盛京戶部籌款墊發。一俟河南解款到日。卽行扣還。此項工程。不容稍緩。著錢鼎銘迅卽籌解。毋再稽延。致誤要工。原摺著鈔給閱看。將此各諭令知之。○又諭戶部奏議撥東三省官兵俸餉銀兩。並請飭催各省歷年欠解銀兩。各摺片據稱奉天癸酉年俸餉約需銀八十六萬兩。除該將軍奏明應抵用銀三十三萬七千兩外。計需銀五十二萬三千兩。按照章程折放。應撥實銀四十一萬八千四

百兩。復將該省應抵各款詳細查覈。共抵銀三十萬六千八百三十兩。尚應撥銀十一萬一千五百七十四兩。卽在該省應徵海口船規項下照數提撥。吉林俸餉約需銀五十萬七千八百十兩零。除本省應抵各款外。應撥銀十三萬二千五百五十兩。照章折算實需銀十萬六千四十兩。並打牲烏拉應領銀三萬二千八百七十六兩零。均應全數撥給。黑龍江俸餉應領銀三十六萬兩。照章折算實

需銀二十八萬八千兩。除應抵各款外。應撥銀二十五萬二千兩。其應領制錢一千八百二十一串。由盛京戶部金銀庫撥給等語。著照所議辦理。所有吉林應撥銀十萬六千四十兩。著提撥長蘆癸酉年應徵鹽課銀二萬六千四十兩。山東癸酉年應徵地丁銀四萬兩。河南癸酉年應徵地丁銀四萬兩。打牲烏拉應撥銀三萬二千八百七十六兩零。著提撥長蘆癸酉年應徵鹽課銀一萬兩。河南驛

站存贖銀二萬二千八百七十六兩。黑龍江應撥銀二十五萬二千兩。著提撥長蘆癸酉年應徵鹽課銀五萬二千兩。山東癸酉年應徵地丁銀五萬兩。河南癸酉年應徵地丁銀五萬兩。驛站存贖銀五萬兩。直隸旗租銀五萬兩。卽著各該督撫按照戶部指撥銀數。遴委妥員迅速解赴盛京戶部交納。毋許遲誤。並著瑞聯俟各該省解到時。卽知照吉林打牲烏拉黑龍江派員赴奉天領取。以資散放。

仍由各該將軍按照折放章程覈實放給。不得稍有浮冒。並將奉省銀價按月造報。及用過銀錢各數目。於奏銷時照例題報。如有餘贖銀兩。於下年請領時聲明備抵。至該三省節年俸餉銀兩。直隸山東河南等省積欠至二百零七萬餘兩之多。屢催罔應。實屬延玩。著各該督撫嚴飭藩運各司。將前項欠解銀兩陸續籌款解赴奉省交納。以濟該三省俸餉要需。儻各該省仍復延不解交。卽著戶部

指名嚴叅。原片著鈔給閱看。將此各諭令知之。○又諭有人奏河南署光州知州劉慶恩縱盜虐民。肥己罔上。本年光州興隆集搶刦重案。該員憚於查拏。將事主掌責。勒令改盜為竊。城內凌三義等家被刦。至今案無弋獲。馮姓爭產一案。該員勒罰五百金入己。所收鎮潢橋房租數千金。盡飽私囊。城內大生錢店關閉。因受賄將該店主釋放不究。反將鋪鄰拘責。砍伐該州試院樹木。敗壞文風等語。著錢鼎銘按照所叅各節。確切訪查。據實叅奏。毋得稍涉迴護。原片著鈔給閱看。將此諭令知之。尋奏遵查。劉恩錫尚無貪污劣蹟。惟於馮姓田地訟案。尚未定讞。因馮姓呈驗契約。與墨約不符。輒令看管立限換約重稅。以致興謗。又修理光州試院。輒將回乾樹株砍伐。辦理均有不合。應請交部議處。從之。○以山東拏獲逆匪張淩雲出力。予道員長庚優敘。副將賈宗江等加銜升敘有差。○追予浙

江錢塘陣亡殉難舉人金曰頊等紳民婦女一百六十五名口。分別旌卹如例。並予建祠。○展緩吉林三姓歉收地方未完倉穀暨折色銀兩。赦漢扎薩克郡工達維多克丹鄂爾多斯扎薩克貝子巴達爾琥茂明安頭等台吉達爾瑪吉哩第科爾沁貝勒達瑪林旺濟勒喀爾喀扎薩克貝勒堆固爾素隆等四人。蘇尼特貝勒布彥圖。阿巴哈納爾扎薩克貝勒達木定扎布。於養心門內瞻覲。○辛酉

孝和睿皇后忌辰。遣官祭

昌西陵。○引見應封宗室不入八分輔國公載勛。一等鎮國將軍毓長。三等奉國將軍溥菊。溥蘅齡。祺載朝。一等輔國將軍溥齡。溥霖三等輔國將軍謙華。奉恩將軍增傑。增慧。得旨均著照例授職。○舉行本年軍政。吉林等省駐防卓異官十八員。不謹官一員。才力不及官二員。年老有疾官九員。分別議敘處分。如例。○壬戌

孝德顯皇后忌辰遣官祭

定陵○以故一等子恩裕繼子祥霖襲爵○癸亥以京畿雪澤愆期

上詣

大高殿祈禱行禮○遣惇親王奕訢詣

時應宮恭親王奕訢詣

昭顯廟醇親王奕譞詣

宣仁廟孚郡王奕誨詣

凝和廟拈香○諭內閣前因駐藏大臣恩麟

擅賞戴琫花翎並巡閱營伍未經親到當經

降旨將恩麟交部議處令其來京當差並諭

知恩麟於新任駐藏大臣未到以前仍將應

辦事宜認真經理茲據恩麟奏德泰偏索關

防請旨遵行德泰奏與恩麟意見未合照繕

移會文案呈覽各一摺德泰於特飭恩麟諭

旨謬為講解固執已見催令恩麟將關防等

件剋日移交起程回京實屬庸妄糊塗不勝

幫辦之任德泰著革職卽行回旗○諭軍機

大臣等德泰奏整頓藏務請飭撥餉銀並定

補餉章程各摺片據稱連年藏餉短絀輒向

商上借墊番情不無挾制弁兵僅放半餉亦

形苦累所奏自係實情西藏遠處邊陲關擊

緊要需用餉銀必應照額籌解方足以資整

頓川省積欠藏餉為數不少德泰覈計明年

餉需及酌還欠款請由川庫撥實銀九萬兩

著吳棠如數籌撥務於來年三四月間解到

嗣後每年額餉六萬兩限於春初解到以資

接濟毋稍遲誤其察木多拉里一帶汎塘弁

兵並著嚴飭打箭鑪同知設法撥給足餉毋

令缺乏德泰庸妄糊塗本日已降旨革職所

有藏中應辦事件著承繼實力整理承繼未

到任以前仍著恩麟認真籌辦毋稍大意德

泰所稱補發駐藏弁兵尾餉請責成糧員等

覈實辦理自為杜弊起見著承繼恩麟明定

章程飭令承辦各員遇有請咨赴川補領尾

餉務須查明確數不得稍涉含糊致滋弊混

至所稱弁兵應發實銀。不准易錢散放。商上人等以錢居奇。應行查禁等語。並著承繼等體察情形妥為辦理。原摺片著分別鈔給閱看。將此由五百里各諭令知之。○舉行本年軍政侍衛處鑾儀衛滿洲蒙古漢軍各旗營卓異官一百三十八員。不謹官二員。罷輟官一員。才力不及官三員。年老官三員。有疾官八員。分別議敘處分如例。○土爾扈特布彥圖親王策林喇普坦阿巴噶郡王剛噶爾倫布等二人。科爾沁貝勒昂噶叩等二人。教漢貝子達克沁喀爾喀扎薩克輔國公棍布札布等二人。土默特扎薩克頭等塔布囊哈什塔瑪噶於神武門外瞻覲。○甲子以故歸化城土默特輔國公錦丕勒多爾濟子貢格巴勒襲爵。○以故車臣汗扎薩克頭等台吉車林多爾濟子勒旺呼克津襲職。○賞內閣侍讀學士希凱頭等侍衛為駐藏幫辦大臣。未到任以前駐藏辦事大臣恩麟兼署。○命福

州將軍文煜在紫禁城騎馬。○追予江蘇各屬陣亡殉難布政司經歷周汝文等紳民婦女二千二十一員名口分別旌卹如例。○乙丑

上奉

慈安端裕皇太后

慈禧端佑皇太后幸漱芳齋侍午膳。○諭軍機大臣等定安奏請催秦豫兩省應解烏魯木齊餉銀一摺。刻下烏魯木齊軍情緊要。必須厚集兵力以赴戎機。定安現部署大同官兵起程赴景廉軍營需餉甚迫。河南應解餉銀四萬五千兩。陝西應解餉銀四萬兩。屢經該將軍咨催迄未解到。殊屬延玩。著錢鼎銘邵亨豫嚴飭各該藩司趕緊如數籌撥解赴綏遠。俾大同官兵得以剋日起程。毋稍遲誤。另片奏張曜一軍分紮鎮番靈州一帶東西一千餘里。轉運一切需駝甚多。亟須籌款採買。請飭河南於該軍月餉外另籌銀三萬兩等

語著錢鼎銘督飭藩司迅卽如數籌撥解赴張曜軍營俾購駝隻以資轉運將此由四百里各諭令知之○以故三等子蘇泰子穆特布襲爵○以安徽官軍會勦河南交界匪徒出力賞總兵官郭寶昌頭品頂帶劉永清以提督簡放參將顧廷文鄧成先王士堂巴圖魯名號遊擊黃步武等花翎從九品吳景元等藍翎餘加銜升敘有差○以安徽籌餉辦防出力賞布政使裕祿花翎道員王思沂布政使銜總兵官張士元等升敘有差

大清穆宗繼天開運受中居正保大定功聖智誠孝信敏恭寬毅皇帝實錄卷之三百四十六

大清穆宗繼天開運受中居正保大定功聖智
誠孝信敏恭寬毅皇帝實錄卷之三百四十七

臣等謹將本年各省奏請開辦賑務事宜恭摺具奏為事竊查本年各省災情較前稍重臣等查奏各省賑務事宜恭摺具奏為事竊查本年各省災情較前稍重臣等查奏各省賑務事宜恭摺具奏為事

同治十一年壬申十二月丙寅諭軍機大臣

等延煦畢道遠奏剝運白糧積久弊生請事
變通一摺據稱江浙白糧到津向雇堅大殷
實民船剝運近來弊竇叢生私立船捐名目
公然賣放輒以窄小破船塞責或冒充民船
應募駕駛之人又多官撥船戶作弊是其慣
技本年竟有全船沈失船戶潛逃情事莫若
由江浙糧道一手經理等語著照所請辦理
即著張樹聲恩錫楊昌濬飭知各該糧道來
歲海運白糧抵津即自雇民船剝運赴通無

庸在津候驗津貼剝價等銀由各糧道自行
支給其封雇時並著李鴻章飭天津道嚴禁
諸色人等從中阻撓有則立予重懲不得稍
分畛域抵壩後即由倉場侍郎立時驗收毋
許經紀人等藉端刁難此外起運押運事宜
及應用委員均由各該糧道隨宜辦理原摺
著鈔給閱看將此諭知李鴻章張樹聲楊昌
濬並傳諭恩錫知之○又諭前據奎昌等奏
豫籌征兵餉銀當諭令戶部速議具奏茲據

奏稱烏城軍餉支絀自應再予續撥近來協
撥新疆軍餉不外距口較近之山東山西河
南等省惟該三省上年奏撥烏城餉銀尚未
解齊此次續撥軍餉未便全由該三省提撥
請由山東山西河南積欠新疆項下各撥銀
十萬兩江西省地丁項下撥銀十萬兩浙江
省地丁項下撥銀五萬兩兩淮鹽釐項下撥
銀五萬兩接濟烏城軍餉此外山東欠解上
年指撥烏城餉銀二十萬兩山西欠解上年

指撥烏城餉銀八萬兩。河南欠解上年指撥烏城餉銀十萬兩。仍請飭趕緊解齊等語。著張樹聲、丁寶楨、鮑源深、錢鼎銘、劉坤一、楊昌濬、督飭藩運各司。竭力如數籌畫解交。察哈爾都統衙門額勒和布等於此項餉銀解到後。即派委妥員迅速轉解。以濟要需。各該省籌解餉銀均屬不易。奎昌等務當撙節動用。不得稍涉浮糜。將此由五百里各諭令知之。○又諭前據張廷岳等奏前撥山東等省餉

銀恐難速到。請飭部添撥庫銀一摺。當令戶部速議具奏。茲據奏稱部庫入不敷出。異常支絀。無款可撥。仍請飭催各省前撥銀兩趕緊籌解等語。庫倫軍需緊要。各省奉撥餉銀自應速籌報解。所有山東先後欠解協餉八萬兩。山西欠解協餉四萬兩。河南欠解協餉三萬兩。著丁寶楨、鮑源深、錢鼎銘勒限一月。埽數解清。儻有遲延。蒂欠。即將各該藩司指名叅處。以儆疲玩。該三省餉銀解到後。著張

廷岳、阿爾塔什達、撙節動用。並將每月支放軍餉實數開單報部查覈。不得藉詞延緩。將此由四百里各諭令知之。○又諭張廷岳等奏迎接哲布尊丹巴呼圖克圖之呼畢勒罕。可否照第六世七世仍用黃布城黃車轎一摺。前世哲布尊丹巴呼圖克圖之黃布城黃車轎例應坐牀後始准乘用。惟哲布尊丹巴呼圖克圖累世均能闡揚黃教。保衛蒙眾。為喀爾喀四部落同奉之大佛。此次迎接哲布

尊丹巴呼圖克圖之呼畢勒罕。著加恩沿途准用黃布城黃車轎。其所用黃繖藍旗亦准照舊賞用。○舉行本年軍政。山東年老官三員。罷輓官一員。處分如例。○以四川會理等處勦匪出力。賞提督張占鼐副將劉鎮坤土司安平康巴圖魯名號。遊擊靳勝正等花翎。守備張開富等藍翎。餘加銜升敘。開復有差。○追予四川廣元陣亡傷亡將弁兵勇三千四十一員名。建立昭忠祠。○予故直隸深州

知州張杰。易州知州夏子齡。江蘇徐州道王夢齡。高郵州知州魏源。靖江縣知縣齊在鎔。贛榆縣知縣袁坦。浙江湖州府教授許正綬。福建詔安縣知縣楊福五。河南滎陽縣知縣羅鳳儀。山東膠州知州張同聲。棲霞縣知縣方傳植。陝西邠州知州托克紳。四川候補道蔣若采。忠州知州吳友麓。彭縣知縣吳應蓮。丹棱縣知縣毛隆輔。入祀名宦祠。從總督李鴻章。吳棠。巡撫張之萬。劉坤一。楊昌濬。王凱

泰。李鶴年。丁寶楨。護巡撫譚鍾麟。請也。○予直隸故山西介休縣知縣陳曾公。江西弋陽縣知縣呂上沅。安徽故增貢生孫蟠。廩生戴予超。江西故國子監助教王岐瑞。會昌縣訓導阮復祖。吉水縣從九品胡會勳。浙江故台州府教授王庭槐。歲貢生何濟川。福建故禮部員外郎鄭用錫。湖北故拔貢生朱奇生。湖南故廣西潯州府知府鄒煥杰。零陵縣訓導方鈺。河南故江蘇淮揚兵備道李國瑞。副貢

生蘇源生。山東故河南光州知州金寶符。增生程鴻儀。山西故蒲州府教授苗席珍。四川故甯遠府教授熊履青。入祀鄉賢祠。從總督李鴻章。吳棠。巡撫英翰。劉坤一。楊昌濬。王凱泰。郭柏蔭。王文韶。李鶴年。丁寶楨。鮑源深。請也。○緩徵兩淮富安。安豐。梁埭。東臺。何珠。丁溪草堰。劉莊。伍佑。新興。廟灣。板浦。中正。臨興。十四場。被水地方。竈課有差。○加賞通州煮賑粟米四百石。○丁卯諭軍機大臣等。左宗

崇奏。已革提督田興恕。遣戍新疆。行次泰州。道梗未能前進。同治六七等年。賊擾鞏秦。該革員隨同防軍出隊。踊躍爭先。現在新疆仍難起解。懇請釋令回籍等語。田興恕獲咎甚重。本無可逭。姑念該革員防勦出力。尚知愧奮。且本年查辦遣戍各員。業經分別加恩。田興恕事同一律。著加恩准其釋令回籍。該革員到籍後。著李瀚章。王文韶。飭令地方官嚴加管束。此次准其釋回。係屬法外施恩。如再

任性妄為不安本分必當從嚴懲辦毋謂寬典可幸遂也將此各諭令知之○又諭前因烏城需用馬隊當諭額勒和布等揀調蒙古馬隊二百五十名裹帶行糧軍裝分起赴烏茲據額勒和布等奏稱現由察哈爾八旗兵丁內如數挑選派佐領那穆濟勒色楞管帶分作三起於本月十五日接續起程前進隨帶行糧軍裝等項業經酌量發給等語此項隊伍行抵烏里雅蘇台界內需用駝馬氈帳

等項暨所需駝隻價銀著奎昌等豫為籌備並先期派員至哈爾尼敦守候接辦俾利師行該隊馬匹間有不齊即由該署將軍等查覈撥補額勒和布等已放給該官兵三箇月口糧以後月餉並由奎昌等接續開放此項官兵到烏該署將軍等務當妥為調派俾資防勦毋稍疏虞額勒和布等以該隊續用糧石不敷擬由直隸添籌款項交口北道購辦按期撥運即著該都統咨商李鴻章籌辦以

資接濟所稱製辦軍器等項及補造帳房應需銀兩請由軍需項下動用等語即著照所擬辦理將此由五百里各諭令知之○以故三等承恩公德懋子鍾秀襲爵○戊辰諭軍機大臣等景霖奏派員移栽樹株請仍飭直隸借撥欠款一摺

景陵新大園迪南等處陰護風水樹株現經景霖派員借款補種完竣所需經費銀三千五百兩應由遵化等州縣解交各該州縣至今

尚未報解

陵寢陰護風水要款未便因報解稽延致令遲誤著李鴻章仍飭藩司無論何款先行如數籌撥解交景霖動用此項銀兩即由直隸藩司於各該州縣前欠籌備庫租項下催徵扣抵將此諭令知之○又諭總理各國事務衙門奏續與俄使辯論情形一摺俄人代收伊犁一事經總理各國事務衙門王大臣等與之辨論該使臣總持先議後交之說一味狡

展心殊巨測其派兵駐紮西湖阻止中國官兵前往各節詰問再三始允轉行該國詳細聲復能否照辦尚無把握似此情形斷非空言所能有濟必須中國兵力足以震懾先發制人方能操縱自如杜其覬覦之漸著榮全就現有兵力妥為布置穩紮穩進前派英廉帶兵赴庫爾喀喇烏蘇能否紮定儘能先復瑪納斯再與景廉彼此聯絡進復烏魯木齊毋使該國續有占越庶可挽回大局該使臣

以邊界之事須兩國邊界官商辦將來如與榮全會晤即著該署將軍隨時相機辯論毋使該國有所藉口景廉前敵軍情若何所調各隊及奏撥成祿處吉林黑龍江馬隊曾否迎提至巴里坤錫綸抵布倫托海後所招募者已訓練成軍否著該都統通籌全局設法進取毋得坐失機宜原摺均著鈔給閱看將此由六百里各密諭知之○吏部議覆河東河道總督喬松年奏江蘇沛縣管河主簿一

缺先經歸入裁汰乾河河員案內一併裁撤係屬錯誤請免裁汰以資辦公應如所請辦理從之○迨予安徽各屬陣亡殉難文童劉恆海等士民婦女六百二十二名口分別旌卹如例○迨予安徽合肥門殉難文生黃先登暨眷屬十八名口分別旌卹並立祠建坊如例○旌表守正捐軀河南鄧州民女吳氏○烏喇特扎薩克鎮國公貢桑鼐扎布喀喇沁額駙巴圖鄂齊爾等二人歸化城土默特輔國公貢格巴勒於養心門內瞻觀○已諭內閣內務府奏端門樓庫存軍械查有失竊情事請旨辦理一摺端門樓存儲軍器向係五旗護軍營直班官兵等輪流看守本年十一月間經直年司員查得庫存腰刀失去九十三把撒袋失去八分本月十二日該司員等前往該處查驗箭枝復見庫房東次間有撬開窗櫺等處情形是該官兵等視典守為具文任意懈弛實堪痛恨且禁門重地

斷非外來竊賊所能溷跡更難保無監守自盜情事著前鋒統領護軍統領查明此次橈門失於看守之直班官兵等送交刑部嚴行審辦該管前鋒統領護軍統領失於覺察著交部議處嗣後應如何嚴密巡查看守之處即著前鋒統領護軍統領妥議章程奏明辦理摺內所稱同治元年八月間該處曾有被竊情形至今正賊未獲看守官兵又未嚴懲是以相率疏懈等語著刑部據實具奏○諭

軍機大臣等前因烏里雅蘇台城防緊要經奎昌等奏請於庫倫練軍內抽調古北口宣化兵共五百名以資防禦當諭令張廷岳等照數派撥速赴烏城如庫倫練軍不敷分撥再由宣化古北口轉調足額茲據張廷岳等奏稱此項練軍現在分紮庫倫迤西一帶扼要巡防方資鎮攝未便遽行掣動若徑由古北口調撥前往與察哈爾馬隊分起直達烏城較為妥速等語所陳自是實在情形烏庫

兩城防守同關緊要此起練軍既稱得力即著張廷岳等飭令認真梭巡遇賊即擊烏城需兵甚急著李鴻章即於宣化古北口練軍內迅速挑選五百名裹帶行糧等件分起速赴烏城交奎昌等調遣奎昌等當將城防事宜豫為籌畫毋得稍有疏虞將此由五百里各諭令知之○庚午諭內閣御史吳鴻恩奏請釐正文體一摺考試為掄才大典自應加意遴選以拔真才據該御史所奏近來科場

或勦襲膚辭或鈔錄舊文於士習文風大有關係嗣後考官衡文務當認真校閱以清真雅正為宗出題亦應明白正大不得割裂穿鑿致乖文體○又諭御史吳鴻恩奏京城竊案日多請飭整頓捕務等語京師為輦轂重地豈容宵小肆行若如該御史所奏近來內外城被竊之家甚多獲賊到案者甚少其按限責比一條幾成虛設營汛所管地面該弁兵等多不按段巡查以致竊案層見疊出實

屬不成事體著步軍統領衙門五城御史嚴飭所屬認真查拏如有諱竊不辦及隱匿窩戶等弊卽行嚴叅其未獲竊案仍著按限比責毋稍寬縱所有各營汛弁兵並著嚴密巡查遇有窩家立即據實舉報毋得視為具文以清盜藪而靖閭閻○又諭定安奏請將才能出眾勞績最優人員獎勵一摺提督劉景芳等隨同定安行營防勦各路竄匪或爭先摧敵迅埽游氛或辦理營務機宜悉協均屬異常出力自應量予獎勵提督劉景芳著交軍機處存記俟有提鎮缺出儘先提奏副將崇安著免補副將以總兵記名簡放佐領多隆阿著免補參佐領仍以副都統記名簡放知府常綬著免補知府以道員仍留山西歸軍功候補班前先補用以示激勸○諭軍機大臣等都興阿等奏駐清門外渾江迤西地段經都興阿等督飭協領崇善等前往查勘西自邊柵東至渾江南接前查地段北至哈

爾敏河口二窪等處共查出坐落六十九處已墾熟地十萬三千一百餘畝現已查勘完竣卽著照鳳轅二邊門外奏定章程於同治十三年起科以昭畫一至渾江迤東一帶據奏地極寬廣游民强悍一時礙難查辦自係實在情形卽著照所請俟三五年後再行查勘其風轍二邊門外催科事宜並著都興阿等飭令委員等趕緊催徵毋任拖延將此各諭令知之○又諭步軍統領衙門奏湖南童生楊鳳嵩以會匪擾害等詞赴該衙門呈訴據稱益陽甯鄉兩縣上年仍有匪黨聚眾劫殺焚燒縣署鄉間亦被搶劫又岳州地方賭風尤甚應行嚴禁等語匪徒糾黨滋事大為地方之害且慮日久蔓延釀成巨患該童生所訴如果屬實亟應認真勦辦以淨根株著李瀚章王文韶卽行確切查明據實具奏一面督飭官兵迅往捕拏剋期殄滅並飭地方官嚴禁聚賭以清盜源至原呈所稱焚燒縣

署是否卽係上年該督撫奏報益陽滋事之案並著一併奏聞原呈均著鈔給閱看將此各諭令知之尋奏遵查楊鳳嵩呈詞卽指上年益陽滋事之案以後並無會匪劫殺情事至所稱岳州賭風甚盛亦多不實仍當派員確查隨時嚴禁以清盜源報聞○以記名提督李長樂為湖北提督○兵部議覆黑龍江將軍德英奏請將布特哈等處無餉牲丁九百名全行補作甲兵應准以五百名挑補甲兵仍留牲丁四百名以存舊制從之○挑黑龍江巴彥蘇蘇旗丁一百名為副甲與原設正兵一體訓練差遣從將軍德英請也○以甘肅通昌通貴等處勦匪出力予總兵官郝永剛以提督簡放賞總兵官李永芳參將董大成一品封典總兵官王進忠副將劉應倫參將蔣希夷郭什春遊擊李得勝劉大發注林東丁玉德都司李萬倉巴圖魯名號同知王偉榮遊擊王世清等花翎都司李文思等

藍翎餘加銜升敘開復有差○辛未上復詣

大高殿祈雪行禮○遣惇親王奕諒詣

時應宮恭親王奕訢詣

昭顯廟醇親王奕譞詣

宣仁廟惠郡王奕詳詣

凝和廟拈香○車臣汗扎薩克頭等台吉勒

旺呼克津於神武門外瞻覲○壬申諭軍機

大臣等張樹聲恩錫奏蘇省本屆海運正漕

現提出十萬石由招商局輪船承運赴津請飭直隸總督備船剝運等語輪船轉運甚速必須趕緊剝運方免囤棧延滯之虞除該省白糧仍遵本月十六日諭旨辦理外著李鴻章卽飭天津道縣多備船隻趕緊剝運並查照上屆福建採買米石之案會同倉場侍郎臨棧查驗隨收隨剝毋使久儲棧房以致蒸變將此諭令知之○蠲緩直隸文安天津兩縣大窪地畝額賦暨民借倉穀○癸酉

上御撫辰殿大幄次賜蒙古王貝勒貝子公台吉暨呼圖克圖等宴並賞賚有差○諭內閣李瀚章郭柏蔭奏特參庸劣不職各員請分別懲辦一摺湖北長樂縣知縣曹煊性耽逸樂聲名惡劣著革職永不敘用署興山縣知縣張瑞鴻心地糊塗措施乖方候補知縣上官振勳貌似有才心實譎詐候補縣丞德潤李文蘭舉動輕浮不自檢束均著卽行革職候補知縣鄧經暉才欠開展行復卑鄙著以府經歷縣丞降補候補同知艾慶璞才識平庸不堪造就宜都縣知縣張景星才具短絀辦事遲鈍署公安縣知縣鄒林年力衰頹難期振作均著以原品休致松滋縣知縣李勛性情迂緩才具平庸鄖西縣知縣張文鼎才短識闇審斷模糊均著以教職歸部選用以肅吏治○諭軍機大臣等松瑞奏請飭嚴催欠交米石一摺直隸承德府屬各州縣應交熱河喀喇河屯二倉兵米僅將同治十年春

夏二季兵米交齊其秋冬二季米石除承德府報交米二千六十九石零外各州縣尚欠米六千六百八十九石零此項短交米石兵食攸關豈容任意延宕卽著李鴻章知照熱河總管等咨催熱河道嚴飭各州縣勒限買運交倉毋許稍有蒂欠至前任代理平泉州知州金齡欠交咸豐十年兵米一千十二石零疊經明降諭旨飭令直隸總督嚴催至今尚未補交實屬不成事體仍著李鴻章嚴催勒限如數補交償再不完繳卽著嚴參懲辦以儆玩泄將此諭令知之○又諭理藩院奏土爾滬特汗布彥烏勒哲依圖請赴景廉軍營投效據情代奏一摺前因布彥烏勒哲依圖不能回住遊牧諭令烏里雅蘇台將軍等於所屬附近地方擇一妥善之區將該汗及隨帶人等暫行安插以示撫綏藩服之意此次該汗來京呈請赴景廉軍營投效具見悃忱惟該汗流離遷徙之餘情形苦累若再令

其效力戎行殊不足以示體恤著理藩院傳知布彥烏勒哲依圖仍在烏里雅蘇台暫住所請投效軍營之處著毋庸議並著奎昌常順多布沁扎木楚志剛知之○以故賽因諾顏鎮國公車林端多布子特固斯瓦齊爾襲爵○命土爾扈特布彥圖親王策林喇普坦科爾沁貝勒昂噶叩喀爾喀輔國公棍布扎布在乾清

門行走○賞車臣汗頭等台吉勒旺呼克津雙眼花翎科爾沁鎮國公特古斯畢里克圖歸化城土默特輔國公貢格巴勒土默特頭等塔布囊哈什塔瑪噶花翎○蠲緩山西臨太原臨汾薩拉齊四廳州縣被旱被水地方額賦暨民借倉穀並賑隰州災民一月口糧○甲戌以大學士文祥單懋謙充文淵閣領閣事○以兵部尚書英桂理藩院尚書阜保都察院左都御史胡家玉吏部右侍郎童華

充經筵講官○展緩河南祥符陳留杞通許尉氏洧川鄆陵中牟蘭儀鄭榮陽滎澤汜水禹商邱甯陵永城鹿邑虞城夏邑睢柘城安陽湯陰臨漳武安內黃汲新鄉輝獲嘉淇延津滑濬封邱考城河內濟源修武武陟孟溫原武陽武洛陽偃師鞏孟津登封永甯浙川南陽唐泌陽鎮平桐柏鄧州內鄉裕舞陽葉上蔡確山西平淮甯西華項城沈邱襄城光山固始息七十三廳州縣被水被旱地方新舊

額賦有差○乙亥

孝莊文皇后忌辰遣官祭

昭西陵○以神靈顯應頒湖北襄陽府城

關帝廟扁額曰山南保障○諭內閣御史奇

臣奏風聞寶坻縣屬陳山莊等數十村被災

租賦已蠲免佃戶尚受抽糧之累請飭查

禁等語著順天府府尹查照向章妥為辦理

用副軫念災黎至意○又諭銘安奏革員誣

捏翻供請用刑訊一摺已革廣甯防守尉岐

山前因劉李氏具控溫押劉喬雲以致身死不明經銘安奏請將岐山革職勒令將要犯交出提審確情按律懲辦茲復據銘安奏該革員咆哮公堂並誣控承審司員實屬任意逞刁著卽用刑嚴訊務得確情以成信讞案內逃犯車夫寇巴卽寇得子旗兵路智著都興阿瑞聯恭鏜一體嚴拏務獲歸案究辦毋任遠颺○諭軍機大臣等劉嶽昭奏官軍進攻順甯籌辦餉需岑毓英奏進攻大理等處

情形前諭提督馬如龍統帶所部馳赴雲州一帶力籌攻克現在該提督已派副將馬青雲等管帶頭隊兵勇取道蒙化進剿惟因餉需缺乏全軍未能進發自係實在情形馬如龍接奉諭旨卽擬剋日進征任事實屬奮勇第兵行糧隨自應趕緊籌畫所有湖北應協該提督專餉及各省應解協餉著劉嶽昭迅卽咨催以資應用仍一面先行設法籌撥俾全軍得以剋日起程刻下大理攻剿正緊順

甯雲州等處必須同時進攻方得牽制之勢著劉嶽昭傳諭馬如龍部署齊備卽行拔隊前進毋稍遷延大理東南角城牆攻毀數十丈城中守備甚嚴相持未下岑毓英已派頭隊兵勇馳赴下關接應該撫亦卽親赴前敵督剿該逆被攻緊急難保不逞兇鋌險該撫務當相機籌辦於勇往之中寓慎重之意方免疏虞其蒙化等處賊巢並著飭令總兵李維述等分投力剿迅掃逆氛滇省被賊蹂躪

已久民情甚為困苦深堪軫念岑毓英馬如龍帶兵剿賊務須申明紀律約束兵勇不准絲毫騷擾用副朝廷拯民水火至意將此由五百里各諭令知之○建吉林伯都訥長春兩廳學宮設訓導各一員廩額增額各二名並添吉林省滿號合號廩額增額各一名從將軍奕榕等請也○蠲免兩浙仁和海沙鮑郎蘆滙橫浦浦東六場未墾蕩田本年蠶課○予雲南順甯等處陣亡遊擊魯國祥都司

安根。子總劉玉等祭葬世職加等。○丙子諭內閣。左宗棠奏餉鞘渡河沈失。請將管解委員議處。沈失餉銀豁免。並請飭緝匪分餉銀賊犯一摺。開復同知吳人壽由駐陝軍需局委赴山西運城。提解商匯廣東。協餉六萬兩。本年八月間。押鞘渡河。陡遇風浪。沈船衝沒。餉銀十一鞘。共銀一萬一千兩。續經查明永濟縣船戶張麥紅等有撈獲餉銀分匿兩鞘之事。除起獲銀一千二百餘兩外。尚有餉銀

七百餘兩。及逃犯楊黑毛等未獲。此次解餉委員吳人壽管解不慎。咎無可辭。著交部議處。並著山西巡撫嚴飭該管地方官勒限追緝。撈獲匪分餉銀賊。務獲懲辦。毋任漏網。至沈失餉銀九千兩。既據奏稱實因船行猝遇風暴損失。著加恩准予豁免。○諭軍機大臣等。左宗棠奏官軍勦擊肅逆。疊獲勝仗。暨西甯土客回目乞撫。現在辦理情形各摺片。肅州回逆困踞孤城。疊次出撲官軍營盤。經

徐占彪等奮勇擊退。惟城中悍賊尚多。因獸猶鬪。允宜穩慎進取。迅拔堅城。該大臣現已添派陶生林等營前赴肅州。交徐占彪節制。調遣金順一軍計期亦應到肅。即著左宗棠飭令徐占彪會同金順。乘此聲威。迅圖攻拔。以竟全功。西甯土客各回。呈繳馬匹槍械。紛乞乞撫。並著飭令劉錦棠等妥為辦理。毋稍疏虞。逆首馬本源馬桂源。逃遁已燕。戎格因黨與已離。亦思投誠。免罪。該逆等狡詐性成。

恐以乞撫懈我軍心。萬一逃入番地。則捕獲尤難。仍著飭令劉明燈陳湜劉錦棠等妥慎籌辦。無論是否就撫。總以捕獲為要。不可稍涉迂緩。致誤事機。另摺奏。久病未痊。請特簡賢能等語。該大臣辦理甘肅軍務。宣力數年。地方漸就肅清。大功不日告竣。嗣後一切善後事宜。及吏治民生。正賴該大臣悉心籌度。至新疆軍務。誠非從內豫為布置。從新豫為調度。不可將來大兵出關。關內既須重臣鎮

撫而籌餉籌糧並籌轉運等事。尤恃有大臣實力實心經營布置。庶前敵各營不虞後顧。該大臣素顧大局。諒早籌計及此。應俟甘境救平。先將餉事兵事通盤籌畫。據實奏聞。朝廷倚畀方深。豈可遽萌退志。左宗棠著賞假一箇月安心調理。河州肅州軍情仍著隨時詳悉具奏。以慰塵繫。將此由六百里諭令知之。○甘肅西甯鎮總兵官黃武賢開缺。省親以記名總兵官何作霖為甘肅西甯鎮總兵官。

上以歲暮禋祭

太廟自是日始齋戒三日。○丁丑諭內閣。丁寶楨奏請將庸劣各員分別懲辦等語。山東淄川縣知縣湯炳堃。狃於積習。泄沓自安。候補知縣周廷燮。根柢卑鄙。難膺民社。富國場大使童錫恭。昏憤不職。永阜場大使呂懿。闇茸無能。均著卽行革職。署城武縣事壽張縣知縣方鳴皋。才識拘迂。辦公拮据。著以教職歸

部選用。招遠縣知縣趙國珍。嗜好過深。難期振作。著以原品休致。以肅官方。○諭軍機大臣等。理藩院奏遵議迎接新呼畢勒罕事宜。一摺。喀爾喀四部落汗王等擇於明年正月內由庫起程赴藏迎接。哲布尊丹巴呼圖克圖之呼畢勒罕。著派桑噶西哩前往迎接。隨行之堪布台吉等由理藩院咨行兵部給發路引。其一切應辦事宜均照該衙門所議辦理。現在西甯地方未靖。所有迎接人眾及明

歲由京派往之大臣沿途經過地方應一體派兵往返護送以利通行。著左宗棠豫師吳棠承繼恩麟於此項差務過境時多派官兵妥為護送不得稍有疏虞。理藩院摺均著鈔給閱看。將此由五百里各諭令知之。○追予安徽各屬陣亡殉難知縣李鴻等紳民婦女二十員名口分別旌卹如例。○戊寅以歲暮禋祭前期遣官祭

太廟中殿。

後殿○諭軍機大臣等庫克吉泰奏圍內頑佃聚眾抗官請將辦理不善官弁懲處一摺署翼長伊克坦布等帶兵前往圍場驅逐擅入正圍各佃有刁佃于歲等率領二百餘人蜂擁而至施放槍礮自擬不礙正圍結案偏令該員等照寫並搶去軍械等件豐仲泰等在湃布嘎溝門建修卡房突被佃民燒毀並拆倒大牆六十餘丈該佃等兇惡情形實屬目無法紀且聞伊等設立霸圍會名目若不嚴行懲辦則刁風日熾勢將釀成巨患著庫克吉泰嚴飭圍場總管等並該管地方官多派官兵迅將抗官為首之犯悉數拏獲按律懲治毋許一名漏網一面將圍內餘眾概行驅出其勾通之旗佃助勢之匪徒一併嚴密拏拏儻敢仍前抗拒即著照例格殺勿論至從前飭拏為首入圍及架唆煽惑各犯並著嚴緝訊辦署翼長伊克坦布豐仲泰防禦富祥安泰未能認真驅逐殊屬恒怯無能均著暫

行革職以示懲儆所有騰圍各事宜該都統務當妥籌辦理毋任滋生事端將此諭令知之○又諭成祿奏馳抵安敦揆捕賊匪籌辦軍糧李天和所部暫難前進並肅甘等處軍情各摺片成祿出關後揆捕零匪數百名安敦玉地方現無賊蹤並招募戶民酌發籽種舉辦屯田需用銀兩即著咨商景廉文麟於解到新疆協餉內酌量提撥以應要需該處民情困苦該提督務當加意撫綏毋令失所據奏採買之糧僅敷一冬支發續買糧石尚無就緒軍士枵腹堪虞自應速籌接濟著左宗棠嚴飭甘涼安肅各地方官務須寬籌糧石源源轉運或解至安西玉門或解至赤金以便成祿提用俟來年屯田收成後即可酌量停緩該軍既經出關餉需尤不可緩所有四川湖北陝西應協月餉著吳棠李瀚章郭柏蔭邵亨豫趕緊籌撥按數解交西征糧臺陸續運送出關毋稍延誤成祿以各省解到

之餉為數無多請飭部於款項稍裕省分先撥銀二三十萬兩仍在欠解協餉內扣抵歸款著戶部酌覈辦理前諭成祿催令李天和所部三營馳赴景廉軍營調遣茲據奏稱現在天氣嚴寒勢難強令前進請飭景廉等將駐紮安西等處之保安威儀數營先行調回等語景廉軍營兵力單薄亟應添軍助勦轉瞬春融軍行即可無阻著成祿即飭李天和整軍前進毋得藉端逗遛並著景廉文麟酌

度情形應否先將保安等營調往之處即與成祿咨商辦理吉林黑龍江馬隊已抵高臺著成祿飭令迅速整頓剋日馳赴景廉軍營以資厚集肅州之賊負隅日久現經左宗棠添派陶生林等營歸徐占彪調遣金順一軍計期亦應到肅此後軍事可期得手成祿惟當督飭各營嚴防賊匪出關竄擾毋稍鬆懈將此由六百里各諭令知之○賞蘇尼特郡王那本濟勒旺楚克科爾沁貝子阿敏烏爾

圖紫疆郭爾羅斯輔國公圖布烏勒濟圖雙眼花翎○命茂明安貝勒格楚克鄂爾多斯貝子扎那濟哩第翁牛特輔國公克什克阿爾畢濟呼在御前行走鄂爾多斯貝子巴達爾琿在紫禁城騎馬○予甘肅嘉峪關殉難吏目希祥祭葬世職○己卯拾祭

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢○遣官祭

太歲之神○諭內閣內務府奏端門樓東馬道有人溷進請飭嚴查一摺本月二十六日未刻該司員等前往端門馬道上查驗忽見

有人在東馬道樓前藏匿追拏未獲禁門重地宜如何嚴肅且前因端門樓失去腰刀撒袋等件甫經嚴飭乃該直班官兵等並不認真巡察仍令閒人白晝溷進任意懈弛殊堪痛恨嗣後前鋒統領護軍統領務當嚴飭直班官兵等實力巡察毋得仍前玩泄致干重咎○諭軍機大臣等榮全奏請飭調撥官兵等語據稱探聞瑪納斯逆回復與烏魯木齊纏頭講和有糾合二千餘人先擾民團後撲

官軍之謠又聞俄國兵隊五六百名由伊犁起程欲赴西湖恐有進取瑪納斯之意英廉等駐紮庫爾喀喇烏蘇兵力本單茲據所奏各情殊有腹背受敵之慮著榮全飭令該護軍參領等穩慎扼紮妥為防範俄兵若到西湖務當察看情形隨機應變毋稍輕率致有疏虞榮全軍營需兵孔亟該署將軍以前調杜嘎爾所部吉林黑龍江官軍五百名抵營需時因聞烏城有抽撤官兵之議請飭該城

將軍大臣將在防官兵內挑選二百五十名派營總伊楞額管帶赴營俟前調官軍抵烏時截留以補其數前據奎昌等奏該城軍情喫緊請將福珠哩所部吉林馬隊就近調撥當諭杜嘎爾飭令迅速進發俟行抵烏城後准奎昌等暫留防剿福珠禮一軍已令趕辦行裝拔隊較為迅速即著杜嘎爾檄令該軍剋日進發趨程徑赴榮全軍營不准稍涉遲滯奎昌等亦不得再行截留致誤事機其黑

龍江官兵並著杜嘎爾卽令接續前進俾資防剿烏境逆匪現竄何處著奎昌等嚴飭達爾濟實力截剿就地殄除並一面詳細奏聞將此由六百里各諭令知之 又諭榮全奏請催山東等省迅解餉銀並請飭部迅籌有著之款等語上年七月間因榮全前赴伊犁餉需緊要諭令丁寶楨等由山東河南地丁項下各撥銀五萬兩解交察哈爾都統遞解茲據榮全奏迄今一年有餘尚未報解到營

該營需餉甚殷著丁寶楨錢鼎銘迅將前項銀兩如數趕緊籌撥毋稍延緩該署將軍前請由部籌撥有著之款三十萬兩經戶部覆奏請於山西山東河南應解本年地丁京餉項下各劃撥銀五萬兩仍酌撥山西山東河南地丁銀各五萬兩統共撥銀三十萬兩至榮全前請將直隸山西河南協餉作為伊犁專餉亦經戶部覆奏所有新疆月餉七萬兩解到時無論何省餉銀均由奎昌等分撥以

一半歸烏魯木齊哈密巴里坤等城提用以一半歸伊犁塔爾巴哈台等城提用業於十月十七日諭令丁寶楨等如數籌撥並令該署將軍等欽遵辦理榮全此時諒可接奉前旨矣將此由五百里各諭令知之 又諭本日據榮全奏本年二月初一日所發摺件遺失茲復補繕具奏請飭採運茶斤並餉銀短數請飭追究各摺片榮全擬招集華商漸聚塔城冀復復前舊規以免行使俄票之累請

於綏遠城代買挂錫裏箱每箱約重六七十七斤紅梅茶八百箱上細珠蘭茶二百箱等語著定安卽行照數購辦派員解赴科布多存儲聽候榮全調用應需價值俟新疆協餉解過綏遠時如數扣還歸款並著曉諭向日在塔貿易各茶商照舊領票販運茶葉赴塔貿易毋稍觀望科布多解到榮全軍營餉銀二萬一千六百兩據稱先行開用三鞘共短銀二十九兩五錢其餘各鞘恐亦不能足數聞

科布多外委李吉祥赴張家口迎提軍餉有私開餉鞘情事請飭追究等語著托倫布保英將李吉祥嚴行審訊如有前項情事即行照例懲辦嗣後新疆軍餉經過各城著該將軍都統大臣等均加貼印花以便稽察將此由五百里各諭令知之以讀祝聲音洪亮賞太常寺少卿慶福花翎（朝鮮國使臣金壽鉉等三人於午門外瞻觀）庚辰

上御保和殿筵宴朝正外藩科爾沁喀爾喀阿

拉善蘇尼特郭爾多斯阿巴噶浩齊特土默特茂明安喀喇沁烏喇特郭爾羅斯翁牛特歸化城土默特敖漢察哈爾土爾扈特巴林王貝勒貝子公額駙台吉暨朝鮮正副使等隨文武大臣依次就坐諸樂並作

上進酒召科爾沁扎薩克圖謝圖親王巴寶多爾濟喀爾哈親王達爾瑪阿拉善扎薩克親王貢桑珠爾默特蘇尼特扎薩克郡王托第布木鄂爾多斯貝子扎那吉哩第阿巴噶卓

哩克圖郡王剛噶爾倫布浩齊特扎薩克郡王濟克登噶維張土默特貝子索特那木色登茂明安貝勒格楚克喀喇沁貝勒德木齊扎布烏喇特鎮國公貢蘇龍扎布郭爾羅斯扎薩克輔國公圖布烏勒濟圖翁牛特輔國公克什克阿爾畢濟呼歸化城土默特輔國公貢格巴勒敖漢貝勒達克沁察哈爾輔國公濟楚克扎木蘇土爾扈特布彥圖親王策林喇普坦巴林二等台吉色旺諾爾布等至

御座前賜酒成禮（奉）

慈安端裕皇太后

慈禧端佑皇太后幸漱芳齋侍午膳（酉刻詣

鍾粹宮

慈安端裕皇太后前行禮長春宮

慈禧端佑皇太后前行禮（予貴州各屬陣亡殉難候選府經歷王定邦等紳民婦女一千八百七十九員名口分別旌卹如例）是年旌表孝子直隸等省張桂蘭等一百三十八

名孝友。江西等省胡光所等八名。孝婦直隸等省胡宣妻鄭氏等三口。孝女。湖南等省曹靜宜等十四口。烈婦直隸等省王永喜妻盧氏等四十三口。烈女。四川等省湯庚妹等十口。義夫。浙江等省張廷錡等五名。義士。江西省歐陽起玟等三名。義民。四川省冉昌華等二名。守節合例。滿洲護軍富忠妻張氏等一百十八口。蒙古護軍阜王保妻李氏等八十四口。漢軍教爾布金瑞忠妻武氏等三十七口。各省駐防邵廷珠妻龔氏等三百九十二口。奉天等省劉福岳妻孟氏等一萬九千六百八口。夫亡殉節。浙江等省顏文藻妻劉氏等十七口。未婚守志。江西等省胡斯鈐聘妻熊氏等二十四口。百歲壽民。廣東等省陳佑昌等十名口。五世同堂。陝西等省蘇福貴等二十四家。樂善好施。江西等省胡光墉等四名。急公好義。安徽等省朱宗潘等二名。均給銀建坊如例。○會計天下民數穀數。除江

蘇安徽雲南廣西陝西甘肅未經冊報外奉天等省通共大小男婦二萬七千四百六十三萬六千十四名口。存倉米穀二百八十三萬九千五百十四石五斗九合五勺。

大清穆宗繼天開運受中居正保大定功聖智誠孝信敏恭寬毅皇帝實錄卷三百四十七

大清穆宗繼天開運受中居正保大定功聖智
誠孝信敏恭寬毅皇帝實錄卷之三百四十八

同治十二年癸酉春正月辛巳朔

上詣

奉先殿行禮○詣

堂子行禮○遣官祭

太廟後殿○率王以下文武大臣詣

慈寧門慶賀

慈安端裕皇太后

慈禧端佑皇太后禮成御太和殿受朝作樂宣

表如儀○詣

大高殿

壽皇殿行禮○御乾清宮賜近支親藩等宴○
奉

慈安端裕皇太后

慈禧端佑皇太后幸漱芳齋侍午膳 命貝勒

載澂在內廷行走貝勒載漪頭品頂帶載瀾

在乾清門行走 壬午

上詣鍾粹宮問

慈安端裕皇太后安長春宮問

慈禧端佑皇太后安至己酉皆如之 緩徵直

隸寶坻薊保定霸文安大城固安永清東安

武清宛平良鄉房山涿縣清苑安肅新城博

野雄祁安高陽河間獻任邱天津鹽山開元

城大名東明長垣豐潤玉田饒陽安平深澤

三十八州縣被水地方本年額賦並展緩通

三河香河定興望都容城蠡束鹿肅甯青靜

海滄南皮慶雲正定晉無極藁城新樂沙河

南和鉅鹿任永年邯鄲成安肥鄉廣平雞澤

磁武邑趙甯晉深定三十五州縣積欠糧租

暨民借倉穀 癸未

高宗純皇帝忌辰遣官祭

裕陵

上詣

壽皇殿行禮 諭內閣朕於三月初五日恭奉

慈安端裕皇太后

慈禧端佑皇太后啟鑒初八日祇謁

東陵初九日節屆清明朕恭詣

定陵行數土禮並詣

隆恩殿行大饗禮虔申孺慕禮成後於十二日

還宮所有應行典禮並一切事宜著各該衙

門照例敬謹豫備 又諭前因端門樓庫存

軍械有失竊情事諭令前鋒統領護軍統領

將如何嚴密巡查看守之處妥議章程具奏

茲據察杭阿等奏稱請飭內務府將現存軍

械若干會同司鑰長查明造冊咨送景運門

存案嗣後凡遇收放軍械時由該衙門將實

存數目知照景運門傳知直隸司鑰長會同

查封並請飭工部將各門馬道牆垣一律修整等語均著照所議辦理所請添蓋堆撥著毋庸議至禁門重地向有直班官兵專司看守如果認真巡查何至有被竊情事該前鋒統領護軍統領平時漫不經心任意懈弛此次因內務府將軍械被竊及端門馬道樓前有人藏匿追拏未獲各情先後據實奏聞輒請由內務府派撥包衣護軍二十名輪流直班章京二員專司鎖鑰會同稽查似此意

存諉卸殊屬可惡所請著不准行察杭阿等均著交部議處仍著責成前鋒統領護軍統領督飭直班官兵認真巡查看守如再仍前玩忽定行嚴懲不貸其各處應用腰牌著內務府隨時迅速發給以便稽查 諭軍機大臣等奎昌等奏追勦賊匪出境豫籌防勦一摺官軍於上年十一月間在那瑪勒吉幹招地方遇賊接仗賊即敗竄探聞該匪兩股每股五六百名一竄科布多迤西一路不知何

往一回竄肅州邊外之厄濟納河諾彥山一帶與該處踞匪會合又聞該逆欲將所擄貨財販運於綏遠城庫倫多買槍藥圖在邊外肆擾肅州踞賊屢竄出關必須迅克肅城方免蔓延為患著左宗棠檄飭徐占彪會合金順兵勇奮力進剿剋期攻拔務將該逆醜類就地殲除毋任紛竄關外又戒不了之局其厄濟納河諾彥山地方為肅逆巢穴該大臣兵力此時能否兼顧並著酌度辦理奎昌等

擬俟請調之官兵軍械到齊後騰出察哈爾馬隊令其移營察漢淖爾地方作為追剿之兵隨時探明諾彥山等處賊勢相機攻剿即著奎昌常順多布沁扎木楚杰剛悉心商酌妥籌布置其竄往科城迤西賊尤在何處滋擾著托倫布保英確切偵探派軍截剿盡殄賊氛並著定安張廷岳阿爾塔什達多派官兵於所屬境內認真盤查毋任賊匪潛行販運以杜詭謀奎昌等摺內所稱該匪黨內

多有花勇係屬何項勇丁並著查明具奏。所有此次打仗出力官兵及在事各員准其擇尤保奏毋許冒濫將此由六百里各諭令知之。甲申

上詣

時應宮拈香 御紫光閣賜蒙古王貝勒貝子公額駙台吉暨朝鮮使臣呼圖克圖等宴並賞賚有差 命阿拉善公銜頭等台吉特色楞烏喇特鎮國公貢蘇龍扎布在乾清門

行走賞科爾沁公銜頭等台吉色旺諾爾布桑保三等台吉都特什哩勒布花翎、緩徵山東濟甯鄒平長山齊東長清東阿惠民濱利津霑化蒲臺甯陽嶧汶上壽張濰澤單曹鉅野鄆城濮范觀城朝城蘭山茌平博興樂安金鄉東平青城海豐滋陽滕陽穀城武聊城高苑魚臺三十九州縣暨東昌臨清濟甯德州四衛被水被旱被蟲被風地方本年上忙額賦並各項租課、乙酉

上以孟春時享

太廟自是日始齋戒三日○丙戌諭軍機大臣等吳棠奏採運燈杆木植請飭沿途各省督撫查明河道有無阻滯並令地方官照料催趲一摺川省採辦

天壇望燈杆木植業經覓得堅直大木開工砍伐著吳棠督飭承辦之員趕緊運解毋任遲誤至此項木植查照向章應由江南瓜洲口循運河北上中間有無阻滯著沿途各省督

撫暨漕運河道各總督查明經過地方如能照舊運行卽分飭所屬一體照料催趲以期妥速如運河難以行走能否由海道解運並著該督撫等會商妥辦將此諭知李鴻章李宗羲吳棠張樹聲喬松年文彬丁寶楨並傳諭恩錫知之○以前任山西巡撫李宗羲為兩江總督並充辦理通商事務大臣以漕運總督張樹聲為江蘇巡撫山東布政使文彬為漕運總督山東按察使李元華為布政

使克沂曹濟道長賡為按察使 丁亥

世祖章皇帝忌辰遣官祭

孝陵 諭內閣張樹聲奏特參庸劣不職各員一摺江蘇候補知府馮庚泉行止庸陋聲名狼藉候補知縣廖明賢卑鄙嗜利行同無賴均著革職永不敘用署荆溪縣事無錫縣知縣傅琳森辦事顛預聽斷偏酷如皋縣知縣周際霖審理要案草率糊塗均著卽行革職江陰縣知縣顏榮階氣體衰弱難期振作惟

該員文理尚優著開缺以教職歸部選用以肅官常 又諭張樹聲奏勇丁藉端滋事請將營哨各官分別懲處一摺江蘇青浦縣境鳳凰山向設教練三營上年六月間前署兩江總督何璟訪聞管帶正營副將鄭崇義管帶護軍營副將王金元均屬不知振作卽撤委另行派員管帶該兩營勇丁聞營官撤委輒以索賞為詞聚眾譁鬧幾至釀變嗣經查明縱容滋鬧之哨官李春林等四員因從前

統領該營之提督鄭海黿交卸回籍時曾有
犒賞遂任勇丁藉口討索以致譁謠實屬有
意縱容該營官鄭崇義等雖無剋扣餉項情
弊惟甫經交卸而所部弁兵聚眾脅制總由
平時約束無方均有應得之咎鄭崇義王金
元均著以參將降補哨官遊擊李春林守備
鄭崇仁鄭家才千總李金臺均著革職李金
臺藉詞挾制情節尤重並著發往黑龍江充
當苦差以肅軍紀○是日立春順天府進土

牛春山寶座 戊子享

太廟

上親詣行禮、遣官祭

太歲之神、

上以次辛祈穀於

上帝自是日始齋戒三日 庚寅

上詣

南郊齋宮齋宿、辛卯祈穀於

上帝

上親詣行禮○詣

關帝廟拈香

孝全成皇后忌辰遣官祭

幕陵○壬辰諭內閣英翰奏請將庸部不職各
員分別懲辦一摺安徽懷遠縣知縣童琛聲
名平常補用知縣易雍大糊塗乖謬候補縣
丞俞迺昌舉動狂躁天長縣訓導陳錫周聲
名狼藉均著卽行革職候補知縣金士衍才
識庸闇著以府經歷縣丞降補廬江縣知縣

李凌霄不諳吏治惟文理尚優著以教職選
用桐城縣知縣黃長森才欠開展難勝繁劇
著開缺另行補用以肅官方、又諭景廉奏
訊明調兵輕進之委員請從嚴懲辦等語已
革副將桂洪元於上年春間經景廉委赴沙
山子等處查看地方情形於應辦事件並未
查明輒思邀功寄信提督張玉春令其
帶兵前進並有不必稟明都統之語以致官
軍輕進失利實屬謬妄糊塗桂洪元著卽發

往黑龍江充當苦差沿途軍營不准率行奏留○諭軍機大臣等景廉奏請嚴催各省專協等餉一摺景廉奉命西征需餉緊急各省應解專協等餉報解寥寥該部統現駐巴城部署兵勇每月約需餉銀六萬餘兩若不迅籌接濟譁潰堪虞著戶部即於庫存項內提撥銀二十萬兩交順天府派員解至察哈爾由額勒和布等接收轉運景廉軍營以應急需毋稍遲誤其各省欠解新疆軍餉及奉撥

景廉軍營專款著戶部嚴催各該省迅速設法源源籌解不得意存膜視致誤要需景廉軍營轉運糧餉軍火亟需駝隻著定安額勒和布景瑞各將前次派辦駝隻如數採買解送景廉軍營以備應用景廉即將巴城防守事宜布置周密督率兵勇剋期迅赴古城力圖進取將此諭知戶部並由六百里諭令定安額勒和布景瑞景廉知之○刑部右侍郎常恩因病解職調理藩院右侍郎廣壽為刑

部右侍郎以大理寺卿成林為理藩院右侍郎○以散秩大臣扎拉豐阿為正藍旗漢軍副都統前任吉林副都統毓福署正白旗蒙古副都統以副都統銜頭等侍衛沙克都林扎布為巴里坤領隊大臣予故巴里坤領隊大臣伊勒屯祭葬卹廕如軍營病故例

癸巳

上御乾清宮賜近支親藩等宴諭軍機大臣等奎昌等奏借地安插棍噶扎勒參徒眾並請將出力委員獎勵各摺片據稱棍噶扎勒參徒眾回阿勒台山耕牧奎昌等因該處係烏梁海蒙古牧地非辦理清楚不能彼此相安今即補佐領雅爾哈前往阿勒台山會同科布多委員與烏梁海兩翼散秩大臣妥為籌辦該散秩大臣等情願借地安插該呼圖克圖等亦皆樂從等語自是日前權宜辦法惟安插徒眾究有若干棍噶扎勒參要求究係何事均未據一一聲敘著即詳細奏聞奎

昌現已起程回京卽著常順多布沁扎木楚志剛隨時妥為駕馭毋任滋生事端該烏梁海地屬科布多著托倫布保英留心察看先事防維毋稍疏忽並飭烏梁海兩翼散秩大臣等諭知該蒙古人眾各守本分務令永遠相安卽補佐領雅爾哈著仍以前保佐領軍功班次遇缺儘先前卽補補缺後以協領儘先補用以示鼓勵將此由五百里各諭令知之尋奏遵查棍噶扎勒參所收徒眾共一

千四百餘人擬照例安插八百人撥給牧地其要求各事如歲領茶布立事務處頒給漢蒙三體字喇嘛則例暫設巡緝官兵等情已咨理藩院查覈辦理報聞○甲午

宣宗成皇帝忌辰遣官祭

慕陵○

上詣

奉先殿

壽皇殿行禮○以故翁牛特鎮國公永隴子旺

木林沁襲爵○乙未

上詣

大高殿

壽皇殿行禮○御保和殿賜王以下文武大臣蒙古王貝勒貝子公額駙台吉暨朝鮮使臣等宴○奉

慈安端裕皇太后

慈禧端佑皇太后幸漱芳齋侍午膳○諭內閣劉嶽昭曾璧光周達武奏雲貴官軍會克新

城老巢黔省上游肅清一摺貴州新城地方與雲南平彝等州縣接壤逆回金萬照等廣集其間為患兩省經劉嶽昭等飭令雲貴各軍會合進剿疊將賊礮攻毀擒斬甚多上年十月初五日提督周達武親督官兵會同沈壽榕等軍直逼城下攻入南門將逆首金萬照等擒獲正法首要各逆悉數殲除當將新城克復黔省上游一律肅清貴州巡撫曾璧光歷年辦理軍務調度有方貴州提督周達

武自帶兵入黔所向有功現在全省底定自應渥予恩施曾壁光著賞給頭品頂帶太子少保銜雲騎尉世職周達武著賞給騎都尉世職以獎勞勩又諭劉嶽昭奏請將庸劣各員懲辦等語雲南補用同知直隸州知州陳慶枚性情羸率舉止輕浮補用總兵杜得雲行為卑鄙不安本分均著卽行革職永不敘用並不准投效軍營以儆官邪諭軍機大臣等黔省新城逆回日久負隅此次該將

領等奮勇攻克將要逆悉數翦除上游一律肅清勦辦甚為出力黔省變亂十有餘年現在地方新復一切善後事宜亟應妥為經理著曾壁光等懷遵疊次諭旨悉心籌辦以期一勞永逸新城降眾二千餘人業經該撫等籌商安插仍著飭令地方官撫綏防範毋貽後患降目張忠誠著劉嶽昭隨時察看如再不知悔改卽行明正典刑不得稍事姑容該處逃亡人眾漸次復業曾壁光務當慎選賢

能守令盡心撫輯用副朝廷軫恤殘黎至意該兩省官軍應如何分別留防撤回以資鎮壓並節餉需之處著劉嶽昭曾壁光周達武妥籌辦理將此由五百里諭知劉嶽昭曾壁光並傳諭周達武知之○以貴州攻克新城賊巢上游肅清賞布政使黎培敬按察使林肇元頭品頂帶提督何世華吳奇忠游宗翠黃宗耀總兵官李家福黃馬褂總兵官許桂蘭道員吳德溥副將楊國相蕭太和參將彭

德沅遊擊梁慶章舒金才孫炳操陳治道段定陞都司陸長知巴圖魯名號知府胡紹曾都司劉官德等花翎通判李成煥等藍翎餘加銜升敘開復有差予陣亡總兵官劉同升等七十六員祭葬世職加等 丙申

上御乾清宮賜大學士尚書等宴 諭內閣本月二十六日親政以後凡遇

慈安端裕皇太后

慈禧端佑皇太后萬壽及元旦令辰並一切慶

典應行呈遞如意之王大臣等均著照舊於兩宮

皇太后前呈遞○諭軍機大臣等前因瑞雲奏請劃撥涼莊官兵餉項當經諭令吳棠在四川協甘餉內按月劃扣銀五千兩作為涼莊兩營八九兩年俸餉由該副都統派員領取毋庸統解西征糧臺以清款目茲據額爾慶額奏涼莊官兵困苦請飭四川援案續行劃撥餉項等語著吳棠仍在四川協甘餉銀二

萬兩內續行按月劃撥銀五千兩作為十年十一年涼莊兩營官兵俸餉由額爾慶額派員領取毋稍遲滯並知照西征糧臺查照辦理將此各諭令知之○丁酉諭軍機大臣等王文韶奏援防各軍分別遣留一摺湘省援黔各軍防勦數年欠餉甚鉅王文韶已將席寶田等營勇裁撤一萬二千餘人其留防黔境之龔繼昌等營一萬三千餘人仍令扼要設防以資鎮守辦理尚為妥協現在黔省上

游甫就肅清諸事尚須布置其下游楚軍所復之地黔省尚難兼顧龔繼昌各營一時遽難裁撤且遣散游勇尤須安插得宜即著王文韶審慎圖維妥為辦理湘省防軍分紮長衡永及沅晃一帶並著飭令統帶各員認真防堵毋稍疏虞至留黔各軍月餉現照防軍一律酌減三成支發自為節省餉需起見惟減成後每月是否能放足餉暨嗣後應如何次第酌裁營勇並清釐餉需之處仍著王文

韶隨時酌度情形妥慎籌辦將此諭令知之○以甘肅武威擊勦竄賊獲勝賞驍騎校全安等藍翎○戊戌諭軍機大臣等總理各國事務衙門奏請派員辦理日本國換約事宜一摺日本國通商條約上年經李鴻章與該國使臣會同議定茲該國派使臣來津換約著派李鴻章將上年所立條約妥為互換其條規二本即由總理各國事務衙門發交李鴻章祇領照辦其觀奉國書一節著李鴻章

於換約時體察情形妥慎酌辦將此諭令知之○己亥

上御撫辰殿大幄次賜蒙古王貝勒貝子公額駙台吉暨朝鮮使臣等食諭內閣楊昌濬奏特參庸劣不職各員一摺浙江瑞安縣知縣白瑛才識庸闇辦事顛頊候補縣丞王繩濬居心巧詐聲名陋劣候補縣丞程壽昌試用從九品王超委辦釐捐操守不潔均著卽行革職候補通判胡秉璠貌似有才不知檢

束著以縣丞降補德清縣知縣詹儀桂性緩多病難期振作候補知縣張兆基步履艱蹇年力就衰均著勒令休致以肅官常○予甘肅四合原被戕總兵官魏紀鑒等祭葬世職○蠲緩江西蓮花南昌新建進賢清江新淦新喻安福永新東鄉鄱陽餘干樂平萬年星子都昌建昌安義德化德安瑞昌湖口彭澤豐城上高新昌峽江廣昌二十八廳縣暨九江府同知所屬歙收地方新舊額賦並雜課

有差○緩徵兩浙錢清西興長亭橫浦浦東鮑郎六場被災地方竈課○庚子諭內閣景霖奏請撥銀兩以備要差一摺朕於今年三月間恭奉

慈安端裕皇太后

慈禧端佑皇太后祇謁

東陵沿途駐蹕地方搭橋修道並修理行宮等處工程自應早為辦理現在該處永濟籌備兩庫並無存款景霖請援案於直隸藩庫撥

銀一萬二千兩以備支用卽著李鴻章飭令藩司迅速籌撥銀一萬二千兩派員限二月初間解到毋得遲延致誤要需景霖一面趕緊派員撙節動支妥為供辦此項銀兩於事竣後卽著景霖覈明用數分別咨送報銷毋稍浮冒○諭軍機大臣等李鶴年王凱奏奏請飭署任提督統領輪船等語提督李成謀現在調補長江水師提督輪船事務勢難兼顧李鶴年等以署提督羅大春在閩年久熟

悉情形擬令該員接統著卽照所請所有輪船統領應辦事宜卽責成該署提督經理務令隨時校閱俾臻嫺熟沈葆楨現已到工任事亦當隨時查察督飭認真妥辦毋稍懈弛將此各諭令知之○辛丑

孝穆成皇后忌辰遣官祭

慕陵○諭內閣都興阿奕慶奏查勘

福陵

昭陵應修各工請擇吉派員興修一摺著欽天

監於本年三四月內選擇吉期先行知照卽著盛京將軍會同工部侍郎屆期敬謹興修○又諭都興阿奏請准侍衛回京供職並懇獎敘一摺御前頭等侍衛索布多爾札布前在天津南路隨同都興阿帶隊防剿擒匪旋經調赴奉天駐紮巡防前後五載始終勤奮尚屬著有微勞索布多爾札布著賞加副都統銜以示獎勵並准其回京供職○又諭慶恩春佑奏祖塋被賊偷掘請飭查拏一摺順

承簡郡王倫柱之側福晉暨順承勤郡王春山之側福晉等墳塋在西直門外二里溝地方突於本年正月內被賊偷掘該王祖塋牆外鎮國將軍春定等墓亦有被掘情形發掘墳墓法所必懲況京城附郭地面郡王祖塋竟至被掘多處匪徒肆行無忌捕務廢弛已極著步軍統領衙門順天府五城將該犯等迅速查拏送部從嚴懲辦並將看守墳塋家人究訊有無勾匪情事一併從重辦理以儆

兇頑○諭軍機大臣等前據左宗棠奏成祿糜餉遷延舉動乖張當經諭令穆圖善密查具奏旋據穆圖善覆稱成祿不知檢束叅款俱屬有因本應治以應得之罪因念成祿業經出關所部乏人接統是以未經降旨本日復據左宗棠奏成祿前在高臺苛派捐輸迨士民赴營申訴復指為聚眾抗糧誣為叛逆並將寄寓之權家園莊圍定扼捕殺斃二百餘人猶且虛報勝仗籲請獎敘等語是該提

督喪心昧良情罪重大實難一日姑容金順前奏行抵涼州即日督飭後隊赴肅此時計已馳抵肅州著卽酌帶所部兼程出關接統成祿各隊一面傳旨將成祿革職拏問卽日遴派員弁押解來京聽候治罪毋得稍涉遲延致有洩漏肅州軍務已諭令左宗棠責成徐占彪等迅速攻勦應否酌增勁旅卽由該督調派金順於拏問成祿派員押解起程後卽在安敦玉一帶扼要駐紮聽候諭旨該將

軍所部各隊及分紮後路之軍應如何調赴前敵留顧運道之處卽著金順斟酌軍情妥為籌畫奏明辦理將此由六百里密諭知之又諭本日據左宗棠奏成祿在高臺時苛斂捐輸誣民為逆縱兵冤斃多命所犯情節重大斷難一日姑容已密諭金順傳旨將成祿革職拏問解京治罪矣關外距京寫遠解送務須嚴密除由金順派員押解外著左宗棠多派得力員弁沿途護解並飭經過地方

官接續遞解前進不得稍涉疏虞前署高臺縣知縣管笙著左宗棠一併派員押解來京質證毋任成祿得以狡展至金順所部兵勇或調赴前敵或分紮後路軍糧關繫緊要左宗棠務當隨時妥籌接濟毋令缺乏一切運送軍糧軍火並檄飭地方官毋得稍分畛域肅州軍務卽責成徐占彪等認真勦辦迅掃逆氛如須添撥兵勇卽著酌量調派以資得力所請將通判王佳植等免議生員李載寬等昭雪之處俟定案時一併降旨將此由六百里密諭知之又諭前因成祿一軍出關需餉緊急諭令戶部於款項稍裕省分酌撥茲據該部奏稱擬在四川積欠餉內先提銀十萬兩湖北積欠餉內先提銀五萬兩共銀十五萬兩請飭籌解等語著照該部所議卽由吳棠李瀚章郭柏蔭各飭藩司如數籌撥解至西征糧臺運送出關毋稍延宕此項提撥餉銀仍在四川湖北欠餉內扣抵歸款將

此由五百里各諭令知之○壬寅諭內閣李鴻章奏請豁免積欠旗租一摺各省民欠錢糧業經於上年九月間恩詔內分別豁免惟直省民佃旗地完納官租與民糧事同一律近年災患頻仍佃種旗地之民亦甚困苦著加恩將直隸各州縣同治六年以前實在民欠各項旗租並各案補徵銀兩一體豁免以紓民力○蠲緩直隸安河間任隆平甯晉五州縣被水村莊上年額賦○蠲緩廣西武

宣宣化橫崇善左養利永康凌雲雄容來賓柳城遷江歸順天保奉議新甯永淳隆安思恩河池臨桂靈川永安修仁武緣甯上林貴二十八州縣被擾被旱地方上年額賦暨兵米有差○癸卯

孝聖憲皇后忌辰遣官祭

泰東陵○諭內閣朕奉

慈安端裕皇太后

慈禧端佑皇太后懿旨三載考績為國家激揚

大典中外滿漢諸臣有能恪共職守勞勩最著者允宜特加甄敘以示優眷茲當京察屆期吏部開單題請詳加披閱恭親王首贊樞廷歷久不懈盡心輔政鉅細靡遺懋著勤勞深資倚任著交宗人府從優議敘大學士文祥吏部尚書寶璽兵部尚書也桂芬工部尚書李鴻藻和衷贊畫矢慎矢勤均著交部議敘大學士直隸總督李鴻章盡心民事宣力彌勤陝甘總督左宗棠公忠謀國艱鉅克膺

均著交部從優議敘餘著照舊供職○諭軍機大臣等李鴻章奏宣化古北口練軍未便續行調派托倫布等奏籌辦防勦各一摺前諭李鴻章於宣化古北口練軍內挑選五百名赴烏調遣茲據奏稱該處練軍存兵無多捍衛畿輔彈壓地方未便再議抽調自係實在情形烏里雅蘇台前調察哈爾馬隊二百五十名計日即可到防現在兵力是否足數分布儻必需步隊協防仍著咨商張廷岳等

於庫防練軍內酌量抽撥就近赴烏用資防守常順多布沁札木楚志剛張廷岳阿爾塔什達當彼此悉心會商妥籌辦理不得稍涉推諉致誤事機賊匪竄擾草地飄忽靡常現經托倫布等分撥官兵布置城防扼紮要隘卽著督飭實力防勦以杜窺伺逆匪由佈爾漢博克達西南一帶竄去究在何處滋擾著常順多布沁札木楚志剛托倫布保英確切偵探嚴飭官軍會合截勦務將該匪迅速殲

除毋任日久延蔓將此由五百里各諭令知之○又諭托倫布保英奏請飭催經費銀兩等語科布多經費銀兩前經戶部於山東河南兩省地丁項內各撥銀五萬兩限於上年內解運過半茲據奏稱此項銀兩尚未解到該城艱窘異常應放各款刻不容緩請飭迅速撥解以濟急需著丁寶楨錢鼎銘卽將該兩省指撥科城經費銀兩趕緊如數籌解運至察哈爾都統衙門交納由托倫布等派

員迎提應用毋稍遲緩將此由四百里各諭令知之○兵部議覆直隸總督李鴻章奏永定河修防緊要額兵不敷差遣請添撥戰兵十名守兵九十名卽於通省標營內均勻裁撥應如所請辦理從之○兵部議覆前署兩江總督張樹聲奏請將移撥南匯營之狼山鎮中營守備一缺仍留狼山管理錢糧事宜應如所請辦理從之○以奉天節年勦匪出力賞佐領高元朗等花翎都司丁春喜等藍

翎餘加銜升敘有差○甲辰諭內閣劉嶽昭岑毓英奏克復大理府城首逆伏誅全郡肅清一摺逆首杜汶秀盤踞大理府城十有八載地險城堅負隅抗拒上年五月間官軍攻克上下兩關賊勢漸蹙雲南巡撫岑毓英先將近省及東南各郡次第廓清督兵前赴迤西規取大理十一月初十至二十等日總兵楊玉科及派出各將弁開挖地道轟陷大理東南城隅乘勢擁入城內之上城晝夜鏖戰

共斃賊二千餘名。奪據蓮花池一帶賊壘。官軍攻逼土城西北隅。楊玉科復約束各軍四面合擊。自率親兵策應。施放開花大礮轟毀賊營。礮樓木柵逆首杜汶秀見事勢危迫。於二十五日親率死黨萬餘接仗。楊玉科督軍兜剿。至二十六日斃賊五六千名。該逆敗入土城內之偽城。情急服毒。其黨將杜逆獻解軍前。正法。岑毓英督軍至五里橋地方。環城審視。探知餘酋楊榮、蔡廷棟等仍形負固。會

商楊玉科先期密派將弁暗入偽城分投設伏。十二月初七日。楊玉科率同太和縣知縣譚席珍直至縣署駐紮。初九日潛入偽府。督令伏兵奪據該逆礮樓。賊眾驚亂。岑毓英復親率各軍與楊玉科內外夾擊。連日血戰。殺賊萬餘。賊分股由東、南、北三門狂竄。我軍跟蹤追擊。生擒偽大冢宰馬仲山等多名。殲賊三千餘名。生擒偽大司衡楊榮、偽大經略蔡廷棟等。盡法懲治。並搜獲杜逆子女杜淙揚

等分別收禁。悍黨悉數殲除。大理全郡肅清。覽奏實深欣慰。逆酋杜汶秀首級卽著於犯事地方懸竿示眾。無庸獻馘來京。其年未及歲之逆子杜淙揚、杜賡揚、杜城揚三名及幼女一人著在該省嚴行監禁。並著刑部查明例案。咨行該督撫照例辦理。雲南巡撫岑毓英當兵餉支絀之時。激勵眾心。親臨前敵。攻克堅城。渠魁授首。實屬謀勇兼裕。調度有方。深堪嘉尚。著賞穿黃馬褂。並賞給騎都尉世

職。雲貴總督劉嶽昭與岑毓英和衷共濟。克奏膚公。著開復革職留任。處分交部從優議敘。記名提督開化鎮總兵楊玉科著賞給騎都尉世職。並賞給白玉翎管一支、白玉搬指一箇、小刀一柄、大荷包一對、小荷包兩箇。所有單開之總兵段瑞梅等均著交軍機處記名。遇有提督缺出請旨簡放。諭軍機大臣等杜逆自倡亂以來。流毒十有八載。攻陷五十三城。踞險負隅。其勢甚熾。岑毓英於兵單

餉絀之時激勵眾心堅忍耐苦先將東南各郡次第蕩平然後專事迤西卒使全境肅清渠魁授首實屬謀勇兼裕功績懋昭劉嶽昭遇事和衷克濟成績均堪嘉尚本日已明降諭旨分別加恩並將出力陣亡各員照所請獎卹俟該省全境肅清再行普沛恩施大理既復其未復之順甯雲州及所屬之小猛統猛郎錫臘又騰越廳城及所屬之烏土寨馬家村並蒙化廳屬之大小園埂自應乘勝掃

蕩俾全省一律廓清卽著岑毓英督同楊玉科將圍埂賊巢迅速攻拔一面料理大理善後事宜務臻妥善順甯雲州兩城前有旨令馬如龍前往攻取該提督以餉絀尚未起程所派頭隊官兵僅五百名亦嫌單薄岑毓英現擬就近分軍相機進取仍著傳知馬如龍懷遵前旨剋日帶兵徑赴順甯雲州一帶合兵會剿以竟全功應需餉項卽著劉嶽昭妥籌接濟毋令缺乏至騰越地方卽責成總兵

李維述帶領所部前往辦理毋稍遲誤將此由六百里各諭令知之○又諭額勒和布等奏籌辦馬隊出邊暨覈計供運軍糧各摺片調赴景廉軍營之吉林黑龍江馬隊一千名已由額勒和布等撥給駝隻口糧分起由張家口出邊並派員隨往沿途照料送至烏里雅蘇台交替該都統以時值春深駝隻力弱卽難負重致遠恐抵烏城臺界內原帶牲畜不能得力所慮自是實情著常順多布沁扎

木楚志剛景廉各於所屬臺路豫為籌備駝隻俟前項馬隊到時酌量撥給替換前進以免耽延額勒和布等動用餉銀著卽覈實具奏應解景廉軍營駝隻著迅卽如數撥往毋稍延緩嗣後察哈爾續運米石供應分防各軍卽照該都統等所議查照直隸總督奏定成案辦理調赴伊犁及景廉軍營各隊由察哈爾轉運米石供支每石約需銀十餘兩糜費甚鉅伊犁巴里坤等處間有耕種收穫著

榮全景廉體察各該處情形就地採買若干再由察哈爾糧臺運送若干亦可稍省經費如購糧款項不敷即可咨明額勒和布等將察哈爾所省運費米價等項按數撥往以資應用將此由五百里各諭令知之 又諭文麟奏追勦東山竄匪獲勝一摺肅州股匪屢次出關竄擾哈密東山經文麟派令統領魏忠義督軍駐紮塔爾沁堡城分扼各隘探勦馬賊並將逆回馬五十九擒獲惟該逆分

股突竄蹤跡靡常刻雖被擊遠遁難保不去而復來仍著飭令魏忠義將各要隘實力嚴防遇有賊匪竄至即行截擊毋任紛竄其二堡葫蘆溝一帶為該逆出竄之路並著嚴飭張忻李生元等多設偵探嚴密扼堵以免疏虞將此由五百里諭令知之 命倉場侍郎延煦前往天津會同總督李鴻章驗收海運漕糧 以克復雲南大理府城賞總兵官蔡標一品封典總兵官段瑞梅徐聯魁蔣宗漢

黃馬褂副將和耀參將劉步龍錢大川遊擊李應舉彭子祥都司和述廷楊建勳董良弼尉遲東曉趙騫斗蔡興國蔡正坤劉全忠馬中級蘇三保范桂興馬士成守備董雲慶彭子興黃河洲奚長青彭振綱知州范瓊章巴圖魯名號知州楊景修等花翎州判周維巽等藍翎餘加銜升敘有差予陣亡守備李正昌等九十九員祭葬世職加等 乙巳欽奉 慈安端裕皇太后

慈禧端佑皇太后懿旨皇帝寅紹丕基於今十有二載春秋鼎盛盛典學有成茲於本月二十六日躬親大政欣慰之餘倍深兢惕因念我朝

列聖相承無不以敬

天法

祖之心為勤政愛民之治况數年來東南各省雖經底定民生尚未久安滇隴邊境及西北路軍務未戢國用不足時事方艱皇帝日理

萬幾當敬念惟

天惟

祖

宗所以付託一人者至重且鉅祇承

家法夕惕朝乾於一切用人行政孳孳講求不

可稍涉怠忽視朝之暇仍當討論經史深求

古今治亂之原克儉克勤勵精圖治此則垂

簾聽政之初心所夙夜跂望而不能或釋者

也在廷王大臣等均宜公忠共矢勿避怨嫌

本日召見時業經諄諄面諭其餘中外大小

臣工亦當恪恭盡職痛戒因循宏濟艱難弼

成上理有厚望焉○又奉

懿旨前因皇帝沖齡亟宜乘時典學特簡師傅

朝夕輔導於今十有二年茲值親政伊始仍

當不忘古訓況學問事功互相表裏凡古今

治忽之原政事得失之故無不可因事監觀

引為法戒

列聖文謨武烈載在

聖訓尤應按日恭閱庶於用人行政得有遵循

國語清文亦必勤加練習皇帝每日辦事召

見後仍應詣弘德殿與諸臣虛衷討論李鴻

藻徐桐林天齡桂清廣壽均著照常入直盡

心講貫用收啟沃之功至肄武習勞乃我朝

家法騎射等事皇帝亦須次第兼習已諭令御

前大臣查照舊章隨時斟酌請旨敬謹伺候

前據醇親王奕譞奏親政有期懇將弘德殿

差使撤去等語著照所請嗣後無庸入直弘

德殿○引見京察三品以下京堂各員得旨

均著照舊供職○緩徵廣東海陽饒平鎮平

興甯四縣被水地方同治十年未完額賦○

丙午

上親政率王以下大學士六部九卿詣

慈寧門行慶賀禮○御太和殿王以下文武大

臣官員行朝賀禮○諭內閣朕受

皇考文宗顯皇帝付託之重沖齡踐阼時事多

艱仰賴

慈安端裕皇太后

慈禧端佑皇太后垂簾聽政簡任親賢勵精圖

治十餘年來粵捻各匪次第蕩平滇隴邊疆

漸臻底定洵足以揚

先烈而奠丕基

盛德豐功超邁前古朕仰蒙

慈蔭得以及時典學日就月將茲復座被

聖慈命朕躬親大政孳孳以敬

天法

祖勤政愛民為念仔肩至重深懼弗克負荷惟

有恪遵

訓諭兢兢業業上懍

祖

宗締造之艱下慰中外臣民之望用以祇承

家法仰答

慈恩至在廷王大臣及各省封疆大吏務當共

矢公忠匡朕不逮其餘大小臣工亦宜精白

乃心恪恭盡職勤求吏治乂安民生以冀上

副我兩宮

皇太后諄諄訓誡至意○又諭上年自冬至後朕恭遇

壇

廟大祀敬謹親詣行禮而

奉先殿未經特祭恭查咸豐二年

皇考文宗顯皇帝親詣

奉先殿致祭行禮朕親政後自當敬法

前謨用申誠悃謹於三月初一日恭詣

奉先殿前殿讀祝致祭所有應行典禮著各該

衙門照例敬謹豫備○丁未諭軍機大臣等

豐紳謙禧奏滿營需餉請飭山西撥款一摺

請飭戶部議由福建劃解甯夏滿營兵餉十

萬兩當諭令文煜等如數解往茲據豐紳等

奏現在滿營官兵月餉並修理軍械添買馬

匹需款甚殷閩省相距遙遠若俟該省餉到

誠恐緩不濟急請飭山西先行籌撥等語山

西每年向有應撥甯夏滿營兵餉十萬兩即

著鮑源深飭令藩司於此項應撥該營兵餉內無論何款先行籌撥銀五萬兩交該署將軍等所派委員管解回營以應急需其福建應撥甯夏餉項卽著鮑源深咨催到晉以歸此次劃撥之款其餘欠撥積年餉銀並著源深籌解俾資接濟將此由四百里諭令知之○又諭定安奏籌派官兵赴烏魯木齊助勦一摺定安派撥大同步隊官兵一千名前往烏魯木齊聽候景廉調遣前據該將軍奏明

由河南陝西兩省共撥銀八萬五千兩以備起程茲據奏稱河南僅解到銀一萬兩陝西仍未報解請旨飭催等語景廉軍營需兵甚殷此項隊伍專候餉銀解到方能進發著錢鼎銘將欠解餉銀三萬五千兩即行豫將應解餉銀四萬兩迅速如數籌撥解赴綏遠以應要需毋再遲誤將此由四百里各諭令知之○戊申諭內閣醇親王等奏請將神機營練兵仍撥歸原旗營操演以復舊制一摺神

機營馬步各隊訓練有年頗著成效若卽撥歸原旗營操演恐統率不一日久難免廢弛仍著該營王大臣督率操練毋隳前功該王大臣等務當隨時實力訓練歷久不懈以資得力每年春秋二季著派閱兵大臣會同神機營王大臣公同校閱應如何認真閱看之處著神機營王大臣詳定章程咨行閱兵大臣查照辦理另片奏京師旗綠各營兵丁請仍歸各該管大臣督率教練等語仍著醇親

王隨時稽查勤加校閱俾成勁旅○己酉孝儀純皇后忌辰遣官祭裕陵○諭軍機大臣等戶部奏部庫空虛應行存儲款項請照初議另款封存一摺四成洋稅銀兩前經總理各國事務衙門奏明解交部庫另款存儲近因各衙門奏支之款絡繹不絕正項不敷隨時那借殊與初議不符著該部遵照奏准原案全數封存以後各海關報解四成洋稅隨到隨封連前所存一概不

准擅動如庫存正項一時不敷周轉惟八旗兵餉及神機營經費暨隨時緊要軍需准由該部奏明暫借四成洋稅開放仍俟正項充裕照數撥還其餘一切放款概不准奏借此項致啟那移之漸另片奏內府外庫定制攸分各宜量入為出不可牽混又片奏內府經費仍照舊添撥各等語內務府供應內廷一切用項本有粵海關天津長蘆應解各款及莊園頭租銀加以戶部每年添撥經費量入為出何至用款不敷著總管內務府大臣於一切應用之需覈實撙節並嚴飭各該司員認真辦理毋得任意開銷致涉浮冒其各省關例解款項如逾限不到或仍前拖欠卽由該大臣等奏明將該督撫監督運使等嚴予處分以儆玩泄至由部奏撥之六十萬兩現經戶部奏明仍按年籌撥是內府用款不至過絀嗣後不得再向戶部借撥以符定制將此各諭令知之

大清穆宗繼天開運受中居正保大定功聖智誠孝信敏恭寬毅皇帝實錄卷之三百四十八

大清穆宗繼天開運受中居正保大定功聖智
誠孝信敏恭寬毅皇帝實錄卷之三百四十九

臣等謹將本年內各款開列於左
一、本年內奉 上諭旨：著戶部將各省每年收支釐金數目認真稽覈以杜弊端現當言路廣開之際凡屬臣工均當竭誠獻納嗣後有言責諸臣務於政治之得失民生之疾苦剴切敷陳用資採擇

同治十二年癸酉二月庚戌朔

上詣鍾粹宮問

慈安端裕皇太后安。長春宮問

慈禧端佑皇太后安。至丙辰皆如之。○諭內閣

御史吳鴻恩奏敬陳管見一摺所稱修身親賢量才恤民知言責實各條不無可採朕躬親庶政夙夜兢兢不敢稍萌暇逸尤賴在廷王大臣及各省督撫等共相贊助庶幾集思廣益民物乂安至為政之要首重得人前經諭令各直省督撫各舉所知仍著悉心訪察

如有賢能出眾之員即行隨時保奏用備任使軍興以來餉需支絀抽收釐金原屬朝廷萬不得已之舉據奏辦理釐局官紳往往假公濟私任意侵漁殊堪痛恨著各直省督撫嚴加查察儻有前項情弊即行嚴參懲辦並著戶部將各直省每年收支釐金數目認真稽覈以杜弊端現當言路廣開之際凡屬臣工均當竭誠獻納嗣後有言責諸臣務於政治之得失民生之疾苦剴切敷陳用資採擇

內而部院諸臣外而封疆大吏責任至重尤當隨時嚴飭屬僚矢慎矢勤實事求是不得粉飾因循致負諄諄誥誡至意○諭軍機大臣等前因喬松年奏籌辦黃運兩河情形文彬丁寶楨奏請仍挽復淮徐故道並御史游百川奏河運並治宜詳籌妥辦等情當經降旨交軍機大臣會同六部九卿妥議具奏茲據遵議會奏請派大員前往山東查勘各等語黃河自銅瓦廂決口改道北行後汎濫山

東境內久為漕運民生之害。現在淮徐故道。既難規復。豈可聽其自然。不為修治。喬松年前奏堵合霍橋決口。築隄束水。使由張秋八里廟一口下注入海。旁流分注。藉以濟運。所擬辦法。究竟是否可行。有無窒礙。必須籌畫萬全。方可興辦。此事關係重大。固不可日久因循。亦未便輕率從事。李鴻章曾在山東勸辦捻匪。於黃運兩河情形。閱歷既久。自必熟悉。著該督將喬松年等所奏。悉心體察。從長

計議。應如何妥籌辦法。期於漕運民生兩有裨益。及辦理有無把握之處。據實詳細具奏。原摺片著鈔給閱看。將此諭令知之。○辛亥。諭內閣御史吳鳳藻奏。敬抒管見一摺。所陳各條。尚有堪備採擇之處。守令為親民之官。必久於其任。始能將地方利弊從容講求。次第興革。據奏近日吏治積習最壞者。莫如調劑以致守令等官。視職守如傳舍。急囊橐以營私。似此情形。何以副朝廷察吏安民之意。

嗣後各直省督撫於所屬各員。務當慎選賢能。以期吏治蒸蒸日上。如有循聲卓著之員。務令久於其任。俾得盡心民事。毋得率行更調。貽誤地方。科道職司揀納。必須品端守潔之員。方能勝任。嗣後各部院衙門保送滿漢御史。務須慎加選擇。不得但計資俸。循例保送。以重諫職。○又諭內閣學士馬恩溥奏。請將殉難紳民飭部議卹等語。雲南舉人段登雲生員馬光藻楊映桂。耆民蘇愉。均因逆匪

脅授偽職。先後自盡。實屬深明大義。馬光藻係回民。不肯從逆。尤堪嘉尚。段登雲馬光藻楊映桂蘇愉。均著交部分別議卹。並准於大理原籍入祠建坊。以彰忠義。該省自逆匪擾亂以來。所有回漢殉難紳民。均屬可憫。著該督撫設局採訪。一體奏請旌卹。毋任湮沒。至逆匪杜汶秀叛亂有年。該處回漢居民。有被其迫脅陷入賊中者。均所不免。念其身處顛危。不能自拔。非甘心從匪者比。現在首逆既

經就戮。悍黨亦已殲除。此外順甯騰越雲州等處賊眾。自必聞風膽落。大兵所至。除實係始終助逆者悉予駢誅外。其餘被脅之人。情有可原者。著量加寬宥。予以自新。並著該督撫剴切曉諭漢回人等。不得扶仇訐告。用示覆幘生成。咸與維新至意。○諭軍機大臣等。內閣學士馬恩溥奏滇省漸就肅清。請飭撫臣暫駐大理一摺。據稱大理攻克。逆首就擒。恐事平之後。蔓引株連。不分良莠。率行誅戮。

請飭撫臣暫駐該郡數月。撫輯居民等語。前因順甯雲州等處尚未收復。諭令岑毓英督同楊玉科將圍埂賊巢迅速攻拔。惟大理善後事宜亦關緊要。該撫應否暫在大理駐紮數月。撫輯居民。一面分軍進攻各路逆巢之處。著岑毓英體察情形。妥籌辦理。將此由五百里諭令知之。○壬子。遣官祭

文昌帝君廟。○癸丑。諭軍機大臣等。榮全奏俄情叵測。餉絀兵單。豫籌辦法一摺。榮全接

到俄官來咨。不令管理伊犁人民。並攤派伊犁官員銀兩。不遵卽治其罪。且傳聞有東進之說。窺伺瑪納斯等處。包藏禍心。大局何堪設想。榮全豫籌防範。以調兵必先集團餉項支絀。各省報解寥寥。自係實在情形。所請將山西等省月協餉銀三萬五千兩。由戶部先撥現款。批交神機營。與前請每月一萬三千兩之項。源源解濟。再令各該省將應協之餉解還部庫等語。著戶部覈議具奏。俄情叵測。

該署將軍務當臨機應變。妥籌挽回補救之方。一面將調兵集團及進兵道路並運解軍火各事宜。先行妥為布置。以圖進取。俟戶部議定後。如何籌濟餉需。卽行諭知該署將軍遵照辦理。另摺奏。因病懇請開缺。又片奏。病如增劇。擬先赴京就醫。各等語。榮全宣力邊疆。歷有年所。且數年來備嘗艱苦。茲因積勞病發。懇請開缺。廕念殊深。惟現在新疆各城未復。伊犁之事。辦理甚形棘手。非熟悉該處

情形者。斷難勝任。榮全當力疾從公。以副委任。未可遽萌退志。著加恩賞假一箇月。在營調理。無庸開缺。刻下事關緊要。接替乏人。不得率行起程回京。致誤事機。將此由五百里諭令知之。○引見各衙門京察保送一等人員。得旨。此次京察一等圈出人員。著各該堂官再行出具切實考語。交吏部帶領引見。圈出之滿洲蒙古中書筆帖式等官。著歸入理事同知通判內。遇有缺出。與舊記名人員。一

體帶領引見。漢軍漢人著交部以撫民同知通判等官分別選用。起居注主事依凌阿。大理寺左寺丞鄭德基。太常寺寺丞兼讀祝官哈明阿。光祿寺署正富英。魏錫經。欽天監夏官正杜春芳。冬官正陳希齡。順天府治中蕭履中。唐古特學助教奎鳳。上諭處委署主事榮昌。寶泉局中廠大使璧良。翰林院待詔伊綿泰。通政司知事廷熙。太常寺贊禮郎慶聯。花沙布。伊仁布。普普。博士倉植。國子監助教

成霖。侍衛處委署主事長安。鑾儀衛鳴贊。鞭官覺羅廣福。俱著交部照例以應升之缺升用。所有內閣侍讀恩霖等二百七十六員。俱著准其一等加一級。○甲寅。遣官祭

先醫之神。○乙卯。諭軍機大臣等。成祿奏。特參規避出關倡眾私逃之副將。請旨就地正法。一摺。據稱副將王節文投效軍營。願隨出關。旋託詞潛逃。訪得該副將在甘州達達營署甘涼道蕭宗幹派令管帶馬隊。將營官胡

可均派往弁勇勒留不放。並接王仁和函稱。王節文前在伊營。種種不法。其人決不可留。等語。著左宗棠將王節文被參各節嚴密確查。如實有倡眾私逃情事。即著飭令蕭宗幹將王節文就地正法。以肅軍律。原摺着鈔給閱看。將此由五百里諭令知之。尋奏遵查。王節文雖無倡逃實據。惟強橫躁妄。種種不法。應俟訊明。照軍法懲辦。報聞。○又諭。恩麟等奏達賴喇嘛下山味經。並改期掌管任事。一

摺現在藏地清平。達賴喇嘛擬於本年二月間下山率領眾僧親赴大招攢招唎經為國祈福具見出於至誠。洵堪嘉尚。即著恩麟等前往布達拉山妥為照料。並發去黃哈達一箇。銀曼達一箇。鈴杵一分。菩提念珠一串。玉盃一箇。玉碟一箇。小卷五絲緞二卷。傳諭該達賴喇嘛令其祇領。用昭恩賚。將此各諭令知之。

上以祭

社稷壇自是日始齋戒三日。○丙辰。

孝淑睿皇后忌辰遣官祭

昌陵。○諭內閣本年輪應查閱福建浙江廣東廣西四省營伍之期。福建著即派李鶴年。浙江即派楊昌濬。廣東即派瑞麟。廣西即派劉長佑。逐一查閱認真簡校。如有訓練不精軍實不齊者。即將廢弛之將弁據實奏。毋得視為具文。○引見內務府三院等處京察保送一等人員得旨。此次內務府三院等處京

察一等圈出人員著各該堂官再行出具切實考語帶領引見。圈出之堂主事俊啓。茶膳房主事愛崇阿。造辦處六品庫掌恩福堂筆帖式文興慶陞世奎。文康。增濬。文德舒忠。莊健嵩山。那蘇圖稽察內務府事務監察御史衙門筆帖式定安。都虞司筆帖式桂蔭會計司筆帖式連福。掌儀司筆帖式文連慶豐司筆帖式福善。營造司筆帖式德祿。桂泉。廷輔。管理內管領事務處筆帖式桂亨。茶膳房筆帖式伊精阿。甯壽宮筆帖式廣來。上駟院主事端璞。委署主事王麟。武備院主事伊昌阿。六品庫掌世綱。六品虛銜委署庫掌廣明。筆帖式長泰。八品催總德恆。七品銜無品級庫掌福祥。奉宸苑六品庫掌福英。筆帖式文億。圓明園委署主事福惠。六品苑丞承崇。福筆帖式誠培。清漪園六品苑丞承善。誠英俱著交吏部記名照例選用。所有一等官員筆帖式達他等員俱著准其一等加一級。至年已逾

歲之慎刑司員外郎景佑上駟院員外郎克峻圓明園七品苑副金保清漪園七品苑丞文斌年力就衰均著以原品休致○引見京察年至六十五歲以上人員得旨宗人府筆帖式泉敬理藩院郎中海通禮科筆帖式聖保光祿寺署丞伊勒通阿均著以原品休致餘著照舊供職○丁巳以崇上

慈安端裕皇太后

慈禧端佑皇太后徽號前期遣官告祭

天

地

太廟

社稷

上禮服御中和殿恭閱奏書畢

上升輿由右翼門至永康左門降輿大學士捧

奏書由中路前行至

慈寧門

上由東階升至門下東旁立

慈安端裕皇太后

慈禧端佑皇太后御慈寧宮升座儀駕全設中和樂作

上詣正中拜位跪大學士捧奏書在左旁跪進上受奏書恭獻授右旁大學士跪接置正中黃案上宣讀官捧起跪宣

慈安端裕皇太后奏書曰

宏恩廣被百年啟昌熾之符

至德難名六合切尊親之戴冀仰酬夫

高厚用抒頌以顯揚欽惟

母后慈安端裕皇太后

功贊乾元

道侔坤德

從躬而福增綏履集燕喜於家邦

訓政而化洽垂裳普鴻庥於中外臣祇遵

懿命親理萬幾敬晉

徽稱光昭四表伏冀

聖慈俞允俾展微忱書星輝雲爛之祥歡騰宇

宙上日升月恆之頌

瑞靄宮庭臣不勝惓惓之至謹奏跪宣

慈禧端佑皇太后奏書曰

鴻慈垂訓衍景祚以凝庥

燕翼詒謀啟昌期而裕後禮既隆夫

尊養典尤重於顯揚欽惟

聖母慈禧端佑皇太后

性協安貞

德符厚載

訓藐躬而敷政十一年時切欽承

熙庶績以延釐億兆姓同登仁壽臣祇遵

懿命幾務親裁敬考彝章

崇稱肅上伏冀

聖慈俞允俾展微忱偕萬國以臚歡道歸有極

合九州而晉頌

福介無疆臣不勝惓惓之至謹奏

上率王大臣官員行禮禮成

慈安端裕皇太后

慈禧端佑皇太后還宮

上詣鍾粹宮問

慈安端裕皇太后安長春宮問

慈禧端佑皇太后安○祭

先師孔子遣大學士單懋謙行禮○戊午祭

大社

大稷

上親詣行禮○恭上

慈安端裕皇太后

慈禧端佑皇太后徽號

冊

寶

上禮服御太和殿恭閱

冊

寶畢奉安於綵亭前行

上升輿隨後由右翼門至永康左門

上降輿行至

慈寧門外東旁立

冊

寶陳設於正中黃案。

慈安端裕皇太后

慈禧端佑皇太后御慈寧宮。升座。儀駕全設。中

和樂作。

上詣正中拜位跪。左旁大學士捧

冊

寶依次跪進。

上受恭獻。授右旁大學士跪接。置正中黃案上。

宣讀官捧起。跪宣

慈安端裕皇太后冊文曰。

慈暉遠播。萬方蒙樂利之庥。

鴻號加崇。四海極尊親之戴。歡騰宮掖。頌溢寰

區。欽惟

母后慈安端裕皇太后

德協坤貞。

道符箕順。

提躬恭儉。儀型式著於家邦。

逮下寬仁。惠澤覃敷於中外。

璇闈起化。佐

皇考而治切吁宵。

黼座綏猷。

訓藐躬而時廑惕厲。昨以中宮正位。己虔晉夫

崇稱。今茲庶政親裁。益光昭夫

至德雖

聖不自聖。彌形

謙抑之懷。而名莫能名。倍切顯揚之願。祇遵

成憲。懋舉隆儀。謹告

天

地

宗廟。

社稷。率諸王貝勒文武羣臣恭奉

冊

寶。加上

徽號曰

慈安端裕康慶皇太后。伏願

洪庥存至

純嘏彌增歌星輝雲爛以呈祥永綿

景祚仰

日升月恆之並曜共荷

仁帡臣稽首頓首謹言跪宣

慈禧端佑皇太后冊文曰

慈恩式訓燕詒彰啟迪之隆

懿範垂庥鴻號懋顯揚之典歡臚朝野喜溢宮

庭欽惟

聖母慈禧端佑皇太后

地道同符

坤元合撰

著溫恭之令則內治克勤

秉愷悌之淵衷仁聲允洽

念藐躬丕基寅紹

恩勤訓誨之頻勞

體

先皇大統留貽

兢業祇承之時切曩者禮成椒掖總百祿以承

歡今茲

訓稟宣幃俾萬幾之親理在

聖懷沖抑莫窺

至德之高深而薄海瞻依共仰

徽音之懋著肅遵經禮虔展悃忱謹告

天

地

宗廟

社稷率諸王貝勒文武羣臣恭奉

冊

寶加上

徽號曰

慈禧端佑康頤皇太后伏願

蕃釐茂集

嘉貺駢臻延億萬年昌熾之祥永綏

福履合千百國尊親之戴同荷

生成臣稽首頓首謹言

上率王大臣官員行禮。禮成。

慈安端裕康慶皇太后

慈禧端佑康頤皇太后還宮。○

上詣鍾粹宮

慈安端裕康慶皇太后前行禮。長春宮

慈禧端佑康頤皇太后前行禮。○奉

慈安端裕康慶皇太后

慈禧端佑康頤皇太后幸漱芳齋。侍午膳。○諭

內閣。前因御史袁方城奏。參前甘肅西甯道

舒之翰。阻撓戰事。受賊重賂。遊擊蕭兆元。暗

中通賊等情。當諭令左宗棠查奏。茲據奏稱

舒之翰。被參受賄重賂。為賊道地。訪查均無

實據。惟該員在首府任內。索取各屬規禮。前

署靖遠縣知縣金麟。因案被訴。曾送給舒之

翰銀兩。作為贄敬。其被參在首府任內作毒

一節。亦屬確實。至得受餽遺多少。無從稽覈

等語。前甘肅西甯道舒之翰。身任監司。輒有

索取規禮等事。實屬行為卑鄙。有玷官箴。舒

之翰。著即行革職。驅逐回籍。永不敘用。並著

穆圖善。飭令該革員迅速回籍。不准藉詞留

營。以儆官邪。至遊擊蕭兆元。被參通賊一節。

既據該督奏稱。查無其事。即著無庸置議。○

諭軍機大臣等。左宗棠。豫師奏。官軍攻拔大

通逆巢。左宗棠奏。肅州官軍攻破城西賊堡。

各摺片。大通逆目馬進祿等。鼓惑叛弁馬壽。

詭謀煽變。經劉錦棠督軍進剿。攻破向陽堡。

逆巢。並將著名逆酋。悉數擒斬。剿辦尚屬得

手。叛員馬本源等。久踞巴燕戎格。徧詣各軍。

求撫。仍持兩端。暗行勾結。必須迅速剿辦。左

宗棠已派陳湜等軍。由河州前進。著即飭令

實力攻剿。並嚴扼米拉溝等處。竄路。以期一

鼓殲除。大通一帶回匪。仍著飭令劉錦棠等

乘勝進兵。剿撫兼施。速籌戡定。平番碾伯一

帶防剿事宜。著豫師督飭所部。與左宗棠派

出各營聯絡策應。毋稍鬆懈。肅州城西賊堡。

經官軍用地雷轟破。城內賊勢已蹙。惟回情

狡詐未可輕聽乞撫之詞致墮詭計現在陶
生林等軍計已抵肅兵力較厚著左宗棠飭
令徐占彪激勵將士奮力圍剿迅拔堅城毋
任日久盤踞將此由五百里各諭令知之○
賞恭請

冊

寶龍亭執役校尉銀○以甘肅攻克大通逆巢
賞回目馬占鼐等項翎○予甘肅肅州陣亡
提督朱南英等五十六員祭葬世職○己未

上詣鍾粹宮問

慈安端裕康慶皇太后安長春宮問

慈禧端佑康頤皇太后安至戊寅皆如之○恭

上

慈安端裕康慶皇太后

慈禧端佑康頤皇太后徽號禮成頒詔天下詔

曰朕惟化起宮庭盛治莫先於教孝禮經邦
國上儀首重夫尊親矧以任姒之徽音克紹
唐虞之隆軌普八紘而徧德聞澤覃敷合兆

姓以同瞻彝章式洽欽惟

慈安端裕皇太后

萱幃篤祐

蘭殿凝庥

垂教育之深仁

著溫恭之令範

慈禧端佑皇太后

度昭金玉

德協珩璜

肅雖表壺掖之型

樂利溥震區之福

疇咨庶政殫十一年宵旰之勤

底定中原啟億萬世靈長之祚茲者仰承

翼命親攬乾綱秉

懿訓以綏猷遵

成謨而圖治用集僉同之議敬申歸美之誠爰

晉

崇稱丕揚

大烈謹告

天

地

宗廟

社稷。於同治十二年二月初九日。率諸王貝勒

文武羣臣。恭奉

冊

寶。加上

慈安端裕皇太后徽號曰

慈安端裕康慶皇太后。

慈禧端佑康頤皇太后徽號曰

慈禧端佑康頤皇太后。璆冊翔華。益煥星雲之

瑞。金甌鞏固。咸霑雨露之施。茂典聿光。湛恩

宜沛。所有事宜。開列於後。一。在內親王之福

晉以下。公之妻以上。著加恩賜。一。外藩蒙古

諸王之福。晉以下。公之妻以上。著加恩賜。一。

民公侯伯以下。二品大臣以上。令婦。著加恩

賜。一。從前尚過公主格格之額駙等。照伊等

品級著加恩賜。一。從前恩詔後升職加銜補

官者。悉照現在職銜。給與封典。一。貢生監生

在監肄業者。免生監一月。一。天下之本。農為

重。各州府縣衛。果有勤於耕種。務本力作者。

著地方官不時嘉獎。以示鼓勵。一。歷年軍興。

驛站甚屬勞苦。著各省督撫加意撫恤。一。吉

林黑龍江官兵及各省旗綠官兵之出征調

防在他省者。著該督撫將軍查明各該官兵

家屬。賞給一月錢糧。一。罰贖積穀。原以備賑。

冬月嚴寒。鰥寡孤獨貧民無以為生。著各直

省督撫飭令有司。務將積穀酌量賑濟。毋任

奸民假冒支領。一。太監等賞給一月錢糧。一。

上三旗辛者庫當差婦人。酌議賞賜。於戲廣

聖慈而錫類。願熙

鴻號於無疆。合臣庶以臚歡。垂示

燕詒於有永。布告天下。咸使聞知。

上御太和殿。王以下文武大臣官員行慶賀禮。

○奉

慈安端裕康慶皇太后

慈禧端佑康頤皇太后幸漱芳齋侍午膳○遣

官祭昭忠祠○庚申

孝康章皇后忌辰遣官祭

孝陵○諭軍機大臣等常順等奏督隊進紮以扼賊衝並豫籌軍儲景廉奏請採買戰馬耕牛各摺片烏城防勒緊要現在肅州軍務正在得手誠恐賊匪竄出紛擾該城防堵未可稍疏常順等擬飛催福珠哩馬隊並宣化等

練軍到城分起扼紮惟福珠哩一軍前經諭令杜嘎爾飭令馳赴榮全軍營該城不得截留宣化等練軍亦據李鴻章奏稱該處存兵無多未能抽調諭令該署將軍等咨商張廷岳等於庫防練軍內酌量抽撥就近赴烏常順多布沁扎木楚志剛務當就現有兵力扼紮嚴防勤加偵探儻賊勢緊急常順等當親往督勦毋稍疏虞該城需用火器甚急著神機營調撥洋馬槍五百桿隨帶洋火藥鉛箭

銅帽酌帶什物以及擦槍器具排槍二百桿隨帶鉛丸二萬出配帶什物彈模等項即行解赴察哈爾都統衙門並著定安調撥子母礮四十位隨帶馬架擡槍一百桿隨帶鉛丸一萬出配帶什物彈模等項統由常順等即派官兵分往迎提以資防勦景廉勒辦賊匪馬匹缺乏並奇古屯田牛隻短少採買維艱著常順多布沁扎木楚志剛托倫布保英各飭所屬會同景廉委員在蒙古部落採買戰馬一千匹耕牛一千頭解送到營俾資應用所需價值先由該城墊發俟景廉軍餉到烏扣還常順等另摺奏遵查烏科兩城具報賊數互異情形據實覆奏等語軍營偵探最關緊要常順等前奏賊匪數目係據該部落探報倉卒馳陳未免確查嗣後惟當確切偵探妥籌防勦毋得稍涉張惶致滋貽誤將此由五百里各諭令知之○又諭景廉奏古牧地回情反覆請飭李天和等隊迅速赴營一摺

古牧地回目馬明與烏魯木齊瑪納斯逆回
句結圖撲古城新渠經孔才等將濟木薩古
城貿易回民勦洗絕其內應並在滋泥泉地
方與賊接仗獲勝據孔才等所稟情形是該
回等詭譎性成中懷叵測投誠之說萬不可
恃。第四回眾經此懲創馬明得信難保不報復
尋仇投順安集延回伺隙滋擾。景廉務當檄
飭各營嚴密偵探妥為防範以備不虞。孔才
等有無啟釁別情著查明據實具奏。現在春

氣漸融。景廉當激勵將士拔營西進以壯前
敵聲威。迅圖進取。毋得遲誤。機宜成祿所部
前已諭令金順接統。刻下景廉軍營需兵甚
亟。著金順懍遵前旨。剋期出關。接統成祿所
部一面迅飭李天和率所部三營馳赴景廉
軍營聽候調遣。毋稍遲延。景廉所調之吉林
黑龍江馬隊計應早抵成祿軍營。並著金順
一併檄令星速前進。毋稍濡滯。將此由六百
里各密諭知之。尋景廉奏孔才等實因古牧

地回酋有暗撲濟古消息。該處貿易又有回
逆瀝跡。恐變生肘腋。是以概行勦洗。並無啟
釁別情。報聞。○辛酉諭軍機大臣等。金順奏
前隊進紮肅州設法催運軍糧一摺。金順所
派前隊總兵俞厚安等軍現已馳抵肅州。該
前將軍擬將甘肅高臺各處糧運辦理稍有
端倪。即由高臺滾營前進。規取肅州。日內計
早抵肅。惟前因成祿情罪重大。諭令該前將
軍酌帶所部兼程出關。接統其軍。傳旨將該

提督革職。拏問解京。又因景廉需兵孔亟。復
諭令該前將軍於接統成祿所部後。即飭李
天和三營馳赴景廉軍營。聽候調遣。關外事
機緊要。金順當懍遵正月二十一日本月十
一日兩次密諭。酌帶勁兵。剋日出關。將諭辦
各事妥速籌辦。以慰廑懷。肅州賊鋒屢挫。機
有可乘。該前將軍所部各隊應否酌留若干
助勦。抑須全行調赴前敵之處。著金順斟酌
軍情妥籌辦理。該軍所需糧石。即照所議。隨

時與左宗棠和衷商辦。俾利師行。將此由六百里密諭知之。○又諭金順奏請飭四川就近協濟餉項。並請飭陝西加撥軍餉各等語。金順一軍西行。勦賊正當喫緊。需餉甚殷。自上年八月以來。僅西安解到協餉一萬八千兩。山西河東應撥協餉。尚未報解。前由山西奏請粵東改撥協餉十萬兩。道途遙遠。遲解需時。該前將軍所請飭四川就近接濟之處。自係為軍需緊急起見。著吳棠督飭藩司。自本年正月起。按月協濟金順軍餉一萬兩。由該前將軍派員領解。瑞麟、張兆棟仍應趕緊籌款解還川省。以清款目。河東應撥協餉。著鮑源深迅速設法籌解。不得以鹽課減收藉詞。至陝西月協金順餉銀九千二百兩。據稱按月撥解。未有貽誤。惟該軍進勦方殷。餉項奇絀。並著邵亨豫每月加撥協餉銀五千八百兩。俾資飽騰。毋稍延宕。將此由五百里各諭令知之。○復引見京察一等園出人員。得

旨除額圖璉、劉恩濬王之翰、孫詒經、畢保釐、尹蕭、怡梅、啟熙、張清華、嵩溥、春岫、黃大鶴、承勛、王守基、管貽萼、王兆蘭、文海、松林、李桂林、英敏、余上華、奎光、薛允升、董學履、余撰、教冊、賢、王珩、阿克達、春慶、錫綸、林鳳、官清、瑞英、謙、佛爾恭額、玉英、王道源、畢應辰、王榮、琯、毓璋、毋庸記名外。宗室鍾泰、奕年均著以五品京堂用。李衛亨、啟莊、文治、董潤、本係專用道員。均著交軍機處記名。仍專以道員用。恩霽、丁士彬、徐郁、徐致祥、趙曾、向董兆奎、曹秉濬、王緒、曾孫鳳翔、增林、惠齡、何樞、瑞斌、廷彥、耆彬、塔明阿、王福保、廣蔭、曾椿、壽錫、恩多齡、錫光、國鈞、吳潮、斌鑑、莊錫級、裕昆、文沛、額勒經額、禧麟、崇繕、續昌、福寬、春慶、奇臣、余培、軒、文增、均著交軍機處記名。以道府用。恆裕著記名。以開差道府用。○以理藩院右侍郎成林兼鑲白旗蒙古副都統。○壬戌諭內閣。兵部奏。書吏舞弊潛逃。請旨飭拏懲辦一摺。正紅旗

漢軍聞散黃等因本旗不肯將伊子姪送考赴兵部具呈。經該部咨行盛京將軍查明該聞散是否應行考試。旋據該將軍咨稱原文內將是否二字貼補改寫實准字樣。其為書吏舞弊情節顯然。該吏等俱已聞風藏匿。難保無賄屬通謀情事。所有書吏高文斌董春江著步軍統領衙門順天府五城一體嚴拏務獲交刑部訊究懲辦。兵部承辦司員於書吏行文補改字句毫無覺察。非尋常疏忽可比。著查取職名先行交部議處。○諭軍機大臣等恩錫奏續獲會匪訊明正法等語。哥老會匪劉東伯陳錦汶於匪首王占汶等拏獲後聞風逃逸。現經恩錫派員於江陰地方將劉東伯拏獲正法。惟逆匪陳錦汶尚未弋獲。難保不潛逃回籍。亟應迅速躡拏以絕根株。著王文韶飭令該省文武員弁一體嚴密訪拏毋任漏網。將此諭令知之。○復引見內務府三院等處京察一等圈出人員得旨除海

金恆延毋庸記名外。祥泰福長錫奎明勳文銑英奎文治定昌舒麟毓秀廷琦俱著交軍機處記名。○以詹事府少詹事蘇勒布為大理寺卿。○追予江蘇各屬陣亡殉難同知朱寶等紳民婦女一千八百四十六員名口分別旌卹如例。○癸亥諭內閣醇親王奏戕害僧格林沁之捻逆就擒請派員赴該親王墳園賜祭一摺。前據丁寶楨奏擒匪張凌雲係戕害僧格林沁之犯漏網潛逃。於上年八月

比著查取職名先行交部議處。○諭軍機大臣等恩錫奏續獲會匪訊明正法等語。哥老會匪劉東伯陳錦汶於匪首王占汶等拏獲後聞風逃逸。現經恩錫派員於江陰地方將劉東伯拏獲正法。惟逆匪陳錦汶尚未弋獲。難保不潛逃回籍。亟應迅速躡拏以絕根株。著王文韶飭令該省文武員弁一體嚴密訪拏毋任漏網。將此諭令知之。○復引見內務府三院等處京察一等圈出人員得旨除海

聞訪拿獲案訊明正法並將該犯摘心於山東省城僧格林沁專祠致祭等語。張凌雲一犯罪不容誅既經丁寶楨訊明正法並於僧格林沁專祠摘心致祭足以紓義憤而慰忠魂醇親王所奏著毋庸議。○又諭稽察左翼宗學大理寺卿王榕吉奏兩翼宗學宜亟加整頓一摺。國家設立宗學法良意美據稱近來該學日形懈弛肄業各生月給米石自改支折色以來愈形苦累以致教習各員並不

與該生等時常晤面。殊屬不成事體。應如何認真整頓之處。著管理左右翼宗學之王公妥議章程具奏。○諭軍機大臣等。據御史邊寶泉呈遞匿名書信一件。其封面開明本年正月十三日杭城崇信堂許封。由杭城呂廣泰京信局遞寄。該局住竹椅子巷內。著楊昌濬嚴密訪查。杭州城內是否有崇信堂許姓。該信局是否知其來歷。正月十三日是否有許姓寄御史邊寶泉之信。查明後即行據實

覆奏。毋稍含混。將此諭令知之。○以察哈爾官軍勦辦甘肅竄匪出力。予委營總達密蘭等升敘有差。○甲子祭

文昌帝君廟

上親詣行禮。○乙丑祭

關帝廟

上親詣行禮。○奉

慈安端裕康慶皇太后

慈禧端佑康頤皇太后幸漱芳齋侍午膳。○諭

軍機大臣等。都興阿奏股匪突出滋擾。派隊勦辦情形一摺。奉天牛莊屬界黃沙坨高麗房身龔家地雙岔子等處。突有馬賊分竄滋擾。旋即合股百人。麇聚虎樟屯地方。經該將軍派令總兵張得祿營總訥欽馳赴牛莊會同防守。尉果勒明阿帶隊按剿。追至鷹城子缸瓦嶺等處。擒斬甚多。餘賊渡河逃逸。淹斃無算。此股馬賊。嘯聚省南山溪之間。久逃顯戮。現在出擾牛莊屬境。雖經斬截多名。誠恐

餘黨未盡殲除。復圖狡逞。都興阿惟當嚴飭派出各員弁等實力按緝。務將南路伏莽一律芟除。毋留餘孽。至西路地方。並飭撤回隊伍認真防範。毋得稍有疏虞。將此諭令知之。○丙寅以京營左翼總兵榮祿暫護步軍統領。○丁卯諭軍機大臣等。有人奏游勇滋擾地方。亟宜整頓一摺。據稱本年正月湖北差弁行至直隸保定府屬望都滿城一帶。突遇騎馬賊匪。搶去衣服銀物。並傷事主。容城等

縣路刦重案層見疊出。傳聞半係游勇涸跡。肆行刦掠等語。近來各營散勇往往流為盜匪。沿途搶刦實為閭閻之害。尤慮日久滋蔓。釀成巨患。亟宜認真拏辦。著李鴻章派委妥員會同地方文武嚴密巡察。實力查拏。嚴行懲辦。以安行旅而靖地方。將此諭令知之。○改山東文登協中軍都司為陸路文登營都司。專隸登州鎮總兵官統轄。從巡撫丁寶楨請也。○戊辰遣官祭黑龍潭。

昭靈沛澤龍王之神。玉泉山。

惠濟慈佑靈渡龍王之神。昆明湖。

安佑普濟沛澤廣生龍王之神。密雲縣白龍潭。

昭靈廣濟普澤龍王之神。○遣官祭圓明園。

惠濟祠。

河神廟。○戶部議覆署伊犁將軍榮全請發伊犁餉銀擬將新疆月餉內直隸應解之二千五百兩由部墊給再撥庫存洋稅銀四千

五百兩合之上年奏定部撥月餉一萬三千兩每月共墊發銀二萬兩。即在各省關劃撥歸款。餘仍令山西等省按月分解。榮全軍營應用從之。○舉行同治十一年軍政。四川不謹官一員。罷職官一員。年老官二員。有疾官二員。才力不及官一員。分別處分如例。○已諭內閣。給事中陳鴻翊奏海運南糧請飭驗放大臣先期赴津守驗一摺。近來江浙海運漕糧到津較前迅速。自應及時趕驗。俾資

周轉而免積壓。嗣後驗米大臣著於二月下旬前往天津守候驗收。以重漕務。○以太僕寺少卿彭祖賢署光祿寺卿。○舉行同治十一年軍政。直隸年老有疾官一員。才力不及官一員。分別處分如例。○庚午諭內閣。朕於三月初五日啟鑒後著派惇親王。大學士。軍機處尚書。毛昶熙。崇綸。步軍統領英元。留京辦事。惇親王。軍機處尚書。毛昶熙。崇綸。四人分日輪班在內直宿。不直宿者於申刻散直。英元

每日進內辦事。後無庸直宿。午刻先行散直。
○諭軍機大臣等。劉嶽昭。岑毓英奏攻克蒙
化廳屬大小圍埂。岑毓英奏查明參將梁士
美被仇刺殺。辦理情形。擬派楊玉科進攻順
甯等城。各摺片。蒙化廳屬賊黨業已悉數殲
除。事機順手。自應乘此聲威。迅將未復各城
力圖攻拔。岑毓英前派總兵段梅瑞。蔡標等
分攻順甯雲州二城。兵力尚單。著卽責成提
督楊玉科親帶所部馳往。督同段瑞梅等併

力進攻。肅清邊圉。大理府城一切善後事宜。
著該撫懍遵前旨。酌度辦理。其騰越廳城。卽
飭令李維述速籌規取。毋稍延緩。千總沈朝
輔。向助參將梁士美。跋扈驕恣。旋因爭權懷
怨。主使將梁士美刺殺。並誘殺紳士多人。聚
眾謀為不軌。抗拒官軍。實屬罪不容誅。業經
格殺洵足以中國法而快人心。其下手兇犯
沈有能等。仍著該督撫飭屬嚴拏。毋任漏網。
已革副將和耀曾勒賊出力。前已有旨以總

兵記名簡放。著照所請。准其開復副將原官。
免繳捐復銀兩。並仍照原保獎勵。都司楊九
貴棄營私逃回籍。把持錢糧公事。實屬大干
法紀。楊九貴著卽革職。嚴拏究辦。以肅軍紀。
將此由五百里各諭令知之。○以雲南蒙化
攻克賊巢。賞提督李維述白玉搬指一箇。玉
柄小刀一把。大荷包一對。小荷包兩箇。提督
楊國發黃馬褂。遊擊趙開祥巴圖魯名號。知
州恒璋等花翎。外委沙玉高等藍翎。餘加銜

升敘有差。子陣亡副將岑寬德等二十三員
祭葬。世職加等。○辛未春分朝
日於東郊。遣惠郡王奕詳行禮。○壬申諭內閣。
李瀚章奏審明已革遊擊主使勇丁索餉滋
鬧。請旨辦理一摺。湖南在籍已革遊擊戴長
齡。前在總兵蕭德揚營內幫辦營務。蕭德揚
陣亡後。所有陝省積欠勇餉。業經由官示諭
不得向蕭德揚家屬索討。該革員膽敢起意
糾勇多人。前往兇索。並主使各勇打毀倉屋。

搶去穀石。實屬情同無賴。已革遊擊戴長齡。著從重發往黑龍江。不准援減。○以記名總兵官楊發貴為湖南鎮筵鎮總兵官。○癸酉。派御前侍衛索布多爾扎布。乾清門侍衛明安。禮部左侍郎察杭阿。恭詣

東陵查看紅椿。○甲戌。署烏里雅蘇台將軍常順等奏請調頭等侍衛豐陞阿等十三員赴營差委。允之。○命浩齊特扎薩克郡王吉克登噶衛章在御前行走。○予甘肅各屬陣亡

殉難紳民魯得貴等暨婦女一千七百七十名口分別旌卹如例。○乙亥。

孝昭仁皇后忌辰。遣官祭

景陵。○諭軍機大臣等。金順奏全師抵肅。勦賊獲勝一摺。總兵劉宏發等。於正月十四五等日。會同徐占彪各隊。攻勦肅逆。疊獲勝仗。勦辦尚屬出力。該前將軍督率後隊。於正月十八日齊抵肅州。卽著懷遵臺次密諭。酌帶兵勇星速出關。接統成祿所部。一面傳旨將該

提督革職拏問。不准稍涉遲延。致有洩漏。肅州一城尚稽攻克。該前將軍所部隊伍。應否酌留若干助勦。抑須全行調赴關外之處。並著仍遵前旨。斟酌軍情。妥籌辦理。另片奏革員赴營投效等語。已革協領花里雅春著准其留營差遣。將此由六百里密諭知之。○江蘇巡撫張樹聲奏請於揚州府城建立故兩江總督曾國藩專祠。允之。○予甘肅肅州陣亡守備張茂林。千總謝得勝。柯萬祥祭葬。并世

職加等。○丙子。諭內閣。戶部奏庫存行在印信被竊。請旨辦理一摺。戶部行在堂印。向在印庫存儲。現經該部派出隨扈司員查驗。印箱封鎖脫落。印信遺失無存。該看庫官兵。著卽送交刑部嚴行訊究。看庫官員。著查取職名。先行交部議處。並著步軍統領衙門順天府五城一體嚴密訪拏。賊犯送部究辦。並將印信查獲繳銷。所有失於覺察之該堂司各官。著一併交部議處。尋議尚書載齡董煦侍

郎潘祖蔭桂清溫葆深均照例革職留任從之○以故教漢扎薩克郡王達維多克丹子色登諾爾多克襲爵○丁丑遣官祭賢良祠○追予江蘇各屬陣亡殉難通判祝錫勳等紳民婦女一千九百九十三員名口分別旌卹如例○豁免江蘇山陽清河桃源安東銅山豐沛蕭陽山邵宿遷睢甯海沐陽贛榆阜甯十六州縣暨淮安大河徐州三衛被擾地方節年民欠額賦○戊寅諭軍機大臣等成祿奏後路官軍截剿竄匪並糧餉軍裝久滯情形一摺據稱該提督所留關內馬步各隊分紮肅州金塔高臺等處因軍糧車馬地方官推延不辦未能進發餉銀軍火等項存儲高臺亦未設法運解等語前已密諭金順馳赴關外接統成祿所部傳旨將該提督革職拏問金順接奉前旨計已剋期前進懷遵辦理成祿所部各營自應妥籌整頓所有關內外分紮各營應如何調度布置之處著金順

酌度情形妥為籌畫該軍需用糧石軍火及車馬等項必須該地方官認真經理方免遲滯著左宗棠嚴飭西路各廳州縣趕緊籌辦不得推延遲緩致誤軍行原摺均著鈔給閱看將此由五百里各密諭知之○以故土爾扈特扎薩克貝勒達什車林子丹津襲爵

大清穆宗繼天開運受中居正保大定功聖智誠孝信敏恭寬毅皇帝實錄卷之三百四十九

大清穆宗繼天開運受中居正保大定功聖智
誠孝信敏恭寬毅皇帝實錄卷之三百五十

同治十二年癸酉三月己卯朔

上以親政伊始致祭

奉先殿親詣行禮如時享儀○詣鍾粹宮問

慈安端裕康頤皇太后安長春宮問

慈禧端佑康頤皇太后安至壬午皆如之○奉

慈安端裕康慶皇太后

慈禧端佑康頤皇太后幸漱芳齋侍午膳○諭

軍機大臣等張廷岳阿爾塔什達奏賊匪意

圖竄擾豫籌堵擊一摺賊匪勾結甘州肅州

逆黨由阿拉善王旗竄至諾彥山一帶圖犯

庫倫暨額爾德尼班第達呼圖克圖及額爾
德尼招等處。逼近庫倫西南。張廷岳等已檄
齊默特多爾濟等各帶所部分投防守。並飭
宣古兩營。會同蒙古各營。扼紮庫倫。迤西。聯
絡聲勢。以防賊匪奔竄。所籌尚妥。仍著張廷
岳等隨時偵探盤查。毋任賊匪潛入。如遇匪
蹤。竄近。即著督飭各營。相機前後夾擊。痛加
剿洗。以期一鼓聚殲。諾彥山等處。地方險阻。
易於藏奸。其平原處所。路路可通。並無要隘。

足扼賊蹤。飄忽靡定。各遊牧人路徑紛歧。尤
虞伺隙肆竄。亟應一體防範。以遏妖氛。著定
安常順。多布沁。扎木楚。志剛。杜嘎爾。張曜。實
力嚴防。遇賊即擊。毋任紛竄。將此由五百里
諭知。定安常順。多布沁。扎木楚。志剛。杜嘎爾。
張廷岳。阿達塔什達。並傳諭張曜知之。○庚
辰。派盛京戶部侍郎瑞聯恭勅

永陵 啟運殿等處應修工程○辛巳祭

先蠶之神遣

慧妃行禮○壬午諭軍機大臣等有人奏淮南擬改鹽棧累商滋弊請旨飭停一摺據稱兩淮鹽務前經曾國藩奏定章程因儀徵難以修復改由瓜洲開橫河至七河口設棧上年冬六河口江岸坍塌張樹聲即飭改復儀徵每歲科派銀四十餘萬兩並加剝費錢四十餘萬緡輕議更張商民交困請飭停止改棧查勘瓜洲校場一帶地勢就近移棧以順

輿情等語所奏累商滋弊各節是否屬實究竟鹽棧應設何處方為合宜著李宗義妥為籌度奏明辦理原摺著鈔給閱看將此諭令知之尋奏淮南鹽棧親加履勘仍應改設儀徵以復舊制而利商運至科派加剝各費查無其事報聞○湖北布政使張建基因病解職以前任甘肅布政使林之望為湖北布政使○福建臺灣鎮總兵官林宜華撤任調浙江定海鎮總兵官張其光為福建臺灣鎮總

兵官擢江南京口右營遊擊郭定猷為浙江定海鎮總兵官○旌表守正捐軀河南鄆陵縣民女陳然妮○癸未

上奉

慈安端裕康慶皇太后

慈禧端佑康頤皇太后啟鑒恭謁

東陵○至朝陽門外詣

東嶽廟拈香○詣

慈雲寺拈香○詣

慈安端裕康慶皇太后

慈禧端佑康頤皇太后行宮問安至還宮皆如之○諭軍機大臣等常順多布沁扎木楚奏臺站關繫緊要應籌顧恤並請添備車駝各摺片近來西北各路徵調頻仍各臺站支應要差情形極形疲累必須隨時整頓遇事體恤方不至貽誤事機若如常順等所奏凡出口差使均須察哈爾管站部員發給傳單始得傳駝馬烏拉等項因之通同賄弊於定章

之外。任意多開。該管站員役。遂藉為需索之地。不肖差員。亦得快其挾帶之私。其賽爾烏蘇管站部員。亦以稍有賂遺。遂復依樣轉傳。驛騷擾害。彫敝日形等語。似此積弊相沿。伊于胡底。常順現於烏城。查出哈密領餉委員楊萬清挾帶商貨等弊。業已咨明該城大臣。叅辦其餘虛傳駝隻之案。尚不一而足。若不速籌整飭。何以恤臺站而利遄行。著定安常順多布沁扎木楚志剛。托倫布保英額勒和

布景瑞一體妥為籌辦。嗣後由口或由綏遠城起運餉銀軍械等項。卽由該將軍都統覈明斤數。酌給應用。駝隻飭行管站員役遵照傳支。至各城派員入口採辦一切。亦由該城詳細具文知會綏遠城及察哈爾兩處。覈給駝隻。以免需索擾害。其管站部員。卽著額勒和布等隨時查察。如有前項情弊。卽行從嚴叅辦。出口西行之大小官員弁兵。堂站僅供騎馬。應否添給車駝。以資體恤之處。著額勒

和布等詳查成案。酌覈事宜。妥籌辦理。將此由五百里各諭令知之。○又諭常順等奏統帶官被控。請撤委訊辦等語。已革委參領維魯普棍布羅壘等。呈控統帶達爾濟指壓軍餉不發。僅以羊隻麪斤抵放。並逞威挾恨。責罰兵丁。及去歲追賊時。縱賊竄擾等情。事除達爾濟追賊不力一節。業經查明。事出有因。無庸再行查辦外。其被控剋扣軍餉。威責營兵各情。著常順多布沁扎木楚志剛。確切查

明。一面飭令達爾濟據實呈遞。親供不准稍有掩飾。仍責令統帶三起官兵認真防勦賊匪。儻因有被控情事。帶兵不能出力。卽將達爾濟從重懲辦。常順等一面將此案訊明。按律定擬具奏。毋稍含混。將此由五百里各諭令知之。○免蹕路經過地方。本年額賦十分之三。○是日駐蹕煙郊行宮。甲申遣官祭歷代帝王廟。○是日駐蹕白澗行宮。乙酉上詣

獨樂寺拈香 詣

隆福寺拈香○賞請轎鑾儀衛校尉銀○賞

看守煙郊等處行宮弁兵半月錢糧○是日

駐蹕隆福寺行宮翼日如之○丙戌

上恭謁

昭西陵

孝陵

孝東陵

景陵

裕陵

定陵俱未至碑亭卽降輿慟哭步入

隆恩門詣

寶城前行禮躬奠哀慟王以下文武大臣均隨

行禮○諭內閣御前大臣醇親王等奏在籍

官員跪遞職名請飭查辦一摺在籍官員情

殷瞻仰蹕路跪迎原無不可惟呈遞職名實

屬違例此次在籍道員史樸等姑免查辦嗣

後如有跪迎之紳耆人等不准擅遞職名以

符定制○賞連日豫備乘車官兵銀○丁亥

清明節遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

端慧皇太子園寢○

上恭詣

定陵行數土禮率王以下文武大臣詣

隆恩殿行大饗禮禮成詣

明樓前行辭謁禮思慕瞻依備極哀慟○臨

端慧皇太子園寢酌酒○奉

慈安端裕康慶皇太后

慈禧端佑康頤皇太后回鑾○詣

桃花寺拈香○祭

先農之神遣順承郡王慶恩行禮○是日駐

蹕桃花寺行宮○戊子

上詣

獨樂寺拈香○賞請轎鑾儀衛校尉銀○是

日駐蹕白澗行宮○己丑

孝賢純皇后忌辰遣官祭

裕陵○諭軍機大臣等左宗棠豫師奏官軍收

復大通縣城擒斬逆目一摺大通縣城為逆

回所踞堡寨林立劉錦棠訪知其中死黨無

多餘皆畏懼兵威因勢利導遂克縣城並將

叛弁馬壽等擒斬辦理甚合機宜即著左宗

棠等飭令劉錦棠將善後事宜妥為籌辦以

期一勞永逸白彥虎乘隙狂竄左宗棠等當

飭在事各軍認真追捕務獲毋令日久稽誅

此次出力文武員弁准彙入前次各保案

奏請獎勵將此由六百里各諭令知之○以

克復甘肅巴燕戎格廳城生擒逆首馬桂源

等予總兵官沈玉遂戴定邦以提督簡放餘

議敘有差○予甘肅肅州陣亡參將張集昌

等十三員祭葬世職加等○琉球國使臣向

德裕等三人於煙郊行宮外瞻覲○是日駐

蹕煙郊行宮○庚寅

上詣

慈雲寺拈香○至朝陽門外詣

東嶽廟拈香○奉

慈安端裕康慶皇太后

慈禧端佑康頤皇太后還宮○辛卯

上詣鍾粹宮問

慈安端裕康慶皇太后安長春宮問

慈禧端佑康頤皇太后安。至戊申皆如之。○諭內閣明善奏特參豫備車輛之官員等。請分別懲處一摺。此次豫備

慈禧端裕康慶皇太后

慈禧端佑康頤皇太后乘車。羸匹疲瘁。遇雨難行。該管官員等沿途亦未能實力督催。均屬咎有應得。上駟院廐長海齡內管領保祥。均著交內務府嚴加議處。總管內務府大臣明善於車輛差使未能妥為照料。且豹尾槍前

竟有間雜車輛攙越行走。甚不嚴肅。實屬疏懈。明善著交部議處。帶豹尾槍之委散秩大臣載森。載勛不能實力管束。著一併交部議處。尋議明善等均照約束不嚴例降一級調用。得旨准其抵銷。○又諭武備院奏請將管理駝隻遲誤之司員議處一摺。據稱本月十一日應交進

慈禧端裕康慶皇太后

慈禧端佑康頤皇太后暨上用行李駝隻遲誤

未到初十日亦有遲誤之事實。屬不成事體。

所有跟隨行李之員外郎恆山副司。帷舒雲均著交內務府議處。並著順天府查明該衙門及武備院所備駝隻有無虛放數目侵吞口分之弊。照例懲辦。嗣後應如何變通或改用羸馱以期無誤要差之處。並著武備院順天府妥議章程奏明辦理。尋奏請嗣後改添羸馱以免遲誤從之。○壬辰諭內閣內務府奏隨扈車輛不齊。車甲管束不嚴。請交部議

處。克興阿等奏羸頭未能得力。請交部議處。各一摺。此次恭請

慈禧端裕康慶皇太后

慈禧端佑康頤皇太后車輛車甲牽羸甲人等不齊。羸匹疲瘁。該管大臣等未能先事嚴飭妥辦。均屬咎有應得。除明善業於昨日交部議處外。崇綸春佑魁齡桂清誠明克興阿廣順均著交部議處。其車甲人等著查明嚴行責懲。至豫備兩宮

皇太后轎前執燈人役遲誤實屬不成事體著查取該管司員職名革職永不敘用尋吏部議崇綸等均照約束不嚴例降一級調用得旨准其抵銷○賞請轎鑾儀衛校尉銀○癸巳

上奉

慈安端裕康慶皇太后

慈禧端佑康頤皇太后幸漱芳齋侍午膳○諭內閣內務府奏查明貽誤要差之司員請旨

遵行一摺向來駐蹕處所需器皿均係沿途各州縣豫備由內務府揀派司官在宮門外兒交內監放太監分放各處此次煙郊桃花寺行宮外竟有太監多人爭先奪取器皿之事實屬可惡除內監放太監馬進喜等業經朕嚴行懲責發往黑龍江外監放司員員外郎迎格福敏未能隨時彈壓任令太監等紛紛奪取殊屬不成事體均著革職永不敘用以示懲儆嗣後該衙門務當揀派明幹司

員妥為經理如太監人等有似此不法情事即由該司員稟明隨扈總管內務府大臣隨時奏請懲辦至此次車輛遲誤車庫庫掌於承應要差漫不經心實屬咎無可辭車庫庫掌德立吉文吉祥均著即行革職○以詹事府少詹事松淮為詹事○甲午諭內閣鮑源深奏藩司應遵旨赴京陛見並呈請開缺回籍補制一摺山西布政使李慶翱前在蒲州府任內丁憂因防務緊要未能回籍自應准

其補制李慶翱著賞假百日回籍補行穿孝無庸開缺俟假滿後即行來京陛見○陝甘總督左宗棠奏提督蘇洪勝請更名蘇洪順允之○琉球國王尚泰遣使表貢方物賞賚筵宴如例○以陝西收撫潰勇出力賞提督者貴正一品封典提督童虎臣總兵官張世璜遊擊張邦福潘萬才馬金敘巴圖魯名號餘加銜升敘開復有差○旌表未婚守志宗室閨吉聘妻關佳氏○蠲免陝西咸甯長安

渭南三原高陵臨潼涇陽咸陽富平大荔郃
長武三水鄜洛川中部宜君醴泉興平鄠鳳
翔寶雞隴南鄭城固沔澄城朝邑華陰華蒲
城乾三十二州縣被擾地方舊欠額賦○命
五城賁賑展期兩月○乙未追予湖北漢陽
殉難知府董振鐸諡壯節○丙申諭軍機大
臣等金順奏會攻肅州獲勝請飭張曜前赴
甘涼催山西撥解軍餉成祿奏車馬短缺未
能拔隊出關各摺片金順抵肅州後會同徐

占彪攻勦獲勝賊勢已蹙著左宗棠責成徐
占彪乘此機會認真攻勦以期早竟全功金
順仍懍遵前旨剋期出關接統成祿所部能
否酌留隊伍會攻肅城著該前將軍妥籌布
置務臻周密白彥虎糾黨六七千人出竄甘
州漸近撫彝地方意圖應援肅逆牽掣官軍
甘撫一帶關繫糧運後路金順現須出關未
能兼顧徐占彪所部攻勦喫緊若抽撥隊伍
前往必至兵分力單甯夏防務現尚安謐張

曜平日勦賊勇往著卽親率大隊由甘涼一
路節節掃蕩而前殲除白彥虎等股以維全
局張曜拔隊後著定安飭令金運昌酌撥數
營由纏金迅赴甯夏扼要填紮聯絡聲勢毋
得稍有遲延山西每月應解金順軍餉二萬
兩同治十年撥款尚有五萬兩未解月餉又
不應期該軍需用孔殷著鮑源深通盤籌畫
將金順軍餉設法源源接濟俾資飽騰成祿
此次滯陳車馬短缺糧食匱乏不能拔隊前

進亦係實在情形該軍現交金順接統應需
車馬糧食左宗棠務當檄令地方官設法應
付俾利師行不得意存膜視將此由六百里
諭知左宗棠定安金順鮑源深並傳諭張曜
知之○又諭金順奏成祿一軍糧餉奇絀等
語成祿所部疊經密諭金順剋期出關妥為
接統並令傳旨將該提督革職拏問茲覽該
前將軍所奏情形自是未經接奉前次密寄
諭旨仍著金順懍遵疊次密諭剋期前進慎

密辦理不得稍涉遲延。成祿所部各營金順務當妥為整頓。應如何分紮扼堵之處。即著酌度情形妥為布置。詳細奏聞。以慰廑繫。將此由六百里密諭知之。○又諭榮全奏伊犁兵民盼救。並陳伊犁等處情形。一摺。俄人在伊犁者。現有一千餘眾。日向索倫錫伯蒙古漢人等勒索銀糧。蒙漢人等窘苦。盼救甚殷。纏頭色得克等亦受俄人酷虐。情願反正。歸誠。機有可乘。榮全當隨時設法妥為拊循。以

便相機進取。至榮全接濟錫伯銀兩。俄官來咨。不令管理。殊屬狡橫。榮全咨覆。謂錫伯係中國所轄之人。應由中國接濟。俄國無庸管理。義正詞嚴。所辦甚是。惟俄情叵測。恐不可以理喻。且又有運送槍礮赴喀什噶爾之謠。榮全務當臨機應變。力籌挽回補救之方。一面將調兵集團及疏通道路運解軍火各事宜妥為布置。用赴事機。俄商前往瑪納斯貿易中途殺傷五十餘人。是否回匪冒名搶劫。

抑係百姓恨其濟賊。殺以洩忿。著榮全確切查明。據實具奏。趙興體與瑪納斯回匪互殺。賊勢似可稍蹙。第首逆馬伏沅漏網。而投誠之說又未可深信。榮全仍當妥慎籌辦。隨時咨商景廉。激勵士卒。設法進兵。速將烏嚕木齊及瑪納斯等處戡定。庶可併力西進。較之徵調內地兵勇。難易遲速。判若天淵。該署將軍想能體會此意也。另片奏病勢增劇。亟盼派員接替等語。現在邊事孔棘。非熟悉情形

者。斷難勝任。榮全當懍遵二月初四日諭旨。在營調理料理軍事。以副委任。將此由六百里諭令知之。○舉行同治十一年軍政浙江罷輟官一員。年老有疾官六員。福建不謹官一員。罷輟官三員。年老官一員。有疾官二員。分別處分如例。○丁酉諭內閣。此次祇謁東陵。謹於定陵。迤東擇有吉壤。地勢雄秀。山川環抱。復恭奉

慈安端裕康慶皇太后

慈禧端佑康頤皇太后親臨閱視敬奉

懿旨普祥峪菩陀峪卽定為萬年吉地欽此朕
仰體

慈懷自應擇吉興工

普祥峪著派惇親王協辦大學士全慶總管內
務府大臣都統春佑工部右侍郎榮祿

菩陀峪著派醇親王左都御史英元總管內務
府大臣吏部左侍郎魁齡總管內務府大臣

工部左侍郎明善前往敬謹辦理○又諭兵
部奏前任參贊大臣現在到京將前議降調
之案聲明請旨一摺奎昌著加恩改為革職
留任○以戶部左侍郎志和兼署兵部右侍
郎○以前任山海關副都統玉亮署正白旗
漢軍副都統前任荊州左翼副都統蘇彰阿
署鑲紅旗蒙古副都統○己亥諭軍機大臣
等榮全奏遵議富和所陳塔城事宜諸多窒
礙各摺片富和前奏各情既於新疆大局無

益卽著毋庸置議本日已明降諭旨將富和
開缺令英廉補授塔爾巴哈台參贊大臣矣
著榮全傳旨卽令富和馳赴景廉軍營隨同
剿賊毋稍延緩英廉前經榮全派赴庫爾喀
喇烏蘇帶兵防剿著榮全酌派可靠之員前
往接替俾該參贊速赴新任以重職守儻一
時未便調回卽著榮全遴派妥員奏請署理
塔爾巴哈台參贊大臣印務將此由五百里
諭令知之○以左都御史英元差務較繁改

派兵部尚書英桂辦理

菩陀峪萬年吉地工程○命塔爾巴哈台參贊
大臣富和開缺赴烏魯木齊都統景廉軍營
隨同剿賊賞正藍旗蒙古護軍參領英廉副
都統銜為塔爾巴哈台參贊大臣○庚子
上奉

慈安端裕康慶皇太后

慈禧端佑康頤皇太后幸宣壽宮侍午膳○賜
王以下文武大臣蒙古王貝勒貝子額駙暨

琉球使臣等食○撥工部火藥一萬斤鉛丸二萬斤火繩四萬條轟藥一千斤解由察哈爾轉解科布多軍營備用○辛丑

萬壽節遣官祭

太廟後殿○遣官祭

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

顯佑宮

東嶽廟

城隍廟○

上詣

大高殿

壽皇殿行禮○詣鍾粹宮

慈安端裕康頤皇太后前行禮長春宮

慈禧端佑康頤皇太后前行禮○御乾清宮王

以下文武大臣蒙古王貝勒貝子額駙等行

慶賀禮取官於午門外行禮○奉

慈安端裕康慶皇太后

慈禧端佑康頤皇太后幸寧壽宮侍午膳○賜

王以下文武大臣蒙古王貝勒貝子額駙暨

琉球使臣等食○諭軍機大臣等曾璧光周

達武奏請飭催川省迅解應協各餉一摺貴

州軍務雖將告竣該省上游興義安順普安

等處尚有餘匪嘯聚正當剋期勦洗黔省各

軍遽難裁撤餉項自不能驟議覈減所請飭川省撥解欠餉之處自係實在情形著吳崇督飭司道先將欠解黔省的餉四十六萬二千兩指撥專餉五萬兩共銀五十一萬二千兩務於一月內分為兩批趕緊埽數解黔以清積欠曾璧光周達武務當激勵各軍迅將上游餘匪悉數埽除毋任漏網並將善後各事宜妥為籌辦俟軍務全竣各軍應如何分別撤留體察情形奏明辦理將此由五百里

諭知吳崇曾璧光並傳諭周達武知之○貴州巡撫曾璧光奏請將辛酉甲子兩科鄉試歸併本科舉行從之○以甘肅攻克納家牯等處回堡出力賞阿拉善管旗副章京敖肯等花翎餘升敘有差○壬寅

上奉

慈安端裕康慶皇太后

慈禧端佑康頤皇太后幸漱芳齋侍午膳○諭軍機大臣等張曜奏竄匪擾及甘涼派隊援

剿一摺據奏接據金順咨稱甘州撫彝一帶現有竄匪滋擾咨令李葆琛率隊赴肅助剿該提督當即添派提督孫金彪遴派隊伍馳赴鎮番會同李葆琛等將軍火等項護送西進等語肅州此時情形若何如仍形喫緊卽於孫金彪李葆琛兩員中酌留一員並酌留隊伍以資助剿其餘隊伍仍令回紮鎮番俾資護運著金順張曜會商妥籌辦理金順前奏白彥虎出竄甘州漸近撫彝茲據該提督

奏探聞該逆糾黨由大通竄至涼州西南一帶金順現須出關張曜著仍遵本月十八日諭旨親率大隊由甘涼一帶勤加偵探埽蕩而前務將白彥虎等股悉數剿滅迅殄逆氛張曜拔隊後定安當懍遵前旨卽飭金運昌酌撥數營前赴甯夏扼要填紮毋稍延緩其鎮番一帶防剿事宜並著張曜妥籌布置務臻周密將此由五百里諭知定安金順並傳諭張曜知之○甲辰諭軍機大臣等劉長佑

奏越南國勢未能自強援軍難以兼顧一摺。越南近日情形益加貧弱黎裔等患近在國中濱海地方又為法國蠶食其勢岌岌幾難自存該國不能自強動招外侮在中國撫綏藩服自難恕然第越境用兵可暫而不可久越南前次變亂業經調兵深入援應以示懷柔若長恃中國兵力其勢斷難兼顧兵法以逸待勞自應先防後剿不宜舍己從人劉長佑閱歷較深於此中機宜必能洞悉著隨時

會商瑞麟統籌全局慎固邊防越南如有緩急邊境防軍即可遙為聲援相機進止並著檄令覃遠璉等加意設防嚴杜奸徒勾結毋稍疏懈馮子村入省會商後如何情形即著詳細具奏將此由五百里諭令知之○又諭劉長佑奏接准越南咨呈上年十月間有法國領事官涂普義等火船四隻駛至該國廣安海口稱奉雲南提督馬如龍委赴外洋採辦軍裝火器取道該國赴滇並有李玉墀鈔

呈該提督劄文二件字多訛謬所述來歷疑端不一經該國將船阻截劉長佑現已飛咨雲貴總督查明覈辦等語該船所載軍火等物既稱係雲南提督委辦之件何以並無滇省照會所持劄文又係同治十年七月所給遲至年餘始至該國情節支離亟應確查究辦著劉嶽昭岑毓英迅即查明此項火船軍器是否提督馬如龍委辦其涂普義及李玉墀等有無別項情弊速行根究明確據實奏

聞即一面咨明劉長佑嚴行懲辦將此由五百里各諭令知之○以廣西官軍援剿越南竄匪獲勝賞副將李揚才陳朝綱蔣益昌巴圖魯名號土州判岑潤青五品頂帶花翎知縣廖景森等藍翎知府趙沃等加銜升敘有差予陣亡遊擊楊汝廷祭葬世職如副將例○乙巳命察哈爾副都統景瑞來京以前任科布多參贊大臣奎昌署察哈爾副都統○追予兩江各屬陣亡殉難候選縣丞劉棫等

紳民婦女一千九十八員名口分別旌卹如
例○丙午諭軍機大臣等前據翰林院編修
吳大澂奏洋人懇請召見未可允准本日復
據御史吳鴻恩奏洋人請覲請飭開導並酌
定禮節各摺片西洋各國使臣籲懇朝覲蓄
志已久此次復向總理各國事務衙門屢次
懇請經王大臣力為辯論儻該使臣堅執前
說應如何豫籌辦理期於朝廷體制及中外
大局兩無窒礙之處著李鴻章妥議具奏原

摺片均著鈔給閱看將此密諭知之尋奏各
國以朝覲為修好第一事今值親政大典請
准面申慶忱措詞尚屬恭順惟泰西各國見
君向無跪拜之儀本朝有待屬國一定之禮
而無待與國一定之禮各使不從中國禮節
良由習俗素殊儻寬其小節示以大度似尚
無損朝廷體制下所司知之○又諭彭玉麟
奏報巡江日期及酌提公費並分年居住上
下游一摺據稱長江水師縱橫五省凡湖河

之歸長江分防者均應周歷每年巡閱一次
為日無多擬請自上游湖南本籍出巡到江
蘇下游差竣即在江浙度歲次年由江浙下
游巡至上游湖南長沙差竣即在衡州度歲
等語即著照所議辦理該侍郎以每年巡江
公費無須另籌即在前存兩江生息項下提
用此項銀兩是否足敷辦公著李宗羲李瀚
章酌度情形如有不敷仍遵前旨另行籌款
以資應用將此各諭令知之

上以孟夏時享

太廟自是日始齋戒三日○丁未諭內閣劉嶽
昭岑毓英奏官軍攻克順甯府城並錫臘等
處賊巢及圍攻雲州獲勝一摺雲南順甯賊
匪於官軍未到之先出撲大小中山各營經
提督段瑞梅率師援剿自正月二十八日至
二月初七日連日鏖戰連破賊營礮樓三十
二座殺賊八百餘人提督楊玉科分兵往攻
錫臘牽制賊勢當將錫臘攻克段瑞梅等復

將橋頭山等處賊營木壘礮樓八十餘座概行平毀。殺賊二千餘人。並將鳳山虎山攻克。乘勝直抵城下。開挖地道。晝夜圍攻。楊玉科督飭段瑞梅等分攻各門。一面架梯登城。一面由轟陷處衝入。節節掃蕩。至二十五日。將順甯府城收復。逆首馬得中等均已焚斃。雲州一路。於正月二十六七二月初二等日。疊經官軍勦擊。攻拔附城河灣村賊營五座。其猛郎一帶賊巢。亦經次第攻破。勦辦甚為得手。

即著激勵將士。迅將雲州騰越兩城奮力攻復。掃除餘孽。以靖邊疆。○諭軍機大臣等。岑毓英奏滇省軍務將次肅清。俟蕩平雲州騰越等處餘孽後。擬即遣撤勇丁。追繳軍器。上年該省大理未克之先。委員赴粵購買洋槍洋礮洋藥銅帽等物。尚多未解入滇。請飭沿途各省督撫截留等語。即著瑞麟李瀚章。吳棠郭柏蔭王文韶張兆棟劉長佑曾璧光。飭令所屬查明雲南督撫及提督委員。由粵

採買洋槍洋礮各項。無論行抵何處。即行悉數截留。封存該省軍裝庫。以免事後清查追繳之煩。將此各諭令知之。○移浙江烏程縣同城縣丞於楊瀆橋與大錢司巡檢分管漣港事宜。從巡撫楊昌濬請也。○以克復雲南順甯府城。賞提督段瑞梅蔣宗漢總兵官和耀曾。正一品封典。提督蔡標道員蔡錦青黃馬褂。知府李鳳書遊擊許士坤李德濺李榮興。都司周之楨鄭開元吳之竹周慶安龔聯

元李福興蘇開先石炳元董正性楊發貴守備丁槐輝師尹。知縣楊福萃。邑圖魯名號同知謝家瑞。守備楊發科等。花翎千總盧正昌等。藍翎餘加銜升敘有差。予陣亡守備楊昌善縣丞王廷瓚。把總李元吉等。祭葬世職加等。

大清穆宗繼天開運受中居正保大定功聖智
誠孝信敏恭寬毅皇帝實錄卷之三百五十

大清穆宗繼天開運受中居正保大定功聖智
誠孝信敏恭寬毅皇帝實錄卷之三百五十一

同治十二年癸酉夏四月己酉朔享

太廟

上親詣行禮○詣鍾粹宮問

慈安端裕康慶皇太后安長春宮問

慈禧端佑康頤皇太后安至丁丑皆如之○奉

慈安端裕康慶皇太后

慈禧端佑康頤皇太后幸漱芳齋侍午膳○予

貴州銅仁傷亡知縣朱恩榜祭葬世職○予

貴州各屬陣亡殉難從九品劉德超等紳民

婦女一百三十七員名口分別旌卹如例○

庚戌諭軍機大臣等前據大理寺少卿王家璧奏請飭查林則徐條奏畿輔水利原摺。妥議籌辦。並陳疏濬溝洫事宜各摺片。畿輔水利。雍正年間曾墾田數千頃。原任兩廣總督林則徐疏請仿照成法試行。謀畫深遠。近年直隸河患頻仍。若以治田者治水。果能辦有成效。於國計民生實有裨益。著李鴻章查照林則徐原奏。體察情形。酌度辦理。原摺片著鈔給閱看。將此諭令知之。○壬子追予湖北

各屬陣亡殉難千總王兆熊等紳民婦女七百二十一員名口分別旌卹如例。○旌表守正捐軀河南虞城縣民趙華春妻王氏。○癸丑追予河南各屬陣亡殉難紳民婦女一千一百五十三名口分別旌卹如例。○乙卯諭軍機大臣等有人奏直隸盧龍縣知縣唐鉞。枉法貪贓。違禁苛派。該縣武生李思成。霸種王姓地畝。並恃強將王姓毆斃。復將縣差張發毆傷。李思成送給該縣之子唐啟濬銀三

百兩。唐鉞應允免究。勒令和息。李思成復餽送該縣銀百兩。遂將張發嚴押。不許再控。又徐揚被繆思顏踢死一案。繆思顏送給銀兩。遽行開釋。又永平府陳官屯地方商人陳姓。被馬賊搶刦銀二百餘兩。赴署喊告。並不緝捕。嚴追至兵差過境。輒行勒派差徭。又該縣嗜好太重。積案不結。請飭查辦等語。著李鴻章按照所參各節。確切訪查。據實參奏。毋稍徇隱。原摺著鈔給閱看。將此諭令知之。尋奏。

遵查唐鉞尚無貪贓枉法等事。惟徐揚陳殿揚案內逃兇逃盜。日久未獲。實屬捕務廢弛。又下鄉相驗。攜帶伊子前往。致招物議。亦屬辦事羸疏。應請革職。武生李思成惡蹟素著。已飭永平府嚴行訊辦。從之。○丙辰以鳳凰城城守尉奕艾為吉林副都統。○戊午諭軍機大臣等景廉奏遵旨通籌西路全局一摺。錫綸行抵布倫托海。察看該處地勢空曠。無險可據。暫赴阿勒台山南駐紮。擬調集蒙古

喇嘛及未經回塔之厄魯特官兵。以壯聲威。惟該官兵等困苦異常。亟應籌給款項。卽著常順多布沁扎木楚志剛。托倫布。保英。就近籌撥銀一萬兩。以便錫綸派員分往迎提。毋稍延緩。該都統所奏。錫綸宜駐紮沙山子。或另擇善地。徐圖進剿。著景廉。錫綸。隨時會商妥辦。趙興體等團勇。錫綸當妥為撫馭。以資援應。景廉以榮全前赴伊犁。尚宜少緩。該署將軍所帶官兵。莫若與錫綸會合。以全力規

取瑪納斯。果能克復。庶聲勢聯絡。烏魯木齊可期得手。彼時再議交還伊犁之事。辦理較易等語。所籌亦是。著榮全悉心酌度。妥籌辦理。景廉於三月內起程。進紮古城。居中調度。該都統到古後。務當妥為布置。穩慎進取。以挫賊鋒。而維全局。巴里坤為大軍後路。景廉計已拔隊。該處地方空虛。李天和等隊伍一時不能到坤。著文麟迅撥營勇。填紮巴城。不得稍涉推諉。前經疊諭金順出關。卽著星馳

西進。飭令李天和所部三營及吉林黑龍江馬隊。迅赴景廉軍營。以厚兵力。肅州一城。為關內外樞紐。亟應迅圖攻克。著左宗棠檄飭徐占彪。實力圍剿。擒渠埽穴。迅奏膚公。母任逆黨。疊竄邊外。致擾蒙古地方。是為至要。將此由五百里各諭令知之。○漕運總督文彬。陛見。以江蘇淮揚道劉咸。暫護漕運總督。○上以常雩祀

天於

圓丘。自是日始齋戒三日。○己未。以貝勒奕劻為後扈大臣。○補鑄甘肅西甯鎮總兵官西甯府知府印信。從總督左宗棠請也。○予山西軍營病故總兵官崇安祭葬卹廕加等。○庚申。

上詣

南郊齋宮齋宿。○諭內閣。張廷岳等奏派出迎接哲布尊丹巴呼圖克圖之呼畢勒罕多羅貝勒錦丕勒多爾濟。現在患病。請另行派人

迎接等語。多羅貝勒錦丕勒多爾濟現在患病。不能迎接。哲布尊丹巴呼圖克圖之呼畢勒罕。卽改派扎薩克圖汗車林端多布迎接。著張廷岳等速催車林端多布趕緊起程。毋稍遲延。並加恩由庫倫至西甯馳驛行走。此次各項執事官員人等。已於三月初八日起程。錦丕勒多爾濟於此等欽派要差。疊次稟報患病。實屬有心規避。錦丕勒多爾濟著革去郡王銜。以儆效尤。○諭軍機大臣等。杜嘎

爾奏會商籌備防勒一摺。賊匪意圖竄擾。飄忽靡常。亟應認真防範。杜嘎爾以軍臺四十四站。縣延數千里。地勢原分四段。擬於中兩段左近。擇要分營扼紮。所籌尚妥。卽著勤加防探。遇賊卽擊。毋稍疏虞。惟該營僅有馬隊二百名。不敷分布。著額勒和布等卽由察哈爾八旗添調官兵三百名。速赴杜嘎爾軍營。以資防剿。該營餉項支絀。刻下兵數旣添。餉需尤亟。察哈爾前請部款十五萬兩。現在所

存無多。勢難分顧。著戶部迅速籌撥銀五萬兩。解交察哈爾存儲。由杜嘎爾按月派員請領。應由何省協餉歸還之處。卽由該部奏明辦理。杜嘎爾一軍。上年領過鍋帳等項。支搭日久。殘破不堪。著工部再行覈發全分鍋帳二百副。由額勒和布等就近派員赴部請領。分撥應用。毋稍稽遲。將此諭知戶部。工部。並由四百里諭令額勒和布。杜嘎爾景瑞。奎昌知之。○辛酉。常寧祀。

天於

圖丘

上親詣行禮。○詣

關帝廟拈香。○諭軍機大臣等。金順奏肅逆突圍。援賊撲營。力戰擊退。並斟酌出關事宜。密陳請旨各摺片。肅州踞逆。日夜突圍。而各路援賊。屢次撲犯營壘。經金順會商徐占彪督率官軍奮力擊退。尚屬得手。惟援賊雖難保不再圖竄擾。金順疊次諭令帶兵出關。

徐占彪一軍深恐兵力單薄不能遏絕外援殲除踞匪前據左宗棠奏宋慶所部三月初旬可於蘭州取齊擬令先赴涼州等語此時計早抵涼卽著左宗棠傳知該提督統率全軍尅日赴肅會同徐占彪規復肅州盡殲醜類如宋慶一軍兵力尚慮不敷或未能卽時西進卽著左宗棠遵照前旨另派得力隊伍迅赴肅州會勦金順以勦賊成圍正在喫緊未可遽撤圍師率之西去已函致成祿來肅

會勦俟其到後一面安置成祿部眾一面傳旨拏問所籌辦法殊形謬妄且與歷次諭旨不合朝廷賞功罰罪一秉大公至正何必誘之使來作此權宜之計况信函往返難免不至洩漏至謂成祿部眾調至關內可以近受箝制則前降諭旨原令金順帶兵出關豈關內則可威撫關外卽不可威撫耶該前將軍仍當懍遵疊次密諭酌帶所部迅速出關接統成祿各軍傳旨將該提督革職拏問解京

治罪以肅戎行不得藉口圍師遷延干咎並不得藉口左宗棠所派之兵未到任意稽遲金順所部軍糧仍著左宗棠飭屬妥籌接濟毋令缺乏將此由六百里各密諭知之○又諭劉長佑奏留駐越南總兵私派差弁迫索滋事請革職審辦一摺留駐越南太原之總兵陳得貴於本年正月間專弁陳有貴回龍州請領餉銀行抵金英縣對馬市地方與該處民人鬪毆輒指該處夷官縱匪刦餉該總

兵並不稟明聽候查辦遂挾恨率派弁兵駐紮多福府城妄稱進勦似此遇事專擅任性妄為若稍事姑容何以肅戎行而綏藩服陳得貴著先行革職由劉長佑等嚴行審訊從重懲辦以示儆戒將此由五百里諭令知之○予甘肅肅州陣亡佐領塔爾通阿等十二員祭葬世職加等○壬戌補行引見京察人員得旨光祿寺卿惠林太醫院左院判李德立均著照舊供職○癸亥

上奉

慈安端裕康慶皇太后

慈禧端佑康頤皇太后幸漱芳齋侍午膳○諭

軍機大臣等張曜奏遵旨率隊前進籌備駝運情形一摺前諭張曜親率所部由甘涼一帶掃蕩而前勦除竄匪該提督現已調集防營整備西進惟由甯夏至涼州半多沙漠糧餉軍火鍋帳一切均須隨帶駝隻運送張曜已咨明定安籌辦著該將軍將該提督所商

轉運事宜妥為籌畫並迅即撥給駝隻俾利進行毋稍延緩西路各軍雲集軍糧採買維艱該營委員辦理尚慮呼應不靈著左宗棠飭知該地方各官一體照料以濟軍糈將此由五百里諭知左宗棠定安並傳諭張曜知之○直隸總督李鴻章等奏此次輪船裝運漕米十五萬餘石擬仿照白糧章程飭令江浙糧道運通交納以免折耗偷漏之弊下部知之○順天府府尹梁肇煌開缺省親以太

僕寺少卿彭祖賢為順天府府尹○甲子月食以順天府府丞龔自閔署光祿寺卿○乙丑

孝端文皇后忌辰遣官祭

昭陵○諭軍機大臣等定安奏籌布防勦事宜請飭各專責成暨阿拉善旗有賊竄擾各摺片定安以甯夏及阿拉善旗一帶不可無重兵鎮攝甘涼地方現有宋慶一軍防勦足敷分布似可移緩就急酌留張曜所部就近扼

紮以期兼顧擬自甯夏至涼州防勦事宜責成張曜辦理其甘涼迤西請責成宋慶勦辦等語前據左宗棠奏宋慶所部擬令先赴涼州已有旨諭知左宗棠即飭宋慶統率全軍剋日赴肅會同徐占彪攻勦以便金順出關是甘涼一帶兵力甚單亟須張曜督隊前往迅掃逆氛當此事機緊要之時豈可朝令夕更致涉鬆勁仍著定安知照張曜懍遵前旨迅赴甘涼將白彥虎等股盡數掃除毋得遷

延貽誤。張曜啟行後。甯夏需兵填紮。定安既奏稱金運昌一軍難以輕動。應如何派隊扼紮俾免疏虞之處。著該將軍妥籌具奏。阿拉善旗有賊匪竄擾。是否白彥虎一股。現既竄向阿畢爾米特地方。著定安督飭防軍會同蒙兵認真截擊。並著知照張曜撥隊協力兜剿。以免蔓延。另片奏請飭豫省撥解張曜駝隻銀兩等語。前諭錢鼎銘於張曜一軍月餉外籌銀三萬兩。備購駝隻。迄今未據報解。現

在張曜統軍西進。需駝甚亟。著錢鼎銘將前次派撥銀三萬兩。趕緊如數措解。以應急需。至每月餉養駝隻及駝夫工食等項。需費甚鉅。著鮑源深飭令河東道。自本年四月起。每月籌撥銀五千兩。交太原駐紮嵩武軍轉運局。徑解張曜軍營。以資接濟。河南餉項未到以前。張曜所需駝隻。仍著定安趕緊籌款墊辦。以便張曜兼程前進。俟河南餉到。再行撥還。該將軍當以大局為重。不得稍涉推諉。儻

有貽誤。定惟該將軍是問。將此由六百里各諭令知之。○戊辰。旌表守正捐軀山西孝義縣民王映明妻李氏。○己巳。諭內閣。左宗棠奏道員不能振作。請開缺另簡等語。甘肅甯夏道陶斯咏。在任年久。因循廢弛。難期振作。著即開缺。甘肅甯夏道員缺。著魏喻義調補。所遺蘭州道員缺。著璩武補授。○諭軍機大臣等。左宗棠豫師奏官軍克復巴燕戎城後。勦辦逆回。進規循化。左宗棠奏追勦竄回。並

肅州疊獲勝仗情形各一摺。巴燕戎城克復後。陳湜飭令該處回族呈繳馬械。並將青科莊悍回懲創。以次戡定卡勒等莊。現駐甘都工河岸。俟循化上四工回族縛獻醜類。呈繳馬械。諸事辦妥。再赴循化次第辦理。即著左宗棠等督飭陳湜認真籌畫。懾以兵威。撫其馴順。以期一勞永逸。綏靖邊陲。白彥虎等逆由西甯出竄。圖援肅州。經楊世俊等軍探蹤截擊。疊挫賊鋒。該逆復與肅城踞賊夾撲圍

城營壘。經徐占彪等督軍擊退。並襲破塔爾灣賊巢。賊膽益寒。紛紛潰竄。現在白彥虎已被槍傷。亟應乘此機勢。迅速殲除。其散竄南山各岔口者。左宗棠已飭甘州各防營按緝。並咨商宋慶。飭令分駐各營。就近捕斬。想可淨絕根株。至竄向大單灘黑山峽之賊。人數雖不甚多。亦應一律追捕。仍著該督飭派官軍探蹤剿擊。悉數殲擒。毋留餘孽。肅賊無援。必形窮蹙。左宗棠當飭令徐占彪等盡力攻剿。速拔孤城。不得久稽時日。將此由六百里各諭令知之。○又諭。成祿奏撥隊赴巴里坤助剿。請飭文麟酌買糧石各摺片。成祿現在所部內挑選親兵右後兩營。健銳右營一營。撥赴巴城。因李天和會辦屯田事務。未能分身。派令副將胡飛鵬統領三營前進。此軍新到。於地勢賊情未能知悉。景廉務當妥為調遣。加意拊循。隨時曉諭合營。彼此聯絡。和衷共濟。不得膜視客軍。致令孤立。山東奉撥餉

銀十萬兩解赴哈密。豫為成祿一軍買糧之用。該省尚有六萬兩未解。著文麟迅速催提。卽在奇台古城巴里坤哈密等處酌買糧三萬石。以備供支。俾出關各隊不至枵腹荷戈。實於軍事大有裨益。將此由五百里各諭令知之。○陝甘總督左宗棠奏請調前布倫托海辦事大臣李雲麟赴甘肅軍營差委。允之。○以署京營右翼總兵成林兼護步軍統領。○以盛京戶部侍郎瑞聯為熱河都統。○予故熱河都統庫克吉泰祭葬。諡勤毅。○予甘肅肅州陣亡總兵官劉厚福祭葬。世職加等。○庚午以鑲白旗蒙古都統崇實署熱河都統。○辛未調戶部左侍郎志和為盛京戶部侍郎兼管奉天府府尹事。○以正藍旗蒙古都統靈桂兼署鑲白旗蒙古都統。○追予江蘇六合陣亡殉難訓導劉榮炳等紳民婦女七百四十八員名口分別旌卹如例。○壬申調工部右侍郎榮祿為戶部左侍郎管三庫

事以內閣學士訥仁為工部右侍郎管錢法堂事○以戶部右侍郎桂清兼署兵部右侍郎以察哈爾副都統景瑞為正藍旗蒙古副都統 癸酉諭軍機大臣等惇親王醇親王等奏詳細查看

吉地方位情形繪圖呈覽一摺

普祥峪

普陀峪兩處誌椿經該親王等帶同堪輿敬謹覆勘兩處方位未能平準擬請

普祥峪誌椿下移一丈五尺二寸西移四尺七寸五分

普陀峪誌椿上移七尺四寸東移八寸等語

普祥峪

普陀峪前立誌椿現在既據奏稱兩處方位未能平列自應敬謹改移以昭慎重即著照惇親王醇親王等所奏情形妥慎辦理圖說留覽將此各諭令知之○又諭左都御史胡家玉奏江西省額外加徵地丁銀兩請飭裁革

一摺據稱江西省錢糧定例徵銀一兩隨徵耗銀一錢今每兩加徵銀四錢顯違定制請飭永遠裁革不得再立捐款公費名目等語各省地丁錢糧均有定額若如該左都御史所奏是該省州縣於正額之外違例加徵民間受害何可勝言亟應速為禁止著劉坤一嚴飭所屬州縣等恪遵定例不准絲毫浮收如查有私立捐款公費名目額外加徵者即著嚴行叅辦另片奏該省漕米一石折收銀

一兩九錢除解部款外提充捐款公費及州縣辦公之用為數已多復又分為三限每限每石各加銀三錢全給州縣辦公深恐虛報收數徒飽私囊弊端不少請旨裁禁等語著劉坤一一併查明將應行裁革者速為禁止並著嚴飭各州縣認真辦理毋得稍有徇庇原摺片著鈔給閱看將此諭令知之○甲戌旌表殉母捐軀安徽懷甯縣在籍知州彭爵麒女大姑○乙亥浙江巡撫楊昌濬奏請簡

派大員督辦海塘工程。得旨著該撫督飭承辦。工員覈實經理。毋避怨嫌。所請另派大員督辦之處。著毋庸議。○補鑄陝西提標前後左右等營固原城守營各遊擊關防。從總督左宗棠請也。○追予浙江各屬陣亡殉難訓導吳敬榮等紳民婦女六百三十九員名口。分別旌卹如例。○丙子以京畿雨澤愆期。

上詣

大高殿祈禱行禮。○遣孚郡王奕譔詣

時應宮惠郡王奕詳詣

昭顯廟鎮國公奕謨詣

宣仁廟貝勒載治詣

凝和廟拈香。諭內閣御史文明奏。宣寺馳行越禮。請旨嚴禁一摺。據稱本月十三日祭祀禮成。還宮之先。突有眾太監騎馬爭馳。自正陽門起。擅走各門中洞。並廝役等亦俱騎馬。由中路跟隨。衝越儀仗。直至午門外始行下馬。各門官兵並不向前攔阻。請旨嚴禁等

語。乘輿出入。凡扈從各官。皆宜懍遵步行。若如該御史所奏。該太監等越禮馳行。實屬不成事體。亟應嚴行禁止。著總管內務府大臣飭令總管太監嚴加約束。嗣後該太監等當差出入。皆當恪遵功令。不准恣意妄行。並嚴飭各門章京督率官兵等。每遇乘輿出入各路。如再有太監及廝役人等擅走御道。不聽攔阻者。立即稟明該管大臣。奏請從嚴懲辦。毋稍寬縱。另片奏請將慎刑司所立鐵碑恭

錄懸挂各處等語。著總管內務府大臣即將慎刑司門左鐵碑敬錄數通。恭懸執事太監各處。俾知有犯必懲。以肅紀綱。而昭炯戒。○

丁丑

孝慎成皇后忌辰。遣官祭

慕陵

大清穆宗繼天開運受中居正保大定功聖智
誠孝信敏恭寬毅皇帝實錄卷之三百五十一

大清穆宗繼天開運受中居正保大定功聖智
誠孝信敏恭寬毅皇帝實錄卷之三百五十二

同治十二年癸酉五月戊寅朔

上詣鍾粹宮問

慈安端裕康慶皇太后安長春宮問

慈禧端佑康頤皇太后安至丁未皆如之○諭

內閣載遵等奏釋回防禦應補何缺請飭查

辦一摺據稱已革防禦多福自配釋回應補

何缺當咨兵部辦理乃該革員因現在出有

防禦一缺遽爾自請補授查閱兵部來文防

禦字樣有黏補痕跡請飭部查辦等語已革

防禦多福照例究應以何缺挑補兵部原文

內何以前後不相符合是否該部書吏舞弊抑或該革員串通承辦事務衙門官吏私行黏補之處著兵部堂官及載遷等查明具奏○諭軍機大臣等富和奏新疆大概情形並榮全擅給弁兵翎頂所調軍械火藥被俄官截留各摺片詳加披覽該參贊與榮全意見不合瑣屑上陳實屬不知大體第所稱榮全勒令蒙古報效安臺並向各隊索馬三百匹以致潰散又以賞兵為詞由烏里雅蘇台等

處採辦貨物搶掠俄人物件之土爾扈特烏梁海人眾係塔爾巴哈台所屬榮全謂係科布多管轄置之不問其給榮全好馬者均賞給頂帶並任意賞給二三品頂帶花翎均未入奏調到軍械火藥被俄官截留經富和行文追回各情事事關大員任性妄為於邊疆甚有關繫常順非與榮全共辦一事無所用其迴護著即按照富和所指各款派員據實查明覆奏毋稍徇隱富和另片奏本年正月

初三日接奉寄諭榮全並未全錄給閱等語該署將軍何以未經全錄之處並著常順一併查明具奏原摺片四件咨索一件均著鈔給閱看將此由五百里諭令知之○己卯以江蘇江安糧道王大經為湖北按察使○庚辰

孝誠仁皇后忌辰遣官祭

景陵○諭內閣都興阿等奏旗員營官互毆受傷情詞歧異請飭交刑部提訊一摺在旗刑

部額外主事慶吉因伊弟慶順家工人在廟看戲與勇丁口角被毆遂負氣赴廟將戲喝止時遊擊劉得勝帶隊巡街因其身穿便衣不服查問復與該旗員互毆受傷劉得勝經總兵張得祿撤去隊官與隨同滋事之勇丁等一併押候查辦慶吉復以張得祿攜妾觀戲等詞遣抱赴省牽控經都興阿等飭查無據該旗員尚復堅執前詞覈與眾供均相歧異案關官員互毆控詞歧異亟應研訊明確

以成信讞著盛京刑部卽行提取全案人證
秉公研訊確情按律懲辦毋稍徇縱○以驗
收海運漕糧完竣予直隸總督李鴻章倉場
侍郎延煦優敘道員蔭德泰等加級加銜有
差○辛巳以失察勇丁勾匪搶劫摘甘肅總
兵官劉宗璋頂帶仍留營○壬午以甘肅優
霑

上詣

大高殿行禮報謝 遣孚郡王奕譞詣

時應宮惠郡王奕詳詣

昭顯廟鎮國公奕謨詣

宣仁廟貝勒載澂詣

凝和廟拈香○甲申諭內閣景廉奏總兵不
能得力請開缺聽候查辦等語前有旨令將
巴里坤鎮總兵何瑄調赴左宗棠軍營察看
因景廉奏稱該總兵熟悉西疆情形准其暫
留本任茲據該都統奏何瑄近來精神頗敗
辦理城防頗形疏懈公事亦多廢弛派撥調

赴古城官兵推諉遷延尤屬不知緩急何瑄
著卽行開缺該總兵現有應在巴里坤候質
之案俟質訊明確後仍赴左宗棠軍營聽候
查辦○又諭前因常順等奏已革委參領維
魯普棍布羅壘等呈控統帶官達爾濟貪縱
營私當諭常順等卽將達爾濟剋扣軍餉各
情訊明定擬具奏茲據奏稱達爾濟在歸化
開鋪屢次運載貨物到營設法銷售私貨領
出餉銀稽延不發各官兵待餉既久始將各
項貨物派給分領折算重價抵作放餉並將
離營官兵口分仍行按月承領且有勒繳皮
張折價及私吞駝隻情事達爾濟剋扣兵餉
冒領虛支藉端漁利實屬罪有應得著卽革
職不准留營參領那楚克巴都瑪任聽達爾
濟役使擅自離營有乖職守著一併革職以
示懲儆至達爾濟領過餉銀十萬三千兩究
竟放過若干侵蝕若干豈可稍涉含混仍著
常順等徹底查究將侵吞餉銀若干責令如

數賠繳母任狡展○諭軍機大臣等景廉奏籌畫臺站事宜接濟馬隊來營俟到古城後查看糧運一摺關外軍務緊要景廉所調之吉林黑龍江官兵若不豫籌接濟必至貽誤軍行該都統請俟此項官兵行抵烏里雅蘇台後卽由烏城北臺徑送科布多再由科布多送至古城似較便捷卽著常順多布沁扎木楚托倫布保英遵照辦理以免中途阻滯至科布多迤南向設八臺直接古城漢三臺

該處前經奏撤三臺僅存五臺現在大兵由此經行深恐不能接替著托倫布保英卽飭蒙古部落將已撤之三臺照舊安設其古城漢三臺卽由景廉飭屬妥辦俾利通行科城新復舊設各臺著照景廉所議由軍需項下每年各幫貼銀一千兩以示體恤口北歸綏兩道應運景廉軍營米鈔雖陸續據報起解而到營者為數寥寥據該都統奏稱所運米鈔半在烏城各臺積壓人竊鼠耗往往一袋

僅存半袋猶復雜以糞土等語似此情形何以剔弊端而節經費著常順等轉飭各臺隨時稽查迅速按起運送毋許積壓並查明虧短數目設法辦理以昭覈實慶壽奏請飭烏城撥銀製造軍械等語巴里坤防務緊要軍械殘缺不堪必應趕緊修理前任領隊大臣伊勒屯奏撥烏城餉銀二萬兩僅解過四千兩不敷應用著常順等卽將未解之一萬六千兩迅速籌撥咨明慶壽派員迎提隨時添

造俾應急需將此由五百里各諭令知之○烏里雅蘇台蒙古參贊大臣多布沁扎木楚因病乞假以扎薩克圖汗扎薩克郡王車林端多布署烏里雅蘇台蒙古參贊大臣○烏里雅蘇台參贊大臣志剛因病解職賞內閣學士文奎副都統銜署烏里雅蘇台參贊大臣○甘肅巴里坤鎮總兵官何琯解任查辦賞已革甘肅提督成瑞三品頂帶署巴里坤鎮總兵官 乙酉諭內閣德英奏縷陳東省

地方情形請及時整頓一摺盛京為根本重地吉林黑龍江實為陪都藩籬自招墾荒地以來藏奸匿匪盜賊肆行亟應及時整頓以重邊防東省官兵向稱勇敢而黑龍江索倫愛曼騎射尤強近來餉項短絀殊不足以示體恤嗣後每歲應給官兵俸餉著戶部咨令指撥各省依限解清不准稍有帶欠其歷年積欠之餉並著催令陸續補解毋得日久拖延俾該將軍等得以隨時汰弱留強勤加操

練以期漸復舊觀至吉林黑龍江山場荒地原為旗丁游牧演獵之區現在良莠雜處往往有盜匪窩藏其間雖經德英將呼蘭等處開墾之事奏請停止而奸民土豪仍有承攬地畝轉售漁利之事著該省將軍再行認真嚴禁並著該部明定章程將訪獲鑽營地畝之攬頭照依土豪惡棍例從重懲辦並將使費銀錢追出充公其已經開墾之處該將軍等務將戶口編冊不時稽查毋許容留外匪

以清盜源東省馬賊橫行皆由兵役奸民勾結容隱所致前因綿宜及瑞聯等先後條陳辦法已諭令盛京將軍等嚴定章程實力籌辦德英所擬各節與前旨大略相同仍著該將軍府尹等督率所屬員弁認真緝捕毋得日久懈生黑龍江新設呼蘭理事同知管轄遼闊旗民雜處公事繁多德英因銓選之員經年始能履任請將此缺歸於奉天揀發人員內補用遇有同知缺出一面報部一面咨

奉天府府尹於揀發應升人員內遴員試署如果勝任出考題補三年任滿無過照邊俸期滿例調入內地升補等語係為邊地得人起見即著該部妥議具奏奉天旗民近年遷徙吉林黑龍江者竟有千餘戶之多是否因生計艱難謀生外出著該將軍轉飭所屬地方旗佐隨時稽查覈實辦理毋許無故遷移漫無限制○諭軍機大臣等德英奏東省現在情形密陳整頓事宜六條請旨辦理一摺

前五條已明降諭旨分別照准及交部議奏矣。後一條所稱該省地方遼闊處處與俄國毗連該國時有越界種地牧馬等事東省馬賊未靖深恐串通為患該將軍因庫款空虛請飭部撥銀兩豫為存儲以備緩急等語所陳不為無見惟現在各省撥解兵餉已覺籌措維艱部庫尤形支絀所有欠解該處俸餉已諭戶部查明咨催各該省迅解但使餉需稍裕則兵力自可防維此外如有必須豫為

籌備之事德英惟當酌度情形妥為布置約需款項若干即著奏明辦理將此諭令知之○以乾清門侍衛索布多爾扎布署正藍旗漢軍副都統（追予）江蘇各屬陣亡殉難營千總銜楊濤等紳民婦女一千九百一員名口分別旌卹如例○丙戌黑龍江將軍德英奏請將已革同知文祺開復永不敘用處分得旨該革員原參情節較重所請撤銷永不敘用字樣之處著不准行 戊子諭軍機大

臣等成祿奏陝回大股突竄出關情形危急一摺據稱東來大股賊匪約有萬餘悉竄出關自惠回堡至赤金連營數十里擾及白楊河屯莊後面並無追兵訊據獲賊供稱白彥虎等逆因肅逆馬四乞援率黨由扁都口西出至肅州塔爾灣一帶紮營馬四不放入城白彥虎遂傳知賊眾出口全到赤金意欲赴紅廟子等語前據左宗棠奏官軍襲破塔爾灣賊巢賊眾潰竄白彥虎已被槍傷其竄向

大軍灘黑山峽之賊人數不多似賊股漸已窮蹙此次成祿所奏則稱賊係全數出關勢甚猖獗情形不甚相符成祿所部本單豈能遏賊狂竄左宗棠當嚴檄追勦之師跟蹤進擊迅埽逆氛不得以驅賊出關遂為了事金順著懍遵疊次諭旨帶兵剋期西行接統成祿所部將此股竄匪悉數殲除毋得稍事遷延致成滋蔓將此由五百里各諭令知之○又諭前因富和奏榮全勒令蒙古報效安臺

等款當諭令該署將軍將所奏各節派員據實查明覆奏茲復據富和以榮全散放月餉改用俄票剋扣牟利並帶兵徧袒各情及捏造堂諭賞給官兵車腳銀兩自販私貨任意索價等事榮全當和同辦新疆軍務富和屢次曉曉瀆陳是否榮全任意妄為抑或富和意存攻訐亟應確查明晰秉公辦理著常順懍遵本月初一日諭旨確切查明並將此次所陳各節一併詳查據實覆奏毋稍徇隱原

摺片三件均著鈔給閱看將此諭令知之尋奏遵查榮全並無改放俄票捏造堂諭賞給官兵銀兩販貨索價等情至搶掠俄人物件及俄官截留軍械等事均係富和任內應辦之案其賞給扎薩克頂帶係為撫慰外夷起見奉到寄諭未經全錄給閱亦屬意在慎密尚無不合報聞予甘肅各屬陣亡殉難紳民婦女二百五十九名口分別旌卹如例○己丑諭軍機大臣等都興阿奏查明應修各

工援案懇請估修一摺盛京圍禁宗室覺羅之高牆空房等處年久坍塌經都興阿查明均屬應修自應趕緊修葺以昭嚴密著奕慶卽於本年夏秋閒派員前往勘估將高牆空房暨官兵看守房屋及周圍牆垣坍塌處所修理完整所需銀兩卽由盛京戶部庫存項下動支工竣覈實報銷將此各諭令知之○補行引見京察年至六十五歲以上人員得旨理藩院司務同安著以原品休致以本

年鄉試考試應開列試差人員於保和殿○以捐貲助賑賞浙江在籍道員胡光墉母金氏

御書扁額日勉善承榮○庚寅遣官祭

關帝廟諭軍機大臣等劉嶽昭今毓英奏官軍攻克雲州城池勦辦川滇邊界匪徒情形各一摺記名提督楊玉科等於克復順甯後進攻雲州力戰月餘先後斃賊甚多旋於四月初二日攻破城池逆酋悍賊悉數殲除

勦辦甚為出力現在雲州既克軍威愈振騰越等處之賊自必聞風膽落著劉嶽昭岑毓英督飭李維述等迅速攻勦力圖掃蕩一面飭楊玉科統軍繼進合力圍攻以期早日肅清其小猛統等處賊黨並著嚴飭官軍一律勦除毋任久踞川滇邊界游練勾結土匪郭心齋在仁富鄉等處聚眾滋事經昭通兵團會同川省防軍進勦當將首匪擒獲並斃餘黨數百名地方業已肅清辦理尚為迅速惟

川滇連界地方崇山密箐路徑紛歧賊黨此擎彼竄難保無漏網餘匪復行嘯聚著吳崇劉嶽昭岑毓英飭令該地方文武舉辦團練編查保甲隨時認真緝捕消患未萌不可稍涉大意此次在事出力文武員弁兵團著准其附入興義府城案內擇尤保奏毋許冒濫將此由五百里各諭令知之○以候補內閣學士崇綺為內閣學士兼禮部侍郎銜○以雲南疊次克復城池暨攻破賊巢出力加賞

提督楊玉科雲騎尉世職提督徐聯魁副將劉重慶潘文元一品封典遊擊岑應麟都司李鳳祥巴圖魯名號知府英文副將張潤等花翎守備萬繩武等藍翎餘加銜升敘有差○予雲南雲州陣亡遊擊伍起雲等祭葬世職加等 壬辰

上奉

慈禧端佑康頤皇太后

慈禧端佑康頤皇太后幸漱芳齋侍午膳○哈

密辦事大臣文麟奏烏魯木齊都統景廉所調哈密駐紮官兵可否全數留駐哈密得旨景廉咨調漢營官兵著准其撤回一半仍留一半作為哈密官兵 撥荊州駐防官兵五百五十名移補乍浦滿營缺額從署杭州將軍連成請也○撥神機營火箭一千枝馬洋槍三百桿工部火藥二萬斤解交烏魯木齊都統景廉軍營備用 癸巳諭軍機大臣等邵亨豫奏請飭催廣東迅撥協餉等語廣東

欠解陝西月餉及協撥之項共銀一百零四萬兩陝省需餉孔亟司庫支絀異常自應速籌撥濟以資軍食著瑞麟張兆棟督飭藩司無論何款趕緊撥銀數十萬兩交該省委員領解俾濟急需毋稍延宕將此由四百里各諭令知之○以侵吞餉項革前署福建臺灣鎮總兵官楊在元職以勾結會匪陝西遊擊劉徵武革職拏辦 乙未諭軍機大臣等景霖奏續修地盤官道請飭撥解銀兩一摺

據稱

普祥峪

普陀峪迤南添修地盤一座並修墊地盤官道等工續用經費銀一千九百四十五兩現在無款可籌請飭仍由直隸藩庫籌撥以清欠款等語著李鴻章飭令藩司趕緊如數籌撥毋稍延緩將此諭令知之○丙申諭軍機大臣等都興阿奏奉天拏獲盜夥據供有在熱河朝陽縣賄買大小籤假冒辦公拏賊為名

到處訛搶並豎立趙家溝太平社會黃旗進邊搶掠抗拒官兵請飭查辦等語奉省盜賊滋擾屢經拏辦未能淨絕根株乃熱河屬朝陽縣社會復屢有進邊騷擾情事該匪等膽敢賄買地方籤票豎立旗幟假冒辦公藉圖訛搶實屬不成事體亟應嚴行懲辦以儆兇頑著崇實立即查明認真拏辦務將首要各犯全行弋獲盡法處治並嚴飭各屬嗣後不准擅給籤票任意越邊以安地方而杜弊混都興阿亦應嚴飭帶隊各員並地方官合力按捕毋任此拏彼竄俾靖盜蹤原片著鈔給崇實閱看將此各諭令知之○追予江西軍營病故總兵官普承堯祭葬卹廕加等旌表割臂療親江蘇山陽縣候選從九品范汝琦○追予江蘇清江殉難陝西吏目單如珊妻胡氏旌表如例 丁酉諭內閣總理各國事務衙門奏住京各國使臣籲請覲見呈遞國書一摺現在齋有國書之住京各國使臣

著准其覲見。又諭前因革員多福請補防禦一缺。兵部文內有黏補痕跡。是否該部書吏與該革員串通舞弊。當諭兵部堂官及載遷等查明具奏。茲據載遷等奏。齎送兵部文書人劉秉林回時。將收照遺失。懷中挖出書信。遽行撕毀。多福之叔翼長熙昌及翼長瑞昌並有託投部文及託帶書信銀兩等事。多福情詞閃爍。取供亦屬支離。請解交刑部審訊等語。事關職官與書吏串通舞弊。亟應徹

底根究。已革防禦多福送文人劉秉林均著交刑部審訊。披甲福海書吏魯永泰著一併解部備質。翼長瑞昌熙昌均著聽候傳訊。兵部承辦書吏一併歸案審辦。景霖另片奏文內黏補痕跡。未能看出。自請議處等語。多福一案除載遷上年尚未到任。載燦在請假期內均無庸議。外。景霖著交部議處。綏遠城將軍定安奏遵籌甯夏軍情。提督張曜西行後。僅遇警信。即檄駐紮纏金之提督王鳳鳴

率隊馳擊。其纏金地方再由包頭沿河防兵內籌撥防守。現督臣左宗棠亦派提督譚拔萃過河扼紮。有此數軍。與甯夏旗兵聯絡。可資得力。報聞。○以騷擾臺站。摘吉林委參領貴慶頂帶。撤委銜下部嚴議。己亥諭內閣。載遷等奏請將擅押職官濫用非刑之廳官交部訊辦。一摺。據稱石門理事廳通判阿昌阿因筆帖式世興有姦拐使女情事。輒將世興拘禁。濫加刑拷。請交刑部訊辦等語。筆帖

式世興如有姦拐情事。自應稟明該管上司辦理。乃阿昌阿執行擅押刑拷。實屬乖謬。阿昌阿著先行革職。世興著先行解任。由載遷等咨照直隸總督委員將該員等一併解交刑部。確切訊明。按律懲辦。○諭軍機大臣等。吳棠奏被參屬員挾忿誣訐。請旨派員查辦。並鈔錄稟詞呈覽。一摺。前署通江縣知縣黎互熙。經吳棠以治理未諳。奏參降補。後旋遞臬呈內稱。撤任被參。由於不能餽送上司所

致又以該管知府張桐許為營求有與幕賓談壽齡往還書信為證並稱談壽齡隨幕入川濫邀保敘又牽敘已革同知劉愚稟詞臚列多款屬員於被叅後稟計上司意圖挾制此風斷不可長惟據所稟張桐與談壽齡為該員營求需索銀兩既有書信為據亟應確切根究談壽齡是否係吳棠幕友違例濫保亦難逃人耳目其餘各款虛實均應研究著魁玉按照稟內所指各情秉公確查據實具

奏不准稍涉徇隱原摺一件稟二件均著鈔給閱看將此諭令知之 庚子

孝恭仁皇后忌辰遣官祭

景陵 辛丑諭內閣前據左宗棠奏烏魯木齊提督成祿前在高臺苛派捐輸誣良為叛枉殺二百餘人並虛報勝仗籲請獎敘請飭廷臣議罪等語當經寄諭金順令其兼程出關接統成祿所部一面傳旨將成祿革職拏問遴派員弁押解來京嗣復據御史吳可讀奏

成祿所犯情罪重大請即從重懲辦本日據金順奏已將成祿傳旨革職拏問派員押解赴京等語已革提督成祿苛派濫殺情節極重著即解交刑部聽候治罪 諭軍機大臣等金順奏拏問成祿押解起程派員先往接辦該軍事務一摺金順於四月二十三日派員將成祿催赴肅州傳旨拏問押解起程已明降諭旨將該革員解交刑部治罪矣甘肅至京道路寫遠左宗棠當選派得力員弁協

同護解並飭沿途地方官小心遞解前進以期嚴密金順以肅州城圍喫緊尚未起程西行先派副都統明春前赴玉門一帶接辦該軍事務惟成祿所部必須金順迅往接統大加整頓方能得力且賊匪近又紛竄出關尤當隨時督隊截剿免致蔓延肅州軍務已諭左宗棠責成徐占彪勦辦金順著懍遵疊次諭旨剋期出關接統成祿所部埽蕩妖氛不得遲誤機宜致負委任至關外米糧缺乏兵

食維艱金順所部軍糧著左宗棠妥籌兼顧
檄令地方官設法採買轉運源源接濟以資
飽騰毋稍膜視將此由五百里各諭令知之
上以夏至祭

地於

方澤自是日始齋戒三日○壬寅諭內閣榮毓
等奏查明緊要工程請派大臣查勘一摺
泰陵更衣殿

昌西陵琉璃花門內地地面端順固倫公主園寢

享堂等處均有滲漏酥朽情形著派宜振前
往將應修各工敬謹查勘具奏另片奏東口
子門內石橋中間石塊沈陷河身淤塞著宜
振一併敬謹查勘奏明辦理○癸卯

上詣

雍和宮行禮齋宿 朝鮮國使臣李招弼等三
人於神武門外瞻觀 甲辰夏至祭

地於

方澤

上親詣行禮○詣

火神廟拈香 奉

慈安端裕康慶皇太后

慈禧端佑康頤皇太后幸漱芳齋侍午膳○乙

巳諭軍機大臣等豫師奏請飭催青海蒙古

王公俸餉並西甯經費銀兩一摺山西應解

青海蒙古王公俸餉及西甯經費雖經陸續

報解尚欠撥銀七萬六千四百兩該王公等

俸銀僅發至同治三年分止情形實屬苦累

若再不籌接濟殊非體恤外藩之道著鮑源

深督飭藩司無論如何為難趕緊如數籌解

不准稍涉遲延並不准絲毫帶欠將此由四

百里諭令知之 庫倫辦事大臣張廷岳等

奏商民捐輸充賞鈔斤可否賞給扁額得旨

著由張廷岳等照例給予急公好義扁額以

示獎勵○丙午以已革甘肅提督成瑞署烏

魯木齊提督 以甘肅巴里坤鎮遊擊陳升

恆護總兵官 丁未以故青海扎薩克頭等

台吉端多布那木扎勒孫丹巴襲職

大清穆宗繼天開運受中居正保大定功聖智
誠孝信敏恭寬毅皇帝實錄卷之三百五十二

大清穆宗繼天開運受中居正保大定功聖智
誠孝信敏恭寬毅皇帝實錄卷之三百五十三

[illegible]

咨覆該城軍需緊急。著戶部無論何款。先行籌撥銀數萬兩。剋期解交常順等。以應急需。並將前次議覆奎昌等請撥餉銀之處。迅即知照。至山東省欠解餉銀二十五萬兩。山西省欠解餉銀二萬五千兩。河南省欠解餉銀十六萬五千兩。著丁寶楨。鮑源深。錢鼎銘。督飭各該藩司。迅即如數撥解。毋再遲延。致有貽誤。將此由五百里各諭令知之。○以翰林院侍讀錫珍充日講起居注官。○以右春坊

右庶子崑岡為雲南鄉試正考官。翰林院編修王文在為副考官。內閣侍讀學士許庚身為貴州鄉試正考官。翰林院侍講黃體芳為副考官。○以烏里雅蘇台勦賊獲勝。賞四等台吉棟魯布花翎。○乙酉。考試應開列試差二品以下京堂各官於上書房。○辛亥。旌表守正捐軀江蘇阜甯縣民徐學東。繼妻蔡氏。○壬子。上幸瀛臺。○諭軍機大臣等。金順奏酌撥馬步

各營。親統出關。請飭左宗棠籌濟軍食。文麟奏肅州回匪。西竄出關。派兵防守哈密隘口。各一摺。現在肅州回匪陸續竄出關外。玉門安西俱有大股攻撲屯莊。哈密亦復喫重。金順自應懍遵前旨。迅速統帶馬步各隊。並成祿關外之軍。確探賊蹤。實力追剿。毋任紛竄。文麟所部兵力雖單。亦當酌派隊伍。與金順之軍分投夾擊。俾賊不至任意西竄。哈密各隘口防務亦可鬆動。該前將軍等務當協力

同心。勦除此股竄匪。以靖關外門戶。現在安西玉門蹂躪偏地。金順所需每月糧一千石。料三百石。自應於關內籌辦。左宗棠身任地方。呼應較靈。即著嚴飭甘肅肅州兩處地方官。先籌辦四箇軍軍食。並協濟車馬。運赴玉門屯儲。毋得稍有短絀。該前將軍亦不得專候軍食辦齊。方行出關。致誤戎機。肅州合圍已久。諒可不日攻拔。金順留防各軍。即著傳諭宋慶於抵肅城後。代為統攝。免致他虞。將

此由六百里各諭令知之。○綏遠城將軍定安奏病體仍未痊愈。懇請賞假回旗。得旨定安著再賞假三箇月調理。毋庸回旗。遇有軍務緊要事件。仍著照常經理。○日本國使臣副島種臣。俄羅斯國使臣倭良嘎哩。美利堅國使臣鏤斐迪。英吉利國使臣威妥瑪。法蘭西使臣臣熱福理。和蘭國使臣費果蓀。於紫光閣前瞻觀。○癸丑。復設山東兗州府泉河通判一缺。仍管泉源暨戴村壩工。從河東河

道總督喬松年請也。○甲寅。以鑲黃旗漢軍都統春佑兼署鑲白旗滿洲都統。○乙卯。諭內閣。錫祉等奏請飭嚴催欠交米石一摺。據稱直隸承德府屬各州縣欠交同治十一年分熱河兵米。現尚未據報交。請飭直隸總督嚴催等語。即著李鴻章嚴催該府州縣迅速買運交倉。以裕兵食。其前任代理平泉州知州金齡欠交米石。疊經飭令直隸總督嚴催。何以至今尚未補交。實屬不成事體。仍著李

鴻章查明嚴催。勒限如數補交。儻再不完繳。即著嚴參懲辦。○丙辰。

上詣

奉先殿

壽皇殿行禮。盛京將軍都興阿等奏。

永陵補栽樹株業經委員敬謹驗收。報聞。○戊午。以力守危城。予故四川候補知府董貽清於井研縣建立專祠。○己未。以內閣學士馬恩溥為福建鄉試正考官。翰林院編修張英

麟為副考官。通政使司副使夏家鎬為廣東鄉試正考官。翰林院檢討周冠為副考官。編修崔志道為廣西鄉試正考官。戶部主事陳毓秀為副考官。○庚申。諭軍機大臣等。榮全奏詳陳近日邊情。亟圖補救一摺。土爾扈特遊牧屢被哈薩克竊去馬匹。該蒙古未經報官。因認有原馬。即將哈薩克馬羣趕來作質。雖有不合。而俄官聽信哈薩克一面之詞。不問曲直。大肆搶掠。竟將貝子固山達等拘執。

赴伊實屬非理。榮全現已行文俄國查詢此事。即著催令該國迅速咨覆。詳悉具奏。此事榮全務當妥為辦理。毋任哈薩克倚勢妄行。以安蒙古。各處民團。榮全仍當設法鈐束。隨時招集安撫。俾為我用。以輔兵力。該署將軍現擬派員赴庫爾哈喇烏蘇一帶擇地安營訓練。保衛地方。即著實力舉行。不得有名無實。金順著懷遵疊次諭旨。迅速出關。與景廉之軍聯絡聲勢。相機進取。以靖邊疆。將此由

五百里各諭令知之。○予陝西軍營病故提督駱國志祭葬卹廕。謚勇肅。○撥神機營槍二百桿。鳥槍五百桿。矛二百桿。刀二百把。洋火藥一千斤。洋藥捲鉛子各四萬出。銅帽十六萬粒。工部火藥一萬斤。轟藥一百斤。鉛丸二十八萬出。火繩六千丈。解赴署伊犁將軍榮全軍營備用。○辛酉。諭軍機大臣等。李鶴年。王凱泰奏。江浙欠解閩省協餉過多。請旨飭催一摺。閩省各營兵餉。向賴鄰省協款。

濟用。江西省自同治元年起。至十二年止。共積欠協閩兵餉銀一百十四萬八千餘兩。浙江省自咸豐五年起。至同治十二年止。除暫緩十六萬兩外。共積欠協閩兵餉銀四十三萬兩。日久未解。閩省需餉甚急。自應速籌解濟。以應急需。著劉坤一。楊昌濬。迅飭各該藩司。即將應協閩省款項源源報解。俾資應用。毋稍稽遲。另片奏。閩省借撥善後黔餉。請飭四川迅解歸款等語。福建借撥善後黔餉。業

經解足二十萬之數。各省除解還外。四川尚欠銀二萬兩。著吳棠迅將所欠銀兩。速即解還閩省。以清款目。湖北省欠解銀三萬兩。業由該省徑解貴州。曾璧光於此項餉銀解到時。即收作閩省協黔餉銀。按數扣抵。以免轉轄。將此由六百里各諭令知之。○又諭金順奏肅州踞逆。屢撲城圍。經官軍擊勝一摺。此次肅城回匪。屢思攻撲城圍。經金順督率兵弁會同徐占彪。蔣東才各軍。疊次擊勦獲勝。

現在添築卡壘縮圍緊逼該逆屢敗之餘飛走路窮自不難一鼓攻拔即著左宗棠飭令徐占彪等軍迅克肅城毋再遲緩提督宋慶是否已抵肅州並著該大臣遵照前旨令其兼程前進以資統率現在關外情形極為喫肅城有徐占彪各軍足以攻拔堅城該前將軍務當懷遵疊次諭旨剋期出關毋得以肅城未克為詞遷延不進所調察哈爾馬一千匹本日已諭知額勒和布等迅速撥調計

到營尚需時日該前將軍更不可藉口馬匹未到稍有稽延致誤戎機肅城攻克後金順雖已出關其所統文武員弁曾著微勞准其擇尤酌保優予獎敘將此由六百里各諭令知之○予甘肅肅州陣亡參將陳占魁守備呂長泰千總王國慶驍騎校雙升祭葬世職加等○調察哈爾戰馬一千匹解赴前任烏里雅蘇台將軍金順軍營備用○壬戌上奉

慈安端裕康慶皇太后

慈禧端佑康頤皇太后幸漱芳齋侍午膳○諭

內閣楊昌濬奏革書具控犯書捏報病故改名蒙充請旨飭提審辦一摺據稱織造衙門革書韓溥華在將軍衙門控告革書孫錦前因犯案擬軍膽敢捏報病故更名孫同如復充外辦書吏侵冒工款十餘萬兩請飭督臣提案審辦等語犯書孫錦前因欺蒙作弊經織造德生奏請發往黑龍江充軍復經刑部議駁請令浙江巡撫訊供擬辦係遣軍未定之犯如果捏報病故改名蒙充冒銷侵蝕殊干法紀韓溥華承辦活計以假金蒙混經織造文治斥革押追亦難保無捏情誣告希圖牽涉本官情事至各省將軍向不管轄地方織造衙門事件將軍亦不應干預署杭州將軍連成於韓溥華具控時何以不卽知照楊昌濬查辦竟劄地方官緝拏迨該撫據李鶴年咨會行查始據該署將軍咨覆殊不可解

所有此案人證卷宗。著楊昌濬卽行派員解送刑部。確切審訊。按律懲辦。○以甘肅鎮番縣城解圍出力。賞總兵官王仁和一品封典。知州張春生。都司傅銘等花翎。同知魏高騫等藍翎。餘加銜升敘有差。○癸亥。命署杭州將軍連成來京。以杭州副都統善慶為將軍。○追予江南江甯殉難布政使祁宿藻謚文節。知縣劉同纓謚武烈。○予江蘇故提督張光泰祭葬卹廕。如軍營病故例。○甲子。命兵

部左侍郎胡瑞澂提督浙江學政。○以正白旗滿洲護軍參領濟祿為杭州副都統。○乙丑。諭內閣載遷等奏直隸藩庫撥款窒礙。請變通辦理一摺。直隸藩庫應撥解載遷等銀一萬兩。尚欠撥銀五千兩。未能卽行撥給。現在載遷等應發各款需用孔亟。仍著直隸總督督飭藩司。將前項欠撥銀兩如數籌撥。所有此次撥銀一萬兩。准在司庫地糧項下歸入直隸恭辦大差正款。先行開除。其遵化等

州縣應歸永濟庫欠款銀兩。仍由該督飭令藩司催提歸庫。以清款目。另片奏請飭催各衙門夏季餉銀等語。遵化薊州豐潤玉田四州縣領解載遷等所屬各衙門春餉。均屬遲延。薊州更為延緩。著直隸總督飭令藩司。詳查發給各州縣本屆夏餉日期。嚴催該州縣迅速解送。並查明薊州遲誤春餉。如有那移情弊。卽行從嚴叅辦。○諭軍機大臣等。景廉奏帶隊馳赴古城。查看前敵情形。並請飭臺

站籌備駝馬運解礮位軍火各摺片。景廉已於四月間馳抵古城。卽赴濟木薩地方察看營壘。該處地當扼要。且南山一帶。與烏魯木齊吐魯番路路可通。烏屬回逆。與安集延時合時離。情形叵測。景廉惟當督飭各營官軍認真訓練。勤加偵探。毋稍疏虞。該都統擬於木壘河一帶。分紮兩營。聯絡聲勢。以防賊匪繞越我軍後路。阻絕糧運。卽著景廉就現有兵力。酌度情形。妥為布置。以期穩慎進取。景

廉兵力尚單。所有綏遠城前撥之大同官兵。迄今尚未拔隊。該軍應需行餉。業由景廉咨催陝西河南。迅將銀五萬五千兩。埽數解綏。並飛咨山東。於欠解新疆及景廉專協各款內。迅速籌撥銀四萬兩。運解綏城。以為該軍起程之費。即著定安妥為布置。飭令此項官兵。剋日啟行。速赴景廉軍營。以資防剿。成祿所部吉林黑龍江馬隊。並李天和三營。迄無西進消息。成祿所帶各隊。已歸金順接統。前

經疊次諭令該前將軍迅速出關。與景廉一軍聯絡聲勢。該處事機緊要。著金順懍遵疊次諭旨。剋期出關。不准稍涉遲延。致滋貽誤。其吉林黑龍江馬隊。並李天和三營。即著金順飭令迅速馳赴景廉軍營。助剿毋稍延緩。金順出關後。兵力自厚。能否再行添撥步隊數營。前往景廉軍營。以壯聲威之處。著該前將軍妥籌辦理。黎獻由湖北購辦礮位軍火等項。業經分起起程。由河南山西歸化城取

道蒙古前進。著定安於此項軍火經過綏遠城時。迅即撥給一半官駝。俾資運解。其一半即著派委妥幹之員。會同黎獻就近設法雇覓商駝。一併送至濟斯洪果爾臺。運解到營。以期迅速。並著額勒和布奎昌轉飭蒙古各軍臺一體支給駝馬應用。俾免阻滯。將此由六百里各諭令知之。○山東巡撫丁寶楨奏按察使唐賡請於陞見後回旗補制。得旨長唐著俟來京陞見後。賞假百日。在旗補制。○

以前任禮部左侍郎殷兆鏞署兵部左侍郎。戶部左侍郎潘祖蔭兼署吏部左侍郎。○以營伍廢弛。革山東副將劉蔣華職。○丙寅。諭內閣甘肅甯夏鎮總兵李佑清。湖南鹽法道白恩佑。貴州貴西道奇克慎。浙江金華府知府徐寶治。均著開缺送部引見。○諭軍機大臣等。袁保恆奏關外需餉甚急。請飭催各省迅速撥解一摺。據稱成祿一軍協餉。自上年八月間奉撥四川每月銀四萬兩。湖北每月

銀二萬兩。陝西每月銀一萬兩。迄今四川僅兩次解到銀五萬兩。又現據報解銀二萬兩。湖北僅五次解到銀四萬五千兩。又現據報解銀一萬兩。陝西僅解過銀四千兩。所解之數與所撥之數計之。尚不及十分之二。不敷甚鉅。請飭迅速籌撥等語。成祿一軍現歸金順接統。交替之際。撫馭既難。需餉尤急。關外程途險遠。採購轉運。在在維艱。尤不可稍有缺乏。著吳棠、李瀚章、郭柏蔭、邵亨豫各將欠

解該軍協餉迅速籌撥大批。先行解往。並將以後月協之款如數撥解。源源接濟。毋稍延緩。將此由六百里各諭令知之。○命陝西按察使英奎來京。以福建鹽法道裕寬為陝西按察使。○丁卯諭軍機大臣等。左宗棠豫師奏收復循化廳城。籌辦善後事宜。左宗棠奏圍攻肅城。踞逆獲勝。並金順全軍未能迅速出關情形。各摺。循化廳城既經收復。惟收輯難民甚多。一切善後事宜。亟應次第興辦。著

左宗棠豫師飭令該地方官認真經理。妥為撫綏。以期一勞永逸。左宗棠所奏三四月間官軍圍攻肅州。踞匪疊獲勝仗。與金順前奏情形大略相同。現在宋慶所部提督蔣東才等營亦已行抵肅州。偏城築壘。各營鎖圍嚴密。賊膽已寒。第窮極思竄。亦在意中。著左宗棠飭令徐占彪、宋慶督率各營實力圍剿。務將此股賊匪就地殲除。毋得縱令他竄。致貽後患。至關外用兵。糧石車駝。自應豫為籌

畫。方可師行無阻。自肅州一帶被賊蹂躪以後。籌辦一切均屬不易。此種情形。朝廷亦所深悉。但以西路軍情緊急。未便置為後圖。且景廉現已率隊進抵古城。後路尤須有兵策應。方可聯絡聲勢。節節進規。是以疊次嚴諭金順。剋期出關。以期迅赴戎機。茲據左宗棠奏稱。現在新穀未收。軍糧缺乏。駱駝亦值歇廠怯熱之時。不能負重。若展遲兩月。於八月間拔隊西行。局勢似較穩慎等語。所籌亦係

實情惟白彥虎賊股。現又竄擾關外。安敦王等處情形緊急。盼兵尤切。金順仍當趕緊部署。統軍出關相機勦辦。如一時實因糧運車駝未能應用。或派撥數營先行進發。以資接應之處。著金順酌度情形。妥籌辦理。金順需用糧石車駝等項。仍著左宗棠飭令該地方官速為豫備。毋稍延誤。將此由五百里各諭令知之。○以前任陝西漢中鎮總兵官伍維壽為甘肅甯夏鎮總兵官。○戊辰諭內閣廣

科奏拏獲偷竊銅絲幪網人犯。請旨辦理一摺。據稱本月二十日。午門直班護軍參領倭什渾盤獲偷竊銅絲幪網人犯王洸華。供出同夥窩主李三等。復經步軍校慶奎等帶同王洸華將夥犯李三拏獲等語。王洸華、李三均著交刑部嚴行審訊。按律懲辦。未獲之楊三、金大、盧大等犯。著步軍統領衙門順天府五城一體嚴拏。務獲究辦。○以圖謝圖汗親王車林多爾濟署烏里雅蘇台蒙古參贊大

臣以甘肅甯夏等處勦辦回匪出力。賞副都統薩凌阿一品封典。提督春福副將劉定來參將司世道張宜獻。由利豐李鳴鑾。唐洪志。劉永慶。遊擊周國佩。金孔輝。王天才。都司張寶林。孫希貴。黃均萬。王春發。張有田。譚金松。張發祥。黃餘慶。印士魁。袁得高。王永昇。段文彬。李松。張志德。楊永高。周宏泰。羅得勝。姚在明。張清和。佐領德羣。馬亮勝。格防。禦托克托布。春陞。慶福。全成。德克吉善。駙騎校額爾

精佈。邁通阿。守備李代興。王宏義。王鴻發。門得陞。胡兆棠。易占魁。蔡有發。黃占彪。張萬福。范長發。千總宋立勳。巴圖魯名號都司李恆發。等花翎守備梁嘉樂等。藍翎餘加銜升敘有差。○以甘肅甯夏防勦回匪。暨辦糧出力。賞護將軍副都統豐紳頭品頂帶道員陶斯咏二品封典。予副都統謙禧優敘。○己巳兵部奏遵議駭擾臺站參領貴慶處分得旨。貴慶著卽行革職。免其開世職之缺。准留軍營

效力○以協辦大學士刑部尚書全慶署稽察欽奉上諭事件處○以翰林院侍講學士鍾寶華為四川鄉試正考官編修張之洞為副考官陳翼為湖南鄉試正考官檢討楊泰亨為副考官○旌表夫亡殉節湖南在籍主事吳琳妻徐氏○庚午遣官祭

火神廟○諭軍機大臣等前因黔省餉需奇絀諭令各該省督撫無論何款趕緊籌撥嗣後諭令四川等省各撥銀五萬兩剋日解黔

茲據曾璧光周達武奏稱各省協餉雖據陸續報解而所欠之項為數甚鉅開單呈覽請飭迅解等語黔省需餉甚迫亟應速籌接濟以拯飢軍況該省上下游雖就肅清尚有興義等屬餘匪未淨現正勦辦喫緊尤須籌撥鉅款方免停兵待餉之虞著瑞麟李宗羲李鶴年李瀚章張樹聲楊昌濬王凱泰于寶楨劉坤一郭柏蔭王文韶張兆棟速將所欠協餉專餉按照單開剋期如數撥解以濟要需

毋再延緩原單著分別鈔給閱看將此由五百里各諭令知之○以太常寺卿阿昌阿為內閣學士兼禮部侍郎銜○以記名提督程文炳為江西九江鎮總兵官○以貴州克復清平等城並攻拔賊巢出力賞總兵官陳玉堃一品封典總兵官左啟龍譚金魁朱達雄鄧少雲黃鶴生譚定光黎順廉副將鄧德俊劉復禮文益照顏炳文參將馬占奎洋將來士尼為能巴圖魯名號知府許大綸參將向

忠等花翎知州謝泰階等藍翎餘加銜升敘有差○以貴州安南縣境肅清暨克復貞豐州城出力賞提督羅長春一品封典總兵官劉同升楊友益副將黃雲超通判陳昌言巴圖魯名號在籍郎中蔣斯崧都司楊定邦等花翎同知曾永曙等藍翎餘加銜升敘有差○辛未以驗收海運漕糧完竣予倉場侍郎畢道遠議敘○壬申諭內閣英翰奏請將擅設釐捐之知縣懲處一摺安徽甯國縣知縣

張善述稟請設卡抽釐。經該撫嚴批飭禁。張善述不候批示。擅行開辦。迨將該員撤任查辦。始行停撤。雖無侵吞情事。究屬藉端科斂。辦理荒謬。張善述著交部嚴加議處。以示懲儆。另片奏請將才不勝任之知府降補等語。候補知府梅錦源。貌似有才。心實巧滑。著以府經歷縣丞降補。○癸酉。諭內閣。劉長佑奏。特參庸劣不職各員。請旨革職一摺。廣西藤縣知縣李湘南。人甚昏謬。辦事顛預。委用知

縣程紳。操守不潔。士論譁然。泗城府經歷鄭三珠。險詐不馴。聲名惡劣。西隆州州判徐俊舉。止乖謬。不洽輿情。試用州同林廷選。人本平庸。且好滋事。試用州同王宏燾。巧於鑽幹。聲名平常。懷遠縣梅寨巡檢張鴻達。藉事需索。擾累地方。委用巡檢徐德升。任性妄為。官聲甚劣。委用典史鄒行貴。心術詐偽。辦事荒唐。均著卽行革職。以肅官方。○乙亥。諭軍機大臣等。文麟奏大股陝回攻撲敦煌縣城。並

哈密回王呈請禁糧出境。慶壽奏。東路逆匪出竄。布置城防各一摺。據文麟奏稱。探聞陝回於四月間竄撲敦煌。約有萬餘。攻陷新店子一帶屯莊。並圍攻縣城。道路梗塞。文報不通等語。逆匪紛竄關外。勢甚披猖。現在賊蹤既擾及敦煌。哈密東路甚形喫重。馬蓮井防軍單薄。文麟務當添派兵勇。擇要駐紮。聯絡防剿。力杜西竄之路。所有派援敦煌之軍。並著飭令迅速前往。相機策應。賊匪有欲竄入

敦煌山內。前赴西路之說。巴里坤城防亦屬緊要。著慶壽酌募得力勇丁。認真訓練。將防守事宜。布為布置。毋稍大意。前據左宗棠奏。金順一軍。因籌辦軍糧。駝隻未能剋日啟行。業經諭令金順趕緊部署出關。或派撥數營先行進發。以資接濟。現在關外賊勢蔓延。望援甚切。該軍尤宜豫為料理。早日出關。以期迅掃逆氛。成祿舊部各營。前據金順奏稱。已派明春前赴玉門一帶接統。並著飭令妥為

整頓。遇賊卽擊。迅赴戎機。據文麟奏稱。回王邁哈默特等以哈密產糧。僅足供本城兵民之食。呈請禁止販賣出境等語。自為慮及乏食起見。惟現在景廉進紮古城。後路糧運。必須源源接濟。巴里坤亦係瘠苦之區。所產糧石無多。尤非安敦玉一帶可比。文麟仍當酌度情形。妥籌兼顧。毋稍膜視。其有奸商私販出境。希圖牟利。或有暗中接濟賊匪等情。自當明白曉諭。設法禁止。但不可概行遏糴。致

誤軍糈。將此由五百里諭知左宗棠。金順文麟並傳諭慶壽知之。○又諭榮全奏征兵途次截留。請飭催速進。並探聞賊情各摺片。前因榮全奏調杜嘎爾軍營馬隊。當諭該副都統檄飭福珠哩一軍剋日進發。馳赴榮全軍營。其黑龍江官兵。並著接續前進。茲據榮全奏福珠哩所部。共吉林黑龍江官兵三百八十餘員名。內黑龍江馬隊一百八十餘員名。現經常順全數截留。僅飭吉林一隊前進。該

處兵力甚單。請飭催截留征兵速進等語。現在纏頭萬餘有由。沙山子竄赴西湖之信。是庫爾喀喇烏蘇一帶軍情甚迫。榮全所部過單不敷布置。所有烏城截留之黑龍江馬隊。著常順車林多爾濟。仍飭併歸福珠哩統帶。剋日撥赴榮全軍營。以資防勦。沙山子等處現在回情。若何榮全當就現有兵力妥為防範。毋稍疏虞。將此由五百里各諭令知之。

大清穆宗繼天開運受中居正保大定功聖智誠孝信敏恭寬毅皇帝實錄卷之三百五十三

大清穆宗繼天開運受中居正保大定功聖智
誠孝信敏恭寬毅皇帝實錄卷之三百五十四

聖德恭親王等奏為恭摺仰祈聖鑒事竊臣等伏以皇上聖德純備克膺天授臣等忝列近侍每當侍從之時無不感慕皇上之聖德而臣等亦不敢自安臣等伏乞皇上聖鑒訓示謹奏

同治十二年癸酉閏六月丁丑朔

上詣鍾粹宮問

慈安端裕康慶皇太后安長春宮問

慈禧端佑康頤皇太后安至丙午皆如之○奉

慈安端裕康慶皇太后

慈禧端佑康頤皇太后幸漱芳齋侍午膳○辛

巳諭內閣都察院奏廣東紳士翰林院編修

潘衍桐等呈稱原任湖北德安府知府易容

之於咸豐四年間在德安府任內守城禦賊

力竭殉難懇請予諡等語著禮部議奏另片

奏殉節人員應不准由同鄉京官呈請予諡
等語嗣後各省殉難官員果係死事慘烈者
准由該處紳民呈請各該督撫及都察院衙
門查覈具奏不准再由同鄉京官具呈聲請
以昭覈實○追予廣西思恩陣亡知縣高廷
祉諡壯節○壬午諭內閣榮毓等奏請派員
查勘要工一摺

奏東陵神廚庫

昌陵明樓等處均有滲漏情形著派訥仁前往

將應修各工敬謹查勘具奏另片奏

陵寢各處樹株被風情形開單呈覽等語著訥

仁一併查勘具奏○又諭御史鄧慶麟奏奉

天吉林積案甚多請飭迅速完結一摺據稱

奉天吉林二省訟獄繁多該地方官並不認

真判斷逐件申詳現在積案累累亟應清理

等語各直省詞訟案件自應隨時審結以免

株累無辜若如該御史所奏該二省案牘積

壓以致各廳州縣獄中人犯統計不下數千

殊屬不成事體著盛京將軍刑部侍郎奉天府府尹吉林將軍遼派幹練之員分赴各屬會同地方官迅將積年之案逐起查明開具清冊據實申報即行秉公審訊勒限完結如有舉報不實逾限不完以及貪賄徇縱情事即著嚴行叅辦並將原任直隸總督曾國藩奏定清訟事宜十條酌量照辦以清庶獄至地方官審理案件依限完結本係職分所當為若於結案時輒行隨摺請獎未免冒濫其

委員資斧及招解申詳等費事屬細微各該省自有舊章可循至從前積壓案件及查叅遲延例有應得處分豈可概行寬免該御史所奏均毋庸議○甲申諭內閣前據軍機大臣六部九卿會議喬松年文彬丁寶楨並御史游百川所奏籌辦黃運兩河情形當經諭令李鴻章妥籌辦法據實詳細具奏茲據奏稱銅瓦廂決口後舊河身淤墊過高歲久乾隄無從修治勢難挽復准徐故道且於漕運

無甚裨益至借黃濟運築隄束水工程均無把握與導衛濟運之法同一難行各等語所奏頗為詳盡河流既難挽之使南而利運又別無長策李鴻章請仍由海道轉運令各督撫酌提本色若干運滬由海船解津其餘仍照章折解以省運費並隨時指撥漕折銀兩採買接濟著戶部通盤籌畫妥議具奏河流趨重山東自應增立隄防著丁寶楨酌度形勢將張秋利津一帶舊有民埝加培堅固以

資捍衛其侯家林決口現雖堵築合龍仍恐民埝不能久恃並著該撫於秋汛後詳悉勘估酌籌款項將侯家林上下民埝仿照官隄辦法一律加高培厚設法守護沿河各州縣民人田地久被淹沒情殊可憫即著查明分別奏請蠲緩錢糧並將海口鹽場商運各事宜酌量變通辦理以示體恤至銅瓦廂決口以下蘭儀東明一帶地勢平行不可無遠隄以防泛濫著喬松年就近察看應如何量築

陟塏以資保護卽行悉心籌辦准徐故道洄出舊河身民間多有占種該督所請酌議升科之處著江蘇河南山東各督撫體察情形妥籌具奏另片奏請停止河運採買糧石推廣海運等語著戶部議奏○又諭都興阿奏邊地緊要請飭委前任同知署理一招丁憂前任奉天昌圖廳同知張鼎鏞例應守制惟據該將軍奏稱該員前在昌圖廳任內緝捕勤能民情愛戴現在邊地亟宜整頓接替乏

人張鼎鏞卽著准其暫委署理昌圖廳同知以資得力他省不得援以為例○乙酉諭軍機大臣等定安奏籌辦轉運新疆軍火餉糈請飭籌撥款項一摺歸化城迤北蘇木六臺站向來豫備烏科兩城轉運差使刻下新疆軍務方殷軍火餉糈轉運絡繹該處臺站經費支絀亟應籌措以備要需著張樹聲卽行籌撥銀二萬兩迅卽委員解至綏遠城俾資應用毋稍遲誤將此由五百里諭令知之○

吏部議覆黑龍江將軍德英奏呼蘭理事同知作為題調要缺於奉天揀發應升人員內遴署請補並照邊俸例三年報滿應如所請辦理從之○丙戌諭內閣原任大學士朱鳳標老成端謹學問優長由翰林洊擢正卿疊司文柄朕御極後命充上書房總師傅簡任綸扉管理部務均能恪恭將事克稱厥職上年患病疊經賞假調理嗣因固請門缺准予致仕賞食全俸方冀調養就痊遐齡永享遽

聞溘逝悼惜殊深著加恩追贈太子太保銜賞給陀羅經被派肅親王隆懃帶領侍衛十員卽日前往奠醊所有任內一切處分悉予開復應得卹典該衙門察例具奏伊子主事朱其煊著俟服闋後以工部郎中遇缺卽補伊孫監生朱有基著賞給舉人一體會試用示眷念耆臣至意尋予祭葬諡文端○又諭劉嶽昭岑毓英奏官軍攻克騰越廳城並各處賊巢雲南全省肅清一摺覽奏實深欣慰

雲南自雲州克復後提督和耀曾督軍進攻小猛統本年四月十五六等日該逆連次出撲疊經官軍擊敗生擒首逆偽大將軍馬應紅等復乘勝由寨後禮拜寺攻入殲賊多名當將小猛攻克各軍進攻勝越廳城三月初三初七等日先後攻克烏土寨馬家村堅巢並將城外賊營木城碉樓概行掃蕩直薄城下李維述等督軍四面合圍開挖地道五月初三日夜間轟陷城垣十餘處各軍蟻附而進該逆紛紛潰逃官軍內外夾擊殲除偽大司強馬汰廉等首從二千餘賊當將勝越廳城克復全省一律肅清仍著劉嶽昭岑毓英督飭各軍將餘匪悉數剿滅務絕根株滇省逆匪自咸豐六年倡亂以來攻陷城邑荼毒生民十有八載上年大理克復巨憝伏誅後其餘黨猶敢分踞順甯等處負隅死抗此次經劉嶽昭岑毓英等分飭各軍以次攻拔各該將士同心敵愾迅速厥功深堪嘉尚雲

南巡撫岑毓英親臨前敵調度有方用能肅清全省著賞加太子少保銜該撫前經賞給騎都尉世職著加恩改為一等輕車都尉世職雲貴總督劉嶽昭籌備戰守克竟全功著賞穿黃馬褂雲南開化鎮總兵楊玉科戰功卓著前經賞給騎都尉世職著加恩改為一等輕車都尉世職總兵李維述提督段瑞梅蔣宗漢徐聯魁均著賞給雲騎尉世職○又諭雲南自軍興以來迄今十有八年郡縣城

池大半被賊蹂躪小民顛沛流離深堪矜憫現在地方甫就肅清流亡未集若將積欠錢糧照常徵收民力益形拮据著加恩將同治十一年以前民欠錢糧概行豁免其本年應徵錢糧著該督撫督飭地方官認真清查分別荒熟地畝酌量徵收成數奏明辦理該省前因軍務緊要調派各屬鄉勇協同官軍助剿抽收釐穀接濟軍糧閭閻不無苦累並著自本年以後永遠停止以紓民力該督撫卽

刊刻謄黃偏行曉諭務使實惠均霑毋使吏胥舞弊用副朕軫念民艱至意○諭軍機大臣等劉嶽昭岑毓英奏官軍攻克騰越廳城及小猛統等處賊巢一摺雲南回匪之亂歷時十有八年自上年冬間攻克大理府城後節節進剿迤西賊巢次第掃蕩現在騰越既克全省一律肅清覽奏實深欣慰滇省久被賊擾民生困苦茲幸羣匪廓清亟應慎選牧令整飭吏治加意撫綏俾得各安生業其有

著名賊黨漏網伏匿者仍當嚴密搜捕以絕根株該省餉項本形支絀岑毓英另片奏稱擬將粵勇先行遣撤其餘各營俟由騰越拔回分別撤卽卽著該撫妥為辦理以節餉需並督飭管帶各員嚴加約束毋任滋生事端又據奏前署騰越鎮總兵明慶前署保山縣知縣鮑虞均因失守城池久陷賊中現在先後逃出等語該員等於城陷後覘顏苟活是否甘心從逆抑實係被賊拘留所供各情有

無捏飾著劉嶽昭岑毓英確切查明將該員等應得罪名定擬具奏將此由六百里各諭令知之尋岑毓英奏遵查明慶鮑虞均因力竭城陷受傷被拘並無聞警先逃及甘心從逆情事應照例量減請發往軍臺效力下部議從之○又諭劉嶽昭岑毓英奏滇省軍務肅清善後經費孔亟請飭催各省協餉一摺據稱廣東等省奉撥協滇新餉自同治八年至今共欠四百四十餘萬兩現在該省軍務

肅清所有補發兵勇欠餉籌辦善後各事宜在在需款請飭迅速籌撥等語著瑞麟張兆棟吳棠劉坤一楊昌濬李宗羲張樹聲李瀚章王文韶郭柏蔭督飭藩司將各該省積欠滇省新餉無論何款先行迅速籌撥一半俟滇省各將領派弁持文到時卽行照數給發以濟要需其餘應解之項務於年內掃數解清毋稍帶欠滇省此時雖已肅清而各營欠餉尚多兵勇口糧等項未能遽行停止各該

省應撥月餉仍著照常撥解俾資接濟不得稍涉推諉將此由五百里各諭令知之○又諭曾壁光周達武奏新城防勇索餉滋事現經全數殄滅一摺本年四月間駐防新城之經左新前兩營哨長什長丁發桂等同勇丁五六百人鼓譟索餉由外城進攻內城分黨往攻興義府城官軍分路勦辦將逆首丁發桂楊得城殲斃並將陶甫承何玉亭黎正關先後擒獲餘匪無一漏網現在興義等處是

否業已安靖著曾壁光等妥為彈壓尤宜加意拊循黔省上下游隨處皆有防軍無軍不有欠餉萬一相率效尤殊屬不成事體曾壁光周達武務當先事豫防隨時安撫毋令再滋事端將此由六百里諭知曾壁光並傳諭周達武知之○又諭曾壁光周達武奏請飭催各省欠餉以維危局等語據稱楚黔各營勇丁欠餉甚鉅勢皆迫不及待現值新城防勇索餉滋事之後必須速籌鉅款庶免再生

枝節所奏自係實在情形曾壁光等請於四川所欠的餉先撥銀五十萬兩山東福建江西廣東江蘇浙江湖北於欠餉內每省各先撥銀十五萬兩著各該督撫無論何款照數籌撥務於一月內飛速解黔以濟眉急黔省甫經平定若因餉需不繼致營勇紛紛譟釀成事端後患何可勝言諒各該督撫素顧大局必能力籌接濟也將此由五百里各諭令知之以克復雲南騰越廳城全省肅清

賞提督楊國發總兵官劉興張宗久張士進李應舉呂鎮南陸純剛夏毓秀副將馬青雲一品封典提督馬如龍張保和何秀林吳永安和耀曾總兵官馬忠黃馬褂道員向邦倬倪懋禮蕭德揆知府趙子驤馬駒良陳泰崐副將錢之福參將魏春侯應賢遊擊寇文通王永齡都司魯國棟李杞材雷躍龍熊明袁善馬雙元孫毓張聯元何天祥農得勝徐天寶和汝珍李映和守備李珍國王誠趙培元

何儒珍吳自綱何金巴圖魯名號知府賈鐸副將和迷廷等花翎千總葛蔚等藍翎餘加街升敘開復有差子陣亡副將張漢威等二十八員祭葬世職加等○以籌備雲南軍需予前任成都將軍崇實四川總督吳棠兩廣總督瑞麟暨江蘇江西浙江湖北湖南各督撫藩司並雲南道員韓錦雲等優敘賞布政使宋廷春按察使程誠頭品頂帶以貴州新城殄除叛勇賞總兵官熊尚志副將黎順廉遊擊孫福燦把總謝正明巴圖魯名號外委湯縉臣等藍翎餘升敘開復有差革疏防滋事提督游宗翠黃宗耀參將周振楠職永不敘用贈陣亡署縣丞知州楊見龍知府銜千總陳國忠都司銜從九品李潤芳州同銜均祭葬世職加等予貴州新城遇害道員周康祿祭葬世職如二品官以諡壯節交國史館立傳於死事地方暨原籍建立專祠革救援不力副將劉百魁職永不敘用追予

雲南緬甯合門殉難副將魁昌祭葬世職加等建專祠眷屬旌卹如例一併附祀陣亡知州吳景蘇把總何懷清楊玉成宣撫使罕恩澤祭葬世職加等與故知府汪堃均附祀魁昌專祠追予雲南大理殉難都司和鑑妻趙氏旌表如例並建和鑑暨趙氏專祠○予雲南永北殉難都司丁奉章祭葬世職加等妻楊氏殉節旌表如例丁亥追予江蘇各屬陣亡殉難紳民婦女一千九百三名口分別旌卹如例戊子以翰林院侍講學士烏拉喜崇阿為江西鄉試正考官檢討張道淵為副考官侍讀徐致祥為浙江鄉試正考官侍讀寶廷為副考官編修解煜為湖北鄉試正考官陝西道御史吳鳳藻為副考官○己丑諭內閣御史沈淮奏部員貪婪不職請飭查辦一摺據稱風聞戶部司員楊鴻典有攬權權納賄舞弊作弊情事請飭戶部查奏等語戶部司員楊鴻典既據該御史奏稱有攬權

納賄等項重情卽著先行解任交刑部審訊
並著刑部調取該員經手案件秉公確查儻
有營私舞弊情事卽著據實奏照例懲辦
○庚寅禮部以

慈安端裕康慶皇太后萬壽禮節請得旨是照
例行禮奉

慈安端裕康慶皇太后懿旨今年停止筵宴其
在外公主福晉命婦進內行禮之處並著停
止○辛卯

上奉

慈安端裕康慶皇太后

慈禧端佑康頤皇太后幸漱芳齋侍午膳○癸

巳以神靈顯應頒陝西耀州

觀音大士院

御書扁額曰宣慈昭佑○甲午以京畿久雨未

晴

上詣

大高殿祈禱行禮○遣惇親王奕誼詣

時應宮恭親王奕訢詣
昭顯廟醇親王奕譞詣
宣仁廟孚郡王奕誥詣

凝和廟拈香○丙申諭內閣御史許廷桂奏
請飭戶部慎選司員承辦部務一摺據稱軍
務漸就肅清各省徵收款項亟宜規復舊制
軍需報銷亦應認真稽覈請飭遴選司員經
理等語所奏係為剔除弊端起見著該部堂
官每司掄選諳練公事者數員將各省現行

之畝捐津貼釐捐及徵收丁漕違制者酌度
情形次第奏請豁除以蘇民困其軍需報銷
各款並著慎選廉謹之員總司其事凡有不
遵定例捏造章程希圖冒濫者分別駁斥如
查有蒙混覈銷等弊卽行據實嚴參毋稍寬
縱○戊戌以都察院左副都御史劉有銘為
江南鄉試正考官翰林院編修黃自元為副
考官吳寶恕為陝西鄉試正考官潘衍桐為
副考官○己亥派刑部右侍郎廣壽馳往奉

天審辦案件○以署兵部左侍郎殷兆鏞兼署工部左侍郎○旌表守正捐軀直隸獻縣民李得欽女強姐○庚子諭軍機大臣等豐紳謙禧奏甯夏防務緊要請飭晉省補撥餉銀並請籌撥火藥各摺片甯夏滿營需餉甚亟前經諭令鮑源深迅籌撥銀五萬兩以應急需現在該處防務正殷餉項愈形支絀鮑源深僅報解銀一萬兩實屬不敷支用著鮑源深飭令藩司迅將未撥銀四萬兩統籌齊

備撥交甯夏委員領解回營俾資應用該城需用軍火甚急並著鮑源深即行籌撥乾潔火藥一萬斤鉛丸一萬斤火繩一萬大運解歸綏道庫存儲以備該城派員領取將此由四百里諭令知之○辛丑諭內閣前因都察院奏殉節人員應不准由同鄉京官呈請予謚當經降旨令該處紳民呈請各該督撫及都察院衙門查覈具奏毋庸由同鄉官具呈聲請因思易名之典所以褒卹大員其有名

不副實者雖秩登一品未經予謚所以示彰瘅之公至嚴且慎溯自軍興以來文武各員中有戰功卓著為中外所共知者因督兵大臣詳敘事蹟奏請予謚亦經加恩允准乃近來中外臣工往往將殉節之道府州縣等官懇請予謚該員等矢志報國朝廷既優加贈卹並廢及子孫所以褒獎忠藎者不為不至儻將易名重典視為矜恤常例紛紛陳請殊屬非是嗣後文武各員其官階例不應予謚

者如果勲名懋著自當破格施恩臣下不得率行奏請以示限制○又諭李鴻章奏永定河南四工漫口在工各員分別參辦並自請議處一摺據稱本年伏汛大雨連旬山水暴發河湖異漲經該河道等晝夜搶險開放牐壩險工已就平穩自六月十一二日以後大雨傾盆各處山水匯注牐壩宣洩不及河不能容南四工九號對岸又淤生沙背迴風偏溜水勢擡高數尺人力難施遂至漫口各等

語永定河工。經李鴻章於上年奏報合龍為時未久。仍復決口。雖由連旬大雨所致。在工各員。究未能小心防護。咎無可辭。南岸同知朱津著革職留任。南四工固安縣縣丞王仁寶著革職留工效力。永定河道李朝儀著革職留任。以示懲儆。李鴻章督率無方。著交部議處。即著該督嚴飭在事員弁。迅將決口趕緊堵築。毋稍延緩。其上游各廳汛。並著加意防護。被淹地方。即由該督量為撫恤。毋令失所。尋吏部議李鴻章應降一級留任。得旨准其抵銷。○諭軍機大臣等。景廉奏回逆大股出關。滋擾敦煌。請飭金順來古助剿。並請飭榮全進兵會攻瑪納斯各摺片。陝回白彥虎會合西甯大股回逆。攜帶家眷萬餘眾出關。滋擾敦煌及西海蒙古一帶地方。攻破村堡。官兵堵剿連獲勝仗。後因賊眾兵單。官軍挫衄。以致李天和陣亡。胡飛鵬被擄。勇丁散亡大半。此軍本係赴坤助剿之兵。刻下將亡。勇

潰已不成軍。景廉兵力甚單。防剿均形棘手。該逆此次勾結甘回。攜眷出關。沿途擄掠。必為西竄。烏魯木齊之計。該處南北兩路皆有徑路可通。景廉惟當就現有兵力。勤加偵探。設法截剿。一面飛咨哈密巴里坤兩城嚴密防守。毋稍疏虞。金順一軍前經疊次諭令迅速出關。以厚兵力。現在巴哈古城各處。事機甚急。即著該前將軍懍遵疊次諭旨。速帶馬步各營兼程西進。為景廉後路應援。並與景廉會商機宜。迅掃逆氛。毋得藉詞延緩。回目馬明既有投誠之意。景廉惟當設法羈縻。總使安夷回逆勢不相聯。庶免掣肘。但回情詭譎。投誠未可深信。景廉持諭招撫。總宜穩慎。籠絡計出萬全。毋為該回目所紿。是為至要。俄商前赴瑪納斯貿易。該處正為賊匪出沒之區。貨物被搶。勢所必至。俄商遽指為徐學功搶劫。未必非藉此圖詐。希冀官為賠償。景廉現已剴調徐學功來營面詢。並派員前往

查訪虛實自無難根究卽著景廉查詢明確將如何辦理之處卽行據實奏聞俄人覬覦烏垣已非一日藉端生事自在意中官軍能將瑪納斯剋期攻拔先發制人兵機庶可得手著榮全咨會錫綸迅速會兵進攻務將瑪納斯攻克以期次第進取俄人狡詐性成儻我軍日久無功深恐又生枝節榮全亦當妥籌攻勦迅赴戎機毋稍遲誤將此由六百里各諭令知之尋景廉奏遵查徐學功係在安

集海三道河子地方與安夷回匪打仗奪獲牲畜布匹等件分給哨勇並無搶劫俄商之事至俄夷圖詐等情已咨署伊犁將軍榮全酌覈辦理下所司知之○又諭前因富順等奏參總管達爾濟營私漁利各情當經降旨將達爾濟革職不准留營並所領餉銀有無侵蝕飭常順等查辦茲據奏稱已革總管達爾濟所領餉銀十萬三千兩僅係給發遲延尚無顯肆侵剋情事其虛支軍餉該革員於

被參後業經交出勒交皮價一項已飭賠繳至其侵吞駝隻現經取回七十三隻交該營牧養備用等語達爾濟既據查無侵剋軍餉重情卽著加恩免其追賠所虧皮價一項仍由常順等飭令如數賠繳不准延欠該革員本係不准留營之員常順卽當飭令起程回旗並咨明察哈爾都統嚴行管束毋任滋事將此由四百里諭令知之○以哈密籌辦防勦出力賞遊擊王洪順佐領明圖善千總田

錫禮巴圖魯名號知縣裕厚以知州用並賞花翎筆帖式奎顯等藍翎餘加銜升敘有差○予故直隸總督慶祺附祀博多勒噶台忠親王僧格林沁天津府專祠○予故江蘇道員袁保慶交國史館立傳附祀原任漕運總督袁甲三安徽臨淮專祠○壬寅諭內閣張廷岳等奏派出迎接哲布尊丹巴呼圖克圖之呼畢勒罕札薩克圖汗車林端多布現在患病請另行派員一摺車林端多布現在患

病不能迎接哲布尊丹巴呼圖克圖之呼畢勒罕即改派車臣汗部落貝勒車林桑都布迎接著張廷岳等迅速嚴催車林桑都布趕緊起程斷不可再行推諉並著加恩由庫倫至西甯馳驛行走車林端多布貼此等要差跡近推諉著交理藩院議處以示懲儆○癸卯諭內閣邵亨豫奏帶兵大員在營丁憂一摺統帶銘軍記名按察使劉盛藻現丁父憂該臬司懇請回籍終制原應准其所請惟

現在甘省軍務未竣陝防緊要該臬司統率銘軍深資得力未便遽易生手著邵亨豫飭令劉盛藻將陝防事宜照常辦理一俟甘境肅清該省防務安謐再行奏請回籍終制伊父劉大全著加恩賞給一品封典以示矜恤○派內閣學士崇綺順天府府尹彭祖賢監臨順天鄉試○補鑄甘肅河州鎮左營兼管中軍遊擊秦州州判兩當縣知縣金縣知縣儒學靖遠縣知縣儒學平羅縣縣丞張掖縣

縣丞渭源縣儒學各關防印信條記從總督左宗棠請也○甲辰諭軍機大臣等侍郎綿宜奏盛京馬賊為害已久請飭辦理一摺盛京各屬馬賊為害多年雖經疊次擒拏仍未淨絕根株允宜設法整頓以靖地方而消禍患該侍郎所陳整兵募勇禁賭聚糧各條不為無見著都興阿瑞聯恭鏜酌度情形認真辦理妥揀賢能員弁聯絡兵勢偵賊所在合力兜拏務將著名渠魁悉數弋獲其逃散匪

黨一併擒捕嚴拏毋任漏網並多募勇丁由兼尹府尹揀派賢員管帶與官兵合力兜拏檄令各廳州縣力行保甲互相守望聯絡兵勇一體堵拏賭博最為盜賊淵藪著該將軍等嚴行禁止先為剴切曉諭如再有開設賭場者即行查拏從嚴懲辦奉省產糧素豐近來各口岸糶賣過多以致民間毫無積蓄並著該將軍等妥為籌畫其外來商販應如何分別禁止之處即行會商辦理原摺均著鈔

給閱看將此各諭令知之○

上以孟秋時享

太廟自是日始齋戒三日○乙巳以光祿寺卿

惠林為太常寺卿。丙午。予貴州鎮遠等處。

陣亡副將吳喜榮等祭葬世職加等○子貴

州軍營病故總兵官袁發貴祭葬卹廕加等

東坡志林

i

大清穆宗繼天開運受中居正保大定功聖智誠孝信敏恭寬毅皇帝實錄卷之三百五十四

六八六

大清穆宗繼天開運受中居正保大定功聖智
誠孝信敏恭寬毅皇帝實錄卷之三百五十五

此係陳氏所託子孫題居者意本寸大序文所謂明則新德星之出士族不飲而一府事件居乃略信也

理大辦事處戶部三庫等情。○此奉 硃批。該部知道。欽此。

正統己未州縣官理戶部大校等事降戶人氏補國公事乃以一
一就過事而一就歸一九九九年字室藏板快官之通月有八
八正官太子太傅翰林院掌書

[illegible][illegible]

新刊

同治十二年癸酉秋七月丁未朔享

太廟

上親詣行禮○詣鍾粹宮問

慈安端裕康慶皇太后安長春宮問

慈禧端佑康頤皇太后安至丙子皆如之○奉

慈安端裕康慶皇太后

慈禧端佑康頤皇太后幸漱芳齋侍午膳○派

兼署工部左侍郎殷兆鏞恭勘

景陵妃園寢等處工程○戊申准山西在籍二

品頂帶前太僕寺卿徐繼畬重與席鳴宴賞

頭品頂帶○追予廣東各屬陣亡殉難紳民楊洪楷等暨婦女四百三十四名口分別旌卹如例○己酉諭軍機大臣等金順奏攻克肅州東關平毀賊卡一摺肅州自合圍後金順會商徐占彪宋慶添築礮臺偪城轟擊上月初六日徐占彪督隊出賊不意直登東城各軍奮勇繼進賊眾抵死抗拒分股出城撲犯官軍營卡冀圖牽掣各營分投迎勦大挫兇鋒遂將東關攻克並將蒲桃園賊卡平毀

悍賊悉數殲除勦辦尚為得手東關攻克賊糧畜將盡已成檻獸釜魚著左宗棠檄令徐占彪宋慶等併力環攻嚴防賊匪衝突迅將肅城剋期攻拔聚而殲旃毋稍鬆勁肅州軍務得手徐占彪宋慶兩軍足敷勦辦白彥虎等股竄擾關外勢甚猖獗金順仍當懍遵疊次諭旨迅帶所部兼程西進為景廉後路應援相機痛埽妖氛毋稍遲滯另片奏請將已革委參領雙壽留營等語雙壽係勒令回

旗永不敘用之員所請留營效力之處著不准行將此由六百里各諭令知之○又諭本日據金順奏肅州兵勇圍攻甚密指日可期克復是甘省軍務漸就肅清因思現在各營勇丁固多他省客勇而本地募勇亦復不少此項勇丁招自田間半係無業游民以之衝鋒禦寇不過一時權宜之計無事時恐未必能安耕作若任其游蕩不為鈐制致令流為匪徒不但無以示矜恤亦非綏靖地方之道

甘肅各營兵丁缺額甚多凱撤以後應如何將本地募勇挑補訓練以資安插之處著左宗棠悉心酌度情形奏明辦理其各省勇丁亦當分別撤留其得力者飭各營官實力整頓不得力者妥為資遣俾免滋事並著先事豫籌以遏亂萌將此諭令知之○予甘肅肅州陣亡總兵官黃金堂黃明貴副將梁得勝遊擊李士明劉宏發都司舒占標千總秦涵保祭葬世職加等○辛亥諭內閣前據吳棠

奏前署通江縣知縣黎互熙經該督以治理未諳奏參降補旋據該員呈遞稟詞挾忿誣訐請旨派員查辦當經諭令魁玉確查具奏茲據奏稱按照所稟各情分別詳查如所稱上年吳棠生日屬員餽送禮銀及出省巡閱時隨從人役千名需索備賞銀兩均無其事至道員談壽齡並非吳棠幕友因歷年籌撥黔餉出力咨由曾璧光請獎亦非吳棠徇私濫保其所稱知府張桐許為營求向其索謝

與談壽齡商同分贓有書信二件為據又張桐屬送吳棠銀二千兩等情傳集該員等到案研訊均屬子虛黎互熙旋遞悔呈據稱該員舊患痰迷因曾借同鄉幕友貝世培銀兩貝世培唆令捏控希圖開復並捏造書信二件交該員作據貝世培畏罪逃走等語黎互熙身為職官於被參後不知悔過自新輒聽人唆使誣訐上司著即行革職永不敘用交原籍地方官嚴加管束毋任出外滋事並著

嚴緝貝世培務獲按律懲辦以儆刁頑另片奏四川候補各員人數眾多其中有因曾在該省遊幕並職官指捐流寓省分暨親族同官一省照章均應迴避者殊多牽混應請查辦等語著吳棠確切查明如有照章應行迴避之員勒限呈明准其改省儘敢隱匿取巧即行從嚴參辦○諭軍機大臣等劉長佑馮子材奏西隆西林踞匪悉數殲除裁併各軍並疊獲匪犯情形一摺西隆西林兩屬之峰

崗巖毛草坪等處賊巢經官軍先後攻克斃賊多名惟該處近接黔疆匪蹤出沒無定難保無餘黨竄伏仍著劉長佑等督飭該處地方文武實力搜拏以清餘孽防勦越南各軍現經馮子材簡汰挑留分紮關內外其鎮安歸順及各土州要隘亦經覃遠璉派營分駐即著檄飭該鎮道扼要嚴防毋稍疏懈吳逆餘黨蒙艾等竟敢由越南潛回勾結滋擾雖經拏獲正法此外漏網者尚恐不少劉長佑

等仍當嚴飭沿邊各營一體搜捕務絕根株並飭各該處地方官將善後事宜統籌全局妥為辦理將此由四百里各諭令知之○以內閣侍讀學士許庚身為光祿寺卿○以西西隆西林殲除踞匪予知府梁炳漢等加銜升敘有差○癸丑諭內閣奕榕等奏阿勒楚喀地方失火延燒衙署官民房屋請將該管各官分別議處一摺本年五月間吉林阿勒楚喀地方不戒於火由城南土圍門外延

燒圍內民房及衙署監獄官房共燒毀房間七千有零燒斃民人八名口所有被災商民旗戶情殊可憫著奕榕等查明設法妥為撫恤毋令失所副都統海英於該管地方被災救護不力實屬咎有應得著交部議處協領烏勒喜佈委協領蘇勒通阿雲騎尉年常阿富祥先事未能防範臨時又不能救止尤難辭咎著一併交部議處以示懲儆被災衙署監獄八旗兵房及各項官所並著飭令該副

都統等籌款照例賠修尋兵部議海英應降一級留任烏勒喜佈等降一級調用均准抵銷從之○諭軍機大臣等文麟奏陝回竄擾敦煌現催馬隊會剿並賊匪分竄哈密邊界各摺片陝回大股眾約萬餘出關滋擾敦煌攻陷屯莊焚燒搶掠官軍接仗失利李天和陣亡兵勇死亡過半與景廉前奏大略相同現在賊勢猖狂均向北山飛竄深恐沿途勾結勢成滋蔓難圖文麟所派馬隊官兵復為

河漲所阻未能前進敦煌兵勇無多勢難堵禦著文麟飛飭馬隊營官張明等迅速設法繞道前赴敦城會同該處官兵實力勦辦毋稍疏虞並著文麟分飭東路沿塘駐防並塔爾納沁一帶各營勤加偵探認真防堵金順一軍疊經諭令迅速出關刻下關外軍情緊急著該前將軍懍遵疊次諭旨剋日拔隊起程迅赴戎機毋得稍有遲誤明春所帶成祿數營現紮何處著金順檄令就近兜勦以遏

兇鋒該逆回西竄擾其心叵測哈密古城各處防堵未可稍鬆著景廉會商文麟各就現有兵力設法堵剿毋任賊匪紛竄哈密邊界馬金山一帶竟有賊匪三百餘名盤踞並有青海回逆四萬餘名到肅被官兵擊敗竄往古城俱有北犯之意文麟務當飭令在防官兵扼要嚴防遇賊卽擊毋稍疏懈將此由六百里各諭令知之○以翰林院編修鄭嵩齡為河南鄉試正考官檢討王慶祺為副考官

侍讀學士楊慶麟為山東鄉試正考官編修陳學棻為副考官洪良品為山西鄉試正考官吏部主事范鳴銖為副考官○乙卯

孝靜成皇后忌辰遣官祭

慕東陵○諭軍機大臣等楊昌濬奏黨匪聚眾滋事立時撲滅一摺浙江新昌縣煙山地方向有黨匪出沒疊經捕獲懲辦楊昌濬飭令該縣編查保甲匪徒王成繼等因挾紳董協獲黨首何則秀之嫌起意聚眾滋擾羣至紳

士楊禹疇等家拆毀房屋復勾結天台東陽匪類於閏六月初四日擁眾數千圍撲縣城當經官軍奮力截捕斬擒匪黨百餘名餘眾散逸其竄往關嶺之匪亦經守卡弁勇擊散惟匪首王城繼等在逃未獲著楊昌濬嚴飭密速緝拏務獲懲辦毋任漏網一面將保甲事宜認真辦理並收繳器械嚴申禁令以靖地方前署新昌縣知縣王嘉瑞於黨匪挾仇焚搶未能先事籌防著交部議處該管知府

及地方官汛事前疏於稽察本有應得之咎姑念會督防勦卽時撲滅功過尚足相抵均著免其置議所有出力員弁著俟匪首王城繼等悉數緝獲後再由該撫擇尤保奏毋許冒濫將此由四百里諭令知之○又諭托倫布保英奏經費浩繁請撥餉銀並飭催欠餉一摺據稱科布多近年支款加增所有添設臺兵修理城垣等項需餉甚殷現在庫儲支絀情形萬窘請飭部撥銀十萬兩等語著照

扎倫布等所請由戶部如數撥解以濟急需
其山東山西河南三省奉撥科城餉銀各五
萬兩僅解過銀一萬兩並著丁寶楨鮑源深
錢鼎銘督飭該藩司迅速籌解不得稍有帶
欠將此由四百里各諭令知之○丙辰
孝懿仁皇后忌辰遣官祭

景陵○諭內閣奕榕等奏請將疏防刦盜遺火
延燒軍器之該管各員革職勒緝一摺吉林
額穆赫索羅地方前月突有盜匪數十名闖

入街內搶刦鋪戶遺火延燒營房軍器樓大
門驛站官房等處該匪乘夜逃逸佐領忠壽
等平時既毫無防備臨時又不督兵追捕任
令匪蹤遠颺捕務廢弛已極實堪痛恨卽補
協領花翎佐領忠壽藍翎防禦春全著一併
革職留於地方協緝儘限滿無獲卽著從嚴
叅辦該處被焚房間及軍器等項責令該員
等照數賠補並著奕榕等嚴飭派出各員弁
實力搜捕務將此股賊匪全數弋獲盡法懲

治不准一名漏網○福建陸路提督江長貴
年老解職以福甯鎮總兵官羅大春為陸路
提督順昌協副將宋桂芳為福甯鎮總兵官
○丁巳

上奉

慈安端裕康慶皇太后

慈禧端佑康頤皇太后幸漱芳齋侍午膳○以
工部右侍郎訥仁兼署刑部右侍郎○以正
黃旗滿洲副都統察杭阿兼署鑲紅旗滿洲

副都統○豁免山東青城縣被水地方新舊
錢漕○戊午

慈安端裕康慶皇太后聖壽節遣官祭

太廟後殿

奉先殿○

上率王以下文武大臣詣

慈寧門行慶賀禮眾官於午門外行禮○詣鐘

粹宮

慈安端裕康慶皇太后前侍早膳○奉

慈安端裕康慶皇太后

慈禧端佑康頤皇太后幸漱芳齋侍午膳○以

理藩院右侍郎成林兼京營右翼總兵○以

記名提督李勝為湖南綏靖鎮總兵官○己未

上奉

慈安端裕康慶皇太后

慈禧端佑康頤皇太后幸漱芳齋侍午膳○庫

倫辦事大臣張廷岳等奏遵保帶兵各員懇

請優獎得旨徐平川等均著照所請獎勵其

直隸等省辦理糧臺及運解餉銀出力各員

並著咨行該省督撫查明覈實酌保毋許冒

濫○庚申諭軍機大臣等左宗棠奏攻克肅

州外城情形一摺與金順前奏大略相同現

在各軍已偏城添築營壘併力轟擊左宗棠

又派員押解礮位前往助勦賊勢窮蹙不難

聚而殲旃即著左宗棠飭令徐占彪會同宋

慶迅將肅州剋期攻拔盡掃妖氛毋令一名

漏網又奏籌辦採糧轉運事宜暨購備駝隻

各摺片各營糧料轉運自應按照人馬實數

覈實支銷以免浮冒現據左宗棠查明除徐

占彪所部有冊可稽外宋慶馬步共作十八

營張曜馬步十四營金順並接統成祿所部

共作三十營並將轉運章程分別籌畫所奏

甚為詳悉著照所議將各該營應需糧料照

數源源接濟毋令缺乏經此次覈定後各該

營如有缺額以少報多冒領浮銷即著該大

臣隨時查明奏兵貴精不貴多金順各營

自可汰弱留強不必虛擁多營耗軍需而無

實際著該前將軍酌度情形從長計議將各

營歸併裁汰咨明實在數目以便左宗棠設

法供支各省應解金順及接統成祿一軍協

餉著戶部查明催令迅解金順軍營以資應

用毋得遲延阿拉善旗採辦駝隻意存推諉

且有擅價居奇情事協理台吉阿布哩辦公

未能踴躍著理藩院飭令貢桑珠爾默特迅

速回旗承辦以免貽誤烏喇特等旗向係產駝之區足供採買著定安就近飭令各該旗會同左宗棠委員盡力採辦不准阻撓推諉將此由六百里各諭令知之○以甘肅河州勦擒竄匪予提督張仲春優敘陣亡都司劉煥章祭葬世職加等○辛酉中元節

上詣

奉先殿

壽皇殿行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢○

上奉

慈安端裕康慶皇太后

慈禧端佑康頤皇太后幸漱芳齋侍午膳○壬

戌諭內閣都興阿奕慶奏恭修

永陵

啟運殿請擇吉移請

神牌安奉

東西配殿一摺著欽天監於七月內敬謹選

擇吉期迅速具奏○又諭興林廣科等奏午

門內有兵丁自行抹傷請飭究辦一摺據稱

本月十三日有鑲白旗蒙古桂榮佐領下養

育兵連喜因伊弟松安代人保帳不敷被帳主陵偏自縊身死連喜含冤意欲復仇攜帶供呈由西華門入自行抹傷等語養育兵連喜卽有冤情亦當赴各有司衙門呈控膽敢溷入西華門在午門內抹傷殊屬不知法紀連喜著交刑部嚴行究辦呈內所指匪棍張三青腿子張閻王趙姓白毛李三李太李二小霸王高五沈太王三鄭二著步軍統領衙門順天府五城一體嚴拏務獲交刑部歸

案審訊所有是日西華門直班兵丁著查明嚴行懲辦該管各官失於覺察著查取職名交部議處禁門重地豈容閒人溷入疊經降旨訓誡該直班官兵等並不認真巡察實屬廢弛已極嗣後前鋒統領護軍統領務當督飭各門直班官兵實力稽察嚴申門禁儻敢仍前玩泄卽行從嚴參辦○又諭錢鼎銘奏特參庸劣不職各員請分別革職改教一摺河南候補知縣王元緒嗜利妄為敗壞官方

候補直隸州知州沈鳳儀心術曖昧人品卑污太康縣典史金元榮舉止乖張扶溝縣典史劉慶元玩視捕務永甯縣訓導楊肇宜遇事招搖遂平縣教諭暴駿圖行為乖謬均著革職林縣知縣李樹楨精力就衰難膺民社著以教職歸部銓選○諭軍機大臣等常順奏賊氛北竄馬隊遑難移撥一摺據稱探報陝回大股出關北竄匪蹤擾及阿畢爾米特游牧現飭官兵探勦前由杜嘎爾撥到之黑

龍江馬隊一時未能撥赴榮全軍營懇請飭調勁旅迅速來烏再令黑龍江馬隊西進等語此項馬隊本係榮全調赴西路之兵該處需兵甚亟本難准其所請惟現在回匪大股紛竄烏城兵力甚單黑龍江馬隊駐防察漢浮爾等處未便遽行撤動著准其暫留防勦以遏賊鋒並著李鴻章於宣化官兵內挑選五百名剋日整隊赴烏前據李鴻章奏直隸練軍未便再議抽調惟現在關外軍情緊要

該督務當酌度緩急迅行調派毋稍遲延該官兵抵烏後常順等卽飭黑龍江馬隊馳赴榮全軍營俾資戰守逆匪由胡魯斯泰地方逸去現竄何處著常順車林多爾濟文奎嚴飭官軍確切偵探視賊所向實力擊剿迅殄賊氛並將該城防守事宜妥為布置不得稍涉疏虞另片奏逆匪圖竄烏魯木齊請飭迅克肅州俾金順得以率隊出關並請飭景廉速勦踞賊等語該逆屬聚於安西敦煌等處

覬覦北犯僅任令勾結烏魯木齊踞匪該城軍務更覺棘手著景廉督飭官軍力籌堵剿毋令該逆聲息相通益形滋蔓肅州外城已克當不難一鼓而下著左宗棠檄飭各軍加勁圍剿迅奏膚公金順當懍遵疊次諭旨迅速出關將白彥虎等股匪黨痛加勦洗毋任豕突將此由五百里各諭令知之○撥神機營洋火藥二萬四千出鉛丸二萬四千粒劈山礮四十位檯槍排槍各四百桿洋槍二百

桿鉛丸一萬斤竹矛一千二百桿刀二千把解赴烏里雅蘇台軍營備用○癸亥

文宗顯皇帝忌辰遣官祭

定陵○

上詣

奉先殿

壽皇殿行禮○甲子諭內閣順天府奏被水各州縣請截留漕糧備賑一摺本年順天所屬之順義等州縣被水成災小民情形困苦殊

堪矜憫加恩著照所請由倉場侍郎將現在運通之籌備漕糧截留八萬石存儲通倉以備將來分撥各屬就近領運著萬青藜等卽飭該地方官查明被災戶口應如何分撥賑濟迅速妥籌具奏用副軫念災黎至意○予故前任刑部右侍郎吳廷棟祭葬如例○旌表夫亡殉節江蘇鹽知事錢元增妻胡氏○乙丑撫恤琉球國遭風難夷如例○丙寅諭內閣本年夏間直隸雨水過多永定河南岸

決口被水地方田廬多被衝沒小民蕩析離居殊堪矜憫前據順天府奏請截留漕糧八萬石備賑當經降旨允准因思畿輔被災甚廣亟應妥籌撫恤著加恩於東南各省釐金關稅鹽課項下合撥銀三四十萬兩以資賑濟由李鴻章酌定各省應解數目一面分咨一面於直隸藩運關各庫內無論何款先行動支俟各該省解到時歸款其順天所屬應需賑濟銀兩若干卽於此款內撥給並著李

鴻章會商萬青藜彭祖賢奏明辦理該總督府尹務當督飭地方官查明被災戶口覈實散放妥為賑恤總期實惠及民毋令一夫失所用副朕軫念災黎至意○丁卯補行引見京察年至六十五歲以上人員得旨刑部郎中承明著照舊供職○戊辰戶部奏遵議直隸督臣李鴻章所陳海運河運採買各事宜查海運雖已暢行河運未可遂廢請飭江廣各督撫酌提本色運漚解津其江北新漕應

令仍辦河運從之○己巳以神靈顯應加山西長治縣

昭澤王封號曰靈感

靈貺王封號曰昭顯○諭內閣李鶴年王凱泰奏特參庸劣不職各員請分別撤省降革一摺福建泰甯縣知縣徐士俊遇事操切措置失當沙縣知縣楊淑仁辦事竭蹶人地未宜均著撤省遇有相當缺出酌量補用惠安縣知縣吳同盛才欠開展聽斷遲鈍署崇安

縣知縣候補同知丁承禧違例科罰緝捕廢弛均著以府經歷縣丞降補候補同知王錫奎志趣卑陋不堪造就何慶生身家不清物議沸騰候補按察司經歷謝揚炳委辦釐務操守不潔均著一併革職試用通判李元賢性情浮薄行止有虧著卽革職永不敘用○諭軍機大臣等禮部奏中國船隻往泊朝鮮據咨轉奏一摺據稱本年四月間有中國船三隻往泊朝鮮義州境內經該國官弁逐捕

反持銃礮向發旋被該國兇擊格殺六人始行退走等語內地民人越境漁採貿易本干禁止上年十一月間業經諭令禮部傳知該國王嗣後如有匪徒侵擾卽照向章一體兇擊格殺勿論此次復有民船偷越滋擾實屬不成事體亟應嚴行禁止著都興阿瑞聯志和恭鐸丁寶楨分飭沿海各處設法整頓嚴密稽查如有內地民船越境滋擾卽行嚴拏懲辦毋稍寬縱並著禮部行知該國玉仍懍

遵上年十一月間諭旨一體查拏逐捕以清邊界將此諭知禮部並由四百里諭令都興阿瑞聯志和恭鐸丁寶楨知之○又諭都興阿奏股匪肆擾派隊擊散一摺匪首趙西來孫洛好等率黨百餘人由大孤家子屯擾及卡拉營子一帶經派出蒙古官兵馳至何家屯地方追擊斃賊多名餘匪逃匿新立屯等處復有匪目趙中等率賊七八十名廣聚滋擾副都統德昌督隊馳抵羊羔屯地方緝捕

將該匪及另股接應之賊擊敗餘賊竄逸此起賊匪乘禾稼茂密之時伺隙紛竄豈可任其勾結致成滋蔓且邊內外賊匪股數尚多亟宜加意搜捕著都興阿督飭派出各員弁實力分投確探痛勦不得任令四出竄擾並將匪首趙西來等按名弋獲不准一名漏網以清伏莽而遏亂萌將此由四百里諭令知之○以故奉恩輔國公裕格子意普襲爵○以正黃旗滿洲副都統恩承兼署正藍旗蒙

古副都統○予貴州各屬陣亡殉難貢生張世全等紳民婦女一千二百五十八名口分別旌卹如例○辛未

仁宗睿皇帝忌辰遣官祭

昌陵○

上詣

壽皇殿行禮○諭內閣殷兆鏞奏遵查專案工程請派員承修一摺所有

景陵妃園寢等處著派本年承修另案工程之

大臣魁齡一併敬謹承修○諭軍機大臣等崇實奏東荒沿邊一帶匪徒滋擾調隊會勦並酌撥餉需一摺匪首莊洛三卽莊洪沐在奉省東魯荒等處糾邀著名馬賊王汧王海及蒙賊鐵干一隻蠟等沿途裹脅赴朝陽縣東荒一帶挾嫌報復崇實因該處兵力單薄已咨商李鴻章等在古北口練軍內調撥馬隊官兵一百名前往勦辦卽著嚴飭帶隊各員會同該處地方文武將此股匪徒迅速撲

滅匪首莊洛三等務須悉數弋獲不准一名漏網該縣現募勇下籌備防勦所需經費崇實擬於熱河道庫內暫行動支造冊報銷著照所議辦理將此諭令知之○又諭金順奏關外逆匪被勦竄遁並偏攻肅州情形一摺逆匪分擾安西敦煌等處經副都統明春總兵胡可均等帶隊截擊均獲勝仗擒斬頗多金順復派副將和正興等選帶隊伍出關接應文麟所派馬隊亦到該逆於閏六月十七

等日遁逸入山勢將由南山西竄該逆現竄何處有無分股著景廉文麟督飭官軍確切分探嚴防痛殲醜類毋令蔓延安敦玉雖已解嚴仍著金順文麟飭該官兵等按捕逸匪實力探勦不得稍涉疏虞肅城自攻克東關後各軍添築卡壘連環攻擊不難一鼓蕩平著左宗棠金順督令各該將領剋期攻拔將該處踞匪聚而殲旃以安邊圉金順一面部署出關事宜早日成行毋稍遲緩此次關外

出力各員弁著該前將軍俟肅城克復後併案覈實請獎將此由五百里各諭令知之○予甘肅敦煌陣亡副將李天和祭葬世職○旌表未婚守志直隸獻縣文童劉肇竣聘妻唐氏○壬申追予浙江各屬陣亡殉難都司毛金標等紳民婦女二百十六員名口分別旌卹如例○癸酉諭內閣御史張沄奏畿輔賑務請飭清查戶口一摺本年夏間雨水過多直隸各州縣被水成災已准順天府所請

截留漕糧八萬石備賑並降旨於東南各省釐金關稅鹽課項下撥銀三四十萬兩以資賑濟仍由直隸總督先行籌款墊辦原期實惠均霑早蘇民困若如該御史所奏直隸順天所屬州縣向辦賑務並不親自履勘亦不清查戶口何以昭覈實而杜弊端著直隸總督順天府府尹通飭各屬州縣力除積習督率公正紳士於被災各村逐一編查戶口分別極貧次貧認真稽查覈實散放並先期刊

刻騰黃偏行曉諭儻查該官紳等有侵冒情弊卽據實從嚴懲辦以杜侵漁○又諭寶珣奏假期已滿病勢增劇請開缺回旗調理一摺兵部右侍郎寶珣著准其開缺回旗調理前任駐藏大臣恩麟著賞給副都統銜俟駐藏大臣承繼到任後護送哲布尊丹巴之呼畢勒罕前赴庫倫再行來京○諭軍機大臣等御史譚鈞培奏黔省善後事宜亟應妥籌一摺貴州現在全省肅清惟民間經兵燹之

餘瘡痍未復該省一切善後事宜亟應妥為籌畫次第舉行該御史所陳籌餉需建碉堡設屯田寬賦稅增州縣肅官方各條不為無見著曾璧光體察情形應如何籌辦之處悉心經畫妥為料理以靖地方而蘇民困原摺著鈔給閱看將此由五百里諭令知之○甲戌諭內閣禮部奏本年親政欽奉恩詔請派員告祭各處一摺除本日業由軍機大臣開列名單派員分別致祭外惟此次恩詔早經

頒發該部何以至今始行奏請殊屬遲延禮部堂官著傳旨申飭○又諭兵部奏武職應行迴避人員申明舊章請飭揀調一摺武職各員均有管轄地方之責從前各省請補各缺多有例應迴避之員自應分別調補以符定制而杜弊端前據兵部於同治九年二月間奏明所有軍務業經肅清各省陸路副將參將水師副將籍隸本省人員水師參將遊擊都司守備陸路守備係補本府本營之缺

陸路遊擊都司距籍在五百里以內均令各該督撫分別揀調現在陝西雲南貴州軍務已就肅清自應一律辦理著該督等卽行查明將籍隸本省之副將參將於兼轄省分揀員對調其遊擊都司距籍在五百里以內守備係補本府本營之缺卽於本省合例人員內調補用符定例至各省實缺提鎮尚未陞見之員並著具摺陳請以次來京陞見○以都察院左副都御史恩麟為兵部右侍郎○

以前任山海關副都統玉亮為正白旗漢軍副都統○以貽誤要差奪扎薩克圖汗車林端多布黃馬褂○乙亥諭內閣前因左都御史胡家玉奏江西省錢糧違例加徵請飭裁革並不得立捐款公費名目等語當諭令劉坤一嚴飭所屬州縣恪遵定例不准絲毫浮收如查有私立捐款公費名目額外加徵卽著嚴行叅辦嗣據劉坤一奏據實直陳丁漕改章實在情形請仍照新章辦理當經允准

仍諭令隨時認真稽查儻有絲毫浮收卽行從嚴叅辦茲復據胡家玉奏滙陳江西省違例加徵各弊請飭部覈議等語著戶部按照該左都御史所陳各節及江西省現在情形應如何辦理始臻妥善之處悉心酌覈妥議具奏至所稱請嚴飭各州縣不得將上司之供應道府之漕規節壽諸陋規巧立辦公名目取之於民等語著該撫仍遵前旨嚴飭所屬認真革除以維政體而恤民生尋戶部奏

遵議江西地丁一項請飭該撫臣按照曾國藩原定章程辦理漕折一項亦請查照同治四年奏定錢數徵收至逾限加價一節應令倣照江蘇辦法年內毋庸加收年外每石加錢五百文以示限制從之○諭軍機大臣等左宗棠奏圍攻肅城踞匪並親赴前敵一摺官軍克復東關後復於大南門外偪城修築礮臺營卡該逆分股占踞兩卡經副將賴長等開礮轟擊仍奪回原築營卡固守該大臣

現在親赴肅州卽著與金順會商督飭各軍力籌進剿迅克堅城肅逆勢極窮蹙左宗棠金順務當嚴密布置鎖合長圍就地殄除毋令城賊乘間出竄又成不了之局各郡縣善後事宜及金順出關後糧運一切卽著左宗棠親歷該處妥籌辦理本日據景廉奏回目馬明投順安夷並有西攻綏來之說若句結該處逆回撲犯沙子山等處現存兵勇無多防剿均不足恃請飭金順來古助剿等語著

金順一面部署出關事宜振旅西行與景廉聯絡聲援以資戰守將此由五百里各諭令知之○又諭景廉奏回目馬明投入安集延並逆匪撲犯民團派隊援應各等語馬明乞撫本不足恃現在該逆與瑪納斯回匪均投併安集延逆餒頗張景廉務當督飭官軍慎守營壘嚴防東犯不得稍涉疏虞趙興體等營勇均係烏合之眾屢經逆匪撲擾勢難支持景廉現派馬隊前往援剿著飭令該官兵

迅速西進聯絡民團實力防剿以遏賊鋒沙子山地居要隘該都統咨會錫綸帶兵會同榮全所部進紮該處以壯聲勢而固民心卽著該都統等彼此會商妥籌辦理安集延久踞烏城勢甚兇悍非厚集兵力難以得手現在肅州一城指日可克前據左宗棠奏金順一軍請俟秋仲出關本日已寄諭金順令其迅速振旅西行該都統另摺奏請撥軍火已諭定安常順等照數撥給矣將此由五百里

諭令知之○又諭景廉奏請籌撥軍火一摺前據常順奏錫綸等營需用軍火當照所請諭令神機營如數撥給由常順等迎提回城分撥應用茲據奏稱錫綸現在布倫托海布置進攻事宜亟需軍火卽著常順等於所調軍火解到烏城時卽將洋槍排槍子母礮擡槍隨帶洋火藥鉛箭銅帽等物及舊存新調之火藥以一半分撥錫綸軍營由該幫辦大臣迎提應用又據奏稱此項軍火止可暫時

數用請再由綏遠城調撥擡槍三百桿隨帶鉛丸三萬出火繩四千盤如綏遠庫存無餘卽就近製造由該都統派員迎提分撥錫綸應用等語著照所請由定安如數撥解以濟要需將此由五百里各諭令知之○予甘肅肅州陣亡守備王安邦等十二員祭葬世職加等○

上以祭

社稷壇自是日始齋戒三日○丙子諭軍機大

臣等喬松年奏黃河各廳險工搶護平穩工需尚屬不敷請添撥銀兩一摺著錢鼎銘督飭藩司再行撥給銀四萬五千兩與前撥之款限霜清以前發交開歸道覈實動用以資修防本年黃水停積甚於往年南岸險工較多尤宜加意防護喬松年務當嚴飭道廳各員認真守護以期工歸實用毋許稍有浮冒致涉疏虞將此由四百里各諭令知之

大清穆宗繼天開運受中居正保大定功聖智誠孝信敏恭寬毅皇帝實錄卷之三百五十五

廬亦多被淹閒有淹斃人口小民蕩析離居

官方○諸軍機大臣等王文韶奏查辦甯遠

強族匪徒分別懲創一摺湖南永州府屬地方俗多強悍甯遠縣屬之西洞歐陽姓分居嶺頭等五村尤為橫暴甚至抄搶姦殺擾害良民無惡不作經該撫派委道員陳寶箴嚴密查辦拏獲首匪歐陽華等多名正法訪緝餘匪解散脅從並選設該姓族長擬定規條約束辦理尚屬妥速著該撫隨時督飭該地方官嚴拏逸匪並認真整頓慎勿姑息養奸務使強梁知儆附從者予以自新分別妥辦

母枉母縱以去莠類而安善良另片一件著留中將此由五百里諭令知之○盛京將軍都興阿奏病難速痊懇請開缺回旗調理得旨都興阿向來辦事認真病體現亦就痊著將地方應辦事宜實力整頓以副委任毋庸奏請開缺○調順天府府丞張緒楷為奉天府府丞兼學政命刑部右侍郎錢寶廉提督順天學政內閣學士馬恩溥提督江蘇學政光祿寺卿許庚身提督江西學政詹事府少

詹事馮譽驥提督福建學政翰林院編修王文在提督湖北學政顧雲臣提督湖南學政費延釐提督河南學政侍讀黃體芳提督山東學政編修謝維藩提督山西學政吳大澂提督陝甘學政張之洞提督四川學政國子監祭酒章鋆提督廣東學政翰林院編修吳華年提督廣西學政安徽學政祁世長浙江學政胡瑞澗雲南學政李端棻貴州學政章業祥俱留任○戊寅祭

大社

大稷

上親詣行禮○秋分夕

月於西郊遣鄭親王慶至行禮○諭軍機大臣

等文麟奏回匪攻撲馬蓮井等處營堡派隊

援剿一摺陝回大股由敦煌西竄先後圍攻

馬蓮井塔爾納沁營堡勢甚猖獗文麟現派

馬隊馳赴塔爾納沁援剿著卽飭令統領魏

忠義等會同該處兵勇嚴密堵禦實力勦擊

母任逆匪竄越。該逆擁眾奔突。誠恐竄入東山。益形滋蔓。並著丈麟咨會景廉。及巴里坤城大臣總兵等。一體嚴防。毋稍大意。將此由六百里諭令知之。○盛京戶部侍郎兼奉天府府尹瑞聯等奏陳籌辦馬賊情形。請另派大員專辦。得旨。盛京馬賊滋擾。疊經諭令都興阿等認真按捕。著該兼尹府尹與該將軍體察情形。和衷商辦。將馬賊悉數查拏。務獲究辦。以靖地方。瑞聯等所請簡派大員辦理

之處。著毋庸議。○以兵部右侍郎夏同善兼署刑部右侍郎。○以通政使司副使岐元為光祿寺卿。○以聚賭滋事。革河南知府謝國輔職。追予河南各屬陣亡殉難紳民婦女五百七十名口分別旌卹如例。○己卯刑部奏。遵議不從反獄之監犯李汰渴可否免勾。得旨。該犯李汰渴。俟勾到時再行傳旨。○庚辰遣官祭黑龍潭。昭靈沛澤龍王之神。玉泉山。

惠濟慈佑靈漢龍王之神。昆明湖安佑普濟沛澤廣生龍王之神。密雲縣白龍潭。

昭靈廣濟普澤龍王之神。○遣官祭圓明園惠濟祠。

河神廟。○辛巳遣官祭昭忠祠。○諭軍機大臣等。前因直隸永定河南岸決口。被災地方甚眾。諭令於東南各省釐金關稅鹽課項下合撥銀三四十萬。以資賑濟。茲據李鴻章奏

稱。七月十九日運河隄岸復衝刷數口。天津河間保定三府屬邑被災有極重者。亟應量籌撫恤。並酌定各省應解數目。擬撥江蘇江海關洋稅銀五萬兩。甯蘇滬三局釐金各銀一萬兩。江安糧道庫節存漕項銀二萬兩。共十萬兩。江西釐金銀五萬兩。九江關常洋稅銀三萬兩。共八萬兩。湖北江漢關洋稅銀三萬兩。釐金銀三萬兩。共六萬兩。浙江釐金銀三萬兩。浙海關洋稅銀二萬兩。共五萬兩。福

建稅釐銀五萬兩。廣東鹽課銀五萬兩。安徽釐金銀一萬兩。請飭迅速籌撥等語。今年畿輔地方民間被災甚重。賑恤之款刻不容緩。著李宗義、張樹聲、劉坤一、李瀚章、郭柏蔭、楊昌濬、李鶴年、王凱、秦瑞麟、張兆棟、英翰各飭所屬迅速照數通融籌撥。務於本年十月以前解到。俾資接濟。李鴻章一面飭令司道無論何款設法籌墊。以應急需。並著萬青藜、彭祖賢與李鴻章分飭經理官紳認真稽查。覈實辦理。務使災黎實惠。均霑毋令一夫失所。儻查有官紳等侵冒等弊。即著從嚴叅辦。毋稍寬縱。將此諭知萬青藜、彭祖賢並由五百里諭令李鴻章、瑞麟、李宗義、李鶴年、李瀚章、張樹聲、英翰、楊昌濬、劉坤一、王凱、秦郭柏蔭、張兆棟知之。○又諭前因常順奏賊氛北竄。黑龍江馬隊遠難移撥。當經諭令李鴻章挑選宣化官兵五百名前赴烏城。再飭黑龍江馬隊西進。茲據李鴻章奏稱宣化練兵無多。

勢難照數抽調。擬將烏城額駐宣化防兵二百二十七名及現由宣鎮挑定換班官兵一百四名均暫留烏城。作為此次抽調征兵所有換防官兵請改由張家口行起。以期迅速。等語。著照李鴻章所議趕緊調往烏城以資守禦。額勒和布、奎昌於此項官兵抵口後即飭沿途臺站供應駝隻。其應領鹽菜米折等項並飭口北道速為籌發。俾利師行。該官兵等到防後常順、車林多爾濟、文奎務飭黑龍

江官兵迅速赴榮全軍營。並將烏城防守事宜妥為布置。不得稍涉疏懈。將此由五百里各諭令知之。○壬午諭軍機大臣等都興、阿泰邊外復起股匪。派隊剿除一摺。奉天邊外匪徒滋擾熱河朝陽轄境。經都興、阿派隊前往會同剿辦。該官兵等於朝陽縣剿賊獲勝。後在東魯克高山臺地方斃匪多名。並將賊首孫洛疙疸擒獲正法。其南路竄匪亦經官軍隨時剿除。著都興、阿飭令派出各員會同熱

河官兵迅將竄逸餘匪悉數殲除毋留餘孽崇實亦當飭令該地方官一體嚴密接捕務絕根株將此各諭令知之○又諭劉嶽昭岑毓英奏遵查馬如龍採辦外洋軍火情形岑毓英奏旋省日期代楊玉科請覲文武各缺請分由督撫辦理請將徐之銘賜卹吳崇奏川滇邊界散練游匪為患疊經勦除各摺片岑毓英現在回省辦理監臨事務即著暫留楊玉科駐紮大理會同迤西道將應辦善後

妥為經理以資彈壓至遣散勇丁查辦土司各事宜著劉嶽昭岑毓英悉心會商妥籌辦理前有旨令各省實缺提鎮尚未陞見之員以次來見一俟大理軍務底定楊玉科無須留駐該郡即著該總兵來京陞見岑毓英擬請將文職各缺統歸巡撫主政與總兵商定會銜武職各缺統歸總督主政與巡撫商定會銜向來督撫管轄文武各員均有定例劉嶽昭岑毓英惟當遵例辦理不得稍有撓越

至應舉應劾各員尤宜覈其實蹟秉公具奏方不至有名無實徒託空言前據岑毓英奏滇省軍務將次肅清上年購買洋槍等件請飭沿途各省督撫截留當諭令瑞麟等飭屬查明截留封存茲據劉嶽昭等查明馬如龍委令涂普義採辦外洋軍火實在情形著劉長佑咨照瑞麟李瀚章郭柏蔭王文韶張兆棟曾璧光仍遵前旨飭令所屬查明雲南委員由粵採買洋槍洋礮各項無論行抵何處

即行悉數截留封存該省軍裝庫並著吳崇一體欽遵辦理李玉墀本非雲南所派之員與陳得貴有無不法情事著劉長佑就近確查分別懲辦馬如龍委令涂普義前往外洋採辦軍火未經先行咨商劉嶽昭發給通關文憑以致中途被阻亦屬疏忽馬如龍著交部察議岑毓英請將徐之銘開復議罪一切處分並照例賜卹之處著毋庸議川省敘州府屬地方與滇之大關等處接壤時有散練

游匪勾結為患。本年春夏間。匪首郭心齋、林淙遂等糾眾擾掠。經提督唐友耕等督兵勦捕。悉數殲除。所有川省歷次勦匪出力員弁。紳團准由吳崇彙案擇尤酌保。毋許冒濫。仍著吳崇、劉嶽昭、岑毓英各飭防軍會同地方文武實力巡防。揆捕餘匪。以絕亂萌。將此由四百里各諭令知之。○又諭榮全奏懇請開缺。簡員接替。常順等奏籌撥馬隊西進援勦情形。並匪徒滋擾臺站各摺片。榮全催令富

和起程。該員竟敢肆罵。並毆傷榮全數處。實屬目無綱紀。富和著交部嚴加議處。並著榮全傳旨令其即日。前赴景廉軍營。不准稍涉遲緩。榮全以舊疾增劇。奏請開缺。現在西路軍事孔棘。該署將軍當顧全大局。勉力支持。盡心籌辦。毋得藉詞推諉。所請開缺之處。著毋庸議。回匪竄擾關外。時有零股窺伺。烏屬邊境飄忽靡常。著常順、車林多爾濟、奎督飭官軍嚴密設防。確探賊蹤。痛加勦擊。毋任

蔓延為患。纏夷圖撲沙山子、西湖等處。榮全軍營需兵甚亟。常順等以黑龍江官兵久經駐防。察漢、淖爾未便撤動。另撥察哈爾騎兵二百五十餘名馳往援勦。即著照所議行。常順等即飭該官兵剋日拔隊西行。俾資勦辦。巴里坤路等處臺站疊有賊匪乘間搶掠。所獲之車零頗多。克德米特二犯訊明後。即著就地正法。嗣後有似此擾害軍臺匪徒。均著照此辦理。並著常順等飭令沿臺駐紮官兵

分投巡緝。以靖地方。將此由五百里各諭令知之。尋兵部議。富和照毆無統屬官員私罪例革職。得旨。富和著照部議革職。即行回旗。毋庸前赴景廉軍營。○以協辦大學士刑部尚書全慶為順天鄉試正考官。都察院左都御史胡家玉、吏部右侍郎童華、戶部左侍郎潘祖蔭為副考官。○雲南鶴麗鎮總兵官馬忠因病解職。以記名提督張保和為雲南鶴麗鎮總兵官。○追予故雲貴總督恆春祭葬。

世職加等妻博禹特氏旌表如例○予故雲貴總督勞崇光於雲南省城建立專祠○修雲南麗江府城從巡撫岑毓英請也○癸未遣官祭

文昌帝君廟○諭軍機大臣等崇實奏詳陳圍場積弊並課銀不能依限起徵懇請展緩一摺熱河圍場自同治二年奏明招墾委員辦理謬誤奸佃從中漁利以致弊竇叢生崇實現擬將已騰正圍永遠封禁並將邊界卡

倫修齊所有新舊放出之地逐次重修丈量另換新照其舊領紅照一概繳銷查明地畝造冊發交州縣承領按畝徵糧均著照所議辦理查大之舉須俟秋禾登場方能舉辦著瑞聯崇實體察情形妥為經理以清圍地而垂永久毋任再滋弊端庫克吉泰前請自同治十二年為始圍場新舊課銀改由各府州縣徵解此時尚難照辦著准其暫行展緩仍照舊章辦理一俟圍地丈量清楚糧籍可考

卽將一切善後事宜酌籌具奏將此由四百里各諭令知之○以吏部尚書寶鋆兼署刑部尚書吏部尚書毛昶熙兼署都察院左都御史內閣學士宋晉署吏部右侍郎禮部右侍郎徐桐兼署戶部左侍郎管三庫事戶部右侍郎溫葆深兼署吏部左侍郎○以鑲紅旗漢軍都統英桂兼署正白旗漢軍都統○甲申遣官祭關帝廟○乙酉

太宗文皇帝忌辰遣官祭

昭陵○諭內閣前因都興阿等奏恭修

永陵

啟運殿請擇吉移請

神牌當經降旨令欽天監於七月內選擇吉期具奏茲據都興阿奏接准欽天監來咨擇吉於七月二十八日移請安奉惟接到咨文已逾吉期勢難趕辦請飭另行擇吉等語著欽天監另於九月間選擇吉期奏明迅速知照

都興阿等敬謹辦理此次欽天監咨文係七月二十日由四百里馳遞何以遲至二十八日始行遞到沿途驛站究係何處耽延著都興阿查明懲辦○山東巡撫丁寶楨奏查驗師船遣留員弁請將督辦道員李宗岱獎勵得旨李宗岱著交部議敘所請傳諭嘉獎之處著毋庸議其廣東山東出力員弁著准其擇尤酌保數員毋許冒濫○追予山東歷城等處陣亡殉難團長劉爾泰等暨婦女五百

十五名口分別旌卹如例○丙戌

上詣

奉先殿

壽皇殿行禮○山西巡撫鮑源深奏控制散勇不外練兵欲善練兵必參以練勇之法現擬仿照直隸省練兵章程辦理得旨務須實力訓練俾營伍漸有起色毋得徒託空言○旌表守正捐軀河南葉縣民女王喜妮許州民女馬京妮○丁亥

太祖高皇帝忌辰遣官祭

福陵○浙江巡撫楊昌濬奏力籌雲南貴州協餉並請飭雲南督撫無庸派員來浙得旨滇省兵餉支絀異常全賴各省協撥庶可無虞匱乏該撫果能力顧大局籌解無誤卽著咨行雲南督撫毋庸派員守催徒勞往返○戊子諭內閣李瀚章郭柏蔭奏縣屬被水成災派員查勘一摺本年夏秋間湖北公安縣屬地方因松滋石首二縣潰隄之水衝入全境

成災小民蕩析離居殊堪矜憫著該督等飭屬逐細查勘妥為撫綏毋使一夫失所用副朕軫念災黎至意○諭軍機大臣等景廉奏請飭成瑞赴古助勦並陝回攻破馬蓮井營堡各摺片景廉帶兵駐紮古城防勦正在喫緊遊擊陳升恆業經該都統遵旨飭令回巴里坤署理總兵之任卽著景廉咨催署烏魯木齊提督成瑞迅速馳赴古城襄辦一切陝回攻破馬蓮井營堡雖經官軍迎勦獲勝惟

東西兩路回逆。聲息時。運關內逆匪。分竄安敦哈密。深恐勾結烏城回逆。互為聲援。其勢又成滋蔓。孔才一軍。勢難分撥。赴哈景廉已咨催巴里坤迅派兵勇。並飛咨金順所部駐紮安西之副都統明春。帶領兵勇就近往援。惟賊勢正在鴟張。兵力究形單薄。著金順懷遵疊次諭旨。迅率所部。剋期出關。與景廉聯絡聲勢。會埽逆氛。毋稍延緩。並著左宗棠酌撥勁旅數營。前往助剿。兼顧巴哈兩城。大麟

惟當就現有兵力。勤加偵探。認真防剿。毋令賊匪蔓延為患。將此由五百里各諭令知之。
○雲貴總督劉嶽昭。陛見以雲南巡撫岑毓英兼署雲貴總督。○以才不勝任。降廣東潮州鎮總兵官楊青山為副將。以補用副將鄭紹忠為潮州鎮總兵官。○以廣東潮州勦辦土匪出力。賞總兵官方耀黃馬褂。○己丑諭軍機大臣等。榮毓等奏直隸欠解廣恩庫款。請旨飭催一摺。直隸藩運兩司及各州縣應

解廣恩庫租銀。近年以來。共積欠銀六萬二千六百餘兩。現在該庫應發要款甚多。需用甚鉅。著李鴻章飭令藩司。無論何款。先行籌撥銀六千兩。長蘆運司先行籌撥銀四千兩。迅速解交廣恩庫。以濟要需。其易州等州縣欠解陳新租銀。並著勒限埽數解齊。毋稍延緩。原摺著鈔給閱看。將此諭令知之。○庚寅諭內閣。理藩院奏新章展限。署將軍未能先期奏明。請旨議處一摺。蒙古捐輸新章。自同

治十一年六月限滿後。並未據署烏里雅蘇台將軍常順奏請展限。乃本年三月間。該署將軍輒請將捐輸台吉布音德勒格爾等照新章獎敘。經該衙門咨查。始據奏請展限。實屬疏漏。常順著交部議處。尋議常順照應奏不奏例。降二級留任。得旨准其抵銷。○又諭理藩院代奏土爾扈特汗布彥烏勒哲依圖賑濟該游牧流離貧苦蒙民。請借支十年汗俸一摺。布彥烏勒哲依圖著加恩賞借十年

汗俸嗣後不得援以為例○以故青海扎薩克輔國公多爾濟沙木弟車林端多布襲爵○以正紅旗滿洲都統景壽兼署正黃旗滿洲都統鑲藍旗滿洲都統慶春兼署鑲黃旗漢軍都統正藍旗漢軍都統崇綸暫署鑲白旗滿洲都統○辛卯

上奉

慈安端裕康慶皇太后

慈禧端佑康頤皇太后幸漱芳齋侍午膳○壬

辰諭軍機大臣等景廉奏哈密被圍撥兵馳救並請飭烏城迅撥馬隊赴巴哈援應派援沙山子官兵剿賊獲勝常順等奏賊氛竄近撥隊迎剿各摺片陝回竄擾哈密盤踞大泉黃蘆岡一帶分股撲城官軍迎剿失利統領魏忠義張炳李琦李生元等皆無下落官兵多有陣亡巴里坤亦有逆回分竄巴哈兩城為西進大軍後路地方最關緊要此股回逆勢極猖獗現在哈密被圍甚急該城日夜盼

援景廉業經籌撥馬步隊前往援應惟賊眾兵單勢難抵禦且道路寫遠尤恐緩不濟急左宗棠現已馳抵肅州兵力自厚肅州以窮寇拒守孤城諒不難剋期攻拔刻下關外事機甚急萬一肅州踞逆鋌而走險勢必與竄擾巴哈等處賊匪聯成一氣該兩城稍有疏失則賊勢又復燎原關外用兵較之內地更形棘手目下烏垣安夷回逆又時有東犯之意景廉孤軍在外兵力難支著左宗棠迅即撥派勁旅數營馳往哈密以資援應速將該處賊匪悉數殲除並堵截肅回出關分竄之路哈密事機十分緊急該大臣務當迅籌調撥毋稍遲緩致誤戎機金順一軍疊經諭令剋日出關以資防剿現在該處情形較前更急著該前將軍迅即拔隊起程並先行撥派得力官兵馳往接應與明春一軍會同雕剿迅掃逆氛景廉亦當酌度情形妥為籌布哈密地方緊要文麟當就現有兵力妥籌堵剿

毋稍疏虞。巴里坤已有賊匪竄近。著慶壽勤加偵探實力防守。以顧地方。烏里雅蘇台現駐吉林黑龍江馬隊及察哈爾官兵。尚稱得力。著常順多布沁扎木楚夫奎妥為調度。迅撥馬隊數百名。由草地兼程馳赴巴哈以資援應。賊匪竄及沁城喀喇烏蘇等處。與烏城所屬蒙古部落毗連。常順等現已派撥官兵前往迎擊。卽著飭令認真勦洗。毋令賊勢蔓延。景廉所派往援沙山子之營總依勒和布

一軍與遊擊徐學功等勦賊出力。准由景廉擇尤保獎。以示鼓勵。陣亡官兵並著查明請卹。將此由六百里諭知左宗棠常順多布沁扎木楚夫奎景廉金順文麟並傳諭慶壽知之。○又諭榮全英廉奏查看厄魯特官兵並沿途臺站情形。請調宣大官兵駐防塔城各摺片。厄魯特官兵屢經催調。尚未移至塔城。英廉以該官兵等困苦路遠恐難遷移。擬親赴布倫托海查看情形。再行籌辦。著英廉於

馳抵該處後。將厄魯特近日情形留心查看。加意拊循。能否遷移來塔。務與榮全商酌妥協。迅速具奏。塔城東路各臺無力應差。致經過官兵軍火運送多有耽延。並著英廉沿途周歷履勘。應如何設法整頓之處。一併妥商辦理。塔城向有甘省換防兵七百名駐紮防守。近因道路未通。難以調派。刻下瑪納斯等處賊勢猖獗。防務喫緊。必須兵力鎮撫。方免疏虞。榮全等請暫由宣化大同兩鎮各撥兵

五百名駐守。係為思患豫防起見。著李鴻章鮑源深於宣化大同官兵內各挑撥精壯五百名。攜帶軍火器械。分起赴塔駐防。俟嘉峪關道路疏通。再照舊章由甘省撥兵換防。並著戶部將此項官兵餉糈寬為籌撥。源源接濟。毋令缺乏。將此由五百里各諭令知之。○癸巳諭軍機大臣等。奕榕奕艾奏請飭催各省欠解俸餉等銀一摺。各省節年應解吉林俸餉等項銀兩。本年三月間僅據長蘆解過

銀三萬三千餘兩山東河南欠解吉林壬申
癸酉年地丁銀各六萬兩癸酉年俸餉銀十
萬六千餘兩長蘆欠解癸酉年鹽課銀二萬
六千餘兩又整裝銀五萬二千兩辛未壬申
兩年捕圍資裝銀二萬八千兩本年捕圍資
裝銀一萬四千兩均無一處報解著李鴻章
丁寶楨錢鼎銘卽將未解吉林俸餉等銀星
速源源報解以資接濟盛京節次截留吉林
俸餉尚有二萬五千兩未經歸款著志和迅

速籌還知照奕榕等派員領取以清款目嗣
後遇有各省解到吉林俸餉銀兩毋再截留
以免輟轡將此由五百里各諭令知之○山
海關副都統訥蘇肯因病解職調正藍旗漢
軍副都統常星阿為山海關副都統以御前
侍衛索布多爾扎布為正藍旗漢軍副都統
○補鑄青海右翼扎薩克印信從西甯辦事
大臣豫師請也○甲午順天府以宗室鄉試
中額請得旨著取中七名○乙未盛京將軍

都興阿等奏朝鮮使臣被劫請將地方官摘
頂勒緝得旨慶麟余文鳳均著先行摘去頂
帶勒限三箇月嚴緝務獲○旌表守正捐軀
河南尉氏縣民婦楊孫氏○丙申遣官祭賢
良祠○諭軍機大臣等景廉奏派援巴哈兩
城並擬親往督隊暨請飭金順出關左宗棠
籌辦軍糧請派署哈密幫辦大臣常順等奏
派隊協勦各摺片關外回匪竄擾巴哈兩城
哈密被圍甚急景廉現派吉爾洪額沙克都

林扎布統帶馬步隊前往救援惟此股回逆
人數甚眾悍賊尤多非厚集兵力難圖勦洗
著景廉飭令吉爾洪額等兼程前進迅速馳
援該都統將濟古兩處防守妥為布置卽著
督帶兵勇親往援應毋稍稽遲該處地方為
西進大軍糧運後路刻下哈密城圍甚急萬
一稍有疏虞則不獨西進大軍糧路阻絕卽
肅州全局亦為掣動金順前有帶兵西進之
請現在關外情形較關內十分緊急該前將

軍曾否起程著懷遵疊次諭旨趨程前往並先撥得力官兵星馳前進會同明春各隊迅解哈密之圍並著左宗棠飭令各屬認真籌辦軍糧在玉門地方安設轉運糧臺以資接濟該大臣仍當懷遵前旨速撥勁旅數營馳赴巴哈兩城迅掃賊氛毋得顧此失彼金順一軍屢次嚴諭剋期出關現在哈密被圍情形如此緊急若再遷延不進致誤事機定將金順從重治罪左宗棠所部兵力甚厚儘可

分撥出關刻下關外賊勢鴟張巴哈兩城盼援甚急若坐視不救致該城稍有疏失定惟左宗棠是問明春現已簡放哈密幫辦大臣責無旁貸著卽督率官兵認真勦辦力解城圍該城防守事宜著文麟就現有兵力妥為布置毋稍貽誤巴里坤與哈密毗連東西北三路皆有賊匪竄擾著慶壽勤加偵探固守城防嚴飭兵勇遇賊卽擊常順等已派察哈爾一起官兵馳往巴里坤一帶會同前次派

出達密蘭防軍共圖援勦卽著飭令該官軍迅赴前敵實力勦勦儻事機緊急仍著常順多木沁扎木楚文奎就近撥兵前往以資援應毋得稍分畛域將此由六百里加緊諭知左宗棠常順多布沁扎木楚文奎景廉金順文麟明春並傳諭慶壽知之○以哈密幫辦大臣錫綸為烏魯木齊領隊大臣正紅旗蒙古卽補前鋒參領明春為哈密幫辦大臣○予故大學士兩江總督曾國藩入祀江南江

甯府暨上元江甯二縣名宦祠從總督李宗義請也○予故江蘇候補鹽運使李昭慶祭葬卹廕加等如軍營病故例○丁酉諭軍機大臣等左宗棠豫師奏請飭催赴藏迎接呼畢勒罕之大臣等迅速前行一摺此次赴藏迎接哲布尊丹巴呼畢勒罕之庫倫堪布喇嘛等早由西甯出口赴青海草地駐牧所有改派庫倫車臣汗部落貝勒車林桑都布尚無入甘消息該堪布等一千餘人守候三月

之久若再遲延轉瞬天時嚴寒長途難以行走情形更屬苦累著張廷岳阿爾塔什達查明該貝勒現在行抵何處催令迅速前進與先到之堪布人等一同起程赴藏以免耽延前派寶珣赴藏迎接呼畢勒罕因中途患病准其開缺回旗改派恩麟俟承繼到任交卸藏務後就近護送起程赴庫本日復寄諭該前駐藏大臣遵照辦理矣將此由五百里各諭令知之○又諭恩麟奏查明革員縱番滋

鬧請將抗違不到之僧俗番官噶布倫等革職審辦一摺革員王來儀私通外番結盟滋事一案有牽連番目重情乃供出之噶布倫策旺邊壩覺爾四品中譯依喜冲批等屢傳不到此案既經眾供確鑿豈容該噶布倫等延不到案任意抗違必須嚴行提訊以期水落石出現充商上噶布倫策旺邊壩覺爾並僧官四品中譯依喜冲批等均著卽行革職由該大臣等提同革員王來儀並門丁高升

等按照指供各情詳訊明確按律定擬具奏前有旨令恩麟護送哲布尊丹巴之呼畢勒罕前赴庫倫著恩麟懍遵前旨俟交卸藏務並車林桑都布暨庫倫堪布喇嘛等到藏後卽速護送起程毋稍延緩將此由五百里各諭令知之○戊戌諭軍機大臣等內閣學士宋晉奏近畿連年被水請飭以工代賑一摺據稱直隸河道漫溢連歲水災與其併力籌賑不如擇要修工請飭該督以現撥帑金酌

提一半拯恤災區以一半趕擇河道緊要者速為修治工賑兼施兩收其效至現撥帑金尚不敷用並飭續撥款項以成鉅工等語近年以來直省河患頻仍亟宜設法疏治期於一勞永逸至宋晉所陳辦法是否可行著李鴻章統籌全局悉心酌覈迅速具奏原摺著鈔給閱看將此諭令知之尋奏直隸河患日深亟應工賑並舉擬明春開辦天津引河及上游隄河各工俾災黎藉資傭趁除撥用各

省協款外不敷之數請由藩庫提用事竣報銷從之○以故青海扎薩克頭等台吉永魯布子丹增緯克都布襲職○以大理寺卿蘇勒布為都察院左副都御史○己亥世宗憲皇帝忌辰遣官祭

泰陵○

上詣

壽皇殿行禮○辛丑追予浙江杭州陣亡外委

張朝陽祭葬世職○壬寅湖南巡撫王大韶

奏記名總兵官謝光勝呈請更名晉鈞下部知之○癸卯諭內閣前據御史沈淮奏戶部主事楊鴻典有攬權納賄等情當經降旨交刑部審訊茲據該部奏稱咨行戶部調取楊鴻典經手案件詳加查覈尚無弊端惟該員於辦理孫承洛報捐一案未於案內聲敘黏連實收換照字樣其丁壬等報捐一案該員於出差期內批呈亦屬不合請旨議處等語楊鴻典著交部議處○諭軍機大臣等文麟

奏回匪圍攻營堡調隊應援請飭部撥銀兩各摺片陝回大股會合東路竄匪偏脅纏頭回眾圍攻哈密城堡勢甚猖獗亟應迅速勦洗文麟現已咨會景廉金順派兵救援前據景廉奏巴哈軍務緊迫該都統已派吉爾洪額沙克都林扎布帶隊援應即著景廉飭令孔才並派出各隊兼程前進該都統將濟古兩處防務布置妥協即懍遵前旨督率兵勇迅速回援毋稍遲緩明春已授哈密幫辦大

臣迅即督率兵勇前赴哈密會同勦辦金順一軍屢次諭令出關現在哈密情形緊急務當迅率所部剋期起程毋再遷延干咎回王福晉暨伯克頭目等深明大義均屬可嘉回城被匪攻陷後該王福晉等現在何處著文麟查明具奏並傳諭該王福晉等迅速招集回眾毋任去而從賊左宗棠當懍遵疊次諭旨分撥兵勇出關助勦一面兼顧金順糧運毋令缺乏肅城賊勢久感該大臣親赴前敵

督勦軍聲日振卽著激勵將士趕緊進攻迅
將城池克復並嚴防窮蹙敗匪乘間逃竄出
關是為至要統領魏忠義打仗失利文麟請
將該員革職並自請治罪本屬咎有應得姑
念賊眾兵單情尚可原均著加恩寬免仍責
成該辦事大臣就現有兵力將城防事宜嚴
密布置不得稍有疏虞致干嚴譴哈密餉
迫切所需兵糧由各路採買均應速撥款項
以濟要需著戶部撥發軍餉現銀十萬兩糧
價現銀五萬兩解交察哈爾都統衙門收存
由文麟委員候補道常祥等領解赴哈俾供
支放將此由六百里各諭令知之○以捐備
軍械予候補三院卿崇禮以副都統簡放○
乙巳以甘肅甘州府城解圍並殲勦山丹土
匪出力賞總兵官楊智珩一品封典參將劉
楚賢等花翎知縣楊世鍾等藍翎餘加銜升
敘有差○賞普濟堂功德林煮賑小米八百
石

大清穆宗繼天開運受中居正保大定功聖智
誠孝信敏恭寬毅皇帝實錄卷之三百五十六

大清穆宗繼天開運受中居正保大定功聖智
誠孝信敏恭寬毅皇帝實錄卷之三百五十七

數年

同治十二年癸酉九月丙午朔

上詣鐘粹宮問

慈安端裕康慶皇太后安長春宮問

慈禧端佑康頤皇太后安至乙亥皆如之○奉

慈安端裕康慶皇太后

慈禧端佑康頤皇太后幸漱芳齋侍午膳○遣

官祭

歷代帝王廟○戊申遣官祭

都城隍之神○己酉諭軍機大臣等崇實奏

勦辦賊匪獲勝情形一摺匪首莊洛三等在

哈立套力改地方聚眾焚掠分股圖犯朝陽

縣境經崇實派令署知縣陳本植等帶隊進

勦立將股匪擊散莊洛三率黨退回巢穴官

軍跟追圍勦殲斃賊黨多名賊始逃竄該匪

竄回靠邊屯將其家屬送往賓圖王旗藏匿

復被奉省官兵中途截擊熱河馬隊焚毀賊

巢沿途追殺擒獲悍黨屈幅潰等正法勦辦

尚為得手惟東荒地方遼闊匪首莊洛三等

現尚逃逸著崇實督飭派出兵勇及古北口

練軍探蹤搜捕都興阿亦當檄令奉省官兵

會同兜擊務將首要各犯悉數殲除以靖地

方毋令死灰復燃致成滋蔓將此各諭令知

之○以內閣學士祥泰為鑲藍旗漢軍副都

統○旌表守正捐軀河南鄭縣民女連氏○

庚戌諭軍機大臣等劉嶽昭等奏請將湖北

每月撥解提督馬如龍專餉仍解雲南藩庫

等語現在雲南軍務告竣辦理善後待餉孔

殷著李瀚章郭柏蔭將每月應撥馬如龍專

餉銀二萬兩卽行停止仍舊撥解重慶轉運局解交雲南藩庫以濟要需將此由四百里各諭令知之○又諭張廷岳等奏請飭催各省協餉一摺據稱庫倫防兵協餉山東欠解銀十萬兩山西欠解銀七萬兩河南欠解銀一萬五千兩疊據張廷岳等咨催迄今尚未報解現在庫倫需餉甚殷請飭催迅解等語著丁寶楨鮑源深錢鼎銘迅速如數籌解派委妥員解交察哈爾都統衙門收存由張廷岳等派撥官兵赴口領解回庫以濟要需將此由四百里各諭令知之○以記名提督楊盛宗為雲南騰越鎮總兵官○撥神機營火藥一萬斤轟藥一千斤火繩三千條交庫倫委員領回備用○辛亥諭軍機大臣等常順等奏探報竄賊情形請調員統帶防軍哈密委員運解軍械中途遇賊各摺片回匪大股出關滋擾圍攻哈密其另股竄向諾木托羅益地方常順等現今達密蘭率所部迎勦並

飭依楞額帶隊赴巴里坤臺路駐紮以遏三塘湖等處竄匪卽著督令該官兵等嚴密堵禦確探匪蹤實力勦擊已哈軍情緊要並著常順多布沁扎木楚文奎懍遵前旨檄飭防軍前往援應以勦為防不得意存畛域逆匪股數眾多邊外地方遼闊亟需厚集兵力以杜奔突著杜嘎爾卽將現駐綏遠城臺路之察哈爾馬隊移紮哈爾尼敦用資防勦哈密被圍情形岌岌景廉自己帶隊回援卽著督飭吉爾洪額等軍星馳勦辦迅解城圍文麟當就現有兵力穩慎防守明春卽率所部馳抵任所掃蕩賊氛金順一軍此時已否起程卽著懍遵疊次嚴諭剋日馳往援勦該軍糧運左宗棠當飭地方官妥速籌辦俾師行得以無阻並懍遵前旨派委得力將弁前往會勦肅州一城疊據左宗棠等奏勢在垂克該大臣復親往督師諒不難一鼓攻拔近日戰事如何著卽詳悉奏聞以慰廑繫前派赴榮

全軍營之侍衛特爾清阿准其調赴烏城以資得力。哈密委員運解軍火被賊搶掠當經官兵奪回著飭俟臺站疏通再行護解前進。毋資寇兵將此由六百里各諭令知之。○癸丑諭內閣都興阿等奏恭修

福陵

隆恩殿請擇吉移請

神牌安奉

東配殿一摺著欽天監於未開工以前敬謹

選擇吉期迅速具奏。又諭都興阿銘安奏被控要證屢提不解請旨飭緝一摺直隸民人楊顯控告拉莫海喇嘛率領蒙古色卜克等謀害伊兄楊明楊盛一案拉莫海喇嘛等屢傳未到色卜克等恃無證據堅不承認該旗並不將案內要證認真拘解以致案懸不結實屬不成事體著理藩院飭令達爾漢王旗勒限飭屬將拉莫海喇嘛即阿玉璽喇嘛朱爾哈歹即朱夏原報人拉必在脫逃人卜

虎伯彥圖即卜呼保音圖台吉薛各里即崔拉科蒙古間會即間魁蒙婦夏斯臺即楚窪東太應訊人達瓦甯保屯達碧機罕拉馬落卜齋張記等按名嚴緝務獲及原辦此案卷宗一併解案以憑質訊。另片奏蒙古案件犯證未解開單請旨飭催等語著理藩院按照都興阿等單開各案即飭各該旗勒緝被控犯證務獲歸案訊辦不准稍有延宕。○諭軍機大臣等托倫布保英奏派隊防剿一摺陝

回竄擾巴里坤哈密並分踞三塘湖地方昨據常順等奏已派隊扼紮巴里坤臺路以資截擊惟三塘湖等處近接科城屬境且扎哈沁八臺轉遞各路軍火餉需關繫尤為緊要現經托倫布等派令蘇那穆策麟等統帶黑龍江馬隊前往扎哈沁屬伯多滾察漢淖爾一帶駐紮防剿即著飭令派出員弁認真探防遇賊即擊毋任擾及臺路所有科城防守事宜並著托倫布等就現有兵力妥為布置

以杜窺伺將此由四百里各諭令知之○乙卯諭內閣李瀚章等奏土匪滋事擒獲首要各犯懲辦一摺湖南臨湘縣藥姑山地方於本年七月間突有土匪傅春林等聚黨結會搶劫滋事李瀚章等飭令提督劉維楨等帶兵前往會拏該匪膽敢拒捕經派出各軍先後擒獲匪首傅春林等並匪黨多名訊明正法其竄逸之匪該提督等分投搜拏續獲王沈保等審明懲辦並將匪巢平毀地方一律肅清湖南會匪疊經滋事現雖立時撲滅仍恐伏莽未淨復行勾結為患著李瀚章郭柏蔭王文韶督飭文武各員會同嚴密搜查以靖地方並著飭令地方官力行保甲毋得徒託空言○以湖南臨湘勦辦土匪出力予署知縣沈翼等議敘有差○丙辰諭軍機大臣等工部奏請飭催硝斤一摺直隸等省應解工部硝斤屢催未解經該部奏請勒限嚴催現在限期將滿尚無一處報解硝斤為操練

要需且外省時有奏撥尤須豫為籌備豈容日久宕延著萬青藜彭祖賢李鴻章丁寶楨錢鼎銘嚴飭承辦各員迅速辦齊按批埽數運解毋再遲延將此諭知萬青藜彭祖賢並諭令李鴻章丁寶楨錢鼎銘知之○丁巳諭軍機大臣等杜嘎爾奏嚴布防探豫籌堵擊一摺陝回出邊撲犯巴哈等處哈密被圍甚急前經諭令該副都統將現駐綏遠城臺路之察哈爾馬隊移紮哈爾尼敦用資防勦即著杜嘎爾懍遵前次諭旨迅速移紮毋誤戎機一面嚴飭派出官兵巡護糧路勤加偵探遇賊即擊毋稍疏虞另片奏請飭山西將撥補餉銀迅即籌解等語此項餉銀係該省應行抵還杜嘎爾劃撥之款現在該營防勦正急需餉甚殷著鮑源深迅將應行撥補餉銀二萬五千兩趕緊籌備務於九月內解至察哈爾以濟急需毋得稍有延緩將此由五百里各諭令知之○戊午諭軍機大臣等常順

等奏請揀調蒙兵赴烏防勦一招陝回大股圍撲哈密烏里雅蘇台界據探亦有匪蹤出沒該處為各城咽喉道路分歧非有得力騎兵不足制賊奔突常順等請於察哈爾八旗蒙古官兵內揀調馬隊一千名卽著額勒和布奎昌照數挑選飭令迅速赴烏防勦該隊統帶需員據奏副都統銜頭等侍衛永德熟悉蒙部情形現隨神機營當差著神機營王大臣卽飭該員就近赴察哈爾於該蒙兵內

擇其年力強壯曾經戰陣者挑選足數統帶赴烏並著該營轉飭正白旗三等侍衛倭恆額幫同永德照料前往該營王大臣卽飭永德等帶領該隊先行分起由臺行走俟到烏後由常順等籌給馬匹以資乘騎仍著額勒和布等迅速由察哈爾挑備膽壯戰馬二千匹於來歲草生臚起時解送烏城俾利攻勦不得遲誤將此諭知神機營王大臣並由五百里諭令常順多布沁扎木楚文奎額勒和

布奎昌知之○以戶部右侍郎桂清為繕譯鄉試正考官通政使司通政使桂豐為副考官○己未諭內閣劉長佑奏請將販私漏釐之縣丞革職等語縣丞吳浩然借欠丁憂知縣周文煥舊債未償販私圖利偷漏釐金實屬行同市儈有玷官箴著卽行革職周文煥本無緝私之責乃因扶嫌稟計吳浩然販私漏釐並欲將伊所販貨物充公代償宿欠尤屬無賴委員從九品楊福淵既將私販之貨

起獲復又顓頊稟報周文煥楊福淵著一併暫行革職提審明確分別懲辦以儆官邪尋奏吳浩然販私屬實業已革職應無庸議周文煥稟計吳浩然雖無串謀別情惟請將貨物充公冀償宿欠實屬鄙陋應開復原叅處分以縣丞降補楊福淵據事稟報尚非有意顓頊原叅處分應請開復下部議從之○以聽斷乖謬革廣西知縣趙元音職○庚申諭內閣監試御史福寬游百川奏試卷編號錯

誤開單呈覽一摺。本科順天鄉試頭二三場紅號不符試卷至有三十一本之多並有滿卷與合卷互編錯亂實非尋常疏忽可比著監臨提調查取職名交部照例議處。此次場內試卷編號錯誤該監臨等何以並未奏聞著將因何錯誤及有無弊竇之處查明據實具奏。○辛酉月食。○旌表守正捐軀直隸獻縣民白桓女鏡姐。○命於安定東直朝陽德勝西直阜成六門外設廠煮賑並賑宛平縣貧民粟米一千八百石。○賞通州煮賑粟米一千石。○壬戌諭內閣訥仁奏遵查專案工程請派員承修一摺

西陵東口子門內石橋迤東御道工程著派本年承修專案工程之大臣毛昶熙一併敬謹承修。○諭軍機大臣等喬松年奏黃河險工疊出請再添撥銀兩等語本年寒露後上南河廳及中河廳各堡險工疊出前次添撥之款不敷應用自應再行籌撥以資修防著錢

鼎銘督飭藩司於歷年節省防險項下再行添撥銀五萬五千兩於年內全數撥發不得遲誤。喬松年於此項解到後務當嚴飭道廳各員覈實散放認真防護以免疏虞將此由四百里各諭令知之。○河東河道總督喬松年奏報秋汛安瀾命詣

河神廟祀謝出力員弁升敘有差。○癸亥諭軍機大臣等景廉奏續派馬隊馳援哈密一摺據稱陝回大股現在竄往紅廟子地方恐該逆西竄則古城防務更形喫緊該都統未能帶兵赴哈現添派營官田錫禮等帶隊前往應援等語即著景廉飭令該營官等星馳前進並飭前派赴哈密之吉爾洪額等迅速進剿立解城圍刻下古城防務固屬緊要而哈密盼援尤急該都統務當斟酌情形妥籌兼顧文麟當就現有兵力妥為防守毋稍疏虞。明春著懷遵前旨迅率所部前赴任所力埽逆氛左宗棠此時已否撥兵赴哈會勦務

當迅派得力將弁前往救援毋稍延緩金順一軍疊經諭令出關該前將軍卽督率隊伍剋日馳往援勦該軍糧運仍著左宗棠飭地方官妥為辦理俾利師行刻下肅州情形若何殊深廕繫左宗棠親赴前敵自不難立拔堅城著卽督飭各軍奮力攻克迅奏膚公以靖邊圉將此由六百里諭令知之○又諭袁保恆奏請飭催欠餉等語據稱廣東應解左宗棠軍餉每月原協並添撥共銀七萬兩該

省按季撥解銀十五萬兩解至同治十一年冬季止尚短解本年春夏秋三季銀四十五萬兩若照月撥七萬兩之數覈計截至本年八月止除現准報解銀十五萬兩外共欠解原協銀四十八萬兩添撥銀八十八萬兩現在士卒待餉孔殷請飭迅速撥解以濟急需卽著瑞麟張兆棟嚴飭藩司將本年應協甘餉趕緊按季補解其歷年積欠餉銀亦當陸續籌措解清儘再任意延緩卽由戶部將該

藩司照章奏請議處將此由四百里各諭令知之○又諭袁保恆奏請飭催欠餉等語山西河東道庫應撥協甘常年兵餉尚欠解銀三十一萬兩又歲協雷正綰營軍餉自改撥後共欠解銀十四萬二千兩現在西征軍餉支絀萬分亟應趕緊籌解以濟要需著鮑源深嚴飭河東道迅將欠解甘餉及雷正綰營協餉於年前如數趕解毋稍遲延並著飭令該道設法疏銷引鹽毋得以鹽課未裕藉詞

推諉將此由四百里諭令知之 甲子諭軍機大臣等文麟奏馬隊官兵勦賊疊勝接據敦煌稟報賊情並賊匪圍攻營堡請飭催援兵來哈暨軍糧缺乏請催錫綸回任各摺片所奏應援塔爾納沁及馬隊勦賊情形尚係閏六月間之事刻下賊匪勾結回城纏頭圍攻哈密營堡甚急前經疊次諭令左宗棠等迅速派兵援應乃各路官兵均無到哈信息該城日夜盼援事機刻不容緩吉爾洪額等

軍計已行抵巴里坤距哈甚近即著景廉飭令該副都統等趙程前進速解城圍文麟一面派員迎提母任藉故逗遛致誤大局景廉續派之馬隊三百名並著飭令田錫禮迅速統帶前往以資接應孔才所部馬隊並黑龍江馬隊景廉務當移緩就急飭令兼程赴哈會同各軍迅掃逆氛金順終未據報出關殊不可解該軍兵力頗厚即著懷遵疊次諭旨剋期前進並先派得力將領統帶馬隊星夜

馳援不得貽誤戎機致干重咎左宗棠此時諒已派隊起程著即催令派出官兵迅速前進毋稍遲延金順一軍糧運仍著該大臣飭令地方官妥為辦理錫綸已授為烏魯木齊領隊大臣所遺哈密幫辦大臣早已簡放明春屢經催令帶隊星馳赴哈即著會同文麟將該城防守事宜悉心籌畫以顧地方並將起程及到哈日期迅速奏聞文麟現在病勢若何殊深廬繫目下事機緊迫該大臣仍當

妥為籌布力任其難以期無負委任該城屯糧被賊搶掠軍食缺乏殊屬可虞著左宗棠景廉妥為設法力籌接濟將此由六百里各諭令知之○乙丑諭內閣李鴻章延煦畢道遠奏江浙漕糧海運抵津擬請改令糧道自行運通一摺向來江浙漕糧海運到津用官剝船運通交納乃行之既久滋生弊端本年海運白糧及輪船所載漕糧改由糧道自顧民船運通較用官剝船運送米色尚為乾潔

李鴻章等請將嗣後南糧變通辦理係為剔除弊端起見著照所議所有來歲江浙漕糧即著改由糧道運通交納毋庸在津驗收並著戶部兩江總督江蘇浙江各巡撫一體遵照辦理其應行變通章程著李鴻章延煦畢道遠悉心妥議具奏○又諭左右翼監督安興阿等奏上駟院咨報倒斃羸頭力難交納自請議處一摺據稱上駟院東西兩園此次咨報倒斃等羸至三十七頭應銷例價較之

市價不敷甚鉅無法設措請旨議處等語向來上駟院額養贏頭如有倒斃等情例由戶部覈准該院文移飭知兩翼如數交納該價卽於稅課項下開銷此次該院咨報倒斃贏頭至三十七頭之多實屬不成事體著戶部及上駟院堂官申明定例予以限制嗣後不准浮冒咨報以昭覈實至該兩翼應行交納贏頭例價不敷亦係實在情形應如何酌定章程之處並著戶部與上駟院妥為籌議奏

明辦理應需例價仍由兩翼在於稅課項下照章開銷毋得藉端推諉該監督所請議處著加恩寬免○丙寅諭內閣刑部奏已革烏魯木齊提督成祿押解到部請旨辦理一摺著派軍機大臣會同刑部審訊按律定擬具奏○又諭前據銘安奏職婦劉李氏控告伊夫劉嵩雲被已革防守尉岐山濫押身死一案請派大員嚴審當經降旨派廣壽前往審訊茲據該侍郎訊明具奏此案已革藍翎都

司銜馬兵趙錫武捏造假帳向捐納筆帖式劉嵩雲訛索未遂主使趙來昇控告已革廣甯防守尉岐山輒將劉嵩雲看押致該職員愁急莫釋乘間投井自盡趙錫武著照所擬絞監候秋後處決岐山濫押職官致釀人命著發往軍臺效力贖罪○補行同治十一年軍政湖北卓異官三員不謹官一員浮躁官一員罷輟官二員才力不及官一員湖南卓異官七員罷輟官二員才力不及官二員年

老官一員有疾官二員廣東卓異官四員不謹官四員才力不及官一員年老官二員分別議敘處分如例 賞五城貧民棉衣銀○丁卯諭內閣前據步軍統領衙門奏已滿徒犯李山壽遣抱赴京控告四川遂甯縣知縣盧光吉串通首府楊重雅等受賄冒功等情當諭令吳棠密查根究茲復據步軍統領衙門奏李山壽同伊妻李張氏來京呈控經該衙門研究據稱案久未結寃不能申等語此

案業經兩年之久何以該督尚未具奏著吳
棠按照所控各情迅速查明徹底根究毋稍
迴護○戊辰諭內閣穆騰阿富陞奏旗員擅
斃兵丁請旨革職派員審訊一摺江甯駐防
驍騎校受祿前因強取俸銀經穆騰阿等革
退錢糧交佐領多哈嚴行管束多哈因其不
安本分並不稟請懲辦輒將受祿擅行勒斃
實屬謬妄糊塗並據受祿之妻趙氏呈控多
哈係扶嫌陷害受祿防禦倭赫圖等並有在
場同謀情事虛實均應徹底根究藍翎佐領
多哈著卽革職防禦倭赫圖著暫行革職領
催吉康奎亮鑑華松華均著革退錢糧交李
宗義派員會同審訊按律定擬具奏○以光
祿寺卿惠林為大理寺卿○追予江西宜春
等處殉難團勇傅烈高等暨婦女一千一百
六十九名口分別旌卹如例 己巳諭軍機
大臣等額勒和布等奏揀調蒙古官兵赴烏
防勦請飭部迅籌銀兩一摺額勒和布等遵

旨 在 察 哈 爾 八 旗 內 挑 備 官 兵 一 千 名 籌 辦
軍 裝 口 糧 俟 侍 衛 永 德 到 口 會 同 選 定 分 起
管 帶 前 赴 烏 城 應 需 軍 械 等 項 不 敷 分 給 著
神 機 營 王 大 臣 籌 撥 烏 槍 二 百 桿 烏 槍 佩 帶
五 百 分 刺 刀 五 百 把 帳 房 三 百 架 配 齊 鑼 鍋
什 物 並 火 藥 一 千 斤 轟 藥 一 百 斤 火 繩 四 千
根 鉛 丸 六 千 出 由 額 勒 和 布 等 派 員 赴 京 請
領 以 資 應 用 此 項 官 兵 啟 行 已 由 額 勒 和 布
等 籌 給 三 箇 月 口 分 飭 令 各 臺 妥 為 照 料 並
援 案 雇 覓 蒙 古 駝 隻 送 至 哈 爾 尼 敦 交 替 其
行 抵 烏 里 雅 蘇 台 界 內 應 用 駝 馬 既 房 等 項
常 順 等 當 先 期 預 為 籌 備 派 員 至 哈 爾 尼 敦
守 候 接 辦 俾 免 耽 延 以 後 該 官 兵 月 餉 著 常
順 等 接 續 開 放 毋 令 缺 乏 如 須 續 用 糧 石 卽
著 額 勒 和 布 等 知 照 李 鴻 章 添 籌 款 項 交 口
北 道 購 辦 源 源 接 濟 察 哈 爾 籌 備 征 兵 需 用
甚 亟 餉 項 短 缺 著 戶 部 迅 撥 部 庫 銀 十 萬 兩
解 交 額 勒 和 布 等 撙 節 動 用 前 次 部 撥 山 東

山西地丁銀各三萬兩河南地丁銀四萬兩日久尚未報解著丁寶楨鮑源深錢鼎銘各飭藩司迅速如數籌撥解往察哈爾應用毋再遲延額勒和布等已在牧羣內挑備戰馬二千匹俟來歲草生臆起時解送烏城屆期仍著該都統等揀派妥員管解前往毋令疲乏所有截留河南餉銀一萬兩自為歸還墊款起見惟景廉軍營需餉甚急哈密現又被圍嗣後不得隨意截留以期彼此兼顧將此

諭知戶部神機營並由五百里諭令常順多布沁扎木楚文奎額勒和布奎昌丁寶楨鮑源深錢鼎銘知之○庚午諭內閣王文韶奏匪徒滋事拏獲懲辦一摺湖南安化縣地方茶市最盛向有防營礮船前往彈壓本年六月間突有匪徒在與安化水路直達之益陽縣沙頭地方焚毀礮船溺斃哨弁謀搶茶行當由該地方文武拏獲魏老一等多名經王文韶提省訊明分別懲辦地方現已安靜其

在逃之匪首袁名揚仍著該撫嚴拏務獲究辦○予湖南安化被戕外委王福嘉祭葬世職○辛未旌表守正捐軀江蘇碭山縣民女侯二姐河南鄧州民婦楊倪氏○壬申孝慈高皇后忌辰遣官祭

福陵○諭軍機大臣等寄諭直隸總督李鴻章朕今歲親政後春閒恭謁

東陵稍申孺慕明歲新正即當降旨恭詣

西陵惟來年清明節氣較早俟降旨後修墊道

路橋梁恐難如期趕辦今冬農隙能否先行次第興工直隸今歲被水道路能否暢行此次工程不能不藉資民力尤恐被災處所民力難支均著該督酌度情形據實具奏將此諭令知之○又諭前於七月間據左宗棠奏圍攻肅城踞逆情形並親赴前敵督勦該逆踞守孤城經官軍於克復東關後復於大南門外偏城修築礮臺營卡賊匪飛走技窮諒不難剋期攻拔乃迄今兩月未據該大臣續

有奏報庫繫殊深現在關外陝回到處勾結勢極猖獗哈密被圍甚急萬一肅逆被勒窮威竄出關外與各匪聯絡一氣又成滋蔓難圖勢將不可收拾即使肅城克復而關外受害不可勝言大局何堪設想左宗棠計已早抵肅州著卽督飭官軍力籌進剿迅拔堅城務將該逆悉數聚殲萬不可使城賊乘間竄出致貽大患哈密被圍日久業經疊諭該大臣迅速派兵往援究竟調撥何隊前往哈密

為西路要隘斷不可稍有疏虞仍著左宗棠懍遵疊次諭旨速卽派兵兼程前進迅解城圍力籌兼顧金順一軍曾否出關並著催令該前將軍懍遵疊諭星馳前赴哈密毋稍延緩致誤戎機所有圍攻肅州及馳救哈密各情形著該大臣迅速詳細奏聞以慰懸盼將此由六百里諭令知之○又諭前因袁保恆奏閩海關協餉指撥六成洋稅無著請飭部仍准借撥四成洋稅或另撥他處有著之款

等語當令戶部速議具奏茲據奏稱各海關四成洋稅業經奏明不准動用前撥閩海關六成洋稅項下應解雷正綰月餉二萬兩為數無多該關尚易籌措請令照舊籌解至西征年終專餉十萬兩現在洋稅短絀恐難兼顧請在福建江蘇釐金項下改撥等語著照該部所議卽著文煜將雷正綰月餉二萬兩仍在六成洋稅項下按月撥解不准推延並著李宗羲李鶴年張樹聲王凱泰督飭各藩

司在於該兩省釐金項下各撥西征年終專餉五萬兩務於年內解交西征糧臺不得稍涉遲誤將此由四百里各諭令知之○以鑲黃旗蒙古副都統尚宗瑞兼署右翼前鋒統領正黃旗蒙古副都統明瑤兼署正紅旗滿洲副都統 癸酉諭軍機大臣等給事中陳鴻翔奏奉省禁運糧米出口請飭開禁一摺據稱直隸等省向賴奉天販運糧米接濟近幾連年被水待食尤殷現聞各海口禁止紅

糧包米粟米出境恐於畿輔民食有礙且該處存糧尚多一經禁運存糧不能出售更恐穀賤傷農請飭開禁以期便民等語著都興阿志和恭鏜體察情形酌覈辦理原摺均著鈔給閱看將此各諭令知之○又諭劉長佑奏土豪被控抗審現在籌辦情形一摺廣西南丹土豪莫雲義藉團恣暴為害地方其子莫五兇狡尤著屢被控告莫雲義竟匿居蠻洋山寨恃險負隅抗不到案該土豪稔惡多年漸形跋扈亟應捕拏懲治以儆刁頑劉長佑以該處地險寨堅驟難擒獲並聞其與黔省苗匪聲氣相通尤恐被勒窮蹙遁入苗寨重煩兵力該撫現已增調練勇二三營派員統帶前往勦捕馮子材熟悉該處情形即著就近督飭各營相機進勦務將莫雲義弋獲毋令漏網並著曾璧光酌撥兵勇扼紮交界地方以杜竄越毋任乘間潛逃致與苗匪勾結莫雲義到案後即著劉長佑將被控各情

逐一根究盡法懲治莫如勤等有無受賄蒙稟等情仍著劉長佑查明辦理另片奏遵查陳得貴等一案等語陳得貴業因另案叅革李玉墀究竟現在何處有無不法情事仍著該撫密飭劉玉成確切查明並俟湖北雲南各督撫查覆後悉心覈辦將此由四百里各諭令知之○補鑄安徽鳳陽縣教諭條記從巡撫英翰請也○以貴州勦平苗匪出力賞提督羅長春一品封典道員張觀鈞總兵官

沈長齡李萬明張三元向恆信袁鶴齡鄧仁和副將劉青煦李榮才謝三陽秦玉佩黃錦昌張高禮廖長春莫連勝張元龍莫聯陞邱俊書何雄光參將王開旗黎應昌高德元黃允中張棟張經綸宋定元李上榮遊擊張起洪巴圖魯名號道員周兆麟副將劉文桂等花翎知州羅錦城等藍翎餘加銜升敘有差○予貴州軍營病故提督宇文秀祭葬卹廕諡武愍交國史館立傳與陣亡提督文德盛

合建專祠○

上以孟冬時享

太廟自是日始齋戒三日○甲戌

孝敬憲皇后忌辰遣官祭

泰陵○漕運總督文彬奏報秋汎安瀾命詣

河神廟祀謝○乙亥以直隸永定河漫口合

龍開復總督李鴻章道員李朝儀等處分賞

同知張毓先等花翎主簿劉慶長藍翎餘加

銜升敘有差○減免兩浙浦東橫浦袁浦三

場歉收地方上年寬課

大清穆宗繼天開運受中居正保大定功聖智
誠孝信敏恭寬毅皇帝實錄卷之三百五十七

[illegible]

同治十二年癸酉冬十月丙子朔享

上親詣行禮○遣官祭

福陵

昭陵

昭西陵

孝陵

孝東陵

景陵

秦陵

泰東陵

裕陵

昌陵

昌西陵

慕陵

慕東陵

定陵遣官祭

端慧皇太子園寢○詣鍾粹宮問

慈安端裕康慶皇太后安○長春宮問

慈禧端佑康頤皇太后安至乙巳皆如之○奉

慈安端裕康慶皇太后

慈禧端佑康頤皇太后幸漱芳齋侍午膳○頌

同治十三年時憲書○諭軍機大臣等崇實

奏熱河防勦需餉甚急請飭直隸將欠解不

敷經費先行籌撥等語直隸向來按年籌撥

熱河不敷經費現計積欠至十萬數千兩之

多刻下該處調撥兵勇防勦沿邊賊匪需餉

甚殷。著李鴻章飭令藩司迅於欠發此項銀兩內先行籌撥銀二三萬兩以應急需其餘積欠款項並著陸續撥發毋再拖延將此諭令知之○以直隸朝陽勦擒竄匪擢署知縣陳本植以知府用並賞花翎知縣朱灝藍翎參將左寶貴王文順均以副將補用○丁母諭內閣御史沈淮奏請暫緩修理圓明園一摺現在帑藏支絀水旱頻仍軍務亦未盡藏朕躬行節儉為天下先豈肯再興土木之工

以滋繁費該御史所奏雖得自風聞不為無見惟兩宮

皇太后保佑朕躬親裁大政十有餘年劬勞倍著而尚無休憩遊息之所以承

慈歡朕心實為悚仄是以諭令總管內務府大臣設法捐修以備

聖慈燕憩用資頤養但物力艱難事宜從儉安佑宮係供奉

列聖

聖容之所暨兩宮

皇太后駐蹕之殿宇並朕辦事住居之處略加修葺不得過於華靡其餘概毋庸興修以昭節省將此明白通諭中外知之○諭軍機大臣等都興阿奏請添調防軍一摺奉天地方遼闊時有賊匪嘯聚勾結巡緝防勦未可稍疏該省分防各路官兵尚須汰弱留強亟應厚集兵力以資防勦著奕榕德英即行挑選精壯馬隊官兵各一百名揀派委參領以下

等官管帶前赴奉省由都興阿分撥調遣並著該將軍飭令分防各軍認真拔巡實力勦捕以靖地方而消邊患將此由四百里各諭令知之○又諭總理各國事務衙門奏川省毆斃司鐸教士現籌辦理情形一摺據稱接准魁玉等函稱法國主教范若瑟遣教士張紫蘭潛赴黔江縣私買民房建堂傳教致該縣民人將司鐸余克林教士戴明卿毆斃與法國使臣照會所述不符請飭魁玉等迅速

查辦等語四川黔江縣民人既有毆斃司鐸教士之案自應查訊明確及早持平辦結方足以服該主教之心免致另生枝節若日久耽延轉使該主教有所藉口且恐民心煽動將來民教滋事之案愈多辦理更形棘手著魁玉吳棠將此案詳細實情先行具奏一面嚴飭該地方官將案內下手正兇及幫毆從犯嚴緝務獲訊明起釁根由分別按律懲辦並將現在辦理情形隨時咨明總理各國事務衙門以憑覈辦不得稍涉遲延將此由六百里各諭令知之○戊寅賞八旗暨步軍營綠營兵丁一月口糧○己卯諭內閣常順等奏更定蒙古差使章程並請將藉詞抗玩之盟長等分別懲處一摺烏里雅蘇台屬四部落連年被災較重差使難支經該署將軍等以科布多屬杜爾伯特所管各部尚稱繁庶議將科屬屯田兵役及嚮道差使並北八臺臺站令杜爾伯特接充辦理該盟長僅認充

北八臺之差其餘堅不承允復經該署將軍等以屯田差使現係喀爾喀兵二百名服役耕種該部落苦累情形不能支持擬將喀爾喀屯田兵丁撤回一半歸杜爾伯特接充乃該盟長不但於此項差使任意抗違並將認充北八臺之差又復牽混謾卸實屬不顧大局杜爾伯特左翼署盟長貝子沙克都爾扎布右翼盟長棍布扎布著交該衙門照例嚴加議處科城行營理藩院司員主事職銜托

莫爾歡從中播弄以致兩次率行咨覆任令該盟長等抗玩難保無受賄情事著即行革職交托倫布保英嚴行查辦至常順等所擬令杜爾伯特更充屯田一半兵役之處即著托倫布等飭令遵照辦理以昭平允而恤災區尋理藩院議沙克都爾扎布棍布扎布均應降四級調用係蒙古照例各折罰扎薩克俸七年不准抵銷從之○諭軍機大臣等常順等奏圍偏哈密賊匪業經西竄現籌防勦

順等奏圍偏哈密賊匪業經西竄現籌防勦

一摺據稱景廉派撥沙克都林扎布等已經帶隊由巴里坤赴哈賊匪現向吐魯番一帶逃竄等語刻下賊蹤雖已西竄而哈密城防未可稍鬆該處現在布置情形若何著文麟就現有兵力將防守事宜悉心籌畫景廉亦當懍遵前旨妥籌兼顧均勿稍涉大意其竄赴吐魯番賊股並著景廉派兵勦擊就地殲除毋任分竄常順等以關內外與喀爾喀處處毗連現仍派達密蘭所部馬隊駐紮瑪呢達爾旗界以護蒙古遊牧卽著飭令該員加意防護毋令賊蹤竄越仍著常順等勤加偵探如哈密軍情緊急卽飭達密蘭帶隊馳援不得稍分畛域並著飭依楞額馬隊防護巴里坤臺路毋稍疏虞明春此時已否赴哈著懍遵疊次諭旨迅速帶兵馳往與文麟會商防勦毋稍遲延將此由六百里各諭令知之

又諭常順等奏請飭催積欠銀兩一摺據稱山西奉撥烏科兩城官兵臺站應支額餉

每年需銀八萬五千兩除同治九年如數清解外以後均有帶欠統計欠解十年十一年歲餉三萬八千餘兩本年分毫未解現在兵丁情形困苦待餉孔殷請飭迅速撥解等語著鮑源深飭令該藩司卽將欠解同治十年十一年額餉三萬八千餘兩及本年歲餉八萬五千兩新設蘇木臺站弁兵鹽菜銀二千兩趕緊照數解交常順等軍營俾供支放其同治二年以後山西尾欠之餉據稱均未解清著一併分款補解毋得再事遷延將此由四百里諭令知之○庚辰諭內閣吳棠奏特參未能勝任各員等語四川鹽源縣知縣裘嗣錦年老多病難膺民社著以原品休致梁山縣知縣沙藻生人尚謹飭難勝繁劇著撤任俟有相當缺出另行補用○以四川官軍防勦雲南逆回暨歷次勦匪出力賞總兵官劉寶國黃馬褂提督李有恆一品封典參將向忠同知彭祿等花翎守備龔開明等藍翎

餘加銜升敘有差○追予四川樂山等處陣亡殉難紳民羅廷俊等暨婦女六十五名口分別旌卹如例○辛巳以履勘

普祥峪

菩陀峪萬年吉地出力予主事張元益等加銜升敘有差○補鑄貴州都勻府知府青谿縣知縣貴定綏陽二縣儒學大定協副將都司各印信關防條記從巡撫曾璧光請也○壬午山東巡撫丁寶楨乞假修墓以漕運總督

文彬署山東巡撫江蘇布政使恩錫署漕運總督○甲申

上奉

慈安端裕康慶皇太后

慈禧端佑康頤皇太后幸漱芳齋侍午膳○諭軍機大臣等景廉奏請停止運糧以紓臺力文麟奏固守哈密擊賊獲勝托倫布等奏賊犯科屬撥隊迎勦各一摺哈密被匪圍攻日久經文麟督率兵勇實力攻勦力保危城洵

堪嘉尚此股賊匪經官軍截勦獲勝後曾否他竄前據常順等奏探得哈密賊蹤有西竄吐魯番之信是否分股西擾抑係探報不確即著文麟明春據實奏聞文麟等務當激勵兵勇嚴密探防遇賊即擊毋稍疏懈明春究於何日馳抵哈密該處地方緊要兵力甚單左宗棠究派何隊馳援肅州踞賊經官軍圍勦窮蹙萬一以出關為走險之路則已哈兩城適當其衝受害不可勝言著左宗棠督飭

各軍迅圖攻拔務將賊匪就地殲除毋任逃竄出關致貽大患應如何派兵截勦堵賊出關之處著該大臣妥為籌畫不得稍涉疏虞一面飭令派援哈密之軍星夜趨行前往以厚兵力金順何日拔隊何以日久未據奏報起程仍著懷遵疊諭帶隊迅速西進科布多屬突有賊匪竄擾軍臺將景廉軍營押解軍裝餉銀十八駄全行掠去托倫布等現派官兵馳往探勦即著飭令該官兵確切偵探認

真防勒並著常順多布沁扎木楚文奎一體嚴防以顧臺路景康以古城一帶採糧尚易請將口北歸綏兩道運糧全行停止以節糜費刻下金順帶兵出關前經疊諭左宗棠將該軍糧運妥為籌畫即著該大臣擇地設立糧臺由關內源源運解以裕兵食察哈爾所省運費米價著額勒和布奎昌毋庸撥解以節經費將此由六百里各諭令知之○以哈密固守城垣擊賊獲勝辦事大臣文麟得旨

嘉獎賞副都統銜○乙酉

慈禧端佑康頤皇太后聖壽節遣官祭

太廟後殿

奉先殿○

上率王以下文武大臣詣

慈寧門行慶賀禮眾官於午門外行禮○詣長

春宮

慈禧端佑康頤皇太后前侍早膳○奉

慈安端裕康慶皇太后

慈禧端佑康頤皇太后幸漱芳齋侍午膳○丙戌

上奉

慈安端裕康慶皇太后

慈禧端佑康頤皇太后幸漱芳齋侍午膳○戊子以都察院左副都御史唐士森為順天武鄉試正考官翰林院侍讀學士周壽昌為副考官○庚寅蠲緩直隸宛平良鄉涿澤清苑安肅新城縣吳橋鹽山元城大名豐潤玉田

安平房山樂亭博野祁阜城肅甯故城南皮無極棗城雞澤清河南樂清豐武強饒陽深澤容城通三河武清薊香河甯河霸保定文安大城固安永清東安順義懷柔雄高陽安河間獻任邱交河景東光天津青靜海滄定開長垣東明六十五州縣被水被雹地方新舊額賦暨倉穀雜課有差○辛卯以刑部右侍郎廣壽署倉場侍郎○以熱河東荒勒匪出力予副將崇福等加銜升敘有差陣亡外

委毛起順等祭葬世職○追予江蘇丹陽陣亡都司虎懷慶祭葬世職○壬辰諭軍機大臣等托倫布保英奏分撥隊伍馳剿竄匪安插臺站並撥赴榮全軍營察哈爾馬隊請暫留援剿各摺片賊匪由察漢通古臺站竄擾土爾扈特一帶向西奔竄察漢通古迤南哈布塔克卡倫復有匪股麇聚西南兩路臺站聞風逃避現經托倫布等派撥黑龍江官兵二百名由保英帶赴布拉噶河跟蹤截剿安

置臺路即著保英分歷各臺遇賊即擊將臺站妥為布置並著景廉英廉一體設法整頓以期疏通餉路毋令壅滯托倫布務當嚴飭馬步各隊密布城防力遏竄匪不得稍涉鬆懈達布蘇圖迤南博東齊河地方有賊匪數百名盤踞該處兵力甚單現赴榮全軍營之察哈爾馬隊二百五十名抵科因西路臺站梗塞未能前進托倫布等所請留科策應之處著准其截留協同派出各員弁聯絡防剿

一俟臺路疏通仍即迅飭前赴榮全軍營毋稍延誤將此由六百里各諭令知之○以內閣學士紹祺署刑部右侍郎○甲午以神靈顯應頒河南中河廳

大王廟

御書扁額曰金隄保障山東臨清牖

漳神廟

御書扁額曰神功顯佑張秋鎮

河神廟

御書扁額曰利運安流○諭內閣前據左都御史胡家玉奏復陳江西省錢糧違例加徵請飭裁革當交戶部妥議具奏茲據劉坤一奏稱胡家玉原奏諸多失實該左都御史及其弟姪有田六七百畝自咸豐初年至今二十餘年銀米絲毫未完該撫接胡家玉干預原籍諸事之信不一而足前於丁漕新章奏奉諭旨之後復貽書該撫等意存恫喝等語除江西徵收丁漕章程業經戶部議奏降旨准

行外劉坤一所陳各節著胡家玉明白回奏。越南國王阮福時遣使表貢方物賞賚筵宴如例。旌表守正捐軀山西綏遠城駐防旗民增祥妹趙氏。○乙未追予江蘇各屬陣亡殉難紳民夏立本等暨婦女一千八百九十九名口分別旌卹如例。○撫恤朝鮮國遭風難夷如例。○丙申以故科爾沁扎薩克扎薩克圖郡王達特巴扎木蘇繼子格瓦占散襲爵。丁酉諭內閣前據劉坤一奏稱左都

御史胡家玉陳奏江西加徵錢糧語多失實。並謂胡家玉及其弟姪田畝久未完糧兼有干預公事信函各節當令胡家玉明白回奏。茲據奏稱本籍祖遺湖田四五百畝其父兄弟五人各分田不及百畝歷年未完銀米均因災歉緩徵劉坤一間或貽書詢問地方公事亦曾函答此次丁漕改章適江西藩司有書前來據實答復並函致劉坤一實非意存恫喝等語該撫此次所奏措詞固多激切惟

胡家玉致書本籍地方官雖為公事起見殊屬不合著交部照例議處所稱地畝被淹緩徵是否屬實歷次往來信件是否該撫先行致函均著劉坤一據實具奏。○又諭御史吳可讀奏同知死事甚烈請飭查明予諡建祠殉難家屬一併附祀並將事蹟開單呈覽一摺甘肅殉難署西甯府貴德同知承順於同治元年在署任內舉行善政頗得民心嗣於六年二月間探聞回眾滋事守城禦賊因眾寡不敵廳城被陷該故員與其母弟等同時遇害極為慘烈殊堪矜憫惟予諡之與臣下不得率行奏請著左宗棠將該故員殉難及其家屬死事情形確切查明據實具奏。○戊戌諭內閣奉天府府丞張緒楷奏順天貢院號舍無可再增請定應試人數一摺鄉試錄送科舉向有例定名數近來國子監及各省學政錄送太濫不獨號舍不敷且人懷幸進之心於士習文風大有關係嗣後順天及各

省鄉試錄送人數應如何嚴定限制用昭覈實之處著該部議奏乃片奏酌擬變通鄉試事宜八條著該衙門一併議奏尋禮部奏嗣後國子監及各省學政錄科應查照例定名數嚴加考試不得濫送其所請添調謄錄勻撥點名各條應如所奏辦理至獎勵外簾請除對讀官外所有彌封謄錄各官應照例給予紀錄從之○諭軍機大臣等前據總理各國事務衙門奏川省黔江縣民人毆斃法國

司鐸教士請飭查辦當諭令魁玉等將此案詳細實情先行具奏並將案内正兇及從犯嚴緝務獲訊明懲辦茲據魁玉等奏稱法國主教范若瑟遣教士張紫蘭潛赴黔江縣私買民房建堂傳教該縣民人將司鐸余克林教士戴明卿毆斃與總理各國事務衙門前奏情形大略相同現已拏獲正兇陳淙發等六名飭令酉陽州知州羅亨奎等提犯研究下手正兇稟候查辦餘犯仍飭嚴緝並飭涪

州知州濮文昇前赴黔江會同覆行相驗等語此案究竟因何啟釁該將軍等並未敘明如謂買房建堂以致民教不和滋生事端該地方官事前豈毫無見聞已獲之陳淙發等六名是否實係下手正兇亦應確切根究不得遷就了事桂衡亭辦理不善咎無可辭著卽行摘去頂帶撤任仍著魁玉吳棠懍遵前旨將啟釁實情迅速查明具奏並嚴究下手正兇躡緝幫毆從犯訊明分別懲辦毋得一

味拖延任令該地方官含糊了事並將現在辦理情形隨時咨明總理各國事務衙門毋稍延緩將此由五百里各諭令知之○追予浙江各屬陣亡殉難領催訥爾機泰等紳民婦女三百四名口分別旌卹如例○乙亥以克復甘肅肅州關內肅清

上詣鍾粹宮

慈安端裕康慶皇太后前長春宮

慈禧端佑康頤皇太后前賀喜○諭軍機大臣

等左宗棠金順奏克復肅州首要各逆及土客悍賊殲滅淨盡左宗棠奏籌畫出關情形請將袁保恆賞假三箇月各摺片肅州逆匪經左宗棠與金順分督各軍會合圍攻並各掘地道進擊逆首馬四以勢蹙詣營乞撫經左宗棠等飭令呈繳馬械點驗冊籍九月二十三該大臣將逆首及各起兇悍客回悉數誅戮卽於是夜克復肅城覽奏實深欣慰所有肅城善後及甘省一切事宜應如何次第興辦撫輯地方以資培養之處著該大臣通盤籌畫妥為布置前因關外軍情緊急迫疊諭金順統率所部出關左宗棠揀派得力將弁前往助剿茲據該大臣奏稱提督張曜夙嫻韜略副都統額爾慶額勇幹有為均堪派令出關會同勦辦卽著知會張曜統帶嵩武全軍額爾慶額統帶吉林黑龍江馬隊會同金順馳往關外迅掃賊氛金順一軍勞乏過甚自應略加整理仍著該前將軍趕緊部署

卽率得勝之師早日西進不可過於延緩左宗棠務將各軍糧運妥為籌備俾利師行安設轉運糧臺一節該大臣請於戶部堂官內揀員總司其事並令選派廉幹司員攜帶帑銀出關辦理著候旨遵行惟糧運事宜必須地方大吏督率呼應方靈卽使派員前往仍須該大臣會同籌辦方能有濟也袁保恆著賞假三箇月俾令回籍省視所有西征糧臺事宜著左宗棠知照袁保恆將現辦事宜趕

辦完竣並遴派妥員暫行接管袁保恆一俟假滿卽行赴陝經理毋稍遲延將此由六百里各諭令知之○命鑲藍旗蒙古都統慶春吏部左侍郎魁齡署兵部左侍郎殷兆鏞在紫禁城騎馬○以克復甘肅肅州城總督左宗棠將軍金順得旨嘉獎賞總兵官萬守根楊龍彪正一品封典提督徐占彪雲騎尉世職提督將東才陳春萬黃馬褂提督胡保林總兵官李玉山副將符先陞張存義唐友山

胡珍品參將方友升馬良驥魏治家遊擊劉知儉董陽春張俊都司蒲陽春宋得祿巴圖魯名號遊擊張長安等花翎餘加銜升敘有差予陣亡提督王子龍總兵官陳登雲副將周玉林等祭葬世職○予貴州各屬陣亡殉難六品軍功李來旗等紳民婦女一千二百二十一名口分別旌卹如例○庚子諭內閣昨因肅州克復降旨將在事出力之徐占彪等分別優獎因思陝甘逆回擾亂十有餘載

勢極披猖自簡任左宗棠總督陝甘數年以來不辭艱苦次第勦除此次親臨前敵督飭將士克復堅城關內一律肅清朕心實深嘉悅自應特沛殊恩用昭懋賞左宗棠著以陝甘總督協辦大學士該大臣前經賞給騎都尉世職並著改為一等輕車都尉世職將軍金順督軍助勦共奏膚公洵為奮勉著開復革職處分以彰勞勩○諭軍機大臣等昨據左宗棠奏餉項奇絀懇請改撥的餉當令戶

部速議具奏現在肅州克復軍務正在得手左宗棠所統各營需餉緊迫必須寬為接濟方足以作士氣而竟全功著戶部於庫存項下迅即籌撥銀一百萬兩陸續解交左宗棠軍營以供支放至各省應解該大臣軍餉仍著戶部悉心籌畫指撥有著之款毋以空言了事俾資實用並將各省積欠西征軍餉催令陸續補解毋得日久拖欠致誤要需將此諭令知之○又諭昨據左宗棠奏餉項奇絀

請撥四成洋稅以資接濟當經降旨交戶部速議具奏第思甘肅地方瘠苦現又時屆隆冬該將士荷戈關隘寒冽異常朕心深為軫念本日已諭知戶部於庫存項下撥銀一百萬兩陸續解往左宗棠於此項銀兩解到後即可酌放月餉俾資飽騰至該大臣軍營餉需亦諄諭戶部嗣後務撥有著之款不得以空言搪塞該大臣所請簡派戶部堂官辦理糧臺事宜自為慎重起見但轉運採買非得

地方大吏辦理則呼應不靈該大臣素顧大局朕所倚畀不必再派部院大員以期事權歸一此次攻拔肅城窮蹙之寇幸皆聚而殲旃關外安敦王等處有無匪徒竄匿哈密曾否解嚴迄今未據文麟奏報關內如甘涼平番一帶有無零星餘匪西甯河州撫事諒不至再有反覆甘境甫經戡定亟須有兵勇擇要分紮以資鎮撫該大臣所部各營官兵數年來隴右馳驅勞苦已久自應一面量加休

息一面設法裁併庶一兵可得一兵之用而餉亦不至虛糜至將來關外用兵籌餉固難籌糧尤屬不易應如何先事豫籌該大臣諒早計及著將兵事餉事統籌全局悉心經理與關內外現在地方情形一併詳細奏聞張曜額爾慶額馬步各隊何時可以出關金順昨亦諭令將兵勇略加休憩即率得勝之師西進所有出關官兵糧餉轉輸及採買一切事宜該大臣自無不引為己任不待朕之諄

諄訓諭也將此由六百里諭令知之○以湖南官軍援勦貴州苗匪疊克城隘出力賞提督唐本朋魏玉彩總兵官熊守綿唐步雲鄧在仁雷占文一品封典總兵官劉高發周謙山伍可錦譚謂志曾燕山孫桂林成志武副將石太康李泗洪儲先基遊擊張治清譚國亮唐朝德謝啟勝李先春巴圖魯名號知州翟廷楷守備梁正榮等花翎千總王廷顯等藍翎餘加銜升敘開復有差○以烏里雅蘇

台駐防官兵勦辦回匪出力予賽因諾顏盟長貝勒錫哩巴扎爾扎布等優敘賞四等台吉達什多爾濟等花翎餘加銜升敘有差○辛丑諭內閣都察院奏都司史錦嶺以前在河南軍營保列儘先都司嗣經撤銷旋即開復本年由直隸總督請補蔚州都司經部議駁但敘保案撤銷未及開復案件緣有書吏羅玉峰索費未遂是以將開復之案隱匿不舉等情赴該衙門呈訴案關書吏舞弊如果

屬實亟應嚴行根究著刑部提集人證嚴訊確情定擬具奏尋奏史錦嶺於同治四年奏保都司經部議駁撤銷七年保案查係續保並非開復其請補蔚州都司冊內未經敘明羅玉峰又不詳查覈對以致彙內漏敘訊無隱匿需索等情應比律減等咎責從之○諭軍機大臣等戶部奏請飭催各省趕解京餉一摺本年京餉經戶部奏撥並續撥銀八百萬兩限五月前解到一半年終解清茲據該

部查明截至十月初十日止各省共欠解銀二百六十七萬餘兩除湖南地丁銀二萬五千兩鹽釐銀一萬五千兩四川鹽釐津貼銀十一萬兩湖北江漢關洋稅銀五萬兩現經奏報解清山東報解地丁銀四萬兩鹽課銀二萬兩外尚有山西地丁銀五十萬兩山東地丁銀十四萬兩河南地丁銀十萬兩湖北地丁銀十一萬兩長蘆鹽課銀二十五萬兩兩淮鹽課鹽釐銀三十萬兩河東加課銀五

萬兩廣東釐金銀五萬兩鹽課銀六萬兩山東鹽課加價銀三萬兩湖北鹽釐銀二萬兩福建茶稅銀四萬兩九江關洋稅銀三十二萬三千餘兩浙海關常洋兩稅銀十六萬兩江海關洋稅銀五萬兩天津關常洋兩稅銀十萬九千餘兩贛關稅銀五萬兩江西釐金二萬五千兩未據報解京餉關繫緊要各該督撫等即將前項應解銀兩迅即照數依限解齊毋得遲延干咎河南應解菜工加價銀

五萬兩前據錢鼎銘奏因河工要需暫行那用另籌補解當經允准仍著該撫將前項銀兩督飭趕緊籌解以清要款將此由五百里各諭令知之○甲辰諭內閣前據左宗棠奏肅州克復關內一律肅清先後降旨將左宗棠等及在事出力各員優加獎勵因思該省各路統兵大員或扼要設防或相機雕勦同心協力共奏膚公允宜一體施恩以彰勞勩將軍金順助攻肅州已加恩開復革職處分

著再賞還黃馬褂花翎清字勇號以示鼓勵。穆圖善前署陝甘總督統兵勦賊懋著勤勞。此次移紮涇州扼賊紛竄亦屬得力著賞給雲騎尉世職提督宋慶駐軍陝西邊境屢挫賊氛迨調赴甘肅合攻肅州尤為奮勇。張曜扼紮甘肅甯夏郡城勦辦王家疃等處踞匪地方得以安謐近由涼州馳赴肅州勇往可嘉。宋慶張曜均著賞戴雙眼花翎副都統銜。西甯辦事大臣豫師會同左宗棠辦理西甯

招撫事宜復在平番防勦得力著賞給頭品頂帶其辦理西征糧臺之二品頂帶詹事府詹事袁保恆籌解軍餉始終無誤亦著賞給頭品頂帶現在關內肅清亟應乘此聲威將關外各處竄匪次第掃除著金順督率所部迅赴古城會同景廉進勦穆圖善著即派隊赴安西敦煌玉門一帶扼紮妥籌防勦以壯聲援哈密尚未解圍張曜著與宋慶統帶所部一同馳往哈密與文麟明春會同勦賊以

厚兵力該將軍等務當奮迅圖功殄除醜類用副委任所有出關各軍轉運糧餉關繫緊要著左宗棠認真督辦源源接濟毋任缺乏。諭軍機大臣等前於九月二十七日寄諭李鴻章詢問明春恭謁

西陵橋梁道路各事宜能否先期趕辦迄今日久未據該督覆奏即著體察情形迅速據實奏聞毋再遲緩將此諭令知之○又諭前因肅州克復加恩以左宗棠協辦大學士並賞

給一等輕車都尉世職本日復明降諭旨將穆圖善等分別加恩獎敘以示諭功行賞用彰勞勩現在關內肅清隴右大兵雲集自應乘此聲威分路西征景廉駐紮古城兵力單薄亟應添派勁旅以圖進取金順所部尚有二十營若與景廉合在一處則兵威較壯景廉本有請飭金順前赴古城之奏即著統率各營剋日馳赴古城相機進勦以期規復烏嚕木齊景廉於金順到後將各隊如何分撥

前進之處。卽著和衷商辦。不得稍涉意見。其額爾慶額馬隊。卽著左宗棠飭令。隨同金順西進。聽候調遣。哈密雖獲勝仗。現在是否解圍。未據文麟等續報。張曜。宋慶所部。兵力較厚。該提督等。久歷戎行。辦事奮勇。朕所素知。著卽督率所部。馳往哈密。駐紮會同文麟。明春等相機防勦。遇有軍情。緩急均准會銜奏事。穆圖善所部馬步各隊。久駐涇州。徒置無用之地。卽著飭令該統領等。分起前赴安敦。

玉一帶駐紮。以爲諸軍後繼。該將軍現在奏請。陞見著將各隊分派起程。後再行來見。面授機宜。以上各軍。經朕酌量分派。後該將軍等接奉此旨。卽行奮迅前進。不得託詞耽延。儻有玩泄從事。朕必當按律懲辦。決不寬貸。至各該軍馳赴關外。糧餉一切及轉運事宜。責任綦重。必須先事豫籌。並督飭地方官悉心經理。帶兵大員。其勢難於兼顧。左宗棠身任兼圻。責無旁貸。著卽統籌各軍所需糧餉。

軍火等項。每月應用若干。寬爲豫備。陸續轉輸。毋令稍有缺乏。如果各該軍逗遛不進。則罪在主將。儻因糧餉不繼。致誤戎機。朕惟左宗棠是問。關外情形。究竟若何。糧運道路。若何鎮迪。以東俱總督統轄之地。著卽詳細查明。繪圖呈覽。河州狄道回情。是否安貼。該大臣督辦糧運。自應駐紮肅州。蘭州省城。止有藩臬駐紮。是否足恃。西甯安插各回眾。能否不滋事端。並著左宗棠豫師據實具奏。左宗

棠所部各隊。久在邊陲。其中疲乏者。諒亦不少。自應分別遣撤。將得力之師。分紮各要害。以資彈壓。值此餉項支絀之時。尤宜汰弱留強。以節糜費。將此由六百里諭知左宗棠。穆圖善。金順。景廉。豫師。文麟。明春。並傳諭張曜。宋慶知之。○又諭前因左宗棠奏餉項奇絀。請仍准以四成洋稅指撥甘餉。當交戶部速議具奏。茲據該部密陳庫儲正項銀兩。僅敷一月放款。其四成洋稅。按照月放之款計算。

亦僅能支持二三月光景。勢難動用等語。現在肅州克復軍餉一切需用維艱。無如部庫情形空虛已甚。該大臣公忠素著。必能中外同心。顧全大局也。此係密諭之件。毋得宣洩。原摺著鈔給閱看。將此密諭知之。○以故青海扎薩克輔國公吹達爾弟棍楚克拉遜多布襲爵。○乙巳上以冬至祀天於

圓丘。自是日始齋戒三日。

大清穆宗繼天開運受中居正保大定功聖智誠孝信敏恭寬毅皇帝實錄卷之三百五十八

大清穆宗繼天開運受中居正保大定功聖智
誠孝信敏恭寬毅皇帝實錄卷之三百五十九

同治十二年癸酉十一月丙午朔

上詣鍾粹宮問

慈安端裕康慶皇太后安長春宮問

慈禧端佑康頤皇太后安至甲戌皆如之○阿

勒楚喀副都統海瑛因病解職以鑾儀衛冠

軍使崇歡為阿勒楚喀副都統 丁未

上詣

南郊齋宮齋宿○諭內閣崇實奏請將蒙混出

結勘放正圍之員弁分別懲處一摺防禦特

克慎等於封禁正圍蒙混出結實屬居心貪

鄙有玷官箴防禦特克慎安泰著一併即行

革職驍騎校蘇崇阿經經革職惟該革員罔

利營私情節尤重著發交圍場總管春山在

於已騰正圍卡倫外枷號兩箇月以示懲儆

○諭軍機大臣等崇實奏詳陳兵米積弊並

籌辦情形一摺熱河兵米向由地方官採買

交倉近來奸商把持吏胥需索弊竇叢生現

經崇實認真整頓惟積弊已深釐剔非易若

不隨時嚴辦難免舊習復萌瑞聯到任後即

著會同熱河總管等妥籌辦理督飭該地方

官嚴禁奸商設立私局等弊並將句串勒索

之員胥人等隨時嚴拏懲辦毋稍寬縱將此

各諭令知之○戊申冬至祀

天於

圓丘

上親詣行禮○詣

關帝廟拈香 遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢、停次日朝賀、奉

慈安端裕康慶皇太后

慈禧端佑康頤皇太后幸漱芳齋侍午膳、諭

軍機大臣等、常順等奏賊匪分股竄擾現擬

督隊迎勦一摺、賊匪竄擾車臣泮爾一帶、分

股在察幹河及莫爾根霍碩等處滋擾、常順

等現飭達密蘭等帶隊馳往截勦、卽著飭令

該官兵遇賊卽擊、毋稍疏懈、蒙古臺站關繫

西北各城糧餉轉運、賊蹤飄忽、靡常現已竄

擾圖謝公遊牧、深恐賊股肆擾於臺路、殊有

關礙、常順業經馳赴前敵、督隊迎擊、卽著督

率各軍迅將此股賊匪悉數殲除、毋任蔓延

為患、並著多布沁扎木楚文奎會同托倫布

保英勤加偵探、實力勦擊、以期淨埽逆氛、而

疏臺路、將此由五百里各諭令知之○越南

國使臣潘世儼等三人於午門外瞻覲○己

酉吉林將軍奕榕等奏報遵派官兵赴奉天

起程日期得旨、該官兵等需用馬匹著奕榕

等遵照都興阿設法籌給、其整裝銀兩著咨

會盛京戶部先行墊撥、並著戶部遇便撥還

以清款目○庚戌諭軍機大臣等、榮全奏馳

報前敵近日情形、舊疾未痊、請簡大員接替

常順等奏迎勦竄匪獲勝各摺。纏夷滋擾新渠城堡一帶。經景廉派營總依爾和布帶隊援剿。會合團勇疊獲勝仗。惟前據景廉奏該都統因古城兵力尚單。已將依爾和布一軍撤回。刻下新渠等處止有徐學功營勇分紮難資捍禦。榮全務當飭令官兵確探賊蹤。妥籌防範。並與團勇聯絡策應。以壯聲援。該署將軍以東路軍情喫緊。請飭金順迅速出關。現在肅州克復。關內肅清。業經諭令金順張

曜宋慶部署出關。分赴古城哈密等處。會同景廉文麟等防剿。諒該將軍等接奉前旨。定當振旅西行。不至稽遲時日也。榮全舊疾未痊。殊深廕念。西路軍事孔棘。該署將軍仍當力疾籌辦。維持大局。以副委任。毋庸開缺。賊匪竄擾車臣淖爾及圖謝公遊牧。常順親赴前敵督剿。十月初間。卓凌阿帶兵接仗獲勝。該逆向西北逃逸。著常順等督飭官軍確切偵探。賊賊所向。奮力勦擊。務將賊股迅速殄

除。毋任滋蔓。該匪股數眾多。來往飄忽。榮全既據科城咨稱有賊二千餘人欲竄科布多等處。即著托倫布保英妥籌勦辦。力掃逆氛。並將匪蹤究竄何處。確探具奏。哈密已否解圍。未據文麟等續報。即著該辦事大臣等將該城近日情形詳悉奏聞。以慰廕擊。將此由六百里各諭令知之。○又諭榮全奏官兵需餉孔亟。請飭迅解欠餉等語。榮全軍營應發索倫並塔城之厄魯特官兵每月俸餉。及接

濟伊犁人眾各用項。皆賴協餉支發。山東等省奉撥新疆月餉。積欠甚多。該官兵等情形困苦。盼餉維殷。亟應迅速撥解。以資支放。著丁寶楨文彬鮑源深錢鼎銘將各該省積欠新疆餉銀迅速撥解。以濟要需。毋稍遲緩。將此由四百里各諭令知之。○以光祿寺卿岐元為太常寺卿。○以庫布奇爾果羅勦匪獲勝。復已革頭等侍衛卓凌阿職。撥工部帳房五百架解赴烏里雅蘇台軍營備用。○蠲

緩江蘇安東上元江甯句容溧水高淳江浦六合江都山陽阜甯清河桃源鹽城高郵泰東臺甘泉儀徵興化寶應銅山豐沛蕭陽山邵宿遷雖甯海沐陽贛榆通如皋泰興海門三十六廳州縣暨淮安大河揚州徐州四衛被水被旱地方新舊額並雜課有差○辛亥諭軍機大臣等文奎等奏城防兵單請催前調察哈爾官兵一摺前據額勒和布等奏所調察哈爾官兵已於八旗內挑備一千名

籌備軍裝口糧俟侍衛承德到口管帶前赴烏城現在常順帶兵馳赴前敵督勦城防兵力益形單薄侍衛承德倭恆額刻下計已到口著額勒和布等催令將備調之兵趕緊挑選務於今冬起期馳赴烏里雅蘇台不得遲誤此項官兵未到時文奎等當就現有兵力妥為布置毋稍疏虞另片奏已革步軍翼尉現任六品官恆矜於九月間因病呈請回旗調理現又隨常順出征不惟病體未痊抑且

聲名狼籍等語恆矜既因病呈請回旗何以又隨常順出征並該革員如何聲名狼籍著常順確切查明據實具奏將此由五百里各諭令知之○追予甘肅隴西守城禦賊故在籍同知祁兌祭葬卹廕如軍營病故例並予建祠殉難眷屬暨紳士等一併附祀○壬子諭軍機大臣等王文韶奏貴州生苗糾眾襲寨戕官現經收復一摺貴州丹江廳屬之蓮花關開屯奸苗暗約八寨古州苗眾勾結散

勇滋事襲破雞講寨署通判屠翰合門被害官兵亦有傷亡經王文韶飭令提督龔繼昌等分隊進攻斃賊多名當將雞講收復賊匪向皆各喬桑烏洛遁去黔省甫就肅清古州上下江等處生苗膽敢勾眾襲寨戕官亟應及早翦除以清萌孽著王文韶曾璧光各飭在防官兵勤加偵探認真防勦將逸賊悉數殲除毋貽後患並隨時相機鎮撫消禍未萌黔省軍務初平瘡痍未復全賴地方官潔己

奉公安良除暴庶幾與民休息治理日臻著
曾璧光慎選賢能牧令切實講求吏治該省
地方官吏如有不勝任者嚴行糾參毋得稍
事姑容以靖地方將此由四百里各諭令知
之○以貴州鎮遠辦理善後出力予署知府
吳自發優敘○旌表守正捐軀江蘇泰州民
婦王陳氏○癸丑諭內閣御史鄧慶麟奏京
控發交案件承審不公請提交刑部審辦或
派大員前往審理一摺國家設立都察院步

軍統領衙門准各直省民人呈訴冤抑原所
以通達下情一經各該衙門具奏無不立降
諭旨交各該督撫親提研審其關涉命案者
並令督同臬司嚴行訊究如該督撫等承審
不公仍准其赴各該衙門呈控儻遇案情重
大或地方官有貪婪不法情事自當提交刑
部或特派大員前往審辦若如該御史所奏
直隸遵化州民人郝越生員王晴川京控兩
案俱係尋常案件獨不思總督為國家大員

自有承審之責如紛紛提交刑部或欽派大
員尚復成何體制該御史不達事理率行陳
奏著毋庸議所有遵化州民人郝越等京控
各案仍著李鴻章秉公嚴訊按律懲辦嗣後
各直省遇有此控案件務當親提人證卷宗
依限審結毋枉毋縱用副朕洞達民隱至意

甲寅遣官祭

先醫之神○諭軍機大臣等有人奏山西翼
城縣知縣錢官垓前在太平縣內內丁憂攜
眷寄居翼城置有房舍田地其母葬於翼城
東鄉其胞弟娶侯姓之女為妾實與寄籍無
異該員並不呈明蒙混補缺到任後流民蕭
玉樑等開設小押鋪與該員胞弟暗中勾結
謀騙民財又與已革拔貢趙遠熙為密友唆
訟過付言無不從該員之弟仍住私宅遇事
招搖門丁鄭叔亭即鄭壽慶多方聚斂又稷
山縣知縣田依渠濫用刑杖與門丁張六部
民張庚元交通納賄又藉書院膏火為名比

戶勒捐。民間私種罌粟。該員按畝收稅。請飭查辦等語。州縣為親民之官。似此貪婪不職。實為地方之害。著鮑源深按照該二員被叅各節。嚴密訪查。據實叅奏。毋稍徇隱。原摺著鈔給閱看。將此諭令知之。○又諭金順奏。統帥出關。憑陳需餉實數。籌畫糧運。請飭撥兵勇皮衣銀兩。帳房軍火。仍令陝西製辦各摺片。金順現率所部。馳赴古城一帶。勦賊士卒荷戈邊外。艱苦倍常。且戈壁長途。糧運一切

需費甚鉅。亟應籌撥有著之款。如期解濟。俾赴戎機。所請於粵海關江海關江漢關洋稅項下。按月添撥三萬兩之處。著戶部速議具奏。其四川新添該將軍營餉銀每月一萬兩。著吳棠飭令藩司。剋期埽數撥解。毋稍遲誤。哈密雖據探報解圍。該逆西竄吐魯番一帶。金順仍應趕緊部署出關。率得勝之師轉戰而前。痛殲醜類。並遵十月二十九日諭旨。速赴古城。與景廉會商防勦。規復烏嚕木齊以

慰塵繫。關外用兵。糧餉軍火。最為緊要。前經諭令左宗棠妥籌辦理。該大臣自必通籌全局。源源接濟。毋任缺乏。金順所部及接統成祿舊部兵勇。統需皮衣銀二萬六千兩。著戶部即行如數指撥。解至道綏道衙門發給。該營委員以資應用。金順軍營所需帳房軍火。歷年均由陝西製辦。仍著邵亨豫照舊籌款辦理。現在秦隴肅清。晉省防務已鬆。該省防軍應如何分別撤留。以節餉需。著鮑源深悉心酌度。奏明辦理。將此由六百里各諭令知之。○又諭托倫布等奏。勦捕逆匪疊獲勝仗。一摺。賊匪竄擾科屬博東齊地方。經保英帶兵往勦。並派喜莫得等分投進攻。該逆紛紛逃竄。十月初八日。在阿育爾公喇嘛庫倫等處與賊接仗。殲斃賊數數百名。餘匪向翰克扎薩克迪南逃竄。並探聞西路盤踞慶格里之賊復欲乘機蠢動。亟應迅速勦辦。以遏賊氛。著保英統率派出各軍痛加勦洗。毋任紛

竄並著景廉派撥隊伍前往合力殲除以清餘孽托倫布當就現有兵力妥籌防勦力顧城防本日據金順奏探聞哈密業已解嚴惟尚未據文麟奏報現在究竟已否解圍著文麟迅速奏聞並著該辦事大臣等將該城防守事宜悉心籌畫不得稍涉疏虞將此由五百里各諭令知之○以科布多勦匪獲勝賞委防禦喜莫得巴圖魯名號佐領棟呢特多爾濟花翎委步軍校玉通藍翎餘加銜升敘

有差○撥江蘇洋火藥三萬磅大小銅帽四百五十萬粒解赴直隸天津交伊犁委員領回備用○乙卯諭內閣朕於明年二月二十四日恭奉

慈安端裕康慶皇太后

慈禧端佑康頤皇太后啟鑒二十七日祇謁

西陵禮成後於三月初二日還宮所有應行事宜著各該衙門照例敬謹豫備予故湖南降調巡撫譚世臨入祀名宦祠從巡撫王丈

詔請也○蠲緩直隸寶坻任宣化三縣歉收地方本年額賦有差並減免差徭丙辰以京畿雪澤愆期

上詣

大高殿祈禱行禮並詣

時應宮

昭顯廟

福佑寺拈香○丁巳

上以祈雪詣

宣仁廟

凝和廟

普度寺拈香○諭內閣前因楊昌濬奏革書韓溥華具控犯書孫錦捏報病故改名蒙充等情當諭令將全案人證卷宗解交刑部確切審訊茲據該部奏稱訊明韓溥華所控犯書孫錦等侵蝕機張銀兩及捏報病故頂名冒充各情均皆屬實按律定擬等語此案孫錦等侵蝕機張並顏料等銀迫經查出勒限

賠修仍敢草率蒙混及勒賠完固後又復頂名意存狡卸且於緝拏緊急時捏報病故實屬狡猾孫錦卽孫世鑣著照該部所擬杖一百流三千里不准援免韓溥華卽韓繩武所告孫錦各情或審明屬實或事出有因惟旣經向臬司呈控並不靜候審訊輒在將軍衙門呈告且有蒙捐職銜情事韓溥華著革去從九品職銜杖一百不准納贖仍遞籍追照折責發落飭縣管束書吏孫瀚在押潛逃現據伊父孫錦供稱係文生員孫文浩改名充當織造衙門經承實屬不守本分著卽行斥革仍著浙江巡撫嚴緝務獲提同韓溥華質訊明確有無侵吞情弊按律定擬報部前任杭州將軍連成於韓溥華呈控時輒行收受劉縣殊屬不合織造文治於孫同如病故後並不扣除致令孫錦頂名蒙混且於生員孫文浩改名承充書吏毫無覺察復疏防孫文浩在署脫逃實屬疏忽連成文治均著交部

議處○蠲緩山東汶上鄆城濮濇澤鉅野嘉祥壽張范濟甯齊河齊東濟陽禹城臨邑長清肥城東平東阿平陰惠民鄒滕嶧陽穀曹觀城朝城聊城茌平冠館陶夏津武城金鄉魚臺厯城章邱鄒平甯陽莘長山新城海豐霑化蘭山博興高苑樂安陵德青城德平陽信平原樂陵商河濱利津蒲臺滋陽曲阜泗水單城武定陶堂邑博平清平高唐恩邱濰七十二州縣暨德州東昌臨清濟甯四衛東平所被水被旱被鹺被蟲地方新舊額賦雜課有差戊午
聖祖仁皇帝忌辰遣官祭景陵
上詣
壽皇殿行禮命盛京工部侍郎奕慶留京當差調戶部右侍郎桂清為盛京工部侍郎○以雲南官軍克復貴州興義府城暨勦滅昭通土匪出力賞總兵官鄒復勝一品封典總

兵官鄧華立毛治祺劉奇義副將前聯陞劉占宏參將金恆才遊擊石占雲唐明盛馬陞王泰源都司納品超巴圖魯名號知府彭念宸遊擊岳昌年等花翎千總耿應培等藍翎餘加銜升敘有差 己未諭軍機大臣等禮部奏越南使臣齎到該國王奏疏鈔錄呈覽一摺據該國王奏稱河楊興化諸匪巢獨力攻勦顧此失彼山興宣三轄蔓匪仍復猖獗請飭派兵會勦等語越南國邊地被匪竄擾

前經諭令馮子材督飭官軍出關勦辦嗣以兵勇不宜久駐外國且慮有騷擾情事是以疊准劉長佑等所奏將各營陸續撤回茲據該國王具疏籲請朕睦顧藩封殊深軫念此時粵西官軍如今出境勦匪究於該國有無裨益且不至別滋事端之處著劉長佑馮子材悉心妥籌迅速具奏並著禮部傳令該國王知悉該國王原奏著鈔給劉長佑馮子材閱看將此諭知禮部並由五百里諭令劉長

佑馮子材知之 戶部奏遵議金順軍營餉銀除原撥月餉十萬兩外所短之數請於粵海江海江漢三關六成洋稅項下每月各撥二萬兩以濟該營餉需從之 以內閣學士崇綺為戶部右侍郎管錢法堂事 以卸任盛京工部侍郎奕慶為鑲藍旗蒙古副都統 ○以內閣學士德椿充國史館清文總校官 ○庚申諭軍機大臣等定安奏布置征兵起程請飭催餉銀一摺景廉軍營需兵助勦前

調大同步隊一千名現經定安部署起程需餉孔亟所有陝西省應解景廉餉銀二萬兩河南省應解餉銀三萬五千兩山東省應解餉銀四萬兩著丁寶楨錢鼎銘邵亨豫督飭藩司迅速如數籌撥解赴歸綏交定安驗收以便征兵征兵迅赴景廉軍營毋稍延緩將此由五百里各諭令知之 蠲緩江蘇長洲元和吳震澤吳江常熟昭文崑山新陽太湖華亭婁金山寶山青浦武進陽湖無錫金匱

江陰宜興荆溪丹徒溧陽太倉鎮洋嘉定奉賢南匯靖江三十州縣暨蘇州太倉鎮海金山鎮江五衛被旱地方未墾田畝新舊額賦並雜課有差○辛酉諭軍機大臣等劉長佑奏越南各匪肆擾現飭粵軍防剿並籌保衛邊境一摺越南各匪在宣光河陽一帶分股據劫據報法國帶兵攻破越南河內省城官多被擄兵有傷亡並有黃逆崇英與陳四黎大各匪乘機攻襲太原山西奸民游勇蟻附鴟張之信北甯現亦戒嚴刻下越南各匪乘機肆擾深恐該逆假充外國名色或勾結為患必至又啟釁端粵西太鎮南甯三府均與越南毗連該處止有劉玉成覃遠璉兩軍兵力甚形單薄現越南夷官踵營求救自應相機防剿以顧外藩著瑞麟張兆棟迅即撥兵數千名由欽州徑出關外約會援剿或繞赴西省南太地方協同堵擊並著劉長佑飭令劉玉成等軍酌度情形認真勦辦仍著瑞麟

等查照前次奏撥之案按月籌解餉銀二萬兩以資接濟粵軍於邊關內外堵剿越南各匪與法兵絕不相涉著總理各國事務衙門即行照會法國使臣轉飭遵照毋令別滋事端將此由四百里各諭令知之○以熱河朝陽擒獲匪首莊洛三等子署知縣知府陳本植遇缺即補賞防禦奎華花翎巡撫秦炳曜等藍翎餘升敘有差○緩徵安徽天長泗定遠霍邱盱眙來安五河鳳陽壽懷遠靈璧鳳臺廣德巢淶無為合肥廬江阜陽含山潁上潛山太湖桐城貴池建德宿和宿松銅陵東流繁昌懷甯當塗青陽甯國望江蕪湖毫太和渦陽建平宣武南陵舒城四十五州縣暨各衛被水被旱被風被蟲地方新舊額賦並雜課有差○壬戌諭軍機大臣等景廉奏援軍抵哈擊賊獲勝立解城圍並探聞餉銀被劫各摺片景廉所派之吉爾洪額等軍於八月間到哈在泥基頭地方與賊接仗獲勝復

會同威儀營官軍將回城收復並攻破南湖賊營辦理尚屬得手惟據白白彥虎股匪由五堡分股奔竄並有撲犯古城之信亟應迅速截剿以遏賊氣卽著景廉飭令吉爾洪額等拔隊回古以資防剿並飭派出各營奮力殲除毋任紛竄據奏該逆將福晉回王縛送南湖賊營該福晉等被賊偪脅不從實屬深明大義刻下南湖業經攻破該福晉等現在何處著文麟等將實在下落確切查明妥為安撫景廉餉銀在科布多所屬察漢通古臺被賊搶劫卽著咨明托倫布等派員一體詳查哈密解圍疊據各路奏報文麟何以日久尚未具奏著卽迅速奏聞明春業經到哈著與文麟會商將該城防守事宜悉心籌畫毋稍疏虞匪蹤飄忽靡常烏里雅蘇台所屬諾本托羅蓋等處已有賊匪竄擾仍著常順等飭令達密蘭確切偵探妥籌防剿迅掃逆氛所有此次剿匪出力人員及陣亡兵勇著景

廉查明分別奏請獎卹將此由六百里各諭令知之○又諭常順奏烏城戰守兵數相等城防布置周妥情形一摺據稱文奎等請催察哈爾官兵摺內隱然以該署將軍為多擁強兵於外而留孱弱以居守置城防於不顧因將布置情形縷晰上陳等語文奎等前請催調官兵自係為嚴密設防起見常順率行揣摩噭噭置辯殊屬非是嗣後該署將軍務當以公事為重與該參贊等隨時和衷商辦不得稍存意見貽誤事機自干咎戾將此諭令知之○移雲南提標右營遊擊駐蒙化廳鶴麗鎮標右營都司駐麗江府城劍川營都司駐喇雞鳴臨元鎮標左營都司駐臨安府屬曲江驛鶴麗鎮標右營右哨千總駐劍川州城添設潞江營遊擊一員守備一員千總把總外委共十六員從巡撫岑毓英請也○以哈密解圍賞黑龍江副都統吉爾洪額巴里坤領隊大臣沙克都林扎布黃馬褂○甲

子

上復詣

大高殿祈雪行禮、遣惇親王奕誼詣

時應宮恭親王奕訢詣

昭顯廟醇親王奕譞詣

宣仁廟孚郡王奕誨詣

凝和廟拈香 諭內閣御史吳可讀奏請將

已革提督成祿立正典刑一摺除原議之軍

機大臣及刑部堂官毋庸會議外著御前大

臣大學士六部九卿將該御史原摺並軍機

大臣會同刑部定擬一摺再行覈議定擬具

奏○乙丑以誣良邀功江蘇寧備蘇正發革

職訊辦○丁卯以統帶輪船出洋捕盜出力

賞廣東副將哈郎阿等花翎餘加銜升敘有

差○予故前任浙江提督鄭魁士祭葬諡壯

烈○戊辰以故車臣汗輔國公扎呢什哩子

拉蘇倫襲爵、己巳諭軍機大臣等岑毓英

奏查明滇省情形擬卽撤勇停捐一摺軍興

以來募勇籌捐本係一時權宜之計軍務平定自應規復舊制免滋弊端滇省已就肅清據該撫查明所部粵勇除遣散外所餘不過千人其籍隸本省勇丁挑選精壯充補綠營兵額餘令歸農歸廠自謀生理所奏深合機宜卽著會商劉嶽昭督飭得力將領將現在各營勇丁分別遣留所留各勇准其充補兵額仍著該督撫隨時勤加訓練束以營規俾成勁旅其遣散各勇尤須妥為安置免至滋生事端至該省及各省所設捐局既可裁撤卽行查明奏聞一律停止以免有名無實滇省變亂日久仕途旣雜吏治宜及時講求該督撫當慎選賢能牧令與民休養生息遇有庸劣各員亟應隨時甄別毋任濫竽歷年收捐款項卽著該督撫查明實數應如何加廣學額中額之處請旨辦理另片奏吏治營伍國用各節深明大計卽著照所議辦理停捐裁勇能先能先舉行足見該撫勇於任事著

與劉嶽昭和衷商辦實事求是整頓地方用副委任該撫所議各節本日並諭令各省督撫等酌度情形籌議具奏矣將此由四百里各諭令知之 又諭岑毓英奏遵旨覆奏侍郎徐桐所陳安危大計請將吏營伍伍國用力圖整飭據稱整頓吏治必先停捐欲停捐必先足用欲足用必先易勇為兵接楚軍章程各省如裁勇十萬每歲所省餉銀卽足抵補京外捐項現時多以勇營留防則綠營未能整頓可知應將現在勇丁挑選精壯充補綠營兵額痛除積習易弓箭為槍礮勤加操練餘勇酌給欠餉妥籌遣散擬請由滇省先行辦理等語所陳不為無見滇省既可首先舉行各省情形雖不相同亦當力求整頓應如何認真籌畫妥為布置之處著各省督撫按照該撫所議各情悉心酌度次第經理務使實有成效毋得徒託空言並將擬辦情形先行詳細具奏原摺均著鈔給閱看將此由

諭令知之 庚午諭軍機大臣等李宗義奏本年江北漕糧仍辦河運東境河道阻塞所有漕船經由戴家廟馬家口一帶及張秋至臨清等處淤塞地方又荷澤臨濮葉汛各口民堰衝缺處所亟應分別疏濬堵合等語著喬松年丁寶楨文彬督飭所屬將漕船經行河道趕緊豫籌修理以利轉運毋稍延緩將此各諭令知之 兩江總督李宗義奏來年江甯各標營不能兵米仍請截留徐州府屬漕糧撥補以恤兵艱從之 辛未予故浙江仁和縣知縣升任按察使張印塘入祀名宦祠從巡撫楊昌濬請也 壬申諭內閣前據軍機大臣會同刑部審明已革烏魯木齊提督成祿罪名比例擬以斬立決聲名應否改為斬監候恭候欽定旋因御史吳可讀奏請將成祿立正典刑當令御前大臣大學士六部九卿再行叢議定擬具奏茲據該王大臣等奏稱成祿罪名請仍照原議辦理其未經

畫臺之通政使于凌辰大理寺少卿王家璧亦據另摺陳明均無異議成祿著改為斬監候。餘均照軍機大臣等所請辦理。至御史職任言官。雖准風聞奏事。何得以私意揣測。形諸奏章。該王大臣等謂吳可讀刺聽朝政。與風聞言事不同。請旨究詰實據等語。御史吳可讀著降三級調用。無庸究詰。○諭軍機大臣等。淮安關監督文桂奏承辦要件需款甚殷。請飭兩江江蘇督撫籌撥等語。該監督承辦玉料。係不容稍緩之件。現在關收關稅為數無多。自應速撥款項以資趕辦。著李宗義張樹聲在江海關洋稅蘇松在釐局並兩淮鹽釐項下分別籌撥銀五萬兩迅速解關備用。文桂於此項解到後務將傳辦各件依限辦齊。解京事竣覈實報銷。毋稍浮冒。將此由四百里諭知李宗義張樹聲並傳諭文桂知之。○又諭錫綸奏回賊西竄軍臺阻梗現擬派兵會勦文奎等奏防勦喫緊請截借軍餉

英廉奏馳回塔城現擬籌辦各節並籌安設布倫托海等臺各摺片。賊匪竄擾科屬察漢通古軍臺等處。和碩特土爾扈特等喇嘛營子均被劫掠。賊蹤西竄至青格里河。錫綸現派蒙庫吉喀噶爾帶領蒙兵喇嘛等眾前往烏龍古上游沿河一帶相機堵勦。即著錫綸飭令該官兵認真探擊。毋稍疏虞。該處軍臺為古城塔城要路。且為榮全景廉等營運道所必經。現探聞烏梁海各臺站皆已逃散。亟須力圖勦洗以淨賊氛。錫綸派出之軍僅有六百名。兵力甚形單薄。著托倫布保英即速派令伯多滾察漢淖爾防兵選擇妥員管帶前進。兩路夾擊。並派明幹之員隨同官軍一面整飭軍臺。以顧運道。儻賊氛甚熾。即著錫綸親率所部前往督勦。榮全景廉亦當勤加偵探。應如何派兵會勦之處。即著妥籌調撥。迅赴戎機。科屬迤西臺站被擾烏城防勦喫緊。儲款無存。文奎等請由伊犁軍餉內暫行

截留二萬兩以資接濟卽著准其暫行借用一俟烏城軍餉解到卽如數補還該城需餉甚殷那借止可顧一時之急著戶部將各省帶欠該城之款嚴行催取迅速籌解並咨明綏遠城張家口兩處於烏城軍餉解到時卽飭該城領餉各員迅解到烏以資急用榮全處盼餉亦切嗣後文奎等亦不得任意截留以致顧此失彼厄魯特官兵寄居布倫托海英廉以塔城一切章程尚無頭緒擬俟餉項

稍充再行飭調回塔卽著照所請行該城現在應辦事宜亟須斟酌緩急次第舉辦惟從前案卷全行遺失著戶部兵部工部理藩院將塔城歷辦冊案摘鈔一分並將該部院則例一併頒發交英廉迅速辦理該城拖欠哈薩克駝馬帳目著英廉卽令親王扎薩克厄魯特領隊大臣等查明確數具文承領此項銀兩並准併案覈實報銷塔城布置一切需款甚多著戶部卽行籌撥銀八萬兩俾資應

用英廉請於東路臺站置買驢駝四百隻駝四百隻驢馬六百匹騾馬六百匹分放各臺應差惟此項駝馬為數太多塔城無從採買著常順多布沁扎木楚文奎卽派員員按照市價妥為照數採買務選口輕體壯毋任以疲弱充數卽由英廉派員赴烏領取所需款項著常順等先行墊辦俟戶部撥款解到卽由常順等照數扣還以清款目布倫托海一臺為科布多所轄前此駐紮該處之厄魯

特官兵除由錫綸調往外其餘人眾亦應調回塔城卽著托倫布保英速卽撥派官兵前往安設臺站以便厄魯特人眾移回塔城駐紮其餘安設各臺卽著照英廉所擬辦理該參贊大臣務當實心經理以副委任將此由六百里各諭令知之 賞二等侍衛特爾清河頭等侍衛為塔爾巴哈台領隊大臣 撥工部火藥一萬斤鉛丸十萬出轟藥五百斤火繩十萬丈解交烏里雅蘇台軍營備用

癸酉

上復詣

大高殿祈雪行禮 遣惇親王奕誼詣

時應宮恭親王奕訢詣

昭顯廟醇親王奕譞詣

宣仁廟孚郡王奕誨詣

凝和廟拈香 撥山東司庫銀六萬兩解交

運河道以備工需 蠲緩浙江仁和錢塘海

甯富陽餘杭臨安新城於潛昌化嘉興秀水

嘉善海鹽平湖石門桐鄉歸安烏程長興德

清武康安吉孝豐諸暨金華蘭谿東陽義烏

浦江湯溪西安龍游建德淳安遂安壽昌桐

廬分水宣平鄞象山山陰會稽蕭山餘姚上

虞嵊臨海黃巖甯海天台仙居永康武義常

山開化麗水縉雲青田松陽新昌永嘉樂清

瑞安平陽泰順六十六州縣暨杭嚴嘉湖衢

州台州四衛被旱被風被雹被蟲地方新舊

額賦並雜課有差 甲戌諭軍機大臣等魁

玉吳棠奏蠻匪滋事官軍勦撫兼施地方現已靜謐一摺四川我邊廳境蠻匪蠢動經魁玉等派兵勦捕殲擒悍目數人該蠻眾窮蹙畏懼先後投誠該將軍總督擇其樸誠可靠之人令充千百戶設立夷兵夷約並將建碉修堡等事宜次第舉行辦理尚為妥協惟獮民支蕃族眾全在地方官撫馭得宜魁玉吳棠務當督飭所屬將善後各事妥為籌辦並隨時拊循防範以杜亂萌毋稍大意將此由四百里各諭令知之 以四川我邊勦撫蠻匪地方肅清予提督陳希祥優敘賞都司李極光巴圖魯名號餘加銜升敘有差予陣亡把總蕭逢春等祭葬世職加等 予四川雅安陣亡文生盧映彤賞卹如例

大清穆宗繼天開運受中居正保大定功聖智
誠孝信敏恭寬毅皇帝實錄卷之三百五十九

大清穆宗繼天開運受中居正保大定功聖智
誠孝信敏恭寬毅皇帝實錄卷之三百六十

教

同治十二年癸酉十二月乙亥朔

上詣

大高殿行禮詣鐘粹宮問

慈安端裕康慶皇太后安長春宮問

慈禧端佑康頤皇太后安至甲辰如之諭

軍機大臣等都興阿等奏賊匪聚眾械鬪現

籌勦辦情形一摺本年十一月間突有賊首

宋輜倡率領匪眾與高希田械鬪傷斃多人

該匪現竄往夾心子高家盤踞難保不竄入

貔口滋擾亟應迅速勦辦著都興阿等督飭

派出各隊趕緊緝拏務將此股賊匪及早撲滅毋任蔓延並著將高希田與宋惻倡啟釁根由詳細查明妥籌辦理以靖地方將此由四百里各諭令知之又諭張廷岳等奏駐庫古北口練軍步隊請暫改二成馬隊一摺邊外地方遼闊必須馬步隊相輔庶防勒易於得力張廷岳等請將駐防庫倫之古北口練軍暫行改設二成馬隊即著照所請行該辦事大臣等即督飭將弁認真選練俾成勁

旅毋得有名無實其每月應添糧餉著李鴻章飭令練餉總局即以奉旨之日為始按照宣化馬隊章程按月一律支放以資飽騰另片奏請飭催欠餉等語山東欠解庫倫十一十二兩年餉銀八萬兩加以山西河南兩省欠餉共銀十六萬五千兩現在該城待用孔殷著丁寶楨文彬鮑源深錢鼎銘查明各該省欠解數目迅籌撥解毋再遲延將此由四百里各諭令知之丙子以故青海扎薩克

頭等台吉索諾木喇布坦姪車林端多布襲職丁丑諭內閣清安奏請撥銀兩以備要差一摺明年二月間朕恭奉

慈安端裕康慶皇太后

慈禧端佑康頤皇太后祇謁

西陵沿途駐蹕地方橋梁道路並各處行宮應修工程自應早為辦理現在廣恩庫無款可籌清安請援案於直隸藩庫撥銀一萬二千兩以備支用即著李鴻章飭令藩司迅速如

數籌撥派員於封印前解到毋稍遲誤清安一面派員妥為備辦俟此項銀兩解到樽節動支事竣覈明用數分別咨送報銷毋任浮冒禮部以明年元旦慶賀禮節請得旨是照例行禮奉

慈安端裕康慶皇太后

慈禧端佑康頤皇太后懿旨停止筵宴其在外公主福晉命婦進內行禮之處並著停止戊寅諭軍機大臣等鮑源深奏遵旨調派大

同官兵赴塔駐防並嘉峪關道路已通可否
仍由甘省撥兵前往各摺片塔爾巴哈台向
有甘肅換防官兵因道路梗阻久未派往前
經諭令李鴻章鮑源深於宣化大同兩鎮各
撥兵五百名赴塔以資防守茲據鮑源深奏
業已如數派撥分作兩起委員統帶即著懷
遵前旨飭令迅速起程仍照上年調赴科城
官兵成案由張家口行走以免濡滯所有官
兵鹽菜口糧該撫請照征兵章程支給並援

案借支減半行裝銀兩均著照所請行該官
兵抵防後所需月餉著戶部奏明辦理俟將
來換防時再由甘省調撥以符舊章將此由
四百里諭令知之補行同治十一年軍政
奉天駐防卓異官五員才力不及官一員分
別議敘處分如例己卯旌表守正捐軀直
隸甯晉縣民苗四妮妻屈氏 錫綏湖北江
夏公安咸甯嘉魚漢陽漢川黃陂孝感沔陽
黃梅鍾祥京山潛江天門應城江陵石首監

利松滋枝江荊門黃岡蘄水廣濟二十四州
縣暨武昌等衛被水被旱地方新舊額賦有
差 庚辰

孝惠章皇后忌辰遣官祭

孝東陵 諭內閣邵亨豫奏故員殉難慘烈請
賞還世職一摺據稱守城殉難之前山東臨
清直隸州知州張積功所得雲騎尉世職因
其嗣子張紹陵傳教獲罪致停承襲惟該故
員前在臨清守城禦賊力竭捐軀全家殉難

死事甚烈懇請賞還世職等語張積功所得
雲騎尉世職著即賞還准其於近支內擇人
承襲 以詹事府詹事松淮為內閣學士兼
禮部侍郎銜大理寺少卿長敘為光祿寺卿
調正白旗蒙古副都統恆訓為成都副都
統實授毓福正白旗蒙古副都統 移浙江
黃巖鎮總兵官於海門衛改為海門鎮總兵
官仍兼轄台州陸營標下中左營員弁均隨
同改駐改添轄甯海左營守備一員千總二

員把總四員外委三名歸海門鎮左營管轄移杭州城守營提標後營嘉興右營紹興左右營象山左右營台州中左右營海甯營石浦營甯海左右營太平營金華右營平陽右營都司一員守備五員千總十一員把總十七員外委二十二名額外五名專防協防駐紮各汛地從總督李鶴年請也○辛巳以散秩大臣恩來署正白旗蒙古副都統○壬午上詣

大高殿行禮○諭軍機大臣等曾璧光奏川省欠解楚軍的餉過多請飭迅解並古州生苗滋事勦捕殆盡各摺片古州苗匪潛赴丹江廳屬糾合黨眾竄踞雞講地方經曾璧光派何世華等帶兵勦辦會同湖南防營將雞講攻克與王文韶前奏大略相同惟黃茅嶺一帶尚有零匪游弋現經周達武酌帶隊伍馳赴八寨督勦卽著曾璧光周達武督令官兵會同湘軍認真搜捕務將餘匪殄除淨盡毋

任漏網黔省甫經廓清曾璧光等務當督飭所屬文武將善後事宜妥為經理以靖地方周達武一軍向由四川月解的餉現在欠解甚多該軍待餉已久譁潰堪虞亟應迅撥鉅款以資支放著吳棠飭令藩司於欠解餉內無論何款先撥銀五十萬兩交該委員領解回黔以後卽照吳棠所議每月解銀二萬兩其所欠尾餉四十萬四千兩仍著補解清款該督務當顧全大局力籌接濟曾璧光周達

武卽將各營分別撤留迅速籌辦以節餉需原摺著鈔給吳棠閱看將此由五百里諭知吳棠曾璧光並傳諭周達武知之○雲南巡撫岑毓英奏奉旨兼署督篆自揣兼顧難周請另行簡員署理得旨岑毓英向來勇於任事朕所深知雲貴總督仍著該撫兼署將地方應辦事宜悉心經理毋許固辭○旌表守正捐軀山東博山縣民穆同起妻王氏○科爾沁扎薩克圖謝圖親王巴實多爾濟等七

人蘇尼特扎薩克郡王托第布木等三人阿
巴噶扎薩克郡王瓦津達拉等三人浩齊特
扎薩克郡王濟克登噶維張烏珠穆沁扎薩
克貝勒達克丹等二人茂明安貝勒格楚克
等二人敖漢貝子達克沁扎魯特鎮國公達
瓦甯保翁牛特輔國公克什克阿爾畢濟呼
喀爾喀扎薩克親王車林多爾濟等六人土
默特貝勒散巴勒諾爾贊巴林貝子索哩雅
烏喇特扎薩克輔國公貢桑端魯布阿巴哈

納爾二等台吉多特諾爾布察哈爾藍翎侍
衛達爾瑪扎布於神武門外瞻覲○癸未諭
軍機大臣等榮全奏東路竄匪喫緊現籌截
勦情形一摺關外竄匪在青格哩迤東各臺
焚掠經錫綸帶隊迎勦獲勝賊匪奔竄與錫
綸前奏情形大略相同該匪現已竄入塔境
亟應迅速勦辦著榮全飭令派出各軍分股
探勦迅埽逆氛並著英廉督飭塔城官兵嚴
密設防毋得稍涉大意該匪由阿雅倫渾爾

向大小拐地方奔竄該處與瑪納斯路徑相
通孝順現已帶隊赴沙灣迎勦卽著榮全飭
令該員迅圖勦洗務將此股竄匪悉數殲除
免致勾結為患錫綸前派隊伍赴烏隴古上
游一帶堵擊並著督飭該官兵勤加偵探認
真防勦毋稍疏虞將此由五百里各諭令知
之○甲申諭內閣榮毓等奏請撥銀兩以備
要差一摺明年二月間朕恭奉

慈安端裕康慶皇太后

慈禧端佑康頤皇太后祇謁

西陵所有應行置備各項自應早為辦理現在
廣恩庫無款可籌卽著李鴻章飭令藩司迅
速籌撥銀一萬兩派員於封印前解到毋稍
遲誤用過銀數照例由廣恩庫於年終彙總
覈實報銷毋任浮冒○又諭本日引見御史
之禮部郎中周家楣著卽註銷御史開缺以
五品京堂候補○諭軍機大臣等錫綸奏陝
回分股西擾官兵追勦獲勝英廉奏塔屬各

臺被擾現派員照舊安設托倫布等奏科屬
竄匪敗逃整頓臺站各一摺陝回句結竄哈
賊股擾及烏梁海等部落錫綸督率官軍追
至霍博克河下游克克莫敦地方截勦獲勝
賊匪乘夜遠颺錫綸兵力甚單此次連獲勝
仗斃匪多名賊眾雖已敗逃宵未大加懲創
尤恐與瑪納斯大股勾結遂成滋蔓難圖錫
綸現已飭令沙山子各軍由阿雅倫淖爾南
畔瑪納斯河東一帶扼要堵截著卽嚴飭該

處兵勇認真截擊毋使賊勢蔓延禁全昨日
奏報已派孝順額爾根巴圖等帶兵分赴沙
灣高家磴地方探蹤勦擊著卽飭令孝順等
勤加偵探會同錫綸派出各軍盡殲醜類毋
稍疏虞塔城所屬烏素圖烏圖布拉克郭布
爾圖三臺官兵聞警逃散英廉現在派員督
催照舊安設著該參贊大臣卽行文該王扎
薩克等速將被難蒙古妥為安插並趕將驚
散臺站設法安置英廉仍當會同榮全督飭

現有官兵嚴加防守遇賊卽擊以顧臺路科
屬現無賊蹤著托倫布保英刻卽查明各臺
被擾情形分別撫恤一面將各臺安設齊備
毋得以賊氛已遠稍為鬆勁將此由五百里
各諭令知之 乙酉

奉和睿皇后忌辰遣官祭

昌西陵 諭內閣奕榕奕艾奏發遣官犯潛逃
請飭拏究一摺已革吉林管內協領富慶前
以私移園場封堆定擬發往軍臺效力因病

展限起解暫交該旗看管該官犯輒敢乘間
潛逃難保不藏匿京師地面著步軍統領衙
門順天府五城飭屬一體嚴拏務獲解交吉
林照例懲辦該旗佐領德恆於發遣官犯並
不小心看管致有疏脫實屬咎無可辭德恆
著交部照例議處 諭軍機大臣等李宗義
文彬奏暫停堰圩石工籌修惠濟正橋請飭
湖北等省迅解協餉一摺清江以上之運口
地方為裹運河咽喉該處舊設惠濟通濟福

興三牘而惠濟牘首先當衝尤為喫重該正
牘久經廢閉自應亟籌興修以免疏失該督
等擬暫停堰盱石工將同治十三年原撥湖
北湖南江西修理石工銀六萬兩先修惠濟
正牘自係移緩就急之計即著李瀚章劉坤
一郭柏蔭王文韶將同治十三年應解協餉
銀兩如數提前趕解俾得剋期興工郭柏蔭
並將本年未解銀兩先行撥解清款如此外
尚有不敷即由李宗義設法籌措該督等務

當督飭道廳各員覈實妥辦不得稍有虛糜
將此由四百里各諭令知之以軍機處校
對清字檔冊完竣予章京員外郎續昌等升
敘有差以入直遲延委散秩大臣施振下
部議處旌表守正捐軀河南修武縣民賈
福貴妻秦氏丙戌以雪澤未霑

上於

大高殿設壇祈禱親詣行禮遣惇親王奕誼
詣

時應宮恭親王奕訢詣

昭顯廟醇親王奕譞詣

宣仁廟孚郡王奕誥詣

凝和廟拈香

孝德顯皇后忌辰遣官祭

定陵諭內閣李鴻章奏甄別庸劣不職各員

請分別懲辦等語直隸慶雲縣知縣楊承杰

任性乖愎辦事靡率平山縣知縣壽山操守

平常聽斷不公均著即行革職靈壽縣知縣

劉庚年緝捕無能性情偏執著以教職選用

內邱縣知縣趙浚才識平庸高陽縣知縣楊

文濤舉止輕浮清河縣知縣王子詰頗有嗜

好均著開缺察看酌量另補新城縣管河縣

丞烏應昌年已就衰難耐勞苦著以原品休

致以示懲儆欽漢扎薩克郡王色丹諾爾

多克等二人喀爾喀貝子托果瓦喀喇沁輔

國公維羅布忠肅蘇尼特輔國公瑪哈西哩

於神武門外瞻覲丁亥諭軍機大臣等紀

源深奏遵旨分別撤留在防兵勇並節餉練兵一摺晉省南北駐防兵勇現經鮑源深酌度情形分別撤留該撫以防軍議撤應於南北兩鎮標兵內各選精兵一千名分為兩營照章操練所需之款卽在現裁水師七營月餉項下酌取應用俟兩鎮之兵練成卽將暫留之營全撤所籌尚妥卽著鮑源深按照所擬會同太原大同兩鎮督飭將弁認真經理總當實事求是毋得徒託空言其現在應撤

各營務當妥為賞遣暫留各勇仍飭統帶各員弁照常約束以衛地方將此諭令知之○又諭景廉奏西路官軍勒匪獲勝古城防務喫緊請飭金順速進助勒並賊擾軍臺請飭科布多就近勒辦安設臺站各摺片徐學功率領練勇在三道廠子地方截擊竄匪獲勝實屬奮勇可嘉本日已明降諭旨將該員照所請獎勵矣逆首白彥虎等現已竄入瑪納斯並勾結迪屬回匪勢漸鴟張或西撲沙山

子或東犯古城均在意中巴里坤屬之紅柳峽等處亦有竄匪滋擾濟木薩迤西三臺地方復有逆回假充兵勇搶掠之事景廉一軍駐紮古城有四面受敵之勢情形殊為喫緊前經諭令金順帶同額爾慶額督兵出關前赴古城會同景廉勒匪刻下當已布置就緒卽著該將軍剋日拔隊起程馳往勒辦毋得稍事逗遛貽誤事機其需用車馬並糧運事宜著左宗棠督飭地方官妥速籌辦以利師

行景廉現派孔才帶兵赴三臺勒賊著飭令該統領實力勒擊迅殲賊股沙山子為西路要地儻該處被賊踞擾關繫甚重逆首白彥虎既有撲犯沙山子信息官軍自應迅往扼防以杜窺伺景廉已咨會錫綸率隊進紮並請飭榮全令孝順率所部會勒孝順現駐沙灣距沙山子不遠卽著榮全撤飭迅速會合錫綸進兵痛殲匪類毋任蔓延兵機旦夕異宜辦理尤貴迅速若待請旨飭行往返稽遲

恐致貽誤嗣後景廉於就近各軍如有應行調撥之處卽由該都統調遣以期便捷毋稍拘泥科布多屬軍臺前被賊擾臺兵潰散景廉軍營道路阻隔業據托倫布等奏稱科屬已無賊蹤該處參贊等飭將烏梁海等處各臺一律安設齊備並查明被難蒙古分別撫恤卽著托倫布等迅速籌辦以通臺路將此由六百里各諭令知之○又諭常順奏參贊大臣騷擾臺站一摺據稱參贊大臣文奎自

出傳單為由京帶來之藥商徐姓傳坐駕杆車進口經常順派員往查應差檔案亦有由烏里雅蘇台進京公幹之候補知縣徐英傳用駕杆車輛等項之事並據戶部章京稟有文奎帶來徐姓現欲回京願將所攜藥料作價入官是徐姓實為藥商無疑傳單所開候補知縣未免捏稱等語候補知縣徐英是否卽藥商徐姓捏稱公幹沿途所用車輛等項究竟共有若干並此外有無騷擾情事著額

勒和布遴派委員逐臺確切查明據實具奏毋稍徇隱原摺著摘鈔給閱看將此由四百里諭令知之○又諭常順奏章京難期得力請飭回原衙門當差等語烏里雅蘇台將軍章京兵部主事裕昌因伊父未葬輒向該城參贊求派赴口迎提軍火差使即便回京安葬實屬假公濟私難期得力裕昌著卽回原衙門當差該營章京接替需人卽著常順咨照兵部揀選熟習軍務能耐勞苦之員迅速

赴烏俾資差委據奏裕昌並有將火器營兵丁挑作戈什哈攜帶回京及私將開花礮車轂輪乘坐進口等情事並著該署將軍確切查明據實具奏前據文奎等奏已革步軍翼尉現任六品官恆矜於九月間因病呈請回旗旋又隨常順出征並稱該員聲名狼藉當諭常順查明具奏著卽懍遵前旨迅速據實奏聞毋得徇隱將此由五百里諭令知之○以騷擾臺站署烏里雅蘇台參贊大臣文奎

下部嚴議命開缺來京以察哈爾副都統杜
嘎爾署烏里雅蘇台參贊大臣補鑄陝西
神木波羅等營參將關防從巡撫邵亨豫請
也以古城三道廠子堵擊竄匪獲勝賞署
遊擊徐學功巴圖魯名號旌表守正捐軀
河南泌陽縣民張禧女妮緩徵兩淮富安
安豐梁垛東臺河垛丁溪草堰劉莊伍佑新
興廟灣板浦中正臨興十四場被水地方新
舊竈課有差戊子諭內閣禮部奏議結磨
勘處分請旨更正並自行檢舉一摺本年順
天鄉試中式舉人徐景春試卷文理荒謬經
磨勘官籤出照例斥革正副考官同考官均
有應得處分著照該部此次所議正考官全
慶副考官胡家玉童華潘祖蔭均著降二級
調用同考官著即行革職至此案正副考官
同考官處分該部前奏辦理未能允協所有
禮部堂司各官著交部分別議處尋議尚書
靈桂萬青葵侍郎察杭阿黃倬綿宜徐桐均

應降一級留任從之又諭給事中陳鴻翊
奏順天各屬因災蠲免各項旗租銀兩請仍
遵旨蠲緩一摺據稱順天寶坻等縣各項旗
租因本年秋禾被災奉旨蠲免分數風聞內
務府莊頭等仍向各縣民佃催索令照十分
交納以致被災民將所領銀米折變交租
甚至遷徙災民不敢歸里領賑請飭查辦等
語蠲免租項原為軫恤災民起見若如該給
事中所奏是莊頭等違例追呼亟應嚴行禁
止著總管內務府大臣即查照從前歷屆被
災蠲緩之案覈實辦理如查有該莊頭等任
意倡索舞弊營私等事即著從嚴懲辦毋稍
徇隱湖北巡撫郭柏蔭因病解職以湖南
布政使吳元炳為湖北巡撫湖南按察使涂
宗瀛為布政使前任甘肅按察使崇福為湖
南按察使旌表夫亡殉節順天民人張玉
衡聘妻郝氏己丑諭軍機大臣等喬松年
奏黃河工程緊要請添撥甲戌年防險銀兩

一摺據稱黃河兩岸各工應需料物必須豫為儲備現在樽節估計擬請添撥防險銀二十七萬四千兩分給南岸銀十五萬四千兩北岸銀十二萬兩等語即照所請即由錢鼎銘督飭藩司如數添撥務於年前先撥四成以便採購料物其餘六成俟來歲春汛前續撥俾資接濟喬松年當督飭道廳等覈實動用總期工堅料實不得稍涉虛糜將此各諭令知之以吏部尚書寶鑒充翰林院掌院

學士以鑲白旗蒙古都統崇實為刑部尚書刑部左侍郎賀壽慈為都察院左都御史前任禮部左侍郎殷兆鏞為吏部右侍郎內閣學士宋晉為戶部左侍郎管三庫事都察院左副都御史劉有銘為刑部左侍郎以前任烏里雅蘇台將軍金順為正白旗漢軍都統未到任前以步軍統領英元署理

大清穆宗繼天開運受中居正保大定功聖智誠孝信敏恭寬毅皇帝實錄卷之三百六十

大清穆宗繼天開運受中居正保大定功聖智
誠孝信敏恭寬毅皇帝實錄卷之三百六十一

同治十二年癸酉十二月庚寅以神靈顯應

頒湖南永順府

關帝廟

御書扁額曰迴瀾垂佑○諭內閣童華現在因
案降調吏部右侍郎殷兆鏞著授奕詳奕謨
讀○又諭前任陝西巡撫劉蓉前因勦賊失
利降旨革職茲據王文韶奏劉蓉於本年十
月間在籍身故等語該員前在湖南湖北四
川陝西等省曾著戰功所有前得革職處分
著加恩開復○改派工部右侍郎宜振恭辦

普祥峪萬年吉地工程○以禮部左侍郎黃倬
兼署吏部左侍郎吏部右侍郎殷兆鏞仍兼
署兵部左侍郎禮部右侍郎徐桐兼署工部
左侍郎○福建巡撫王凱泰陛見以閩浙總
督李鶴年兼署福建巡撫○蜀緩湖南武陵
安鄉龍陽華容澧沅益陽巴陵臨湘湘陰
十州縣暨岳州衛被水地方額賦並雜課有
差○辛卯諭內閣文麟奏前因哈密回子親
王邁哈默特並伊母原任回子親王伯錫爾

福晉邁哈默特福晉均被回匪裹脅現經文
麟將該王邁哈默特並邁哈默特福晉尋救
回城但伊等所住房屋及需用物件盡被蹂
躪其伯錫爾福晉尚未尋獲一摺該回子親
王邁哈默特突遭大難堅守不變深堪嘉尚
著加恩賞給該王銀二萬兩由戶部撥給交
文麟轉交該王以示體恤仍著文麟務將伯
錫爾福晉尋獲回密妥為安撫俟尋獲時即
速奏聞以副朕矜恤回臣之至意○諭軍機

大臣等文麟奏。追勦竄匪。獲勝請催各省欠餉。並飭部撥銀五萬兩。請飭常順等安設北路臺站各摺片。圍偈哈密賊匪。自援軍擊敗後。竄至瞭墩地方。經誠慶等跟蹤追勦。斃賊多名。將回王邁哈默特等救出。惟纏頭去而從賊。恐勾結吐魯番回逆。仍復竄擾哈密。至應嚴加防範。著文麟等督飭各將士將城守事宜妥善布置。不得以賊蹤已遠。稍涉疏懈。臺站為運道所關。現在北路蒙古各臺被擾。

均已逃避。自應趕緊安設。著常順等迅飭蒙古人等將頭二三臺以及北路各臺速為安設。以通運路。刻下哈密需餉甚殷。即著照文麟所請。由戶部籌撥銀五萬兩。迅速解交察哈爾都統衙門收存。即由文麟等派員迎提。其各省應撥哈密餉銀。著戶部咨催各該省督撫飭令藩司迅速撥解。毋任遲延。回城被賊搶掠。該回王等情形困苦。殊深廕念。本日已明降清字諭旨。賞給該回王銀二萬兩。由

戶部解往。著文麟等即將此旨宣示。並著妥為安撫。將此由五百里各諭令知之。○又諭。前據常順奏。參文奎騷擾臺站等款。當經明降諭旨。將文奎開缺。交部嚴加議處。並諭令額勒和布將所參文奎為藥商徐姓傳坐駕杆車等情查明具奏。茲據文奎奏。常順任性妄為。列款參劾一摺。該署將軍署參贊大臣並不以公事為重。輒各挾私見。彼此糾參。殊屬不成事體。所有該署將軍等互參各款。虛

實均應徹底根究。著派額勒和布馳赴烏里雅蘇台。秉公確查。據實具奏。毋稍徇隱。恆矜一員。前據文奎等奏。參該員聲名狼藉。當諭常順查辦。並著額勒和布一併查明。如果所參屬實。即行奏請懲辦。文奎多布沁扎木楚另摺奏多布沁扎木楚因病懇請開缺一摺。多布沁扎木楚是否與常順文奎有意見不同之處。抑係患病屬實。並著額勒和布查奏。該都統接奉此旨後。迅即起程前往。毋稍遲

延所有常順文奎互參摺各一件文奎等奏
參恒矜片一件並多布沁扎木楚懇請開缺
摺一件均著鈔給閱看將此由四百里諭令
知之○以鑲藍旗蒙古都統慶春署察哈爾
都統未到任前以前任科布多參贊大臣奎
昌暫署○以哈密擊賊獲勝賞佐領永成知
縣倪敬修巴圖魯名號守備章林彪等花翎
餘加銜升敘有差○予甘肅各屬陣亡殉難
武舉徐魁等紳民婦女二千一百六十五名
口分別旌卹如例○以故四川茂州年托土
巡檢溫聯科子國威襲職○壬辰以故扎薩
克圖汗扎薩克頭等台吉拜扎巴扎爾扎布
子那遜布彥濟爾噶勒襲職○原任漕運總
督袁甲三母郭氏百歲生辰頒
御書扁額曰百齡衍慶並旌賞如例○是日甲
戌年立春順天府進土牛春山寶座○癸巳
諭內閣都興阿志和春查勘
福陵

昭陵應修各工請擇吉派員興修一摺著欽天
監於明年三四月內選擇吉期先行知照即
著盛京將軍會同工部侍郎屆期敬謹興修
○又諭給事中郭從矩奏禮部議結已革舉
人徐景春一卷意為重輕顯違定例據實糾
參一摺著禮部堂官明白回奏○諭軍機大
臣等豐紳謙禧奏請飭催山西欠餉並豫籌
來年俸餉一摺據稱甯夏滿營現在操練馬
隊修理軍械需餉甚殷上年奏撥山西欠餉
僅據解到銀二萬二千兩不敷支用請飭催
解其來年應放官兵俸餉等項並請飭令籌
解銀五萬兩以資接濟等語著鮑源深督飭
藩司無論何款即將欠解甯夏餉銀二萬八
千兩迅速籌撥發交該處委員務於年內管
解到營俾應急需應撥來年餉銀並著先期
如數籌撥分批解赴甯夏軍營毋任延宕將
此由五百里各諭令知之○甲午
上復詣

大高殿祈雪壇行禮。遣惇親王奕誼詣

時應宮。恭親王奕訢詣

昭顯廟。醇親王奕譞詣

宣仁廟。惠郡王奕詳詣

凝和廟拈香。○諭軍機大臣等。前經諭令額勒和布馳赴烏里雅蘇台。將常順文奎。互叅各款查明具奏。茲復據文奎奏。常順不顧軍務。任意回城一摺。著交額勒和布一併確查。據實奏聞。原摺著鈔給閱看。將此諭令知之。

○乙未補鑄杭州駐防鑲白鑲紅旗協領。正白正紅正藍鑲藍旗頭佐領。鑲白鑲紅旗三佐領。各滿洲圖記從將軍連成請也。○以廣西官軍援剿越南賊匪暨堵剿貴州苗匪出力。賞總兵官蘇萃超。副將劉益元。黃才貴。遊擊潘德言。巴圖魯名號。知府鹿傳霖等花翎。知縣朱鈞韶等藍翎。餘加銜升敘有差。○予故直隸雄縣知縣凌松林。河南南陽府知府劉拱辰。確山縣知縣李德林。山東德州知州

張應翔。山西潞安府知府葉桂芬。入祀名宦祠。從總督李鴻章巡撫錢鼎銘。丁寶楨。鮑源深請也。○予直隸故福建延平府知府楊福五。福建候補知府王肇謙。舉人趙文源。廩貢生王鵬。江蘇故增生陳授。山東故長山縣教諭中際清。滕縣訓導許瀚。山西故候選主事董思源。廣東故浙江嘉興府海防同知劉榮玠。湖南常德府同知謝仲坑。甘肅秦安縣知縣邱步瓊。入祀鄉賢祠。從總督李鴻章巡撫

張樹聲。丁寶楨。鮑源深。張兆棟請也。○賞順天等省鄉試年老諸生曲鶴田等五十人。舉人副榜有差。○丙申。諭內閣。現在肅州克復。關內肅清。因思已故廣東陸路提督劉松山。前在甘肅督兵剿賊。卓著戰功。嗣因深入重險。遇伏捐軀。追念前勞。殊堪矜憫。劉松山業經得有三等輕車都尉世職。著再加賞一等輕車都尉世職。令其嗣子承襲。以彰忠蓋。○又諭劉坤一奏遵旨據實覆奏一摺。據稱查

明胡家玉及其弟姪田畝歷年應完錢糧實有未曾被災辦緩仍未完納者丁漕改章一案胡家玉曾貽該撫書信並非該撫先行致函等語胡家玉本籍田畝應完錢糧既未完納又將丁漕改章一事致書地方官均屬不合降調左都御史胡家玉著交部議處○諭軍機大臣等左宗棠奏出關官軍宜分起行走並遵旨籌擬轉運事宜暨請飭移圖善將所部暫緩出關各摺片官軍攻克肅州後亟

應乘勝出關速圖西進左宗棠擬令張曜一軍作為頭起金順額爾慶額兩軍次第啟行宋慶一軍暫回甯夏整理軍裝各項請俟明年秋後與該大臣精選之軍陸續繼發所籌不為無見即著飭令各軍分起前進迅埽逆氛該軍糧運事宜仍著該大臣妥為籌畫俾收飽騰之效糧臺事極繁重固在得人而理如有必須該大臣前赴肅州親為料簡之處仍應馳往督辦省垣一切事宜據奏有崇保

等經理得宜自可無慮張曜各軍人數將近兩萬兵力不薄而遠道籌糧實非易易穆圖善所部著暫駐紫涇州平涼一帶並著將所部部隊概行撤遣仍帶所部吉林黑龍江馬隊俟來年宋慶一軍整理就緒及左宗棠精選之軍派員管帶後並交穆圖善總統前進扼紮安敦玉一帶督辦轉運事宜其採糧一切仍著左宗棠飭屬妥為經理所有應撤步隊著穆圖善妥為遣散毋令滋生事端官軍

現經分起出關軍行糧隨不容稍有缺乏左宗棠以糧運進抵哈密已經層遞銜接始能運到由哈密前進糧運事宜勢難兼及亦屬實在情形將來各處官軍由哈密節節進剿應如何就地籌畫之處著景廉文麟明春慶壽與金順額爾慶額張曜宋慶臨時酌度情形妥為辦理左宗棠仍當隨時察看力籌兼顧以期無誤軍糧現在安西肅州甘涼一帶回匪悉數殲除地方均已安帖該大臣當將

應辦各事宜。次第妥為籌布。以竟全功。景廉現在古城該處地方為西路進兵要道。古城領隊大臣一缺。並其餘各城員缺。刻尚虛懸。如須請旨簡放。即著景廉迅速具奏。左宗棠另片奏請將該大臣所得一等輕車都尉世職追賞。已故提督劉松山等語。亦經明降諭旨。將劉松山加賞一等輕車都尉世職。令其嗣子承襲。該大臣請將所得世職推讓之處。著毋庸議。將此由六百里諭知左宗棠。金順

穆圖善。景廉。文麟。明春。額爾慶額。並傳諭慶壽。張曜。宋慶。知之。又諭左宗棠。奏道員黎獻。經景廉委令由楚募勇。前赴哈密助剿。現在管帶所募弁勇。取道秦隴出關。沿途陸續逃散。輒收補游勇充數。其經過地方。並有縱勇騷擾情事。該員居心巧詐。敢為大言。毫無實濟。因係景廉委辦軍火。招募楚軍。已飭沿途照章支給口糧車輜。俾得速赴軍營。黎獻實不可用等語。著景廉於該員到營後留心

察看。僅如左宗棠所奏。即著據實奏參。毋為該員所惑。所募勇丁。並著覈實查驗。分別遣留。毋任虛糜糧餉。原片著鈔給閱看。將此諭令知之。又諭常順奏傷疾舉發。同官意見不和。懇請派員接署將軍印務。並遵查六品官恆裕實無劣蹟。各一摺。據稱文奎自到任後。以該署將軍所派各員為均不得力。致令紛紛引退。文奎隨帶之主事志勳等。派署各員。因記不加體察。常順出城督剿。文奎不與多

布沁。扎木楚。會商公事。甚至藥商傳坐臺車。主事裕昌等勒索臺站。並不查問。其六品官恆裕辦事勒索。是以暫留隨營。該員於工需銀兩。並未經手。無從乾沒等語。常順文奎前次互相參劾。業經降旨令額勒和布秉公查辦。即著額勒和布將此次常順所奏各情。彙入前案一併確查。據實覆奏。原摺二件。均著鈔給閱看。將此諭令知之。○以甘肅省城辦理營務。城防出力。賞總兵官范秉誠。巴圖魯

名號予布政使崇保等加銜升敘有差。予
甘肅肅州傷亡遊擊張林祭葬世職加等。
蠲緩山西陽曲奇嵐徐溝薩拉齊太原臨汾
六廳州縣被水被雹地方新舊額賦暨民借
倉穀有差。丁酉。

上御撫辰殿大幄次。賜蒙古王貝勒貝子公額
駙台吉呼圖克圖等宴。並賞賚有差。諭內
閣兵部奏請飭催解地租生息銀兩以備要
差一摺。直隸各州縣應解兵部馬館地租生
息銀兩積欠甚鉅。本年二月間。經該部奏撥
銀二萬兩。僅據解到銀二千兩。本年應徵地
租銀兩亦未解清。明春恭謁

西陵。該部備辦要差需款孔亟。著直隸總督飭
令藩司無論何款。迅將前次奏撥欠解銀一
萬八千兩並欠解本年應徵租銀三千八百
餘兩如數籌措。限來年正月內解到。毋稍遲
誤。嗣後應解該部馬館糧租務須年清年款。
不准再有拖延。己亥。

孝莊文皇后忌辰遣官祭

昭西陵。諭內閣兵部等部奏遵議署將軍織
造處分一摺。前署杭州將軍兼勳舊佐領公
連成擅受革書韓濟華呈詞。著照兵部所議
降一級調用。毋庸查級紀議。抵該員現無職
任。其應得降一級調用處分著照例折罰。世
職半俸三年免其降調。世職杭州織造內務
府郎中文治失察犯書孫錦頂名蒙混著照
吏部所議降二級調用。准其抵銷。諭軍機

大臣等前因劉嶽昭岑毓英奏善後經費孔
亟請飭催各省協餉。諭令瑞麟等先行籌撥
一半。茲據岑毓英奏稱。迄今半年有餘。浙江
解銀十萬兩。江西解銀二萬兩。另解銅本銀
二萬兩。廣東解銀四萬兩。江蘇仍照前每月
解銀五千兩。通共不及二十萬之數。以致各
軍欠餉不能補發。勇營遣撤維艱。地方善後
更無從措手等語。滇省盼餉甚迫。亟應迅籌
接濟。著瑞麟張兆棟吳棠劉坤一楊昌濬李

宗義張樹聲李瀚章吳元炳王文韶懷遵前
旨督飭藩司等將各該省積欠滇省協餉新
餉無論如何為難迅速籌撥一半剋日埽數
交坐催委員匯解來滇其指撥銅本銀兩並
著照數依限起解毋再遲延將此由四百里
各諭令知之○予安徽軍營病故總兵官李
占魁祭葬卹廕○追予雲南賓川陣亡總兵
官褚克昌於省城暨大理府城建立專祠○
追予安徽青陽殉難守備吉學禮祭葬世職

加等眷屬暨家丁等分別旌卹如例○蠲緩
河南孟津祥符陳留杞通許尉氏洧川鄆陵
中牟蘭儀鄭榮陽榮澤汜水禹商邱甯陵永
城鹿邑虞城夏邑睢柘城安陽湯陰臨漳武
安內黃汲新鄉輝獲嘉淇延津滑濬封邱考
城河內濟源修武武陟孟溫原武陽武洛陽
偃師鞏宜陽登封永甯新安南陽唐泌陽鎮
平桐柏鄧內鄉淅川裕舞陽葉上蔡淮甯西
華商水項城沈邱太康扶溝襄城長葛光山

固始息七十七廳州縣被旱被水地方新舊
額賦有差並賑孟津縣災民一月口糧○庚
子以刑部尚書崇實桑春榮吏部右侍郎殷
兆鏞禮部右侍郎徐桐充經筵講官○
上以歲暮祫祭

太廟自是日始齋戒三日○辛丑諭內閣前據
江西巡撫劉坤一陳奏降調左都御史胡家
玉本籍田畝未完錢糧並有先貽該撫書信
情事業將胡家玉交部議處茲據給事中邊

寶泉奏稱胡家玉累次未完糟糧劉坤一豈
漫無覺察何以事歷多年概置不問胡家玉
既有干預原籍諸事之信何以不立時奏聞
迨胡家玉條陳江西丁漕改章互相抵牾始
行糾參藉端報復挾私攻訐等語劉坤一於
胡家玉本籍田畝未完漕糧當時並未奏參
接胡家玉信函後又不即行陳奏亦屬不合
劉坤一著交部議處○又諭李宗義奏甄別
庸劣不職各員請分別懲辦一摺江蘇常州

府知府吳鼎元。年力就衰。難資表率。興化縣知縣黃際清。年老目昏。難膺民社。均著以原品休致。全匱縣知縣俞明厚。賦性剛愎。不洽輿情。准補金山縣知縣何炳章。操守不謹。聲名平常。安徽休甯縣知縣劉中孚。聽斷不公。怨聲載道。候補直隸州知州于昌遂。居心巧詐。辦事荒唐。候補知縣孫亮。功嗜好太深。操守難信。陳毓藻。性情狡獪。聲名平常。均著卽行革職。江甯布政司理問董敬中。賦性疏嬾。

辦事顛預。著以府經歷降補。以示懲儆。○又諭鮑源深。奏特參庸劣各員。請分別降革。改教一摺。山西武鄉縣知縣劉崇禮。性情貪鄙。不洽輿情。著卽行革職。趙城縣知縣金祐。精力就衰。難膺民社。著開缺。以教職銓選。候補知州常豫。才具平庸。難期振作。著降為縣丞。歸部銓選。試用鹽經歷龐謙。巧滑鑽營。舉動乖謬。著卽行革職。以肅吏治。○諭軍機大臣等。文麟。明春奏建銳九營次第到哈。請飭西

征糧臺迅撥月餉一摺。明春所統健銳全軍。已抵哈密。該軍餉需向由西征糧臺每月撥銀七萬兩。歸金順收放。刻下全軍業已抵哈。需餉甚亟。著左宗棠飭令西征糧臺委員。將應解該軍月餉銀七萬兩。除吉江兩營馬隊月餉一萬兩。仍解歸金順支放外。其餘銀六萬兩。卽徑解交哈密。由明春自行支發。俾免周折。並著迅行籌撥四五箇月餉銀。委員由輝路解運文麟。明春一面派員迎提。以期迅速。

哈密現雖解嚴。惟地方緊要。防勦未可稍鬆。文麟等因哈密兵食採辦維艱。擬撥健銳馬步四營。飭令提督宋興元帶領先行赴坤。就食兼辦防堵事宜。並於此四營內分撥二營交景廉差遣。卽著該辦事大臣等妥籌辦理。彼此兼顧。明春請於開春仍將吉江兩營馬隊調齊。整頓營伍。擬親赴古城協辦。著文麟等臨時相度機宜。與景廉妥善籌商。以定進止。將此由五百里各諭令知之。○壬寅。以

歲暮禋祭。前期遣官祭

太廟中殿。

後殿。○諭內閣。明年恭逢

慈禧端佑康頤皇太后四旬大慶。並朕親政後

初屆元日令辰。允宜仰體

慈懷。覃敷闡澤。因念推恩之序。首重親親。乎郡

王著賞銀三千兩。多羅貝勒載治著賞銀二

千兩。俱由內給發。惠郡王奕詳。鎮國公奕謨

均著交宗人府從優議敘。多羅貝勒載澂著

賞加郡王銜。頭品頂戴。著賞給三等輔

國將軍。頭品頂戴。著賞戴花翎。用示施

恩。錫類篤念宗支至意。○又諭。明年恭逢

慈禧端佑康頤皇太后四旬大慶。並朕親政後

初屆元日令辰。業經加恩近支王貝勒等。因

思中外王大臣有勤勞素著者。亦宜特沛恩

施。恭親王。文祥。寶璽。均著交該衙門從優議

敘。沈桂芬著賞給御書扁額一方。科爾沁親

王伯彥訥謨祜多羅貝勒奕劻。公景壽均著

賞穿帶。索紹祺。大學士。兩廣總督瑞麟。大學

士。直隸總督李鴻章。協辦大學士。陝甘總督

左宗棠。均著交部從優議敘。用示宣綸。錫美

至意。○又諭。都興阿。志和。奏興修要工。驗無

尊藏寶匣。應請補領一摺。

福陵

隆恩殿工程。經都興阿等敬謹興修。將

隆恩殿大脊中間龍口開看。並無寶匣。著內務

府查照成案。備辦匣藏各件。俟明春都興阿

等派員領取。時交給祇領。至此項寶匣。前據

承修大臣。阜保。胡家玉。奏稱。匣內金銀等項

尚堪供用。經篇等項。應行補領等語。現經都

興阿等查明。甄瓦並無隙縫情形。何以竟無

尊藏寶匣。著阜保。胡家玉。明白回奏。○又諭。

李鶴年。奏請將庸劣不職各員。分別撤省。降

革等語。福建泉州府蚶江通判潘文鳳。人尚

明白。措置失當。連江縣知縣張元祿。才具謹

飭。人地未宜。均著撤省。另補。署上杭縣知縣

徐元休違例科罰不諳政體署武平縣知縣
晏詩觀玩視命案人亦平庸均著以府經歷
縣丞降補署建陽縣知縣試用通判何燮元
縱役擾民聲名甚劣試用布政司經歷壽維
蕃委辦釐務頗滋物議著一併革職以肅官
方賞軍機大臣工部尚書李鴻藻母姚氏
御書扁額曰錫類延齡○朝鮮國王李熙遣使
表貢方物賞賚筵宴如例○癸卯裕祭
太廟

上親詣行禮遣官祭
永陵
福陵
昭陵
昭西陵
孝陵
孝東陵
景陵
泰陵

泰東陵
裕陵
昌陵
昌西陵
慕陵
慕東陵
定陵○遣官祭
端慧皇太子園寢○遣官祭
太歲之神○朝鮮國使臣鄭健朝等三人於

午門外瞻觀○甲辰
上御保和殿筵宴朝正外藩科爾沁喀爾喀蘇
尼特阿巴噶教漢烏珠穆沁浩齊特土默特
茂明安巴林扎魯特喀喇沁翁牛特烏喇特
鄂爾多斯阿巴哈納爾土爾扈特扎哈沁察
哈爾王貝勒貝子公額駙台吉暨朝鮮正副
使隨文武大臣依次就坐諸樂並作
上進酒召科爾沁扎薩克圖謝圖親王巴寶多
爾濟喀爾喀親王車林多爾濟蘇尼特郡王

托第布木。阿巴噶郡王。瓦津達拉。敖漢郡王。色丹諾爾多克烏珠穆沁貝勒達克丹。浩齊特郡王濟克登噶維張。土默特貝勒散巴勒諾爾贊茂明安貝勒格楚克。巴林貝子索哩雅扎魯特鎮國公達瓦富保喀喇沁輔國公維羅布忠。鼐翁牛特輔國公克什克阿爾畢濟呼烏喇特輔國公貢桑端魯布鄂爾多斯頭等台吉扎那巴蘭扎。阿巴哈納爾二等台吉多特諾爾布。土爾扈特汗布彥烏勒哲依

圖扎哈沁公敏珠爾多爾濟察哈爾四等台

吉齊莫特等至

御座前賜酒成禮。○

慈安端裕康慶皇太后

慈禧端佑康頤皇太后幸漱芳齋侍午膳。○酉

刻詣鍾粹宮

慈安端裕康慶皇太后前行禮。長春宮

慈禧端佑康頤皇太后前行禮。○是年旌表孝

子。江西等省陳占甲等四十一名孝友。江西

等省程學淵等十一名順孫貴州省汪守義等三名孝義。江西等省彭效曾等十名孝婦。江西省劉陳氏等三口孝女。江蘇省楊氏等五口烈婦。江西等省楊誠妻水氏等十五口烈女。江西省胡崇驥聘妻張氏等二口義女。江西等省曾崑等九名義行。江西省晏仲傑等三名義夫。江西省陳作棟等二名守節。合例滿洲贊禮郎恆春妻傅察氏等一百十六口。蒙古拜唐阿阿普都拉妻馬氏等一百十

六口。漢軍馬甲三音布妻郝氏等三十七口。

內務府匠役興盛妻趙氏等二口。

東陵承辦事務衙門間散岳恆妻吳佳氏等三

口。盛京將軍衙門間散陳禹妻張氏等六十

四口。盛京戶部壯丁劉學玉妻范氏一口。盛

京工部壯丁劉廣昇妻郭氏一口。各省駐防

養育兵貴陞妻那拉氏等一百十九口。奉天

等省于彭年妻王氏等二萬八千五百口。夫亡

殉節。甘肅等省慕子駿妻王氏等二十口。未

婚守志江西等省李連貞等十一口百歲壽
民婦山東等省唐君顯等十九名口五世同
堂四川等省王王氏等三十九家六世同堂
四川省李含茂一家樂善好施江西等省王
學植等十二名均給銀建坊如例○會計天
下民數穀數除江蘇安徽雲南廣西陝西甘
肅未經冊報外奉天等省通共大小男婦二
萬七千七百十三萬三千二百二十四名口
存倉米穀二百八十四萬六千七百八十八
石九斗八升六勺

大清穆宗繼天開運受中居正保大定功聖智
誠孝信敏恭寬毅皇帝實錄卷之三百六十一

大清穆宗繼天開運受中居正保大定功聖智
誠孝信敏恭寬毅皇帝實錄卷之三百六十二

恭錄穆宗皇帝實錄卷之三百六十二

聖祖皇帝實錄卷之三百六十二

聖祖皇帝實錄卷之三百六十二

聖祖皇帝實錄卷之三百六十二

聖祖皇帝實錄卷之三百六十二

校修

同治十三年甲戌春正月乙巳朔

上詣

奉先殿行禮○詣

堂子行禮○遣官祭

太廟後殿○率王以下文武大臣詣

慈寧門慶賀

慈安端裕康慶皇太后

慈禧端佑康頤皇太后禮成御太和殿受朝作

樂宣表如儀○詣

大高殿

壽皇殿行禮○御乾清宮賜近支親藩等宴○

奉

慈安端裕康慶皇太后

慈禧端佑康頤皇太后幸漱芳齋侍午膳○丙

午

上詣鍾粹宮問

慈安端裕康慶皇太后安長春宮問

慈禧端佑康頤皇太后安至癸酉皆如之○奉

慈安端裕康慶皇太后

慈禧端佑康頤皇太后幸漱芳齋侍午膳○展

緩直隸通三河武清寶坻薊香河甯河霸保

定文安大城固安永清東安宛平良鄉涿順

義懷柔灤清苑安肅新城蠡雄高陽安河間

獻仕邱交河景吳橋東光天津青靜海滄鹽

山開元城大名東明長垣豐潤玉田安平定

四十八州縣被水地方春徵額賦並展房山

樂亭博野容城祁阜城肅甯故城南皮無極

豪城任雞澤清河南樂清豐宣化武強饒陽

深澤二十州縣節年民欠糧租○丁未

高宗純皇帝忌辰遣官祭

裕陵

上詣

壽皇殿行禮○諭軍機大臣等前據都興阿志和奏興修

福陵

隆恩殿工程驗無尊藏寶匣當經諭令阜保胡家玉明白回奏茲據奏稱同治八年五月

隆恩殿工程合龍與都興阿等同至工次目擊工匠敬謹將寶匣尊藏此次都興阿等未曾到工僅據工員稟稱眼同匠役揭開脊瓦並無寶匣甄瓦亦無隙縫雖係一面之辭惟事隔多年無從究詰等語著都興阿志和查明據實覆奏原摺著鈔給閱看將此各諭令知之○戊申諭內閣前據御史袁承業奏泰山西翼城縣知縣錢官俊稷山縣知縣田依渠貪劣各款當諭鮑源深查明具奏茲據奏稱

錢官俊前在翼城購買墳地寄葬其母未據呈明此外並未置有房地現在翼城任內尚無縱令伊弟招搖及聽任已革拔貢趙遠熙唆訟過付等情惟任用門丁鄭蘭亭致招物議已故稷山縣知縣田依渠實有納賄勒捐情事等語錢官俊在翼城任內尚無貪婪確據惟其母寄葬該縣不於補缺後據實呈明珠屬不合著交部議處門丁鄭蘭亭即鄭叔亭不安本分著即押解回籍不准逗遛稷山

縣知縣田依渠被參屬實業經病故著無庸議○緩徵山東濟甯鄒平長山齊河濟陽禹城長清東阿平陰霑化甯陽鄒嶧壽張荷澤曹鉅野鄆城濮范觀城朝城茌平冠博興樂安武城金鄉嘉祥齊東臨邑肥城東平海豐滕汶上陽穀聊城館陶夏津魚臺四十一州縣暨德州東昌臨清濟甯四衛東平所被水被旱被蟲被鹼地方上忙額賦並雜課有差○

以上辛祈穀於

上帝自是日始齋戒三日○己酉

上以孟春時享

太廟自是日始齋戒三日○庚戌

上詣南郊齋宮齋宿○諭軍機大臣等○劉坤一奏拏辦謀逆匪犯等語上年江西安遠信豐二縣交界之涼傘嶺山內有土匪與外來匪徒勾結圖謀不軌當經破獲匪犯黃得幅等多名並訊明楊忠良係總理江西紅黃白三

教現復受封偽都督其總頭李利貞經白教頭目趙得勝接在湖北襄陽縣鄉間開有齋壇湖南係劉中和譚貫南等為主閩廣均有黨與約期八月舉事業將該犯等訊明處斬以昭炯戒惟該逆逃尚多且其羽翼甚眾極應認真搜捕著劉坤一飭屬嚴密查拏將逃犯張侍傳歐陽魁等並此外匪黨按名弋獲盡法處治並著瑞麟李鶴年李瀚章王凱泰吳元炳王文韶張兆棟一體嚴緝務絕根

株不得敷衍了事貽患地方原片著鈔給瑞麟李鶴年李瀚章王凱泰吳元炳王文韶張兆棟閱看將此由四百里各諭令知之○展緩江西南昌新建進賢清江新淦新喻峽江蓮花安福永新金谿東鄉餘干樂平建昌德化瑞昌湖口德安彭澤豐城上高新昌鄱陽萬年星子都昌二十七廳縣暨南昌九江兩衛被水地方新舊額賦雜課○辛亥祈穀於上帝

上親詣行禮○詣

關帝廟拈香

世祖章皇帝忌辰遣官祭

孝陵○諭軍機大臣等○都興阿等奏拏獲金州屬界械鬪賊首正法一摺賊首宋憫倡糾眾在金州尹家屯地方與高希田械鬪殺傷多人業經總兵張得祿等帶隊擒獲正法並將此股匪徒撲滅辦理尚屬妥速惟高希田即高退愚亦有在岫巖界坎子下屯地方糾匪

搶刦情事現在全家逃入海洋亟應查拏懲辦著都興阿清凱志和恭鏜嚴飭所屬旗民地方官各處按緝並著文彬檄令所屬各州縣及沿海一帶一體捕拏務獲盡法懲治以絕根株而杜後患所有此次出力官兵勇著准都興阿等擇尤酌保毋許冒濫將此由四百里各諭令知之○壬子享

太廟遣孚郡王奕譞恭代行禮○遣官祭

太歲之神○諭軍機大臣等景廉奏陝回攻撲上馬橋派兵援剿錫綸奏擬撤蒙兵暨副總管於兵潰後隨同破賊請免議罪各摺片陝回白彥虎率黨攻撲上馬橋景廉以徐學功兵力甚單派令沙克都林札布帶隊馳援該逆人數眾多意在掠糧占踞要隘沙山子地方素稱產糧之區且為西進大兵要道上馬橋距沙山子僅數十里該處稍有疏虞則沙山子新渠等處皆形喫緊徐學功所部止有三營兵力實形單薄前經諭令榮全飭令

駐紮沙灣之孝順一軍迅速馳往會剿並諭令景廉於就近各軍如有應撥之處即行調遣以期無誤兵機何以孝順一軍屢催未到著榮全即飭孝順迅速統兵前往會埽逆氛該處軍情緊急儘各軍任意延緩必至貽誤事機著景廉嚴催孝順所部速往應援如再遲延即由該都統嚴行叅辦兵事旦夕異宜應敵豈容稍緩嗣後各軍僅有不遵調遣者即著景廉指名嚴叅以肅軍令沙克都林札布所帶各隊景廉即飭令會同徐學功認真防剿以待援軍錫綸所部無多並著該領隊大臣統率前進會同孝順沙克都林札布兩軍進駐沙山子扼要防剿務將該逆合力殲除毋任蔓延為患副總管蒙庫吉呼噶爾所帶蒙兵聞賊即潰不能得力錫綸擬將此項蒙兵裁撤騰出餉銀招募民勇即著咨明榮全景廉英廉巴彥特古斯等將此項蒙兵內由錫綸酌留二百名應用其餘悉數裁撤該

兵月餉卽於出奏之日停止以節糜費蒙庫吉呼噶爾在烏梁海所屬之克克莫敦軍臺地方遇賊敗潰實由烏梁海部眾聞警遠避又因蒙兵驚潰以致失機姑念其於兵潰後尚能收集殘眾隨同破賊蒙庫吉呼噶爾著免其議罪將此由五百里各諭令知之○又諭景廉奏請飭催各省協餉並飭部撥款一摺據稱該營月餉前經部撥四川山東山西河南陝西湖北等省每月專款銀八萬兩僅

據河南報解銀二萬五千兩其餘各省未據報解現在各路援兵計將次第到營需餉甚殷請旨飭催並請先撥部款二十萬兩以資接濟等語景廉軍營餉需關繫緊要各省協餉未能應期解到轉瞬援兵雲集待用孔亟著照所請卽由部庫先行撥給銀二十萬兩以應急需並著李瀚章吳棠文彬鮑源深錢鼎銘邵亨豫吳元炳督飭藩司迅將各該省應撥景廉軍營專餉埽數解清毋任稍有延

欠致誤要需將此由五百里各諭令知之○以正黃旗蒙古都統載容兼署鑲藍旗蒙古都統○賞浙江等省癸酉科鄉試年老諸生吳子申等一百一人舉人副榜有差○甲寅上詣

時應宮拈香○御紫光閣賜蒙古王貝勒貝子公台吉暨朝鮮使臣呼圖克圖等宴並賞賚有差○諭軍機大臣等王文韶奏楚軍追勦丹古亂苗逸賊悉數殲除防境肅清一摺苗匪李官保等勾結古州逆酋李公雞於上年十月間竄至咱刀地方經王文韶檄令提督龔繼昌等會合黔軍進勦先後斃賊多名並將首逆李官保等生擒正法李公雞乘夜逃逸復經我軍擒獲梟示防境均已肅清在事出力各員弁准其彙案擇尤保奏惟苗民性多反覆難保不別滋事端仍著曾璧光周達武督飭地方官妥為鎮撫並將善後事宜次第興辦毋令再生反側王文韶當於湘黔

交界一帶隨時防範如有苗匪稍形蠢動卽當不分畛域會籌勦辦以遏亂萌將此由五百里諭知王文韶曾璧光並傳諭周達武知之○又諭承繼等奏達賴喇嘛下山奉經一摺現在藏地清平達賴喇嘛擬於本年正月閒下山率領僧眾親赴大招攢招奉經為國祈福具見惻忱洵堪嘉尚卽著承繼等前往布達拉山妥為照料並發去黃哈達一箇銀曼達一箇鈴杵一分菩提念珠一串玉盃一

箇玉杯一箇小卷五絲緞二卷傳諭該達賴喇嘛祇領用昭恩賚將此各諭令知之○乙卯

孝全成皇后忌辰遣官祭

慕陵○諭軍機大臣等清安奏請添撥經費一摺前因修理

西陵橋梁道路並各處行宮工程當諭李鴻章由藩庫撥銀一萬二千兩現在修理亭座等項用款不敷著李鴻章飭令藩司再行迅速

撥銀六千兩卽由清安派員領取以濟要需並著清安將應修各工趕緊辦理統俟工竣將用過銀數咨送覈銷毋稍浮冒將此各諭令知之○丙辰諭內閣御史鄧承修奏請飭禁抽收闡姓賭款一摺據稱廣東省賭風甚熾每屆鄉試及歲科試期開場設局竟有巧立闡姓名目抽收經費等語賭博本干例禁况考試屆期尤應嚴行禁止若如該御史所奏藉端抽收款項殊屬不成事體著瑞麟張

兆棟卽行裁革出示嚴禁以肅政體而杜弊端○又諭左宗棠奏請簡漢中鎮總兵一摺陝西漢中鎮總兵員缺著楊長春補授向來提鎮缺出均由特簡且現在各軍營俱有記名人員候旨簡放此次左宗棠將周紹濂等開單呈覽殊屬非是嗣後各督撫務當恪遵定例不得列名請簡以符體制○命翰林院編修張英麟檢討王慶祺在弘德殿行走○予貴州各屬陣亡殉難文生熊開元等紳民

婦女一千三百七十九名口分別旌卹如例

○丁巳

上御乾清宮賜近支親藩等宴○諭內閣英翰奏請將庸劣不職之知縣等官分別降革一摺安徽全椒縣知縣黃嘉瑞操守平常候補知縣余允圻居心巧滑試用直隸州州判孫澄心地糊塗補用巡檢陳夢梅行止輕浮均著卽行革職前署全椒縣巡檢魯國璠任性妄為聲名陋劣著卽革職永不敘用候補知

縣蕭立熙委靡不振著以府經歷縣丞降補以肅官方○諭軍機大臣等瑞麟張兆棟奏越南股匪與法國兵互相攻擊情形未定擬請固守邊圉相機籌辦各摺片法國與越南構兵踞其河內省城股匪劉泳幅等乘機肆擾與法兵互相攻擊現聞法國已與越南議和因股匪猖獗回國添兵往剿該國事勢紛紜情形未定中國自當扼要駐紮固守疆圉未便越境用兵轉致生事瑞麟等已檄鄭紹

忠帶勇二千名馳赴欽州附近扼紮著飭令該總兵隨時查探遇有越南匪徒竄至邊界立卽會同地方文武實力堵剿其洋面交界處所並著認真防堵毋任竄越粵西防軍向紮越南高平諒山二省已由瑞麟等知照法國領事毋得進兵侵犯該處粵軍亦不向河內轄境前進免至互啟猜疑有傷和好著劉長佑飭令覃遠璉等遵照辦理太鎮南甯三府均與越南毗連該撫當妥為布置以固邊

防廣東按月應協廣西餉銀二萬兩仍著瑞麟等隨時籌措源源接濟毋稍推諉將此由五百里各諭令知之○江蘇巡撫張樹聲奏請於蘇州府城建立淮軍昭忠祠列入祀典允之○以正紅旗蒙古都統奕山兼署鑲白旗滿洲都統○命降調吏部右侍郎童華仍在上書房行走賞已革戶部左侍郎潘祖蔭翰林院編修仍在南書房行走○撥神機營攢竹槍三百桿銅帽三萬粒鉛箭二萬出交

科布多委員領回備用○戊午

宣宗成皇帝忌辰遣官祭

慕陵○

上詣

奉先殿

壽皇殿行禮○追予江蘇各屬陣亡殉難在籍

知縣諸葛璣等紳民婦女一千七百十二員

名口分別旌卹如例○己未

上詣

大高殿

壽皇殿行禮○御保和殿賜王以下文武大臣

蒙古王貝勒貝子公額駙台吉暨朝鮮使臣

等宴○奉

慈安端裕康慶皇太后

慈禧端佑康頤皇太后幸漱芳齋侍午膳○庚

申

上御乾清宮賜大學士尚書等宴○辛酉諭內

閣醇親王奏

陵寢殿宇改飾不合舊規請旨更正一摺據奏

慕陵

隆恩殿向係本色枅木罩漆現在梁柱等處改
用油飾不合舊規等語

慕陵

隆恩殿既係本色枅木罩漆何時改用油飾著
工部卽行查明具奏○又諭吏部奏遵議大
員處分請分別革職革任各一摺降調左都
御史胡家玉著加恩改為降五級調用江西

巡撫劉坤一著加恩改為革職留任降為三
品頂帶○諭軍機大臣等榮全奏援剿喫緊
請催察哈爾馬隊速進暨伊犁現在情形請
飭大兵迅速出關並請飭部添撥月餉景廉
奏因病請開缺各摺片陝回大股勾結烏嚕
木齊瑪納斯昌吉古牧地等處賊眾分撲沙
山子沙灣地方攻破村堡榮全派令福珠禮
帶隊應援馳抵沙灣賊已聞風遁去沙山子
等處地方關繫緊要徐學功一軍在上馬橋

與賊久持。雖獲勝仗。無如賊眾兵單。盼援甚急。前經諭令榮全速飭孝順帶兵前往。現在福珠禮業由沙灣前往援剿。仍著該署將軍酌量緩急。飭令迅速馳往。會同徐學功暨景廉派出各隊。迅將此股賊匪合力殲除。毋任蔓延為患。榮全所部馬隊無多。防剿實不敷分布。科城前次截留之察哈爾馬隊官兵二百五十名。前經托倫布等奏。已由科布多放給兩箇月口分銀兩。定於上年十二月二十

日分起西進。即著托倫布保英飭令此起官兵迅速馳赴塔城。以厚兵力。伊犁一城。尚為俄人占踞。耽延日久。必至枝節叢生。辦理更形棘手。前據左宗棠奏。擬令張曜金順額爾慶額各軍分起出關。金順一軍。本諭馳赴古城。與景廉會商進剿。未知該軍現在行抵何處。著即迅速西進。並著左宗棠將糧運事宜妥為籌備。令張曜額爾慶額等軍陸續趨行。金順抵古城後。即著會同景廉各軍速將瑪

納斯烏魯木齊等城剋期收復。兵威一振。則伊犁辦理較易。為力該大臣務當嚴飭各軍鼓行西進。迅赴戎機。速將回逆蕩平。得占先機。則俄人亦可杜其隱患。榮全一面就現有兵力妥籌布置。並將伊犁營制力為整頓。一面與俄國據理辯論。毋任再生事端。並著總理各國事務王大臣與俄國住京使臣詳悉剖明。一俟大兵出關。即當妥為辦理。景廉當俟金順到古城後。酌度機宜。籌商進剿。該都

統病體未痊。著賞假一箇月安心調理。無庸開缺。該處日行事件。該都統已咨會成瑞代辦。儻有緊要事宜。仍著景廉妥為經理。以副委任。榮全軍營需餉甚殷。著戶部於該軍月餉外每月再添撥銀一萬兩。由榮全按季派員一併請領。將此由六百里各諭令知之。○又諭榮全奏請籌調協餉一摺。榮全軍營餉需。歷經諭令山東山西河南等省撥解。協餉茲據奏稱。各該省報解寥寥。應給索倫俸餉。

及接濟伊犁等處銀兩無款可籌現擬整頓伊犁營制餉項尤不可緩請飭戶部墊撥銀兩由山東等省撥解歸款等語著照所請卽由部庫先行墊撥銀十萬兩迅速解交應用並著文彬鮑源深錢鼎銘各於該省應解新疆協餉內照數提撥解還部庫以清款目仍將欠解榮全軍營協餉督飭藩司籌款源源報解俾資接濟毋任再有延欠將此由五百里各諭令知之○壬戌以雲南克復大理等

城出力賞總兵官和述慶安紹欽一品封典副將宋為英參將胡泗王萬鎰遊擊黃天喜蘇洪李芳梅徐成林都司張有福楊恩禮邢鍾秀朱明新巴圖魯名號知府周範參將張文壽等花翎州同段永濬等藍翎餘加銜升敘有差○予雲南各屬陣亡殉難府經歷高翀等紳民婦女六十八十九員名口分別旌卹如例○癸亥

上御撫辰殿大幄次賜蒙古王貝勒貝子公額

駙台吉暨朝鮮使臣等食○諭軍機大臣等文彬奏覆查東明石莊戶口門難以施工應請緩辦一摺文彬親往石莊戶等處詳細查勘丁寶楨所議堵口築隄之舉時日既迫形勢又復變更難以興辦該署撫擬於趙王河以北金隄以南修築長隄咨會李鴻章將東明一帶與濮州毗連處所一律接修並於荷澤等境勸諭居民各修隄埝籌堵石莊戶下游支流趙王河南岸修月隄一道以為屏蔽

汶口之計卽著文彬督飭委員妥籌辦理所需銀兩卽由該省籌款奏明動支並著李鴻章飭令東明一帶地方接修長隄以資保衛黃水擠清下注江北下游亟應豫籌防範著李宗義張樹聲會同喬松年恩錫詳悉勘明擇要修守所有各該省應修各工李鴻章等務當悉心酌度妥速籌辦以捍水患而衛民生前經部撥銀三十萬兩著文彬咨令各省解赴漕運總督衙門交納以備江北辦工之

需將此諭知李鴻章。李宗羲。喬松年。文彬。張樹聲。並傳諭恩錫知之。○又諭定安奏抽撤大同官兵。並裁撤歸綏糧臺一摺。現在歸綏邊防較鬆。該處有金運昌等軍留防。定安擬暫留大同步隊二百名。綏遠馬隊二百名。並酌留員弁襄理營務。其餘大同鎮步隊九百餘名。暨行營差遣官兵一律遣撤。並將歸綏糧臺裁撤。所籌尚妥。著定安與鮑源深悉心會商。妥為辦理。嗣後應放餉項。按月由省籌解。卽照定安奏定章程。由歸綏道經理。仍於年終由該省籌防局查覈奏銷。以清款項。將此各諭令知之。○以記名副都統奎英為歸化城副都統。○甲子。署漕運總督恩錫奏。轉漕首重治河。安民必先戢盜。現將牘壩各工擇要修築。並飭防營會同各州縣嚴緝積匪游勇。以靖地方。得旨。所有應辦事宜。務當實力辦理。以副委任。○乙丑。孝穆成皇后忌辰。遣官祭。

慕陵。○諭內閣。都興阿等奏。查明城守尉被控案情。請旨辦理一摺。開原城守尉定純。先因屬界佟家屯有匪徒聚眾搶劫。派兵往捕。將匪首潘海殺斃。並拏獲賊官正兇趙銀等。究辦。旋被宗室恩吉等呈控。擅殺苛斂各情。現經都興阿查明。潘海實係搶劫罪犯。並非定純擅殺。惟為伊子報捐主事官軍商民致送賀儀。雖未收受。未經阻止。殊屬不合。開原城守尉定純著開缺。交兵部帶領引見。匪犯趙銀。卽趙有苻。並籍廣澤。潘銀。卽潘萬苻。劉幅等三名。及具控之宗室恩吉。生員額力得穆。姚立義等。應得罪名。均著交盛京刑部按律定擬具奏。○蠲緩兩浙仁和錢清西興長亭海沙鮑郎蘆滙橫浦浦東青村十場荒田暨被災地方上年竈課。○丙寅。諭軍機大臣等。常順等奏。分撥馬隊裁撤蒙兵。並請飭催欠餉各摺。片。榮全錫綸軍營需兵助剿。常順擬將永德挑選察哈爾新兵分撥五百名。令依

楞額帶赴科布多駐紮。即將科城截留察哈

爾馬隊二百五十名。馳赴榮全軍營助剿。其

前由烏城分駐科城之吉林黑龍江官兵。撤

回歸起。所有烏城駐紮之賽札兩盟蒙古防

兵。卽行裁撤。至依楞額原帶之察哈爾二起

馬隊。歸併豐陞阿統帶。仍在扎巴罕駐紮。卽

著常順多布沁扎木楚。分別辦理。並飭令統

帶各員。迅赴防所。儻榮全錫綸兩處。遇有緊

急。卽先令科城之隊就近馳往。一面酌撥烏

城之兵。繼進。以期聲勢聯絡。現在烏城需餉

極形急迫。據常順等奏。不但各部落欠發之

項。時時呈催。且榮全錫綸及哈密委員索餉

之咨。絡繹不絕。均因無款。未能協濟。所有山

東山西河南每月應撥銀一萬兩。亟應迅速

籌解。著文彬錢鼎銘鮑源深。督飭藩司。將應

協月餉。如數籌措。剋期報解。以濟要需。儻該

城因餉需缺乏。滋生事端。恐該撫等不能當

此重咎也。將此由五百里各諭令知之。○丁

卯。

孝聖憲皇后忌辰。遣官祭

泰東陵。○諭內閣。前因醇親王奏

慕陵

隆恩殿改飾不合舊規。請旨更正。當令工部查

明具奏。茲據奏稱。查據承修大臣董恂等咨

覆。此項工程。係因擦漆較重。未免顏色過深。

近於黃黑。惟做法係遵照原估細冊。修理未

敢輕改舊規等語。董恂崇厚承修此項工程。

於本色枅木梁柱各處。顏色未能與舊相符。

均著交部議處。仍著董恂等敬謹賠修。將厚

漆刮去。另罩薄漆。以復舊規。至此次驗收工

程之大臣。著一併交部議處。尋議董恂等均

罰俸一年。准其抵銷從之。○又諭李鴻章奏。

本屆春差改道處所。開用民田。懇恩蠲免糧

租一摺。本年二月。朕恭奉

慈安端裕康慶皇太后

慈禧端佑康頤皇太后祇謁

西陵應修橋梁道路因年久失修又疊被大水有應行改道處所及改墊尖營地盤均須開用民田自應量予調劑加恩著照所請所有改修道段地盤開用旗民地畝應徵同治十三年糧租著全行蠲免仍著李鴻章督飭該地方官查明項畝數目酌給籽種以示體恤該督等卽刊刻謄黃徧行曉諭務使實惠均霑毋任吏胥舞弊用副朕軫念民艱至意至蹕路經過地方應行蠲免錢糧分數仍俟屆

期再行降旨○追予雲南大理殉難道員林延禧知縣毛玉成署參將懷唐阿建立專祠○蠲緩直隸天津文安兩縣大窪地畝上年額賦暨民借倉穀○戊辰加賞通州煮賑粟米四百石○己巳諭內閣禮部奏議結覆勘試卷一摺上年癸酉科江南等省試卷經派出大臣覆加磨勘當將應議試卷交部覆議茲據該部詳查條例將此次籤出應議各試卷分別斤革停科及正副考官同考官受卷

謄錄對讀各官應議之處繕單呈覽江南舉人楊楫著卽行斥革正考官劉有銘副考官黃自元均著降二級調用同考官朱泰修著卽革職○諭軍機大臣等英廉奏請飭部撥厄魯特營專餉並墊撥塔城餉項各摺片據稱厄魯特營官兵俸餉向由新疆月餉內撥放並無按年專餉現在各省餉銀未能源源撥解應發俸餉等項無款可籌請飭部指撥每年專餉二萬兩以備支放塔爾巴哈台供

支臺站雇覓駝馬尤需餉銀接濟山東省應撥專餉亦未報解並請由部庫墊解銀三五萬兩俾應要需等語厄魯特營官兵困苦現在兵數足額自應寬籌餉項著照所請卽由戶部在於新疆月餉內劃分指撥每年專餉銀二萬兩務令按期撥解毋任缺乏塔城需餉孔殷並著由部庫先行墊撥銀三五萬兩迅速解交英廉驗收應用俟山東省餉銀解到再行扣留歸款慶春奎昌常順多布沁扎

木楚柱嘎爾托倫布保英於塔城專餉月餉解到卽著一面知照英廉一面派委妥員迅速解往毋庸專候迎提以資接濟毋稍稽延將此諭知戶部並由五百里諭令慶春奎昌常順多布沁扎木楚柱嘎爾托倫布保英知之○派都察院左副都御史興恩兵部右侍郎夏同善知貢舉○以都察院左都御史英元署兵部尚書刑部左侍郎恩承兼署戶部左侍郎管三庫事○以正白旗蒙古都統載

治兼署鑲紅旗漢軍都統正黃旗滿洲副都統恩承兼署鑲黃旗滿洲副都統鑲黃旗滿洲副都統克興阿兼署正藍旗蒙古副都統○以兵部左侍郎崇厚署京營左翼總兵○以烏里雅蘇台官軍援勦沙山子等處竄匪獲勝賞副都統福珠禮黃馬褂副都統德陞阿協領成山巴圖魯名號委營總果權等花翎餘升敘有差○庚午以內閣學士黃鈺為刑部左侍郎○辛未諭內閣前據阜保胡家

玉覆奏承修

福陵

隆恩殿工程同治八年五月合龍時敬謹將寶匣尊藏等情當諭令都興阿志和查明具奏茲據奏稱派員將前次開工揭瓦之工匠詳細查訊上年開工時見甃瓦並無裂縫拆卸大脊並無實匣該將軍等反覆研訊實與原報無異前次

隆恩殿工程合龍後工匠尚在大脊高處工作多日恐此際另有隱匿情事至此次該將軍等未經到工係因患病未能前往自請議處等語阜保胡家玉承修此項工程辦理草率實屬咎有應得均著交部議處都興阿志和於此次開工時未經親到工次並著交部議處所有寶匣仍著內務府遵奉前旨敬謹備辦發交都興阿等委員祇領尋吏部議阜保胡家玉均降二級留任都興阿志和均罰俸六箇月准其抵銷從之○神機營奏副都統

銜祥恩呈請前赴軍營效力得旨著發往金順軍營差遣委用○癸酉

孝儀純皇后忌辰遣官祭

裕陵○以錦州副都統豐紳為黑龍江將軍未到任前以墨爾根城副都統依克唐阿護理以錦州協領古尼音布為錦州副都統○以西安將軍克蒙額署甯夏將軍西安左翼副都統圖明額護將軍○予故黑龍江將軍德英祭葬諡莊毅

中書奉 上

主

大清穆宗繼天開運受中居正保大定功聖智誠孝信敏恭寬毅皇帝實錄卷之三百六十二

大清穆宗繼天開運受中居正保大定功聖智誠孝信敏恭寬毅皇帝實錄卷之三百六十三

同治十三年甲戌二月甲戌朔

上詣鍾粹宮問

慈安端裕康慶皇太后安長春宮問

慈禧端佑康頤皇太后安至丙申皆如之○奉

慈安端裕康慶皇太后

慈禧端佑康頤皇太后幸漱芳齋侍午膳○遣

官祭

先醫之神○蠲緩廣西崇善存養利永康雖容來賓柳城凌雲遷江宣化橫永瀉隆安甯歸順奉議武宣河池思恩臨桂靈川永安

修仁。貴武緣賓。上林。二十七州縣被擾地方。額賦有差。○乙亥。

上以祭

社稷壇。自是日始齋戒三日。○丙子。遣官祭

文昌帝君廟。○命甯夏將軍穆圖善在紫禁

城騎馬。○丁丑。春分。朝

日於東郊。

上親詣行禮。○詣

東嶽廟拈香。○祭

先師孔子。遣吏部尚書毛祖熙行禮。○戊寅。

祭

大社。

大稷。

上親詣行禮。○己卯。諭軍機大臣等。文麟。明春

奏。臺塘被擾。擬帶隊赴坤按剿。並請飭左宗

棠等撥銀兩各摺片。及茂臺等處。既有賊蹤

出沒。恐西北臺塘等處被匪竄擾。亟應迅圖

掃蕩。明春現已親帶馬隊。赴巴里坤察看神

形。相機進剿。即著迅速起程赴坤。與慶壽悉心會商。妥籌剿辦。以靖逆氛。所有安設臺站及採辦糧石各事宜。並著妥為辦理。至安敦玉各處。百姓情形困苦。自應及早撫恤。著左宗棠等撥銀數萬兩。派委廉幹之員。會同各該處地方官查明散放。以恤民艱。其明春所統健銳各營口糧。並著文麟與該幫辦大臣籌商。設法供支。以期無誤兵食。將此由四百里諭知左宗棠。文麟。明春。並傳諭慶壽知之。

○以故賽音諾顏扎薩克輔國公珠爾默特旺濟勒子達什多爾濟襲爵。○以甘肅碾伯擊退回匪出力。予副將李春海以總兵官簡放。賞總兵官趙清桂。副將程步雲。參將趙學純。巴圖魯名號。守備王貴霖等花翎。把總夏雲藩等藍翎。餘加銜升敘有差。○庚辰。孝淑睿皇后忌辰。遣官祭。

昌陵。○予故江蘇道員袁保慶附祀原任漕運總督袁甲三河南陳州府本籍專祠。○辛巳。

遣官祭昭忠祠○諭內閣鴻臚寺少卿梁僧寶奏磨勘鄉試中卷應議過多請飭申明定例一摺磨勘試卷關係甚重近來往往視為具文上年癸酉科各省鄉試中卷經磨勘官及覆勘大臣指出疵謬甚多國家設科取士原期甄拔真才豈容以疵謬之文濫竽充數嗣後鄉會試考官務宜細心校閱認真去取毋得草率從事並著禮部於磨勘時查照向章將科場條例及磨勘處分各條詳細申明

認真辦理另片奏科場條例內磨勘各條有未盡周密者共擬十一條請飭部妥議等語著禮部議奏○諭軍機大臣等前據定安奏籌備大同征兵西進需餉孔亟當經諭令丁寶楨等將山東等省應解景廉餉銀撥解綏遠交定安料理征兵起程茲據定安奏稱前項應解餉銀除陝西省已據報解外山東省僅先撥解銀二萬兩河南應解餉銀三萬五千兩迄今未據報解現在景廉軍營需兵助

勦此項征兵亟應起程前進著文彬錢鼎銘督飭藩司迅即如數籌撥務於二月內解到綏遠城毋稍延緩並著定安一面迅速料理該官兵分起西進俟此項餉銀解到酌量撥交慶春等一體雇覓民駝由濟斯洪果爾接辦供支俾利遄行將此由四百里各諭令知之○以故科爾沁扎薩克達爾漢親王索特那木彭蘇克子棍布旺濟勒襲爵○以故土爾扈特扎薩克頭等台吉喇特那巴扎爾子

依德木車林襲職○壬午以詹事府詹事袁保恆為內閣學士兼禮部侍郎銜降調吏部右侍郎童華為都察院左副都御史○癸未遣官祭

文昌帝君廟○諭內閣朕於本月二十四日啟鑒後著派鄭親王慶至大學士單懋謙尚書萬青藜崇綸步軍統領英元留京辦事鄭親王慶至單懋謙萬青藜崇綸四人分日輪班在內直宿不直宿者於申刻散直英元每

日進內辦事後。毋庸直宿。午刻先行散直。○以奉天金州勦賊出力。賞遊擊丁春喜等花翎。防禦奎明等藍翎。餘升敘有差。○甲申。

孝康章皇后忌辰。遣官祭。

孝陵。○諭內閣。前因岑毓英奏在籍職員仇殺。撤任知府各情。當令刑部速議具奏。茲據該部詳覈案情。定擬奏明。請旨辦理。此案雲南東川府知府孔昭鈐。以補用遊擊楊玉麟有縱丁毆差情事。邀至署內面詢。將其頂帽摘

擲。致被差練羣毆斃命。復縱令差役入其家內搶擄貲財。事後並不飭縣相驗。楊玉麟之子補用同知直隸州知州楊汝楫。以案懸未結。因孔昭鈐撤任在省。挾仇將該府刺殺身死。到案自首。本應予以斬立決。姑念其痛父情切。稍從末減。楊汝楫即楊汝舟者。即革職。改為斬監後。開化鎮總兵楊玉科。於伊侄楊汝楫刺殺孔昭鈐一案。雖無同謀情弊。惟平日不能約束。亦難辭咎。楊玉科著交部議處。

按察使程誠。於此案遲延日久。並不審擬斷結。以致釀成重案。前署會澤縣知縣任傳綸。於署內差役。不能約束。彈壓。逮楊玉麟被毆身死。復不照例相驗。且疏脫要犯。以致案懸數年。均有應得之咎。程誠。任傳綸。均著交部分別議處。○丁亥。諭內閣。御史張觀準奏。請禁止私設釐卡等語。各省設局抽收釐金。係屬萬不得已。借資民力。豈容私自添設。苛歛民財。亟應嚴行禁止。著各直省督撫。於所屬應設釐卡。嚴密稽察。儻有私設卡局情弊。即行從嚴叅辦。並著遴派廉正之員。經理局務。覈實報銷。以杜浮冒。○又諭。御史張觀準奏。各省候補人員壅滯。應行疏通一摺。著吏部議奏。其所稱直隸道員葉伯英鑽謀得缺等語。著李鴻章查明據實覆奏。毋稍徇隱。尋奏。葉伯英係合例應補人員。兼為擇才起見。並非鑽謀得缺。報聞。○諭軍機大臣等。前據醇親王奏。據陳六條。以備採擇一摺。內請培東

土以固根柢一條。據稱盛京刳飭刳商吉林
戕害職官之案。疊出。黑龍江呼蘭地方。流民
強橫。請飭軍機大臣統籌全局。今直隸山東
督撫嚴禁流民遷徙。東三盟蒙古固守疆圉。
召東三省宿將來京。面授機宜。逐漸整理。並
每年酌撥神機營馬步各隊。赴東三省沿途
訪拏奸宄等語。嗣復據奏。訪聞東省伏莽未
淨。賊首張振等百十成羣。來往大道。地方官
不敢過問。盜首至今未獲。請飭速籌正本清

源之策等語。東三省為根本重地。自應及早
籌畫。以遏亂萌。著文祥詳細酌度情形。妥議
具奏。醇親王前奏培東土以固根柢一條。並
二月十一日摺一件。均著鈔給閱看。將此諭
令知之。○派御前侍衛春佑。乾清門侍衛照
祥。兵部右侍郎恩齡。恭詣

西陵查看紅椿。○戊子。以庫爾喀喇烏蘇勒賊
獲勝。賞委參領雙有巴圖魯名號。筆帖式松
山等藍翎。餘升敘有差。○己丑。遣官祭

關帝廟。○庚寅。諭軍機大臣等。前據醇親王
奏。請培東土以固根柢。並續據奏稱。訪聞東
省馬賊肆擾。請飭迅速籌辦。各一摺。盛京為
根本重地。近年該省馬賊滋擾。疊經諭令都
興阿等認真拏辦。迄今未能淨絕。根株現在
匪首張振等結黨搶掠。肆行無忌。自應迅籌
正本清源之策。以靖地方。直隸山東等省流
民遷徙東省。向有例禁。嗣因日久懈弛。以致
無業民人。任意趨赴。流為金匪木匪。應即嚴

行禁止。著都興阿等申明舊例。令各該地方
官於關海口岸及沿邊一帶。隨時稽查。毋任
再有遷越。賊匪避兵而行。此拏彼竄。往往派
兵前去。非聞風遠颺。即潛伏村莊。與平民無
異。兵勇不到之處。則又擾掠如故。全在地方
官實心任事。督飭本地兵役。嚴密躡緝。認真
捕拏。方可殲除淨盡。著都興阿。清凱。志和。恭
鏜。破除情面。整頓吏治。於所屬旗民各地方
官。嚴加整飭。儻有庸劣不職。因循廢弛之員。

立即嚴叅。毋稍寬縱。並將緝捕事宜實力籌辦。所有著名匪首。務須悉數弋獲。並將匪黨一併殄除。以遏亂萌。該將軍府尹務當和衷商榷。期於公事有裨。不得稍存意見。經此次諄諄訓諭。後儻該省馬賊仍復蔓延。則是該將軍等視諭旨為具文。並不妥籌辦法。朕必治以應得之罪。其各懷之。毋忽。將此各諭令知之。○又諭。穆圖善奏請將所部步隊統率出關等語。前據左宗棠奏糧運難籌。有旨令

穆圖善裁撤步隊。現據該將軍奏稱駐紮涇州之勁勇左右兩營。親兵前後中左副左五營。南子副右一營。圍隊一營。及劉宗璋所帶親兵二百名。營務處親兵一百名。現駐水埧河之壯勇中一營。久歷行閒。甚資得力。即著該將軍於到甘肅後。將駐涇各營認真裁汰。簡選精銳勇丁。合之所部馬隊。統率出關。俾一兵得一兵之用。不得濫竽充數。徒糜餉項。所留步隊月餉。著穆圖善咨商西征糧臺。妥

籌辦理。其駐紮平番縣一帶之壯勇左右二營。河鎮五營。南子左右兩營。馬勇一百名。並定字中營。均著咨商左宗棠。妥為遣撤。以節餉需。將此諭令知之。○以翰林院侍讀學士鐵祺為詹事府詹事。○加賞普濟堂功德林。煮賑小米二百石。暨銀四百兩。展期兩月。○辛卯。

上詣

時應宮拈香。○御紫光閣。閱侍衛等騎射。○

遣官祭

歷代帝王廟。○諭內閣。本年輪應查閱山東河南江蘇安徽江西五省營伍之期。山東著即派文彬。河南即派錢鼎銘。江蘇即派李宗義。安徽即派英翰。江西即派劉坤一。逐一查閱。認真簡校。如有訓練不精。軍實不齊者。即將廢弛之將弁。據實叅奏。毋得視為具文。○壬辰。清明節。

上詣

奉先殿

壽皇殿行禮○遣官祭

永陵

福陵

昭陵

昭西陵

孝陵

孝東陵

景陵

奉陵

奉東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢○補行同治十一年軍政

兩江浮躁官一員。罷輓官一員。年老官三員。

有疾官一員。處分如例。○癸巳遣官祭黑龍

潭

昭靈沛澤龍王之神。玉泉山

惠濟慈佑靈漢龍王之神。昆明湖

安佑普濟沛澤廣生龍王之神。密雲縣白龍

潭

昭靈廣濟普澤龍王之神。○遣官祭圓明園

惠濟祠

河神廟○追予四川各屬陣亡傷亡弁勇一

千八百九十一員名賞卹如例。○甲午

上詣

時應宮拈香。○御紫光閣閱侍衛等騎射。○

裁江南淮揚鎮標遊擊一員。守備把總各二

員。外委六員。兵二千四百三名。從總督李宗

義請也。○追予江蘇江都等處陣亡殉難六

品頂帶張堯甫等紳民婦女二百二十一名

口分別旌卹如例。並予立祠建坊。○賞山西

等省癸酉科鄉試年老諸生豈式玉等一百四人舉人副榜有差。○丙申。諭內閣。本日御史張觀準條陳江西丁漕摺內。聲稱本年正月間。劉坤一奏請緩徵錢糧。未將被災之都圖村社明白開列等語。該御史所指。究係何州何縣之都圖村社。劉坤一未經開列。著張觀準明白回奏。○諭軍機大臣等。御史張觀準奏京師現行當十大錢。近來式樣漸小。並攙和雜銅鉛片。致奸商圖利私鑄。相傳有沙

板鵝眼名目。請飭查拏等語。奸民私鑄錢文。大千例禁。著步軍統領衙門。順天府。五城一體嚴查。即將私鑄人犯。拏交刑部。按律懲辦。該局鼓鑄錢文。何以竟有攙和情弊。並著戶工兩局認真整頓。不准偷工減本。致滋弊端。至滇省軍務現已告竣。應如何設法採辦銅斤以資鼓鑄之處。著戶部妥籌辦理。原片均著鈔給閱看。將此各諭令知之。○又諭。前因四川欠解周達武軍餉甚多。諭令該督先撥

銀五十萬兩解黔。其所欠尾餉四十萬餘兩。仍令補解清款。現在黔省甫就肅清。所有籌辦善後事宜。及裁撤勇營。一切需款甚亟。即著吳棠懍遵上年十二月初八日諭旨。無論何款。迅速籌解到黔。以應急需。月協餉銀。仍著按月籌解。毋稍拖欠。至山東。福建。江西。廣東。江蘇。浙江。湖北。各省。均經諭令各於欠借黔餉內。先撥銀十五萬兩。飛速解黔。即著曾璧先行文咨。催剋期籌解。毋任延緩。所有黔

省應撥應留之勇。並著該撫與周達武悉心籌商。妥為辦理。將此由五百里各諭令知之。○又諭。岑毓英奏。探聞越南軍務喫緊。籌辦滇省邊防一摺。越南河內省城。被法國帶兵攻破。並有匪徒黃崇英等。乘機攻擊太原山西。勢頗猖獗。雲南開廣臨安轄境。與越南所屬宣光等處接壤。恐有外匪闖入。勾結該處回夷滋事。岑毓英現派提督李文益等。馳往探明賊情。將沿邊防堵事宜。豫為布置。即著

飭令該員等會同地方官隨時認真防範以期有備無患。越南各匪鴟張該撫虞其假冒外國名色。溷入滇境。或捏稱滇省兵練傷及法人。致啟釁端。著總理各國事務衙門照會法國使臣。轉行現駐越南之領事各官。俾知滇省派兵防邊。係堵剿越南各匪。與法兵不相干涉。毋啟猜疑。如欲遊歷入滇。俟越南平靖道路暢通後。方可前往。岑毓英惟當隨時加意籌畫。慎固封守。期於中外相安。以免另

生枝節。另片奏色蠻不時竄擾。擬撥隊巡防等語。著照所議。即將昭通等處標兵挑補足額。分派一半。前往金沙江外駐紮巡守。輪替更換。勤加操練。前設勇營。著即行裁撤。以後營制而固邊防。將此由四百里諭令知之。○
丁酉。

上奉

慈安端裕康慶皇太后

慈禧端佑康頤皇太后啟鑒恭謁

西陵。○至盧溝橋詣

龍王廟拈香。○詣

慈安端裕康慶皇太后

慈禧端佑康頤皇太后行宮問安。至還宮皆如之。○遣官祭賢良祠。○免蹕路經過直隸宛平良鄉。涿房山涑水易六州縣地方錢糧十分之三。○是日駐蹕黃新莊行宮。○戊戌。諭軍機大臣等。前據御史張觀準奏。江西丁漕弊端太多。請旨懲辦。並據稱劉坤一奏請緩

徵錢糧。未將被災之都圖村社開列。降旨令該御史將所指究係何州何縣。明白回奏。茲據奏稱劉坤一摺內。請緩征新建縣被淹各則官民田未完地丁漕米。並未將都圖村社明白開列等語。該御史所奏此次所改新章。仍屬任意浮收。與部章不符。並該撫因何未將新建縣都圖村社開列之處。著劉坤一查明據實具奏。原摺二件。均著鈔給閱看。將此諭令知之。○是日駐蹕半壁店行宮。○己亥。

孝昭仁皇后忌辰遣官祭

景陵○祭

先農之神遣克勤郡王晉祺行禮○賞請轎

鑾儀衛校尉銀○賞守護行宮兵丁半月錢

糧○是日駐蹕梁格莊行宮翼日如之○庚

子

上恭謁

泰陵

泰東陵

昌陵

昌西陵

慕陵

慕東陵俱未至碑亭即降輿痛哭步入

隆恩門詣

寶城前行禮躬奠哀慟王以下文武大臣均隨

行禮○辛丑

上奉

慈安端裕康慶皇太后

慈禧端佑康頤皇太后回鑾○諭內閣本日沿

途蹕路車馬之跡甚多殊不足以昭嚴肅著

管道大臣直隸總督嚴行禁止儻敢不遵仍

有車馬任意踐蹋毋論大小官員即行據實

糾參兵丁大監校尉人等即著從嚴懲辦○

是日駐蹕秋瀾行宮○壬寅賞江南等省癸

酉科鄉試年老諸生宋步梁等二百七十二

人舉人副榜有差○是日駐蹕半壁店行宮

大清穆宗繼天開運受中居正保大定功聖智

誠孝信敏恭寬毅皇帝實錄卷之三百六十三

大清穆宗繼天開運受中居正保大定功聖智
誠孝信敏恭寬毅皇帝實錄卷之三百六十四

聖祖皇帝御製實錄卷之三百六十四

聖祖皇帝御製實錄卷之三百六十四

聖祖皇帝御製實錄卷之三百六十四

聖祖皇帝御製實錄卷之三百六十四

聖祖皇帝御製實錄卷之三百六十四

教

同治十三年甲戌三月癸卯朔駐蹕黃新莊

行宮○甲辰

上奉

慈安端裕康慶皇太后

慈禧端佑康頤皇太后還宮○賞請轎鑾儀衛

校尉銀○乙巳

上詣鍾粹宮問

慈安端裕康慶皇太后安長春宮問

慈禧端佑康頤皇太后安至壬申皆如之○奉

慈安端裕康慶皇太后

慈禧端佑康頤皇太后幸漱芳齋侍午膳○祭
先蠶之神遣

慧妃行禮○丙午諭內閣巡視西城御史文

保等奏職官謀娶釀命請飭部傳訊一摺民

婦王劉氏自行抹傷身死一案著刑部研訊

確情按律辦理戶部主事沈仕元著先行解

任聽候傳訊○命吏部尚書寶鋆協辦大學

士○以都察院左都御史英元兼正黃旗漢

軍都統○予故正黃旗漢軍都統阿克敦布

祭葬○諡勤恪 丁未諭內閣本年補行覆試

日期較早各省續到之未經覆試舉人不能

一體會試未免向隅自應量為變通以示嘉

惠士林至意著禮部查明此次如有未經覆

試舉人准其先行會試俟會試後再令補行

覆試儻覆試時有應行罰科等事仍著該部

知照知貢舉照例辦理嗣後各直省應行覆

試舉人務當及早晉京如期應試毋許任意

遲延此係破格加恩嗣後不得援以為例○

又諭榮全奏。委員私動軍餉。擅離職守。請分別懲辦一摺。副參領銜升用副參領印務章。京文增上年正月間。經榮全派令赴京領餉。該員於所領軍餉內。膽敢私行動用銀四百二十餘兩。候補筆帖式德克吉訥。經榮全派赴張家口辦理轉運各事宜。乃於上年六月。潛行入都。至九十月間。尚未旋口。均有應得之咎。文增著先行革職。即將所欠銀兩嚴行追繳。如有別項情弊。照例懲辦。德克吉訥著

即行革職。飭令回旗。以儆官邪。○諭軍機大臣等。榮全奏邊務緊要。請調員差委一摺。吉林儘先協領防禦雙玉。烏拉佐領春滿。甯古塔佐領巴圖里。甯古塔儘先協領駝騎校永海。著奕榕飭令馳赴榮全軍營。聽候差遣。並飭該員等各由本城。遠帶技藝嫻熟精壯得力官兵各二三十名。即行起程前往。毋稍遲緩。現在軍務未竣。亟應儲備將材。並著奕榕查明該省如有久經戰陣。謀勇兼優之宿將。

據實的保數員。用備任使。將此諭令知之。○命翰林院侍講學士李文田。仍在南書房行走。○戊申。以禮部尚書萬青藜為會試正考官。刑部尚書崇實。工部尚書李鴻藻。吏部左侍郎魁齡為副考官。○以吏部尚書毛昶熙兼署禮部尚書。戶部尚書載齡兼署刑部尚書。董恂兼署工部尚書。戶部左侍郎榮祿兼署吏部左侍郎。吏部左侍郎彭久餘兼署兵部右侍郎。禮部左侍郎黃倬兼署刑部右侍郎。○以鑲黃旗漢軍都統春佑兼署鑲白旗

蒙古都統。○己酉。以太常寺卿龔自閔為內閣學士兼禮部侍郎銜。翰林院侍讀學士周壽昌為詹事府詹事。鴻臚寺卿楊書香署光祿寺卿。○庚戌。諭軍機大臣等。載遷等奏請撥款生息。以備支發一摺。據稱東陵用款日增。永濟籌備二庫。情形支絀。不敷散放。必須籌添款項。再將放款力求撙節。方無窒礙等語。即著照所請。由長蘆鹽務項下。

撥借銀五萬兩以一半銀二萬五千兩解交載遷等發商生息分交永濟籌備兩庫備用以一半銀二萬五千兩由長蘆運司就近發商生息歸還原款俟原借之款如數歸完以後生息銀兩均解交永濟籌備二庫以供支放李鴻章於接奉此旨後即著如數籌撥俾濟要需將此諭令知之○以科布多迎勒回匪疊勝賞委參領鄂爾哲依托克托祐等花翎委防禦棍布扎布等藍翎餘升敘有差○

辛亥諭軍機大臣等前因文彬奏覆查東明石莊戶口門難以施工擬於趙王河等處築隄修埝當經諭令李宗義等於江北下游豫籌防範擇要修守茲據奏稱上年侯家林以南王老戶等處又復潰決其分流入運者擠清下注江境銅沛一帶湖田被淹若罷堵口之議下游更難防範請飭山東巡撫籌堵缺口等語著文彬詳加籌度如石莊戶口門實難施工即先將王老戶等處民埝缺口竭力

籌堵以免黃水下注貽患江北李宗義等所籌江北各屬備禦情形即著督飭派出各員認真辦理不可有名無實徒託空言原摺著鈔給文彬閱看將此由四百里諭知李宗義張樹聲文彬並傳諭恩錫知之○壬子諭內閣左宗棠奏甘肅農業久荒請將積欠錢糧概予豁免一摺甘肅地方被賊蹂躪多年地畝久荒糧租無出閭閻情形困苦加恩著將甘肅省同治十三年以前實欠在民地丁正

耗等項錢糧草束以及番糧番草並向隨地丁額徵課程等項雜賦概予豁免以紓民力該督卽刊刻謄黃徧行曉諭務使實惠均霑毋任吏胥舞弊用副朕軫念民艱至意○以故巴林扎薩克郡王阿拉瑪斯巴咱爾兄額爾奇木巴雅爾襲爵○癸丑孝賢純皇后忌辰遣官祭

裕陵○諭內閣吏部奏遵議臬司各員處分一摺雲南按察使程誠於遊擊楊玉麟被毆斃

命延不審結。致釀重案。前署會澤縣知縣任傳綸。不能約束差役。復不照例相驗。實屬咎有應得。程誠任傳綸均著降二級調用。不准抵銷。任傳綸並有疏脫重犯案懸不結情事。著照部議降一級調用。毋庸查級紀議。抵○又諭給事中邊寶泉奏。覆試舉人試卷出入太重。請飭會議一摺。所有覆試舉人謝煥章試卷。著派桑春榮彭久餘會同禮部秉公查覈具奏。○諭軍機大臣等。常順奏請飭山西

迅解經費銀兩等語。山西省每歲應解烏科兩城經費銀八萬五千兩。上年應解之款。僅據報解銀二萬兩。現在官兵需餉孔亟。著鮑源深迅將欠解銀六萬五千兩。務於五月以前。埽數解清。以濟要需。本年應解經費銀兩。並著趕緊陸續籌解。毋稍延誤。將此由四百里各諭令知之。○甲寅

上幸圓明園。○還宮。○予故戶部尚書署陝甘總督沈兆霖於甘肅平番縣建立專祠。○乙

卯。以前任湖南按察使倉景恬為雲南按察使。○追予江西都昌殉難職員劉經科妻吳氏媳黃氏旌表如例。○丙辰。諭軍機大臣等。張廷岳等奏竄匪盤踞蒙古地方。請將蒙兵暫緩遣撤一摺。賊匪竄踞諾彥山之套。賴商達地方。經伯克瓦齊爾帶領蒙兵追勦獲勝。斃匪多名。惟賊匪現尚盤踞額哲尼河崇庫克地面。該處為烏庫兩城適中之地。亟須即時勦洗。以免日久蔓延。所有伯克瓦齊爾所

帶蒙兵二百名。著准其暫緩遣撤。其額爾德尼招所駐蒙兵三百名。著暫行遣撤。仍聽候調撥。並著張廷岳阿爾塔什達妥為籌布。一面知照烏城派兵會勦。一面飭令伯克瓦齊爾勤加偵探。遇賊即擊。仍當穩慎防勦。毋稍疏虞。將此由五百里各諭令知之。○以正紅旗滿洲都統景壽兼署鑲黃旗蒙古都統。鑲白旗滿洲副都統奕貴署右翼前鋒統領。鑲白旗滿洲副都統穆隆阿署正黃旗護軍統

領○以正紅旗漢軍副都統璟德鑲白旗蒙古副都統成林署鑲黃旗蒙古副都統○丁巳

上奉

慈安端裕康慶皇太后

慈禧端佑康頤皇太后幸漱芳齋侍午膳追

予江蘇各屬陣亡殉難五品銜程文華等紳民婦女一千六百九十二員名口分別旌卹如例○命五城查賑展期兩月○戊午諭軍

機大臣等醇親王奏請飭密籌杜絕洋藥之策等語自洋藥入中國以來耗財害民流毒不可勝言李鴻章既有與該親王談及將此一端與夷辯理力除巨患之意應如何審度時勢杜絕洋藥之處即著李鴻章妥議辦法詳細密陳原摺著摘鈔給閱看將此密諭知之○命右春坊右庶子林天齡提督江蘇學政○己未月食○陝西巡撫邵亨豫奏遵議雲南巡撫岑毓英所陳易勇為兵一節陝省

營兵缺額甚多若挑勇充補應擇本省及近省之善長者補收入伍餘存各營隨時兩裁以節餉需從之○綢緞陝西咸甯長安渭南三原高陵臨潼涇陽醴泉咸陽富平膚施保安安塞延長宜川延川安定甘泉靖邊定邊懷遠神木大荔朝邑邠三水長武郃洛川中部宜君綏德清澗米脂吳堡興平鄠鳳翔寶雞隴城固沔華陰華蒲城武功南鄭澄城四十八州縣被擾地方舊欠額賦有差○庚申諭軍機大臣等金順奏料理出關事宜暨查拏黎獻所部潰勇各摺片金順現派提督劉宏發統帶禮字五營作為前隊徑赴巴里坤續購駝隻此時計已到營即著親督馬步各營前往安西一帶暫紮迅將存儲玉門之糧運赴安西剋期拔營西進馳赴古城與崇廉籌商進取毋得耽延致誤事機托雲佈等所統各營亦即飭令接續前進以厚兵力金順出關後該軍轉運事宜仍著左宗棠隨時力

籌兼顧。俾免缺乏。額爾慶額張曜何時出關。並著該大臣將糧餉轉輸各節。設法兼籌。毋稍推諉。前據李瀚章左宗棠先後奏稱。道員黎獻帶勇未能得力。所募勇丁亦不足恃。曾諭景廉查奏。今黎獻所募之勇。暫紮肅州。不過二百餘人。尚未出關。已有糾夥潰散。並槍斃提督于奇泮情事。不法已極。除首犯汪幅齋等業經金順拏獲正法外。在逃未獲各犯。著左宗棠金順飭令沿途地方官及各路防

軍一體緝拏。務獲嚴行懲辦。毋令漏網。黎獻所部勇丁潰逃。辦理不善。咎實難辭。著先行交部議處。並著景廉認真察看。如黎獻實難得力。卽行據實奏參。毋稍遷就。未逃勇丁。應如何分別遣留。並著酌度辦理。原片著鈔給。景廉閱看。將此由五百里各諭令知之。○禮部以宗室會試中額請得旨。取中二名。○正白旗漢軍都統金順奏請調荊州右翼蒙古防禦恩澤前赴軍營差委。允之。○辛酉。以貴

州軍務肅清。予總督劉嶽昭巡撫曾璧先提督周達武優敘。○以江南江西浙江福建湖北湖南山東四川廣東廣西節年籌濟貴州軍餉。予歷任將軍總督巡撫暨布政使等獎敘有差。○以貴州全省肅清。賞提督何世華鍾開蘭鄧有德張文德鄧千勝雲騎尉世職。提督馬承宗張錫卿曾敏行道員周振瓊曾紀鳳黃馬褂。周振瓊並賞巴圖魯名號。提督徐有耀總兵官熊復元。一品封典。總兵官陶萬泰知府戴斐章副將張喜元景春林鄧秋高劉青煦何光明參將鄭文超遊擊周政澤張榮陞同知葉聯雲知州吳德泳巴圖魯名號。道員李德莪等花翎。餘加銜升敘開復有差。予陣亡總兵官鄧仁和等二十員祭葬。世職加等。○以貴州省城總辦防勦糧餉。予布政使黎培敬按察使林肇元優敘。○以籌濟貴州兵餉。予四川布政使王德固按察使英祥道員傅慶貽姚觀元黃雲鵠延祐優敘。餘

加銜升敘有差○追予故貴州巡撫蔣霽遠諡勤懇建專祠○壬戌諭軍機大臣等都興阿等奏請酌撥餉糈添練馬隊開單呈覽並添設捕盜弁兵各一摺奉省馬賊滋擾亟應設法按捕該將軍等以客兵遽難裁撤擬由各外城原設兵額內挑選馬隊二千名作為練兵並由各該城八旗挑選蘇拉一千名作為餘兵試行一年果有成效即將客兵裁撤騰出餉項移作練兵之需即著照所議行據

稱添練馬隊每年共需餉銀十二萬餘兩自應迅籌撥解著戶部照數指撥款項迅速解往俾於客兵裁撤之先墊發一年以資接濟至該省各屬原設捕盜弁兵為數太少該將軍等擬添設馬步各兵每歲需銀四萬餘兩請由閩粵兩省海關籌撥等語即著瑞麟文煜文銑於閩海關粵海關經徵稅銀項下每年分季各撥銀二萬兩解交奉天府尹衙門以濟要需該省自此次添撥兵餉後都興阿

等務當覈實動用督飭帶兵員弁及地方文武認真訓練遇有賊匪即行合力按拏不得稍分畛域並將著名匪徒悉數弋獲以淨根株儻該弁兵等巡緝不力及騷擾地方仍蹈從前積習惟都興阿等是問至添練馬隊一年之後客兵可否裁撤即著該將軍等斟酌辦理將此諭知戶部並諭令瑞麟都興阿清凱志和恭鏜文煜傳諭文銑知之○以鑲黃旗滿洲副都統克興阿署鑾儀衛鑾儀使正

白旗蒙古副都統毓福署正紅旗滿洲副都統○甲子

上奉

慈安端裕康慶皇太后

慈禧端佑康頤皇太后幸寧壽宮侍午膳○賜

王以下文武大臣蒙古王貝勒貝子額駙等

食○乙丑

萬壽節遣官祭

太廟後殿○遣官祭

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

顯佑宮

東嶽廟

城隍廟○

上詣

大高殿

壽皇殿行禮詣鍾粹宮

慈安端裕康慶皇太后前行禮長春宮

慈禧端佑康頤皇太后前行禮御乾清宮王

以下文武大臣蒙古王貝勒貝子額駙等行

慶賀禮眾官於午門外行禮○奉

慈安端裕康慶皇太后

慈禧端佑康頤皇太后幸寧壽宮侍午膳賜

王以下文武大臣蒙古王貝勒貝子額駙等

食以庫爾喀喇烏蘇勦賊獲勝予副都統

銜桂祥以副都統簡放賞委章京同順等花

翎餘加銜升敘開復有差○以哈密軍務告

竣予頭等侍衛誠慶以副都統簡放賞佐領

富尼善等花翎縣丞恩春等藍翎餘加銜升

敘開復有差予陣亡參將張忻等六十二員

祭葬世職加等○開復哈密軍營病故總兵

官雙林休致處分子祭葬卹廕加等○丙寅

諭軍機大臣等岑毓英奏遵籌撤勇停捐並

整頓糧稅釐金一摺。滇省勇丁現經岑毓英挑選精壯補足綠營兵額。該省地方事宜亦應及時整頓。該署督請飭廣東等省將舊欠滇餉八百餘萬兩內奉撥銅本銀一百萬兩於本年解到滇省。俾得趕辦京銅。並將新欠滇餉五百餘萬兩儘先籌出一半。一面照滇中庫收隨到隨發。一面發交該省坐催委員於本年內匯解到滇等語。均著照所議辦理。並著瑞麟、李宗義、李瀚章、吳棠、張樹聲、劉坤

一、楊昌濬、郭柏蔭、吳元炳、王文韶、張兆棟卽行如數籌撥。俾資應用。據該署督聲稱各省如能將新舊欠餉按照此次奏請之數籌撥卽可將營伍善後京銅各事宜次第辦理。各省舊欠滇餉七百餘萬兩。新欠滇餉二百五十餘萬兩。均可全數免解等情。各該省果能照岑毓英所奏辦理以後卽可無須接濟。實為一勞永逸之計。瑞麟等務當力顧大局。於無可設措之中竭力籌撥。源源報解。以濟要

需。不得藉詞推諉。原摺著鈔給閱看。原單著分別鈔給閱看。將此由五百里各諭令知之。○兩廣總督瑞麟等奏遵議雲南巡撫岑毓英所陳停捐裁勇各節。廣東綠營裁三存七。規制甫定。所有巡防勇丁隨時酌撤。無庸挑補兵額。至捐輸一項。自黔省勸辦後。本省久已停止。報聞。○戊辰禮部以會試中額請得旨。滿洲取中九名。蒙古取中三名。漢軍取中六名。直隸取中二十五名。奉天取中四名。山

東取中二十三名。山西取中十二名。河南取中十九名。陝甘取中二十四名。江蘇取中二十七名。安徽取中十九名。浙江取中二十六名。江西取中二十三名。湖北取中十五名。湖南取中十五名。四川取中十五名。福建取中二十名。臺灣取中三名。廣東取中十七名。廣西取中十四名。雲南取中十三名。貴州取中十三名。○庚午諭內閣。本日桑春榮彭久餘會同毛昶熙黃倬奏覆。覈已革舉人謝煥章

試卷請免其斥革。仍照疵類例罰停會試一科。又據禮部奏。謝煥章仍請照前議斥革各一摺。除原派閱卷大臣。禮部堂官及此次所派之桑春榮。彭久餘。毋庸會議外。著九卿會議具奏。○諭軍機大臣等。慶春等奏籌運烏城軍糧一摺。據稱烏里雅蘇台駐紮各軍。應需米糧。由察哈爾運送赴烏。現因駝隻雇覓維艱。請照案招覓牛車。接運本年前半軍糧。其本年七月以後烏城各營糧石。請飭署

烏里雅蘇台將軍等仿照庫倫運糧章程。由烏屬之扎薩克圖汗賽因諾顏各部落雇覓駝隻。派員來口。自行駝運等語。著照所議辦理。並著常順多布沁。扎木楚。按照該署都統等所奏情形。妥為籌辦。以濟兵食。而免延誤。原摺著鈔給閱看。將此由四百里各諭令知之。○以正紅旗漢軍都統載齡兼署正黃旗滿洲都統。○予貴州各屬陣亡殉難紳民楊順吉等暨婦女七百十名。口分別旌卹如例。

○
上以孟夏時享

太廟。自是日始齋戒三日。○辛未。諭軍機大臣等。常順等奏。請將特爾清阿暫留烏城。並請撥洋槍各等語。塔爾巴哈台領隊大臣特爾清阿著准其暫留烏城。統帶馬隊。仍著常順等咨商榮全英廉。如塔城需員。卽行飭令赴任。以重職守。至棍噶扎勒參。請撥洋槍。本日已有旨。令神機營撥給洋馬槍一百桿。解交

察哈爾都統衙門轉運。此項洋槍交到。卽著存儲烏城。俟該呼圖克圖需用時。再行酌量發給。將此由五百里各諭令知之。○又諭總理各國事務衙門。奏日本兵船現泊廈門。請派大員查看一摺。日本國使臣上年在京換約時。並未議及派員前赴臺灣生番地方之事。今忽興兵到閩。聲稱借地操兵。心懷叵測。據英國使臣函報。日本係有事生番。並據南北洋通商大臣咨覆情形相同。事關中外交

涉。亟應先事防範。以杜釁端。李鶴年於此等
重大事件。至今未見奏報。殊堪詫異。生番地
方。本係中國轄境。豈容日本窺伺。該處情形
如何。必須詳細查看。妥籌布置。以期有備無
患。李鶴年公事較繁。不能遽離省城。著派沈
葆楨帶領輪船兵弁。以巡閱為名。前往臺灣
生番一帶察看。不動聲色。相機籌辦。應如何
調撥兵弁之處。著會商文煜。李鶴年。及提督
羅大春等。酌量調撥。至生番如可開禁。即設

法撫綏駕馭。俾為我用。藉衛地方。以免外國
侵越。並著沈葆楨酌度情形。與文煜。李鶴年
等悉心會商。請旨辦理。日本兵船到閩後。作
何動靜。著文煜。李鶴年。沈葆楨。據實具奏。南
北洋如探有確耗。並著李鴻章。李宗義。隨時
咨明總理各國事務衙門。覈辦。原摺均著鈔
給閱看。將此由六百里各密諭知之。○又諭
總理各國事務衙門奏。必魯使臣來津。請派
大臣辦理等語。已另有諭旨。派李鴻章為全

權大臣。與該國使臣會商事務矣。必魯國前
有虐待華工之事。李鴻章務將此事與之辯
論明晰。先立專條。再議通商條約事務。本日
簡派全權大臣諭旨一道。一併發往。如該使
臣索看憑據。即著李鴻章另行恭錄。給與閱
看。俟議辦事畢。此旨仍繳還軍機處備查。將
此諭令知之。○命欽差大臣大學士直隸總
督李鴻章與必魯國使臣會商事務。○以鑲
紅旗漢軍都統英桂兼署正紅旗蒙古都統。
正藍旗蒙古都統靈桂兼署鑲白旗滿洲都
統。○撥神機營洋馬槍一百桿。解交烏里雅
蘇台軍營備用。

大清穆宗繼天開運受中居正保大定功聖智
誠孝信敏恭寬毅皇帝實錄卷之三百六十四

實錄卷之三百六十四

十一

大清穆宗繼天開運受中居正保大定功聖智
誠孝信敏恭寬毅皇帝實錄卷之三百六十五

臣等謹將本年二月間祇謁

西陵沿途橋梁道路及各處行宮應修工程已

照清安所奏由直隸藩庫撥款應用茲復據

奏稱各工需用浩繁前撥款項尚不敷用請

撥修

同治十三年甲戌夏四月癸酉朔享

太廟

上親詣行禮 詣鍾粹宮問

慈安端裕康慶皇太后安長春宮問

慈禧端佑康頤皇太后安至辛丑皆如之 諭

內閣清安奏備辦要差領款不敷懇請添撥

一摺本年二月間祇謁

西陵沿途橋梁道路及各處行宮應修工程已

照清安所奏由直隸藩庫撥款應用茲復據

奏稱各工需用浩繁前撥款項尚不敷用請

撥修

同治十三年甲戌夏四月癸酉朔享

太廟

再添撥銀一千八百兩以清墊款等語著李鴻章卽飭藩司如數籌撥由清安派員前往領解並將用數查明咨送報銷

上以常雩祀

天於

園丘自是日始齋戒三日 甲戌諭內閣前因

署烏里雅蘇台將軍常順前署烏里雅蘇台參贊大臣文奎互相糾參疊經諭令額勒和布前往秉公確查茲據該都統查明_奏此

案常順於文奎之自出手諭收受木柴文奎於常順之那用採買菸茶銀兩始皆含混徇隱迨至意見不合復撫拾往事彼此叅劾甚至奉行有年並無不合之案亦以虛誣失實之詞率行入告且文奎奏參常順那用採買菸茶銀兩文奎不惟隨時標放並於該將軍出隊後亦有自行標放此項銀兩情事常順奏參文奎為徐瀛傳坐臺車捏稱公幹而常順亦有為文桂傳坐臺車捏稱委員情事似

此挾私糾參全不以公事為重實屬不成事體除文奎業經兵部具奏遵議處分俟此次定案時再降諭旨外常順著交部嚴加議處兵部主事裕昌因差回京冒用駝馬委署主事福厚常秀聽從文奎以傳聞無據之詞轉諭駐班將軍屬令呈報駐班將軍公達什拉布坦聽從福厚授意捏詞呈報均屬不合著一併交部議處至六品官恆矜既據額勒和布奏稱播弄是非不知遠嫌若僅予議處不

足蔽辜恆矜著交部嚴加議處該署將軍等嚴飭該員卽行回旗聽候部議不准藉詞逗遛 諭軍機大臣等常順等奏請將喀爾喀蒙兵撤回充當要差並請撥餉銀各摺片前據常順等奏擬將喀爾喀屯田兵丁撤回一半令杜爾伯特接充當諭托倫布等飭令遵照辦理茲據該署將軍等奏稱現在賽因諾顏等部落情形困苦差役難支請將喀爾喀蒙兵撤回充當臺站要差等語著托倫布保

英懷遵前旨。飭令杜爾伯特兩翼盟長沙克都爾扎布棍布扎布等接充屯田蒙兵一半並科屬官廠差役暨咨覆認充之北八臺嚮導等項差使迅速接替即將喀爾喀蒙古撤回不得藉詞延宕至烏屬四部落連年被災兼被賊擾自應籌款接濟著照所請由戶部籌撥有著之餉十萬兩卽著常順等派員迎提以應要需將此由五百里各諭令知之又諭景廉奏出關軍糧請仍由關內轉運並摺件未奉批回各摺片前據左宗棠奏金順等軍分起出關所需軍糧僅能運至哈密其由哈密前進糧運請就地籌畫當經諭令景廉等酌度辦理茲據奏稱哈密至古城千有餘里各城兵燹之後田地荒蕪民間存糧無多尚須供支駐紮各營軍食金順所部月需糧料三千石若添此鉅數實屬力有不支且存營駝隻為數無多不敷周轉請飭仍由關內轉運等語所奏自係實在情形卽著左宗

棠統籌全局酌量分設糧臺籌措駝隻將金順等軍糧石仍由關內設法籌解直達古城該大臣素顧大局務當力任其難源源接濟俾收飽騰之效至該都統所稱上年六月初九日所發摺報二件日久未奉批回本日已諭軍機處將所奉寄諭批旨鈔示並令兵部將明發諭旨行知矣將此由六百里各諭令知之又諭英廉奏署將軍榮全任意保舉請飭回奏一摺據稱四品頂帶驍騎校積功係該參贊文案處委員榮全不候其自行酌保且庫城尚有防守出力人員該將軍何以僅將積功列入保舉等語軍營保舉人員須有實在勞績方可量予獎敘若如英廉所奏榮全任意濫保殊不足以昭公允著榮全明白回奏積功保案並著兵部查明暫行撤銷原摺著鈔給閱看將此諭令知之尋奏積功前隨行營當差嗣經派往英廉軍營襄辦營務此次保案以該員前在庫城著有勞績擇

尤請獎並非濫保仍懇恩旨量子獎敘允之
○以健銳營前鋒參領孝順為庫爾喀喇烏
蘇領隊大臣○乙亥

上詣

南郊齋宮齋宿○丙子常雩祀

天於

圓丘

上親詣行禮○詣

關帝廟拈香○諭內閣都察院奏據已革知

縣張鵬雲遣抱以前在烏里雅蘇台因代理
奏叅恆矜摺稟致被讒毀經常順奏叅冤抑
等情赴該衙門呈訴此案張鵬雲是否冤抑
著刑部會同都察院提案研訊確情據實具
奏○丁丑

上幸瀛臺○大學士單懋謙因病請開缺回籍
調理允之○俄羅斯國使臣布策等二人於
紫光閣前瞻觀○戊寅諭軍大大臣等前據
總理各國事務衙門奏日本兵船現泊廈門

聲稱借地操兵並據英國使臣及南北洋大
臣咨報該國有事臺灣生番地方當派沈葆
楨帶領輪船兵弁以巡閱為名前往臺灣一
帶密為籌辦福建布政使潘霽早經陛辭出
京即著馳赴臺灣幫同沈葆楨將一切事宜
妥為籌畫會商文煜李鶴年及提督羅大春
等酌量情形相機辦理潘霽現在行抵何處
並著張樹聲查明催令迅速赴閩兼程前往
不得稍涉遲延將此由五百里密諭沈葆楨

文煜李鶴年張樹聲並傳諭潘霽知之○又
諭前因四川欠解周達武軍餉甚多諭令吳
棠先撥銀五十萬兩所欠尾餉仍令補解清
款嗣因黔省需款甚急復諭該督迅速籌解
茲據奏稱川省餉源奇絀未能剋期全解等
語所奏自係實在情形惟黔省甫就肅清所
有裁撤勇營及籌辦善後各事宜盼餉甚殷
川省近在鄰疆向來解濟餉需不遺餘力值
此全黔底定尤當於無可設法之中竭力措

解俾得清還各營欠餉分別撤留以為一勞永逸之計仍著懍遵前旨力任其難設法籌解以濟要需該督素顧大局諒不至稍分畛域也將此諭令知之○以正白旗蒙古都統載治兼署鑲黃旗漢軍都統○己卯署鑲紅旗蒙古副都統蘇章阿因病解職以正黃旗蒙古副都統明瑤署鑲紅旗蒙古副都統庚辰諭內閣前因桑春榮等奉派覆覈已革舉人謝煥章覆試卷與禮部意見不同分別

覆奏當經諭令九卿會議茲據奏稱查閱謝煥章試卷用意艱深語多晦塞致被擯斥弗錄不為無因禮部因係不列等擬以斥革係照成案辦理惟卷內雖有未妥之句尚非文理不通等語謝煥章著仍照桑春榮等所議開復舉人○罰停會試一科嗣後禮部於科場事宜仍當恪遵前旨○秉公辦理此次係屬破格施恩不得援以為例○前據給事中胡毓筠奏稱謝煥章試卷萬青藜背誦其文謂不列

等未免屈抑等詞萬青藜於此卷既擬查照成案斥革舉人乃於未經奏結之先輒以屈抑向人傳誦殊屬不合萬青藜著交部議處尋議萬青藜應照不應輕私罪律罰俸九箇月無庸議抵從之○諭軍機大臣等總理各國事務衙門奏俄人久踞伊犁希圖侵越一摺榮全前與俄官會議收回伊犁迄無成說近更多方要挾肆意妄為不特久假不歸並覬覦伊犁附近地方希圖侵越該國住京使

臣布策竟有違約背理之詞雖經總理各國事務衙門與之剴辯允為行查彼國其言未足深恃伊犁久為俄國所踞蓄謀侵占本在意中現且有東犯之勢若再不亟圖進取先發制人辦理更無把握察哈爾馬隊計已馳抵塔城榮全兵力稍厚著即將各營力加整頓先期布置一面與景廉各軍聲息相通妥為籌畫毋誤事機瑪納斯烏魯木齊等城必須剋期收復方免俄國生心且可為規復伊

城進步著左宗棠催令出關諸軍迅速西進
會同景廉籌商進剿迅將各城踞賊次第蕩
平期與榮全聲勢聯絡以靖邊氛原摺均著
鈔給閱看將此由五百里各密諭知之 命
協辦大學士吏部尚書寶鋆稽察欽奉上諭
事件處以吏部尚書毛昶熙為翰林院掌
院學士兵部尚書沈桂芬管國子監事 旌
表守正捐軀安徽阜陽縣民張曾妻尚氏
辛巳

上幸圓明園 詣

文昌閣拈香 還宮 壬午准二品頂帶前
廣東候補道李宗沆重與恩榮宴賞頭品頂
帶 癸未諭軍機大臣等榮全奏前敵勦賊
失利並請飭金順景廉撥隊助剿暨飭部補
撥欠餉各摺片逆首小虎雖已竄回瑪納斯
城難保不復行紛竄並有攻撲沙山沙灣西
湖等處之信亟應嚴密防範著榮全飭令孝
順沙克都林扎布等勤加偵探遇有賊匪西

犯務當會合夾擊力挫兇鋒榮全軍營兵力
甚單亟應撥兵援助著景廉卽飭吉爾洪額
統帶黑龍江一軍並添撥吉林馬隊二百五
十名星速前往西湖毋稍延緩金順此時行
抵何處著卽分撥勁旅二三千名飭由沙山
徑赴西湖會合各軍以資助勦據榮全奏該
處行營及庫爾喀喇烏蘇軍營需餉甚殷所
有戶部欠撥該處同治十一年十一月至十
二年二月共四箇月月餉銀五萬二千兩卽

著補行撥發交榮全領餉委員運解回營以
應急需將此由六百里各諭令知之 又諭
文麟奏關內道路漸通請將安敦玉三州縣
仍歸舊制一摺前因關內道路梗塞文報不
通各該地方官無所遵循是以將安敦玉三
州縣暫歸文麟節制現在肅逆蕩平西征大
軍陸續前進一切採買轉運各事宜必須由
地方官妥為照料方能無誤師行安敦玉三
州縣本係該督所轄嗣後著仍歸左宗棠節

制並著該大臣將後路糧運一切事宜飭令各該地方官妥速辦理以專責成而免貽誤將此由四百里各諭令知之 予奉天蓋州殉難防禦烏勒禧春祭葬世職 予烏里雅蘇台葦湖陣亡營總德陞阿等十一員祭葬世職加等 甲申庫倫辦事大臣張廷岳等奏餘匪被勦遠颺請撤呢楚棍庫布爾駐紮蒙兵得旨仍著隨時勤加偵探嚴密防範毋稍疏虞 乙酉諭軍機大臣等前因李宗義

奏黃流擠清入運請飭東省籌堵王老戶莊等處民搶缺口以免貽患江北當經諭令文彬籌度辦理茲據奏稱黃流潰決情形實由上游漫溢東省先當其衝江境因而受害等語是直境與東省交界地方應辦河工正未可緩上年李鴻章曾有於直隸河務先辦尾閘各工之請現在辦理情形若何其直東接壤處所應如何妥籌堵禦俾得保護本境卽以捍衛下游之處卽著體察情形妥籌辦理

江北一帶自應修補運隄使漫水得歸舊河不至橫溢為患李宗義當酌量緩急豫籌備禦以衛民生文彬於應行防範之處仍當悉心酌度實力布置毋得徒託空言文彬原摺著鈔給李鴻章李宗義閱看將此由四百里各諭令知之 丙戌諭軍機大臣等總理各國事務衙門奏日本國兵船已赴臺灣各國船隻亦有駛往福建洋面情事請旨責成前派大員妥速籌策一摺接稱接李宗義咨函

內稱日本國兵船於三月下旬有駛進廈門海口者有前往臺灣者由琅瑤地方登岸並無阻問之人英國水師提督亦選兵船往臺灣巡南巡查並聞日本購買輪船裝載軍裝糧餉法國及日本兵船均已抵廈日本兵共八營俱在臺灣東海旁起岸欲攻生番本月初間始准李鶴年函稱臺灣道稟報二月間日本水師官同夥一人抵琅瑤柴城一帶查看牡丹社等處形勢繪圖並聲稱牡丹社係

屬番界彼自尋釁在我勢難禁止等語生番地方久隸中國版圖與臺灣唇齒相依各國覬覦已久日本相距尤近難保不意圖侵占且各國均有兵船駛往以巡查為名因利乘便心存叵測臺灣道視為番界尋釁勢難禁止實屬不知緩急現在日本兵船已赴臺灣且有登岸情事亟應迅籌辦法使彼族無隙可乘沈葆楨著授為欽差辦理臺灣等處海防兼理各國事務大臣以重事權所有福建

鎮道等官均歸節制江蘇廣東沿海各口輪船准其調遣俾得與日本及各國按約辯論而於征調兵弁船隻事宜亦臻便捷該大臣接奉前旨計已馳赴臺灣一帶著即體察情形或諭以情理或示以兵威悉心酌度妥速辦理並與潘霽隨時慎密籌辦一面會商文煜李鶴年等督飭鎮道妥為布置期於消患方萌不得稍涉大意一面將現在辦法及臺灣如何情形迅速奏聞以慰廑繫除江蘇廣

東沿河各口輪船用款仍由各該省撥給外所有該大臣需用餉銀著文煜李鶴年籌款源源接濟毋任缺乏應調官兵並著李鶴年迅速派撥毋誤事機將此由六百里密諭沈葆楨瑞麟李鴻章文煜李宗義李鶴年張樹聲張兆棟並傳諭潘霽知之以刑部右侍侍廣壽為繙譯會試正考官工部右侍郎訥仁為副考官雲南布政使宋廷春因病解職以前任山東布政使潘鼎新為雲南布政

使追予安徽定遠陣亡殉難候選未入流武達卿等紳民婦女九百五十一員名口分別旌如例例（丁亥）

上奉

慈安端裕康慶皇太后

慈禧端佑康頤皇太后幸漱芳齋侍午膳（追予江蘇各屬陣亡殉難守備俞承恩等紳民婦女四千五百五十七員名口分別旌卹如例戊子諭內閣劉坤一奏遵查緩徵錢糧

案內未開都圖據實覆陳並請將造冊遲延之知縣議處各一摺上年江西新建縣地方被災歉收該縣知縣於應開都圖村社並不依限造報雖據稱因公遲延究屬咎有應得前署江西新建縣知縣現任浮梁縣知縣王維新著交部照例議處劉坤一於緩徵錢糧案內應開都圖未能督催趕辦迨降旨查詢始據補行聲明亦有遲延之咎著一併議處該省徵收丁漕新章既與部章並無不符仍

著隨時嚴查毋任稍有浮冒以杜弊端尋吏部議劉坤一應罰俸九箇月得旨准其抵銷○諭軍機大臣等李鶴年奏日本師船擬攻臺灣番境相機妥籌一摺據稱日本以土番刦殺該國遭風難民率領兵船擬攻臺灣番境現已照覆該國將官令其早日回兵並飭臺灣鎮道按約理論等語日本違約興兵心懷叵測前據總理各國事務衙門具奏已派令沈葆楨潘霨前往臺灣生番一帶察看與

文煜李鶴年等會商辦理嗣復授沈葆楨為欽差辦理臺灣等處海防兼理各國事務大臣現在日本兵船已有登岸情事各國船隻復駛往福建洋面較李鶴年所奏情形尤為喫緊著沈葆楨懍遵前日諭旨與潘霨慎密籌畫隨時會商文煜李鶴年等悉心布置毋令日本侵越並豫杜各國覬覦方為妥善並著文煜李鶴年將撥餉撥兵事宜遵旨妥速籌辦毋誤事機日本是否回兵臺灣鎮道如

何與之理論即著據實奏聞將此由五百里密諭沈葆楨文煜李鶴年並傳諭潘霨知之○江西巡撫劉坤一奏遵議雲南巡撫岑毓英所陳停捐裁勇各節江西額兵無多按期調練無須募補現留水陸防勇分駐要區應俟伏莽盡除再行遣散至本省捐輸專供雲貴陝甘協餉容隨時體察情形再籌停止報聞 己丑

孝端文皇后忌辰遣官祭

昭陵○陝甘總督左宗棠奏請將陝西省延綏陝安漢中各鎮協營仍歸總督節制以復舊制從之○以貝勒載治署掌鑾儀衛事正黃旗蒙古都統載容兼署正黃旗滿洲都統正藍旗漢軍都統崇綸兼署鑲黃旗蒙古都統○以騷擾滋事革駐紮甯夏主事祥陞職交理藩院查辦○庚寅諭軍機大臣等英廉奏宣化大同官兵駐防塔城請仍照征兵例支給鹽糧並請飭部墊發銀兩仍籌撥塔城每年應需餉銀各摺片據稱塔城自兵燹之後人民未復物價昂貴前調之宣化大同官兵到防後應支鹽菜口糧若照塔城屯田官兵章程辦理實屬不敷糊口等語所奏自係實在情形著照所請將宣化大同官兵鹽糧仍按照征兵章程支給以示體恤俟由甘省調換防兵再照塔城章程辦理該官兵應需房間馬匹等項必須早為籌備現在需款甚殷著戶部籌撥銀二十萬兩並著先行墊發以

濟要需俟將來指撥專餉充裕再行扣還至該城應需餉銀除索倫俸餉由伊犁將軍開放外其厄魯特等項官兵俸餉鹽糧每年共需銀十二萬兩並著戶部按年籌撥於前一年春夏間出口八月以前解到毋稍遲誤英廉於餉銀解到時務當撙節動用覈實報銷以重帑項將此諭知戶部並諭令英廉知之○賞會試年老舉人劉及鋒等六十六人司業編修檢討學正職銜有差○辛卯諭內閣

前據兵部奏遵議文奎處分請旨革職茲據兵部奏遵議常順處分請旨革職各一摺前署烏里雅蘇台參贊大臣副都統銜文奎署烏里雅蘇台將軍科布多參贊大臣鑲黃旗漢軍副都統常順均著照部議革職文奎前已有旨飭令回京常順著一併回旗毋庸留營○壬辰諭內閣左宗棠奏請將查禁罌粟辦理不善之知縣分別懲辦一摺民間栽種罌粟大干例禁甘肅地方業經左宗棠遵旨

飭屬嚴禁種植乃代理成縣知縣張廷慶於民間栽種罌粟不行禁止輒藉罰錢修廟為詞顛預了事代理甯遠縣知縣熊寶光派役查勘竟有罰錢免拔罌粟情事代理伏羌縣知縣余壽鼎委典史下鄉履勘收受規費漫無覺察意存徇隱署古浪縣知縣趙德齡至罌粟長發時始具稟請示辦理官聲亦復狼藉張廷慶熊寶光趙德齡均著革職永不敘用余壽鼎業經另案革職並著永不敘用升

用同知前署西和縣知縣劉鳳新僅委典史履勘致滋物議雖無授意科斂情弊究屬怠玩著降為佐雜歸部銓選以示懲儆命吏部尚書毛昶熙戶部尚書董恂刑部尚書桑春榮都察院左都御史賀壽慈禮部左侍郎黃倬右侍郎徐桐內閣學士龔自閔都察院左副都御史童華為殿試讀卷官以降調刑部左侍郎劉有銘為太常寺卿以察哈爾都統額勒和布為烏里雅蘇台將軍調鑲

藍旗蒙古都統慶春為察哈爾都統實授鑲黃旗漢軍副都統托倫布科布多參贊大臣以前任福州副都統富勒渾泰為鑲黃旗漢軍副都統癸巳策試天下貢士秦應達等三百三十七人於保和殿制曰朕蒙庥

吳緯寅紹

丕基荷

列聖之詒謀秉

兩宮之垂訓勅命時幾於茲十有三載親政以

來益深兢業期合天下黎元迪吉康而躋仁壽茲當臨軒策問用集多士式贊嘉猷執中一言竟以咨舜實為傳心所自始逮舜以授禹復以危微精一推廣執中之傳其義安在君子之中庸以德行言之也位育之中和以性情言之也而易象之乾謂為中正與中庸中和義各不同能詳言之歟至若禮教之中著於周官刑協於中載於禹謨其即帝王授受之中由體而達用歟湯誥言降衷孔氏訓

衷為善朱子則云衷祇是中洪範言皇極漢儒訓極為大中朱子以極為在中之準的其說有異同歟大學始終一敬中庸樞紐一誠說者謂存誠卽所以主敬主敬乃所以執中審端致力之方其在斯歟考績始自唐虞詢事考言察於平時而三載九載之典尤備夏有道人木鐸之徇商有三風十愆之儆其激勵臣工之意何深切歟夫民生困而不恤案牘積而不釐朝廷安用此吏為周官六計以

廉為本或訓廉為察其義孰優漢以六條察二千石歲終奏舉殿最能縷析歟唐初考課掌於吏部又命京官望高者二人分校京外官敘以四善分以二十七最差以九等宋命清望之官典其事其辨察官吏能否為三等或謂因唐之四善而分之法豈詳於唐歟民為邦本食乃民天嘗讀幽風及大田良耜諸篇稼穡之艱難廩於宵旰此世運所由稱盛也漢時力田之科與孝弟並稱文帝時親耕

耜田以勸天下武帝世復為代田教民耕種田多墾闢其事能詳考歟唐貞觀初太宗銳意於治官司應授田而不授應課農桑而不課者有禁逮貞元朝宰相李泌請於中和節令百官進農書司農獻種槁之種其於農政有無裨益歲或不登若前史所紀發廩弛征輸粟貸種諸政酌而行之以何為便社倉義倉利弊相兼果何由而積儲有備斂散有方俾小民咸沾實惠歟讀史之要首辨方輿粵

自黃帝畫野分州方制萬里何以帝王世紀謂九州顓帝所建舜典肇十有二州所增建者何州禹貢之九州職方氏之九州其同異若何秦并六國郡縣天下或謂三十六郡或謂四十郡何說為允漢分天下為十三部而不常所治晉復一統之規分州十九幾於秦漢之境唐都關內紹漢法周分天下為十道明皇增飾舊章分十五道宋分天下為十五路至天聖而為十八路至元豐而為二十三

路元立中書省一行中書省十有一為百八十五路其疆域形勢分合沿革之故能詳之歟士有志於用世舉凡河渠邊防食貨兵制皆其所有事也若與圖不講何所藉手歟凡厥四端典學以求治察吏以興廉裕食以養民辦方以經國皆宰世之宏謨綏猷之極則也爾多士對揚伊始其各陳讜論毋隱○諭軍機大臣等李鶴年奏日本兵船已抵臺灣番境密籌防範並詳陳臺灣地利日本詭謀各摺片日本兵船不候照覆即行駛赴臺灣登岸紮營顯係心懷叵測李鶴年已派水陸各營分往鳳山澎湖等處屯紮並調集莊團水師防範臺境藉壯聲威以期有備無患番地雖居荒服究隸中國版圖其戕殺日本難民當聽中國持平辦理日本何得遽爾興兵侵軼入境若謂該國僅與生番尋仇未擾腹地遂聽其蠻觸相爭必為外國所輕視更生覬覦釁端固不可開體制更不可失該督惟

當按約理論阻令回兵以敦和好不得以番地異於腹地遂聽其肆意妄為也派往琅瑤之員與日本如何辯論能否就我範圍著該督據實奏聞仍隨時會同文煜悉心布置務臻周妥沈葆楨計當起程著懍遵疊次諭旨與潘霽慎密籌畫會商文煜李鶴年妥為辦理毋稍大意近日臺灣番境情形若何著隨時詳細具奏另片奏稱查辦彰化匪徒各情匪黨雖就殄除恐有餘孽潛藏根株未盡匪首廖有富亦未就擒著李鶴年檄令臺灣鎮道飭屬一體查拏務將廖有富等按名弋獲盡法懲治毋令死灰復燃致與外國人勾結滋生事端將此由五百里密諭沈葆楨文煜李鶴年並傳諭潘霽慎知之○以正黃旗護軍統領察杭阿為鑲藍旗蒙古都統○追予浙江各屬陣亡殉難知縣孫紹德等紳民婦女五百十一員名口分別旌卹如例○修湖北江陵蒲圻二縣隄工從總督李瀚章請也○

甲午。命鑲藍旗蒙古都統察杭阿仍兼禮部左侍郎管太常寺事。以鑲藍旗滿洲副都統安興阿為左翼前鋒統領。鑲黃旗滿洲副都統榮祿為正藍旗護軍統領。調正黃旗蒙古副都統明瑤為正黃旗滿洲副都統。鑲藍旗滿洲副都統綿宜為正黃旗蒙古副都統。撥工部火藥五千斤。火繩二千五百丈。轟藥五十斤。神機營洋馬槍二百桿。排槍二百桿。解交察哈爾。轉交烏里雅蘇台委員領回備用。○乙未。諭內閣。左宗棠奏。特參廢弛營伍庸劣各員。請分別撤革。一摺。甘肅署山丹營遊擊花翎副將銜儘先參將巴里坤鎮標右營守備張廷餘。辦事乖謬。任性妄為。花翎儘先參將署大馬營遊擊鄧學魁。怠惰偷安。訓練無術。署山丹營千總甘標左營世襲雲騎尉劉光。玩視操防。不知振作。著一併革職。署洪水營遊擊蘇文煥。辦事草率。難期整理。且於馬匹糧料。任意浮支。著先行撤任。有

無侵吞情事。並著查明參辦。以肅戎行。○丙申。

上御乾清宮。召讀卷官入親閱。定進呈十卷。甲第。諭軍機大臣等。定安奏提督劉景芳所部直字營馬隊駐防歸綏。向由直隸籌撥月餉。現在該省以餉項支絀。未能兼顧。該軍馬隊仍須留駐綏城。請改由晉省籌給月餉等語。直字營馬隊留防綏遠。一時未能遣撤。自應按月籌撥餉需。俾無缺乏。著照所請。除該

回備用。○乙未。諭內閣。左宗棠奏。特參廢弛營伍庸劣各員。請分別撤革。一摺。甘肅署山丹營遊擊花翎副將銜儘先參將巴里坤鎮標右營守備張廷餘。辦事乖謬。任性妄為。花翎儘先參將署大馬營遊擊鄧學魁。怠惰偷安。訓練無術。署山丹營千總甘標左營世襲雲騎尉劉光。玩視操防。不知振作。著一併革職。署洪水營遊擊蘇文煥。辦事草率。難期整理。且於馬匹糧料。任意浮支。著先行撤任。有

隊本年五六兩月餉銀。已經直隸借撥外。所有直字營馬隊弁勇。景字營隨員。並洋礮隊弁兵。每月應需餉銀四千九百餘兩。著自本年七月起。即由鮑源深督飭藩司。按月籌解。以資接濟。將此由四百里各諭令知之。○又諭。景廉奏。回逆滋擾。滋泥泉西泉等處。經官軍堵剿。獲勝等語。此股賊匪。隨同白彥虎出關。分路滋擾。意在阻截我軍餉道。現在雖經孔才等帶兵堵擊。擒斬悍逆多名。惟該逆既

經分股。且有撲犯北套橋之信。是賊眾人數尚多。不得以黑茨窩一路均無賊蹤。稍形鬆懈。仍著景廉飭令派出官軍。勤加偵探。務將此股逆匪悉數殲除。毋貽後患。刻下大兵陸續出關。張曜一軍業已行抵玉門。金順所派各軍分起進發。該都統駐紮古城日久。聲息自可相通。出關各軍現在行抵何處。景廉在古城如何布置。並著詳悉奏聞。將此由四百里諭令知之。又諭托倫布保英奏請飭催山東等省迅撥欠解科城餉銀等語。前次山東河南山西奉撥科城餉銀十四萬兩。據托倫布等奏。山東僅解到銀一萬五千兩。河南僅解到銀一萬二千五百兩。尚欠解銀共十一萬二千五百兩。科城賊氛甫靖。調防官兵馬隊需餉甚殷。著文彬錢鼎銘鮑源深督飭藩司迅將欠解指撥科城餉銀。埽數解至察哈爾都統衙門交納。由托倫布等派員迎提。以濟要需。毋稍遲延。將此由四百里各諭令

知之。移直隸任邱東汎管河縣丞由鄭州

鎮改駐苟各莊。從總督李鴻章請也。以古城官軍援解哈密城圍。並沙山子擊匪出力

予副將孔才以總兵官簡放。賞守備王嘉才

等花翎。州同江汝霖等藍翎。餘加銜升敘。有

差予陣亡守備任際隆等。祭葬世職加等。

以哈密軍營辦理營務糧臺出力。予知州裕

厚升敘。丁酉

上御太和殿傳臚。賜一甲陸潤祥譚宗浚黃貽

楫三人進士。及第二甲華金壽等一百三十

二人進士出身。三甲許普濟等二百二人同

進士出身。諭軍機大臣等。李鶴年奏日本

師船已與生番接仗。現籌防範一摺。日本並

不遵約回兵。已與生番接仗。並擬即日移營

進剿。其蓄謀尋隙。意圖占踞。已可概見。該國

現到輪船七隻。尚有鐵甲船及堅固兵船未

到。此時釁端已開。自應先事布置。嚴密設防。

以期有備無患。江蘇廣東沿海各口輪船前

已有旨准歸沈葆楨調遣李鶴年亦擬添調直隸江蘇輪船赴閩防範應需輪船若干隻即著李鴻章李宗義張樹聲瑞麟張兆棟如數撥往以壯聲勢日本被傷者是否止係數人至生番有無被傷被殺之人未據該督奏及生番既居中國土地即當一視同仁不得謂為化外游民恕置不顧任其慘遭荼毒事關海疆安危大計未可稍涉疏虞致生後患著沈葆楨懍遵疊次諭旨隨時與潘霽籌畫

會商文煜李鶴年辦理總當消弭邊釁豫遏詭謀方為不負委任李鶴年所籌自強之策有無把握是否辦有端倪不得以空言塞責致誤事機將此由六百里密諭沈葆楨瑞麟李鴻章文煜李宗義李鶴年張樹聲張兆棟並傳諭潘霽知之○又諭李鶴年奏閩省兵餉向賴各省協濟現計江西省共欠解銀一百十九萬八千餘兩浙江省共欠解銀七十三萬七千餘兩廣東省共欠解銀二十四萬

八千餘兩請飭籌解等語閩省庫儲支絀需餉孔殷各該省自應迅籌接濟著瑞麟劉坤一楊昌濬張兆棟文鈺將欠解閩省兵餉軍餉迅速籌撥源源報解毋再遲延將此由四百里諭知瑞麟劉坤一楊昌濬張兆棟並傳諭文鈺知之 己亥改江蘇蘇松鎮左營守備為中營陸汎守備並改補千總外委各一員從總督李宗義請也 庚子引見辛未斜散館人員得旨修撰洪鈞梁耀樞編修楊霽

郁崑業經授職二甲庶吉士陳理泰朱琛朱成熙林國柱廖壽豐李殿林牛瑄陸廷黻王祖光張楷潘炳年崔國因丁振鐸毛松年尹琳基曾培祺鄧蓉鏡惲彥彬李聯芳盧峯李岷岷臧濟臣袁善呂紹端張曾敬毛五和王廉丁立幹李端陳卿雲陳序球唐景崇孫汝贊樊恭煦雷鍾德朱文鏡張佩綸歐德芳瞿鴻禨吳西川顧樹屏許有麟吳觀禮龔履中魯琪光王貽清陳欽熊景釗王文錦謝元福

寇本城陸繼輝李肇南俱著授為編修三甲庶吉士李長齡貴恆楊際春陳秉和陳寶英煦李紱藻汪運銓俱著授為檢討承翰金保泰朱元治洪鎮區諤良彭圭曦陳壽昌俱著以部屬用楊成文周福清王履亨周衍恩曾瑞春陳瑜黃崇惺成占春鄭揚芳鳴泰許振祥曹昌祺李鐵林左璫孫慧基周晉堃劉韞良俱著以知縣即用○授一甲一名進士陸潤庠翰林院修撰二名進士譚宗浚三名進

士黃貽楫編修○辛丑

孝慎成皇后忌辰遣官祭

慕陵○諭軍機大臣等景廉奏病勢增劇懇請開缺一摺景廉假期屆滿病未就痊覽奏殊深廕繫該都統久居邊塞為國宣勞現在駐紮古城防勦正當喫緊且金順等隊計已陸續出關尤須聲勢聯絡力圖進取以靖邊陲景廉熟悉情形未便遽易生手仍當顧全大局力疾從公勉為其難以副委任著再賞假

兩箇月在營調理無庸開缺遇有緊要事件仍著悉心經理毋誤戎機將此由四百里諭令知之○又諭常順等奏酌撥馬隊進紮要衝以護臺路並請借撥月餉各摺片據稱布倫托海為塔城運道咽喉錫綸現已移營進紮沙山子該處地方緊要擬將現駐科城之察哈爾馬隊交特爾清阿帶往駐紮藉資鎮攝並令達密蘭將駐紮庫林胡都克之隊分撥一起交卓凌阿帶往科南車臣淖爾填紮

以備調遣等語常順等所籌布置是否妥協額勒和布現已簡放烏里雅蘇台將軍並令馳赴新任著即迅速前往到烏城後統籌全局酌度辦理此項馬隊如須移紮所需月餉馬匹等項應否由科城借撥並著一併奏明辦理杜嘎爾簡署烏里雅蘇台參贊大臣已據奏報起程何以日久尚未抵任著即催令前進毋再稽延將此由四百里各諭令知之

大清穆宗繼天開運受中居正保大定功聖智
誠孝信敏恭寬毅皇帝實錄卷之三百六十五

卷之三百六十五

三

大清穆宗繼天開運受中居正保大定功聖智
誠孝信敏恭寬毅皇帝實錄卷之三百六十六

穆宗皇帝在位九年三月二十日崩於盛京紫禁城內之勤政殿年五十九歲諡法曰毅皇帝廟號穆宗

穆宗皇帝在位九年三月二十日崩於盛京紫禁城內之勤政殿年五十九歲諡法曰毅皇帝廟號穆宗

穆宗皇帝在位九年三月二十日崩於盛京紫禁城內之勤政殿年五十九歲諡法曰毅皇帝廟號穆宗

穆宗皇帝在位九年三月二十日崩於盛京紫禁城內之勤政殿年五十九歲諡法曰毅皇帝廟號穆宗

穆宗皇帝在位九年三月二十日崩於盛京紫禁城內之勤政殿年五十九歲諡法曰毅皇帝廟號穆宗

敬

同治十三年甲戌五月壬寅朔

上詣鍾粹宮問

慈安端裕康慶皇太后安長春宮問

慈禧端佑康頤皇太后安至辛未皆如之○

上御乾清宮命理藩院尚書卓保左侍郎成林

乾清門侍衛載驚引後藏堪布噶青宜瑪曲

批章嘉呼圖克圖等十一人呈遞丹書克○

以神靈顯應頒直隸霸州

龍王廟

御書扁額曰功在生民○諭軍機大臣等文煜

李鶴年沈葆楨奏遵旨會籌臺灣防務大概情形一摺覽奏均屬妥協日本上年遭風難民經臺灣商民與熟番救出交回該國轉藉他國積年舊案越境稱兵其為妄生覬覦自不待問該國此舉為中外之所共惡沈葆楨等擬將疊次洋船遭風各案摘要照會各國領事其不候照覆即舉兵入境與生番開仗各情形亦分次照會令其公評曲直並擬購買鐵甲船水雷及各項軍火器械均著照所議行並准其將閩省存款移緩就急酌量動用如有不敷即照所請暫借洋款以應急需調赴浙江之伏波等輪船著沈葆楨迅速調回直隸江蘇廣東沿海各口輪船應如何調撥之處著沈葆楨等與李鴻章李宗義張樹聲瑞麟張兆棟咨商妥辦前署臺灣道黎兆棠據沈葆楨奏稱該員洞悉洋情著瑞麟張兆棟飭令即行起程赴閩以資得力所請設電綫以通消息亦著沈葆楨等迅速辦理該

大臣此時計已起程前赴臺灣著即察看情形妥速籌辦一面詳悉具奏用慰廑繫羅大春潘霽到臺灣後沈葆楨即與該員等隨時會商辦理該省防務沈葆楨文煜李鶴年當統籌全局妥為布置另片奏請派員稽查船政等語沈葆楨現在赴臺著文煜等傳諭前陝西布政使林壽圖前往船廠認真稽查隨時察看海口情形如有緊要事宜與文煜李鶴年妥為備禦並著會銜具奏將此由六百里密諭沈葆楨瑞麟李鴻章文煜李宗義李鶴年張樹聲張兆棟並傳諭潘霽知之○又諭瑞麟等奏越南匪徒情形分別籌辦一摺據稱法國已與越南議和並與越南合兵勦辦股匪驅逐流民該匪等有願回內地投首之人現籌辦法等語越南匪徒一經法國會勦難保不奔竄邊境著瑞麟等分飭沿邊帶兵各員隨時偵探嚴密設防如竄回各匪仍敢持械肆擾即著實力堵勦毋令竄入內地

其投首之匪尤應詳查如實係真心悔罪自拔來歸卽飭令交界地方各官妥為收撫不准攜帶軍器其中有無在內地犯案之人瑞麟等仍當分別辦理並飭各本籍地方官嚴加管束毋令滋生事端如有流落難民遷回內地者亦當妥為安插總之為勦為撫該督等務須妥慎籌辦不可稍涉輕率致貽後患以重邊防將此由四百里各諭令知之○癸卯引見京察年至六十五歲以上人員得旨

裕陵禮部郎中訥默謹著照舊供職○甲辰

孝誠仁皇后忌辰遣官祭

景陵○乙巳諭軍機大臣等袁保恆奏遵籌穆圖善步隊各營月餉並請飭戶部建議健銳營軍餉請飭廣東更正覈計協甘餉數各摺片穆圖善一軍每年餉銀一百八萬兩各省欠解甚多現在該軍步隊亟須裁汰簡練統率出關所需月餉尤屬刻不容緩左宗棠全軍餉項已屬不敷實難勻濟將來此軍出關

有期統計所部馬步隊月餉及製造轉運諸費共需若干卽著袁保恆詳細奏明應否加撥抑改撥有著之款由戶部妥籌辦理現在該軍馬隊月餉及步隊月支糧價鹽菜等項卽由袁保恆咨商左宗棠暫照向章勻那撥解以資整頓至各省關奉撥左宗棠協餉積欠甚多刻下各軍部署出關關外糧運以及關內善後各事宜需款甚殷各省應解餉需正不得以關內肅清稍形鬆懈著戶部查明

實欠數目咨行各該督撫監督等竭力籌措源源解濟毋稍延誤明春接統成祿健銳營全軍所需餉項甚形支絀著戶部指定確數應如何與金順協餉劃分清晰或改撥有著款項之處統由該部妥速籌議具奏廣東原撥左宗棠月餉每月應解銀七萬兩現值關外用兵需款甚鉅著瑞麟張兆棟飭令藩司將協甘餉數仍按奉撥每月七萬兩如數籌解以濟要需另片奏張曜宗慶所統嵩武毅

宇兩軍餉需請暫由他省添協等語張曜宋慶兩軍餉項向由河南按月撥解該撫素顧大局並無短絀現在該兩軍次第出關所需餉項正賴該省源源接濟以資飽騰豈可輕議更張轉滋貽誤所請著毋庸議將此諭知戶部並由四百里諭令瑞麟張兆棟袁保恆知之○派協辦大學士吏部尚書寶鋆吏部尚書毛昶熙教習庶吉士○丙午上以夏至祭

地於

方澤自是日始齋戒三日○丁未旌表守正捐軀安徽六安州民魯紹禮妻宋氏○戊申諭軍機大臣等榮全奏續獲奸細並前敵獲勝情形一摺逆首小虎糾合瑪納斯賊匪意圖紛竄經孝順等拏獲奸細訊明賊情當經派隊於謝家地擊賊獲勝該逆雖經受創難保不復圖竄擾著榮全飭令孝順福珠哩等勤加偵探嚴密防範並嚴飭沙克都林扎布進

兵會勦毋任遷延該署將軍前調黑龍江馬隊已有旨諭知景廉飭令吉爾洪額統帶前往西湖並令金順分撥勁旅會合進勦藉可稍助兵力著卽派員催令迅速前進一俟到營後妥籌布置亟圖進取另片奏索倫兵餉請飭塔城參贊籌辦等語塔城一切事宜向由該參贊大臣照例辦理現在榮全既駐塔城所有索倫俸餉及一切事宜著榮全英廉和衷共濟妥為籌畫毋得各存意見致誤事

機將此由五百里各諭令知之○己酉夏至祭

地於

方澤

上親詣行禮○詣

火神廟拈香○庚戌豁減直隸安河間任隆平甯晉五州縣被水地方上年額賦並緩徵節年糧租○辛亥引見新科進士得旨陸潤庠譚宗浚黃貽楫業經授職外華金壽劉傳

福檀璣馮光適翟伯恆張百熙何崇光屠仁
守牟蔭喬陳華聚劉集勳趙增榮劉鳳綸姚
禮泰諸可圻林紹年羅錦文沈錫晉張初杰
高燮曾章洪鈞周晉麒龐璽陳文驥陳才芳
任貴震李熙文黃卓元白遇道王亦曾朱百
遂鳳鳴詹鴻謨張廷燦蔣璧方趙爾巽李光
斗黃玉堂鍾家彥寶昌殷源馮應壽鄭思賀
梁廷棟陳崧齡鮑臨徐浩孫佩金王烈涂慶
瀾顧懷壬教名震李寅王蘭昇尚賢秦澍春

楊欽琦烏拉布吳講主綽良貴朱光鑒胡勝
程其珏胡燭茶滕經潘頤福楊鼎昌徐兆豐
劉廷鏡陸葆德湯鼎烜石成峰辛家彥詹嗣
賢主作樞吳錫璋趙宗鼎張景祁張恩榮張
德迪陳榮仁孫其正陳存懋李蕊陳光煦李
昭煒彭啟瑞王會英趙爾震俱著改為翰林
院庶吉士袁錫齡張聞錦時慶萊黃搏扶陳
浩恩陳昌王振聲鄭秉成龐慶麟蒲春銘梁
肇晉賀勛趙惟善靳元瑞孫葆田廷清翁壽

錢何其敬洪應祥郭安仁楊玉相李裕澤崔
湘錢登雲楊凝鍾俞壽祺江南金俞培元張
西園傅培基萬錫珩張其翼陳士炳唐登瀛
陳天驥孫彝政曹志清曾秀翹于民新王鼎
許普濟李之藩傅式芳鄭連壽張紹華孫賦
謙閻廷弼奎郁朱紫佩麥寶常林星賡郭兆
福章德藻葉如圭鍾烈甯廷弼顧曾沐趙昌
言趙舒翹戴錫鈞朱毓崧海錕何兆熊李時
杰胡廷幹林文炳吳杰方連軫王懷曾鍾懿

蓉姜璧臣楊熾昌石渠俱著分部學習趙培
因顧文基胡廷玉張德霽姚繩武倪惟欽陳
望曾周維新許壽姓唐德俊孫鵬儀蕭射斗
俱著以內閣中書用樓杏春張坤王汝霖李
宗蓮餘慶曾道唯雷棟榮吳徵鼇胡鈞學何
才价梁天昂陳其昌陸元鼎米協麟朱昌霖
牟懋圻曾延里于衡霖胡鴻澤楊懷震朱升
吉鄧樹聲韓釗田蘇游蕭憲章張玉綬張鵬
翥秦應達高繼光李策清保昌王麟書何鍾

相錫良陳建常慶瑞賴煥辰鄭鈞尹麗樞蔡德芳劉槃彭慶颺沈汝奎陸宗鄭徐漢章路金聲馬逢亨談松林張協曾安盤金王季球王聚奎洪鏊賈汝謙田瀛海褚登瀛程開運譚光葵孔廣鑑王雨穀時永新董餘三黃璫龍起濤官懋和張福恆崔俞梁嶸椿王隆道趙錫恩吳克昌林煥曦劉雲章吳宣珏倪觀瀾譚為霖安守和周良玉張鑑衡傅觀光樊璟胡瀛生劉執德謝秉鈞李三捷陳明倫梁

奮庸馮健舒愷宋安書傅丞憲倪望重李兆梅陳兆煥劉發岐舒朝冕席珍任步月張紹渠王縉卿唐元愷倪晉麟孟憲璋段晉熙梁錦瀾常文敏朱霽孫楨袁韻春朱寶書蔡敘功曾行崧焦雲龍汪慶長羅肅彭億清陳寶樹朱鑑章崇泰馬毓芝高思涵張心銘孫念曾俱著交吏部掣籤分發各省以知縣即用戶部候補郎中王維翰工部候補郎中蕭鏞俱著以郎中即用戶部候補主事程秀劉本

植尹序長禮部候補主事桂霖俱著以主事即用候選員外郎恩綬著分部學習餘著歸班銓選○壬子

上幸圓明園還宮○諭軍機大臣等沈葆楨等奏據報臺灣近日情形一摺日本已分三路進攻番社生番逃散遂將牡丹社等處焚燒並欲攻龜仔角社是其乘隙尋仇意圖深入已可概見若再不亟籌辦法則生番更遭荼毒該國必愈肆欺凌沈葆楨已與潘蔚起

程赴臺邀集各國領事公平曲直日本興兵顯背條約固屬理曲辭窮若能就我範圍斂兵回國自可消弭釁端儻仍肆意妄為悍然不顧即當聲罪致討不得遷就因循轉誤事機致將來辦理愈形棘手沈葆楨與潘蔚當相度機宜悉心籌辦應如何調撥官兵前往藉壯聲勢之處著會商文煜李鶴年妥速布置以維大局本日有旨諭令王凱泰即行起程回任毋庸來京陛見該撫回任後著李鶴

年隨事和衷商辦。以期共濟時艱。將此由六百里密諭沈葆楨、文煜、李鶴年，並傳諭潘霨知之。○又諭李鶴年奏閩省海防緊要，請飭撫臣迅回本任一摺。福建巡撫王凱泰前經行抵蘇州，因病奏請開缺。當經降旨賞假兩箇月。無庸開缺。現在閩省自日本違約興師，占踞臺灣，牡丹社一帶該省海防關係緊要，著李宗義、張樹聲即行傳知該撫速行回任，以重地方。王凱泰於接奉此旨後，即日起程。

赴閩毋庸來京陛見，不得俟假期屆滿致有遲誤。將此由五百里各諭令知之。○以翰林院侍讀學士祁世長為內閣學士兼禮部侍郎銜。○旌表守正捐軀廣西靈川縣民陶啟仁妻譚氏。○癸丑諭軍機大臣等慶林奏傳辦活計款項難籌，請分省協撥，並請展期呈進各摺片。此次傳辦活計估需料工等項銀共十二萬兩，為款較多，惟係慈禧端佑康頤皇太后萬壽需用之件，自應如

數趕辦。此項活計既歸江南織造承辦，應由本省籌款撥給。慶林請照大婚活計飭部分省協撥銀兩之處，著毋庸議。仍著李宗義、張樹聲迅將前項需用銀兩設法籌撥解交慶林應用，以備要需。並著慶林將現傳活計照單儘辦儘解，毋得遲誤。將此諭知李宗義、張樹聲，並傳諭慶林知之。○甲寅遣官祭關帝廟。○諭軍機大臣等英廉奏擬赴東路察看地勢，改道安臺一摺。據稱俄人現在察

漢鄂博山口安設營卡，並欲那移塔城東路鄂莫倫臺不准哈薩克雇給牲畜，以致差使阻滯。英廉現擬親赴東路察看，改道安臺仍在察漢鄂博等處安設卡倫等語。鄂莫倫一臺既為俄人地面，往來差使已屬不便。現並有窒礙情形，自應擇地移設。著英廉即行前往東路詳細察看，應由何處安臺，並在察漢鄂博等處安設卡倫，著與榮全悉心商酌妥為辦理。以顧臺路塔城各臺需用駝馬應差

著額勒和布多布沁扎木楚懷遵上年十一月二十七日諭旨先行墊款採買驢駝四百隻驢駝四百隻並隨霍木全分驢馬六百匹驢馬六百匹務於八月以前辦齊卽由英廉派員赴烏領取以資應用墊價若干俟戶部指撥塔城之山東河南安徽等省地丁銀兩無論何省解到卽由額勒和布等照數扣還以清款目將此由五百里各諭令知之○以烏里雅蘇台官軍勦賊出力賞參領滿齋委參領吉格墨特巴圖魯名號委參領布彥圖等花翎州判李士英等藍翎餘升敘開復有差○乙卯諭軍機大臣等前據慶春等奏烏城軍糧請自本年七月以後由烏屬各部落接辦當諭常順等妥籌辦理茲據常順等奏稱現傳集各部落妥籌辦法恐一兩月間不能定議發駝裝運等事亦須數月方能辦理若自七月接運實係趕辦不及請飭察哈爾都統將烏城各營七八九三箇月軍糧仍由

張家口運送等語所奏尚係實在情形著照所請烏城本年秋季軍糧仍由察哈爾暫行代運自本年十月以後卽由烏里雅蘇台將軍等接辦以濟兵食將此由四百里各諭令知之○又諭文麟明春奏回王邁哈默特呈請代懇賞借十年俸銀以補修城垣安輯難夷另頒新印以昭世守並據聲稱該回王每年應支俸銀二千兩該辦事大臣因餉項支絀欠發三年等語上年七月陝回大股竄擾哈密圍攻營城該回王等深明大義派選槍手隨同勦辦逆匪因將回王等偏挾西行經官軍搶救回營該回王等困苦情形殊堪矜念自應優加體恤著照所請賞借十年俸銀由戶部發給交該回王所派通事領齋回哈該回王採辦各物准其由臺站運解並著禮部另鑄該回王印信由驛遞交文麟等轉給祇領原摺著鈔給戶部閱看將此諭知戶部禮部理藩院並諭令文麟明春知之○丙辰

上奉

慈安端裕康慶皇太后

慈禧端佑康頤皇太后幸漱芳齋侍午膳○諭內閣李宗義奏已故提督功績卓著請合建專祠一摺前湖北提督向榮前江南提督張國樑於咸豐年間先後駐師金陵督兵勦賊屢著戰功向榮旋以積勞病故張國樑亦殉節丹陽均經奉

旨優卹茲據該督奏稱該故員等在金陵駐紮

最久生平戰績以江甯為最著雖未竟全功而保障江南民情愛戴請合建專祠等語向榮張國樑著准於江甯省城合建一祠由地方官春秋致祭以彰忠藎○以直隸馬蘭峪緝匪出力予守備李瑛等加銜有差○丁巳諭內閣本年十月初十日恭遇

慈禧端佑康頤皇太后四旬萬壽慶辰謹照乾隆六年

皇太后五旬萬壽加賞八旗年老人等成案所

有在京八旗官員及男婦太監等年六十以上者均著加以恩賞該部即遵諭行○諭軍機大臣等都興阿奏分撥各路客兵勦捕情形一摺前因盛京地方時有馬賊四出紛擾疊經諭令都興阿等嚴行整飭該官兵及旗民地方官宜如何認真緝捕況去歲秋收歉薄當此青黃不接之際尤應加意巡緝以靖閭閻本日據奏情形雖經各路官兵分投勦捕疊於昌圖界薛家嶺等處獲賊多名惟餘

匪逃匿尚多著名盜首未獲且敢拒捕戕官致筆帖式依凌阿於田莊臺地方緝賊中槍殞命該匪戴發乘間逃逸是匪徒肆行無忌緝捕仍未得力何以綏靖地方著都興阿嚴飭駐紮各路官兵勤加控緝務將著名匪首悉數弋獲餘匪一律殲除不准一名漏網致滋延蔓並著志和恭鏜飭屬一體嚴拏隨時稽查保甲以杜奸宄潛蹤儻該地方官猶敢仍前玩泄即著從嚴叅辦毋稍寬縱將此由

四百里各諭令知之。○又諭景廉奏古城防務喫緊馬隊礙難調撥一摺。景廉所部吉爾洪額管帶黑龍江一軍並吉林馬隊二百五十名。前經諭令該都統飭由沙山前赴西湖助剿。茲據景廉奏稱古城濟木薩地居衝要。烏屬逆回時復竄擾三臺滋泥泉及南山一帶。並探聞南路安集延現在吐魯番迤東安設馬隊由開展直至齊克騰木地方。古城籌防籌勦竭蹶不遑。已哈兩城仍須兼顧。所有

吉林黑龍江馬隊勢難分撥等語。自屬實在情形。惟西湖兵力甚單。亟須添兵援應。常順前次奏撥駐防科布多之察哈爾馬隊五百名。尚可移緩就急。著托倫布保英卽飭此項馬隊剋日馳赴西湖。毋稍延緩。金順現在行抵何處。該軍兵力較厚。一俟抵古城後。卽著景廉與金順會商酌撥數營。馳往榮全軍營俾資防勦所需。駝隻著榮全迅速籌備。先期前赴古城接替金順所部官兵西進。毋稍遲

誤。金順一軍糧運著左宗棠懷遵疊次諭旨源源籌解以資飽騰。將此由六百里各諭令知之。○又諭景廉奏成祿舊部投誠回勇恐滋事端應早遣撤等語。據稱明春所部兵勇內有成祿舊部投誠回勇馬隊三營。莠良不一。並有上年在敦煌哈密始行投入者。恐係白逆黨與。此起彼回。勇曾在南山口搶刦迨移至巴里坤駐紮商民均有戒心。又與漢民口角尋仇。恐其勾匪報復。若撤回哈密地面則

西連吐魯番等處並無關卡可防。更與奸徒聲息相通。尤易滋事。已哈兩城不宜久駐。亟應撤回關內。消患未萌。所慮不為無見。關外地方遼濶防範難周。又值回黨充斥之際。此項回勇人數較多。且又不安本分。深恐暗中勾通賊匪。擾害地方。致防勦轉形牽掣。現在關內肅清。各起回民業經左宗棠安置妥協。可無反側之虞。明春所統投誠回勇馬隊三營宜乘此時撤回。令入關。懾以兵威。方可消弭。

後惠著文麟明春酌度情形。悉心籌畫。即將前項回勇發給口糧。遣撤入關。咨明左宗棠擇地安插。並著文麟明春派撥得力員弁。沿途彈壓鈴束。毋令該回勇潛行潰逃。致滋擾累。俟該回勇入關後。即著左宗棠妥為遣散安置。免致滋生事端。將此由六百里各密諭知之。○予奉天田莊臺被戕筆帖式依凌阿。祭葬世職。如陣亡例。○停本年秋審朝審情實人犯句決。○戊午。以修築海塘。神靈佑護。

頌江蘇華亭縣金山嘴

天后廟

御書扁額曰澤普滄瀛

風神廟

御書扁額曰楊休錫福

龍神廟

御書扁額曰安瀾顯佑。○諭軍機大臣等。瑞麟

張兆棟奏查辦東西兩粵交界伏莽疊獲匪犯一摺。廣東靈山縣捕屬等處。與廣西接壤。

向多伏莽。經瑞麟等派總兵鄭紹忠等馳往會同廣西邊界文武查辦。先後拏獲匪犯多名。業將標村匪巢平毀。仍著瑞麟張兆棟會同劉長佑督飭派出各員。於兩粵交界地方嚴密緝捕。並移軍西鄉。將該處匪黨悉數殲除。以清伏莽。欽州逼近越南。恐有外匪竄入。著瑞麟等嚴飭鄭紹忠等會同地方文武隨時確探。妥為防範。毋稍大意。將此各諭令知之。○以甯夏滿營官軍節年勦匪出力。予

協領桂齡佐領裕通。以副都統簡放。賞防禦雙祥等花翎。州判蕭錦炤等藍翎。餘加銜升敘有差。○己未彗星見。○庚申。以翰林院侍講學士松森侍講孫詒經。徐郅克。日講起居注官。司經局洗馬楊紹和。署日講起居注官。○予奉天開原被戕驍騎校扎克當阿祭葬世職。○辛酉。諭軍機大臣等。岑毓英奏。擒捕著名賊黨。殲除首要逆犯。遣散降回。暨收獲礮械等件。各摺片。逆首馬德新。業經拏獲正。

法馬應鸞馬尚雄亦經官軍殺斃尋甸州降回數千戶亦已追繳軍火器械分遣回籍辦理甚為得手該省甫就肅清一切善後事宜亟應妥籌布置平彝縣屬之馬頭山等處回民二百餘戶與漢民仇怨太深該署督現擬將尋甸州城十里外絕產清查分撥計口授田與漢民間雜而居惟必須妥慎籌布務使彼此相安不得復相尋釁方為盡善提督馬如龍寓中礮械等件刻下軍務肅清自不應留存寓所現經岑毓英收獲先後解交善後局存儲此外各回寨如尚有私藏者自應概行追繳惟須慎重出之不可激成事端沙甸大莊一帶前有洋人來往開化邊界之河口新街亦有洋人帶水手跟丁前來現雖折回越南難保不再圖窺伺著岑毓英飭令該地方文武隨時認真偵探嚴密防維其餘一切事宜統著該署督酌度情形慎密籌辦以副委任將此由四百里諭令知之○又諭岑毓

英奏勸捐委員久無稟報請飭查辦等語雲南補用同知直隸州知州李維翰經岑毓英於同治十年間派令會同休致同知朱慶椿前赴廣西試辦勸捐發給執照章程等件迄今三年之久僅據朱慶椿稟報一次所報捐冊亦多錯誤李維翰則並未同路到粵亦無隻字稟報現在滇省捐例業經停止李維翰逗遛他省難保無藉端招搖情弊亟應查明懲辦李維翰著即行革職並著劉長佑飭屬查明該革員逗遛何處嚴行緝拏並追繳原領部監空白執照一併解滇交岑毓英嚴訊究辦其休致同知朱慶椿分獲部監各照及捐獲銀兩有無侵那情弊著劉長佑查明據實奏辦勒限追繳以示懲儆將此各諭令知之○浙江巡撫楊昌濬奏遵旨整頓營伍現經分飭各營挑選精壯練習洋槍礮隊計可得勁旅二千餘人仍當隨時稽察飭令按期操練報聞○壬戌諭軍機大臣等有人奏近

年川省匪徒日眾。聯名結社。有帽頂會。燈花教。諸名目。聚眾連盟。省垣附近地方。肆行搶劫。崇慶州高縣彭縣鹽亭等處。均有匪徒嘯聚。恐釀成巨患。請飭防患未萌等語。匪徒糾眾搶劫。實為閭閻之害。且川省與滇黔各省毗連。尤恐勾結各處匪徒。乘機竊發。亟應認真拏辦。著吳棠派委妥員。會同各該處地方文武一體實力查拏。嚴行懲辦。以絕根株。原摺著鈔給閱看。將此諭令知之。○又諭常順

等奏酌擬棍噶扎勒參安插徒眾事宜。請仍歸塔城管轄。將該呼圖克圖所遞章程開單呈覽一摺。棍噶扎勒參呈遞章程八條。經常順等分別酌擬辦理。並請將嗣後該呼圖克圖徒眾一切事宜。仍歸塔城參贊大臣管轄。所奏各節。是否妥協。額勒和布到任後。著即詳加查察。覆覈具奏。原摺單著鈔給閱看。將此諭令知之。○甲子
孝恭仁皇后忌辰。遣官祭。

景陵○諭軍機大臣等。景廉奏請停止大同官兵西進。以節經費一摺。前因景廉軍營需兵助勦定安等部署。大同官兵起程需款緊要。曾諭各該省迅解專款。並由定安先行籌墊。料理該官兵迅速西進。現在金順張曜等軍陸續出關。與景廉軍營聲勢可期。聯絡從此兵力漸厚。自無須另調征兵。所有大同官兵既因款項支絀。沿途跋涉維艱。據景廉奏請停止前進。自係為樽節經費起見。著照所請。

卽由定安鮑源深飭將所調大同官兵一千名全行停止。西行其山東等省應解專款。如已解到綏城。卽著定安撥解景廉軍營。並飭屬採買駝隻。解交應用。以利轉運。將此由五百里各諭令知之。○命刑部尚書崇實馳赴山海關查辦事件。○予廣西賓州等處陣亡外委曾守振等十四員祭葬世職。○乙丑諭軍機大臣等。都興阿等奏覈明奉省災戶確數。請飭續撥賑款。並災民聚眾乞食設法彈

壓安撫各一摺奉省上年被災各城既經都興阿等派員覆勘明確實需賑款等項共銀二十九萬餘兩除前經戶部奏明由直隸河南兩省共撥給銀十萬兩外所虧甚鉅災黎嗷嗷待哺情形迫不可待且各處已有聚眾乞食分糧搶糧情事雖經都興阿等捐貲助賑並派員各處勸捐惟為數無多而災民戶口至三十餘萬深恐乘機生變關繫非輕著戶部按照該將軍等續請十九萬三千餘兩數目趕緊籌撥委解以濟要需並咨行直隸河南兩省速將前次奉撥之項埽數撥解毋稍遲延並著都興阿清凱志和銘安恭鏜妥為賑撫飭令各該地方文武隨時設法彈壓撫綏安輯毋令滋生事端至各處勸捐辦有成數准由該將軍等隨時奏明給予獎勵將此諭知戶部並由四百里諭令都興阿清凱志和銘安恭鏜知之○丙寅諭軍機大臣等沈葆楨等奏到臺日期籌辦大概情形並番

目籲乞歸化臺澎防兵擬另招精壯充補請將臺灣課稅等銀撥充經費各摺片沈葆楨潘霽先後行抵臺灣察看該處情形沈葆楨給與日本西鄉從道照會詞義頗為嚴正潘霽於本月初八日親赴琅瑤面加詰問彼族狡詐性成中藏叵測設防之事自屬萬不容緩沈葆楨等擬於海口建築礮臺安放巨礮使不得停泊兵船北路淡水等處派兵駐紮由提督羅大春督率巡防並另招勁勇多備軍火等事所籌均是即著該大臣等分別妥速辦理日本藉口他國積年舊案違約稱兵曲直是非中外共見沈葆楨等務當與之極力理論斷不可任其妄為儻該國悍然不顧亦當示以兵威不得稍涉遷就致誤事機該國如何照覆潘霽到琅瑤後如何辯論情形著隨時詳細奏聞以慰廑繫生番本隸中國版圖朝廷一視同仁疊諭該大臣等設法撫綏不得視同化外任其慘罹荼毒現據各社

番目願乞歸化卽著該大臣等酌度機宜妥為收撫聯絡聲勢以固其心俾不至為彼族所誘臺澎向用內地班兵率皆疲弱現在因時制宜自不妨變通辦理沈葆楨等擬將班兵疲弱者撤令歸伍另招本地精壯充補事平之後察看情形再行酌辦卽著照所議行臺灣鹽課關稅釐金等款准其儘數截留撥充海防經費歸臺灣道衙門支銷不敷之款著文煜李鶴年籌撥接濟毋令缺乏將此由

六百里密諭沈葆楨文煜李鶴年並傳諭潘霽知之○丁卯諭內閣江西吉南贛甯道文翼福建延建邵道鍾祿廣西鹽法道劉楚英均著開缺送部引見署福建鹽法道陸心源前在廣東高廉道任內本係開缺送部引見之員著卽開署缺仍遵前旨送部引見○諭軍機大臣等李鴻章奏直隸災區甚廣請飭奉省仍准就近販運雜糧一摺前據都興阿等奏奉省現存糧石僅敷本地民食擬俟本

年秋間體察情形如果收成豐稔再當奏明開運惟直隸向賴奉天糧米接濟現在災區甚廣窮黎待哺罄罄若由遠省販運實恐緩不濟急奉省與直隸毗連販運最為近便李鴻章請仍准就近購糧係為拯救災民起見著都興阿等仍准直省商民就近販運源源接濟以顧民食將此各諭令知之○旌表夫亡殉節直隸天津縣候選鹽大使張文靜妻梅氏○戊辰諭內閣承繼恩麟奏請將捏名

冒領餉銀之員革職查辦一摺管理西藏糧務候補通判周長齡與署西藏遊擊平安營都司李鳴仕通同舞弊借用兼署後藏糧務等銜名鈐記捏詞具文令李鳴仕之姪李朝春前赴四川冒領後藏餉銀至五千兩之多迨經承繼等查追始據李鳴仕供稱所領銀兩已交周長齡寓所銀二千兩餘銀懇請回川措繳案關糧務人員侵冒餉項亟應嚴行懲辦以儆貪婪周長齡李鳴仕均著先行革

職由承繼等將全案人證解交吳棠徹底根究。秉公嚴訊。明確定擬具奏。並將李朝春等獲備質。周長齡。李鳴仕家產。著先行查封。備抵以重帑項。○諭軍機大臣等。文煜。李鶴年奏籌辦沿海各口防務一摺。馬祖澳及白犬洋面。已有日本鐵甲船。木輪舟在彼游弋。並有孟春兵船。自廈門測水。直至中岐。意存恫喝。此時防務萬難稍緩。自應嚴密布置。以備不虞。覽文煜。李鶴年所奏籌防情形。半屬空

言。並無切實辦法。當此事機緊要之際。若再掉以輕心。必致臨時張惶。貽誤大局。究竟福廈各口。何處最為扼要。現應如何設防。福甯連江沿海一帶。作何準備。是否已臻周密。著文煜。李鶴年悉心籌畫。立見施行。不得以含糊一奏。遂為了事。沈葆楨現於淡水等處派兵駐紮。由羅大春督率巡防。責任綦重。仍當遵奉前旨。檄令卽日赴臺。以資得力。著文煜。李鶴年另派得力之員。統兵駐紮廈門。並會

商李新燕妥為籌布。近省情形當隨時知照。沈葆楨。潘霽以期聲息互通。將此由六百里密諭。沈葆楨。文煜。李鶴年並傳諭潘霽知之。○又諭現在日本與臺灣生番稱兵構釁。疊經據理曉諭。仍未遵約退兵。近復有兵船在福州口外往來。本日據文煜。李鶴年奏請留提督羅大春暫緩赴臺。駐紮廈門一帶。以資鎮守。但臺灣事機甚急。昨經沈葆楨奏業與潘霽先後抵臺。擬於該處海口建築礮臺。並

派兵駐紮淡水等處。由羅大春督率巡防。是該提督亟應速赴臺灣省防。一時未能兼顧。而福州各處海口。關繫緊要。防守需人。福建水師提督彭楚漢前經李鴻章奏請留帶直隸練軍暫緩赴任。刻下閩省防務正急。著李鴻章卽飭彭楚漢剋日馳赴新任。以重地方。直隸練軍卽由該督另揀妥員統帶。本日有寄諭沈葆楨及文煜。李鶴年夾板印封各一件。李鴻章接到後。卽著發交輪船。速為分別

投遞毋稍遲誤將此由六百里諭令知之○
緩徵安徽天長縣被旱地方本年上忙額賦
並展上平原緩錢糧○庚午諭內閣額勒和
布等奏釋回廢員未繳臺費輒自潛逃請飭
查拏一摺籍隸湖南之廢員張明仲全大倫
前經加恩釋回其應交臺費銀兩自應報明
聽候辦理乃該廢員等並不呈報私自潛逃
殊屬不合著王文韶飭屬查拏並查明該廢
員等應交臺費銀兩究係能否完繳有無隱

寄貲財訊明報部辦理○辛未諭軍機大臣
等總理各國事務衙門奏日本兵紮番社濱
海防務請飭先事籌辦一摺日本有事生番
占踞臺灣牡丹社一帶前據沈葆楨等奏擬
於海口及北路淡水等處嚴密設防當諭該
大臣等妥速辦理又據文煜等奏馬祖澳等
處已有日本兵船游弋復諭該將軍等於沿
海各口妥為籌布刻下辦理情形若何及該
國近日作何動靜著沈葆楨文煜李鶴年潘

霽詳細奏聞以慰塵繫各省沿海口岸甚多
亟應一體設防為未雨綢繆之計並當聯絡
聲勢藉壯兵威以期有備無患著瑞麟李鴻
章都興阿志和恭鏜李宗義文彬張樹聲楊
昌濬張兆棟統籌全局於各該省沿海地方
形勢詳細體察何處最為扼要何處必當設
防並如何聯為一氣得操勝算之處務當悉
心會商妥籌布置奏明辦理原摺均著鈔給
閱看將此由六百里密諭沈葆楨瑞麟李鴻

章都興阿志和恭鏜文煜李宗義李鶴年文
彬張樹聲楊昌濬張兆棟並傳諭潘霽知之
○撥德州駐防旗兵二百名青州一百名河
南五十名荊州五百五十名移補杭州駐防
兵額從將軍善慶請也

大清穆宗繼天開運受中居正保大定功聖智
誠孝信敏恭寬毅皇帝實錄卷之三百六十六

卷三六七

三

大清穆宗繼天開運受中居正保大定功聖智
誠孝信敏恭寬毅皇帝實錄卷之三百六十七

光緒二十六年八月十五日奉 慈禧端佑康頤皇后

上諭 著將前奉 慈禧端佑康頤皇后

上諭 著將前奉 慈禧端佑康頤皇后

上諭 著將前奉 慈禧端佑康頤皇后

上諭 著將前奉 慈禧端佑康頤皇后

教修

同治十三年甲戌六月壬申朔

上詣鍾粹宮問

慈安端裕康慶皇太后安長春宮問

慈禧端佑康頤皇太后安至庚子皆如之奉

慈安端裕康慶皇太后

慈禧端佑康頤皇太后幸漱芳齋侍午膳 蠲

緩河南虞城被風被雹地方本年額賦 癸

酉以兵部尚書英桂兼署刑部尚書 以正

白旗蒙古都統載治兼署鑲白旗蒙古都統

甲戌

上幸圓明園 還宮 諭軍機大臣等榮全奏
逆匪滋擾臺站派隊迎剿添調官兵各情形
一摺孝順等拏獲奸細據供烏嚕木齊逆首
大虎帶領逆黨圖撲西湖等處現在第六臺
一帶已有零匪竄擾搶掠臺站孝順等軍有
腹背受敵之勢榮全挑選官兵派桂祥統帶
往剿卽著飭令該員確探匪蹤實力剿辦與
前敵官軍聯絡聲勢迅掃賊氛並著景廉檄
令沙克都林扎布等撥兵馳赴西湖援剿毋

稍遲緩致誤事機駐防科布多之察哈爾馬
隊前諭托倫布保英飭令西進現在塔城需
兵孔亟著該參贊等卽令此項官兵迅速前
往俾資戰守將此由六百里各諭令知之
○乙亥賞請轎鑾儀衛校尉銀○丙子諭內閣
穆騰阿奏請將不洽兵情之駐防協領暫行
革職留任一摺京口左翼協領延康右翼協
領善連因放米遲延致兵丁糾眾鬧關官署
該員等並未將為首滋事之犯立時拏獲實

屬毫無紀律延康善連均著暫行革職留任
仍著飭令查拏此案首從各犯從重懲辦如
再不知愧奮卽行據實嚴參京口副都統恆
惠係專閫大員不能振作以致臨時呼應不
靈著卽開缺來京當差其有無別項情弊並
著穆騰阿查明據實參奏 諭軍機大臣等
文煜李鶴年奏布置海防籌撥臺防餉銀軍
火並探報日本船隻在五虎口外游弋情形
請飭宋慶統兵赴閩各摺片日本違約稱兵

昨據沈葆楨奏報到臺後業經給與照會向
其理論並經潘蔚親赴琅璦面加詰問是否
斂兵回國尚未續有奏報現據文煜等奏福
州五虎口百餘里外已有該國鐵甲等船在
彼游弋是福州廈門等處海防甚為喫緊文
煜等現擬擇要堅築礮臺並飭副將楊廷輝
將附近漁人招募成軍免資寇兵卽著迅速
妥為布置並飭總兵孫開華等認真辦理以
期有備無患所需水雷及轉輪礮臺等卽著

咨商沈葆楨妥為籌辦以資要需此外沿江沿海如尚有扼要之處亦當豫為防範毋稍疏懈臺灣近日情形自沈葆楨給與照會之後日本官如何照覆能否就我範圍著沈葆楨等相機妥辦仍隨時奏聞以慰廑繫至提督宋慶一軍現在整理出關雖尚未成行而閩省海防緊要該軍遠在甯夏焉能濟急閩浙兩省皆李鶴年管轄何至乏員調撥如防軍需人統帶即著另行揀派以資得力所請

飭令宋慶帶兵赴閩之處著毋庸議將此由六百里密諭沈葆楨文煜李鶴年並傳諭潘霽知之馬蘭鎮總兵官景霖奏盤山行宮殿閣滲漏可否委員勘修得旨著總管內務府大臣派員前往查勘如實難設法保護即將尊藏佛像並

御筆像軸等件恭送回京以昭慎重以前任阿勒楚喀副都統海英為京口副都統丁丑以神靈顯應加河南河南府

龍神封號曰昭應登封縣高山龍神封號曰靈惠戊寅予廣東東莞被戕署千總陳廷亮祭葬世職己卯諭軍機大臣等沈葆楨等奏理諭倭將稍有端倪仍遵旨加緊籌防並請飭彭楚漢帶隊赴臺各摺片潘霽偕道員夏獻綸等於五月初八日馳抵琅瑯與日本中將西鄉從道反覆辯論逐條窮詰西鄉從道理屈詞窮旋以所用兵費無著為言復經潘霽據理駁斥彼請一面致

書柳原前光一面寄信該國暫不添兵前來惟彼族貪勢性成未必遽能就我範圍沈葆楨等所奏非益嚴警備難望轉圜儻恃其款詞日延一日奸民乘隙構煽必至事敗垂成等語深合機宜著照所請由北洋大臣調撥久練洋槍隊三千人均乘坐輪船赴臺該郡現有兵勇不甚得力李鴻章李宗義務當迅速調派令其剋日起程前往以壯聲勢南北洋防務

緊要俟日本兵退後沈葆楨等即令此項隊伍各歸防所前據文煜等奏擬留羅大春駐紮廈門當經降旨仍令迅即渡臺辦理淡水一帶防務並諭李鴻章檄飭彭楚漢迅赴本任沈葆楨等此時計可接奉前旨所陳臺灣南北路布置情形及令曾元福提倡鄉團各事宜即著督飭該員等悉心籌辦務臻周妥並偵探日本情形隨時詳悉具奏潘霨在琅瑤時傳各社生番頭目至者百數十人皆稱

日本欺凌懇求保護並願設官經理永隸編氓仍著沈葆楨等遵奉疊次諭旨妥為收撫以固其心所有奏調之前南澳鎮總兵吳光亮浙江候補道劉璈著瑞麟楊昌濬派令迅往臺郡用資任使閩省輪船不敷調撥江蘇廣東沿海各口輪船前有旨准歸沈葆楨調遣即著於滬局添調數號由吳大廷督帶駛往前諭李鴻章飭彭楚漢赴閩如該提督尚未起程此次調撥之北洋洋槍隊三千人著

即令其統帶迅由輪船馳赴臺灣毋稍遲緩該提督抵臺後應否留於該郡督隊辦防之處著該大臣等與文煜李鶴年會商辦理將此由六百里密諭沈葆楨瑞麟李鴻章文煜李宗義李鶴年楊昌濬並傳諭潘霨知之又諭托倫布等奏遵撥察哈爾官兵分起西進並催調烏城應撥馬匹一摺據稱駐防科布多之察哈爾馬隊五百名業經借撥科城蒙古馬匹並飭科屬臺站籌備駝馬於東臺

運到部撥榮全軍餉內截撥銀一萬五千兩作為三箇月口分令伊楞額督率隊伍於五月二十等日分起西進直抵布倫托海等語此項官兵前赴塔城所有塔屬各臺著榮全飭令一體籌備烏拉接護前進俾利師行其烏城應撥馬匹並著額勒和布等迅催察哈爾剋期解運毋稍延緩此項馬匹解到除歸還科城蒙古馬隊二百匹外其餘儘數撥赴榮全軍營以資應用賊蹤飄忽靡常科城與

塔城交界地方仍著托倫布等勤加偵探應如何相機堵禦以期聯絡聲勢之處務當嚴密布置妥籌辦理將此由五百里各諭令知之○命前任陝甘總督楊岳斌湖北巡撫曾國荃山東巡撫閻敬銘江蘇巡撫趙德轍丁日昌浙江提督鮑超山西按察使蔣益澧兩淮鹽運使郭嵩燾來京陛見 庚辰

上詣

奉先殿

壽皇殿行禮○辛巳予故四川布政使升任巡撫劉蓉事蹟宣付史館入祀名宦祠並附祀總督駱秉章專祠從總督吳棠請也 壬午諭軍機大臣等岑毓英奏烏索寨餘匪已降復叛派兵剿滅一摺逆首柳映蒼糾黨占踞騰越廳屬之烏索寨經提督蔣宗漢等合兵圍剿連破賊壘本年四月間將烏索寨攻克柳映蒼舉火自焚匪黨按殺淨盡剿辦尚屬妥速惟該處毗連緬甸野夷恐有漏網餘匪

潛行竄伏仍著岑毓英嚴飭蔣宗漢等認真查緝務將匪黨悉數殲除毋留餘孽將此由五百里諭令知之 命總管內務府大臣春佑開缺以堂郎中貴寶為總管內務府大臣予故總管內務府大臣誠明祭葬如例予雲南烏索寨陣亡遊擊顧定侯等祭葬世職加等○癸未諭內閣載遷等奏應行急修各工請派大臣查勘一摺

昭西陵

隆恩門內燎鑪等處工程均有滲漏鈔朽等情著派何廷謙前往將應修各工敬謹查勘具奏另片奏

景陵奉祀禮部署內

龍亭庫現有滲漏閃裂情形等語著何廷謙一併查勘奏明辦理 又諭文祥奏病仍未痊懇請開缺調理一摺文祥著再賞假兩箇月安心調理無庸開缺 諭軍機大臣等本日文祥奏病仍未痊懇請開缺一摺已明降

諭旨再賞假兩箇月俾得安心調理矣數月以來該大臣病體仍未就痊甚深廛繫惟各國交涉事件甚繁刻下日本與生番尋釁辦理亦無頭緒亟須該大臣前赴總理各國事務衙門會同籌畫著文祥不必拘定假期隨時前往該衙門悉心會商妥辦共濟時艱將此諭令知之○又諭李鴻章奏遵旨籌派洋槍隊航海馳赴臺防並請調駐陝銘軍東來以備南北海口策應一摺前據沈葆楨等奏

請由北洋撥久練洋槍隊三千人南洋二千人馳赴臺灣當經諭令李鴻章李宗義迅速調派茲據李鴻章奏稱直隸防軍拱衛畿輔必須留備緩急礙難分調南洋槍隊無多亦難酌撥且於兩處抽撥恐兵將素不相習轉致貽誤查有提督唐定奎所統現駐徐州之武毅銘字一軍素習西洋槍礮訓練有年堪以派往等語著照所請即飭唐定奎統帶所部步隊六千五百人由徐拔赴瓜洲口分起

航海赴臺聽候沈葆楨調遣由李宗義張樹聲飭調滬局輪船暨雇用招商局輪船駛赴瓜洲以備該軍東渡並著沈葆楨酌派閩廠兵船入江接載俾期迅速該軍所需月餉軍裝子藥等項仍著源源籌撥毋任稍有缺乏提督彭楚漢著李鴻章飭令星速赴任籌辦防務日本違約稱兵心存叵測所有南北洋沿海各口均須嚴密設防自應添調勁兵屯紮適中之地以壯聲援現在陝西防務已鬆

著邵亨豫迅飭臬司劉盛藻統率陝防武毅銘軍馬步二十二營星夜兼程拔赴山東濟甯及江南徐州一帶擇要扼紮以備南北海口策應該軍到防後著李鴻章李宗義隨時會商相機調派南北洋防務緊要並著該督等悉心妥籌詳細具奏福州一帶沿海地方文煜李鶴年王凱泰當實力籌防務臻周密不得稍存大意致誤事機日本近日情形若何著沈葆楨等隨時確探並將應行備豫事

宜妥為區畫。即行奏聞。另片奏輪船遲速無常。嗣後寄諭沈葆楨等夾板等件。除發交齋摺原輪船遞回可期迅速外。其餘應仍由驛遞徑發閩省等語。覽奏已悉。嗣後發交該督飭令遞回之件。即著隨時交原輪船飛速齋遞。將此由六百里密諭沈葆楨李鴻章文煜李宗義李鶴年王凱泰張樹聲邵亨豫並傳諭潘蔚知之。○以內閣學士德椿署正紅旗滿洲副都統。○甲申諭軍機大臣等奕榕等奏請飭催山東撥解捕圍銀兩並請飭部豫撥本年圍費一摺。同治十二年吉林捕圍官兵津貼等銀。前經戶部指撥山東釐金項下銀一萬四千兩。除已解到銀四千九百八十八兩。尚欠解九千兩。零經奕榕等等於本年俸餉銀內先行借墊發給。亟應速籌歸款。著文彬迅將欠解銀兩籌款撥解奉省。由奕榕等派員關領以清款目。至吉林本年冬圍經費銀一萬四千兩。並著戶部豫撥專款俾資

應用。將此各諭令知之。○又諭傳諭福建陸路提督羅大春羅大春奏日本漸肆狂悖。密陳籌備事宜一摺。所奏閩省海防及各省海口應行籌辦各節。不為無見。所有臺灣暨福州廈門等處前經諭令沈葆楨文煜李鶴年妥籌辦理。並諭沿海各督撫將軍豫為布置矣。該提督前經沈葆楨奏調赴臺。並據文煜等奏已催令該提督東渡。其廈門一帶防務改派孫開華接辦。著羅大春刻即馳赴臺灣會同沈葆楨潘蔚督率淡水等處防兵妥籌布置以資得力。○乙酉以河運漕船迅速。頒山東張秋鎮

金龍四大王廟
御書扁額曰神功濟運侯家林

金龍四大王廟
御書扁額曰施洽羣有
諭內閣巡視西城御史文保等奏宗室覺羅旗人持械羣毆毀壞官署請旨辦理一摺。據稱本月十一日宗室

德明額等在海王軒茶館因事械毆突至西城坊署喊嚷門窗均被毀壞現在訊錄供詞請旨辦理等語。案關宗室覺羅旗人在闕廟地面持械羣毆且有毀壞衙署等情亟宜徹底根究著刑部會同宗人府迅傳富五富成英壽德明額桂盛鳳曉到案並嚴拏在逃之桂三富姓英姓鞠二等一併研訊究辦以儆尤頑。○諭軍機大臣等文祥奏海防緊要請飭寬籌餉需一摺現在日本藉端啟釁違約

稱兵雖經沈葆楨等據理辯論仍應整頓海防以為自強之計所有各省沿海地方前經諭令該將軍督撫妥籌辦理惟布置設防用款甚鉅著戶部通盤籌畫凡一切不急之需竭力撙節將海防經費先事豫籌庶各海疆大吏不至以餉項支絀致誤事機將此諭令知之。○丙戌

上奉

慈安端裕康慶皇太后

慈禧端佑康頤皇太后幸漱芳齋侍午膳以記名副都統多隆阿署歸化城副都統予江蘇故工部尚書王引之入祀鄉賢祠從巡撫張樹聲請也。丁亥諭軍機大臣等金順奏督師出關請由關內運糧接濟並懇飭部先那實在鉅款各一摺據稱提督劉宏發現經金順派令統帶各營由巴里坤馳往古城副都統額爾慶額已於五月初九日出關帶隊赴古金順酌帶馬步各隊西進暫紮安西

屬境請由關內轉糧接濟等語金順所部各軍全隊西行軍糧最關緊要現在巴里坤古城等處產糧無多須由關內及安敦玉等處運糧接濟方可無誤軍食著左宗棠將該軍及額爾慶額一軍所需糧石源源運解毋令缺乏劉宏發及額爾慶額各營到古後即著景廉籌糧供給以期士飽馬騰並著飭令劉宏發等會合各軍實力防剿迅埽逆氛張曜全隊現在行抵何處宋慶暫駐甯夏轉瞬秋

涼布置計均就緒著左宗棠將各該軍糧運設法妥籌一面飭令陸續西行以厚兵力據金順奏該軍後隊未能接連開拔所需月餉運費等項頗形緊急非得鉅款難資集事請飭部於庫存四成洋稅項下先行借撥銀一百二十萬兩分為兩批解至綏遠城將軍衙門收存轉運卽於積欠金順軍餉內由部指撥東南各省歸還庫款等語著戶部速議具奏至各省關奉撥金順軍餉欠解尚多並著該部咨催迅解毋任延宕將此由六百里各諭令知之 予甘肅鎮番陣亡知府安保祭葬世職 戊子引見補行散館癸亥科庶吉士得旨楊仲愈著以部屬用 追予安徽黟縣陣亡殉難廩生江元玉等紳民婦女五千一百六十六名口分別旌卹如例 旌表未婚守志安徽定遠縣文童楊道然聘妻孫氏楊學沂聘妻俞氏 己丑諭內閣左宗棠奏請將罔利營私之知縣革職查辦等語甘肅

候補知縣楊國光在署徽縣知縣任內稟懇收稅釐季規以資津貼經左宗棠查明該員催收各項陋規多設私卡罔利聲名狼藉劣蹟多端實屬有玷官箴楊國光著先行革職聽候查辦 以翰林院侍讀學士楊慶麟為順天府府尹 開復翰林院編修潘祖蔭前戶部侍郎任內革職留任處分以三品京堂候補 庚寅諭軍機大臣等楊昌濬奏浙江積欠滇餉擬照已給庫收赴領銀數分別籌給並分年接續籌解一摺據稱滇省欠發各營鹽菜卹賞等銀由滇填給庫收到浙領取者已有九萬兩若各營員弁紛紛畢集實在無款發給其奉提舊欠內銅本暨欠新餉一半銀兩並請分年籌解等語所奏自係實在情形著照所請由劉嶽昭岑毓英轉飭藩司將未填給各將領庫收概行停止其已填給赴領者卽由楊昌濬按照庫收內銀數概行先給二成浙省舊欠滇餉內銅本暨欠新餉

一半未解各銀兩卽著分四五年解交以清款項原摺著鈔給劉嶽昭岑毓英閱看將此由五百里各諭令知之予故湖南提督楊鼎勳附祀大學士直隸總督曾國藩天津府專祠辛卯諭軍機大臣等都興阿等奏賊匪分股竄擾派隊防剿並探聞賊匪竄踞情形各摺片本年五六月間突有馬步賊匪分股竄擾孤山等處經官兵分隊迎擊疊有斬擒該匪奔竄羅圈溝地方復竄至新兵堡盤

踞現經都興阿添派副都統色楞額帶隊往剿卽著該將軍等飭令派出各軍實力剿辦務將此股竄匪悉數殲除毋留餘孽現在軍務未竣亟須儲備將材以為干城之選並著都興阿查明奉省如有久經戰陣謀勇兼優之宿將卽行據實酌保數員用備任使將此各諭令知之又諭沈葆楨等奏倭情叵測續籌防務情形一摺日本復到輪船一隻裝兵二百餘人帶有鐵鍊農器等件又有輪船

駛往後山一帶其為意存覬覦悍不旋師自不待問亟應厚集兵力益嚴設備庶有以杜其詭謀提督唐定奎一軍著李鴻章檄令星速拔隊兼程前進不得稍涉延緩致誤事機並著沈葆楨李宗義張樹聲遵奉前旨分別飭調船隻妥為豫備俾得迅到防所以壯軍威臺灣南北路防守事宜均甚緊要澎湖守備空虛現添募勇丁一營是否足資捍禦沈葆楨等務當督飭張其光夏獻綸等妥籌布

置嚴密防守北路淡水等處前諭羅大春前往督防該提督此時當已渡臺並著該大臣等與之會商相機籌辦日本遣人往句卑南社番目經沈葆楨等將該番目陳安生等招致來郡潘蔚現擬駐營鳳山就近相度形勢次第撫綏惟日本狡詐多端既約牡丹社生番議和並以王宇社生番不肯議和有進兵往攻之說沈葆楨等應如何聯絡番眾俾不至為彼族煽惑之處務宜設法妥辦福州廈

門一帶文煜李鶴年王凱泰現在如何籌防著卽區畫周密詳悉奏聞另片奏近閱香港新聞紙將該大臣等四月十九日奏片刊刻等語此等緊要事宜豈容稍有洩漏前經疊降諭旨嚴行訓誡該大臣將軍督撫等應如何加意慎重此次究由何處洩露卽著該大臣將軍督撫等確切查明據實具奏嗣後遇有中外交涉事件務當益加慎密不得稍涉疏虞致干咎戾並著照該大臣所請嗣後奉

到諭旨及陳奏摺片除鈔寄總理各國事務衙門及應行玉寄各處外其餘均不必鈔咨以昭嚴密將此由六百里密諭沈葆楨李鴻章文煜李宗義李鶴年張樹聲王凱泰並傳諭潘蔚知之○追予河南各屬陣亡殉難紳民婦女五百八十九名口分別旌卹如例旌表未婚守志浙江嘉興縣候選知縣金兆崇聘妻汪氏○壬辰諭內閣慶春奎昌奏請將在配脫逃之廢員飭緝究辦一摺廢員邱

瑞祥李振海張同方膽敢在配潛逃亟應嚴拏懲辦著順天府五城一體嚴密查拏務獲究辦○癸巳諭內閣李鶴年奏擒獲積年漏網巨魁等語逆首偽輔王楊輔清卽楊七麻於同治三年間由湖州潛入上海展轉逃匿久稽顯戮現經李鶴年飭屬會同安徽委員在福建晉江縣地方弋獲卽著李鶴年將該逆提省訊明按律懲辦以申國法○諭軍機大臣等李鶴年奏提督不遵節制請旨嚴議

一摺提督羅大春經李鶴年催令迅速東渡仍未起程實屬延玩羅大春著革職留任仍著文煜李鶴年王凱泰飭令該提督迅赴臺灣駐紮蘇澳一帶隨時與沈葆楨潘蔚籌辦防務儻敢抗違或到臺後不能得力卽著沈葆楨李鶴年據實嚴叅治罪將此由六百里諭知沈葆楨文煜李鶴年王凱泰並傳諭潘蔚知之○甲午遣官祭

火神廟○乙未以正黃旗滿洲副都統明瑤

署鑲黃旗護軍統領以散秩大臣恩來為
荊州右翼副都統予故荊州副都統明興
祭葬如例丙申諭內閣御史鄧承修奏賤
役冒籍捐考請旨斥革一摺候選直隸州知
州黃天錫卽黃翰齋又名黃壽田曾在兩廣
總督署內充當門丁輒敢冒入番禺縣籍蒙
捐官職復令其子黃章俊蒙混應試幸列優
生賤役蒙捐冒考亟應嚴行懲辦黃天錫及
其子黃章俊均著卽行斥革交兩廣總督廣

東巡撫飭令地方官追繳執照按律懲辦
湖廣總督李瀚章奏請將記名總兵官丁大
文留於湖北差委允之以鑲紅旗滿洲副
都統恩齡署正白旗蒙古副都統湖北宜
昌鎮總兵官黃中元開缺養親以前任直隸
通永鎮總兵官崔福泰為湖北宜昌鎮總兵
官○丁酉命服闋內閣學士翁同龢仍在弘
德殿行走○命科爾沁鎮國公棍楚克林沁
管中正殿事○以甘肅西甯勦匪出力賞參

將張鴻發巴圖魯名號同知達昌都司何得
勝等花翎州判方傳獲等藍翎餘加銜升敘
有差派睿親王德長帶領侍衛十員往奠
故賽因諾顏扎薩克親王達爾瑪茶酒賞銀
一千兩治喪追予直隸各屬殉難婦女雷
氏等一千五百四十四口旌表如例旌表
未婚守志湖南善化縣文童黃式寓聘妻熊
氏戊戌御前大臣醇親王等奏十五善射
各項懸缺較多可否於本年閱看挑補得旨

應放兵缺著醇親王等奏請欽派大臣校閱
挑補應放官缺仍著候旨遵行
上以孟秋時享
太廟自是日始齋戒三日己亥諭軍機大臣
等景廉奏遵查道員黎獻被參各款據實覆
奏並請飭催各省協餉各摺片據稱左宗棠
所參黎獻招募游勇充數及縱勇騷擾各節
詢據該員稟稱實無其事左宗棠未將原案
咨送無憑查覈金順奏參黎獻所部勇丁潰

散一節查該員係上年十二月由肅起程該營勇丁係本年二月潰散亦非意料所及等語黎獻現已到營仍著景廉隨時認真察看如實難得力或有別項劣蹟卽著據實奏叅不得稍涉迴護至黎獻所募勇丁並著覈實查驗分別遣留毋任虛糜糧餉景廉軍營刻下需餉甚急河南山東山西湖北四川等省應協景廉專餉著李瀚章吳棠文彬鮑源深錢鼎銘吳元炳迅速撥解毋稍蒂欠將此由五百里各諭令知之○內大臣正紅旗蒙古都統奕山乞休允之命仍留一等鎮國將軍食全俸○旌表守正捐軀直隸衡水縣民王國獻女煥羣廣東河源縣民利亞二妻廖氏○庚子以肅親王隆懃為內大臣○以理藩院尚書阜保兼正紅旗蒙古都統○予故前任戶部尚書羅惇衍祭葬諡文恪○追予浙江杭州殉難巡撫羅遵殿於安徽宿松縣原籍建立專祠眷屬人等一併附祀○追予安

徽甯國陣亡道員福咸建立專祠幕友家丁一併附祀

大清穆宗繼天開運受中居正保大定功聖智誠孝信敏恭寬毅皇帝實錄卷之三百六十七

大清穆宗繼天開運受中居正保大定功聖智
誠孝信敏恭寬毅皇帝實錄卷之三百六十八

臣等謹將本年內各官職事開列於左

正統十四年八月十五日奉旨

正統十四年八月十五日奉旨

正統十四年八月十五日奉旨

正統十四年八月十五日奉旨

秋

同治十三年甲戌秋七月辛丑朔享

太廟

上親詣行禮○詣鍾粹宮問

慈安端裕康慶皇太后安長春宮問

慈禧端佑康頤皇太后安至庚午皆如之○奉

慈安端裕康慶皇太后

慈禧端佑康頤皇太后幸漱芳齋侍午膳○壬

寅補鑄雲南永昌府知府儒學施甸巡檢杉

木和巡檢龍陵廳同知巡檢永北廳同知儒

學騰越廳同知經歷大理府通判雲龍賓川

等州知州劍川趙州等州知州儒學保山嶠

我雲南等縣知縣永平縣知縣儒學河陽縣

知縣儒學蒙化廳南澗巡檢各印信關防條

記從總督劉嶽昭請也○甲辰諭內閣何廷

謙奏遵查專案工程請派員承修一摺所有

昭西陵等處工程著派本年承修另案工程之

大臣魁齡榮祿一併敬謹承修○又諭鮑源

深奏請將包攬詞訟希圖索詐之守備斥革

等語山西河曲縣武進士何北海膽敢潛居

薩拉齊等處地方屢次包攬詞訟詐擾鄉愚

實屬不知自愛候補守備武進士何北海著

卽行革職遞回本籍交地方官管束○母任出

外滋事○乙巳諭內閣文彬奏特參庸劣不

職各員請分別革職改用一摺山東甯海州

知州王璽縱容家丁辦事荒謬沂水縣知縣

張慶熙作事乖謬不諳治體署海豐縣事題

補觀城縣知縣張恕捕務廢弛難期振作夏

津縣知縣耿光祐性情乖僻不洽輿情均著

卽行革職。昌邑縣知縣滕家興辦事糊塗。難膺民社著以教職選用。以肅吏治。○諭軍機大臣等沈葆楨等奏臺灣南北路防守情形。請飭淮軍迅速來臺一摺。日本兵營麇聚龜山風港等處。不時游弋各莊。且有脅逼大鳥萬千仔帛二社到營說和。及在茄鹿塘哨探情事。沈葆楨現飭王開俊由東港進紮枋寮。戴德祥由鳳山填紮東港。潘霽與曾元福等馳赴鳳山招募土勇激勵鄉團。並於海口要

隘催建兵棚以備淮軍分紮臺北諸路。以夏獻綸所部一營駐紮蘇澳。擬就淡蘭添募土勇兩營以厚兵力。並開通山路。卽可分移歧萊各處墾荒。布置尚屬周妥。卽著沈葆楨飭令派出各軍認真防守。毋稍疏虞。並令潘霽等將生番各社設法招徠。俾為我用。倭人雇墨西國船隻被傷一案。並著沈葆楨文煜李鶴年王凱泰飭令夏獻綸速行辦結。仍一面招撫歧萊各處生番。剴切曉諭。毋為倭人利

誘。墮其術。中省城各路海防。文煜等務當嚴密布置。現在濟安等輪船次第駛回臺灣。南北防務略有端倪。沈葆楨等惟當慎密防維。固不可掉以輕心。亦不宜冒昧從事。總期審度機宜。悉心籌畫。以副委任。唐定奎所帶徐州洋槍隊十三營。現在曾否起程。著李鴻章李宗義張樹聲飭令該提督迅速赴臺。以資得力。將此由六百里密諭沈葆楨李鴻章文煜李宗義李鶴年張樹聲王凱泰並傳諭潘霽知之。○又諭文彬奏籌議海防事宜一摺。所陳選將才製軍器慎防守審地勢各條。本係自強要務。惟須實事求是。立見施行。方能確有把握。不至徒託空言。事前固不可張惶而未雨綢繆。布置必期周密。該署撫於訓練設防諸事。雖已奏及。尚未將實在辦法確切指陳。究應如何豫籌經費。慎選人才。諒文彬必有籌策。卽著直抒所見。詳細奏聞。請旨辦理。毋再含混。另片奏遇有洋務當與李鴻章

密商妥籌等語。直東壤地相接。海道毗連。自應聲息互通。彼此聯為一氣。嗣後遇有洋務。應與李鴻章商辦者。著該署撫隨時知照。和衷共濟。毋失機宜。將此由四百里密諭知之。○引見八旗及直省考取拔貢生得旨王汝濟等六十一名。以七品小京官分部學習。恩沛等八十四名。以知縣試用毓莖等七十二名。交吏部詢問。以教職佐貳等官分用。○旌表夫亡殉節山東候補典史鄧恩榮妻馮氏。

○丙午諭內閣。李鴻章奏職官報效木植。現在無從驗收。轉解一摺。據稱候選知府李光昭報效木植。現與美法兩國商人互控結訟。夥輻甚多。其所買法商木植較之呈報內務府之數。木價既多。浮開銀亦分毫未付等語。李光昭所辦木植。經李鴻章查明係買自法商。其價僅議定洋銀五萬四千餘圓。而在內務府呈稱購運洋木。竟敢浮報值銀三十萬兩之多。似此膽大妄為。欺罔朝廷。不法已極。

李光昭著先行革職。交李鴻章嚴行審究。照例懲辦。所有李光昭報效木植之案。著即註銷。○諭軍機大臣等。李鴻章奏李光昭報效木植。現與洋人互控結訟。並密陳李光昭性情狡譎。語言荒唐。各摺片。李光昭現與法美領事構訟。各執一詞。必須持平妥辦。著李鴻章飭令該關道與各國領事官會審明確。秉公辦理。該革員以五萬餘圓之木價。捏報三十萬兩。已屬荒唐。且面求美領事代購價值。

無恥已極。尤堪痛恨。該督既稱李光昭在外招搖。出言不慎。且恐有別項情節。即著李鴻章迅速確切根究。按律嚴辦。不得稍涉輕縱。將此諭令知之。○又諭英廉奏回城日期。並擬那移臺站。請將抗違臺差之佐領懲儆。做東南兩路增臺添兵。請飭停止修理塔城。並飭特爾清阿赴任。暨催各省迅解協餉各摺片。臺站運解餉銀軍火。關係緊要。英廉親往達敏郭勒臺等處查看。擬分別那移安設。即著

照所議妥籌辦理塔城需用駝馬前據杜嘎爾等奏業經嚴催採辦限於七月初間解烏以備塔城領取卽著迅速備齊俾資應付佐領巴特瑪扎普經英廉飭令帶領人丁赴塔接當臺差該佐領竟敢任意抗違著先行摘去頂翎儻再不知愧奮卽行從嚴叅辦各臺所雇牲畜因馱運過重傷殘甚多著榮全嚴行曉諭所屬官兵嗣後每駝馱不得過二百斤每牛馬馱不得過一百五十斤如來往差使官兵仍前強令運重或強用過站牲畜卽由英廉咨明榮全將該官兵懲辦並將傷殘倒斃牲畜由該官兵口分內勒限責令賠補烏拉圖布拉克臺等處時有哈薩克擾掠著英廉檄飭該處官兵隨時防範查拏懲辦塔城東南兩路均應加設臺站增添官兵該參贊擬每年酌給駝馬乾銀等語著照所請行厄魯特官兵寄居布倫托海亟須大員妥為鈐束著烏里雅蘇台將軍等卽飭特爾清阿

速赴新任以重職守其所帶馬隊著另派委員接統塔爾巴哈台城垣據英廉奏稱不堪修復應俟新疆事局大定再擇適中之地建城以資控制現因看守軍糧軍火修補廢城未免工大費繁等語所籌亦是卽著榮全暫行停止修理塔城需餉甚急著文彬鮑源深錢鼎銘英翰將應撥塔城專餉暨索倫營俸餉銀兩查明數目設法源源籌解俾資接濟並著定安額勒和布杜嘎爾多布沁扎木楚托倫布保英嗣後於應解塔城餉銀到境卽派弁兵迅速解送一面知照前途各城一體派員豫備轉解毋得等候迎提致稽時日將此由四百里各諭令知之○引見直省考取優貢生得旨惠榮等二十三名以知縣試用孫乃鼎等二十四名以教職用○追予浙江處州殉難知府李希邵建立專祠○戊申裁雲南琅鹽井提舉一缺改為石膏井提舉從巡撫岑毓英請也 己酉

孝靜成皇后忌辰遣官祭

慕東陵○諭內閣前因都察院奏羅文峪防禦
訥勒和善呈控山海關協領和盛阿奈壞營
務等情當派崇實前往查辦並降旨將和盛
阿訥勒和善摘去頂帶解任訊辦茲據崇實
訊明具奏此案訥勒和善所控和盛阿剋扣
兵糧侵蝕馬乾及倡賣官房捏報工程挾勢
勒索各節或事出有因或訊無實據惟協領
和盛阿於應發心紅膏火暫行停放仍向八

旗等處索取文領且援引私人盤踞把持以
致物議沸騰實屬有玷官箴和盛阿著革去
協領發往軍臺效力贖罪防禦訥勒和善於
赴京呈控之前先因口費膏火未發輒以邊
防廢弛等詞向該副都統稟控實屬有意要
挾訥勒和善著卽革職交該管官嚴加管束
驍騎校英瑞因伊戚達崇阿與訥勒和善構
訟輒將代繕親供之間散安保拏獲鎖鑰防
禦惠文因副都統閱操賞給兵丁頂帶輒向

索費英瑞惠文均著革職協領銜佐領達崇
阿雖查無勒索重情惟平日恃才喜事不知
檢束著撤去協領銜開去佐領以防禦降補
協領順庭雖無冒捏工程情事惟於停放撥
還各款並不逐項分晰具稟究屬不合著交
部照例議處山海關副都統常星阿於和盛
阿停放心紅膏火仍索文領並不查明執行
畫稟亦有不合著交部議處○又諭崇實奏

體察山海關實在情形敬陳管見一摺所稱
裁探兵減官馬撤釐金各節不為無見山海
關及永平府等處額設兵丁一千餘名巡邏
哨探是其專責前次添撥探兵既據崇實聲
稱未能得力徒費口糧卽著照所請所有添
撥哨探官兵三十一員名全行裁撤以節糜
費山海關各口駐防馬匹向由各兵朋養備
操前此添設官馬四百匹現在疲乏倒斃既
與原數不符且有滋擾閭閻情事亟應力為
整頓該處增設官馬著卽裁減一半以備調

遣其歲給馬乾銀兩卽由海關道庫作正支銷並著嚴定章程隨時查覈不准復有侵扣作踐等弊臨榆縣設局抽釐接濟軍需原係一時權宜之計隨復添設官馬卽以釐金提備馬乾現在馬匹既經裁減馬乾已由道庫作正支銷所有山海關增設臨榆縣釐局著卽行停止並著直隸總督飭令該處道府會同山海關副都統妥覈辦理並將停止釐局緣由出示曉諭另片奏請將修理衙署各工

明定限制並籌修兵房等語嗣後該處修理衙署各工概不准率行咨報應如何示以限制及歲久失修兵房如何分年辦理之處著工部妥議章程奏明辦理○諭軍機大臣等劉長佑奏現籌勦撫越南匪徒及越南近日情形一摺法人與越南會勦各匪之議未可遽信則粵軍未可遽撤匪徒未可遽招劉長佑所籌各情詳審周密實為切中竅要現在法人原駐河內者漸次退出其大小洋船亦

皆退泊左金港口有侯淦普義來時仍欲進紮省城及勒令南官往勸劉泳幅讓出河路之說用意殊屬叵測粵軍駐紮高諒既為越南聲援又可自固疆圉現在黃崇英股匪屢為劉泳幅所敗復為滇省開化練勇所截機會大有可乘劉長佑已飭徐延旭趙沅體察越南賊勢軍情籌辦勦撫仍著該撫隨時密授機宜以期於事有裨粵東官軍查辦積匪漸次歲事卽可進駐欽州遙為犄角著瑞麟

張兆棟會商劉長佑協力通籌俾兩省邊防同臻鞏固總期安本境而綏藩服毋任他族欺陵此中大有權衡諒該督撫等必能籌畫盡善也徐延旭等到防後如何辦理情形著劉長佑詳悉具奏將此由四百里各諭令知之○庚戌
孝懿仁皇后忌辰遣官祭
景陵○辛亥
上奉

慈安端裕康慶皇太后

慈禧端佑康頤皇太后幸漱芳齋侍午膳○諭
軍機大臣等榮全奏官兵兩次擊敗回逆臺
路已通並請將孝順仍留軍營各摺片逆回
兩次撲犯西湖等處滋擾南臺雖經官軍擊
退仍恐去而復來該處為前敵餉道關繫甚
重著榮全仍飭孝順等勤加偵探嚴密防範
並與沙克都林扎布等聯絡聲勢前後夾擊
毋稍大意察哈爾官兵到營後並著酌量分

撥飭令速赴前敵以資助勦庫爾喀喇烏蘇
地方既據奏稱遭亂後舊制一時難復新任
領隊大臣孝順即著准其暫留榮全軍營專
辦前敵軍務將此由五百里諭令知之○署
伊犁將軍榮全奏請調三等侍衛雙全綏遠
城佐領音得泰赴營差委允之○壬子

慈安端裕康慶皇太后聖壽節遣官祭

太廟後殿

奉先殿

上率王以下文武大臣詣

慈寧門行慶賀禮眾官於午門外行禮○詣鍾

粹宮

慈安端裕康慶皇太后前侍早膳○奉

慈安端裕康慶皇太后

慈禧端佑康頤皇太后幸漱芳齋侍午膳○諭

軍機大臣等景廉奏馬隊官兵暫難分撥並
請飭設法轉運接濟大軍一摺吉爾洪額等
馬隊既據景廉奏稱暫難抽撥即著俟金順

到古城後悉心商酌設法分撥勁旅前赴西
湖助勦金順業已出關劉宏發步隊五營先
赴坤城該軍口糧已經景廉籌撥接濟惟後
路大軍皆以轉輸不繼停留於安玉等處現
在事機正急各軍豈容阻滯中途著左宗棠
懍遵疊次諭旨設法速為轉運俾資飽騰毋
稍缺乏本日已有旨授景廉為欽差大臣金
順為幫辦大臣新疆事宜該大臣等責無旁
貸金順現在行抵何處著迅速先行赴古與

景廉籌高進兵機宜。金順一抵古城卽著迅速奏聞。以慰廬繫榮全兵力。尙單逆回疊犯西湖等處。並著該都統妥籌兼顧。以期聯絡聲勢。俾壯軍威。刻下大軍陸續西行。餉需不容稍緩。著戶部速籌有著之款。源源撥解。毋令停兵待餉。致誤事機。將此由六百里各諭令知之。○又諭榮全現在塔城籌辦西路軍務。屢經奏調景廉金順所部前往助剿古城防務喫緊。景廉所部馬隊未能分撥。金順又

不能卽抵古城。均屬緩不濟急。不若就地籌畫兵力。設法自強。伊犁迤北數百里尙有察哈爾官兵駐牧。去塔城晶河均不甚遠。此項官兵定額一千八百餘名。或全數調往西湖。或酌調一半。訓練成軍。土爾扈特蒙古近駐庫爾喀喇烏蘇南山。亦可酌調二三百名。藉壯聲勢。大河沿戶民約數百家。如招募數百名入營。隨同打仗。可補兵力之不足。其不願入營者。飭令築堡自衛。伊犁之南尙有錫伯

營及厄魯特人眾。均在本遊牧駐紮。人數尙不單弱。榮全本有整頓伊犁營制之責。如能就近調募。加意撫綏。俾成勁旅。較之遠道望援。甚為便捷。卽著該署將軍酌度情形。妥為籌辦。將此由六百里諭令知之。○命協辦大學士陝甘總督左宗棠為大學士。仍留總督任。授烏魯木齊都統景廉為欽差大臣。督辦新疆軍務。正白旗漢軍都統金順幫辦軍務。○以甘肅克復肅州城出力。賞副都統莫爾賡額總兵官吳金魁劉大福。一品封典。總兵官趙炳文副將杜青山熊右林協領穆通阿。佐領魁福倭西鼎連祥來有參將陳西萬。駱長發遊擊張富貴樂開懷藍玉章周興成。余致和陶宏貴都司王金龍曹本旺平定元。汪宏遠李得林何聰項天佑劉天佑黃連陞。防禦巴哩恩永林。委防禦慶連富全驍騎校依里布瑪當阿托克托闊守備賈逢寅胡大興李開顏龐懷三楊生林韓生發李復勝陳

國祥段雲陽千總方寶璣李春林池宗發袁鳳美張玉林巴圖魯名號知府楊珪璜參將羅興泰等花翎知縣方大垌等藍翎餘加銜升敘開復有差○以甘肅擊退安西等處竄匪出力賞副將王士魁守備黎飛雄巴圖魯名號遊擊倪俊等花翎守備劉占鼐等藍翎餘加銜升敘有差○追予烏魯木齊殉難提督平瑞事蹟宣付史館與故古城領隊大臣保恆署領隊大臣惠慶各建專祠各眷屬等暨陣亡官兵一併附祀○乙卯中元節

上詣

奉先殿

壽皇殿行禮○遣官祭

永陵

福陵

昭陵

昭西陵

孝陵

孝東陵○

景陵○

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢○諭軍機大臣等英翰奏布置江防請調卓勝一軍回皖等語日本在臺灣地方違約稱兵沿江防務緊要皖省亟需勁旅設防金運昌所統卓勝一軍現紮黃甫川包頭等處此軍能否卽時調回有無別軍可以填紮著定安通盤籌畫如該處防務漸鬆可以飭令金運昌回皖卽著將此軍酌量撤回安徽以固江防將此由四百里各諭

令知之。○又諭丁寶楨奏黔省善後事宜須妥籌速辦等語。貴州軍務甫平。亟須乘此時會為規畫久遠之計。現在各省欠解該省協餉甚鉅。籌辦善後經費艱難。遺黎之望濟方殷。飢軍之待哺尤急。自應迅籌措置以固邊疆。卽著戶部酌量籌撥款項。俾得先清欠餉。整頓防營。並將善後事宜趕緊經理。該省經此次變亂。一切規模事同創始。並著曾璧光督同司道嚴飭該地方官於應行興辦各事務當盡心區畫。破格舉行。惟期裨益民生。不得拘泥常例。將此諭令知之。○予貴州各屬陣亡殉難廩生鄒亮勳等紳民婦女一千四百三十名口分別旌卹如例。

大清穆宗繼天開運受中居正保大定功聖智誠孝信敏恭寬毅皇帝實錄卷之三百六十八

大清穆宗繼天開運受中居正保大定功聖智
誠孝信敏恭寬毅皇帝實錄卷之三百六十九

穆宗皇帝實錄卷之三百六十九

穆宗皇帝實錄卷之三百六十九

穆宗皇帝實錄卷之三百六十九

穆宗皇帝實錄卷之三百六十九

穆宗皇帝實錄卷之三百六十九

教修

同治十三年甲戌七月丙辰諭軍機大臣等

沈葆楨等奏續陳防務暨撫番開路情形並
查辦倭人失銀案各摺片日本兵船仍在龜
山等處相持日久尚未退兵現在羅大春黎
兆棠均已到臺沈葆楨已飭張其光等開通
山路潘霽亦前往鳳山督練新軍催集民團
綏撫番社並飭地方官豫籌客兵薪米各省
輪船陸續駛回唐定奎一軍不日亦可趕到
刻下颶颶時作琅瑤難泊輪船龜山倭營又
當風衝彼族正在進退維谷之際著沈葆楨

文煜李鶴年王凱泰潘霽酌度情形審慎等
畫能使倭船迅離臺境則諸務皆易為力柳

原前光在都經總理各國事務衙門王大臣

與之凱切辯論該使臣語意枝梧尚未就緒

沈葆楨等務宜乘此兵燬未開速為布置一

面撫馭番眾一面厚集兵力俾壯聲威所有

商購船械等事是否已有端緒著即迅速籌

辦毋失機宜倭人劉穆齋失銀一案並著飭

令夏獻綸迅行辦結毋令彼族狡展藉故耽

延將此由六百里密諭沈葆楨文煜李鶴年

王凱泰並傳諭潘霽知之○丁巳

文宗顯皇帝忌辰遣官祭

定陵○

上詣

奉先殿

壽皇殿行禮○頒江蘇省城紫陽書院

御書扁額曰通經致用正誼書院

御書扁額曰正誼明道○追予江蘇各屬陣亡

殉難守備趙金祥等紳民婦女一千三百二十
十三員名口分別旌卹如例。戊午諭內閣
御史陳彝奏內務府大臣辦事欺蒙請予處
分一摺。革員李光昭報銷木植種種欺罔業
經降旨交李鴻章審辦。總管內務府大臣於
該革員先後具呈時並不詳查駁詰遽為陳
奏實屬辦事欺蒙咎有應得均著交部議處
以示懲儆。尋議總管內務府大臣崇綸明善
春佑均應照溺職例革職從之。○諭軍機大

臣等明春奏營餉欠缺請飭西征糧臺迅撥
銀兩一摺。據稱明春各軍自上年十月抵哈
以來各省餉項均未解到欠發安敦玉巴里
坤等處民間糧腳各價約計五六萬兩並借
用文麟糧價餉銀六七萬兩。景廉糧餉一萬
餘兩積欠累累若不趕緊清釐勢必至與文
麟兩軍交困等語。明春一軍餉需久絀自係
實情亟須提撥專款接濟以免譁潰著左宗
棠袁保恆迅速由西征糧臺籌撥現餉十八

萬兩交明春委員領解回營俾濟急需毋稍
延誤將此由四百里各諭令知之。以醇親
王博多勒噶台親王伯彥訥謨祜為領彝大
臣補行同治十年大計甘肅卓異官二員
不謹官一員浮躁官一員罷輟官一員才力
不及官四員年老官一員分別議敘處分如
例。撥巴里坤戰馬三百匹交哈密委員領
回備用。己未諭內閣朕於八月二十七日
啟鑒駐蹕南苑九月初六日還宮。○諭軍機

大臣等克蒙額奏請飭催晉省迅撥餉銀一
摺。甯夏滿營兵餉向由山西撥解現在該營
官兵艱苦萬分盼餉甚急所有山西每年應
撥甯夏滿營餉銀十萬兩著鮑源深迅飭藩
司趕緊如數籌撥毋得稍有短少即交該協
領蘇勒圖管解回營以濟急需其豐紳等上
年奏請每年撥解現銀五萬兩既據克蒙額
奏稱不敷散放著無庸議至克蒙額請飭四
川湖北山東每月各撥解銀四千兩之處著

戶部議奏將此由四百里各諭令知之尋議遵查四川等省礙難添撥餉銀應無庸議從之。追予廣東各屬陣亡殉難紳民辛華芳等暨婦女三百八十二名口分別旌卹如例。旌表未婚守志江西新喻縣文童劉炳麟聘妻楊氏。庚申。

上幸瀛臺。添鑄吉林伯都訥長春二廳儒學條記從將軍奕榕請也。○比利時國使臣謝惠施等三人於紫光閣前瞻觀。○辛酉諭內

閣兵部奏遵議奉天金州匪災不報案內武職各員處分一摺。奉天金州佐領閻士芳防禦那明阿富森奏於屬界地方被水成災業經勘驗屬實。輒敢觀望推諉不行詳報實屬任意玩延。閻士芳那明阿富森均著照部議革職永不敘用。副都統安圖接據訴災呈詞並不於限內飭查咨報迨鄉民赴署滋鬧經將軍衙門咨查又復含糊聲覆佐領奎山係副都統衙門辦事司員亦不卽時回明覈

辦均屬玩視民瘼辦理乖謬安圖奎山均著照部議革職。壬戌諭內閣都察院奏據蒙古已故郡王達達巴扎木蘇親父繼福晉諾爾斯德嗎氏遣抱以盟長欺騙冒襲王職等詞赴該衙門呈訴據稱郡王達達巴扎木蘇病故無子承襲諾爾斯德嗎氏與該故郡王福晉商議將該氏堂侄愛敏烏爾圖呈報大盟長圖謝圖王旗下乞准承襲該大盟長兩次批駁旋將年甫五歲無譜系可查之迪瓦占三報院襲職該氏等冤抑莫申等語並據蒙古台吉茂依罕等赴該衙門呈訴情節相同案關承襲王職是否挾私擅報亟應徹底根究著理藩院提集人證卷宗秉公研訊確情據實具奏。又諭都察院奏工部員外郎明琳以地方官縱盜殃民等詞赴該衙門呈訴據稱奉天岫巖廳一帶馬賊結黨搶掠並有花會賭局人等械鬪得贓通判城守禦等概不差緝等語案關賊匪肆搶擾害地方該

文武各員並不認真緝捕。亟應嚴行查辦。著都興阿、志和、恭鏜、秉公確查。按律嚴懲。據實具奏。○諭軍機大臣等。文彬奏遵旨覆陳籌防事宜一摺。覽奏均悉。卽著文彬體察情形。認真籌畫。以期有備無患。並著隨時詳悉具奏。毋得徒託空言。另片奏購買軍械。解赴登州備用等語。東省沿海各口岸防務。關繫緊要。文彬當督飭總兵陳擇輔等嚴密布置。並將應築土城營寨礮臺等事。妥為籌辦。將此

密諭知之。○調正白旗蒙古副都統毓福為金州副都統。○以巴里坤守城及勦辦沙山等處竄匪出力。賞副都統順喜頭品頂帶。五品軍功。趙文彬等花翎。署領隊大臣慶壽等加銜升敘有差。予陣亡軍功徐學第、馮保元祭葬世職。如把總例。○癸亥。諭軍機大臣等。有人奏直隸樂亭縣知縣王霖嗜好甚深。信任門丁與庫吏表裏為奸。凡有詞訟。皆有罰款。聽信差役設立班房。藉修道差徭勒派民

錢。任令書吏盜賣官地。請飭查辦等語。州縣為親民之官。似此信任門丁書吏。假公濟私。何足以膺民社。著李鴻章按照所參各節。確切查明。據實具奏。原片著摘鈔給閱。看將此諭令知之。○又諭有人奏署錦縣知縣吳富春任性妄為。本年四月間。有商船由錦口買米。被匪糾搶。吳富春並不根究。反以違禁將船商罰銀。該署縣上年勒索鋪戶錢十餘萬。吊縱令伊子同門丁等聚賭。請飭查辦等語。

吳富春被參各節。是否屬實。著都興阿等嚴密確查。據實奏參。毋稍徇隱。原片著摘鈔給閱。看將此各諭令知之。尋奏遵查。吳富春無縱子聚賭等事。惟因辦差無款。借用鋪戶錢文。未卽歸還。致為眾商口實。殊屬不合。應請交部議處。從之。○又諭李鴻章奏辦理海防請飭催川餉一摺。日本與生番構兵。沿海防務緊要。畿輔重地。尤須嚴密籌防。刻下李鴻章添購軍火。修築礮臺。需款甚急。四川應解

該軍月餉截至本年四月止所解不及一半
著吳崇查明欠解該軍月餉無論何款先行
提解二十萬兩以濟眉急嗣後仍著按月如
數解足毋稍延欠將此由四百里各諭令知
之○以兵部右侍郎恩齡兼正白旗蒙古副
都統乾清門侍衛明安署正白旗蒙古副都
統正黃旗滿洲副都統恩承署正紅旗滿洲
副都統○甲子

上幸瀛臺○御紫光閣閱吉林黑龍江弁兵馬

步射○諭內閣御史孫鳳翔奏前署內務府
司員肆行欺罔情罪尤重請先予嚴懲一摺
據稱上年李光昭呈請報效木植及此次呈
進木植皆係現任內務府大臣貴寶署理堂
郎中任內之事貴寶蒙混具稟呈堂並與李
光昭交通舞弊等語貴寶於李光昭報效木
植一案輒敢蒙混回堂入奏致李光昭得售
其奸欺蒙尤甚貴寶著先行交部嚴加議處
並著李鴻章查明李光昭有無與貴寶交通

舞弊情事據實奏明辦理以示懲儆尋吏部
議貴寶應照溺職例革職從之○以故翰林
院五經博士邵啟運孫毓嵩襲職○乙丑
仁宗睿皇帝忌辰遣官祭

昌陵

上詣

壽皇殿行禮○諭內閣岑毓英奏遵旨甄別庸
劣各員一摺雲南呈貢縣知縣黨浙行為卑
鄙有玷官箴著革職永不敘用候補知縣王

文俊貪酷性成聲名狼藉著革職從嚴審辦
候補州同周啟鉞行止卑污不安本分候補
縣丞何寅輝貪鄙近利任性妄為均著革職
遞解回籍交地方官嚴加管束候補州同蕭
金元專務營私行同市儈試用州判陳德泳
居心巧詐圖飽私囊均著革職該二員侵蝕
釐金鹽課並著勒限追繳候補知縣胡邦傑
試用州同周庚蒙混報捐始終諱匿均著勒
令休致以肅吏治另片奏王文俊在署龍陵

同知任內被控提省查辦該員不候質訊擅自逃走等語著吳棠曾壁光將該員查拏解回雲南歸案審辦諭軍機大臣等總理各國事務衙門奏上海新聞紙刊刻密寄諭旨請飭查究等語軍機處封發寄信諭旨各省奉到後自應加意慎密況係中外交涉事件豈容稍有漏洩乃本年三月二十九日密寄沈葆楨等諭旨上海新聞紙內竟行刊刻究係何人洩漏著李宗義嚴密確查據實覆奏

毋得稍涉含混嗣後各將軍督撫等奉到寄諭務當格外嚴密以昭慎重儻有仍前漏洩致誤機宜惟該將軍督撫等是問將此由六百里密諭沈葆楨瑞麟李鴻章都興阿志和恭鏜文煜李宗義李鶴年文彬王凱泰張樹聲楊昌濬張兆棟並傳諭潘霽知之又諭奕榕奕艾奏甯古塔城被匪闖入旋經收復現在控勦餘匪一摺甯古塔地方突有馬步賊匪三百餘名分股撲城署副都統雙壽未

能抵禦被匪闖入城內現在雖經烏勒興阿等將賊擊退收復城池惟賊眾分股竄逃難免不散而復合刻下各處馬賊未盡勦除儻再勾結蔓延為害實非淺鮮著奕榕等咨令烏勒興阿雙壽督飭兵勇協同派出官兵實力控捕務將此股竄匪悉數殲除毋令乘間遠颺復圖嘯聚甯古塔地方緊要該處官兵當如何嚴密防守以免疏虞乃賊匪僅有三百餘名該城卽行失守是平時武備廢弛已可概見署副都統協領雙壽著摘去頂帶俟回協領任後仍帶革職留任處分並著奕榕等責令迅將餘匪盡行殲滅以觀後效如再不知愧奮卽著嚴參懲辦將此由五百里各諭令知之○綏遠城將軍定安因病解職調杭州將軍善慶為綏遠城將軍丙寅諭內閣都察院奏浙江監生李慶瑞呈遞條陳一摺該監生所陳杜浮徵以紓商困蠲冗捐以裕民力兩條疊諭各督撫實力奉行此外各

條均係撫拾陳言無裨實政卽著無庸置議其所稱外委朱雲等於咸豐十年間在浙江勦賊陣亡未蒙卹典等語著該衙門知照浙江巡撫查明請卹嗣後請卹之案仍著照舊章辦理其不應奏事之員概不得率行具呈代為奏請賀壽慈另摺奏酌擬代奏章程請嗣後遇有條陳時務赴都察院呈遞之件如所陳有裨事體語不及私者仍為代奏如言無可采復圖便己私者卽一概駁斥發還如

閒有可采輒附入本身及他人勞績冀邀恩施者卽令分別具呈毋許牽混以便酌覈奏咨儻牽涉詞訟跡近訐告無論所言有無可采仍照京控案件覈辦等語均著照所議辦理以荊州左翼副都統希元為杭州將軍旌表夫亡守節浙江錢塘縣舉人吳錫熊妻王氏○丁卯以黑龍江記名協領穆克德布為荊州左翼副都統戊辰諭軍機大臣等都興阿奏隨時勦緝股匪並請調馬隊一

摺奉省地方匪徒未靖彈壓巡防均關緊要各隊兵力未厚且有傷病疲乏自應添兵更換著豐紳依克唐阿挑選精壯馬隊官兵二百名派委得力將官管帶赴奉此項馬隊到奉後卽著都興阿查明更換疲乏官兵以資得力並著督飭各隊認真巡緝毋稍疏虞將此由四百里各諭令知之○以甘肅西甯府城解圍及克復大通縣城出力賞提督李桂香黃萬鵬周春生謝明月彭連陞歐陽通蕭

萬和李添順方泗高張永輝甯仁備席大成尹興茂譚和義李協和趙寶林廖得勝彭積祥邱俊鳳張振壽劉得喜賀長發湯秀齊葛致清劉國斌雷貴才余虎恩譚上連總兵官易榮華張輔文陳慶泰彭秋揚張添習何西就陳得貴秦品貴郭慶才沈福堂黃新元副將錢寶鍾正一品封典提督吳隆海黃馬褂提督姜鏡成彭榮復張敦益總兵官柳秀春鄧興隆楊萬幾曾名聲李雲珥張得榮賀益

陞周嘉賓彭如勝譚致廣吳長勝王俊高吳朝萬賀開元副將李蘭芝彭和吉劉曉山唐有義曾義良涂連陞龐少清陳雲廷曾福堂王恆發左得勝方南英周桂清萬福泰張玉輝湯德明李紹仁周萬和張繼桃郭玉和丁連科熊南香馬隆湘黎秀棠程玉修盧有升曹茂松丁玉和馬清隆劉泰昌蕭南桂馬伯銘陳添元李贊儀劉星勝袁有光張鵬翥饒玉興陶憲榜王德清蕭得榮參將帥榮華鄒永茂孫仕尚鄧洪發張忠義朱文質劉遐齡陳勝發呂桂清孫國乾胡洪秀武華清陳考祥梁清和戴連臣蔣文德譚蔚齋羅長勝程榮佳李大秋遊擊李奉勉張欽文何友才許毓蓮唐得益李長勝姚得章曾鳳翔謝長清董福祥李雙梁朱克存周仕發婁德光朱光耀黃金福都司舒昭履岳朝珍守備蔣義全梁祿魯如皋巴圖魯名號知府陳道濟等花翎通判譚上珍等藍翎餘加銜升敘有差

調科布多官馬二百匹解赴烏里雅蘇台軍營備用 己巳
硃筆諭已革總管內務府大臣崇綸明善春佑均著加恩改為革職留任 諭內閣都興阿桂清奏查勘
福陵應修各工請擇吉派員興修一摺著欽天監於本年八九月間選擇吉期先行知照即著盛京將軍會同工部侍郎屆期敬謹興修又諭前降旨諭令總管內務府大臣將圓明園工程擇要興修原以備兩宮
皇太后燕憩用資頤養而遂孝思本年開工後朕曾親往閱看數次見工程浩大非尅期所能蒞功現在物力艱難經費支絀軍務未盡平定各省時有偏災朕仰體
慈懷甚不欲以土木之工重勞民力所有圓明園一切工程均著即行停止俟將來邊境又安庫款充裕再行興修因念三海近來宮掖殿宇完固量加修理工作不至過繁著該管

大臣查勘三海地方酌度情形將如何修葺之處奏請辦理將此通諭中外知之○又諭兵部奏遵議協領副都統處分一摺山海關協領順庭於停放撥還各款並不分晰具稟副都統常星阿於協領和盛阿停放心紅膏火等節並不查明畫稟均屬咎無可辭順庭著照部議降一級調用常星阿著照部議降二級留任均著准其抵銷○又諭銘安奏職官假滿逗遛插訟請飭回京一摺正藍旗世襲子爵佐領聯勛因請假修墓逗遛奉天不即回京銷假輒於該家丁曲增壽爭毆案內藉端插訟實屬冒昧多事聯勛著交部議處並著都興阿即飭該佐領回京毋任逗遛生事○以兵部尚書英桂戶部左侍郎榮祿為總管內務府大臣○以甘肅甯夏勦匪出力賞總兵官郝永剛王明泰一品封典副管旗章京教肯巴圖魯名號遊擊李金彪等花翎餘加銜升敘有差○庚午

硃筆諭在廷王大臣等朕自去歲正月二十六日親政以來每逢召對恭親王時語言之間諸多失儀著革去親王世襲罔替降為郡王仍在軍機大臣上行走併載激革去貝勒郡王銜以示微懲○諭軍機大臣等景廉奏逆回撲犯濟木薩官軍會勦獲勝一摺逆回白彥虎於本年六月間糾黨撲犯濟木薩經景廉飭令孔才並添派隊伍在三臺等處會勦獲勝疊有新擒該匪雖經西竄難保不復圖

回撲仍著景廉督飭孔才勤加偵探嚴密設防毋得稍涉大意金順現在行抵何處該都統務當督率所部迅赴古城與景廉會商勦辦以期迅埽逆氛將此由六百里各諭令知之○以前任兵部右侍郎寶珣為山海關副都統○以濟木薩勦匪獲勝予協領文成額以副都統簡放賞防禦薩克新圖千總李生蘭把總孔昭華楊福巴圖魯名號防禦春慶等花翎委防禦台和藍翎餘加銜升敘有差

回撲仍著景廉督飭孔才勤加偵探嚴密設防毋得稍涉大意金順現在行抵何處該都統務當督率所部迅赴古城與景廉會商勦辦以期迅埽逆氛將此由六百里各諭令知之○以前任兵部右侍郎寶珣為山海關副都統○以濟木薩勦匪獲勝予協領文成額以副都統簡放賞防禦薩克新圖千總李生蘭把總孔昭華楊福巴圖魯名號防禦春慶等花翎委防禦台和藍翎餘加銜升敘有差

子陣亡協領常明祭葬世職如副都統例

手書

十九

大清穆宗繼天開運受中居正保大定功聖智
誠孝信敏恭寬毅皇帝實錄卷之三百六十九

大清穆宗繼天開運受中居正保大定功聖智
誠孝信敏恭寬毅皇帝實錄卷之三百七十

同治十三年甲戌八月辛未朔

上詣鍾粹宮問

慈安端裕康慶皇太后安長春宮問

慈禧端佑康頤皇太后安至丁酉皆如之○奉

慈安端裕康慶皇太后

慈禧端佑康頤皇太后幸漱芳齋侍午膳○遣

官祭

文昌帝君廟○諭內閣朕奉

慈安端裕康慶皇太后

慈禧端佑康頤皇太后懿旨皇帝昨經降旨將

恭親王革去親王世襲罔替降為郡王並載
激革去貝勒郡王銜在恭親王於召對時言
語失儀原屬咎有應得惟念該親王自輔政
以來不無勞勩足錄著加恩賞還親王世襲
罔替載激貝勒郡王銜一併賞還該親王當
仰體朝廷訓誡之意嗣後益加勤慎宏濟艱
難用副委任○又諭前降旨令總管內務府
大臣將圓明園工程擇要興修嗣朕以經費
支絀深恐有累民生已特降諭旨將圓明園
一切工程即行停止並令該管大臣查勘三
海地方量加修理為朕恭奉

兩宮

皇太后駐蹕之所惟現在時值艱難何忍重勞
民力所有三海工程該管大臣務當覈實勘
估力杜浮冒以昭撙節而恤民艱○諭軍機
大臣等有人奏臚陳時務利弊六條一摺所
陳考覈官吏保全民命甄別酷吏振興學校
整飭營伍各條即著各直省督撫酌度情形

實力籌辦毋得視為具文至海疆備禦事宜
疊經諭令該督撫妥為布置並著隨時區畫
嚴密設防以期有備無患至摺內所稱現任
臺灣道府縣等官資淺望輕難資治理並臺
灣道委員當堂擊殺在籍副將林文明一事
請飭秉公訊奏等語著閩浙總督福建巡撫
分別查明據實具奏原摺均著鈔給閱看將
此各諭令知之○又諭有人奏四川近年有
匪徒燒香結盟勢漸鴟張該省從前議收井

捐現聞井戶被災逃亡歇業又川省差役擡
糧私立逢釐收分各名目等語匪徒滋擾地
方實為閭閻之害亟應嚴密查拏著吳棠密
飭地方各官隨時訪拏從嚴懲辦其井戶困
苦情形即著該督查明應否豁免之處奏明
辦理至差役擡糧私立名目並著密查嚴禁
以杜弊端原片著鈔給閱看將此諭令知之
○壬申遣官祭昭忠祠○諭軍機大臣等沈
葆楨等奏臺灣近日情形力籌防務並北路

倭案辨結。屯番搶傷生番。現飭嚴辦。及閩廠輪船。懇准續造各摺片。日本兵船。在後灣楓港一帶。日以蓋兵房掘濠溝。豎竹圍為事。意圖招誘番眾。恫喝村民。日久相持。情形漸怯。現在淮軍業經到臺。羅大春已抵蘇澳。夏獻綸招募楚勇。亦已成軍。澎湖地方。現借海關。凌風輪船。駐彼教習。閩廠六船。隨同操練。防務漸臻嚴密。彼族自無隙可乘。惟中路水沙連秀姑巒一帶。為全臺適中之區。地方最為

緊要。刻下該處社寮。竟有教堂數處。並有逃匪通匿。其間難保倭族不暗為勾通。肆其煽惑。沈葆楨等現擬募兵前往。即著與文煜李鶴年。王凱泰。潘霽迅速籌商。妥為調派。一面撫綏番眾。擒捕匪徒。一面開路設防。力求固守。毋使倭族得售其奸。斷我南北之路。安平礮臺。並著沈葆楨等設法興築。臺城倒塌千有餘丈。現經發款分修。著即飭令周懋琦等認真經理。務期修築鞏固。不准草率從事。電

綫雖可緩圖。鐵甲船必不可少。即使議購有成。將來仍應鳩工自造。目前尤須講求駕駛之法。沈葆楨等惟當切實籌辦。力圖自強。閩廠輪船。即照所請。准其續行興造。得力兵船。以資利用。北路倭案。已經辨結。沈葆楨等請將稅務司好博遜酌給獎勵之處。著該衙門議奏。屯番搶傷生番。亟宜速為查辦。張其光正在下淡水一帶。辦理招撫事宜。何以聞信不即行馳往拏辦。迨回郡城。後復不與沈葆楨言及實屬不知緩急。此案關係撫番全局。豈容置若罔聞。著沈葆楨等嚴飭張其光將屯番拏獲懲辦。以安人心。儻該總兵再復辦理顛預。即著沈葆楨等據實奏明。從嚴叅處。將此由六百里密諭。沈葆楨文煜李鶴年王凱泰並傳諭潘霽知之。○癸酉。諭軍機大臣等。都興阿奏。竄匪勾結滋擾。派兵迎剿。情形一摺。孤山敗匪。由新兵堡竄出。後復敢勾結匪徒。回竄意圖。窺伺邊內。經官軍迎剿斃賊

多名該匪旋向古城子等處北竄現經都興阿派令營總觀海等帶兵防勒卽著嚴飭各該員弁實力勦辦務將此股賊匪悉數殲除其鐵嶺開原等處並飭派防各員隨時探防遇賊卽擊毋任竄入邊疆志和等亦當督飭地方官認真緝捕以靖閭閻將此各諭令知之○派工部左侍郎何廷謙恭勘

慕陵

隆恩殿應修工程○調協辦大學士吏部尚書

寶鑒為兵部尚書兵部尚書英桂為吏部尚書兼步軍統領以刑部右侍郎廣壽為都察院左都御史○以正白旗蒙古都統載治兼署正白旗漢軍都統○以甘肅克復巴燕戎格廳城出力賞提督方正興蕭拱照周文翔總兵官顏清勝鄒廷贊彭光明楊必耀楊景德譚必相馮勝才劉兆元楊蘭桂嚴洪彬副將蔣恭成楊宏春正一品封典提督王上國龔炳嵐易春元喻勝榮總兵官趙得禮周東

漢陳登桂凌默發李永勝李廣珠袁有傑李日新江桂林吳應順鄧貴華劉楚華沈仁傑劉大旺喻德俊李德勝余洪勝傅定達沈崇德龍大勝李賓光盧有升楊雲高副將周崇華祝鑑廷楊文學黎秀棠許政明鄧榮升萬起順孫兆蓮粟龍山鄒國華周義和羅瑞秋蕭泰義周秀發譚發駿程興發徐元勝舒芳桂李其祥趙昌玉湯起江李金明王仁賜汪東村王太山歐陽吉星張佳志李輝池參將郝長慶彭星炳張仕林趙日昇陳玉賢譚祿華潘麟朱達陸李紹華陶楚楠蘇遂意尚秉恆都司方金山陳鵬耆張長安胡起雲指揮僉事楊作霖巴圖魯名號參將成福林等花翎同知曾爾昌等藍翎餘加銜升敘有差○命輔國公載濂帶領侍衛十員往奠故都察院左都御史英元茶酒予祭葬謚恭毅○甲戌遣官祭

關帝廟○諭軍機大臣等瑞聯奏拏獲賊犯

正法各摺片本年二月間朝陽縣屬土門溝等處突有賊匪多人竄擾經署朝陽縣知縣陳本植會同練軍營哨官張英等帶隊往捕在大王山地方斃賊甚多拏獲邢萬發等多名其糾搶羅圈溝礦廠賊匪楊得山亦經蒙員拏獲先後正法平泉州並獲匪犯數名惟劉鳳鳴及傅城等在逃未獲亟應查拏懲辦著瑞聯嚴飭文武員弁務將在逃各犯悉數弋獲不准一名漏網並著飭令地方各官將

緝捕事宜實力籌辦以靖地方將此諭令知之○調吏部右侍郎載崇為刑部右侍郎戶部右侍郎崇綺為吏部右侍郎以內閣學士慶陞為戶部右侍郎管錢法堂事○以左翼前鋒統領安興阿署鑲黃旗蒙古都統正黃旗蒙古副都統伊昌阿署正黃旗護軍統領正白旗滿洲副都統棍楚克林沁正白旗蒙古副都統恩齡署鑲黃旗蒙古副都統○調鑲黃旗漢軍副都統富勒渾泰為鑲紅旗蒙

古副都統以記名副都統喜昌為鑲黃旗漢軍副都統調正黃旗漢軍副都統博崇武為鑲藍旗滿洲副都統以記名副都統崇禮為正黃旗漢軍副都統○乙亥諭軍機大臣等吳崇奏遵籌協黔餉銀並川省地方靜謐拏辦匪徒情形各一摺周達武到川後川省奉撥協餉銀五十萬兩業經吳崇如數籌撥該提督得此鉅款所有應發該軍欠餉足資應用卽著周達武將應行遣撤各營妥速辦理

以節餉需至該提督從前撥用貴州司局銀十一萬餘兩卽著曾壁光設法彌補以清款項川省匪徒據吳崇奏分派隊伍拏獲著名要匪甚多惟該省與滇黔等省接壤游匪散練出沒無常仍應實力整頓毋徒博寬大之名毋事姑息以長奸慝著卽督飭派出各營將弁會同地方文武將緝捕事宜認真籌辦並嚴檄該府廳州縣整飭團丁力行保甲以期保衛地方將此諭知吳崇曾壁光並傳諭

周達武知之○以正白旗護軍統領廣科為左翼前鋒統領正黃旗滿洲副都統明瑤為正白旗護軍統領未到任前以正黃旗蒙古副都統綿宜署理鑲藍旗蒙古副都統奕慶署鑲黃旗護軍統領○

上以祭

社稷壇自是日始齋戒三日○丙子以山東青州府故欽差大臣博多勒噶台忠親王僧格林沁專祠告成命列入祀典並頒

御書扁額曰丹心萬古○以正黃旗蒙古副都

統富明正藍旗滿洲副都統明善署正黃旗

滿洲副都統○補鑄哈密扎薩克回王印信

從辦事大臣文麟請也○丁丑祭

先師孔子遣吏部尚書毛昶熙行禮○戊寅

祭

大社

大稷

上親詣行禮○諭內閣都興阿桂清奏請選擇

合龍吉期等語盛京

永陵

啟運殿合龍著欽天監於九月內選擇吉期先

行知照即著盛京將軍等敬謹遵吉辦理○

吏部以大學士左宗棠應授何殿閣請得旨

左宗棠著授為東閣大學士○己卯

太宗文皇帝忌辰遣官祭

昭陵○庚辰

上詣

奉先殿

壽皇殿行禮○遣官祭黑龍潭

昭靈沛澤龍王之神玉泉山

惠濟慈佑靈濩龍王之神昆明湖

安佑普濟沛澤廣生龍王之神密雲縣白龍

潭

昭靈廣濟普澤龍王之神○遣官祭圓明園

惠濟祠

河神廟○諭內閣御史吳鴻恩奏請除當商

錢鋪積弊等語。當商違例取利。錢鋪攬和私錢。本干例禁。若如該御史所奏。江南淮揚徐海等處。及四川各屬。竟有當商並私押小典。違例取息。錢鋪攬和私錢情事。實屬有礙民生。此等弊端。他省恐亦不免。著各該督撫飭令地方官認真稽察。嚴行禁止。毋任奸商舞弊。○又諭御史吳鴻恩奏。請飭清釐州縣差役積弊等語。差役擾民。例禁甚嚴。若如該御史所奏。竟有勾匪分贓。唆訟索錢。州縣護庇。以避處分各情事。殊屬大干法紀。著各直省督撫嚴飭各地方官。將蠹役認真革除。如有曲為護庇者。即著據實嚴參。以肅吏治。○諭軍機大臣等。御史吳鴻恩奏。四川津貼一項。請飭停止一摺。前因軍需浩繁。不能不借資民力。川省改借徵為津貼。按糧加收。實一時權宜之計。小民苦累有年。實深矜憫。現在滇黔軍務業已肅清。協餉漸可裁省。能否將津貼一項停止之處。著吳棠體察情形。據實具

奏。將此諭令知之。尋奏京餉兵餉均在津貼項下指撥。未便驟議停止。仍請照舊辦理。從之。○又諭周達武奏。川省議籌楚軍欠餉。緩不濟急。一摺。川省欠解周達武所部楚軍協餉。昨據吳棠奏稱。在於省庫湊撥銀二十萬兩解往。先將武字營楚勇裁去五六營。其餘銀二十八萬兩。在於富榮局按月撥解。該提督撥用過貴州司局銀十一萬餘兩。即由貴州設法彌補。當經諭令吳棠等妥為辦理。茲據周達武奏。川省湊撥二十萬兩。實難先裁五六營。其餘專指富榮局按月撥解。而取勇丁停餉守候。亦屬為難。請將各營由吳棠遣撤等語。川省庫款支絀。勢不能立籌鉅款。自當設法通融。惟楚軍月餉業已停止。勢難日久守候。亦屬實在情形。但川省業經湊撥二十萬兩。其餘亦有專指款項。則各營自可陸續遣裁。仍著吳棠與周達武妥為籌商。設法辦理。該提督所請於富榮局夔關等處分撥

共湊成五十萬之數。是否可行。並該軍欠餉。除撥用黔局一項外。其餘三十餘萬兩。作何彌補之處。統由吳棠通盤籌畫。至遣撤勇下。係該提督專責。豈可以餉項為難。卽欲置身事外。萬一營勇聚而生變。則吳棠周達武均不能當此重咎。周達武與吳棠會商籌定後。著一面聯銜具奏。一面將各營分別陸續遣撤。統俟撤勇事竣。再行來京陛見。當此經費支絀。該督等宜如何和衷商榷。共濟時艱。豈

得各存意見。致干咎戾。將此由五百里諭知吳棠。並傳諭周達武知之。尋奏遵議。楚軍餉銀。應照前奏撥足五十萬兩之數。其彌補銀兩。擬由川省籌解八萬兩。餘銀由統領率同各將領儘數報捐。報聞。○以捐製軍械。賞青州副都統春福花翎。○辛巳。

太祖高皇帝忌辰遣官祭

福陵。○以故和碩特輔國公達哩扎布子車旺哩克精襲爵。○以正紅旗漢軍副都統祥亨

鑲藍旗蒙古副都統奕慶署鑲藍旗滿洲副都統。○以福建學獲逆首楊輔清出力。予提督羅大春優敘。知縣金錫蕃以同知直隸州知州用。並賞花翎。餘升敘有差。○以江蘇徐州勦除幅匪。予總兵官王樹楠以提督簡放。賞守備姚長榮花翎。餘加銜升敘有差。陣亡千總尤洪山祭葬。世職加等。○壬午。諭軍機大臣等。前據李鴻章奏。李光昭報效木植。現與洋人互控結訟。並陳李光昭性情狡譎。言

語荒唐。當降旨將李光昭革職。交李鴻章嚴行懲辦。時逾一月有餘。尚未據該督覆奏。著李鴻章將此案迅速嚴訊。卽行奏結。毋再遲延。將此諭令知之。○又諭。御史鄧慶麟奏。奉省馬賊日熾。請飭認真勦辦。一摺。奉天馬賊滋擾。疊經諭令都興阿等督飭地方官認真緝捕。悉數殲除。茲據該御史奏稱。奉天各廳州縣馬賊結夥成羣。搶案疊出。地方文武各官。匿案諱盜。是奉省緝捕廢弛。已可概見。亟

應實力勦辦。以靖地方。著都興阿等嚴飭地方官認真緝辦。務獲究辦。如有縱賊不緝及粉飾徇隱等情。卽行從嚴叅奏。原摺均著鈔給閱看。將此各諭令知之。○又諭文麟。明春奏健銳一軍缺餉。請借部庫銀兩。並改設軍塘。請飭大軍無庸繞走東山。暨健銳親兵馬隊潰逃。現在辦理情形各摺片。健銳一軍月餉。前由明春奏明。由西征糧臺籌撥銀十八萬兩。惟該營盼餉甚殷。西征糧臺撥解尚需

時日。實屬緩不濟急。著照所請。由戶部借撥庫款現銀六萬兩。解交察哈爾都統衙門收存。由明春派員迎提回營。以濟急需。此項借撥銀兩。卽由西征糧臺在明春月餉內劃除解還部庫。以清款目。西征各軍現已陸續出關。據文麟等奏。若繞走東山纏頭地方。諸多不便。哈密廟兒溝及石人子等處。均已改設軍塘。卽著左宗棠、景廉、金順、文麟、明春。知照西征各軍。均由哈密所設塘站行走。毋庸繞

走東山。本年五月間。健銳親兵馬隊潰逃兩哨。業經明春帶隊在四堡地方斬殺多名。立時撲滅。惟該匪四散。亟應嚴密查拏。著文麟、明春、慶壽、陳升、恆飭令地方文武一體緝拏。毋任紛竄。以靖地方。將此諭知戶部。並由四百里諭知左宗棠、景廉、金順、袁保、恆、文麟。明春傳諭慶壽、陳升、恆知之。○癸未秋分夕月於西郊。

上親詣行禮。○諭軍機大臣等。有人奏福建臺

灣府屬民間置買田房稅契。並不照章徵收。惟以契價銀數多寡為斷。於定例之外浮收至三四倍七八倍不等。至典當田產亦勒令照契納稅等語。田產稅契自有定章。若如所奏任意浮收。殊屬不成事體。著李鶴年、王凱泰確切查明。卽行從嚴禁止。務令照章辦理。以杜弊端。原片均著鈔給閱看。將此各諭令知之。○又諭都興阿奏股匪沿邊竄擾。官兵勦辦情形一摺。孤山敗匪糾黨回竄邊內。經

色楞額等督隊迎擊。在中江道李家臺等處
斃匪多名。餘匪竄至大網子溝地方。越山逃
遁。著都興阿嚴飭派出員弁實力緝拏。其沿
邊一帶並著飭令帶隊各將領嚴密防守。毋
任匪蹤紛竄。將此由四百里諭令知之。○又
諭前因丁寶楨奏黔省籌辦善後經費艱難
當經諭令戶部酌籌款項。俾得趕緊經理。茲
據該部奏稱。各省經費未充。無從另撥款項。
貴州原撥各省月餉。此時尚未停撤。其應需

善後經費。不難於月餉及續撥專餉內支用。
請旨飭催等語。卽著瑞麟、李鴻章、李宗義、李
鶴年、吳棠、李瀚章、王文韶、吳元炳、文彬、張兆
棟、王凱泰、楊昌濬、張樹聲、劉坤一將原協黔
省月餉按月照數籌撥。源源解往。不得以該
省軍務已平。稍有蒂欠。致誤要需。至各該省
欠解黔省善後專餉。並著一併迅速籌撥。埽
數解清。如有遷延不解者。卽由曾璧光將該
藩司閻道等指名叅處。以儆玩泄。將此由四

百里各諭令知之。○予奉天中江道等處陣
亡兵丁德春等賞卹如例。○乙酉
上奉

慈安端裕康慶皇太后

慈禧端佑康頤皇太后幸漱芳齋侍午膳。○諭
軍機大臣等。前因英翰奏布置江防。請調卓
勝軍回皖。當經諭令定安通盤籌畫。酌量辦
理。茲據奏稱。金運昌所統馬步各軍駐紮皇
甫川一帶。該處地方遼闊。冬令巡防尤關緊

要。不可無兵駐守。各處防軍亦難抽調更換。
請將該軍暫行留防等語。所奏自係實在情
形。著照所請。卽將卓勝一軍暫留該處駐防。
仍由英翰酌量緩急。如該省兵力不敷。卽知
照定安飭令該軍趕緊回皖。並著定安會商
鮑源深查明晉省如有堪調兵勇。迅飭前赴
皇甫川一帶駐紮巡防。以便卓勝軍抽撤回
皖。協助江防。另片奏援案請賞兵丁皮衣銀
兩等語。著戶部於山西應解京餉內劃撥銀

九千六百兩由鮑源深派員就近徑解歸綏俾資應用此項銀兩解到卽著定安製備皮衣按名發給以示體恤將此由四百里各諭令知之○丙戌遣官祭賢良祠○戊子諭內閣前因已革知府李光昭報效木植浮開價銀並在外招搖各節當經諭令李鴻章嚴訊究辦茲據李鴻章奏訊出李光昭捏報木價並捏造奉旨採辦銜條旗號及圓明園監督各情實屬膽大妄為不法已極李光昭卽著

照所擬斬監候秋後處決另片奏李光昭訊無與貴寶交通舞弊實據惟內務府筆帖式成麟擅自出京偕李光昭潛往各省請旨革職等語成麟著卽行革職以示懲儆貴寶業經革職著毋庸議○諭軍機大臣等奕榕等奏請豫調馬隊以備防勦一摺奉天馬賊自清河溝等處竄出後盤踞李家臺地方經奉省官兵擊散分股逃竄李家臺距威遠堡邊門僅數十里誠恐該匪被勦窮蹙竄入吉林

邊界奕榕等已添派馬隊官兵前往堵勦惟該省存兵無多恐有大股紛竄不足以資堵禦著豐紳依克唐阿卽在該省官兵內豫選精壯馬隊五百名配齊軍火器械聽候調撥奕榕等當就現有防兵嚴飭派出各員認真防勦儻遇事機緊要兵力不敷卽知照豐紳等飭令備調馬隊前往助勦並著都興阿等嚴飭帶兵各員實力勦洗務將此股賊匪悉數殲除毋任四出紛竄致滋蔓延將此由四

百里各諭令知之○又諭榮全奏駝隻備辦維艱請飭烏城分撥運赴一摺前因榮全兵力甚單當經諭令金順於抵古城後酌撥數營馳往助勦並諭榮全速備駝隻先期前赴古城接替金順所部官兵西進茲據榮全奏稱塔城由庫爾喀喇烏蘇至古城計二千餘里賊氛逼近趕運牲畜恐有疏虞且塔城駝隻覓購維艱西進官兵需駝甚多勢難籌備請由烏城餘存駝馬內分撥應用等語所奏

自係實在情形。惟金順全軍行抵古城。亟需駝馬更替。方可剋期西進。烏里雅蘇台刻下防務稍鬆。官兵大半撤防。駝馬自可騰那應用。著額勒和布。杜嘎爾多布。沁扎木楚。於該城餘存駝馬內。分撥健駝四百隻。壯馬四百匹。如有不敷。卽由額勒和布等設法添補足數。派員迅速運赴古城。以備接替金順所部官兵西進。烏城備辦駝馬尚易。該將軍等務當不分畛域。妥速籌辦。俾利師行。金順抵古

城後。仍著懍遵前旨。與景廉會商酌撥數營。馳赴榮全軍營助剿。此項官兵一抵古城。卽當馳赴西湖。駝馬深虞疲乏。榮全仍當設法豫籌接替。毋稍諉卸。將此由四百里各諭令知之。○己丑諭內閣。何廷謙奏遵查專案工程。請派員承修一摺。所有

慕陵東西朝房工程。著派本年承修另案工程之大臣載齡。恩齡。一併敬謹承修。○又諭都興阿等奏。城守尉責任繁重。請賞加職銜一

摺。興京城守尉一缺守護

陵寢。照料工程。兼有緝捕訓練諸務。任重事繁。嗣後著加副都統銜。以資鎮攝。○諭軍機大臣等。沈葆楨等奏。續陳倭營動靜。並籌防開路情形。劉坤一奏。請飭道員黎兆棠。俟臺灣事竣。卽行來江各摺片。日本兵船久駐龜山。雖死亡相繼。仍時有船接濟礮械軍糧。雖未遽啟兵端。然日久相持。終非了局。現在淮軍頭起。陸續盤抵鳳山。羅大春所調泉勇一營。業抵蘇澳。滬尾鷄籠等口。亦擬調募兵勇。扼紮布置。漸臻周密。自當隨時聯絡。以壯聲威。刺桐脚莊民有句引倭兵往攻龜紋社之謠。亟應早為解散。沈葆楨等雖照會倭將西鄉。令其阻止。惟彼族正在招誘村民。藉端生事。未必理諭可行。沈葆楨等惟當飭令王開俊。迅卽傳集該處民番。令其解仇息事。毋任別滋事端。鐵甲船購買未成。仍著沈葆楨等妥速籌辦。以資得力。修築礮臺。勢不容緩。著沈

葆楨等迅速辦理毋失機宜羅大春現招泉屬壯丁千人漸次開通番社該處事務愈繁需餉愈鉅著文煜李鶴年王凱泰設法籌措源源接濟庶於招撫及辨防兩事不至掣肘道員黎兆棠業已到臺該員應否留於福建差委之處著文煜李鶴年王凱泰與沈葆楨等酌度具奏將此由六百里密諭沈葆楨文煜李鶴年王凱泰並傳諭潘霽知之○撥河南司庫銀九萬兩備黃河南北兩岸工需○

庚寅諭內閣御史吳鴻恩奏請飭整頓捕務以利行旅一摺據奏京外村莊時有盜賊搶奪奉天直隸等省伏莽甚多此等情形恐他省亦所不免亟應認真拏辦以靖地方著各直省督撫嚴飭各該地方文武迅將所轄墩汛塘鋪修理整齊添派兵役隨時稽察其各州縣交界地方並著飭令協力訪拏不得稍分畛域儻有諱盜等弊卽行據實叅奏○壬辰以正藍旗漢軍都統崇綸兼署鑲白旗滿

洲都統○賞普濟堂功德林煮賬小米八百石○癸巳

世宗憲皇帝忌辰遣官祭

泰陵○

上詣

壽皇殿行禮○甲午諭軍機大臣等依克唐阿等奏圍獵官兵應需資裝銀兩請飭分別催撥一摺據稱同治十二年黑龍江圍獵官兵應需資裝銀一萬四千八百六十餘兩前經

戶部奏准在於山東地丁銀內撥給迄今日久尚未報解該省向鋪商借墊亟應歸還等語著文彬飭令藩司卽將奉撥銀兩趕緊如數解交豐紳等以清款項至黑龍江本年圍獵官兵應需資裝銀一萬四千八百七十兩著戶部卽行指撥專款先期咨解俾濟要需將此各諭令知之○乙未諭內閣現在大軍陸續出關著派欽差大臣大學士陝甘總督左宗棠督辦糧餉轉運一切事宜內閣學士

袁保恆著作為幫辦並將西征糧臺移設肅州著袁保恆前往該州駐紮○又諭前據御史袁承業奏請酌裁釐金申禁罌粟當經降旨交戶部議奏茲據該部奏稱請飭現辦抽釐省分按照戶部歷年奏案體察辦理並請飭禁止栽種罌粟等語同治八年十二月間疊經戶部具奏令各督撫酌裁釐卡嚴察局員均有成案可循所有現辦抽釐省分設立收捐局卡或量為裁減或覈實歸併著各該省督撫查照戶部奏案隨時體察情形妥為辦理儻有不肖局員侵漁捐項滋擾行商卽著嚴參懲辦至栽種罌粟例禁綦嚴據袁承業奏稱山西大同汾州代州尚知禁約其餘州縣多未遵行等語著山西巡撫分別飭屬確實勘明卽行剴切曉諭嚴禁栽種此等惡習恐他省亦所不免並著各直省督撫通飭所屬隨時認真稽察無論已種未種一律嚴行申禁仍不得任令胥役人等藉端索詐擾

累民生○諭軍機大臣等前據袁保恆奏穆圖善所部月餉請飭加撥或另撥有著之款當交戶部建議具奏茲據奏稱穆圖善月餉向由山西等省協解不得遽謂無著現在各省均有應解之款若再加撥恐均力難籌解該軍餉需不敷歷經左宗棠勻濟應仍由該大臣隨時酌量勻給並請飭各督撫將該軍月餉照數籌撥等語穆圖善一軍月餉銀九萬五千兩各省欠解甚多該營餉需殊形支

絀著李宗羲李瀚章吳棠張樹聲鮑源深錢鼎銘吳元炳嚴飭各該藩司實力籌撥按月如數解往如果仍前延欠卽由西征糧臺會同穆圖善將該藩司指名嚴參以儆玩泄並著左宗棠將該軍餉項隨時妥籌接濟毋稍推諉現在大軍陸續出關所有後路轉餉各事宜關繫緊要從前關外用兵均在肅州安設糧臺由重臣督率經理本日已明降諭旨令左宗棠督辦糧餉轉運一切事宜並令袁

保恆幫辦移紮肅州該大臣等當統籌全局將關外各軍應需糧餉源源接濟俾前敵將帥得以一意進取迅赴戎機毋任稍有匱乏致滋貽誤左宗棠駐紮蘭州遇有緊要事件並著隨時赴肅籌辦袁保恆原辦西征糧臺各事仍著妥籌兼顧將此由五百里各諭令知之○丙申以神靈顯應加浙江定海廳龍神封號曰昭應○諭內閣都興阿桂清奏請選擇合龍吉期一摺盛京

福陵

隆恩殿工程將次完竣著欽天監於九月內選擇合龍吉期先行知照即著盛京將軍等敬謹遵照辦理○丁酉

上啟鑒駐蹕南苑○諭軍機大臣等李瀚章等奏湖北應協雲貴餉項請由督撫派員催解等語據稱湖北奉撥月協滇軍餉銀二萬兩嗣經改為提督馬如龍專餉疊次皆由該提督派員守催現在馬如龍路經湖北隨帶弁

丁七八十人之多坐索欠餉甚亟業由李瀚章等籌解銀二萬兩仍復藉端扶制迨經劉嶽昭過鄂與之婉商再籌解銀四萬兩始允清款又近來雲貴兩省每將尋常商戶欠項以及文武廉俸等款不由督撫知照徑由藩司填給庫收令其至鄂由協餉匯兌各情各省協濟餉需自應由督撫派員催領且目前各省庫款支絀籌措為難若如該督等所奏帶兵官帶領多人坐索欠餉且零碎款項悉

由鄰省支給實屬不成事體嗣後湖北應協雲貴兩省餉項即著劉嶽昭岑毓英曾璧光派委妥員前往催解不得令帶兵官自行委員催取並不得以尋常欠款指餉匯兌以免紛歧而重餉需將此由五百里各諭令知之○是日駐蹕舊衙門行宮翼日如之○戊戌上御黃幄次閱御前王大臣乾清門侍衛等馬射○己亥

上行圍○諭內閣依克唐阿托克滿奏請將不

聽劄調暨縱兵訛詐各員懲辦一摺呼蘭地方封禁山場有奸民砍伐檟木情事。經依克唐阿等劄調副管烏林布進省面訊。竟敢託病抗違。已彥蘇蘇委協領額哲通額縱令兵丁勒詐民財致被控告。又不遵調將被控各犯送案。有心袒庇烏林布額哲通額。均著卽行革職。並著依克唐阿等將砍伐檟木及勒詐民財各犯按名弋獲究辦。○諭軍機大臣等恩麟奏護送呼畢勒罕行抵西甯途遇野

番搶擄一摺。恩麟護送照料呼畢勒罕回庫坐牀行至通天河沿地方。突遇騎馬番夷擁眾數百。聲稱求賞箱包駝馬各節。膽敢圍放槍銃肆行搶擄。實屬不成事體。恩麟現已護送呼畢勒罕行抵西甯。將來出口赴庫道路尚遙。著該前駐藏大臣沿途小心照料。飭令哨探弁兵勤加偵探。穩慎行走。毋得再有疏虞。將此由四百里諭令知之。○是日駐蹕圓河行宮。至癸卯皆如之。

大清穆宗繼天開運受中居正保大定功聖智誠孝信敏恭寬毅皇帝實錄卷之三百七十

大清穆宗繼天開運受中居正保大定功聖智
誠孝信敏恭寬毅皇帝實錄卷之三百七十一

欽
修

同治十三年甲戌九月庚子朔

上幸晾鷹臺撒圍。○賞南苑苑丞苑副等官緞

匹。苑戶等一月錢糧。並賞海戶銀。○辛丑

上幸晾鷹臺閱神機營操。○壬寅

上御行宮門。閱御前王大臣乾清門侍衛等射

○諭軍機大臣等景廉奏檄飭防軍截擊竄

匪一摺。沙山馬橋等處時有賊匪竄擾。防務

甚關緊要。西湖地方亦恐有匪徒回竄。景廉

已飭沙克都林扎布在沙山馬橋等處防守

與西湖各營互為聲援。仍著隨時偵探。如有

賊匪撲犯西湖。即行帶隊截擊。毋令深入。現

在額爾慶額馬隊。並金順所部步隊五營。已

抵古城。金順亦由安西拔隊西進。兵力較厚。

金順到營後。著景廉悉心會商。酌撥數營。前

往西湖一帶援剿。以遏賊氛。將此由五百里

各諭令知之。○浙江巡撫楊昌濬奏溫州樂

清等處被水。現已派員查勘。得旨楊昌濬即

派妥員確切查勘。分別撫恤。毋令一夫失所。

○賞內閣學士松淮副都統銜。為駐藏辦事

大臣。○以操防疏懈。革古城佐領全福職。仍

留營。○加賞故駐藏大臣承繼銀三百兩。治

喪。○予哈密被戕副將李萬勝祭葬。世職。○

癸卯遣官祭

都城隍之神。○諭內閣都興阿等奏請派員

驗收工程。並請擇吉恭請

神牌還御一摺。

永陵

啟運殿各工現已完竣。著欽天監於九月內。敬

謹選擇吉期。知照都興阿等屆期恭請

神牌還御。此項工程著派麟書驗收。○以隊伍整齊。賞管神機營事醇親王。大學士文祥尚書崇綸。都統明慶。副都統熙拉布。侍郎榮祿。恩承。暨侍衛章京等。加級有差。並賞兵丁銀。○賞南苑圍場章京防禦驍騎校等官。緞匹。並賞領催馬甲銀。○甲辰。以豫備南苑等處行宮差務妥協。予管奉宸苑事御前大臣景壽等。加級紀錄有差。○是日駐蹕新衙門行

宮。○乙巳

上回鑾至正陽門詣

闕帝廟拈香。○還宮。○詣鍾粹宮問

慈安端裕康慶皇太后安。長春宮問

慈禧端佑康頤皇太后安。至己巳。皆如之。○諭

內閣榮全所進黑花馬一匹。朕乘騎甚穩。著

賞給鐵龍駒名號。榮全著加恩賞給大卷江

紬二卷。小刀一把。大荷包一對。小荷包一對。

○以奉天沿邊勒匪出力。賞佐領依崇阿等

花翎披甲永全等藍翎。餘升敘有差。○丙午。諭內閣。給事中夏獻馨奏。請飭整頓捕務等語。近來京城地面盜竊肆行。該司坊營汛各官。並不實力查拏。致令捕役人等怠玩性成。且難保無庇賊分贓情事。捕務實屬廢弛。亟應嚴行整頓。著步軍統領衙門。順天府五城各飭所屬一體嚴密稽查。明定章程。認真巡緝。如有緝捕不力員弁。卽行從嚴叅辦。○丁未。諭內閣。大學士兩廣總督瑞麟。老成端恪。

練達勤能。歷受

先朝知遇之隆。洊升卿貳。入贊樞機。咸豐三年。特命赴直隸天津等處督兵勦匪。克奏膚公。朕御極後。簡授廣州將軍。調任兩廣總督。在粵十年。練兵訓士。綏靖邊疆。辦理地方事宜。均臻妥協。旋晉綸扉。仍留總督之任。數歷中外。懋著勤勞。前因患病。賞假調理。方冀漸次就痊。長承恩眷。茲聞溘逝。悼惜殊深。著加恩追贈太保。照大學士例賜卹。入祀賢良祠。任內

一切處分悉予開復。應得卹典該衙門察例具奏。准其入城治喪。其靈柩回旗時著沿途地方官妥為照料。伊子候選知府懷塔布著俟服闋後以四品京堂候補主事佛呢音布著賞給員外郎。花沙布哈芬布均著俟百日孝滿後由該旗帶領引見。用示朕篤念耆臣至意。尋予祭葬。諡文莊。○又諭毛昶熙等奏覆覈朝審人犯。刑部原擬情實緩決等起。俱屬允協。英桂等奏。刑部所定成祿勘語與軍

機大臣會同刑部原擬似未脗合。各一摺。著刑部查明具奏。○又諭廣壽奏步軍統領衙門向設郎中員外郎主事等官定制已極周妥。請裁撤兼辦司員等語。所奏不為無見。著步軍統領衙門將從前奏調各員飭令仍回本衙門當差。其候選各員仍回本旗候選。嗣後不得再行奏調。以符定制。○廣東巡撫張兆棟奏密陳籌辦海防先將大黃滯中流砥柱兩礮臺興修並親詣虎門踴勘礮臺形勢。

暨飭汕頭南澳各礮臺一律修築得旨。已有旨令該撫兼署兩廣總督篆務。著即將海口防務及練兵籌餉一切事宜妥為籌理。毋稍疏虞。以工部尚書崇綸兼署吏部尚書都察院左都御史廣壽署步軍統領。以正藍旗滿洲都統奕劻兼署鑲紅旗漢軍都統。以安徽巡撫英翰為兩廣總督。未到任前以廣東巡撫張兆棟兼署。調湖北巡撫吳元炳為安徽巡撫。以前任陝西巡撫翁同爵為湖

北巡撫。未到任前以湖廣總督李瀚章兼署。

戊申遣官祭

歷代帝王廟。以詹事府詹事鐵祺為內閣學士兼禮部侍郎銜。命委散秩大臣堃林往奠故庫倫辦事大臣車臣汗阿爾塔什達茶酒。賞銀五百兩治喪。己酉諭軍機大臣等。桂清奏興京地方緊要請添設大員鎮守一摺。奉天馬賊日多。疊經勦辦。未能淨絕。根株且時有擾及興京之事。近復有邊外賊匪

聚集七八百人窺伺邊內新兵堡地方商賈居民紛紛遷徙該處地方緊要亟應嚴密防範以淨賊蹤興京僅有城守尉一員前經都興阿等奏請加副都統銜俾資鎮攝業經降旨允准現在桂清請於該處添設副都統一員一切體制章程官兵員數均仿照金州錦州之例自為

陵寢重地格外加慎起見惟添設大員應籌經費應否將盛京副都統移紮興京其員缺卽

照京旗以侍郎兼任以及

陵寢官兵應否照馬蘭泰甯兩鎮章程責成管轄南北界限如何畫分旗民地方官如何增改之處統著都興阿志和麟書繼格銘安桂清恭鐸悉心履勘繪圖貼說詳細妥議具奏至添設副都統後城守尉自無庸加副都統銜或卽將此缺裁撤並著一併議奏桂清原摺著鈔給都興阿等閱看將此各諭令知之
以圖謝圖汗扎薩克貝勒那木濟勒端多

布為庫倫辦事大臣○庚戌諭內閣本年十月初十日恭逢

慈禧端佑康頤皇太后四旬萬壽禮部題請照例行禮筵宴奉

慈禧端佑康頤皇太后懿旨是日在慈寧宮行禮至禮成後內廷自有筵宴所請照例筵宴之處毋庸舉行其在外公主福晉命婦著進內行禮欽此著傳諭各該衙門敬謹遵照○調安徽巡撫吳元炳為江蘇巡撫未到任前

以兩江總督李宗義兼署以安徽布政使裕祿為巡撫河南按察使紹誠為安徽布政使調浙江按察使興奎為河南按察使○辛亥命翰林院侍講張家驤在南書房行走○派兵部右侍郎夏同善知武舉以都察院左副都御史童華為武會試正考官翰林院侍講學士許應騷為副考官○甲寅

上奉

慈安端裕康慶皇太后

慈禧端佑康頤皇太后幸漱芳齋侍午膳○乙卯諭軍機大臣等前因延煦畢道遠奏請飭江西等省酌徵本色或籌款採買當令戶部議奏茲據奏稱江廣河南現辦折漕省分規運本色實為當務之急等語前據戶部奏請令江西湖北湖南起運本色業經降旨允准著李宗義李瀚章恩錫劉坤一王文韶查照該部前奏將本年新漕酌辦本色迅籌起運並將辦理情形先行具奏不得以事屬為難

藉詞推諉其河南新漕著錢鼎銘自同治十四年起先事圖維務將漕糧徵運本色毋得再請折徵置京倉於不顧至江浙等省徵運新漕著該督撫等力籌足額加增起運俾供支放將此諭知李宗義李瀚章吳元炳劉坤一楊昌濬錢鼎銘王文韶並傳諭恩錫知之○以黑龍江等處官軍積年隨征甘肅出力予記名副都統佐領阿奇泰等優敘賞道員沈應奎遊擊郭福昌等花翎縣丞張恆等藍

翎餘加銜升敘開復有差予陣亡參將吳國泰等祭葬世職○丙辰諭軍機大臣等奕榕等奏殲除匪首塔界漸就肅清現在剿辦姓屬金匪一摺竄擾塔城匪首王冥誅即王汶拴業經擒獲正法餘匪亦經副都統烏勒興阿搜剿殆盡遠近山場溝內一律肅清惟敗殘餘匪尚在遁逃仍須乘勢搜捕以期淨絕根株現在三姓所屬山場尚有金匪聚集亟應乘此聲威迅行剿辦奕榕等已添調官兵助剿即著奕榕奕艾咨令副都統勝安親督官兵入山搜剿務將伏匿金匪趕緊剿洗淨盡不准一名漏網並著咨令烏勒興阿暫緩撤兵仍在塔界擇要堵擊以防金匪分竄此次拏獲匪首及在塔境剿匪出力各員准由奕榕等歸案擇尤保獎毋許冒濫塔城被擾失去之左右兩司關防佐領等圖記均著該部按照單開照例補行頒發將此各諭令知之○補鑄貴州上江協右營遊擊永甯州知

州天柱縣縣丞麻哈州儒學各關防印信條記從巡撫曾璧光請也○予甯古塔陣亡領催春德等賞卹加等○戊午諭內閣軍機大臣刑部奏官犯成祿呈遞呈詞請派大臣覆訊一摺已革烏魯木齊提督成祿誣斃多命一案前經軍機大臣會同刑部審訊比例擬以斬立決並以成祿究係誤聽人言與實在誣民為逆者不同應否改為斬監候聲明請旨復經御前大臣大學士六部九卿會議仍

照原擬具奏當經降旨改為斬監候已屬法外施仁豈容該犯任意狡辯成祿著仍照原擬斬監候該犯所遞呈詞等件著毋庸置議○諭軍機大臣等沈葆楨等奏准粵兩軍到臺及南北開路情形一摺倭人勾致近番並益兵房練槍礮中雖怯弱外仍示強沈葆楨等惟當慎密防範申嚴警備不得稍涉疏虞現在淮粵兩軍陸續到臺即著分別布置擇要扼紮以壯聲威臺南生番尚易招致北路

各社率多頑梗之徒大南澳平埔等處有兜番糾集丁壯數千意在抗違沈葆楨等務宜悉心籌度恩威並用會同羅大春加意招徠妥慎辦理不可輕易進紮致為番族所乘轉礙撫番大局臺郡城垣關繫緊要著督飭該地方官速行修葺務期鞏固沈葆楨另片奏大雅安瀾輪船遭風損壞自請議處等語此次損壞船隻即著分別設法修理沈葆楨未能先事豫防殊屬疏忽著交部議處製造輪

船工鉅費繁嗣後務當飭令該管駕等隨時加慎又片奏訊結屯番槍傷生番一案即著照所議辦理將此由六百里密諭沈葆楨文煜李鶴年王凱泰並傳諭潘霽知之尋吏部議沈葆楨應降一級留任得旨准其抵銷○予故記名提督吳雲集附祀故大學士直隸總督曾國藩天津府專祠○旌表殉母捐軀直隸知府陳崇砥姪女慧莊○己未諭軍機大臣等戶部奏請旨嚴飭各省迅解京餉一

摺部庫應放各項要款需用甚鉅。各省欠解本年京餉。尚有一百七十八萬餘兩之多。著該將軍督撫等督同司道監督各將欠解本年京餉。迅即照數報解。依限到京。已報起程各款。亦即催令趕緊解部。毋任沿途逗遛。儻竟任意遲延。致誤開放。即著戶部指名嚴叅。至歷年積欠京餉。並著查照戶部上年奏案。即行陸續補解。原摺均著鈔給閱看。將此由六百里各諭令知之。○又諭前據總理各國事務衙門奏上海新聞紙刊刻本年三月二十九日密寄沈葆楨等諭旨。請飭查究。當諭李宗義嚴密確查。茲據該督奏稱查覈上海林華書院新報。上海匯報。均係照鈔香港華字日報。至香港華字日報內有臺灣消息一條。已載明由福州寄來字樣等語。此次密寄諭旨。究由何人洩漏。著文煜等嚴行查究。即將洩漏根由。確切查明。據實具奏。不准稍涉含混。將此由四百里各密諭知之。○以驗收

海運漕糧完竣。予倉場侍郎延煦畢道遠優敘。賞卹中毓璋。董潤花翎。餘升敘有差。○庚申。諭軍機大臣等。袁保恆奏統籌出關轉運全局。先陳大概情形。暨購辦駝隻糧石。請飭部指提積欠甘餉各摺片。現在大軍陸續出關。轉運最關緊要。必須寬籌款項。先事布置。方免臨時貽誤。袁保恆以糧臺並無現餉。無從措手。請由戶部庫存項下。撥發現銀二百萬兩。俾將駝隻車輛糧石應用各項。趕緊備辦。著戶部酌度情形。應如何發給之處。妥議具奏。西征原有餉項。如何勻撥。並此後常年運費的餉。共需若干。著左宗棠袁保恆悉心商酌。迅速具奏。轉運需駝甚多。袁保恆已派員分赴晉豫等省採買。並商令協領喜勝赴張家口採購。三四千隻。咨明戶部。將金順委員劃解西征糧臺之部撥銀五萬兩。改解張家口交察哈爾都統衙門收存。以備喜勝領用。喜勝赴口時。著慶春奎昌妥為照料。此項

駝隻過境。著廉恩海緒照例免稅放行。並額勒和布杜嘎爾多布沁扎木楚會同烏城所屬各蒙古王旗。剋期代購健駝四五千隻。由北路解送巴里坤交收。限於年內解到。責成慶壽認真監收牧放。以備撥用。所需駝價。卽於此次請撥部款內。由袁保恆咨明劃解烏城應用。附近巴哈之東山一帶纏頭地方產糧尚多。袁保恆已派員前往採買。著文麟明春慶壽先行派員代為購辦。地近何城。卽在

該城存儲。以備提用。並將烏城解到駝隻。代為經理。毋許推諉。各省積欠西征軍餉甚鉅。著戶部查照成案。在於庫款稍裕省分。指提積欠甘餉銀六十萬兩。限於十一月內全數籌撥解陝。不得仍前短欠。另摺奏請赴京陛見等語。袁保恆現在幫辦糧餉轉運一切事宜。責任綦重。亟須遵旨前往肅州與左宗棠籌商機宜。著毋庸來京陛見。以免往返需時。將此由五百里諭知左宗棠袁保恆額勒和

布杜嘎爾多布沁扎木楚慶春奎昌文麟。明春並傳諭慶壽廉恩海緒知之。○又諭岑毓英奏滇省拮据情形。請飭各省補發欠餉一摺。前因滇省籌辦營伍善後京銅各事宜。當經諭令江蘇等省於新舊欠解滇餉內。分別籌解應用。乃各省報解甚屬寥寥。而滇省趕辦京銅。以及補給勇餉。支發綠營俸餉。辦理善後經費各節。需款甚殷。均屬不容稍緩。著楊昌濬飭令該藩司將積欠滇省新餉一百

四十二萬兩內。籌撥二成銀二十八萬四千兩。分別發交該省委員解滇應用。其餘尚應補銀四十二萬六千兩。分三年解清。以足一半之數。至舊餉應撥銅本欠銀十八萬兩。並著於本年內依限解清。其各省應解餉銀。著李宗羲李瀚章吳棠將新欠滇餉。儘本年內先籌解一半。或照一半之數於本年內解交十之六七。下餘儘明年補解足數。其銅本銀兩。仍著於本年解清。毋得再有延宕。至廣東

省暨粵海關欠餉並銅本銀兩應否仍令該省籌解。抑由部另撥有著之款。統著該部奏明辦理。將此由五百里各諭令知之。○予雲南歷年陣亡殉難司獄任淦等暨紳民兵勇婦女三千一百五十二員名口分別旌卹如例。○撫恤琉球國遭風難夷如例。○辛酉諭內閣奕慶奏請將直班不慎之官兵分別懲處一摺。禁門重地。例禁恭嚴。乃本月二十一日。突有驚逸馬車。由神武門馳至景運門前。該直班官兵未能攔阻。實屬不成事體。所有是日直班之鑲黃旗副護軍參領多倫泰著交部議處。其直班藍翎長護軍等。並著該營查明分別懲辦。○諭軍機大臣等。文麟。明春奏遵將健銳營馬勇分別遣留一摺。明春所統健銳營馬隊。勢難久駐關外。惟遣撤太驟。復恐不能迅就安插。現經文麟等擇其情願就撤者。遣令入關。即著文麟等妥為裁遣。此項馬勇入關後。著左宗棠擇地安插。毋令滋

生事端。其情願留營者。並著文麟等嚴加約束。如不能恪守營規。即行相機辦理。毋稍姑息。將此由五百里各諭令知之。○壬戌。以辭退四川茂州水草坪土巡檢蘇國榮子全春襲職。○癸亥。以內閣學士袁保恆為戶部左侍郎。管三庫事。未到任前。以詹事府詹事周壽昌署理。○轉理藩院右侍郎成林為左侍郎。以都察院左副都御史蘇勒布為理藩院右侍郎。○調鑲紅旗護軍統領棍楚克林沁為鑲黃旗護軍統領。正黃旗蒙古副都統綿宜為正藍旗滿洲副都統。以乾清門侍衛明安為正黃旗蒙古副都統。○調雲南提督馬如龍為湖南提督。四川提督胡中和為雲南提督。湖南提督宋慶為四川提督。○予故戶部左侍郎宋晉祭葬如例。○甲子。以正黃旗蒙古副都統富明為鑲紅旗護軍統領。正白旗漢軍副都統慶陞為鑲白旗護軍統領。○補鑄廣東靈山縣知縣印信。從巡撫張兆棟

請也○予浙江故刑部左侍郎馮景夏入祀鄉賢祠。從巡撫楊昌濬請也。○乙丑諭內閣。予告大學士賈楨持躬端謹。學問優長。受先朝知遇之隆。由翰林入直上書房。游陟正卿。入贊綸扉。疊司文柄。朕御極後。派充

實錄館監修總裁。優加簡畀。倚任方殷。旋以患病屢請開缺。准予致仕。賞食全俸。方冀頤養安和。長承恩眷。茲聞溘逝。悼惜殊深。著賞給陀羅經被。派載濂帶領侍衛十員。卽日前往

奠醊。加恩晉贈太保。照大學士例賜卹。入祀賢良祠。任內一切處分悉予開復。應得卹典該衙門察例具奏。靈柩回籍時。並著沿途地方官妥為照料。伊子道員用河南彰德府知府賈致恩著俟服闋後以道員遇缺卽選。伊孫員外郎銜主事賈孝珍著以郎中分部卽補。用示朕篤念耆臣至意。尋予祭葬。諡文端。○以翰林院侍講黃毓恩司經局洗馬楊紹和。右春坊右中允張鵬翼充日講起居注官。

翰林院編修崔志道署日講起居注官。○丙寅。

孝慈高皇后忌辰遣官祭

福陵。○諭軍機大臣等總理各國事務衙門奏海防亟宜切籌。將緊要應辦事宜撮敘數條。請飭詳議一摺。據奏庚申之釁創鉅痛深。當時姑事羈縻。原期力圖自強。以為禦侮之計。乃至今並無自強之實。本年日本兵踞臺灣。番社雖疊經飭令各疆臣嚴密籌防。自問殊無把握。若再不切實籌備。後患不堪設想等語。沿江沿海各省防務經總理各國事務王大臣並各該省將軍督撫等隨時籌畫。而備禦究未可恃。亟應實力講求。同心籌辦。堅苦貞定。歷久不懈。以紓目前當務之急。以裕國家久遠之圖。該王大臣所陳練兵簡器造船籌餉用人持久各條均係緊要機宜。著李鴻章李宗義沈葆楨都興阿李鶴年李瀚章英翰張兆棟文彬吳元炳裕祿楊昌濬劉坤一。

王凱奏。主文韶詳細籌議。將逐條切實辦法。限於一月內覆奏。此外別有要計。亦卽一併奏陳。總期廣益集思。務臻有濟。不得以空言塞責。原摺單均著鈔給閱看。將此由六百里各密諭知之。○減免兩浙橫浦浦東袁浦青村下砂。下砂二三六場被水地方上年竈課有差。○丁卯諭內閣。都興阿等奏請派員驗收工程。並請擇吉恭請神牌還御一摺。

福陵

隆恩殿工程現已完竣。著欽天監於十月內。敬謹選擇吉期。知照都興阿等屆期恭請神牌還御。此項工程著派繼格驗收。○諭軍機大臣等。喬松年奏黃河險工搶護平穩。請續添款項一摺。本年寒露後。黃河上南等廳疊出險工。業經搶護平穩。惟積欠正雜料價等項銀兩。亟須籌款撥解。以資應用。著錢鼎銘督飭藩司籌措銀二萬五千兩。連前次奉撥

南北兩岸銀九萬兩。一併於年前全數籌撥。毋稍延緩。喬松年於此項解到後。務當嚴飭道廳各員覈實動用。毋稍虛糜。將此由四百里各諭令知之。○河東河道總督喬松年奏報霜汛安瀾。命詣河神廟祀謝。○予河南因公淹歿外委朱得富等祭葬卹廕。

上以孟冬時享

太廟。自是日始齋戒三日。○戊辰

孝敬憲皇后忌辰。遣官祭

奉陵。○諭內閣。前因御史張觀準奏。叅直隸樂亭縣知縣王霖信任門丁差役。勒派差徭各節。當經諭令李鴻章查明具奏。茲據奏稱。王霖被叅家丁沈承榮等。與書吏表裏為奸。一節。係屬失於覺察。尚無信任縱容情事。其張玉相被控等案。該員於訊結後。勸令捐銀均經歸公。尚非罰款可比。所叅聽信差役勒索。並無其事。至承修道段。向係借資民力。該員

照章酌派亦無浮勒變賣官地尚非假公濟私等語。王霖雖無勒派營私重情。惟不能振作。致招物議。著卽勒令休致。其勸捐辦工未經詳報及遽將官地變價。均屬不合。並著交部分別議處。○追予故安徽巡撫李孟羣附祀湖北按察使李卿穀武昌府專祠。○己巳以禱雨靈應。頒山西陽曲縣寶侯廟御書扁額。曰仁周三晉。太原縣聖母廟御書扁額。曰惠普桐封。水母廟

御書扁額。曰功資樂利。○諭內閣前因都興阿奏恭修

永陵

啟運殿。請擇吉移請

神牌還御。當經降旨令欽天監於九月內選擇吉期。茲據都興阿等奏稱前擇吉期實屬趕辦不及。著欽天監於十月內另行擇吉。先期知照。都興阿等敬謹辦理。○諭軍機大臣等。李宗義恩錫奏滙陳近日黃水情形。請派廷

臣會議一摺。江南揚莊以下舊黃河。業經李宗義派員挑濬。並酌做裏頭。以備溜至堵閉。惟近來黃水愈益南趨。李宗義以東省決口不堵。不特江省無從措手。卽東省曹濟各屬齊河利津一帶。亦岌岌不可終日。萬一蘭儀等處再有失事。直隸安徽均恐受害。是目前情形較前數年更形喫緊。亟宜豫行籌策。以期一勞永逸。應如何妥籌辦理之處。著李鴻章、李宗義、文彬、喬松年、錢鼎銘、恩錫悉心籌

畫會議聯銜具奏。請旨辦理。李宗義等原摺著鈔給李鴻章等閱看。將此由四百里諭知李鴻章、李宗義、文彬、喬松年、錢鼎銘。並傳諭恩錫知之。○又諭景廉奏通融籌畫軍糧。請飭額爾慶額一軍前往西湖助剿。並請飭科布多運解米麪。暨西路各營勦匪獲勝各摺片。額爾慶額等軍行抵古城。所需糧石。景廉已妥為籌辦。惟該處產糧無多。該大臣擬令額爾慶額統帶所部前往西湖助剿。卽就該

處採糧而濟古地方稍有餘糧。卽備將來金順各營補苴之用。所籌尚屬周妥。卽著景廉金順飭令額爾慶額一軍。馳赴西湖助勦。並杜回逆西竄之路。前已有旨授景廉為欽差大臣。督辦新疆軍務。所有各軍。自應統歸景廉節制。該大臣此次奏報。自是尚未奉到諭旨。西路軍情。旦夕變遷。應如何調遣之處。均著相度機宜。妥為調派。如有不遵調遣者。卽著據實嚴叅。毋稍遷就。科布多存儲米麵至五十餘萬斤之多。何以一年有餘。顆粒未運。日久存積。朽蠹堪虞。現在西進大軍。陸續行抵古城。需糧正亟。著托倫布保英速行雇覓駝隻。源源運解古城。卽以幫臺銀兩酌量發給價值。以期無誤軍食。直隸口北道奎斌前任歸綏道國英採辦軍糧。尚屬出力。均著交部從優議敘。徐學功一軍。疊次勦匪獲勝。擒斬賊匪多名。並將回逆糧臺攻破。尚屬奮勇。所有尤為出力及陣亡各員。准由景廉查明

奏請獎卹。將此由五百里各諭令知之。○以烏珠穆沁貝勒達克丹為理藩院額外侍郎。

大清穆宗繼天開運受中居正保大定功聖智誠孝信敏恭寬毅皇帝實錄卷之三百七十一

大清穆宗繼天開運受中居正保大定功聖智
誠孝信敏恭寬毅皇帝實錄卷之三百七十二

臣等謹將本年十月十五日奉 上諭 著 禮部 知道欽此

臣等謹將本年十月十五日奉 上諭 著 禮部 知道欽此

臣等謹將本年十月十五日奉 上諭 著 禮部 知道欽此

臣等謹將本年十月十五日奉 上諭 著 禮部 知道欽此

臣等謹將本年十月十五日奉 上諭 著 禮部 知道欽此

敕修

同治十三年甲戌冬十月庚午朔享

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢○

上詣鍾粹宮問

慈安端裕康頤皇太后安長春宮問

慈禧端佑康頤皇太后安至戊戌皆如之○奉

慈安端裕康慶皇太后

慈禧端佑康頤皇太后幸漱芳齋侍午膳○頒

同治十四年時憲書○辛未試中式武舉黃

兆晉等一百三十五人於太和殿前○諭內

閣本年十月初十日恭遇

慈禧端佑康頤皇太后四旬萬壽慶洽敷天因

思京外實任文武一二品大員老親有年屆八十以上者康彊逢吉祿養承恩洵為盛世嘉祥允宜特加賞賚著吏部兵部八旗都統卽行查明分別咨報軍機處開單呈覽候旨施恩○又諭已革提督劉銘傳著加恩開復原官○又諭左宗棠奏特參專閫大員請旨革職一摺陝西陝安鎮總兵魏添應於上年十月會哨時禁止支應嗣干總周國瑞因知仍不能免稟知遊擊徐昌壽出示免操節省操餉以供哨差乃該總兵既受供應反責周國瑞等不應出示免操且將免操改為停操陷以重罪實屬鄙詐不職魏添應著卽行革職○又諭左宗棠奏特參鄙謬之署遊擊請旨革職一摺前署靖逆營遊擊補用參將吳錫康在署遊擊任內濫索民間供應擅責鄉民實屬鄙謬吳錫康著卽革職勒令回籍不准投效軍營以昭儆戒○以記名總兵官余虎恩為陝西陝安鎮總兵官○壬申

上詣

大高殿

時應宮拈香○御紫光閣閱中式武舉馬步射○諭軍機大臣等志和奏奉省庫款支絀請嚴催各省欠餉一摺據稱各省應解奉省本年俸餉及同治十年十一十二等年所撥專餉除山東河南報解各數外直隸欠解二萬四十兩零長蘆欠解七萬兩兩淮欠解銀四萬兩山東欠解俸餉銀二萬五千兩專餉銀七萬五千兩河南欠解俸餉銀六萬四千餘兩又專餉銀八萬兩均未報解請飭嚴催等語奉省需餉甚亟各該省自應力籌解濟著李鴻章李宗義文彬錢鼎銘督飭藩運各司迅速籌解務於本年十一月內趕緊解赴奉省以濟要需將此由五百里各諭令知之○閩浙總督李鶴年奏報行抵泉廈日期並查勘海口情形得旨著卽馳回省城與文煜王凱泰將應辦事宜妥為經理○癸酉

上御箭亭。閱中式武舉技勇。○御乾清宮。引見

中式武舉。親定甲乙。○甲戌

上御太和殿傳臚。賜一甲張鳳鳴。趙瑞。雲。劉雲

會。三人武進士及第二甲黃兆晉等十七人

武進士出身。三甲吉生等一百十五人同武

進士出身。○丙子

上率近支親藩詣

慈宣門內恭迎

慈禧端佑康頤皇太后御慈宣宮。陞座侍宴。

上捧觴上

壽。綵衣躬舞。王貝勒貝子公等以次進舞。禮成。

奉

慈安端裕康慶皇太后

慈禧端佑康頤皇太后幸漱芳齋。侍午膳。○賜

近支親藩等食。○丁丑

上奉

慈安端裕康慶皇太后

慈禧端佑康頤皇太后幸宣壽宮。侍午膳。○賜

近支親藩等食。○以

慈禧端佑康頤皇太后四旬聖壽。錫類推恩。賞

大學士直隸總督李鴻章。湖廣總督李瀚章

母李氏

御書扁額曰松筠益壽。軍機大臣工部尚書李

鴻藻母姚氏

御書扁額曰蘭陔春永。輔國將軍載驚父子告

內大臣奕山

御書扁額曰三朝耆碩。吏部尚書毛昶熙母姜

氏

御書扁額曰絳幔延暉。刑部左侍郎恩承母許

氏

御書扁額曰金萱介祉。鑲黃旗蒙古副都統成

明母葉和那拉氏

御書扁額曰慶集魚軒。鑲黃旗蒙古副都統尚

宗瑞母祖氏

御書扁額曰彤管凝祥。廣東碭石鎮總兵官李

揚陞母鄧氏

御書扁額曰北堂愛日並賞

御書福壽字暨文綺珍玩有差○戊寅

上奉

慈安端裕康慶皇太后

慈禧端佑康頤皇太后幸寧壽宮侍午膳○賜

王以下文武大臣蒙古王貝勒貝子額駙等

食○己卯

慈禧端佑康頤皇太后四旬聖壽節遣官祭

太廟後殿

奉先殿○

上率王以下文武大臣蒙古王貝勒貝子額駙

等詣

慈寧門行慶賀禮眾官於午門外行禮○詣長

春宮

慈禧端佑康頤皇太后前侍早膳○奉

慈安端裕康慶皇太后

慈禧端佑康頤皇太后幸寧壽宮侍午膳○賜

王以下文武大臣蒙古王貝勒貝子額駙等

食○諭內閣本年恭逢

慈禧端佑康頤皇太后四旬萬壽普天同慶所

有隨班祝

嘏之革職等員及耆民等自應量予恩施前馬

蘭鎮總兵慶錫前太僕寺卿焦祐瀛前光祿

寺少卿程恭壽前國子監司業馬壽金前三

等侍衛湯泰慶祥前刑部郎中候選知府慶

綱前吏部左侍郎匡源前鑲黃旗漢軍副都

統科布多參贊大臣署烏里雅蘇台將軍長

順前翰林院侍講學士現六品頂帶晉康前

記名副都統二品頂帶圓明園營總文惠前

六品官恆裕前頭等侍衛科布多幫辦大臣

文碩前陝西升用知府候選同知慶祺前盛

京刑部郎中鍾霖前步軍校德山前升用知

州湖南城步縣知縣盛鑑源前甘肅甯夏理

事同知德貴以上革職休致等員五品以上

者均著照原官降二等賞給職銜六品以下

者均著賞還原銜其已有職銜者著加一級

隨同叩祝之耆民等應如何賞賚之處著該衙門查照成案辦理○又諭本年恭逢

慈禧端佑康頤皇太后四旬萬壽普天同慶所有王公及京外文武官員現在議降議罰及以前有革職留任及降級罰俸之案著加恩悉予豁免○又諭廣科著以都統遇缺提奏照祥著挑御前侍衛桂祥佛佑均著賞給侍衛挑乾清門當差○庚辰

上奉

慈禧端裕康慶皇太后

慈禧端佑康頤皇太后幸寧壽宮侍午膳○賜王以下文武大臣蒙古王貝勒貝子額駙等食○諭內閣郡王銜貝勒載治之第四子著命名溥倫○又諭張兆棟文銓奏沿海地面遭風情形一摺本年八月間廣東香山新安二縣屬沿海地面猝遭颶風汲水門等處釐稅房屋多被吹坍巡緝輪船亦有損傷並淹斃營委各員及兵役多人覽奏實深廬繫著

張兆棟等即將被災地方查明妥為撫恤毋任一夫失所○予廣東香山等處淹歿參將陳步雲都司梁遇春雲騎尉饒錫祺守備沈錫章千總卓增元把總梁榮高巡檢恩齡等祭葬卹廕○辛巳

上奉

慈禧端裕康慶皇太后

慈禧端佑康頤皇太后幸寧壽宮侍午膳○壬午

上奉

慈禧端裕康慶皇太后

慈禧端佑康頤皇太后幸寧壽宮侍午膳○賞五城貧民棉衣銀○甲申

上奉

慈禧端裕康慶皇太后

慈禧端佑康頤皇太后幸漱芳齋侍午膳○諭軍機大臣等左宗棠奏辦理出關諸軍餉數及糧運情形並請飭晉省按解張曜一軍駝

乾銀兩暨請賞給該軍皮衣銀兩各摺片出
關各軍餉項業經張曜宋慶報明數目張曜
一軍糧運經費所請作正開銷該軍出關後
轉運軍火等項應添銀兩及宋慶一軍添撥
駝料夫糧款項即著左宗棠酌度情形妥為
辦理金順擬於九月內親帶馬步四營赴巴
里坤餘仍屯駐肅州安西該軍糧料已由左
宗棠發過一千二百萬斤現在古城糧料價
值每石三百餘斤由景廉定作四兩三錢已
為金順訂買二萬餘石是金順全軍足供數
月之食而關內齋糧前往計程愈遠運費愈
繁左宗棠所陳糧運勞費自屬實在情形巴
古一帶既有糧石可採價值不至過昂可省
運費二十餘倍之多自不必由關內採運以
省浮費即著左宗棠景廉金順妥為籌商總
期軍食有裨不可舍易圖難更不得意存推
諉至金順一軍餉糧每月實需若干即由該
幫辦大臣覈實奏明辦理張曜一軍每月駝

乾銀五千兩向由晉省撥發刻下軍行較遠
提解為難著鮑源深即將此項銀兩按月解
至西征糧臺以便轉解應用該軍皮衣銀兩
即著左宗棠撥款賞給將此由五百里各諭
令知之○以湖南湘潭等處歷年勦辦會匪
出力賞提督李鎮朝總兵官謝晉鈞李前福
一品封典知州俞植守備王啟迪等花翎千
總田生蕙等藍翎餘加銜升敘有差○乙酉
諭內閣巡視北城給事中春慶等奏拏獲多
年在逃逆犯請交部審辦一摺已革署參將
張兆綬係因通匪奉旨正法之員膽敢逃匿
提督馬如龍門下改名張瑞臣潛行來京實
屬不法已極現經北城拏獲供認不諱著即
交刑部嚴行審訊按律懲辦湖南提督馬如
龍著先行解任聽候傳質○以正黃旗蒙古
副都統明安兼署正藍旗漢軍副都統○丙
戌諭軍機大臣等禮部奏朝鮮國貢使被劫
據咨轉奏一摺朝鮮國貢使回國行至鳳凰

城邊門以外竟有匪類結夥持械搶奪行裝實屬不成事體亟應嚴密查拏著都興阿志和恭鏜派委員弁前赴邊門以外迅即緝拏懲辦毋任遠颺嗣後朝鮮貢使過境應如何妥為防護並邊外如何設法整頓毋使奸徒滋蔓之處並著都興阿等體察情形悉心妥議奏明辦理以清貢路而靖邊圉將此諭知禮部並由四百里各諭令知之○以正紅旗滿洲副都統托雲兼署正白旗蒙古副都統

○命睿親王德長帶領侍衛十員往奠故莊親王奕仁茶酒予祭葬諡曰厚○丁亥諭軍機大臣等都興阿等奏奉省添練馬隊餘兵待餉孔殷請飭催迅速撥解一摺前因都興阿等奏添練馬隊請撥餉銀經戶部奏准由山東地丁項下撥銀四萬兩江西地丁項下撥銀二萬兩江蘇釐金項下撥銀四萬兩江海關六成洋稅項下撥銀二萬兩山東業經解到銀一萬兩江西籌撥銀一萬兩尚未解

到其餘各省均未報解現在奉省辦理操防需餉甚殷亟應速籌接濟著李宗義吳元炳劉坤一、文彬各將奉撥銀兩如數籌備迅速派員解赴奉省務於年前解到以濟急需將此由四百里各諭令知之○以太常寺卿岐元為內閣學士兼禮部侍郎銜翰林院侍讀學士奎潤為詹事府詹事○賞順天通州王恕園等處煮賑粟米六百石○戊子諭內閣榮祿奏請開總管內務府大臣差使一摺榮

祿辦事尚屬勤慎著毋庸開去總管內務府大臣差使○諭軍機大臣等本日李鶴年奏叅藩司不能稱職一摺據稱福建布政使潘霽由捐納佐雜出身心術陰柔人品卑瑣差委員缺多係捐班人員以致物議沸騰編造歌謠黏貼街市且有袒護同鄉結為朋黨及與將軍拜認師生各情近日辦理日本事宜卑詞下氣求悅夷人大失國體等語該藩司現在臺灣其辦理一切事宜以及平日居官

行事沈葆楨知之必稔卽著按照李鶴年所
參各節秉公詳悉查明迅速據實具奏毋稍
徇隱原摺著鈔給閱看將此由四百里密諭
知之○兼署湖北巡撫李瀚章奏湖北折徵
漕糧驟難改徵本色擬酌提漕折採買米三
萬石由海運至津兌通以實倉儲下部知之
○陝西巡撫邵亨豫奏請將丁憂道員黃鼎
留營辦理防務允之○蠲緩直隸雄高陽任
邱定寶坻薊霸安河閒元城大名豐潤安平
通三河武清香河保定文安大城永清深樂
亭清苑安肅新城蠡獻肅甯天津靜海滄南
皮鹽山慶雲無極棗城清河玉田饒陽深澤
固安青沙河雞澤四十五州縣被水被旱被
雹地方本年額賦租課暨民借倉穀有差
蠲緩直隸閩東明長垣三州縣被水地方本
年額賦有差並減免差徭○己丑以
慈禧端佑康頤皇太后四旬聖壽錫類推恩賞
戶部左侍郎袁保恆祖母郭氏

御書扁額曰期頤錫義盛京副都統清凱母馬
佳氏

御書扁額曰西池錫嘏庫爾喀喇烏蘇領隊大
臣孝順父法什尚阿

御書扁額曰氣稟芝椿並賞文綺珍玩○諭內
閣明善奏請開總管內務府大臣差使一摺
明善辦事有年尚為熟練著毋庸開去內務
府大臣差使○定新設甘肅固原直隸州知
州為衝繁難要缺海城縣知縣為繁疲難要

缺平遠縣知縣為繁難中缺固原州判海
城縣縣丞均為要缺平遠海城二縣訓導典
史同心城巡檢均為簡缺從總督左宗棠請
也○以福建晉江會拏逆首楊輔清出力賞
安徽總兵官馬融和提督銜守備張榮等花
翎餘升敘有差○命正黃旗漢軍都統安興
阿鑲藍旗蒙古都統察杭阿工部左侍郎何
廷謙內閣學士祥泰在紫禁城騎馬○旌表
夫亡殉節安徽候補知府謝希遷妾操氏○

庚寅諭軍機大臣等戶部奏出關各軍餉項暨新疆各城軍餉請統歸西征糧臺經理一摺現在大軍出關相機進取前經降旨派左宗棠督辦糧餉轉運一切事宜並令袁保恆幫辦所有出關各軍應需糧餉運費等項自應統歸左宗棠袁保恆斟酌緩急奏請籌撥至新疆軍餉近年各城請撥頭緒紛繁殊不足以昭覈實亦應由左宗棠等一併經理嗣後出關各軍暨新疆各城請撥餉需均由該

統兵各員及各城大臣咨照左宗棠袁保恆覈明數目酌量奏撥不得紛紛自行奏請以歸畫一而專責成即著左宗棠景廉金順袁保恆咨照該統兵各員及各城大臣一體遵照辦理左宗棠袁保恆務當通盤規畫酌盈劑虛覈實籌撥毋任稍有匱乏原摺均著鈔給閱看將此由五百里各諭令知之○辛卯以神靈顯應加山東鄆城縣河馬村栗大王封號曰誠孚○以記名總兵官唐瑞廷為湖

南鎮軍鎮總兵官○補鑄福建甯化縣儒學條記從巡撫王凱奏請也○壬辰諭軍機大臣等沈葆楨等奏臺灣近日情形並淮軍到臺一摺日本兵船尚未退出臺灣刻下退兵章程業經定議惟此後海防各事宜亟須認真講求以期有備無患現在淮軍三起均抵澎湖應如何分紮要隘之處仍著沈葆楨等酌度情形妥為布置其南北開路以及郡城修築礮壘各事並著該大臣等悉心經理毋

得以日本事已辨結稍形鬆勁刺桐腳莊民已與龜紋社釋嫌尋好琅瑤諸社均受約束其餘亟須次第清查惟入山愈深番社愈難北路復有生番撲犯碉樓傷斃兵丁之事亟應妥為籌辦俾番眾悉為我用藉可自固藩籬著沈葆楨文煜李鶴年王凱泰潘蔚飭令派出各員設法招徠隨時撫恤招墾事宜仍須商同羅大春認真籌畫臺郡城工業已過半安平礮臺現擬設於三鯤身地方一切工

程沈葆楨等務當悉心經畫毋得畏難思阻

將此由五百里密諭沈葆楨文煜李鶴年王

凱泰並傳諭潘霽知之○兵部議覆浙閩總

督李鶴年奏請於福建陸路各營內挑練精

兵五千四百四十八名分為十二營以各本

提鎮為統領各鎮仍歸提督節制以督標中

軍副將為營務處飭令擇要駐紮練習行陣

以申戎備應如所奏辦理從之○山西巡撫

鮑源深奏請將丁憂提督張樹屏留省辦理

冬防允之○以記名提督黃秉鈞為山西太

原鎮總兵官○賞八旗暨步軍營綠營兵丁

一月錢糧○予積勞病故山西太原鎮總兵

官王巨孝祭葬卹廕○癸巳命都察院左都

御史廣壽兵部右侍郎夏同善馳往陝西查

辦事件○以雲南克復順甯等城暨擒斬逆

首馬德新出力賞總兵官岑有富雷應山一

品封典參將馬治堂唐發榮戴運明王瑞段

時行王功甲黃金林遊擊胡占鼇王浩能都

司王珍王貴巴圖魯名號知府林桂清副將

樊鍾溢等花翎通判鍾澧等藍翎餘加銜升

敘有差○追予雲南景東殉難署同知鄭自

耀署遊擊特通阿合建專祠○乙未諭內閣

都察院奏同官呈控債務兼有需索侵吞情

弊請旨交部訊辦一摺據稱都察院筆帖式

武英呈控署都事德全曾向該筆帖式兩次

借用銀兩嗣經武英討問該署都事聲稱盡

為武英前次補缺請假之用反屢次索取規

費將應分飯銀扣除不給等情經廣壽等傳

訊兩造各執一詞亟應徹底根究署都事德

全著交刑部訊辦筆帖式武著著聽候傳質

○又諭王文韶奏請將身家不清之道員革

職等語記名道唐繩武向充原任乾州廳同

知俞受欽長隨輒敢投效軍營蒙混賞緣歷

保至記名道且其平日遇事招搖欺詐百出

亟應嚴行懲辦唐繩武著即行革職仍照律

杖一百交地方官嚴行管束以肅官常○丁

酉諭軍機大臣等大學士文祥奏敬陳管見一摺臺灣之事現雖權宜辦結而後患在在堪虞日本與閩浙一葦可枕倭人習慣食言難保不再生枝節前因議買鐵甲船及水礮臺各節倉卒莫辦措手無從不得不為暫緩目前之計刻下事機已緩亟宜趕緊籌畫以期未雨綢繆豈可仍蹈因循故習著沈葆楨文煜李鶴年王凱泰潘蔚悉心籌商所有在臺兵勇應如何酌留淮軍素稱得力現在業

已到臺應如何分紮防堵全臺事宜應如何布置該大臣等務當妥為經畫以善將來並著李鴻章李宗義將前議購買未成之鐵甲船水礮臺及應用軍械等件迅速籌款購辦無論如何為難務須妥為設法庶幾兵械精良有備無患原摺均著鈔給閱看將此由六百里密諭李鴻章李宗義沈葆楨文煜李鶴年王凱泰並傳諭潘蔚知之○己亥

上不豫仍治事如常命軍機大臣李鴻藻恭代

批答章奏○諭軍機大臣等都興阿等奏勦辦金州逸犯情形一摺逸犯高希田潛回夾心子地方經營總奎山等帶隊往捕該犯膽敢勾結匪黨聚眾抗拒我兵奮勇衝擊斃匪多名高希田向北逃竄其餘匪黨竄由貌口街市歸併高希田圍寨亟應迅速捕拏以靖地方著都興阿等飭令派出隊伍馳赴金州貌口會合各軍協力兜擒相機辦理總期淨絕根株毋任蔓延為患其沿海各口岸並著

都興阿等嚴密防範以杜竄越將此由四百里各諭令知之○以前任宗人府府丞朱學勤為大理寺卿○賞故輔國將軍謙榮母黃佳氏鎮國將軍半倬○補鑄廣西新甯州知州懷集縣儒學各印信條記從巡撫劉長佑請也

大清穆宗繼天開運受中居正保大定功聖智
誠孝信敏恭寬毅皇帝實錄卷之三百七十二

實錄卷之三百七十二

七

大清穆宗繼天開運受中居正保大定功聖智
誠孝信敏恭寬毅皇帝實錄卷之三百七十三

秋修

同治十三年甲戌十一月庚子朔諭內閣劉

坤一奏特參交代虧短並赴藩司衙門喧鬧
之知縣請旨革職拏問一摺。江西署臨川縣
事補用同知直隸州知州李士榮在署臨川
縣任內虧短正雜款項至五千餘兩之多並
不趕緊清理輒敢潛回省城赴藩司衙門喧
鬧實屬膽大妄為玩法已極李士榮著即革
職拏問交劉坤一提同丁胥人等嚴行訊究
按律懲辦○兵部議覆兩江總督李宗義奏
酌擬新設皖南鎮標營制事宜一改甯國營

為鎮標左營。以原設參將與蕪采營遊擊對調。一添設鎮標右營都司守備各一員。一改設荻港汛外委一員。一撥遊兵營荻港千總一員。銅陵采石汛把總二員。歸皖南鎮標右營管轄。以上四條均應如所請辦理。從之。○壬寅予四川會理等處陣亡殉難紳團田履中等暨婦女一千二百三十九名口分別旌卹如例。○旌表夫亡殉節雲南昆明縣廩生趙元熙妻羅氏。夫亡守志四川州吏目錢拱

妻查氏。○甲辰遣官祭

先醫之神。○以神靈默佑。頒浙江海甯州

海神廟

御書扁額曰鯤壑鏡澄。仁和縣

潮神廟

御書扁額曰龕楮安流。○諭軍機大臣等英廉奏臺站供支需款請飭催迅解餉銀一摺。據稱大同官兵陸續西進塔城牲畜疲乏難以供支。現令土爾扈特所安臺站暫為應付前

進仍須添買駝隻以備接濟。請將部撥餉銀迅催趕解等語。著順天府即行派委妥員赴部承領前撥塔爾巴哈台餉銀二十萬兩。設法迅速解交英廉驗收應用。至察哈爾佐領人丁業已移回塔城即著照所請賞給該官兵三箇月俸餉以示優恤。由英廉於部餉解到覈實散放。將此諭知順天府並由四百里諭令英廉知之。○惇親王等議奏

聖躬正宜調攝。每日批摺仍遵前旨暫由李鴻

藻敬繕批答清字摺件並暫由奕訢等敬繕從之。○丙午諭軍機大臣等袁保恆奏部撥庫款不敷需用請飭速籌指撥一摺。前據袁保恆奏統籌出關轉運全局請由部庫撥發現銀二百萬兩經總理各國事務衙門戶部會議在於四成洋稅項下撥給銀一百萬兩並於此項內劃撥金順銀二十萬兩嗣據左宗棠奏請借洋款三百萬兩復經該衙門議准並請將前撥之八十萬兩無庸發給。茲據

袁保恆奏稱現在採辦贏駝糧料等項需款刻不可緩稍一耽延致誤戎機糜餉更鉅前撥庫款實在不敷請再飭撥銀一百二十萬兩等語該侍郎自係尚未接到停發庫款部文所陳出關糧運難以停待尚屬實在情形所有前停撥庫款銀八十萬兩仍著戶部如數發給並著該部於各省各海關指撥的餉銀一百二十萬兩務令迅速照解不得稍有短缺延誤左宗棠袁保恆務當寬籌糧運源源接濟俾各軍士飽馬騰得以一舉埽蕩另摺奏各省撥解協餉請飭部明定章程將照數全解者優給獎勵短解者視所短成數為藩司監督處分等差等語著戶部議奏另片奏請飭綏遠城察哈爾購買駝隻即著定安慶春飭令所屬蒙古各旗剋期代購健駝共足四千隻之數所需價銀由袁保恆撥交喜勝照數給發所購駝隻由喜勝點驗分起派員解臺每起由該將軍都統加派蒙古官一

員兵二名隨同照料所有綏遠城駝稅著一併免收將此諭知戶部並由五百里諭令左宗棠袁保恆定安慶春知之○丁未補鑄兩江督標左營遊擊關防從總督李宗義請也○追予江蘇上元江甯兩縣殉難八品職銜趙俊等紳民婦女三百三十九員名口分別旌卹如例○己酉諭內閣朕於本月遇有天花之喜經惇親王等合詞籲懇靜心調攝朕思萬幾至重何敢稍耽安逸惟朕躬現在尚難耐勞自應俯從所請但恐諸事無所稟承深虞曠誤再三籲懇兩宮皇太后俯念朕躬正資調養所有內外各衙門陳奏事件呈請披覽裁定仰荷慈懷曲體俯允權宜辦理朕心實深感幸將此通諭中外知之○命協辦大學士兵部尚書寶鋆為大學士○以大理寺卿惠林為都察院左副都御史○予貴州各屬殉難鹽知事

張應升等紳民婦女二千一百六員名口分別旌卹如例。○撥神機營洋槍鉛箭十萬出銅帽二十萬粒。硬弓二百張。箭一萬枝。工部火藥一萬斤。鉛九十四萬出。轟藥二百斤。火繩六千丈。解交署伊犁將軍榮全軍營備用。○庚戌諭軍機大臣等。景廉奏籌畫邊疆軍務機宜。請由甘肅遷移戶民分居奇古等處。各摺片。回逆分踞烏屬各城。相為犄角。逆燄甚張。景廉擬分路進兵。會同金順由古城直

取古牧地為一路。張曜由天山南直取吐魯番為一路。並添派大員赴沙山。會合沙克都林扎布錫綸等直取馬納斯為一路。即著景廉金順隨時籌畫。激勵將士。妥速進剿。力掃賊氛。毋得稍事延緩。關外糧餉轉運事宜。前已有旨。派左宗棠督辦。並令袁保恆幫辦。移紮肅州。疊據左宗棠袁保恆奏請撥餉銀。並籌糧運各事。左宗棠景廉金順袁保恆同辦一事。即著隨事會商。妥籌辦理。景廉所請飭

令戶部撥給庫銀六十萬兩。並嚴催各省欠餉等語。著戶部議奏。景廉派員赴烏里雅蘇台等處探辦駝隻。著理藩院知照管轄內外盟蒙古將軍大臣。傳知蒙古王公。轉飭各愛曼隨時出售。按市價官為採買。毋許委員稍有抑勒。西路奇古等處居民稀少。田地半屬荒蕪。景廉請仿照成案。由甘肅各州縣遷移民人一千戶。分居奇古等處。以實邊地。此項遷移戶民。由官發給盤費車腳牛具籽種。趕

於明春到古。俾得盡力耕作。以贍軍糧。著左宗棠體察情形。酌籌妥辦。將此諭知戶部。理藩院。並由五百里諭令左宗棠景廉金順袁保恆知之。○湖南巡撫王文韶奏湖南折徵漕糧驟難復完。本色擬酌提漕折採買米二萬石。由海運至津。兌通以實倉儲。下部知之。○命大學士寶鋆管吏部事。○以都察院左都御史廣壽為兵部尚書。吏部左侍郎魁齡為都察院左都御史。調刑部左侍郎恩承為

吏部左侍郎。以內閣學士紹祺為刑部左侍郎。

上以冬至祀

天於

圜丘。自是日始齋戒三日。○辛亥調鑲紅旗漢軍副都統崇厚為正白旗滿洲副都統。以內閣學士德椿兼鑲紅旗漢軍副都統。○予太醫院左院判李德立以三四品京堂候補。右院判莊守和以四五品京堂候補。○壬子。

聖祖仁皇帝忌辰遣官祭

景陵。○諭內閣奉天府丞張緒楷奏參通判擅責生員一摺。署金州廳同知候補通判宜崇額於賊匪滋擾轄境。聞警送眷赴省。輒因傳喚武生蔡聖書等護送家眷到遲。即將該生等擅行杖責收禁。實屬謬妄。著志和恭鏜卽行查明據實奏參懲辦。○諭軍機大臣等。沈葆楨等奏日本遵約退兵。收回草房營地一摺。日本兵船盡數退出臺灣。其遺下營房草

房板片均經點收完竣。該處已派官軍填紮。惟琅瑤一帶善後機宜亟須悉心籌畫妥善。經營所有招撫生番及修城開路各事宜。仍當妥籌辦理。毋得以倭兵已退卽形鬆懈。著沈葆楨文煜李鶴年王凱泰潘蔚懍遵十月二十八日諭旨妥為布置。毋稍因循。倭人詭譎性成。此次退兵。原不可恃。沈葆楨等惟當於此時力圖自強之策。以期未雨綢繆。庶幾有備無患。另片奏道員黎兆棠因病回籍等語。該員現經簡放津海關道。卽著沈葆楨傳知黎兆棠病痊後迅速赴任。以重職守。將此由五百里密諭沈葆楨文煜李鶴年王凱泰並傳諭潘蔚知。之。○癸丑冬至祀

天於

圜丘。遣醇親王奕譞恭代行禮。○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢○停次日朝賀○諭軍機

大臣等前因丁寶楨奏石莊戶決口奪溜南

趨亟應堵築請飭撥款一摺當經諭令該部

速議具奏茲據戶部工部會議奏稱石莊戶

決口關係東南兩省大局自應趕籌修築所

需工款除上年存銀二十八萬兩外擬撥各

省地丁等銀七十萬兩以資應用等語現在

經費支絀該部以有上年存款可以動用合

之此次撥款幾及百萬當可興工舉辦惟據

該撫所奏決口情形亟宜及時趕辦設因款

項不繼致有停待貽誤非輕著戶部仍照該

撫原請一百五十萬兩之數即行指撥有著

之款趕緊撥解毋誤要需並著丁寶楨即將

應築隄壩及挑挖引河各工勘明地勢迅速

妥辦毋再坐失事機仍督飭承辦各員實心

經理剔除積弊務使款歸實用不准稍有虛

糜喬松年亦當和衷商酌通籌辦理以裨大

局將此諭知戶部並由五百里諭令喬松年

丁寶楨知之○又諭左宗棠奏籌畫移設糧

臺辦理採糧轉運事宜暨請開除屯田經費

各摺片肅州設立西征糧臺既據左宗棠奏

稱南北相距甚遙辦理均形窒礙刻下北路

轉運不患無駝採辦亦易自無庸膠柱鼓瑟

惟現在烏科兩城實存糧石究有若干每年

所產糧石若干。留備各該城兵食若干。以及轉運駝隻能否購辦。足敷應用。著額勒和布、杜嘎爾多布沁扎木楚托倫布保英詳悉確查。迅速具奏。糧臺之設。必與軍行道路相宜。左宗棠所奏於烏里雅蘇台科布多巴里坤地方。擇一要處移臺駐紮。並擇兩處設立分臺之處。卽著與袁保恆妥商辦理。袁保恆與左宗棠同辦一事。務當和衷商榷。毋得各存意見。致誤事機。景廉金順統領大軍西進。總期糧食源源接濟。俾利師行。並著隨時與左宗棠袁保恆妥切函商。以重軍食。屯政雖與行軍相宜。惟今昔情形不同。目前尚難舉辦。著與袁保恆悉心商酌。總期事有實濟。餉不虛糜。餘著照左宗棠所擬辦理。左宗棠原摺片著鈔給袁保恆閱看。原摺著鈔給景廉等閱看。將此由六百里各諭令知之。○緩徵安徽泗靈璧渦陽鳳陽霍邱盱眙鳳臺天長定遠壽懷遠滁無為合肥五河全椒來安潁上。

廬江亳和宿潛山當塗含山巢蕪湖繁昌銅

陵貴池宿松東流阜陽懷甯涇建德六安廣

德宣城南陵石埭望江太湖舒城青陽太和

蒙城桐城太平旌德甯國歙績溪建平五十

四州縣被水被旱被風被蟲地方新舊額賦

暨各項租課有差。○甲寅諭內閣朕於本月

遇有天花之喜仰蒙

慈安端裕康慶皇太后

慈禧端佑康頤皇太后調護朕躬無微不至並

荷

慈懷曲體俯允將內外各衙門章奏

代為披覽裁定朕心實深欣感允宜崇上兩宮

皇太后徽號以冀仰答

鴻慈於萬一所有一切應行典禮著該衙門敬

謹辦理。○又諭朕奉

慈安端裕康慶皇太后

慈禧端佑康頤皇太后懿旨慧妃著封為皇貴

妃瑜嬪著封為瑜妃珣嬪著封為珣妃貴人

西林覺羅氏著封為瑨嬪○又諭朕奉

慈安端裕康慶皇太后

慈禧端佑康頤皇太后懿旨皇帝於本月遇有

天花之喜仰賴

蒼穹默佑諸臻康吉中外同歡允宜普沛恩綸

優加賞賚內廷行走惇親王奕訢著賞食親

王雙俸恭親王奕訢前經賞食親王雙俸著

再賞加親王俸一分醇親王奕譞著賞食親

王雙俸孚郡王奕譔惠郡王奕詳均著賞食

親王俸郡王銜貝勒載治載澂均著賞食郡

王俸貝子銜奉恩鎮國公奕謨著賞食貝子

俸御前大臣科爾沁博多勒噶台親王伯彥

訥謨祜著賞食蒙古親王雙俸郡王銜貝勒

奕劻著賞食郡王俸固倫額駙公景壽著賞

食貝子俸御前行走貝勒載漪貝勒載瀅均

著賞食郡王俸御前行走奉恩輔國公載灃

著賞食奉恩鎮國公俸頭品頂帶著賞

食輔國公俸御前行走貝勒那爾蘇著賞食

蒙古郡王俸軍機大臣大學士文祥寶鋆尚

書沈桂芬李鴻藻均著賞戴雙眼花翎總管

內務府大臣尚書英桂崇綸左都御史魁齡

均著賞戴雙眼花翎侍郎榮祿著賞加太子

少保銜並賞戴雙眼花翎太子少保銜侍郎

明善著賞加太子太保銜並賞戴雙眼花翎

貴寶文錫均著賞戴雙眼花翎弘德殿行走

尚書廣壽侍郎徐桐候補內閣學士翁同龢

均著賞戴花翎翰林院侍講王慶祺著賞加

二品頂帶南書房行走侍郎黃鈺著賞戴花

翎候補三品京堂潘祖蔭著以侍郎候補翰

林院侍講學士孫詒經詹事府左庶子徐卨

翰林院侍講張家驥詹事府左贊善歐陽保

極均著以應升之缺儘先升用所有王公及

京外大小官員均著賞加二級京師八旗及

綠步各營兵丁均著賞給半月錢糧用示行

慶推恩至意○又諭朕奉

慈安端裕康慶皇太后

慈禧端佑康頤皇太后懿旨皇帝於本月遇有

天花之喜仰賴

蒼穹默佑諸臻康吉寅感實深因念欽恤庶獄

仁政所先允宜特沛恩施量加矜恤所有刑

部及各省已經結案監禁人犯除情罪重大

及常赦所不原者毋庸查辦外其餘著軍機

大臣會同刑部酌量案情輕重分別請旨減

等發落其軍流徒杖以下人犯一併分晰減

等完結俾霑寬大之恩勉圖自新之路用示

子惠兆民法外施仁至意○予江蘇高郵因

公淹歿從九品楊葆炎祭葬卹廕○予故右

春坊右中允馮桂芬於江蘇吳縣原籍建立

專祠○旌表夫亡守志湖北江夏縣文童康

純儒妻李氏○乙卯諭內閣朕奉

慈安端裕康慶皇太后

慈禧端佑康頤皇太后懿旨

彤妃等位侍奉

宣宗成皇帝多歷年所允宜加崇位號以表尊

榮

彤妃晉封為

彤貴妃

佳妃晉封為

佳貴妃

成妃晉封為

成貴妃

貴人蔡佳氏晉封為

恆嬪

貴人尚佳氏晉封為

豫嬪○又諭朕奉

慈安端裕康慶皇太后

慈禧端佑康頤皇太后懿旨麗皇貴妃等位侍

奉

文宗顯皇帝均稱淑慎麗皇貴妃著封為麗皇

貴太妃婉妃著封為婉貴妃祺妃著封為祺

貴妃玟妃著封為玟貴妃璫嬪著封為璫妃

吉嬪著封為吉妃禧嬪著封為禧妃慶嬪著

封為慶妃○又諭御史英震等奏宗室開設煙館並糾聚多人肆鬧請交該衙門審辦一摺鑲白旗宗室祥能即祥齡住居北城地面大外廊營煙館經御史劉國光查問該宗室肆行咆哮該御史等訪聞該處煙館即係祥能所設並聚有假冒宗室之岳三即岳湘韓瑞兒賊張九等數十人結夥訛詐至鳳魁於祥能滋事後仍在煙館居住顯係教誘該宗室為匪之徒徐太司大以鋪屋轉賃煙館

均有不合著交宗人府刑部會同嚴訊照例懲辦其未獲夥犯常太任三祥三假冒宗室之岳三即岳湘韓瑞兒賊張九等著步軍統領衙門順天府五城一體嚴拏務獲歸案訊辦另片奏宗室住居外城匪徒畏官役查拏多串結宗室以為護符請飭禁止等語著宗人府嚴飭宗室遵照向例在內城居住除在京城外瑩地居住者仍從其舊外不得寄居前三門外南城地面並著五城御史會同

營汛認真稽查儻有匪徒假冒宗室藉勢訛詐情事即行拏究○諭軍機大臣等喬松年奏黃河工程喫重請添撥乙亥年防險銀兩一摺黃河南北兩岸各廳應需料物必須豫為儲備喬松年請添撥銀二十六萬兩分發南岸各廳銀十四萬兩北岸各廳銀十二萬兩著照所請即由錢鼎銘督飭藩司如數添撥務於年前先撥四成其餘六成俟來歲春汛續撥以應要需喬松年當督飭道廳等嚴

實動用總期工堅料實不得稍涉虛糜喬松年另片奏上南等廳本年搶辦險工那墊料物銀兩請飭籌撥等語著錢鼎銘飭令藩司籌撥銀四萬兩年前先撥五成其餘五成來春同額款銀兩一併解清毋稍延緩將此由四百里各諭令知之○以吏部尚書英桂兼署兵部尚書吏部左侍郎彭久餘兼署兵部右侍郎戶部右侍郎溫葆深兼署刑部右侍郎兵部左侍郎崇厚兼署戶部右侍郎管錢

法堂事。○以鑲黃旗蒙古副都統尚宗瑞署鑲白旗護軍統領鑲黃旗滿洲副都統克興阿署正白旗漢軍副都統。○丙辰諭內閣兵部奏遵議提督失察在逃逆犯處分一摺。湖南提督馬如龍於逆犯張兆綬改名張瑞臣潛隨來京。未能覺察。實屬咎無可辭。馬如龍著照部議革職留任。○諭軍機大臣等。喬松年奏請撥運河各廳乙亥年另案工程銀兩一摺。運河各廳應修埽壩等項工程。及泃河

捕河應行修濬處所。需款甚亟。自宜先為籌備。以利漕行。著丁寶楨飭令藩司籌撥運泃。捕上下泉六廳另案工程銀六萬兩。解交喬松年應用。並著喬松年督飭道廳各員。迅將運河各屬應辦事宜。擇要撙節估辦。毋稍虛糜。另片奏請飭催欠解銀兩等語。上年山東奉撥運河各廳另案工需銀六萬兩。僅解過銀三萬兩。著丁寶楨飭令藩司。即將上年奉撥欠解銀三萬兩。同此次請撥乙亥年另案

工需一併撥發。毋再短欠。將此由四百里各諭令知之。○又諭丁寶楨奏前因貴州籌辦善後事宜。借撥山東銀二十萬兩。由四川廣東江西湖北浙江五省分還歸款。現已撥解過貴州銀十八萬兩。下餘二萬兩。現籌措解。刻下山東籌辦河工及撫恤等項。需款甚殷。而五省應還之款。絲毫未解。請旨飭催等語。此項銀兩。原係由山東借撥之項。各省亟宜及早歸還。以清款目。著李瀚章翁同龢吳棠

張兆棟劉坤一楊昌濬各飭該省藩司。將應解還黔省借撥山東銀各四萬兩。迅速如數撥還山東。以應急需。毋稍延緩。將此由四百里各諭令知之。○蠲緩山東荷澤鄆城濮嘉祥濟甯鉅野范壽張齊東長清東平惠民濱鄒滕嶧汶上陽穀曹觀城聊城金鄉魚臺鄒平齊河臨邑東阿蒲臺滋陽甯陽定陶茌平莘館陶夏津博興樂安海豐臨清厯城章邱長山新城濟陽禹城陵德德平平原肥

城。平陰陽信樂陵商河利津泗水城武曲阜單堂邑博平清平冠高唐邱武城霑化蘭山昌邑七十州縣暨德州東昌臨清濟甯西衛東平所永阜場被水被旱被風被雹地方新舊額賦並各項租課有差。○蠲緩湖南武陵安鄉龍陽華容沅江益陽湘陰澧邑陵九州縣暨岳州衛被水被旱地方新舊額賦。○戊午諭內閣侍郎何廷謙奏遵查專案工程請派員承修一摺所有

裕陵

聖德神功碑亭等工著派本年承修專案工程之大臣魁齡榮祿一併敬謹承修。○以鑲紅旗漢軍副都統岳林為鑲紅旗護軍統領工部右侍郎訥仁兼正黃旗蒙古副都統。○己未諭軍機大臣等戶部奏豫撥來年京餉一摺據稱歷屆京餉均於年前豫撥同治十四年京餉擬在各省地丁鹽課關稅等項內指撥銀七百萬兩請飭各該省於來年分批起

解等語。京餉關係緊要現經該部就各省緩急情形斟酌動撥自應遵照奏定數目源源報解以濟要需著該督撫將軍鹽政監督等務於來年開印後分批起解限五月前解到一半十二月初間全數解清不准截留改撥藉詞延誤儻局限不到即照奏定章程指名嚴叅原單著分別摘鈔給閱看另摺奏歷年積欠京餉自上年奏催同治九十十一等年欠餉後截至現在止兩淮鹽課鹽釐尚欠解

九年京餉十六萬兩十年京餉十二萬兩十一年京餉十五萬兩山西地丁尚欠解十年京餉二十萬兩十一年京餉十萬兩同治十二年京餉內山西地丁欠解十五萬兩兩淮鹽課鹽釐欠解十五萬兩九江關洋稅欠解五萬一千餘兩天津關常洋兩稅欠解十萬九千餘兩刻下部庫異常支絀若不催解陳欠京餉則該部放款實有支應不及之虞請飭趕緊補解等語著各該省督撫督飭藩運

兩司。九江天津兩關監督各將前項欠解京餉迅速補解。均限十四年五月以前如數解清。儻敢飾詞諉卸。仍前延欠。卽著該部指名嚴叅。其同治八年以前歷年積欠京餉。並著查照戶部上年奏案。陸續籌補。以清欠款。又片奏內務府同治十四年分應需經費。擬撥兩淮鹽課銀五萬兩。兩浙鹽課銀五萬兩。廣東鹽課銀五萬兩。福建茶稅銀十萬兩。閩海關常稅銀十萬兩。太平關常稅銀十萬兩。九江關常稅銀十五萬兩。共銀六十萬兩。請飭依限完解等語。著該督撫將軍鹽政監督等務於來年開印後。陸續徑解內務府交納。先將起程日期報部。仍限六月前解到一半。十二月初間埽數解清。不准稍有帶欠。將此由五百里諭知福州將軍直隸兩江湖廣閩浙兩廣四川江蘇安徽江西福建浙江湖北湖南河南山東山西廣東各督撫。並傳諭粵海關監督知之。○又諭前因杜嘎爾等奏防軍

月餉欠解甚鉅。請由部庫借撥銀兩。當令戶部議奏。茲據奏稱。部庫窘迫情形。岌岌可慮。實難輕議外撥。該將軍等請由部庫暫行借撥銀二十萬兩之處。著毋庸議。惟烏城士卒防邊極苦。應領餉需。實屬萬不可緩。山東山西河南自本年正月起至十月止。三省共欠解該城月餉二十五萬兩。請飭趕解等語。著丁寶楨鮑源深錢鼎銘迅將積欠烏城月餉趕緊籌款。限於年內解齊。至十月以後月餉並著該撫等源源起解。毋再遲延。儻仍前玩泄。卽由該將軍等指名嚴叅。以重防務。將此由五百里各諭令知之。○又諭載遷等奏永濟倉挽運兵米。辦理竭蹶。請由直隸藩庫撥款一摺。據稱永濟倉領運兵米腳價不敷。前經載遷等奏請添撥款項。經部議由永濟庫撥發。近來永濟庫款支絀無項可籌。請飭直隸籌撥等語。卽著李鴻章督飭藩司。無論何款撥給銀五千七百兩。由載遷等派員領取。

以濟兵食。將此諭令知之。○又諭文煜奏臺防要需及撥給日本國費項。那動四成洋稅一摺。臺防關繫緊要。文煜因無款可籌。先後那移四成銀二十八萬兩。出於萬不得已。亦係實在情形。該將軍自請交部議處之處。著加恩寬免。此係解部要款。嗣後不得擅自通那。以重庫儲。至六成洋稅。入不敷出。文煜所陳雷正綰月餉及船政經費。均無款可撥。應如何籌畫之處。著戶部議奏。將此諭知戶部。

並諭令文煜知之。○又諭文麟等奏飭派纏頭接護伯錫爾福晉回哈一摺。伯錫爾福晉上年被逆匪擄至七克騰木。經安集延南路夷目怕夏搶出。安置布古爾地方。該福晉轉徙流離。殊堪矜念。怕夏投遞文檔。據稱俟奉到哈密大臣印諭。即將該福晉送回。其為去逆效順。已可概見。文麟等現今回王邁哈默特選派頭目前往該處。即著將伯錫爾福晉妥速接護回哈。毋令失所。該怕夏果能率領

南路各城夷人翻然來歸。再將吐魯番城池獻出。朝廷自必加以恩典。著文麟等開誠曉諭。設法招徠。以裨大局。該大臣等接到怕夏回文。即著迅速具奏。將此由五百里各諭令知之。○以營求差使革盛京員外郎福興職。○以四川勦平我邊蠻匪並防勦逆回出力。賞提督劉道宗總兵官李忠楷。一品封典。提督李有恆黃馬褂。知府王樹漢參將德綬等。花翎知縣繆延祺等。藍翎餘加銜升敘有差。

○予四川軍營病故提督陳希祥祭葬卹廕。○追予浙江杭州等處殉難知縣劉玉衡等暨紳民婦女四百八十員名口分別旌卹如例。○蠲緩江蘇沐陽句容上元江甯溧水高淳江浦六合江都山陽阜甯清河桃源安東鹽城高郵泰東臺甘泉儀徵興化寶應銅山豐沛蕭陽山邳宿遷睢甯海贛榆通如皋泰興海門三十六廳州縣暨淮安大河揚州徐州四衛被旱被水地方新舊額賦有差。○癸

亥。以江蘇蘇松太道沈秉成為河南按察使。

○補鑄杭州駐防鑲黃正黃正藍旗滿洲各

佐領條記從將軍連成等請也。○甲子諭軍

機大臣等前因石莊戶決口亟須堵築。當經

諭令丁寶楨及時趕辦。並諭戶部照該撫原

請之數指撥有著款項以資工需。茲據丁寶

楨奏查勘石莊戶決口現難施工擬在迤下

之賈莊建壩堵合。即於南北岸普築長隄惟

查濮州為北岸之上游而濮州之上游又在

開州。請飭直隸一律趕辦等語。此項工程關

繫數省地方自當不分畛域通力合作趕籌

辦理。即著丁寶楨籌備料物督飭在事各員

及早興工以冀剋期蒞事。其直隸境內應行

築隄之處並著李鴻章督飭該地方官妥速

籌辦。俾南北兩岸悉臻完固。至應需工程款據

丁寶楨奏除部撥一百五十萬兩外尚不敷

銀一百二三十萬兩。著准於山東藩運兩司

及糧道各庫臨清東海兩關隨時通融那用。

以濟要需。該撫務當嚴飭在事人員認真辦

理。儻有浮冒因循致誤要工者。即行從嚴叅

辦。如能辦理迅速工程完固。准由丁寶楨奏

請獎敘。原摺著鈔給李鴻章閱看。將此由四

百里各諭令知之。○以

慈禧端佑康頤皇太后四旬聖壽。錫類推恩。賞

廣東巡撫張兆棟。母宋氏。扁額曰懿。架頤齡。

廣西右江鎮總兵官周盛傳。母栗氏。扁額曰

恩。承燕喜。並賞文綺珍玩。○山東巡撫丁寶

楨奏請調刑部郎中文天駿。湖北候補道張

蔭桓。差遣委用。允之。○乙丑。諭內閣。豐紳等

奏侍衛那斯琿之母年老無人侍奉。請將該

員開缺留籍另補等語。乾清門二等侍衛那

斯琿著准其開缺。以本省相當之缺對品補

用。○諭軍機大臣等。給事中郭從矩奏本年

黃河溜勢南趨。由東境下注江境。運河為黃

水所侵。於漕運恐多窒礙。請飭將江北徐淮

揚等屬運道隄工履勘覈實興修等語。著李

宗義文彬按照該給事中所奏體察情形悉心會商妥籌具奏原摺均著鈔給閱看將此各諭令知之○又諭御史許廷桂奏辦理河務亟須豫籌鉅款請於淮南票鹽添引二百張每張收銀六千兩儘數赴解河工以應要需等語淮南鹽務增添引票商情是否樂從鹽引能否暢銷有無流弊之處著李宗義體察情形詳悉妥議具奏原片著鈔給閱看將此諭令知之○丙寅以京畿雪澤愆期命恭

親王奕訢詣

大高殿恭代祈禱行禮○遣惇親王奕誼詣

時應宮醇親王奕譞詣

昭顯廟孚郡王奕誨詣

宣仁廟惠郡王奕詳詣

凝和廟拈香○諭軍機大臣等有人奏房山

縣知縣於本年十月間將城鄉糧店全行封

禁傳鋪戶人等勒令充當糧行領帖納課門

丁高三屬令鋪戶出銀一千兩許為撤回封

條請飭查辦等語著順天府直隸總督查明所叅該知縣藉端索財有妨民食各節是否屬實即行具奏原摺均著鈔給閱看將此諭知順天府並諭令李鴻章知之○閩浙總督李鶴年等奏報甯德縣風災擊沈巡船連江縣水災衝塌城垣得旨所有被災地方著飭該管官加意拊循毋令失所○以候補內閣學士翁同龢為內閣學士兼禮部侍郎銜○以正白旗漢軍副都統玉亮署鑲白旗滿洲副都統○撫恤琉球國遭風難夷如例○丁卯予雲南緬甯殉難七品軍功歐陽德元等四十八名賞卹加等

大清穆宗繼天開運受中居正保大定功聖智
誠孝信敏恭寬毅皇帝實錄卷之三百七十三

實錄卷之三百七十三

十三

大清穆宗繼天開運受中居正保大定功聖智
誠孝信敏恭寬毅皇帝實錄卷之三百七十四

敕修

同治十三年甲戌十二月庚午朔○辛未諭

內閣岑毓英奏遵查通省荒熟田地酌擬應徵應減錢糧成數一摺據稱上年錢糧仍係儘收儘解開支軍餉本年委員分投丈量按畝估計成數已種田畝自九成至五六成不等荒蕪田畝自一成至四五成不等請分別徵收減免等語雲南甫就肅清流亡未集田畝半屬荒蕪若將應徵錢糧照常徵收民力實有未逮加恩著照所請即自同治十三年起予限十年將滇省各屬錢糧按照此次清

查已種田畝成數。分別徵收。其荒蕪田地。各按成數。將應納錢糧。暫行蠲免。以蘇民困。俟十年限滿。百姓元氣稍復。荒蕪盡行開墾。再照舊額徵收。該督撫卽刊刻謄黃。徧行曉諭。務使實惠均霑。毋任吏胥舞弊。用副朕軫念民艱至意。○吏部以大學士寶璽。應定何殿閣。請得旨。李鴻章著授為文華殿大學士。文祥著授為武英殿大學士。寶璽著授為體仁閣大學士。○壬申陝甘總督左宗棠。奏甘肅

補行計典。未滿一年。本年大計。請展至下屆併案辦理。從之。○以循聲卓著。予故廣東鹽運使鍾謙鈞。交國史館立傳。○癸酉。以遺愛在民。予故四川彭山縣知縣升任道員蹇閻。建立專祠。○追予四川各屬陣亡殉難紳團。宛象賢等暨婦女七百三十六名口。分別旌卹如例。○甲戌。

上疾增劇。諭內閣李宗義。奏甄別現任道員。請旨降補一摺。江南鹽巡道鄧裕功。頗有嗜

好。不知振作。著以同知降補歸部銓選。以肅官方。○諭軍機大臣等。文煜等奏查明新聞紙。刊刻密件之陳言。已往香港。請飭查拏一摺。陳言卽陳靄亭。係廣東新會縣人。經文煜等查明。於八月間由臺灣內渡。已回香港。事關漏洩機密要件。亟應查訊明確。以期水落石出。著張兆棟密飭所屬。將陳言卽陳靄亭設法查拏解訊。從嚴懲辦。原摺著鈔給張兆棟閱看。將此由四百里各密諭知之。○兩江

總督李宗義等奏。淮揚水勢甚大。運道艱阻。擬將來年江北漕米。改辦海運一次。從之。○兩江總督李宗義因病解職。以江西巡撫劉坤一署兩江總督。江西布政使劉秉璋署巡撫。

上疾大漸。○酉刻。崩於養心殿東暖閣。

慈安端裕康慶皇太后

慈禧端佑康頤皇太后御養心殿西暖閣。召惇親王奕訢。恭親王奕訢。醇親王奕譞。孚郡王

奕謨惠郡王奕詳貝勒載治載澂。公奕謨御前大臣伯彥訥謨祜奕劻。景壽軍機大臣寶鋆。沈桂芬。李鴻藻。總管內務府大臣英桂。崇綸。魁齡。榮祿。明善。貴寶。文錫。弘德殿行走徐桐。翁同龢。王慶祺。南書房行走黃鈺。潘祖蔭。孫詒經。徐郃。張家驥。入欽奉。

懿旨醇親王奕譞之子載灃著承繼

文宗顯皇帝為子入承大統為嗣皇帝○奉

大行皇帝遺詔曰朕蒙

皇考文宗顯皇帝覆載隆恩付畀神器冲齡踐

阼寅紹丕基臨御以來仰蒙兩宮

皇太后垂簾聽政宵旰憂勞嗣奉

懿旨命朕親裁大政仰維

列聖家法一以敬

天法

祖勤政愛民為本自維薄德敢不朝乾夕惕惟

日孜孜十餘年來稟承

慈訓勤求上理雖幸官軍所至粵捻各逆次第

削平滇黔關隴苗匪回匪分別勦撫俱臻安靖而兵燹之餘吾民瘡痍未復每一念及寤寐難安各直省遇有水旱偏災凡疆臣請蠲請賑無不立沛恩施深宮兢惕之懷當為中外臣民所共見朕體氣素強本年十一月適出天祇加意調攝乃邇日以來元氣日虧以致彌留不起豈非天乎顧念統緒至重亟宜傳付得人茲欽奉兩宮

皇太后懿旨醇親王奕譞之子載灃著承繼

文宗顯皇帝為子入承大統為嗣皇帝特諭嗣

皇帝仁孝聰明必能欽承付託

天生民而立之君使司牧之惟日矢憂勤惕勵

於以知人安民永保我不丕基並孝養兩宮

皇太后仰慰

慈懷兼顧中外文武臣僚共矢公忠各勤厥職

用輔嗣皇帝邅隆之治則朕懷藉慰矣喪服

仍依舊制二十七日而除布告天下咸使聞

知○乙亥未刻大殮畢奉安

梓宮於乾清宮。○庚寅奉移

梓宮於觀德殿。○光緒元年二月戊子寅刻。

皇后阿魯特氏崩。○庚寅定

萬年福地於

雙山峪。修建

山陵。○甲午奉移

大行皇后梓宮於永思殿。○三月己亥恭上

大行皇帝尊諡曰

繼天開運受中居正保大定功聖智誠孝信敏

恭寬毅皇帝。

廟號

穆宗。○五月戊申恭上

大行皇后尊諡曰

孝哲嘉順淑慎賢明憲天彰聖毅皇后。○九月

辛亥奉移

穆宗毅皇帝梓宮。暨

孝哲毅皇后梓宮。暫安隆福寺行宮。派王大臣

輪班敬謹守護。○光緒五年三月庚午卯時。

葬

惠陵。○

上在位十三年

聖壽十有九

上誕膺

寶命。臨御萬邦。荷

昊穹眷佑之隆。嗣

列聖詒謀之遠。

沖齡踐阼。蒙兩宮

皇太后垂簾聽政。時四方多事。

上祇承

慈誨

垂拱無為。而

天與人歸。不數年閒。削平大憝。

親政後宵衣旰食。網舉目張。庶事用康。八方底

定。懿歟盛哉。洵

天生敦敏。徇齊之主。上符元會。下濟烝民。用是

海宇蕩平。中外懾服。邇安遠至。萬國輸誠。

駿烈鴻猷為千古罕觀之隆軌也。臣等職司制

輯。自辛酉七月迄甲戌十二月。釐為書三百

七十四卷。敬舉數端附識簡末。雖未足揄揚

於萬一。亦以宣

上德而抒下情云爾。一曰敬

天。惟

天。作

聖。惟

聖。憲

天。

上統業為心。默乎

蒼緯。故能幹旋氣運。感召祥和。每逢春

祈夏

雩

圖丘

方澤諸大祀。

深宮齋戒。必敬必誠。癸酉冬至。親詣

南郊特攄

宸翰。有欽承

慈訓光

前烈。重荷仔肩。惕藐躬之句。仰見

宸衷寅畏。顧諟時深。其或暘雨偶愆。禱祈維謹。

祥霽甘澍。有感斯通。惟

念切民依。故

德動

天鑒也。當捷奏頻傳。潢池永靖。敬告

天。

地歡洽。神人聿昭

篤祐之庥。彌抱持盈之懼。他若薦馨

方社。望秩山川。肝鬢豐融。幽明一貫。凡羣祀百

靈之助順者。靡不錫題賜號。崇德報功。則皆

本旦明昭事之忱。推而廣之者也。一曰法

祖。我

朝顯庸創制。垂三百年。

聖謨洋洋。規為大備。

上奉

任如之教事事恪循

祖訓率由舊章

御極之初雖未躬攬幾務而

太廟祭享必於前期親詣內外宮殿供奉

神御之所歲時展拜備極敬恭若夫講學親師

則同符

聖祖戡亂致治則克迪

前光繼業延洪通追

先德已歲在癸甲祇謁

東

西陵瞻弓劍於

橋山觀釋琇於汴水愴聞僣見悽愴瞻依蓋篤

永思繼

丕緒也由是懿親可大任而倚畀必專尊行則

不名而臨拜胥免分府則厚賚而誼重親親

賜奠則躬臨而禮隆長賞延於世不以子

孫之罪掩功罰及其身不以宗室之情廢法

至於訓騎射重國書又皆

堂構克承勿替引之者也且夫萬幾之紛一勤

胥理

上六齡嗣服仰賴

思齊之化俯聽謹議之陳

舜知益宏

堯聰日擴聞水旱盜賊之警則宴逸常懲視經

營規畫之方則機宜洞悉洎乎

親裁大政批答章奏引對臣工剖決如流先勞

罔倦固由

天行之不息實法

地道之永貞綜計十三年中訓飭疆圉勉勵將

士延攬耆碩寵擢循良教養兼籌恩威並布

四維既舉百度咸貞於是勤轉漕以實京倉

籌度支以裕國用廣屯墾以開榛棘嚴法令

以靖萑苻誅宦寺之行私則宮掖不干朝政

獎遠人之慕義則蕃部悉被

恩膏牧令則甄別時行而官邪必斥輿臺則名

器弗假而流品必分至若立界牌議條約製

機器興船政通商西域遣使重洋或創或因

經權悉協要皆

黼座之精神所彌綸而周浹也

上之勤政有如此者政在養民民先足食減東

南之額賦永沐

皇仁拯兵燹之遺黎必周實惠近而京畿設廠

賁廉頻施遠而各省蠲租捍災是亟

建元之始免天下錢糧以千萬計暨

造船親迎之歲

綵衣介

壽之年三沛

恩綸悉除逋賦普天率土稽首臚歡然猶慮被

擾之區無以生聚也為之築城堡以衛身家

濬湖河以備旱潦裁釐卡以暢行旅免米捐

以恤商農發內帑截歲漕以賑飢而生者蒙

福瘞枯骨禁火葬以厚俗而歿者銜恩決囚

每予於全減死者無慮千百斷獄必求詳審

覆讞者至於再三凡茲惠閭之施悉稟

徽柔之德

上之愛民有如此者

上勝衣就傳穎悟軼倫嗣奉

懿旨讀書弘德殿選擇儒臣講解大學衍義淹

貫歷代諸書稽治法於唐虞接心源於孔孟

以古為鑑與日俱新

天藻輝煌裒然成集其發明經義與評論史事

諸作詞嚴義正精確不磨用能嘉惠士林昌

明正學修曲阜

文廟而聖道尊葺各省黌宮而儒術重加廣

學額中額而士氣振增祀先賢先儒而潛德

彰勛實學於詞林登優行於廷試整太學課

士之規申教職曠官之戒興廉舉孝旌節褒

忠炳炳麟麟同風三代矣猶復嚴磨勘以絕

傲幸添號舍以廣控羅益邊徼之泮林復駐

防之鄉試設鐫書局於直省創同文館於上

都恩榜一開正科四舉人才薈萃多士奮興

則文德之誕敷者宏也

國家承平日久。奸宄潛萌。會匪起於粵西。捻氛擾及河朔。先後二十年。蔓延十餘省。

文宗顯皇帝屢興赫怒之師。未竟

觀成之志。

上矩循

坤厚。運際乾元。捷伐大張。威棱遠播。灌金陵之窟穴。埽中土之烽煙。克江浙而勢如破竹。平潁毫而燄熄頑苗。殲渠魁於豫蜀之間。殄餘孽於晉秦之界。皖鄂之干戈既戢。閩甌之氛

稊俱銷。遂乃飲至策勳。論功行賞。稱觴

璇室而

文母多欣薦。罕

珠邱而

先靈大慰。既而黔滇靜謐。關隴廓清。緬甸之象遙來。越南之使踵至。然且圖治未亂。保邦未危。命重臣周視水師。飭疆吏嚴申軍令。防河防海。疊布諭辭。旗營綠營。一新壁壘。肄武南苑。訓士卒以知方。遣帥新疆。復版圖以闢宇。

自非

神謀燭遠。

天策揚威。安能雷動風行。若是乎。海外諸國。啟釁則易。服教為難。

上宏施覆。疇之仁。務協羈縻之義。彼狡焉思逞者。亦皆化其梟桀。就我範圍。瞻觀

天威。且至股票也。則武功之震疊者遠也。夫欽天道。繩

祖武。茂典也。飭庶政。誠萬民。豐規也。經文緯武。

卓哉煌煌神明之式也。而仰窺

純孝之性。恭儉之德。與夫用人謀治之方。則又絢繹之而莫能盡焉。粵自諒陰卽位。孺慕益

深。居戚倚廬。竭哀盡敬。遂遵

懿教。奉

靈輦。歸自灤陽。重光

大業。厥後

定陵敷土。展禮將虔。誠孝之思。達乎幽漠。以天下養。悅

慈母心。侍膳問安。寒暑無間。良辰上壽。則娛

志於宮闈。蹕路隨行。則承

歡於行殿。婚禮成而

后妃奉。畢喜洽一堂。慶典舉而

聖母延釐。

恩覃九土。

徽稱三上。

懿範永昭。洵

帝者之上儀。

皇家之景福。已至於封

先朝之嬪御。晉懿戚以公侯。敦本睦婣。推仁錫

類。夫是以

孝治懋而天下咸知有尊親也。移俗易風。敦崇

節儉。斥邪言之騷擾。儆內府之繁奢。宗室治

遊。懲其偏錯。藩臣宴樂。罰其怠荒。

大婚為典禮攸關。命無糜費。陪都為根本所繫。

諭戒浮華。方物宜貢而暫停。鉅工雖興而復

輟。不獻俘以夸功烈。不加賦以益度支。不矜

禾麥之祥。豐年為寶。不侈日星之瑞。實事是

求。蓋澹定本性。生樸素承

家法。不僅以餉糈支絀。時事艱難。而為是表揚

謙戒。逸豫也。進退臣工。知人則哲。跋扈者明

正典刑。阿附者立予罷斥。喪師失律者必誅。

捏功諱敗者。毋赦。然而嚴以戮罪。未嘗不寬

以用才。觀夫滌前愆。宥小過。拔勇士。擢謀臣。

予投誠以自新。釋脅從而罔治。外則命元老

以專節鉞。內則任親臣以統神機。勳高者置

之台衡。績懋者加以世職。頒爵重元戎之賞。

易名隆異數之恩。宣史館以著忠勤。給勇號

以昭果銳。錄戰功而封其先世。妥毅魄而官

其後人。所以鼓舞賢才。恢復疆宇者。胥是道

也。軍務方殷。

廟謨盡善。或飭募勇以助兵。或獎練團以拒寇。

戎機所繫。芻蕘亦許敷陳。軍餉雖繁。州縣仍

懲苛派。逮乎輜戈解甲。善後尤難。撤營勇則

防其驕騷。撥餘黨則慮其潛匿。裁協餉以紓

其籌措行保甲以密其邏巡勸農桑行補助所以敦本也祛奇袤遏僭侈所以節流也舉閭修勉績學所以尚德也賞平反禁私押所以省刑也河運與海運兼行而利還防弊回民與漢民一視而莠亦為良報墾升科治行邊塞讀書入監化及外臣億萬年之方略長垂。

六七作之聲靈丕紹方且扇巍顯翼甄殷陶周駕兩漢而上之視三唐而蔑如矣宜乎大德

必得壽無逸則永年遠符耄期之聖人上媲古稀之

天子而乃天花甫謝

聖體違和遽棄臣民莫攀


龍馭一時坎埏赤子呶滋蒼生衢謠壤擊之倫棧嶂航瀛之侶莫不痛失怙恃奔走號呼於此見人心之感戴者深而

至仁大孝俊德豐功之震方區而淪肌髓者非一日也繼自今金匱石室式煥宏謨方策留

貽永永無極大哉

聖乎傳所謂博厚配地高明配天悠久無疆者意在斯乎意在斯乎

大清穆宗繼天開運受中居正保大定功聖智誠孝信敏恭寬毅皇帝實錄卷之三百七十四



統一書號:11018·1355—51

定 價: 45.00 元